

YISASINI KAMA VAYA



The New Testament in the Agarabi language of Papua New
Guinea

YISASINI KAMA VAYA
The New Testament in the Agarabi language of Papua New Guinea
Nupela Testamen long tokples Agarabi long Niugini

Copyright © 2010 The Bible Society of Papua New Guinea

Language: Agarabi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2013-01-07

PDF generated using Haiola and XeLaTeX on 11 Nov 2022 from source files dated 22 Nov 2019
105c264e-e2fa-503a-9726-8b662c09b700

Contents

Matiu	1
Maki	58
Ruku	92
Yoni	151
Aposeri	192
Romu	244
1 Korini	270
2 Korini	294
Karesia	309
Efesasi	318
Firipaí	327
Korosi	333
1 Tesaronika	339
2 Tesaronika	345
1 Timoti	348
2 Timoti	356
Taitasi	361
Firimoni	365
Iburu	367
Yemisi	386
1 Pita	393
2 Pita	401
1 Yoni	406
2 Yoni	413
3 Yoni	415
Yuti	417
Revaresen	420

MATIUNI KAMA VAYA (Matiu) Matiuni Kama Vaya Ma Uvanteí Pákenai Afova Vaya Ino

Ma vompon ma uvantein banta ino.
Yisas Karaisini Kama Vaya ma varen
orin banta (aposeri) Matiu anon uvan-
ten mino. Beni ena ví Revi ino.

Uvarein orana ino.
AD eiti (80) ráké eiti-faipi (85) fin mi ma
vompon uvanten minon ten kokhon
afova vanta kayo ano inikhen mifo
inká ena kéká ano AD sikisti (60) ráké
seventi (70) fin minon ten inikhen
mino.

Ma vompon ma uvantein baru ino.
Parestaini san ma Kantasí Ukhein Bara
e ma siyainpin mino.

*Ma vompon ma uvaman amikhein kéká
ino.*
Yutan anan kékái uvaman amiyáken
betimpin ma monó nanin banta vain
mi moéken tiamikhen mino.

*Nái ana vará ma vompon uvanten
nafino.*
Yutan kayoi anafu aráompin ma
sakhanampa vaya siáden ma varará
nanin banta ma aya uren evaránen
avirano van ma Tiyarafenu ano aní
ukharé ein mai vantán Yisasi vákan
mí véin maman dákó uren Kin ne
sinten mino.

Yisasin Anafu Aráo (Ruku 3:23-38)

¹ Yisas Karaisi maen Abaraamun nú Kin
Devitin núí anan pintéi afoká ukhan mi
ma ven anafuyan aví ino.*

² Abaraamu maen Aisakin kain baren
Aisaki ano Yekopun kaúdan
Yekopu ano Yudan má be afá aváeyan
má kaen mino.

³ Yuda maen Peresin nú Seran nú afóe
ifo míkan iyampon anóe maen Tamari
ino. Peresi ano Esronin kain baren
Esroni ano Ramun kaen mino.*

⁴ Ramu ano Aminadapin kain baren
Aminadapi ano Nasonin kaúdan Na-
soni ano Sarmonin kaen mino.

⁵* Sarmoni maen Boasin afóe ifo ve anóe
maen Reapi ino. Boasi maen Obetin
afóe ifo ve anóe maen Ruti ino. Obeti
ano Yesin kaúdan,

⁶ inká Yesi ano Kin Devitin kaen mino.
Deviti maen Soromonin afoén bakan
be anóe maen Uraiyan aná ma varé
ein nanin mino.*

⁷ Soromoni ano Reoboamin kain baren
Reoboami ano Abiyan kaúdan Abiya
ano Asan kaen mino.

⁸ Asa ano Yeosafatin kain baren
Yeosafati ano Yeoramin kaúdan
Yeorami ano Usaiyan kaen mino.

⁹ Usaiya ano Yotamun kain baren
Yotamu ano Easin kaúdan Easi ano
Esékaiyan kaen mino.

¹⁰ Esékaiya ano Manasen kain baren
Manase ano Amonin kaúdan
Amoni* ano Yosaiyan mo khauran,

¹¹* inká Yosaiya ano Yekonaiyan* má
be afá kayo vá kauran mi Babironí
barafá karavusi e fáken oren mino.

¹²* Karavusi e fáken moran mai oy-
ampáké Yekonaiya ano Seatierin kaúdan
Seantieri ano Serubaberin kaen mino.

¹³ Serubaberi ano Abiudin kain baren
Abiudi ano Eriakimin kaúdan
Eriakimi ano Asorin kaen mino.

¹⁴ Asori ano Sadókin kain baren
Sadóki ano Akimin kaúdan
Akimi ano Eriutin kaen mino.

¹⁵ Eriuti ano Eriasarín kain baren
Eriasari ano Matanin kaúdan
Matani ano Yekopun kaúdan maen,

¹⁶ inká Yekopu ano Marian avafu
Yosepin kaen mino. Maria anoi
Tiyarafenu ano ma aní ukhein banta
e sen ma ariyain banta Yisasin kaen
mino.

¹⁷ Máan tukhan Abaraamun táké
Devitimpin onóben Devitin táké Babironí
ma karavusi fáken o varé ein damú
onóben mai ráké Tiyarafenu ano ma

* **1:1:** Esé 22:18; 1Kr 17:11 * **1:3:** Esé 38:29-30; Rut 4:18-22 * **1:5:** Rut 4:13-17 * **1:6:** 2Sa 12:24 * **1:10:**
Amonini ena ví Amosi ino. 1Ki 3:14 fin ná onano. * **1:11:** 2Ki 22-24; 2Kr 36:10; Yer 27:20 * **1:11:** Yekoniani
ena ví Yeiakini ino. 2Ki 24:6 fin ná onano. * **1:12:** Esr 3:2

aní ukhein banta Yisasintá ma o khañáí ukhein mai fotini (14) afóeyan mi mai aúbaná me yákó urú ukhen mino.

Tiyarafenu Ano Ma Aní Ukhein Banta Yisasi Ma Ve Anóe Ano Kaein Baya Ino (Ruku 2:1-7)

18 Máan tukhan Tiyarafenu ano ma aní ukhein banta Yisasin ma ve anóe ano kaein mai máan mi ukhen mino. Be anóe Maria maen Yosepin amiran bákan ínaimpáké iman amintéin Kantá Aunan mano véin arápin iyampon báuantan baréin Yosepi iniren afová en mino.*
19 Afová uren mai van be avafu Yosepi maen puntákein banta váken banasi avorá Marian ída ayave ameno van aúpáké bei inimpin mai ma véin iman ameno van iyaré ein ífá ono van en mino.

20 Máan inin béi variyan baré íkan Bafani enisori ano véi vaintá kaimpin dákó uven temí, “Devitin anin Yosepi oe, éin ma Marian iman ameno van iyain ída vá ífá ono. Para vara seyo, mai ma véin amúpin báken ma yákó ono van iyain iyampon mai Kantá Aunani ákona anon mai yaná afoká ukhen mino. 21 Béi afon iyampon mi kainten mifo Yisasin* ne se vá ben aví teno. Para vara seyo, véi anon bei vanasi ume fintena aya uren evaránen aviranten mino.”*

22 Mai yanasinta ma yákó ein manon pura sen Bafan mano ma sakhanampa vanta finté uaren ma máa sikhare ein mi kanaíen mino. 23 “Mana arinta ano amúbasí uven mana afon iyampon kaúdantin maen Imanuerin ne sinten mino.” *Ais 7:14*
Mai víi ana maen Tiyarafenu setin má ban mino.

24 Mai khain ma Yosepi ódaren maen orun mantaven mai ma Bafani enisori ano ma véin tiamein anain bákuren Marian o aviren me ve anasí en mino. 25 Be anasí ma ukhan maen béi ída ven má manafin baranton nentá bákan baren mana afon iyampon káudan béi ano Yisasi ne sen aví ten mino.*

2

Ofu Ma Afova Varan Banta Kayo Ano Ma Ena Vara Fáké Erein Baya Ino

1 Yudiá barafin ma Eroti kiní ukhein damú Betariamú barufá Maria ano Yisasin kain bákan áau e uní páké manáa afova vanta kéká ano Yerusaremí barurá eriven 2 máa sen inaemí, “Mana iyampon ma Yutan kayoi kin afoká ukhein mai intefasá ban nafino. Tetí ankan áau e uní páké onékun béin ma aníin ofu édaví ódaréi ventá monó teno van eriyá tiféuno.”*

3 Máa sen ina íkan Erotin má minó Yerusaremí barurá ma varé ein nanin banta vá ano mai vaya iníden maen kokhon ineine en oreraen mino. 4 Máan tiyákan Eroti ano vanasii monó ánon banta vá man baya ma afová ukhein banta kayo vá aran e átaru uvin betí ankan inaemí, “Mai ma Tiyarafenu ano ma aní ukhein banta inte varurasá afoká intéin ná sakhanampa vanta kayo ano sikharen nafino.” 5 Máa síkan betí ankan evaránen béin tiamemí, “Béi Betariamú barurái Yudiá barafá afoká inten ne,” sikharen mino. Para vara seyo, sakhanampa vanta ano máa sen Tiyarafenui vompon dókifin uvantaren mino,

6 “Yudiá bara fintena varu Betariamú oe, Yudiá barafin ma aví bain baru kayoi oyampá éi ída va ono.

Mai fara vara seyo, éin pinté mana ánon banta e afoká uven maen béi anon tentí Isareri nanin bantai yafisiní inten mino.’”* *Mai 5:2*

7 Máa sen tiamin Eroti iníden áau e uní páké ma afova vanta kéká erikhá ein aúpáké aran béi vaintá eríkan mai ofu ma afoká ein damusan betí ankampin avovéen ina uren afova varen mino. 8 Afová uren betí ankan tiantan Betariamú oriyákan temí, “Tiretí ankan ore vá mai iyampon nan mo kamaeya yosire ma véin ódante vá ovaráne séin me sisimesirá ten má dere oresá mo ventá monó teno.”

9 Máa síkan betí ankan kini vaya iníden mairá me ampen oriyen maen mai ma áau e uní páké ma onein ofu ano vetin an uanten oriyaren mai iyampon ma vain namun amontá o kharemen mino. 10 O

* 1:18: Ruk 1:27, 35 * 1:21: Yisasin bí maen mai veni ana máan mi ukhen mino. Bafan mano vanasi aya intene ma siyain baya ino. * 1:21: Ruk 1:31; 2:21 * 1:25: Ruk 2:21 * 2:2: Nam 24:17 * 2:6: Yon 7:42

kharemíkan betí ankan mai ofu oniyáken moéken amusin en mino. ¹¹ Máan turen mai afova vanta kéká ano mai namumpin un pében onákan mai iyampon mano ve anóe Marian má baréin betí ankan mun aron kan durafúden barará mátimen mai iyampontá monó tiren betí unan máden oté uren kori vá kama auna iyain uveri vá irafin ma sádan kama aunka iyain uveri vá máden mai iyampon amusin amen mino.* ¹² Amiren bakháin Tiyarafenu ano kaimpin betí ankan tiamen ída vá evaráne Eroti vaintá orono síkan betí ankan iniren mai aa me ifá uren ena aa sáké betí varufá oren mino.

Yosepin Má Be Aná Akhá Bá Ma Isipí Barafá Karan Orein Baya Ino

¹³ Afova vanta kayo ma orivíkan maen Bafani enisori ano kaimpin Yosepin avorá afoká uven máa semí, “E mantaveya iyampon má be anóen má aviare Isipí karan ore o varé esí ma séi siamenuna yamusá ovaráneya ereno. Mai fara vara seyo, Eroti ano mai iyampon dosiré arono van iyan mino.” ¹⁴ Máa siran Yosepi e mantaaren iyampon má be anóen má aviaren mai inuran mana Isipí oren mino. ¹⁵ O van baren Eroti ma fúbíkan Bafan mano ma sakhanampa vanta oo ráké uaren tiyáken, “Isipíkenu se sanin aré uno,” ma síkhá ein baya fura sen afoká en mino. *Ose 11:1*

¹⁶ Eroti ma afová en áau e uní páke afova vanta kéká ano semi mákasen mino siren moéken aranan en mino. Máan turen afova vanta kéká ano ma siamiyan ofu ma afokáí oné tiferuna mai kan oranan orikhen mino ma síkhá ein nan bei aruvin banta kayo siantan Betari-amú baru akhempá ma kákan baru vá titó baru vá ma vain pimpá oriyáken kan orana aránaópá ma vain ain iyampon kayo máa minó aruan puren mino. ¹⁷ Minó ma yanasinta ma afoká ein mai Tiyarafenu anon sakhanampa vanta Yere-maiyan pinté uaren máa síkharéin mino:

¹⁸ “Ifí baya Ramá barufin inékun ifisana yariyan kákan arun bariyá iné uno.
Resori maen be akhafana van arunaná bariyan

ará kusiantan baya ma siyain ída inen mino.
Para va ino, minó iyampon mi fúan kípakhan mino.”* *Yer 31:15*

Yosepi Ma Ve Aná Akhá Bá Evaránen Nasaretí Barurá Orein Baya Ino

¹⁹ Eroti ma fúbin maen Bafani enisori ano kaimpin Yosepin avorá Isipí afoká uven máa sen ²⁰ béin tiamemí, “Éi e mantaveya iyampon má be anóen má aviare evaráne Isarerí barafá orono. Mai iyampon ma aruan purono van iyaré ein banta kayo inka furen mino.”

²¹ Máa síkan Yosepi esé ana e manten iyampon má be anóen má aviaren evaránen Isarerí barafá oren mino. ²² Oriven iníkan Erotin anin Arkerausi ano ve afóeni varu varen Yudiá kayoi kiní ukheimpin Yosepi mai akhempá orin nan péden mai ma ena khaimpin Tiyarafenu ano véin tiamikhá einí en Kariri varafá oren mino. ²³ Orein mano Nasaretí barurá o varen mino. Máan ma ein manon sakhanampa vanta kayo ano ma siyáken béin nan Nasaretí banta ino sen aranten mino ma síkhá ein pura sen afoká en mino.*

3

Monó Non Péantan Banta Yoni Ano Ma Yisasini Aa Uvídaen Puntáantein Baya Ino (Maki 1:2-8; Ruku 3:1-18; Yoni 1:19-28)

¹ Maí damú Yudiá barafá banta ída van kámápin monó non péantan banta Yoni afoká uven banasi monó baya máa sen tiamemí, ² “Tiretí ankan ará baerano. Inaru yafisin inka ádé erikhen mino.”*

³ Sakhanampa vanta Aisaiyan oorá Tiyarafenu ano Yonin nan mi máa síkharen mino,

“Banta ida van kámá bara fáké mana vanta ano oovaren máa siyan mino, ‘Bafani aa uvídeya

veni aa funtáantano.’ ” *Ais 40:3*

⁴ Yoni véi kameri ayo fóké uvaran au anamuñ uren kao au fóké amú anan uren báken panon má bonkampun anu vá niyaren mino.* ⁵ Yerusaremíke nanin banta vá Yudiá bara fáke nanin banta vá minó Yodaní non akhen páke nanin

* **2:11:** Íbo 72:10-15; Ais 60:6 * **2:18:** Esé 35:19 * **2:23:** Ais 11:1; 53:2; Ruk 2:39; Yon 1:45 * **3:2:** Mat 4:17; Mak 1:15 * **3:4:** 2Ki 1:8

banta vá ano vanta ída van kámá barafá Yonini vaya ineno van ore ore en mino. ⁶ Oriven mo vetí ankaní ume sian páman urákan Yoni ano Yodaní nompin monó non péanten mino. ⁷ Yoni ma monó non péantiyan onákan Farasisi kayo vá Sadyusi kayo vá mairá eríkan betí ankan máa sen tiamemí, “Tiretí ankan namu osafáe akhafanan banan Tiyarafenui arananá uman mano siretimpin ereno van iyan mifo mai van iye anó tiamikhayá mai uman pinté karan orono van iya fonó.” ⁸ Máan tiya ompo siretí ankan ma fura seya ará baédanteya mai siretí ankaní avúavá pókesá aní oro. ⁹ *Téi siretí ankan tiamé umpo siretí ída vá Abaraamu nan tetin tinafu ino se vá ineno. Tiyarafenu ano kanaíen ma onámaná kayo sintin Abaraamun anavasini inten mino. ¹⁰ *Minó daa ma ída aran iran nain tíkaré irafin karú dano van mai yaa kayo anafin tantume fe van mino.

¹¹ *Téi ma siretí ankan nompó péantiyarúna mai siretin nan inka ará baéken mino siré aní iyá umpo sen toyampá ma eriyain bantai ákona ano senti ákona esantakhá téi ída kanaí é ben arantan anamun ayufirí ukhé uno. Béi anon Kantá Aunan má ira vá póké péantanten mino. ¹² Béin ayampin bakhari in danka van mino. Bei uviti namumpin bakhari iyan uviti aítan mápin kaiyáken ída kípan irafin aítan taman kaurinten mino.”

Yoni Ano Ma Yisasin Monó Non Péantein Baya Ino

(Maki 1:9-11; Ruku 3:21-22)

¹³ Yoni ma vaya siyákan maen Yisasi Karirifá me ampiren Yoni ano véin monó non péantano van Yodeni non arufá oren mino. ¹⁴ Oríkan Yoni ano véin ayópá ono van temí, “Éi ano ma séi monó non pétintaren mifo éi fará téi varunafá eriya fonó.”

¹⁵ Máa síkan Yisasi evaránen béin tiamemí, “Ída ifo séi ma siyarunaí ma éi esin mi Tiyarafenu ano ma erasan nan ma funtákein avúavá barano ma síkhá ein

baya ano mo kanaí inten mino.” Síkan Yoni iniren beni vaya vákuren monó non péanten mino.

¹⁶ *Yisasin ma monó non péantádan non pinté ainen e ayoren avafá ma ódiyain má inaru ona yivin béi oniyain má Tiyarafenui Aunan mano mana kukhofá nun avúaváká ten béi vaipá eren mino. ¹⁷ *Eriyain má inaru fáké mana oova ano máa semí, “Mai sen tanin mino. Téi ven nan moéké tinunu ukhé te sú káká ben nan moéké timusin iyá uno.”

4

Ban Anon Mano Ma Yisasin Akhenóka Ein Baya Ino

(Maki 1:12-13; Ruku 4:1-13)

¹ *Máa siran Ban Anon mano Yisasin akhenóka ino van Kantá Aunan mano mai rákena yo aviren banta ída van kámá barafá oren mino. ² *Aviren mo khain báken foti (40) inuran má bayan má dunan auraren baréin arafan puren mino. ³ Arafan nan iyan baré íkan béin ma akhenókain banta ano enóben béin máa sen tiamemí, “Éi ma fura se Tiyarafenu Anin ma vanteya sesin ma onámaná kayo ano veretií ino.”

⁴ Máa síkan Yisasi evaránen tiamemí, “Tiyarafenui vompon dókifin máa sen baya uvanten mino, ‘Banasi ano yunantá ana ída kanaíen para van oriyan ban aunan baranten mifo Tiyarafenu oo fenté ma kuviyain baya ánain ma vákurinten mai fara van oriyan ban aunan baranten mino.’” *Diu 8:3*

⁵ Máa síkan Ban Anon mano véin do aviren kantasí ukhein baru Yerusaremí oren mo kákan monó namun amonta suron mantaanten mino. ⁶ Mo mantaantáden Ban Anon mano véin máa sen tiamemí, “Éi Tiyarafenu Anin ma vanteya káuse aravono. Para vara seyo, Tiyarafenui vompon dókifin máa síkhen mino:

“Béi ano vei enisori kayo siantantin éintá dafíben betí ankan ayan do uvídatiya

* **3:7:** Mat 12:34; 23:33 * **3:9:** Yon 8:33, 39; Rom 4:12 * **3:10:** Mat 7:19; Ruk 13:6-9 * **3:11:** Yon 1:26-27, 33; Apo 1:5 * **3:16:** Yon 1:32 * **3:17:** Íbo 2:7; Ais 42:1; Mat 12:18; 17:5; Ruk 9:35 * **4:1:** Ibu 2:18; 4:15 * **4:2:** Eks 34:28

mairá káusesin ída mana onámaná ano arantan aru finten mino.’” *Íbo 91:11-12*

⁷ Yisasi evaránen béin tiamemí, “Tiyarafenui vompon dókifin enadá máa sikhen mino, ‘Éi ída vá ei Bafan Tiyarafenu akhenóka uan onano.’” *Diu 6:16*

⁸ Máa síran Ban Anon mano véin evaránen do aviren mana yan bain anu yontá mun kaúdaren ma varará ma ákona vara kayofin ma ara ara kama yanasinta vain aníen mino. ⁹ Aní uren béi máa sen Yisasin tiamemí, “Éi ma aron durafúdeya matime sentá ma monó tiresí maé ma ma oniyaona yanasintá minó éin amenté uno.”

¹⁰ Máa síkan Yisasi evaránen béin tiamemí, “Ban Anon noe, sífó ono. Tiyarafenui vompon dóki ano máa sikhen mino, ‘Ei Bafan Tiyarafenu veyáká aránaópá bákeya ventá ana vá monó teno.’” *Diu 6:13*

¹¹ Máa síkan Ban Anon mano me ifá en orivin enisori kayo ano eriven ben me ayaen mino.

Yisasi Ma Karirifá Monó Doran Mo Arai Ein Baya Ino
(*Maki 1:14-15; Ruku 4:14-15*)

¹² *Aruvin banta kayo ano ma Yonin pákaan karivusifin kain baya ma Yisasi íniden béi evaránen Karirifá oren mino. ¹³ Nasaretí barurá manáa yamú o varen mairá me ifá uren Seburunin má Naftarin mái varafin ma Karirí non ankinafá bain baru Kapeniamú o varen mino. ¹⁴ Yisasi ma mai avúavá barein mai Tiyarafenu ano ma sakhanampa vanta Aisaiyan oorá máa sikharé ein mi fura sen afoká en mino,

¹⁵ “Seburuni vá Naftari vái varafin ma vain nanin banta vá Karirí non akhempá ma orikhein aayana vá Yodan non arufá ma vain nanin banta vá maen mai ena anan nanin bantan Karirí varafin baren mino.

¹⁶ Mai kayo ano kákan títipafin baré íkan kákan oon inka khan onen mino.

Purin mano ma sítípa uádan duntein barafin baré ein nanin bantafin inka kakhán afoká en mino.” *Ais 9:1-2*

¹⁷ *Yisasi aráien monó baya vanasi siamemí, “Tiretí ankan ará baerano. Para vara seyo, inaru yafisin ádé anantá erinten mino.”

Yisasi Ma Arai En Kamí Kamí Eyo Iyampón Kayo Arein Baya Ino
(*Maki 1:16-20; Ruku 5:1-11*)

¹⁸ Maná damú Saimonin nan ma Pitán ne siyain banta vá be afá Endurun má ano noyana arin dorarí iyain bakan base karúdiyáin Yisasi Karirí non ankinafá oriyaren onen mino. ¹⁹ Ódaren Yisasi vékanan máa sen tiamemí, “Tirékanan taréa noyana vaseí iya ompo sen má eresí banasi ma aviran aní uantano.” ²⁰ Máa siyain má ana vékanan base unan me ampiren béin dakhafen oren mino.

²¹ Yisasi mai ráké oriyan onákan Yemisin nú Yonin nú anavasan botifin kumanten be afóe Sebetin má base avové iyá íkan békanan má aren mino. ²² Ariyain má anan békanan mai voti vá betíi afóen má me ampiren Yisasin bákuren oren mino.

Yisasi Ma Aí Nanin Banta Ayofein Baya Ino
(*Ruku 6:17-19*)

²³ *Yisasi Karirí varafin oriyáken betí ankani monó átaru namumpin un pében monó baya vanasi siamiyáken inká Tiyarafenui yafisin pintena kama vaya sian dáko iyan aí ma vá ein nanin banta ayofiyan au ma namu ukhá ein puntá antiyán en mino. ²⁴ *Máan tiyákan beni vaya ano minó Siriai varafá orera íkan minó nanin banta ano ara ara namu aí ma vákan ai san iyá ein má namu aunan ma varé ein kayo vá auvayaní ma iyá ein kayo vá ai ayan ma fukaré ein kayo vá aviren eríkan Yisasi minó evaránen ayofiyan kama uanten mino. ²⁵ *Karirí vara fáke nanin banta vá Dekoporisíke nanin banta vá *Yerusaremíke nanin banta vá Yudiá bara fáke nanin banta vá Yodení non ufáke nanin banta kayo vá ano véin bákuren noren mino.

* **4:12:** Mat 14:3; Mak 6:17; Ruk 3:19-20 * **4:17:** Mat 3:2; 19:27 * **4:23:** Mat 9:35; Mak 1:39; Apo 10:38

* **4:24:** Mak 6:55 * **4:25:** Mak 3:7-8 * **4:25:** Dekopori sin bí ma vain mai tian mikan kákan baru en tikhen mino.

5

*Yisasi Ma Vanasi Ano Avu Vá Uman Má
Ma Varan Nain Afova Amein Baya Ino
(Ruku 6:20-23)*

¹ Maná damú Yisasi onákan kokhon nanin banta átaru iyaimpin béi me onen anuí ukhein akhempá kena un kumamin bei eyo iyampon kayo ano véi vaintá eren mino. ² Enóbin béi araien betí ankan afova veya amiyen temí,

³ **“Tiyarafenu van ma aiyain kayo vá amusin ino fara vara seyo inaru yafisin baru vetí ankan nina ino.*

⁴ **Arunanápin ma vain kayo ano vá amusin ino fara vara seyo Tiyarafenu ano ará kusiantanten mino.*

⁵ **Be au ma vararasí uren bain kayo ano vá amusin ino fara vara seyo Tiyarafenu ano auyen bara vetí ankan aminten mino.*

⁶ **Puntakein avúava san ma aiyantin ma arafan nan iyain kayo ano vá amusin ino fara vara seyo Tiyarafenu ano kanaí uantanten mino.*

⁷ *Ena nanin banta van ma arunan uan-
tiyain kayo ano vá amusin ino
fara vara seyo Tiyarafenu ano vei
arunaná betin aní inten mino.*

⁸ *Ará ano ma avusese ukhein kayo ano vá
amusin ino
fara vara seyo vetí ankan Tiyarafenu
onanten mino.*

⁹ *Aruve asiveimpin ma kusin avúavá
pákaren bain kayo ano vá amusin
ino
fara vara seyo vetí ankan nan Ti-
yarafenu akhafana ino sen aranten
mino.*

¹⁰ **Puntákein avúava san ma uman
amiyantín ná mai kayo ano amusin
ino
fara vara seyo inaru yafisin baru vetí
ankan nina ino.*

¹¹ **“Ten tínain ma sivákuriyasín ma
ódaren mai van ma vanasi ano namu*

vaya siren namu uanten ara ara kam-
pun bayafó ma augin kuráden tiyanti mai
vará amusin ono. ¹² **Para vara seyo,
inarufá tiretí kákan miyan ave ukhen
mifo siretin ará ano kama ukhantiya vá
moékeya amusin ná ono. Tiretin ma
aan uantein erikhá ein sakhanampa vanta
kayo aurá ma namu uantaká ein avúavái
afoká inten mino.”*

*Yisasi Siyáken Banasi Ano Un Má
Kakhan Má An Mi Yakhen Mino
(Maki 9:50; Ruku 14:34-35)*

¹³ Yisasi evaránen temí, “Tiretí ankan un
ma einí ukha ono. Uní ase ma kípavinti
mai un intesá uresin ná evaránen ase
inten nafino. Máan tukhein un ída veni
ase vantí fase karúdaresin mai yaró onóbe
enóbein manan ban mino.

¹⁴ **“Mana kákan baru ma ída aúpasíin
anu yontá báé iyain an deya siretí ma
varai kakhan mono. ¹⁵ *Banasi ano
ída oon uruan kurafin kufere íyan mifo
sakhókái uruan kain báken mápin ma
vain nanin banta kakhaanté íyan mino.
¹⁶ *Máan mana eya vá tiretí ankani oon
áesin ná banasi avorá panu siyantín ná
tiretí kama avúavasá oniyáken inarufá
bain Afóen avisá daní ino.*

*Yisasi Ma Man Baya Kayo Kanaí Ono
Van Erein Baya Ino*

¹⁷ **“Ída vá teya man baya vá
sakhanampa vanta kayoi veya vá do
varanton mi sen nan eren mino se ineno.
Téi ída ma veya kayo yo maman karúdano
van eré umpo yorékun mai veya kayo
ano mo kanaí suron ino van mi eré uno.
¹⁸ *Téi fura siré tiretí ankan tiamé uno
ínaimpáké inaru vá bara vá kípanten mifo
man baya fintena sitó bompon ná uvantá
inten nafi inká tító kasá usikhá inten nafi
ída aiyoran para vantín mi minó mai
ma uvantá ein daná afoká inten mino.
¹⁹ *Máan tukhen mifo mana vanta ano ma
man baya kayo finte sitó máa yurafúden
ena nanin banta afova amintín ma vetí
ankan mai ánain bákuriyaré intín maen
inaru yafisimpin títókái ven aví aminten*

* 5:3: Ais 57:15 * 5:4: Ais 61:2-3; Rev 7:17 * 5:5: Íbo 37:11 * 5:6: Ais 55:1-2 * 5:10: 1Pi 3:14 * 5:11:
1Pi 4:14 * 5:12: 2Kr 36:16; Apo 7:52 * 5:14: Yon 8:12; 9:5 * 5:15: Mak 4:21; Ruk 8:16; 11:33 * 5:16:
Efe 5:8-9; 1Pi 2:12 * 5:17: Rom 3:31 * 5:18: Ruk 16:17; 21:33 * 5:19: Yem 2:10

mino. Máan tinten mifo mana vanta ano ma minó man baya ánain bákuriyan ma minó nanin banta van mai ánain bákurino van ma afova amiyaren maen mai vanta ano inaru yafisimpin kákan bí baranten mino. ²⁰ Máan tukháí séi siretí ankan tiamiyá uno. Tiretí ma ída Tiyaarafenui anunu ánain ma vákuresin ma siretí funtákein avúavá ano ma man baya ma afová ukhein banta kayo vá Farasisi kayo vái funtákein avúavá ma ída esantakhá intiya siretí ankan ída kanaíeya inaru yafisimpin oferan nono.

Banta Aruan Purin Baya Ino
(Ruku 12:57-59)

²¹ “Mosesini man baya ma anafu aráon amikhá ein mano sikhén mino, ‘Ída vá banta aruan purono. Banta ma aruan purin nain mano vá kópin ná orino sikhaya siretí ankan inka inikha ono. *Eks 20:13; Diu 5:17*

²² *Máan tukháí séi siretí ankan tiamé umpo vá mumunan afá aváen má ma aran kanti asivúdanona vanta ano kópin ná orono. Máan mana e mana vanta ano ma ve afá aváen nan ánon ída vain banta ono* ma sin nain mai Kanisorii* ánon banta anon kó tiantanten mifo mana vanta ano ma ena van óen banta ono sinten ira kiyán uman baren berai siyan purin barurasá orino.

²³ *‘Mai van mi Tiyaarafenuin ma íkun uan ameno van ma on karánará uadantá o mantave e afá aváe ano ma éin má asivuká inain baya ma ovare me ininte vá, ²⁴ ei íkun uan amin daná mairá me khaúde vá esé ana ore mo mai vava afá aváen má puntáde vá ovaráne me íkun uan ameno.

²⁵ “Éin kó tiantan banta ano ma aviren kó barufá ma kó tiantano van oriyantiya aine vá ayanafá béin má mai vava funtarano. Ída ma aine funtaresin maen kó inin banta ayampin ma éin kaintin kó inin banta ano aruvín banta ayampin kaintin aruvín banta ano éin karavusifin aviren mo khainten mino. ²⁶ Téi fura siré éin

tiamiyá uno. Éi karavusi namumpin para vákeyai mai ma éin aví tiantein kó miyan máa miyaní uan kípán nono.

Ena Nanin Banta Vá Ma Vanasín Baya Ino

²⁷ “Tiretí ankan pefái ída vá ena aná ba safi ena avafun ma safi vá e vare vare e nono síka inikha ono. *Eks 20:14; Diu 5:18*
²⁸ Máan tukhen mifo séi siretí ankan tiamé uno. Mana vanta ano ma mana nanin ódaren ma ineinefin aran nanteya mai vanta ano e aúpin inka ven má bare umeí e ono. ²⁹ *Máan tukhen mifo ayan kurompáke auu ano ma éin e yarifaan umefin ma kaintiya mai auu vá do vían karúdano. Mana vukhafa ma yo síkaan karúdaresin ma minó bukhafa ída karúdantin ma ira khiyan uman baren berai siyan purin barufin ma karúdantin orin manan kanaí inten mino. ³⁰ *Inká éin ayan kurompá ano ma e yarifaan umefin ma kaintiya vá mai yáman ná do síkaan karúdano. Mana vukhafa ma yo síkaan karúdaresin ma minó en au ída ira kiyán uman baren berai siyan purin barufin orin manan kanaí inten mino.

Anasi Ma Ifá Uantan Avúavá Baya Ino

³¹ *‘‘Mana vanta ano ma ve aná tiantano vará béin ifá uantan bompon uvaman béin amiren ná tiantano,’ sen pefá Mosesini man baya ano síkha inikha ono. *Diu 24:1-4*

³² *Inikha ompo séi siretí ankan tiamiyá uno. Mana vanta ano ma ve aná ano ída ena vanta vá noré intin ma véi mai nanin ma siantanten mai vanta ano man bayan durafuren mai nanin nan ena vanta vá e vare vare en non bí aminten mino. Máan turantin pasen mana vanta ano ma véin má ábasuí inten maen ída vá ena aná bá e vare vare en nono ma síkhein man bayai yurafurinten mino.

Ayan Ma Vefió In Baya Ino

³³ *‘‘Mosesini ena man baya ma anafu aráon amikhein tiretí ankan inikha ono.

* **5:22:** 1Yn 3:15 * **5:22:** Ánon ída vain banta ono Aramaiki vava finté ma Raka e siyain mai veni ana máan mi ukhen mino. Mana vanta ano ma ena vanta van aran nan uaren ma namu vava sen asiyaín baya ino. * **5:22:** Kanisori e ma siyain mai Kiriki vava finté Senhedrini en tiyan min. Mat 10:17; 26:59; Mak 14:55; Apo 4:15; 5:33; 6:15; 7:1; 22:30; 23:1, 6, 15, 20, 28; 24:20, 21 fin ná dere onano. * **5:23:** Mak 11:25 * **5:29:** Mat 18:9; Mak 9:47 * **5:30:** Mat 18:8; Mak 9:43 * **5:31:** Mak 10:4 * **5:32:** 1Ko 7:10-11 * **5:33:** Riv 19:12; Nam 30:2; Diu 23:21

'Pura ódino ma sire ayan befió uranteya mai vaya ída vá durafuriyákeya mai yaná puntáde vá Bafan avorá barano.' ³⁴* Máan tukháí séi siretí ankan tiamiyá umpo ída vá mana vayará ma ákona ono van inarufá ódino sireya ayan befió ono. Mai fara vara seyo, Tiya rafenui kumanin kin karái inaru van mino. ³⁵* Tiretí ankan ída vá mana vayará ákona ono van bara aví teno. Mai fara vara seyo, Tiya rafenui arantan kain kará ino. Tiretí ankan ída vá mana vayará ákona ono van Yerusalemí aví teno. Mai fara vara seyo, Kákan Kini varu ino. ³⁶ Máan tukhen mifo éi ída vá mana vayará ákona ono van e ánon aví teno. Mai fara vara seyo, éi ída kanaíeya ánon do maman efanteni safi sókonteni safi in nono. ³⁷ Tiretí ankan ná eyo ana seya vá ída ino ana seya vá inompo manáa vaya ma mairá mo asotúin maen Ban Anon pintéi eriyán mino.

Evaránen Anona In Avúavá Baya Ino
(Ruku 6:29-30)

³⁸ " 'Mana vanta ano ma auu ankaman dufúkinti vá ben auu ankaman dufúkono. Inká aveantun ankaman duvíkanti vá ben aveantun ankaman duvíkano,' sen Mosesini man baya ano fefá tikhaya inikha ono. *Eks 21:24; Riv 24:20; Diu 19:21*

³⁹ Máa sikhen mifo séi siretí ankan tiamiyá uno. Mana vanta ano ma siretí ankan namu avúavasí uantantiya siretí ída vá béin evaráneya namu avúavasí uantano. Mana vanta ano ma mana ufáke ápa ankádanti vá ena ufáke ápa yo vaédesin ná ankan mino. ⁴⁰ Inká mana vanta ano eni au anamun kó tiré barano van ma intiya vá ei ayá au anamun masá béin ameno. ⁴¹ Mana vanta ano ma éin nan ona siya uan manáa ayáká mo simeno ma sinti vá éi enavá ayáká mo asotú ure vá aya uan mo ameno. ⁴² Mana vanta ano ma éi vaonafá mana yana san inantinti mae véin amiyáke inká mana vanta ano ma mana yana san éi vaonafá ma simikharéesí anona evaráne ameno ma sin nain banta ída vá oyan ameno.

* **5:34:** Ais 66:1; Mat 23:22; Yem 5:12 * **5:35:** Íbo 48:2; Ais 66:1 * **5:44:** Eks 23:4-5; Ruk 23:34; Apo 7:60; Rom 12:14, 20 * **5:44:** Manáa ínainpá uvarein bompon enavá baya asotú en máa sikhen mino: éin má namu uantan nain kayo vá avábá uantiya inká aranan ma uantiyan nain kayo vará kama uantano. * **5:48:** Riv 19:2; Diu 18:13

* **6:1:** Mat 23:5

Tiretí Namuro Ma Avábá Uantan Baya Ino
(Ruku 6:27-28, 32-36)

⁴³ "Mosesini man baya ano 'E arona avábá ureya vá' ei namuro ída vá avábá ono sikhaya siretí ankan pefá inikha ono. *Riv 19:18*

⁴⁴ *Máa sikhen mifo séi siretí ankan tiamiyá uno. Ei namuro avábá ureya vá* éin aren asen ono van ma yakhafin nain kékasá Tiya rafenui amúkuan ameno. ⁴⁵ Máan ma inte mae siretí ankan Afóe ma inarufá báken áau yan ma namu nanin banta vá kama nanin banta vá amaniná ma kiyain má inká á dákan ma funtákein nanin banta vá ída funtákein nanin banta amaniná bá ma yan eriyain akhafanaii inono. ⁴⁶ Tiretí ankan ma avábá iyan nain kéká ana ma avábá inteya mai intéa miyan ná barante fono. Ídá takisi varan banta kayo vá dere máan té iyan nafino. ⁴⁷ Tiretí ankan ma e afá aváeyan mana ma avábá iyanteya mai éi intéa avúavasí ena avorá mo variya fono. Monó ída inin kayo vá ano yeren ídá manaí avúavasí é iyan nafino. ⁴⁸ *Para vara seyo, siretí ankan Afóe ma inarufá báken puntáken bainisá ukhe funtákein nanin banta vá bano.

6

Ona I Van Nanin Banta Ma Amin Avúavá Baya Ino

¹ * "Tiretí ankan dafían ná ákona ure ída vá tiretí kama avúava sinta vanasi ano onano van betin avorá aní ono. Tiretí ankan ma máan tinte mae siretí Afóe ma inarurá baípáke ná ída kanaíe miyan baran nono.

² "Éi ma ona ída van nanin banta ma manáa yaná ameno van ma inteya ída vá manáa kéká an deya kampun baya sire ída mai ánain dakhafin banasi ano ma amo sino van tiantan oriyan ma monó átaru namumpin nafi ayanafa safi ma ufen aseini ono. Téi fura siré tiretin tiamiyá uno. Mai vanta kayo ano inká minó miyan baren mino. ³ Máan té iyan mifo éi ma ona i van nanin banta kayo

ma aya inteya vá en ayan kuron mano ma variyain daná ída vá ayan ópá ano áesin afová ino. ⁴ Máan tesin maen eni ayain mano umefá bantin e Afóe ma inarufá báken aú páke ma variyain danasinta ma oné iyain mano éin miyan aminten mino.

Dunan Auraren Ma Amúkin Avúavá Pákena Vaya Ino (Ruku 11:2-4)

⁵ * “Inká turetí ankan ma amúkinteya ída vá au khákan banta kéká ano ma vaya siren ída mai ánain dakhafé iyain an deya vá banasi ano onano van monó átaru namumpin nafi aayanafa safi mantaveya amúkono. Téi fura siré turetín tiamiyá uno. Mai kéká ano vetí minó miyan inka varen mino. ⁶ Manten mifo suretí ankan ma amúkono van ma inteya vá ei karafarampin un pébe ona munkure vá aúpá bain Afóe vaipasá amúkono. Máan tesin maen aúpá bariyain danasinta ma oniyain Afóe ano éin miyan aminten mino. ⁷ * Inká monó ída inin nan ma afokhampin bain kayo ano ma Tiyarafenu ano inino van muno siren ma ayáká amúké iyainí ída vá ono. ⁸ * Turetí ída vá betí ankan an dano fara vara seyo suretí Afóe ano intéa yanasará inanteno van iya fo, mai véi fe afová ukhen mino.

⁹ “Máan tukhen mifo suretí ankan ná máan amúkirisá ono. “Tetin Tifóe inarufá baona en aví kantasá bano.

¹⁰ * Éini yafisin ná erino.

Inarurá ma éin oo yaiyyainí erá teti má barará éin oo yaiyono.

¹¹ Má damú kena yunan éi setin timeno.

¹² * Éi setinti ume ampesirá inká tétin má dere máan manaé enai ume ampiantano.

¹³ * Inká éi ida vá tétin akhenókafin tivire ore vá Ban Anon ayan pinte vá tétin do sivían ka ono.*

¹⁴ * Para vara seyo, ena nanin banta ano ma suretí ankan umeí uantádantí ma

vetíi ume ampiantanteya mai suretí Afóe ma inarufá bain mano suretíi ume vá ampiantanten mino. ¹⁵ Máan tukhen mifo suretí ankan ma ena nanin bantai ume ma ída ampiantesin maen turetí Afóe ano suretíi ume vá ída ampiantanten mino.

¹⁶ * “Turetí ankan ma yunan aurare amúkiyante vá ena nanin banta ano onano van ída vá au khákan banta kéká ano vaya siren ma ída mai ánain dakhafiyán ma yunan auraren arunan en noini ono. Téi fura siré turetí ankan tiamé uno. Mai kéká ano vetíi minó miyan inka varen mino. ¹⁷ Máan tukhen mifo éi ma yunan aurare amúkiyante auná tesé ure vá ánontá uveri vana ono. ¹⁸ Máan tesin ná minó nanin banta kayo ano ída afová intin ná e Afóe ma aúpá bain mai ano ana vá afová iyan inká minó daná ma aúpá bariyain daná ma afová iyain Afóe anon eni miyan aminten mino.

Moní Bá Ona Vá Ma Kaiyan Ban Baya Ino (Ruku 12:33-34)

¹⁹ * “Turetí ankan ída vá bara rákena kama yanasinta ma antan danú ano niyan ma karokharon ariyan ma inká umoyan banta ano varákuren bariyaimpin turetíi kama ona kaiya vá bano. ²⁰ * Ída vá máan tin nompo mai ma ída antan danú nan ma karokharon iran ma inká umoyan banta ano varákuren baré iyain mai inarufasá turetíi kama ona vá kaono. ²¹ Para vara seyo, éini kama ona ma vain mai varurái eni ineine vá aú amafon má banten mino.

Auu Ma Vain Mai Au Vukhafai On Mino (Ruku 11:34-36)

²² “Auu ma vain mai aui on mifo éin auu ma kama ukhantin maen éin au fimpá kakan mano víkaken banten mino. ²³ Bíkanten mifo éin auu ma namu ukhantin mai minó éin aufimpá títípá inten mino. Mai oon ma éin aufin títípá ukhantin maen eni minó bukhafo ano moéken títípá en kumayusí inten mino.

* **6:5:** Mat 23:5; Ruk 18:10-14 * **6:7:** 1Ki 18:26-29 * **6:8:** Mat 6:32 * **6:10:** Ruk 22:42 * **6:12:** Mat 6:14-15; 18:21-35 * **6:13:** Ruk 22:40; Yem 1:13; Yon 17:15; 2Te 3:3; 2Ti 4:18 * **6:13:** áa namu yaná pinte vá tétin do sivían ka ono. Manáa ínainpá ma uvarein bompompin ena vaya asotú en máa sikhen mino, Máan tukhein nan mi yafisin má ákona vá kákan bí bá enina van para oriyan banten mino. Pura. * **6:14:** Mak 11:25-26 * **6:16:** Ais 58:5-9 * **6:19:** Yem 5:1-3 * **6:20:** Mat 19:21; Ruk 18:22

Kankan Ayafai Yorarí In Baya Ino
(Ruku 16:13)

²⁴ “Ída mana vanta ano kanaíen kankan an ayafai yorarí inten mino. Máan ma inten maen mana ayafa oman kaumpan uantáden ena ayafa avábá uanten inká manai oo yaiyen ena oofá átakharé uantanten mino. Máan tukhanti siretí ankan ída kanaíeya Tiyarafenu vá moní báí yoran bantaí inono.

Kokhon Ineine Ma In Baya Ino
(Ruku 12:22-31)

²⁵ * “Máan tukhein nan mi séi siretí ankan tiamiyá uno. Ída vá tiretí ma váke yunan má non má ma nanona van e inian moreya inká auí daná ma aurá inona van kokhon ineine ono. Aunan ma váka vaona anó dunan ma naren ban esantakhan ná inká au vukhafa ma váka vaona anó auí daná ma uren ban esantakhen nafino. ²⁶ *Tiretí ankan ayompin ma vain nun kayo vá onano. Betí ankan ída yunan doren unafen uan mápin kaé iyan mifo siretí ankan Afóe ma inarufá bain manon betin dunan amé iyan mino. Tiretí ankan ídá mai nun kayo esantakhé unó té inikhe fono. ²⁷ Máan tukhen mifo siretí ankan pinté mana ano ma kamaé bano van ma kokhon ineine inten maen mai aho kanaisá ená bei van manáa vá mo asotú inten nafino.

²⁸ “Máan tukhen mifo siretí ankan pará auí dana san kokhon ineine iya rafono. Tiretí ankan paravan kayo ma ampantein ná onano. Betí ankani yoran ída vákan auí daná ina ída amué iyan mino. ²⁹ *Máan té iyan mifo séi siretí ankan tiamé uno. Pefá Kin Soromoni ano minó buí daná amu uren iyaren mifo vení auí daná kayo ano faravan kayo ma kiyain má ída manái ukharen mino. ³⁰ Mai ma sare ampan-taré intin inuran ma síkaren ira saran nain káta mai Tiyarafenu ano kamaen auí uanté iyain mifo sító mumunan má baona nanin banta oe, véi ídá kanaíen ná tiretin auí uantanten nafino. ³¹ Máan tukhanti náí yunan má non masá naré báké intéa vuí danasá onte rafuno se siretí ankan ída vá kokhon ineine iya vá bano. ³² *Para

vara seyo, afokhampin ma vain nanin banta kayo ano mai yanasinta van dosé iyan mifo siretí ankan Afóe ma inarufá bain mano siretin nan mai yanasintan barano van iya ono sen pefái afová ukhen mino. ³³ *Máan tukhen mifo esé daná Tiyarafenui yafisin má beni funtákein avúavá bá dosiresin ná mai yanasinta yere minó tiretin amino. ³⁴ Máan tukhen mifo vá inurantena yana san ída vá tiretí ankan kokhon ineine ono, fara vara seyo inun damú ano veyan inurantena van ineine inten mifo mana mana yamúpin bei uman barú barú ukhen mino.

7

Banasii Avúavá Ma Yaimin Baya Ino
(Ruku 6:37-38, 41-42)

¹ * “Tiretí ankan ída vá ena nanin bantai avúavá daimono. Para vara seyo, Tiyarafenu ano siretin má deren máan manaen daiminten mino. ² *Tiretí ankan ma ena nanin banta yaimiyá inona mai avúaváká anan Tiyarafenu ano siretin daiminten mino. Tiretí ankan inte avúavákasá ena nanin banta yaimiyá inte fo mai avúaváká anan ten Tiyarafenu ano siretin daiminten mino.

³ “Éi fará e afá aváen auufen ma sitó daa antan bain oniyá bákeyá e auufen ma yaa khaéáadan bain nan ída iniya fono. ⁴ Daa khaéáadan maen auufen bantiya éi mai intesá eyá e afá aváen nan tifá tiváe oe, en auu fentena yaa antan do manantano van muno sinte fono. ⁵ Éi vaya ma sire ída mai ánain dakhafin banta ompo vá e auufen ma yaa khaéáadan bain nare vá do máde vá auu kamaeya óde vá e afá aváen auu fentena yaa antan do manantano.

⁶ “Tiretí ankan ída vá Tiyarafenu ma siantádantin kantasí ukhan nain daná mam iyan kayo ameno. Amesin naren mai iyan kayo ano vaéaren tiretin untaranten mino. Tiretíi kama ukhein ankaroro kayo arantampó dasamin nafo ída vá pon kayo karúdaan ameno.

Amúkin Avúavá Pákena Vaya Ino
(Ruku 11-9-13)

* **6:25:** Fir 4:6; 1Ti 6:6-8; 1Pi 5:7 * **6:26:** Mat 10:29-31; Ruk 12:6-7 * **6:29:** 1Ki 10:4-7; 2Kr 9:3-6 * **6:32:** Mat 6:8 * **6:33:** 1Ki 3:11-14; Íbo 37:4, 25; Rom 14:17 * **7:1:** Rom 2:1; 1Ko 4:5; Yem 4:11-12 * **7:2:** Mak 4:24

7 **“Tiretí ankan amúkimpó ma inantiya vasin maen Tiyarafenu ano aminten mino. Dosiya ma vare mae oman afoká inono. Onará ma ankamiya vasin maen ona yiantanten mino. 8 *Para vara seyo, amúkimpó ma inan ma sé iyain nanin banta ano minó daná baré iyan mino. Mana vanta ano ma mana yana san ma yosiyaren mai yaná oné iyan mino. Mana vanta ano ma onará ma ankamiyá intin maen Tiyarafenu ano véin ona yiantanten mino.*

9 *“Mana iyampon mano ma siretin pinte mana afóe vaonafá ma yáun nan ma inantinti mae iye anó onámaná maman aminte fono. 10 Inká noyana van ma inantinti mae namu osafáé e akhá aminte fono. 11 *Tiretí afóeyan mano ma namu avúavá bariyákeya ma e akhafana kama yanasinta ma amin mai afová ukheya ma amé iyaonaí anan en tiretí Afóe ma inarufá bain mano ventá ma amúkimpó inantin nain nanin banta moéken kama yanasintan aminten mino. 12 *Máan tinten mifo ena nanin banta ano inte avúava sintá tiretin uantano vará anunu iyante fo mai avúava sinta ana vá betin uantano. Mai avúava sinta maen mai man baya vá sakhanampa vanta kayo vái ana vaya ino.*

*Kákan Ona Vá Titó Ona Vápin Ma Oferan
Baya Ino
(Ruku 13:24)*

13 *“Tiretí ankan titó onafin ná umperano. Para vara seyo, o afeyoran barufá ma orikhein ona kákan mi vákan maifá ma orikhein aa kákan ban kasaen orirí ukhan mi kokhon nanin banta ano mai aa anan bákuren oriyan mino. 14 Máan tukhen mifo aun baran barufá ma orin ona sitói vákan mai varufá ma orin aa sitosí ukhan maen manáa nanin banta ano anan mai aa yosiren óden oriyan mino.*

*Daa Ana Vá Beni Aran Máí Vaya Ino
(Ruku 6:43-44, 13:25-27)*

15 **“Kampun sakhanampa vanta kayo vará tiretí ankan dafian ná ákona ono.*

Sipi sipi ayo unan kafina uren erinten mifo aúpin afá iyan kayo víkakhen mino. 16 **Máan tukhein tiretí ankan betin avúavá ano ma aran imá dan nain mi ódeya afováin nompo kaná ayankun anan tákena uvaini aran kúdená inká avi kháta kayo rákena fiki aran kúden ná inten nafino. 17 Máan manan en mi kama yaa ana kayo ano kama aran máan imádé iyan mifo namu yaa ana kayo ano namu aran máan imádé iyan mino. 18 Kama yaa ana ano ída namu aran iran maen inká namu yaa ana ano ída kama aran iran é iyan mino. 19 *Ída ma kama aran iran nain daa ana kayo síkaren ira saman kaurinten mino. 20 *Máan tukhantiya vetí ma aran imádan naintái afová eya onan nono.*

21 **“Téin nan ma Bafan noe, Bafan noe, sen tariyain nanin banta kayo minó ano va inaru yafisimpin oferanten naino. Ída ifo inarufá ma vain Tifóeni vaya ánain ma yakhafin nain nanin banta kayo ano anan inaru yafisimpin oferanten mino. 22 Tiyarafenu ano ma vanasi yaimin nain damú kokhon nanin banta ano se nan ‘Bafan noe, Bafan noe, setí ankan en avíká sakhanampaiin dorarí iyáké inká en avíká ana namu aunan do siantiyá maé inka kokhon enará ukhein danasinta maman afoká iyaré uno,’ sinten mino. 23 *Máan ma sintí maé téi funtádé evarané betin tiamenté uno, ‘Tiretí ankan namu avúavá baran nanin banta kayon banái séi ída siretin afová ukhé umpo sífo oro.’*

*Kama Afova Vain Banta Vá Ída Kama
Afova Vain Banta Vá Ano Ma Má Uvaran
Baya Ino
(Ruku 6:47-49)*

24 *“Máan tukhein nan mi senti vaya iniren ma mai ánain dakhafin nain nanin banta anon kama afova vain banta ano ma kákan onámaná daró ma má uvareiníi iyan mino. 25 Uvantaré íkan á bá uva vá uáken anon non taven mai má avékan maen kákan onámaná daró uvantaréin pasen ída mai namun baráken mino. 26 Máan ten mifo senti vaya ma iniren ída mai vaya ánain ma yakhafin nain nanin banta ano*

* 7:7: Mak 11:24; Yon 14:13; 15:7; 16:23-24 * 7:8: 1Yn 3:22; 5:14-15 * 7:11: Yem 1:17 * 7:12: Mat 22:39-40; Ruk 6:31; Rom 13:8-10 * 7:15: Mat 24:24; Apo 20:29; 2Pi 2:1 * 7:16: Kar 5:19-22; Yem 3:12 * 7:19: Mat 3:10; Ruk 3:9; Yon 15:6 * 7:20: Mat 12:33 * 7:21: Ruk 6:46; Yem 1:25 * 7:23: Íbo 6:8; 2Ti 2:19

mai ída afova vanta ano ma eyurá ma ve amá uvareiníi iyan mino. ²⁷ Uvantaré íkan á bá uva vá uáken anon non taven mai má avékan baráken eraven mino.”

²⁸ Yisasi ma mai vaya kayo siamiran maen minó nanin banta ano véi ma afova amiyain baya kayo van takhaen oreraen mino. ²⁹ *Mai fara va ino vetíi man baya ma afová ukhein banta kéká ano ma afova amiyainisa en naifo mana aví bain banta ano ma afova amiyainíi en mino.

8

Amon Dana Aí Bain Banta Ma Yisasi Ayofein Baya Ino

(Maki 1:40-44; Ruku 5:12-14)

¹ Yisasi ma anuyon me ampiren ar-avíkan maen kokhon nanin banta ano ven ánaín dakhafen araven mino. ² Araviyain má mana amon dana aí bain banta ano Yisasi vaintá eren me aron kanan durafúden mátimen temí, “Bafan noe, éi ma anunu iyante séin tu sesé usintesí evarané kama ono.”

³ Máa síkan Yisasi ayan dan orin mai vanta au aruviyan temí, “Evaránen en au avusese en kama ino van téi sinunu iyá uno.” Siyain má manádá amon dana aí kípan maen mai vanta au evaránen kamaen mino. ⁴ *Kama uantáden Yisasi véin máa sen tiamemí, “Éi ída vá ma ma en au kama uanteruna vaya mana vanta siameno. Oreya vá monó doran banta vaintá oresin ná éin avové en onano. Pefá ma Mosesini man baya ano ma sikhá einí eya vá Tiyarafenu ma íkun uan amin danasinta máde susu seya amusin amesin ná minó nanin banta ano óden inka veni aí kípakhan mino sino.”

Mana Antareti (100) Aruvin Banta Kayoi Ayafa Vanta Ano Ma Mumunan Ein Baya Ino

(Ruku 7:1-10)

⁵ Yisasi ma Kapeniamú barufin o uniyain má mana antareti (100) aruvin banta kayoi ayafa vanta ano véi vaintá eriven béin ayaino van ínan en inaemí, ⁶ “Bafan noe, senti yoran banta ai ayan

púkan kákan aí iyan berai siyáken bakhen manan bá uno.”

⁷ Máa síkan Yisasi véin tiamemí, “Téi oré mo ayofanté uno.”

⁸ Máa sin aruvin banta kayoi ayafa ano Yisinin evaránen tiamemí, “Bafan noe, séi ída kama vanta varuna éi ída kanaíeya sen timá orin nompo vaya ana sesin ná tenti yoran banta evaránen asefa ino. ⁹ Mai séi farava máa siya rauno sesi ayafa vanta kayoi aránaópái séi vákun maen inká tenti aránaópái manáa aruvin banta kayo vái mana van ma orono ma sékun oriyá maé inká ena van ma ereno sékun maen eré iyan mino. Inká tesi yoran banta van ma ma yorari ono ma sékun mai yorari é iyan mino.”

¹⁰ Máa síkan Yisasi mai vaya iniren anú duren mai ma ven dakhafen noré ein nanin banta máa sen tiamemí, “Téi fura siré tiretí ankan tiamiyá uno. Téi onékun ma vantai mumunan má manaí ukhein banta Isarerii varafin ída mana van mino. ¹¹ *Máan tukháí séi siretí ankan tiamiyá uno, Áau e unipá bá orun perápá bá ma vain bara fintena nanin banta kayo finté* kokhon mano inaru yafisimpin ere ere uven maen maifin ma omasí inaimpin Abaraamu, Aisaki, Yekopun ankan má manafin kumamen dunan nanten mino. ¹² *Nanten mifo Tiyarafenu ano ma vei yafisimpin bano van ma fe iyáantákáin nain nanin banta yo siantantin titípa ukhein barufin o váken berai siyan aveantuntá inkekípiyan ifí danten mino.”

¹³ Máa siren aruvin banta kayoi ayafa vanta siamemí, “Éi ma mumunan eonaíen mai yaná afoká inten mifo orono.” Máan ma siyain áaurá anai mai yoran bantai aí daná kípen mino.

Yisasi Ma Pitan Aná Anóen Ayofein Baya Ino

(Maki 1:29-31; Ruku 4:38-39)

¹⁴ Yisasi ma Pitan amápin un pében onákan maen Pitan aná anóen aí uaren aufá ira kharo iyan takhópin bakhen baren mino. ¹⁵ Bakhen baré íkan Yisasi ven ayan bana fákiyain má mai aí daná

* **7:29:** Mak 1:22; Ruk 4:32 * **8:4:** Riv 14:1-32; Mat 9:30; Ruk 17:14 * **8:11:** Ruk 13:29 * **8:11:** Mai kayo ena anan nanin banta ino. * **8:12:** Mat 22:13; 25:30; Ruk 13:28

kípavin e mantaaren beni yunan taren mino.

Yisasi Ma Kokhon Nanin Banta Ayofein Baya Ino

(Maki 1:32-34; Ruku 4:40-41)

¹⁶ Mai inúpa kokhon nanin banta ano namu aunan ma vain kéká aviren Yisasi vaípa ere ere íkan mai aunan kéká do siantiyán inká aí daná ma vá ein kayo minó ayofen mino. ¹⁷ Máan ma ein manon sakhanampa vanta Aisaiyan pinté uaren Tiyarafenu ano sikhán mino. “Béi anon tetisi ara ara sí daná kípásintáden tetin kama usintanten mino,” ma sikhá ein mi fura sen afoká en mino. *Ais 53:4*

Yisasin Ánain Dakhafyain Nan Ma Uman Baran Baya Ino

(Ruku 9:57-60)

¹⁸ Yisasi ma onákan kokhon nanin banta ano véin aúban den iyen eúkiyáimbin bei eyo iyampon kayo siamemí, “Erí non e khádé ena ufá ódó tifano.” ¹⁹ Máa síkan mana man baya ma afová ukhein banta ano eriven Yisasin tiamemí, “Aru soe, éi ma orinonafá téi en dakhafé nonté uno.”

²⁰ *Máa síkan Yisasi evaránen béin tiamemí, “Afá iyan kayoi ain bákán maen inká nun kayoi nan bákán ukhen mifo Banta Anin* mano ma ánon kauren baran nain beni kanú ída van mino.”

²¹ *Máa síkan maen eyo iyampon kayo finté mana ano máa sen Yisasin tiamemí, “Bafan noe, áesirá te sífóen nare mo masí urerá ono.”

²² Máa síkan Yisasi véin tiamemí, “Áin púkein banta kayo ano furin banta masí iyantiya éi sen dakhafono.”

Yisasi Ma Kákan Uva Yo Siantein Baya Ino

(Maki 4:35-41; Ruku 8:22-25)

²³ Máa siren Yisasi votifin un kumanin bei eyo iyampon kayo ano yakhafen óden mino. ²⁴ *Ódiven non aúbaná oriyain má anú deiníen kákan uva íkan non karantó uaren boti yarararí iyan mifo Yisasi fara aun bakharen mino. ²⁵ Bakharé íkan bei eyo iyampon kayo ano véin mo avoriyan

avádóden temí, “Bafan noe, Bafan noe, non ufurirí iyá tiféumpo setin tiya ono.”

²⁶ *Máa síkan béi evaránen betí ankan tiamemí, “Titó mumunan má baona vanta kéká soe! Pará akhokho van iyara fono.” Máa siren béi e mantaaren uva vá non má ákonaen asiyain má púkehaven ída kayaen mino.

²⁷ Máan tiyain má betí ankan takha iyan kokhon ineine en orera iyan beraran inaemí, “Ma inté ukhein bantá bákán ná uva vá non má ano véin oo yaiyiyan nafino.”

Namu Aunan Bá Ein Bantá Kanan Pinte Ma Yisasi Yo Siantein Baya Ino

(Maki 5:1-17; Ruku 8:26-37)

²⁸ Yisasi Karirí non e kháden ena ufá Kadará kayoi varafin óden mino.* Ódiyain má namu aunan kayo ma vain bantá kanan mano ven má e fóken mino. Máí kanan banta ano afasién non banta masí ukhein pimpá baren nóken aran má ukhan maen banasi ano féden mai aasá ída oriyaren mino. ²⁹ *Máan tiyá íkan míkanan mano avádóden oovaren temí, “Éi Tiyarafenu Anin mompo, náisá ono vará damú ída afoká ukhayá tetin namu ono van eriya fono.”

³⁰ Máan ma siyákan maen manáa nentá pon kayo iyukhen báken dunan niyaren mino. ³¹ Niyan bákán namu aunan kayo ano Yisasin ínanen inaemí, “Tetí ankan ma sisintante vá áesirá mesan pon kayo aúpin ná oferá tifano.”

³² Máa síkan Yisasi evaránen betin tiamemí, “Tíretí ankan orono,” siyain má namu aunan kayo ano mai kanan banta me ampiren pon kayo aúpin o fébikan mai fon kayo ano sava uaren kákan ayafin o káusiven non ufuren puren mino. ³³ Máan tiyain má pontá ma yafiká ein banta kéká ano kákan barufá karan oren mo minó nanin banta mai ma afoká ein daná baya siamiyáken namu aunan kayo ma vá ein bantá kanampin ma afoká ein baya vá dere siamen mino. ³⁴ Tiamíkan iniren mai varu finté minó nanin banta ano Yisasin onano van eren mino. E oniyáken betíi

* 8:20: 2Ko 8:9 * 8:20: Yisasi ma Banta Anin ne ma sikhein mai Yisasi veyan nan mino. * 8:21: 1Ki 19:20

* 8:24: Íbo 4:8 * 8:26: Íbo 89:9; Mat 14:31 * 8:28: Manáa vompon Kerké barafin máa sen ena vompon Kerá

barafin máa sen mino. * 8:29: Mak 1:24; Ruk 4:41

vara me ampiren ena akhempá orino van inanen tianten mino.

9

Ai Ayan Púká Ein Banta Ma Yisasi Ayofein Baya Ino

(Maki 2:1-12; Ruku 5:17-26)

¹ *Yisasi mana votifin un kumamen Karirí non e kháden bei varufá oren mino.

² Oriyain má manáa vanta kayo ano ai ayan púkein banta kúkútafin bavin daiyen eríkan Yisasi ma vetí ankaní mumunan ódaren mai aí banta máa sen tiamemí, “Tanin noe, eni ume ampianté umpo vá en ará ano ákonæen ná bano.”

³ Máa síkan maifin manáa man baya ma afová ukhein banta kéká ma varé ein mano mai vaya iniren betiyan ten oreraemí, “Ma vanta ano Tiyarafenui varun bariyan ume ampiantiyen mino.”

⁴ *Máa sen iniyan Yisasi vetí ankaní ineinefin afová uren temí, “Pará tiretí ankan aúpin namu ineine maman ayuman iya rafono. ⁵ Inte vaya ma seruna anó teso sikhen nafino. ‘Eni ume ampianté uno’ ma seruna ano fino áa éi ‘e mantave orono’ ma seruna ano fino. ⁶ *Máan tukhen mifo sireti sá afová ono Banta Animpin ákona vákan mi ma varará ume kayo ampiantiyen mino.” Máa siren mai ma ai ayan púkein banta van temí, “Mantaveya ei kúkúta mamare ei varufá orono.” ⁷ Máa siyain má mai vanta ano e mantaaren bei varufá oren mino. ⁸ Oríkan banasi ano ódaren akhokho van uren máan ákona ma varará banta ma amé iyain nan Tiyarafenu aví daníen mino.

Yisasi Ma Matiun Arein Baya Ino

(Maki 2:13-17; Ruku 5:27-32)

⁹ Mairá Yisasi me ampiren oriyaeren o onákan Matiun ne sin banta ano sakisi varan namumpin kumantaré íkan Yisasi véin tiamemí, “Éi ere sen tivákurono.” Síkan Matiu e mantaaren ben avákuren oren mino.

¹⁰ Yisasi ma Matiun amápin o khuman ten dunan niyákan maen kokhon takisi varan banta kéká bá ume nanin banta kayo vá ano maifin ódiven Yisasi má bei

eyo iyampon kayo vá manafin kumamen dunan nen mino. ¹¹ *Niyákan Farasisi kéká ano ódaren aranan iyáken beni eyo iyampon kayorá inaemí, “Pará tiretí ankaní arú ano sakisi varan banta kéká bá ume vanta kayo vá manafin kumamen dunan niyan nafino.”

¹² Máa siyákan Yisasi mai vaya iniren máa semí, “Aí ma ída vain nanin banta kayo ano ída ayofan banta vaipá oré iyan mifo aí ma vain nanin banta ano anan ayofan banta vaipá oré iyan mino. ¹³ *Ma vaya ma Tiyarafenui vompon dókifin ma vain pintena vá tiretí ankan ore vá o afova varano. ‘Ena ma arunan uantan nan mi širanakhen mifo íkun ma uan amin nan ída ino.’ *Ose 6:6*

Téi funtákein kéká arano vara ererauno, umeí ma en noin kayon arano van mi erikhé uno.”

Dunan Ma Aurá Pákena Van Ma Yisasin Inaein Baya Ino

(Maki 2:18-22; Ruku 5:33-39)

¹⁴ *Maná damú Yonini eyo iyampon kayo ano Yisasi vaintá eriven béin inaemí, “Farasisi kéká bá tetí ankan má ano yunan turé iyá umpo fará eni eyo iyampon kayo ano ída yunan auriyan nafino.”

¹⁵ Máa sen ina íkan Yisasi evaránen betí ankan tiamemí, “Anasi ma iman ameno van iyantin ma mai vanta ano ma vei kéká bá para vantin maen mai vetí ankan náí vará béin arunan uantanten nafino. Maná damusí intin ma anasi iman ameno van iyain banta ma aviren orivintin maen maí damúj vetí ankan dunan auranten mino.

¹⁶ “Ída mana ano auyen davaráe ma kafáádan póké peyante au anamun ma yakakheimpin mo yamparen amué iyan mino. Para vara seyo, auyen davaráe kafáádan ma feyante au anamuntá mo yamparen amu urantin baren maen auyen davaráe ano yarifantin tampí tiaren mai au anamun kákantá eyáken orera inten mino. ¹⁷ Ída mana vanta ano feyante memé au unampin auyen uvaini anu vanaé iyan mino. Peyantefin ma vanarantin maen paútiaren uvaini anu varará banaen eravintin mai memé au unan namu inten mino. Máan tukhan

* 9:1: Mat 4:13 * 9:4: Ruk 9:47; Yon 2:25 * 9:6: Yon 17:2 * 9:11: Ruk 15:2 * 9:13: Mat 12:7 * 9:14: Ruk 18:12

mi auyen memé au unampin ma auyen uvaini anu vanaran maen mi míkanan kamaen báe iyan mino.”

Yisasi Ma Fúká Ein Arinta Avían Mantén Ma Aí Nanin Ayofen Ma Ein Baya Ino (Maki 5:22-43; Ruku 8:41-56)

¹⁸ Yisasi ma Yonini eyo iyampon kayo vá baya siyákan maen mana átaru namuntá ánoní ukhein banta ano véi vaintá me aron kanan durafúden mátimen temí, “Te siraun taréa furí umpo éi ereya mo ayan ben aurá kaesin evaránen aunan baren mantano.” ¹⁹ Maa síkan Yisasi e mantaaren béin dakhafen oríkan bei eyo iyampon kayo vá ano yere oren mino.

²⁰ Oriyákan mana nanin maen tirantan kan orun kádan (12) oranará biyon aí daná mantein baré íkan mai nanin mano ádé eriven Yisasini ayá au anamun áton aruven mino. ²¹ *Aruviyan mai nanin mano veyan nan temí, “Beni au anamun ma aruvékun maen tenti sí daná kípan ten mino.”

²² Maa siren aruviyain má Yisasi yo vaéan mai nanin oniyáken temí, “Tiraun noe, eni mumunan manon eni aí kípaanten mifo en ará ano vá ákonaen bano.” Máan ma siyain má anan mai nanini viyon aí daná kípen mino.

²³ Máan turen mairá Yisasi oren monó átaru namuntá ma ánoní ukhein banta amápin o onákan banasi ano kuní iyaren mino. * ²⁴ Máan tiyákan Yisasi semí, “Tiretí ankan báe entavoro. Mai arinta ída fúken paran aun bakhen mino.” Maa síkan minó ano venan inten oreraen mino. ²⁵ Mai nanin banta ma yo siantan barufá eravuvin maen Yisasi mápin un pében mai arinta ayan bana ma fakaaran orun mantén mino. ²⁶ Mai ma Yisasi varein avúavá baya ano mai varafin minó akhempá oreraen mino.

Auu Yufúkukhá ein Bantá Kan Má Ida Vaya Siyá ein Banta Vá Ma Yisasi Ayofein Baya Ino

²⁷ *Yisasi ma mai varu me ampíren oríkan maen auu yufúkukhein bantá kan

mano oyampá dakhafen oriyán oovararen máa semí, “Devitin Anin noe, verasan nan arunan usintano.”

²⁸ Maa sen oriyákan mai ma véi vain namumpin un pébin mai ma auu yufúkukhein bantá kan mano mai namumpin béi vaintá unóbin Yisasi vékanan máa sen inaemí, “Tenan tirékan auu kama urantí onano vará mumunan iya fono,” síkan békanan evaránen béin tiamemí, “Eyo Bafan noe, berasan mumunan iyá uno.”

²⁹ Maa síkan békanan auurá ayan kaúden temí, “Tiré kan ma sentá mumunan eonarái mai yaná kanaíen afoká inten mino.” ³⁰ *Maa siyain má míkanan evaránen auu mábikan Yisasi ákonaen airon ananí uanten temí, “Ma ma siré kampin ma afoká ein daná ída vá áesin mana vanta ano afová ino.” ³¹ Maa siran maen maí kan banta ano oren Yisasi ma varein avúavá baya mai varafin ma minó akhempá ma vain nanin bantafin mai veya siádan oreraen mino.

³² Maí kan banta ano ma Yisasin me ampíren oriyain má namu aunan mano oorá iyákan ída veya siyain banta vanasi ano aviren béi vaintá eren mino. ³³ *Eríkan Yisasi ma mai namu aunan do siantádan maen mai vanta ano veya síkan banasi ano sakha iyáken temí, “Pefá ída Isarerii varafin máan daná afoká in ontaren mino.”

³⁴ *Maa sen orera iyan maen Farasisi kéká ano semí, “Namu aunani ánon bantai ákonarái véi namu aunan do siantiyan mino.”

Manáa Yoran Bantan Ban Mino Ma Sein Baya Ino

³⁵ *Minó kákan barufimpa safi sitó baru-fimpa safi Yisasi oriyáken betíi monó átaru namun kayofin Tiya rafenui yafisin pintena kama veya kayo siamiyáken ara ara aí daná kayo ayofen oren mino. ³⁶ *Máan ten oriyáken kokhon nanin banta kayo onákan sipisipirá dafisin banta ída vákan ma asuse en aminofin nóken ma ayain banta van dosen noíní iyákan mai

* **9:21:** Mat 14:36 * **9:23:** Yisasi ma yorun baré ein barufá ma vanta fúbin maen okhaxhan mi asiyan ifí diyan mino. * **9:27:** Mat 20:29-34 * **9:30:** Mat 8:4 * **9:33:** Mak 2:12 * **9:34:** Mat 12:24; Mak 3:22; Ruk 11:15 * **9:35:** Mat 4:23; Mak 1:39 * **9:36:** Nam 27:17; 1Ki 22:17; Sek 10:2; Mat 14:14; Mak 6:34 * **9:37:** Ruk 10:2

van Yisasi vetí ankan nan arunan uanten mino. ³⁷ *Arunan uantáden bei eyo iyampon kayo siamemí, “Kokhon dunan karakhan mifo mai yunan ma yuyasin kéká tanáan ban mino. ³⁸ Máan tukhen mifo vá dunan afóe vaipasá amúke inantesin ná béi kokhon doran banta siantantin bei yunan karápin oriven ná beni yunan duyáan átaru ino.”

10

Tirantan Kan Orun Kádan (12) Eyo Iyampon Kayo Ma Yisasi Aní Ein Baya Ino (Maki 3:13-19; Ruku 6:12-16)

¹ *Tirantan kan orun kádan (12) eyo iyampon Yisasi araren namu aunan kayo ma yo siantan má ara ara aí daná ma ayofan ákona vá amen mino.

² Mai máa sirantan kan orun kádan (12) baya varen orin banta kéká aví máan mi ukhen mino. Esé araién Saimonin nan ma Pita ne siyain má inká ben afá Enduru má inká Sebetin anin kanan Yemisin nú Yonin nú anavasan má inká ³ Firipin má Bataromiun má Tomasin má takisi varan banta Matiuun má inká Arafiassin anin Yemisin nú Tadiusin nú bá ⁴ Serotin anan banta Saimonin má inká Inaipá ma Yisinin avían namuro ayampin amin nain banta Yudas Iskariotin* má ino.

Yisasi Vei Eyo Iyampon Kayo Siantan Ma Monó Dorantá Orera Ein Baya Ino (Maki 6:7-13; Ruku 9:1-5)

⁵ Yisasi mai máa sirantan kan orun kádan (12) banta siantan oriyákan afova vava kayo máa sen tiamemí, “Tiretí ankan ída vá ena anan banta kékápin ore vá inká Sameriá kayoi varufimpá bá ída vá orera ono. ⁶ *Isareri kékái sipisipi kayo ma afeyókein mai kayofin mana vá orono. ⁷ *Tiretí ankan ma oriyáke mae vá máan ná teno, ‘Inaru yafisin inka ádé erikhen mino.’ ⁸ Tiretí ankan oreya vá aí banta mo ayofesin evaránen asefa intiya vá, púkáin nain ayanóan mantiyáke vá, amon dana aí ma fákakhan nain kama uantiya vá, banasifin ma namu aunan baréin nain

do siantiya vá ono. Ma ákona ída miyan bákaya faran tiretí ankan bare ompo vá mai ída miyan bantiya fara vá banasi aya ono. ⁹ *Tiretí ankan ída vá kori fi siriva fi kopa moni safi vá amú anan unampin bá ureya vare orono. ¹⁰ *Tiretí ankan ma oriya mae ída vá unan bareya inká ída vá ena au anamun má arantan anamun má ayonta vá bare vá orono. Mai ma mo yorarí uantanona nanin banta ano vá éin dunan má minó daná bá amino.

¹¹ “Tiretí ankan ma mana kákan barufin nafi sitó barufin nafi ma orivinte mae funtákein banta van mairá dosireya mai vanta amasá bareya mai varu me ampeno.

¹² *Tiretí ankan ma mai vanta amápin un pébinteya mai namumpin ma van nain nanin banta máan ná te siameno, ‘Tiretin má ará kusin banten mino.’ ¹³ Máa sesin ma mai namun pinte nanin banta ano ma amusin iyan ma siretí ankan aviranti mae vá tiretí avu vava áesin ná betin má bano. Banten mifo siretin ma ída amusin iyan ma avirantiya vá tiretí ará kusiantan baya áesin ná ovaránen tiretimpin erino.

¹⁴ *Mana ano ma siretí ankan ída aviren be amápin oren ma siretí vava inin nan ma afonkarí intiya ma mai varu me ampinte vá arantantáke kayosá betin avorá me fúpá tian karú desin ná afová en ná Tiyarafenu ano setin uman timinten mino sino. ¹⁵ *Téi fura siré tiretí ankan tiamiyá uno. Tiyarafenu ano ma vanasi yaimono van inikhein damú ma afoká intin Sodomu varu vá Komora varu vá ané ma afoká ukhá ein mai uman moéken esantakhein uman mi mai varu kayo finte nanin banta ané afoká inten mino.

Ara Ara Uman Ma Afoká Inai Páke Amaan Tikhein Baya Ino (Maki 13:9-13; Ruku 21:12-17)

¹⁶ *“Máan tintéji séi siretí ankan afá iyan ofen ma sipisipi kayo siantan oreinií é umpo vá osafáe an de vá bempáké barará tonanempe vá oriyákeya kukhofá nun mano ma fúkekhaben noinisá ono.

* **10:1:** Mak 6:7; Ruk 9:1 * **10:4:** Yudas Iskarioti e ma siyain mai Iskarioti baru ráke vantan ban mino. * **10:6:** Yer 50:6 * **10:7:** Mat 3:2; 4:17; Ruk 10:9, 11 * **10:9:** Ruk 10:4 * **10:10:** Ruk 10:7; 1Ko 9:14 * **10:12:** Ruk 10:5-6 * **10:14:** Ruk 10:10-12; Apo 13:51 * **10:15:** Mat 11:24; Yut 7 * **10:16:** Ruk 10:3; Rom 16:19 * **10:17:** Mak 13:9-11; Ruk 12:11-12; 21:12-15

17 **“Manáa vanta kéká kasá dafían ákona ono. Tiretin avían Kanisori kayorá mo kaintin kó tiantáden betí monó átaru namun kayofin tiretin dafiyó ankaminten mino. 18 Téintá ma mumunan iyaona van mai kéká ano siretin avían kamanin kayo vá kin kéká bá avorá kaintiya mairái vetin má ena anan nanin banta kayo avorá bá kama vava sian dákó inono. 19 Máan tesin ma siretin avían kópin ma kaintiya inte vayá tente rafuno sireya ída vá anomé ineno. Mai áaurá anan Tiyaorafenu ano mai ma sinona vava ineine amintiya sinono. 20 *Mai fara vara seyo, siretiyantá ída vava sin nampo siretí Afóeni Aunan manon tiretin oo ráké uaren bava sinten mino.*

21 **“Be afá aváe ano e mantaaren be afá aváen avían namuro ayampin kaintin aruan purintin maen be afóe ano e mantaaren be akhá mai avúavasí ana uantantin maen inká iyamporinta ano e mantaaren be anóe afóen namuroí uantáden arintin purino van avían namuro ayampin kainten mino. 22 Téin tiví ma siretimpin banti ma séin bákuriyanona van mi minó banta kéká ano siretí ankan ará namu uantanten mifo iye anó mantaan ákona ukhen baré intin ná ma varai kípán damú afoká inten nafi Tiyaorafenu ano mai nanin banta kayon evaránen aviranten mino. 23 Tiretí ankan ma mana varu fintena nanin banta ano ma inian namu uantanti mae ena varu fasá karan orono. Téi fura siré tiretin tiamé uno. Isarerii varafin ma vain baru kayofin ída yóan kípakesin mi Banta Anin erinten mino.*

24 **“Sikhuru iyampon mano vei arú ída esantakhan inká dorán banta ano vei ayafa ída esantakhan ukhé iyan mino. 25 *Sikhuru iyampon mano ma vei arú bá mun manaí intin ma inká dorán banta ano ma vei ayafa vanta vá mun manaí intin maen mai anan kanaí inten mino. Má afóen nan ma namu aunani ánon banta Beseburi e ma sen ariyain mai veni kéká bá deren moéken namu ví aranten mino.*

Namuro Kayo Van Ma Ída Feran Baya

- * **10:20:** Yon 14:26 * **10:21:** Mai 7:6; Mat 10:35; Mak 13:12; Ruk 21:16 * **10:24:** Ruk 6:40; Yon 13:16; 15:20
 * **10:25:** Mat 9:34; 12:24; Mak 3:22; Ruk 11:15 * **10:26:** Mak 4:22; Ruk 8:17 * **10:28:** Rom 8:31; Yem 4:12
 * **10:31:** Mat 6:26 * **10:33:** Mak 8:38; Ruk 9:26; 2Ti 2:12

Ino (Ruku 12:4-7)

26 **“Banta kéká ano ma siretí ankan uman ameno van ma intiya sireti ída vá akhokho van ono. Aúpá ma ana yamuan kain bain danasinta ano yákó intin inká aúpá bava kayo vanasi ano afová inten mino. 27 Téi ma inuran pinté ma siamenuna vava vá tiretí ankan kakhakhein tasá teno. Tiretí ankan átarempin ma kafaya finté ma siamin nain bava vá má amontasá un mantaveya vá oovare vanasi siameno. 28 *Banta kéká ano ma yante vukhafa aruan purin nan ída vá tiretí ankan perano. Beti ída kanaíen aú bá aruan purinten mifo Tiyaorafenu vava vará perano. Béi anon kanaíen aú bá dan bukhafa vá mai ma ira kiyan uman baren berai siyan purin barufin taman kaurinten mino. 29 Mana monípó tító nun kanan miyaní ino van kaé iyan mifo siretí ankan Afóe ano mai nun kayo kamaen dafisiyáken mai fintena mana ída áintin barará eravino van anunu ukhen mino. 30 Máan tukhan mi Tiyaorafenu ano siretí ankan ánon do yankáan kípáren minó afova suron ukhen mino. 31 *Máan tukhaya siretí ankan tító nun kayo esantakha ompo ída vá akhokho van ono.*

Yisasini Vava Sin Nan Ma Ída Ayave In Baya Ino

(Ruku 12:8-9)

32 **“Mana vanta ano ma e manten banasi siamen ma séi veni kéká uno ma sintí maé mai sen má deren béin nan tesi kéká ino sé Tifóe ma inarufá bain tiamenté uno. 33 *Tiamenté umpo mana vanta ano ma e manten banasi siamen ma séi ída veni kéká uno ma sintí maé mai sen má deren béin nan ída sesi kéká ino sé Tifóe ma inarufá bain tiamenté uno.*

Yisasin Ma Móeken Anunu In Baya Ino (Ruku 12:51-53, 14:26-27)

34 **“Ma varará aruvin kusiantan mi sen nan baren eren mino seya siretí ankan ída vá ineno. Téi vaenatin baré eré uno. 35 Para vara seyo, namuroíin avúavá afoká ino van mi séi eré uno.*

“Banta ano e mantaaren be afóen namuroí intin,
be araun mano e mantaaren be anóen namuroí intin,

be anafú ano e mantaaren anasi anafú namuroí uantantin

³⁶ inká mana vanta ano e mantaaren baéden bei kéká bá namuroí inten mino.’ *Mai 7:6*

³⁷ “Mana vanta ano ma ve anóe afóen nan ma moéken anunun ma sen nan ma ída moéken anunu inain mai ano ída kanaíen ten bákurinten mino. Inká mana vanta ano ma ve anin nafi ve araun nafi moéken anunun ma sen nan ma ída moéken anunu inain mai ano ída kanaíen ten bákurinten mino. ³⁸ *Máan tinten mifo iye anó ída vei yaa unkamádan mamaren ná ten tínain dakhafinten nafi mai ano ída kanaíen ten bákurinten mino.* ³⁹ Bei aunan ma ákonaen pákakhá inain nanin bantai aunan o afeyoranten mifo sen nan ma iniren bei aunan ma ampín nain nanin banta ano fara van oriyan ban aunan o varanten mino.

Ena Vanta Ma Aya Iyain Kéká Ano Ma Inarufá Kákan Miyán Baran Nain Baya Ino (Maki 9:41)

⁴⁰ * “Tiretí ankan ma avíden ma avábá inain mai vanta ano séin mi sivíden kama inten mino. Téin ma siviran nain banta ano mai ma séin tisintá erikheruna Sifóen mi aviranten mino. ⁴¹ Máan tinten mifo mana vanta ano ma mana sakhanampa vanta aya iran muno ma siren aviren be amápin mo kaúden dafisinten maen mai ma Tiyarafenu ano sakhanampa vanta amiyain miyan mi mai vanta ano varanten mino. Inká mana vanta ano ma mana funtákein banta aya ono van ma avían be amá mo kaúden ma yafisinten maen mai ma funtákein banta kayo ano ma varé iyain miyan mi mai vanta ano varanten mino. ⁴² “Mana vanta ano sen naro siren ma senti eyo iyampon kayo finte mana aví ída vain doran banta ma kápifin iyon non dáan aminten maen mai séi fura siré tiretin tiamiyá uno. Mai vantai miyan ída afeyoranten mino.”

* **10:38:** Mat 16:24-25; Mak 8:34-35; Ruk 9:23-24; 17:33; Yon 12:25
máan mi ukhein mino. Yisasin ánain bákurintá ma uman baran mino.

* **11:5:** Ais 35:5-6; 61:1

11

Monó Non Péantan Banta Yonin Nú Yisasin Núi Vaya Ino

(Ruku 7:18-35)

¹ Yisasi ma sirantan kan orun kádan (12) eyo iyampon kayo ma vaya siamiren maen mai varu me ampíren Kariri varafin ma vain baru kayo fimpá nóken banasi afova amiyán Tiyarafenui kama vaya vetin tiamen mino.

² Yoni ma karavusifin baren ma Tiyarafenu ano aní ukhein banta ano ma minó dorarí iyain baya iniren bei eyo iyampon kayo van máa sen Yisasin mo ina ino van tiamemí, ³ “Éi fura sé mai ma Tiyarafenu ano ma aní ukhá ma avé ukhá erúna vanta fono. Áa ena vanta eriyain nará tetí ankan ave ótifan nuno.”

⁴ Máa síkan Yisasi evaránen betí ankan tiamemí, “Tiretí ankan ma ma oniyáke ineona vaya vá evaráne ore mo Yonin tiameno: ⁵ *Auu ma yufúkukhá ein kayo ano evaránen onákan inká arantan ma namu ukhá ein kayo ano e manten orin maen amon dana aí ma vá ein kayo au evaránen kama íkan inká átaren ma kontá ein kayo ano evaránen baya kamaen iníkan maen púká ein kayo ano evaránen e mantákan inká ona ma ída vain nanin banta ano kama vaya inin en mino. ⁶ Téin ma soniyantin ma vetíi mumunan ída eravukhan nain kayon Tiyarafenu ano moékan amusín aminten mino.”

⁷ Yonini eyo iyampon kayo ma orivíkan Yisasi máa sen Yonin nan banasi siamemí, “Tiretí ankan inté ukhein bantá onano vará banta ída van kámá barafá ori-yaré fono. Béi ída ákona van ura ano ma kaya einisá iyayá onano van ori-yare fono. ⁸ Áa náinasá onano vará ori-yare fono. Mana vanta ano kama ukhein aúí danasá uren bákayá tiretí ankan onano van oniyare fono. Ída ino. Kama aúí daná ma ukhein banta kayo ano kin amápin mi váé iyan mino. ⁹ Máan té iyan mifo mai fará tiretí ankan ori-yare fono. Mana sakhanampa vanta onantasá ori-yare fono. Mai fura ino. Téi siretí ankan tiamé uno, mai sakhanampa vanta

* **10:38:** Bei yaa unkamádan ma varani ana máan mi ukhein mino. Yisasin ánain bákurintá ma uman baran mino.

* **10:40:** Mak 9:37; Ruk 10:16; Yon 13:20

ano minó sakhanampa vanta esantakhen mino. ¹⁰ *Mai vanta van mi Tiyarafenui vompon dóki ano máa sikharen mino,

“Téi mana vanta siantékun éin an uanten oren

eni aa mo uvisinten mino. *Mar 3:1*

¹¹ Téi fura siré tiretí ankan tiamé uno. Monó non péantan banta Yoni ano minó ma varará ma afoká ukhá ein banta kayo esantakhen mifo inaru yafisimpin ma sitosí ukháin nain manon Yonin esantanten mino. ¹² *Monó non péantan banta Yoni ma kama vava siyan monó non péantiyaré ein táké ma eren ma saréa varunarái ákona mumunan iyain kéká ano inaru yafisimpin ainen orono van iyákan kokhon banta ano Tiyarafenui yafisin namuroí uantiyan mino. ¹³ Para vara seyo, minó sakhanampa vanta kayoi vava vá man baya vá ano ma afoká inten ne ma sikhare ein danasinta ano Yonintái me kanaíen mino. ¹⁴ *Tiretí ankan mai van ma mumunan iyanteya mai ma Tiyarafenui vompon dóki ano ma sakhanampa vanta Iraiyan an dakhein banta van ma erinten ne ma sikhá ein mai Yonin nan mi sikharen mino. ¹⁵ Átaren ma van nain kayo ano vá inino.

¹⁶ “Ma ma saréa ma vain nanin banta van náí yanákasá tiádante rafuno. Iyampon kayo ano ma átaru varurá kumanten ma ena iyampon kayo máa sen areiníi iyan mino.

¹⁷ “‘Teti ankan í dano van okhakhan asékuya ompo

siretí ankan ída í de ono.

Arunan ná baran í déku ompo

siretí ankan ída arunaná mádeya ifí de ono.’

¹⁸ Mai fara vara seyo, Yoni ma eriven maen dunan má uvaini non má auraren ída niyákan minó ano siyáken béimpin namu aunan ban mino siyaren mino.

¹⁹ *Máa siyaréin ma Banta Anin eriven ma yunan má non má nákan maen minó ano sen, ‘Onano, yunan má uvaini non má béi kokhon niyáken béi tákisi varan banta kéká bá ume vanta kayo vái arona ino.’ Máa siyan mifo Tiyarafenui vava ánain ma

vákuró tifanuna van mi veti afová en pura vayan tiyaren ne sinten mino.”

Ída Ma Ará Baeran Nain Baru Kayo Ano Ma Kákan Uman Baran Nain Baya Ino

(Ruku 10:13-15)

²⁰ Manáa varufin Yisasi kokhon enará ukhein danasinta yáko urákan mai varu fintena nanin banta ano ída ará baeriyaimpin Yisasi mai varu finte nanin banta máa sen asemí, ²¹ *‘Korasiníke nanin banta vá Betsaidake nanin banta va soe, siretí kákan uman uron mi varan nono. Mana vanta ano Taiya vá Saidoni vái varufin oriven máan avúavá daná afoká intin baren betí ankan pefái ará baéden koyan buí daná uren dun akhempá kumanten betíi ume van arunaná baran nainten mino. ²² Máan tukháí séi siretí ankan tiamé uno. Tiyarafenu ano ma vanasi yaimono van ma aní ukhein damú ma siretimpin afoká inain uman mano Taiya vá Saidoni varu kampin ma afoká ein uman mano esantaren tiretimpin afoká inten mino.

²³ *Tireti Kapeniamú kéká soe, Tiyarafenu ano siretin avirantí inarufá ódinte fono. Ída ino. Tiretí ankan purin nanin bantai varufin námen uron mi aravin nono. Aravin nompo mana vanta ano Sodomú barurá oriven téi ma siretin aúbaná afoká iyaruna yanasinta afoká en baréinti Sodomú baru fara van nainten mino. ²⁴ *Máan tukháí séi siretí ankan tiamé uno. Tiyarafenu ano ma vanasi yaimono van ma aní ukhein damú ma siretimpin afoká inain uman mano Sodomu varufin ma afoká ein uman esantaren tiretimpin afoká inten mino.

Yisasi Ma Ve Afóen Tusu Sianten Amúkein Baya Ino

(Ruku 10:21-22)

²⁵ *Maí damú ana Yisasi máa semí, “Tifóe oe, éi inaru vá bara vái Bafan mi van ná ein amo sé uno. Mai fara vara seyo, kama ineine vá afova vá bain banta kayo ano onan nain nan ma aúpasí ukhareya ma iyampon arará kayo an dakhein banta kayo ma anieona van mi susu sé uno.

* **11:10:** Ruk 1:76 * **11:12:** Ruk 16:16 * **11:14:** Mar 4:5; Mat 17:10-13; Mak 9:11-13 * **11:19:** Mat 9:14

* **11:21:** Ais 23; Isi 26-28; Yoe 3:4-8; Amo 1:9-10; Sek 9:2-4 * **11:23:** Esé 19:24-28; Ais 14:13-15 * **11:24:** Mat 10:15; Ruk 10:12 * **11:25:** 1Ko 1:26-29

26 Pura ino. Tifóe oe, éi ei kama anunu máan dakhafeya máan te ono. Pura.”

27 *Máa sen amúkuren banasi siamemí, “Te Sifóe ano inka minó daná ten tiyampin kaen mifo mana vanta ano ída ve Anin afová ukhan be Afóe ano anan afová ukhen mino. Inká ída mana vanta ano ve Afóen afová ukhen mifo ve Anin mano ma ve Afóen aní ono van aní ukhein nanin banta kayo vá be Anin má ano anan afová ukhen mino.

28 *Uman ma variya nan ma avesara iyain kayo ano vá téi varunafá eresí avíkan ameno. 29 Tiretí ankan ten pintena ma afova mamareya vá tenti vaya aránaopa sá bano. Mai fara vara seyo, séi sirá kusen barará orin avúavá baran bantan baruna sen pinten nan avíkan baran nono.

30 *Mai fara vara seyo, ma vaya ma siretí ankan tiamiyaruna vá inká barano van ma amiyaruna uman má ano seso sikhen mino.

12

Yisasi Ma Veyan Nan Sabatii Bafan Muno Sein Baya Ino

(Maki 2:23-28; Ruku 6:1-5)

1 *Mana Sabati yamú Yisasi má bei eyo iyampon kayo vá uíti yunampin oriyaré íkan bei eyo iyampon kayo arafan puríkan uíti ankáden aú puníden nen mino. 2 *Niyákan Farasisi kéká ano ódaren Yisasin tiamemí, “Onano Sabati yamú baran nan airo ananí ukhein danái eni eyo iyampon kayo ano variyan mino.”

3 *Máa síkan Yisasi evaránen betí ankan tiamemí, “Pefá ma Deviti ma vei kéká bá arafan puríkan ma mantaré ein baya vompon pintena siretí ídá dankáke fono.

4 *Deviti ma Tiyarafenu amápin un pében ma ven avorá bereti khauren airo ananí uran ban ma monó doran banta kayo ano ana vá nano síkhá ein ma un máden bei kéká bá nein mino. 5 *Monó doran banta kayo ano Sabati yamú ma monó namumpin doriyá ein mai are ukhein damúi vetí ankan doriyan ída uman bariyaren mifo siretí ankan ídá man bayai

vompon dókifin dankáke fono. 6 *Téi siretí ankan tiamiyá uno. Monó namun ma esantakhein daná ano mafin ban mino. 7 *Tiyarafenui vompon dóki ano ma sen ‘Ena ma arunan uantan nan mi siranakhen mifo íkun ma uan amin nan ída ino,’

Ose 6:6
ma sikhein baya kayoi ana ma siretí ankan afová ukhanteya aau ma ída vain nanin banta ída namu ví amin nono. 8 Para vara seyo, Sabati yamúká ma yafisin ákona Tiyarafenu ano Banta Anin mi amikhen mino.”

Yisasi Ma Mana Ayan Púkein Banta Ma Sabati Yamú Ayofein Baya Ino

(Maki 3:1-6; Ruku 6:6-11)

9 Yisasi mairá me ampiren oren mai varui monó átaru namumpin ódikan 10 *maifin mana ayan davénakhein banta varé íkan Farasisi kéká ano Yisasini aau ana yosiren kó tiantano van inaemí, “Sabati yamú tetí ankan kanaisá erá aí banta ayofá tifante rafuno.”

11 *Máa sen ina íkan Yisasi vetin tiamemí, “Tiretin pinté mana vanta ano ma mana sipisipi yesin baren ma Sabati yamú masípin o áduvinti ídá mai finte orun avían kainte fono. 12 Banta anon moéken sipisipi esantakhein pasé Sabati yamú kasaé aya ó tifanté uno.”

13 Máa siren béi mai vanta siamemí, “E ayan darurono,” síkan mai vanta ano ve ayan daruriyain má mai ayan evaránen kama uaren ena ufake ayan má manaíen mino. 14 *Máan tíkan mai Farasisi kayo ano ódaren e khuven manápá o iyuyen Yisasin ma aruan purin nain aa van dosen mino.

Yisasi Maen Tiyarafenu Ano Aní Ukhein Doran Banta Ino

15 Mai ma Farasisi kéká ano véin uman ameno van iyain baya ma Yisasi afová uren mai varu me ampiren oríkan kokhon nanin banta kayo ano véin bákuren oríkan aí ma vain nanin banta minó ayofaan tádein 16 *beyan nan ída ena siamino van mai nanin banta airo ananí uanten

* 11:27: Mat 28:18; Yon 1:18; 3:35; 10:15; 17:2 * 11:28: Yer 31:25 * 11:30: 1Yn 5:3 * 12:1: Diu 23:25
* 12:2: Eks 20:10 * 12:3: 1Sa 21:1-6 * 12:4: Riv 24:5-9 * 12:5: Nam 28:9-10 * 12:6: Mat 12:41-42
* 12:7: Mat 9:13 * 12:10: Ruk 14:3 * 12:11: Ruk 14:5 * 12:14: Yon 5:16 * 12:16: Mat 8:4; Mak 3:12

mino. ¹⁷ Yisasi ma mai avúavasí ein manon sakhanampa vanta Aisaiyan oo ráké uaren ma Tiyarafenu ano siádan baré ein mi kanaíen mino. ¹⁸ *Máan mi sikhán mino,

“Ma senti yoran banta séi ma aní ukheruna ino.

Téi ven nan moéké tinunu iyá kun ten tirá pin ká kan timusin édaviyan mino.

Téi sesi saunan bempin kaékun puntá kein avúavá baya varará nanin bantafin tiaminten mino.

¹⁹ Béi ída aran má avádóden baya sen aruven inten mino.

Banasifin béi ará kusin má bempá ké baya sinten mino.

²⁰ Banasi ano ma ura an den iyarí ukhá in nain béi ída iyanten mino.

Inká oon ma yusimono van ein an ma yakhá in nain nanin banta véi ída funtiminten mino.

Béi yoren oriyán maen puntá kein avúavá mo maman dá kó inten mino.

²¹ Minó barará nanin banta ano ventá mumunan uven béi ayaino van ave inten mino. *Ais 42:1-4*

*Yisasi má Beseburi Má i Vaya Ino
(Maki 3:20-30; Ruku 11:14-23, 12:10)*

²² Maí damú mana namu aunan maño fákakhan auu yufúkúvin ída vaya siyá in banta aviren Yisasi vaintá erí kan mai vanta ano oniyán baya siyan íno van Yisasi mai vanta ayofen mino. ²³ Máan tikan minó nanin banta ano sakhaen orera iyá ken inaemí, “Ma vanta Devitin Anin ná banten nafino.”*

²⁴ *Máa sen oreraen mifo Farasisi kayo ano ma mai vaya iniren betí ankan máa semí, “Ma vanta ano minó namu aunan kayoi á non bantái* á konará i namu aunan kayo yo siantiyán mino.”

²⁵ Máa siyá kan Yisasi vetí ankani ineinefin afová uren betin tiamemí, “Mana vara ano ma aúban aii uren maná pá ké kábintin ena fáké kábintin uven ma aruvinten maen mai vara namu inten mino. Inká mana varu finte safi mana má pinte

safi ma aúban daíden aruvinten maen mai varu fi mai ma safi ída á konaen banten mino. ²⁶ Máan tukhantín Ban Anon mano ma e mantaaren Ban Anon ma yo siantanten maen mai veyan mi aúban daiminten mifo inté uren ná beni yafisin á kona ano fara vanten nafino. ²⁷ Inká namu aunan kayoi á non bantái á konará ma namu aunan kayo yo siantiyá kun maen mai iye anó tiretí kéká á kona amin ná namu aunan kayo yo siantiyán nafino. Máan tukhantín tiretí kéká anon tireti ma seona vayará aní iyan tiren nan ída funtá ka ono sinten mino. ²⁸ *Máan tukhen mifo séin ma Tiyarafenui Aunan mano siyaintí ma namu aunan do siantiyá ku maeya mai siretí ankan afová inono, Tiyarafenui yafisin á kona fefái siretimpin e van mino.

²⁹ “Inká intesá uren ná mana á kona vanta amá pin mana vanta ano un pében ná beni ona varanten nafino. Mai á kona vantai ona ma varano sinten maen á kona anan pó ké nare véin damuá daren mi ven amá pinta yanásinta minó baranten mino.

³⁰ * “Téin ma namuroí usintiyá in nanin banta mai ída sen tirona ino. Inká téin ma ída siyaen banasi aví an á taru iyá in mai nanin banta anon banasi intanin orera iyan mino. ³¹ *Máan tukhá i séi siretí ankan tiamiyá uno. Minó ume vá oyampá baya ma sinona vá Tiyarafenu ano ampiantanten mifo Kantá Aunan nan ma oyampá baya sinona mai ume Tiyarafenu ano ída kanaíen ampiantanten mino. ³² Mana nanin banta ano ma Banta Anin ma oyampá baya sinona ume Tiyarafenu ano ampiantanten mifo Kantá Aunan ma oyampá baya sinona ume saréa fi ínaimpa safi Tiyarafenu ano ída uron mi ampiantanten mino.

*Daa Aran Ma Iran Naintá Ma Mai Yaa
Oman Afová In Baya Ino
(Ruku 6:43-45)*

³³ * “Máan tinten mifo kama yafisirí ma inona yaa ana anon kama aran imá dantin inká namu yafisirí ma inona yaa ana anon

* **12:18:** Mat 3:17 * **12:23:** Tiyarafenu ano ma aní ukhein banta Devitin anan pintéi afoká inten mino ma sikhá ein nan Yutan kayo ano mumunan ukharen mino. * **12:24:** Mat 9:34; 10:25 * **12:24:** Kiriki vaya finté mai vanta aví Beseburi ne siyan mino. Matiu 12:27 dere manaí ukhen mino. * **12:28:** Apo 10:38; 1Yn 3:8 * **12:30:** Mak 9:40; Ruk 9:50 * **12:31:** Ibu 6:4-6 * **12:33:** Mat 7:16-20

namu aran imádanten mino. Para vara seyo, inté ukhein daa aná ban nafi mai veni aran ma imádan naintái afová inono. ³⁴ *Tiretí ankan namu osafáe akhafana ompo, inté uákeyá namu avúavá ma aúpin bain kéká ano kama vava sen novara fono. Aúpin ma vain avúavá máan oofente kuvé iyan mino. ³⁵ Kama vanta arápin ma kokhon kama ineine kayo víkakan ma vain manon kama avúavá baré iyan mifo inká namu vanta arápin ma kokhon namu ineine kayo víkakan ma vain manon namu avúavá baré iyan mino. ³⁶ Máan tukháí siretí ankan tiamé uno. Tiyarafenu ano ma vanasi yaimin nain damúi vanasi ano ma ída funtákein baya ma siyáin nain tian dákó inten mino. ³⁷ Para vara seyo, Tiyarafenu ano eni vava kayorá anan kama vava siyare ono sen inká ída funtákein baya siyare ono sen daiminten mino.”

Yonan Amaniná Ma Afoká Ukhá Ein Nan Ma Yisasi Sein Baya Ino
(Maki 8:11-12; Ruku 11:29-32)

³⁸ *Máa sirákan manáa man baya ma afová ukhein banta kayo vá Farasisi kéká bá ano máa sen Yisasin tiamemí, “Aru soe, setí ankan ma éin nan Tiyarafenui yorará iyan mino sen ma inino sinte mae éi mana enará ukhein daná aníesirá oná tifano.”

³⁹ *Máa síkan Yisasi vetí ankan evaránen tiamemí, “Taréa ma vain mai namu avúavá baran nanin banta vá Tiyarafenuí ída ákonaen monó tin nanin banta vá báken ena ena yamú betí aní dana san manan ina iyan mifo vetí ankan ída kanaíen mana aní daná onanten mino. Sakhanampa vanta Yona ma aní ukhein mai aní daná anan betí onanten mino. ⁴⁰ *Para vara seyo, Yona ma kanú manaú bayan má inuran má ma kákan noyana arápin ma varé einí en Banta Anin mano kanú manaú bayan má inuran má bara aúpin banten mino.

⁴¹ *Máan tinten mifo Tiyarafenu ano ma vanasi yaimin nain damú Ninivéke vanta kayo ano mairá e mantaven maen ma ma saréa vain nanin bantai namu avúavá tian afoká inten mino. Para vara

seyo, Yona ma mo vava sin maen minó Ninivéke nanin banta ano vava iníden ará baeren mifo siretin aúbanápin mana Yonan esantakhein daná ano e vákaya ída ará baeriya ono. ⁴² *Tiyarafenu ano ma vanasi yaimin nain damú mana sautéke Kuinin mano mairá e mantaven maen ma ma saréa vain nanin bantai namu avúavá tian afoká inten mino. Mai farava ino mai Kuini ano vara akhempa suron mi varen Soromonini kama afova vava ineno van erein mifo mana Soromonin esantakhein daná ano e van mino.

Namu Aunan Kayo Ano Ma Evaránen Banta Aúpin Oriyain Baya Ino
(Ruku 11:24-26)

⁴³ “Namu aunan mano ma mana vanta me ampíren ma vanta i van kámá barafá nóken bei avíkan baru van dosintin ma ída mana kama afokhan bantin maen, ⁴⁴ béi máa sinten mino, ‘Téi ma fefá báeruna namumpin evaráné oronté uno,’ siren o onantin maen mai namumpin ída mana yaná bantin mai namun bakhari uren aúí uádantin banten mino. ⁴⁵ *Máan tukhantín maen béi evaránen oren dan manápá ifo afápá kan un kádan namu uron ukhein namu aunan o avíaren mai namumpin o vantín maen mai vanta ano fefá ma namu avúavá ma variyá ein esantaren moéken namu uró inten mino. Mai ma einí ukhein avúavá anan taréa ma vaona nanin bantafin afoká inten mino.”

Yisasin Anóen má Be Afá Kayo Vái Vaya Ino
(Maki 3:31-35; Ruku 8:19-21)

⁴⁶ Yisasi ma mai nanin bantafin para vava siyan bákan maen be anóen má afá kayo vá ano véin má baya seno van barurá e mantakhen ave ukharen mino. ⁴⁷ Ave ukhan mana vanta ano Yisasin mun tiamemí, “E anóen má e afá kayo vá ano en má baya seno van barurá e ave ukhen mino.”*

⁴⁸ Máa síkan Yisasi evaránen mai vanta siamemí, “Iye anó te sinóe van ná inká inte kékasá ten tifá tiváeyan ban nafino.”

⁴⁹ Máa siren bei eyo iyampon kayo aníen eúkiyan temí, “Onano. Ma se sinóen má te

* 12:34: Mat 3:7; 15:18; Ruk 3:7; 6:45

* 12:38: Mat 16:1; Ruk 11:16; Yon 6:30

* 12:39: Mat 16:4; Mak 8:12

* 12:40: Yna 1:17

* 12:41: Yna 3:5

* 12:42: 1Ki 10:1-10

* 12:45: 2Pi 2:20

* 12:47: Manáa vompon

dókifin ída ma vesi (12:47) van mino. * 12:50: Rom 8:29

sifá tiváeyan mái van mino. ⁵⁰ *Para vara seyo, inarufá ma vain Tifóeni anunu ánain ma yakhafiyain mai nanin banta anon ten tifá tiváe, siyofi, sinóe van mino.”

13

Danayun Ma Fafasin Bantará Ma Ovaéádein Baya Ino

(Maki 4:1-9; Ruku 8:4-8)

¹ Maí damú ana Yisasi má pinté ekhuven non akharun akhempá o khumanen mino.

² *Kumantaré íkan kokhon nanin banta ano véi vaintá e iyiyaimpin béi e manten botifin un kumamin banasi ano eyurá manten mino. ³ Mantakhan Yisasi kokhon baya o vaédiyan betin tiamemí, “Ineno. Mana vanta ano yunan barafin danayun mo fafaseno van oren mino. ⁴ Mo fafasen oriyákan maen manáa aasá eravíkan nun kayo ano e aíden nen mino. ⁵ Inká manáa yanayun on daró eravuaren bara asamana ukhan ainen e ampamen mino.

⁶ Ampamen mifo vara ída amákó ukhan amun ída kain námen aravukharéin á kan maen mai yanayun kafuren puren mino. ⁷ Inká manáa yanayun ayankun namampin eravukharen e ampamíkan ayankun naman mano úkuon dararen mino. ⁸ Inká manáa yanayun mano kama varafin eravukharen e ampamaren aran iren mino. Manáa ano mana antareti (100) iran manáa ano sikhisti (60) iran manáa ano teti (30) iran en mino. ⁹ Átaren ma van nain kayo vá inino.”

Yisasi Ma Ovaeran Baya Fákena Ma Sian Amá Ein Baya Ino

(Maki 4:10-12; Ruku 8:9-10)

¹⁰ Ínaimpáké bei eyo iyampon kayo ano Yisasi vaintá eriven máa sen inaemí, “Pará éi veya ovaédiyá banasi siamiya fono.”

¹¹ Máa síkan Yisasi evaránen betí ankan tiamemí, “Inaru yafisin pintenai aúpá baya ana ma afováin Tiyarafenu ano inka siretin amikhen mifo vetí ankan ída amikhen mino. ¹² *Tiyarafenui veya iniren ma kamaen dafisin nain nanin bantai Tiyarafenu ano moékan afova aminten mifo ída ma kamaen dafisin nain nanin

banta fintena fefá ma mantáin nain afova vá inan do varanten mino. ¹³ Ma anarái ovaéde ana veya siyá uno:

“Auu ano oniyán mifo vetí ankan ída mana yaná onanten mino.

Átarempó iniyán mifo vetí ankan ída veya iniren afová inten mino.

¹⁴ *Mai ma nanin banta ano sakhanampa vanta Aisaiyani vayan pura sen afová iyan mino. Béi máa sikharen mino,

“Tiretí ankan kokhon dádá baya inin nompo ída mai vayai ana afová inono.

Tiretí ankan kokhon dádá onan nompo ída kanaíeya mana yaná oman afová inono.

¹⁵ Para vara seyo, mai nanin bantai aú ona inka munkin

átaren konin maen baya ída inen amúkuven oriyán mifo

auu máben onen

átarempó baya inen

inká áukaké afová uren

aú baeren baré intí

kasaé betin ayofanté eruna ren mino.’

Ais 6:9-10

¹⁶ *Máan tukhen mifo siretin auu ano ma kasaen minó daná onan ma átaren mano ma veya iniyain nará tiretí ankan amusin ná ono. ¹⁷ Téi fura siré tiretí ankan tiamé uno. Pefá sakhanampa vanta kayo vá puntákein banta kayo vá ano ma ma saréa oniyaona yanasinta onano van iyaren mifo vetí ída ontaren mino. Inká ma ma saréa ma siretí ankan ma iniyaona veya kayo ineno van ukharen mifo vetí ankan ída inikharen mino.

Danayun Pafasí Pákenai Ovaeran Baya Ma Sian Amá Ein Baya Ino

(Maki 4:13-20; Ruku 8:11-15)

¹⁸ “Banta ano ma yunan barafin ma yanayun pafasintá ma sian baereruna vayai ana vá ineno. ¹⁹ Banasi ano ma inaru yafisini kama veya ma iniren ma

ída mai vayai ana ma afová iyain mai yanayun ma aasá eraveiní íkan mi Ban Anon mano eriven Tiyarafenui kama veya ma aúká pafasirein ainen do varé iyan mino. ²⁰ “On daró ma vain barafin ma eravein danayun kayo mai vanasi ano ma

* **13:2:** Ruk 5:1-3 * **13:12:** Mat 25:29; Mak 4:25; Ruk 8:18; 19:26 * **13:14:** Yon 12:40; Apo 28:26-27 * **13:16:** Ruk 10:23-24

vaya iniren ma mai veya ainen mamaren ma amusin einíi ukhen mino. ²¹ Máan tukhan maen ída arú kain orera uvin amun dan námen aravukharéin mi Ti-yarafenui vayará ma ara ara uman ma erin maen ainen eraven ankamé iyan mino. ²² *Ayankun namampin ma eravein danayun kayo mai vanasí ano ma veya iniren ma vara ráke yanasinta vá inká moni san ma in mai avúavá danasinta vá anon Ti-yarafenui veya yaramádan ída aran íré iyan mino. ²³ Máan té iyan mifo kama varafin ma eravein danayun kayo mai vanasí ano ma veya iniren mai vayai ana ma afová iyain manon mai mana antaretí (100) aran imádan inká manáa ano sikhisti (60) aran imádan inká manáa ano teti (30) aran imádan é iyan mino.”

Namu Kátará Ma Ovaéádan Baya Ino

²⁴ Yisasi ena veya máa sen betí ankan tian baéan amen mino. “Inaru yafisin mai máan mi ukhen mino. Mana vanta ano kama uviti ayun bei yunan barafin doren mino. ²⁵ Dóden e vakhan maen beni namuro ano inuran eriven namu káta ayun me mai vanta ano ma uviti yódampin pafasiren oren mino. ²⁶ Oriklaré íkan uviti e ampamíkan maen inká mai namu káta vá deren e ampamen mino.

²⁷ “Ampantá íkan doran banta kayo ano eriven dunan afóen máa sen tiamemí, ‘Kákan banta oe, éi kama uviti ayun mi ei yunan barafin pafaseona ifo inté eipasá namu káta maifin pótikhen nafino.’

²⁸ “Máa síkan béi vetí ankan tiamemí, ‘Mana namuro anon mai avúavasí ukhen mino.’

“Máa síkan doran banta kayo ano véin inaemí, ‘Tetí ankan nan mai namu káta kayo oman daruren manará átaru ino vará anunu iya fono.’

²⁹ “Máa síkan béi vetin tiamemí, ‘Ída ino. Namu káta yariyá inonafá uviti vá dere yari nona van muno. ³⁰ Míkanan ma áesin manafin pótikharé intin ma yunan duyasín damusí ma inain mai anon kama ukhen mino. Pótikharé intin ma yuyasin damusí ma intí maé mai yorarí ma inain banta kayo séi máa sé tiamenté uno, ‘Namu káta kayo nare vá ira saran átaru

ure ana yamuádare vá inká uviti átaru ure vá tenti yunan kain namumpin bare mo khaono.’”

Mastati Arantá Ma Ovaéádan Baya Ino (Maki 4:30-32; Ruku 13:18-19)

³¹ Yisasi ena ovaeran baya máa sen betí ankan tiamemí, “Mastati e sin daa aran ma einíi inaru yafisin mano ukhen mino. Mana vanta ano mastati aran máden bei yunan barafin doren mino. ³² Mastati aú maen ída ena yunan aú kayo an den kákaní ukhen mifo sitó aúí vaé iyan mino. Dunan bara finté ma véi e fotiaren maen minó dunan ana esantaren dan mi ódivin nun kayo ano mai yaa ayantá e yomané iyan mino.”

Yisirá Ma Ovaéádan Baya Ino (Ruku 13:20-21)

³³ Máa siren Yisasi evaránen ena veya ovaéden betí ankan tiamemí, “Inaru yafisin mai yisi an mi yakhen mino. Mana nanin mano ma yisi máden kokhon paravampin kakhufaren upí uran ma ínaimpáké mai faravan mano kákantá pamiyainíi ukhen mino.”

Yisasi Ma Ovaeran Baya Kayo Fóké Ana Vanasi Siamein Baya Ino (Maki 4:33-34)

³⁴ Minó baya ma Yisasi ano vanasi siamiyaré ein maen mai ovaédiyan manan tiamiyán mifo véi ída mana veya funtáden tiamiyaren mino. ³⁵ Mai avúavasí ma ein mai fefá mana sakhanampa vanta oo ráké uaren máa sikharen mino, “Téi veya ovaédiyá anan tiretin tiamenté uno.

Pefa suron ma ma vara afoká ein táké ma eriyán baren ma ma sare vaonará ma aúpa baré ein baya máan téi senté uno,” ma sikharé ein mi fura sen afoká en mino. *Íbo 78:2*

Namu Kátai Ovaeran Baya Ma Yisasi Sian Amá Ein Baya Ino

³⁶ Mairá Yisasi vanasi me ampiren mápin orivíkan beni eyo iyampon kayo ano véi vaintá onóben temí, “Kaná éi mai namu káta ma yunampin ampantá eini ana setin tisimesí inétifante rafuno.”

* 13:22: Ruk 12:16-21; 1Ti 6:9-10, 17

³⁷ Maa síkan Yisasi evaránen betí ankan tiamemí, “Kama uviti ayun ma yorein banta maen mai Banta Anin mino.

³⁸ Dunan bara maen mai ma vara ino. Inká kama uviti ayun maen mai inaru yafisin pintena nanin banta ino. Namu káta maen mai Ban Anoni vanasi ino.

³⁹ Mai ma namu káta ayun ma fafasiyain namuro maen mai Ban Anon mino. Dunan ma yuyasin damú maen mai ma vara ma kípan nain damú ino. Inká dunan duyasín banta kayo maen mai enisori kayo ino.

⁴⁰ * “Banta kayo ano ma namu káta átaru uren ma irafin taman kaureiníi ma vara ma kípan nain damú inten mino. ⁴¹ * Banta Anin mano vei enisori kayo siantantin maen beni inaru yafisin pintena umeí ino van ma vanasi akhenóka iyá ein danasinta vá namu avúavá ma variyá ein nanin banta vá do siantanten mino. ⁴² * Do siantáden maen mai kéká kákan irafin karúdan tin o váken kákantá berai siyan aveantuntá inkekí piyan banten mino.

⁴³ * Máan tiyantín maen puntákein nanin banta ano áau ma kheiníi vetí Afóeni yafisimpin inten mino. Átaren ma van nain kayo ano vá inino.”

Aúpa Ma Kama Ona Vain Má Ankaroro Vasan Ma Sian Baéadan Baya Ino

⁴⁴ Yisasi evaránen máa semí, “Mana varafin kokhon kori aúpa baré íkan ma mana vanta ano oneiníi inaru yafisin ukhen mino. Ódaren kákan amusín uren ainen evaránen orein mano vei minó danasinta mo sarí uren moní mamaren mai vara e miyaníen mino.”

⁴⁵ Yisasi evaránen máa semí, “Ona kokhon bain banta ano ma kama ankaroro kayo van ma yosiyainíi inaru yafisin ukhen mino. ⁴⁶ Dosen noren ma mana kama uron ukhein ankaroro váin ma o ódaren maen bei minó ona mo sarí uren moní mamaren mai ankaroro o miyaníen mino.”

Noyana Arin Base Unantá Ma Sian Baéadan Baya Ino

⁴⁷ Maa siren Yisasi ena ovaeran baya semí, “Base unan ma non akharumpin

karúdan aravuvín ma ara ara noyana ma fákiyainíi inaru yafisin ukhen mino.

⁴⁸ Mai vase unan ma karúdan noyana kayo víkavin maen noyana arin banta kayo ano orun darifaan akhempá kaúden ma kumanten kama noyana máa aían unan kayofin kauren namu noyana kayo karúde iyan mino. ⁴⁹ Ínaimpá ma vara ma kípan nain damú máan manan inten mino. Enisori kayo ano eriven maen kama nanin bantafin ma namu nanin banta kayo ma vain do airanten mino. ⁵⁰ * Do aíden maen karúdan tin kákan ira kiyaimpin o váken kákantá berai siyan aveantuntá inkekí piyan banten mino.”

⁵¹ Maa siren Yisasi vei eyo iyampon kayo inaemí, “Ma ma ovaeran baya kayo ma siamerunai ana inká afová e rafono,” síkan betí ankan “eyo” sen mino.

⁵² Maa síkan béi vetí ankan tiamemí, “Máan tukhan mi man baya ma afová ukhein banta kayo ano ma inaru yafisin pintena vaya ma afova amiyain kéká ano kákan namun afóen an mi yakhen ona kain karafarampin un pében maen auyen afova vá peyante afova vá ma kama ukhein baren eré iyan mino.”

Nasaretí Nanin Banta Ano Ma Yisasín Oyan Amein Baya Ino

(Maki 6:1-6; Ruku 4:16-30)

⁵³ Yisasi ma mai vaya kayo ovaédiyan tiamíden maen mai varu me ampíren ⁵⁴ * bei varu anará oren mino. Oriven betíi monó átaru namumpin ódiven aráien Tiyarafenui vaya vanasi siamiyákan beni vaya iniren takhaen oreraen temí, “Ma vanta ano ma afova vá enará ukhein daná ákona ma maman afokáin má inte fáken ná manten nafino. ⁵⁵ * Béi mana má uvaran banta anin mi vá tetí afová ukhé uno. Be anóe Marian bakan inká be afá kéká Yemisi, Yosepi, Saimoni, Yudasí siren mino. ⁵⁶ Inká minó ben ayofin náí setin má bain mifo inte fákená béi mai ákona manten nafino siren takhaiyan kokhon ineine en mino.” ⁵⁷ * Maa siren béin ará namu uantiyan maen Yisasi vetí ankan tiamemí, “Sakhanampa vanta aví minó

* **13:40:** Yon 15:6 * **13:41:** Mat 24:31; 25:31; Mak 13:27 * **13:42:** Mat 8:12 * **13:43:** Dan 12:3 * **13:50:** Mat 13:42; Ruk 13:28 * **13:54:** Yon 7:15 * **13:55:** Yon 6:42 * **13:57:** Yon 4:44

barufá ban mifo veni varu anará bá ben amápin má ída ven aví ban mino.”

⁵⁸ Maa siren béintá ída mumunan iyaimpin mai varurá ída kokhon enará ukhein daná afoká en mino.

14

Yonin Anuran Ma Síkein Baya Ino

(Maki 6:14-29; Ruku 3:19-20, 9:7-9)

¹ Maí damú kamanini ánon banta Eroti ano * Yisasi ma yoriyain avúavá baya kayo inen mino. ² Iniren bei yoran banta kayo máa sen tiamemí, “Monó non péantan banta Yonin purin pinté e mantakhan mai van mi enará ukhein ákona yaná anon béimpin doriyan mino.”

³⁻⁴ *Pefá Eroti ano ve afá Firipin aná Erodiasin mamaran ma Yoni ano Erotin nan ten ma éi Tiya rafenui man bayan durafure mai nanin bare ono ma sein nan mi Yonin pákaren ayan nan kuan karavusifin kaen mino. ⁵ *Eroti ano Yonin aruan purono van ukharen mifo mai véi mana sakhanampa vanta ino sen banasi ano afová ukhan mai van mi vetí nan periyaren mino.

⁶ Máan tiyá íkan Erotin ma ve anóe khaein damú afoká íkan kákan dunan táden niyan iyukhein aúbaná Erodiasin araun mano mo yanisií íkan Eroti kákan amusin uaren ⁷ béi e manten mai arinta máa sen iyáan ten temí, “Ódino fura sé uno éi náí yanasará inantinte fono séi fara amenté uno.” ⁸ Maa síkan be anóe Erodiasin ano véin ákona ineine amirákan mai arinta ano mo Erotin inaemí, “Monó non péantan banta Yonin ánon tíkaan mana yókifin kaúdeya vare me simeno.” ⁹ Maa síkan Kin mano mai vaya iníkan ben ará uman den mifo minó banta ma ven má kumanten dunan niyan ma mai kayo avorá ma fura ódino siren ma iyáantákaré ein nan ayave varana e siren bei aruvin banta kayo van mai arinta ano ma seiní ono sen mino. ¹⁰ Maa siren mana aruvin banta siantan karavusifin oren mo síkan Yonin amen tiken mino. ¹¹ Tíkaren mana yókifin ben ánon kauren mai arinta mo amíkan baren be anóen mo amen mino. ¹² Máan turákan Yonini eyo iyampon kayo ano ven

au e yaiyen mo masí uren Yisasin mo siamen mino.

Yisasi Ma Yan Manápá Tauseni (5,000) Vanta Yunan Amein Baya Ino

(Maki 6:31-44; Ruku 9:10-17; Yoni 6:1-13)

¹³ Yonin ma aruan purin baya Yisasi iníden mai varu me ampiren aúpáké bo-tifin ódiven banta ída van kámá barafá bei eyo iyampon kayo vá ana orivin maen minó nanin banta ano mai ma Yisasi orikheipá afová en iniren betí varu me ampiriyan barará maifá ana ore ore en mino. ¹⁴ Yisasin ma voti ano mo kaúdan maen béi onákan kokhon nanin banta kayo iyukheimpin betin nan arunan uren betí aí kayo ayofaanten mino.

¹⁵ Máan ten oriyákan inúpasí in eyo iyampon kayo ano Yisasi vaintá eriven máa sen tiamemí, “Ma vanta ída van kámá barafái vá íkan inka yuniríen mifo vanasi siantesin ádé ma vain baru kayo fimpá oriven ná betiyan dunan miyaní ino.”

¹⁶ Maa síkan Yisasi evaránen bei eyo iyampon kayo siamemí, “Betí ankan áesin bantiya siretí ano vá betin dunan amesin ná nano.”

¹⁷ Maa síkan betí ankan evaránen béin tiamemí, “Tetí ankan dan manápá bereti vá kankanan noyana vá anan dáké tiféuno.”

¹⁸ Maa síkan béi semí, “Mai vereti kayo vá noyana vá bare mará me simeno.”

¹⁹ *Maa siren banasi van káta yaró kumaneno síkan kumamin béi mai yan manápá bereti vá noyaná kanan má mamaren inarufá kakháben Tiya rafenu susu siantáden kisiren bei eyo iyampon kayo amíkan máden banasi amen oreraen mino. ²⁰ Banasi ano mai vereti kayo vá noyana kayo vá nákan amú kuriyaimpin bei eyo iyampon kayo ano antan o éke e éke uren tiyan míkan mifo sirantan kan orun kádan (12) unan bíken mino. ²¹ Anasi iyampon ída yankafen mifo vanta máa ma yankafein mai yan manápá tauseni (5,000) anon nen mino.

Yisasi Ma Non Daró Orein Baya Ino

(Maki 6:45-52; Yoni 6:16-21)

* **14:1:** Ma Eroti maen Yisasin ma araráká ma arono van ein Erotin anin mino. * **14:3-4:** Riv 18:16; 20:21; Ruk 3:19-20 * **14:5:** Mat 21:26 * **14:19:** Mat 15:35-39; Mak 8:6-10

22 Mai oyampáké ana Yisasi vei eyo iyampon kayo nare síkan botifin un kumamen betí ankan non e kháden ena ufá oriyákan béi fara váken banasi siantan oreraen mino. 23 *Tiantan ma orera uvíkan maen béi amúkono van beyaká anufá óden un bákkan inuraníen mino. 24 Bei eyo iyampon kayo ma orein boti ano nenta suron orivin maen auu fáké kákan uva uaren non karantó en mai voti e máden dómeron en mino.

25 Máan ten oriyan kakhano van iyákan Yisasi vetí ankan baípa non akharun daró oren mino. 26 *Bei eyo iyampon kayo ano Yisasín onákan non daró ma orin maen ban mi eriyan mino siren akhokho van báden oreraen mino.

27 Báden orera iyain má Yisasi ainen betí ankan tiamemí, “Téi umpo siretí ankan ída vá akhokho van iyáke ará kuse vá bano.”

28 Máa síkan Pita evaránen béin tiamemí, “Bafan noe, éi ma vanteya mai séin tesirá non daró éi vaonafá orono.”

29 Máa síkan Yisasi semí, “Ereno.” Siyain má Pita voti finté erafuyen Yisasín kakháaren non daró oren mino. 30 Oriyan onákan uva ano ákonáen non karantó eimpin akhokho van iyáken araién nompin orun periyan oovaren temí, “Bafan noe, siya ono.”

31 *Máa siyain má ana Yisasi ayan dan orin Pitan pákaaren máa sen tiamemí, “Tító mumunan má baona vanta oe! Pará éi ída mumunan e fono.”

32 Máa siren míkan ma votifin un kumaniyain má uva kipen mino. 33 Kípiyain má mai ma votifin kumantaré ein kéká ano Yisasín aví daníen temí, “Pura uron tireya éi Tiyarafenun Anin mono.”

Yisasi Ma Kenesaretíke Kokhon Nanin Banta Ayofein Baya Ino
(Maki 6:53-56)

34 Máa siren Yisasín má bei eyo iyampon kayo vá non e kháden oriaren maen Kenesaretí akhempá óden mino. 35 Ódiyain má mai akhen páke vanta kayo ano Yisasín afová en óden baya yan orera íkan minó baru fáke nanin banta ano aí kéká aviren béi vaintá eren mino. 36 *Eriven maen

Yisasín ínanen inaemí, “Áesin aí kayo ano eni au anamun áton mana aruvino,” siran bení au anamun áton ma aruvein kayo ano asefaen oreraen mino.

15

Banasi Ma Maman Avusese Iyain Danasinta Fákena Van Ma Yisasi Siamein Baya Ino

(Maki 7:1-13)

1 Mairá Yerusaremíké manáa Farasisi kéká bá man baya ma afová ukhein banta kayo vá ano Yisasi vaintá eriven máa sen béin inaemí, 2 “Pará eni eyo iyampon kayo ano sinafu siráoni avúavá durafuren ná dunan ma nanovan ayan nare ída sesé iyan nafino.”

3 Máa síkan Yisasi vetí ankan evaránen tiamemí, “Mai fará tiretí ankan anafu aráoni avúavá ánain mana vákuriyayá Tiyarafenui man baya yurafuriya rafono.

4 Para vara seyo, Tiyarafenui vompon dókifin máa sikhén mino, ‘Anóe afóeni aránaopa sá ore vá betin oo vá daiyono.’

Eks 20:12; Diu 5:16

Inká ‘Be anóe afóen ma ankayantin nain mano vá purino.’ *Eks 21:17; Riv 20:9*

5 Máa sikhén mifo inká tiretí ankan máa seya vanasi afova améiya ono, Banta ano ma ve anóe afóen ma moní ameno van inain mano kasaen Tiyarafenun amiren maen be anoifon máa sen tiaminten mino. En ma ameno seruna moní Tiyarafenun mi amé uno. 6 Máan ma iyain mai avúavá anon e anóe afóen oo vá daiyono sen Tiyarafenu ano ma sikhén bayan durafúdeya siretí anafu aráoni avúavá ánain manan bákuriya ono. 7 Tiretí ankan Tiyarafenui vaya ana sireya ída mai ánain dakhafin banta kéká ompo sakhanampa vanta Aisaiya ano siretí ankani avúava san ma siádan baré ein mai fura uron mi sikharen mino.

8 “ ‘Ma nanin banta kayo ano oo máa fókéi sen tiví daní iyan

mifo vetí ankani ará bá ineine vá ano nenta suron mi van mino.

9 Betí ankan dan bukhaafói séin monó tisintiyáken

barará bantai ineine máa fói vanasi afova amiyan mino.’ ” *Ais 29:13*

*Banasi Ma Maman Painí Íyaí Pákena
Van Ma Yisasi Sein Baya Ino
(Maki 7:14-23)*

¹⁰ Yisasi vanasi aran béi vaintá eríkan máa sen betin tiamemí, “Kamae inire vá ovare me ineno. ¹¹ *Nái yaná anó banta oofen ódiaren ná aúpin aravé iyan nafi mai ano ída véin maman painié iyan mifo ná yaná anó aú pinté édaaren ná oo fenté kuvé iyan nafi mai anon béin maman painié iyan mino.”

¹² Ínaimpáké eyo iyampon kayo ano Yisasi vaintá eriven béin máa sen inaemí, “Éi afová ukhen nan ná Farasisi kéká ano ma ma vaya kayo iniren aran dosé iyan nafino.”

¹³ Máa síkan Yisasi evaránen tiamemí, “Inarufá bain Tifóe ano ma ída yókaré inain dunan mai veyantái minó arú bá darinten mino.* ¹⁴ *Auu yufúkukhein banta kayo ano ma auu yufúkukhein banta ma aa aníen orinten maen minó ano masípin o ádinten mino. Betí ankan auu yufúkukhein kékái váken auu yufúkukhein kayo aa aní ono van mifo vetin mo ampeno.

¹⁵ Máa síkan Pita semí, “Mai ma ovaeran baya ma seona vaya ana setin tisimesí ineno.

¹⁶ Yisasi evaránen betin inaemí, “Ma ma ovaéadan baya ana siretin má dere ídá afová iya vae. ¹⁷ Minó daná oofen ma naáden nan arápin aravuaren mi masípin esanten oré iyan mifo siretí ankan ídá mai yaná afová ukhe fono. ¹⁸ Máan tukhen mifo vanta oo fenté ma kuvé iyain mai anon aú bá ineine vá pinté édiyan pasen mi vanta maman painí é iyan mino. ¹⁹ Banta aú pinte namu ineine kayo vá banta aruan purin má ena ana safi avafun nafi ma varen non avúavá bá pamúku avúavá bá umoyan avúavá bá kópin ma kampun tin má inká ena nanin banta ma namu vaya sen asiyain mái khuvé iyan mino. ²⁰ Minó mai avúava sinta anon Ti-yarafenu avorá banta maman painí é iyan mifo ayan ída seséin ma yunan pákaren niyain mai ano va vanta fainí é iyan naino. Ída ino.”

* **15:11:** Mat 12:34 * **15:13:** Mai ma arú bá darinten ne sikhein dunan maen mai Farasisi kéká ino. * **15:14:** Ruk 6:39; Rom 2:19 * **15:24:** Mat 10:6 * **15:31:** Mak 7:37

*Ena Anan Pinte Nanin Mano Ma Yisasi-
intá Mumunan Ein Baya Ino
(Maki 7:24-30)*

²¹ Yisasi mai varu me ampiren Taiya vá Saidoni vá varafá oren mino. ²² Oríkan mana Kenaní anan pinte nanin maifá bain baré íkan béi Yisasi vaintá eriven oovararen temí, “Bafan, Devitin Anin noe, se siraun namu aunan mano fákakhan kákan berai siyan bá umpo sen nan arunan usintano.”

²³ Máa síkan Yisasi ída evaránen mana vaya siyaimpin bei eyo iyampon kayo ano véi vaintá eriven béin ákonaen tiamemí, “Ma nanin mano ínanen oovaren eriyannan mifo siantan orino.”

²⁴ *Máa síkan béi evaránen mai nanin tiamemí, “Isareri kékái sipisipi kayo ma afeyokein nan manan Ti-yarafenu ano séin tisintá erikhé uno.”

²⁵ Máa siyain má mai nanin mano Yisasi-íni ádé eriven me aron kanan durafúden barafin mátimen temí, “Bafan noe, éi sen tiya ono.”

²⁶ Máa síkan Yisasi véin evaránen tiamemí, “Iyampon kayoi yunan ma máden betíi iyan kayo ma karúdaan amin mai ída funtáken mino.”

²⁷ Máa síkan mai nanin mano semí, “Bafan noe, éi fura siya ompo iyan kayo ano vetí afóeni sakhó aránaópá ma yunan antan eravein kasaen né iyan mino.”

²⁸ Yisasi mai vaya iniren evaránen tiamemí, “Anasi oe, éi ákona mumunan mái vaona éi ma afoká ino van ma iyaona mai yaná afoká inten mino.” Máan ma siyain áaurá anan mai nanin araun e asefaen mino.

*Yisasi Ma Kokhon Nanin Banta Ayofein
Baya Ino*

²⁹ Máa siren Yisasi mai varu me ampiren Kariri non akhempá oriyan baren mana anu avapá un kumanen mino. ³⁰ Un kumantan kokhon nanin banta ano véi vaipá eriyáken ai ayan púká ein nafi auu yufúkukhá ein nafi ai ayan ma namu ukhá ein nafi ída ma vaya siyá ein nafi inká ena aí daná ma vá ein kayo vá minó aviren mo ven arantampin aseren orera uran mai kéká ayofen mino. ³¹ *Ayofiyann

maen minó nanin banta ano onákan ída ma vaya siyá ein kayo ano vaya síkan ai ayan ma namu ukharé ein kayo evaránen puntarákan arantan ma namu ukharé ein maño e manten oríkan auu ma yufúkukharé ein kayo evaránen onákan iyaimpin banasi ano sakharen kokhon ineine en orera iyáken Isareri kékái Ayarafenun aví daníen mino.

*Yisasi Ma Kamí Kamí Tauseni (4000)
Vanta Yunan Amein Baya Ino
(Maki 8:1-10)*

³² *Daní iyákan Yisasi vei eyo iyampon kayo aran eríkan máa sen tiamemí, “Ma nanin banta maen dunan ída nan kanú manaú damúi sen má baká betín nan tirunan iyá umpo arafan bantí ma siantan oriyaren ayanafá auu entave entave intin eraven ankaminten mino.”

³³ Máa síkan eyo iyampon kayo ano véin tiamemí, “Ma vanta ída van kámá barafá ifo inte fáken ná minó ano kanaíen ma naren bereti kayo máderá máan nanin banta amenté tiferafuno.”

³⁴ Máa síkan Yisasi evaránen betí ankan inaémi, “Nái máa veretí tiretí ankan dáke fono.”

Máa sen ina íkan betí ankan temí, “Dan manápá ifo afápá kan un kádan bereti vá manáa sitó noyana kayo vái van mino.”

³⁵ Máa síkan Yisasi mai nanin banta van barará kumaneno síkan kumanen mino. ³⁶ Kumamíkan béi mai yan manápá ifo afápá kan un kádan bereti vá noyana kayo vá máden Tiyarafenu susu siantáden kisiren bei eyo iyampon kayo amíkan máden banasi amen oreraen mino. ³⁷ Amíkan minó nanin banta ano nákan amú kuriyaimpin eyo iyampon kayo ano antan o éke e éken uan dan manápá ifo afápá kan un kádan unan báen mino. ³⁸ Mai yunan ma nein mai kamí kamí tauseni (4,000) vanta ifo anasi iyampon ída yankafen mino. ³⁹ Narákan Yisasi mai nanin banta siantan orivin maen botifin un kumamen Makhadaní akhempá oren mino.

* **15:32:** Mat 14:14 * **16:1:** Mat 12:38; Ruk 11:16 * **16:2:** Manáa fefá ma uvantaré ein bompon dókifin ves 2 vá 3 vá ída varen mino. * **16:3:** Yisasi ma enará ukhein daná ma variyain betí ída oman afová uren mumunan en mino. * **16:4:** Mat 12:39; Ruk 11:29 * **16:6:** Ruk 12:1 * **16:9:** Mat 14:17-21 * **16:10:** Mat 15:34-38

16

Farasisi Kayo Ano Ma Yisinin Nan Inaru Fáke Avúavá Aní Intin Onano Van Ein Baya Ino

(Maki 8:11-13; Ruku 12:54-56)

¹ *Farasisi kayo vá Sadyusi kéká bá ano Yisasi vaintá eriven béin akhenóka uan onano van inaru fáke mana aní daná aní intí onano van béin inaen mino.

² Ina íkan Yisasi evaránen betí ankan máa sen tiamemí, * “Inupasí íkan ma ayontá ma nararé íka maeyan inuran afe intin mino séiya ono. ³ Inká ákurá ma onen nan ma sókon konan ma yampa maeya saréa uva intin á danten minon téiya ono. Ayontá ma afoká ein avúavá tiretí ankan ódeyan daíde afová éiya ompo saréa ma afoká iyain danasinta siretí ída yaimiya ono.* ⁴ *Taréa ma vain mai namu avúavá baran nanin banta vá Tiyarafenurá ída ákonaen monó tin nanin bantan báken ena ena aní daná aní intí onano van manan iyan ban mifo veti ankan ída kanaíen mana aní daná daná onanten mino. Aní daná ma mana veti onan nain mai sakhanaampa vanta Yonani aní daná ana ino,” siren Yisasi vetin me ampiren oren mino.

Farasisi Kayo Vá Sadyusi Kéká Bái Yisi Fákena Vaya Ino

(Maki 8:14-21)

⁵ Yisasi vei eyo iyampon kayo vá non akharun ekháden ena ufá oriyákan beni eyo iyampon kayo ano á úden ída vereti varen mino. ⁶ *Oriven Yisasi máa sen betí ankan tiamemí, “Farasisi kayo vá Sadyusi kéká báí yisi vará dafian ná ákona ono.”

⁷ Máa síkan beni eyo iyampon kayo ano vetiyan máa sen oreraemí, “Tetí ankan ma ída vereti varé erikheruna van mi véi mai vaya sen mino.”

⁸ Betí ankan ma siyain baya Yisasi afová uren máa sen betin tiamemí, “Titó mumunan bain kéká soe, fará tiretí ma vereti ída manteona van baya siya rafono. ⁹ *Tiretí ankan ídá afová ukhe fono. Dan manápá tauseni (5,000) vanta ano ma yan manápá bereti nara maeya antan dunan náí máa

unan ná bÍke fono. ¹⁰ *Inká dan manápá ifo afápá kan un kádan bereti ma kamí kamí tausení (4,000) vanta ano ma nara maeya antan dunan náí máa unan ná bÍke fono. ¹¹ Téi ída vereti van tiamiyá umpo fará tiretí ída afová iya rafono. Farasisi kayo vá Sadyusi kéká báí yisirá dafían ákona ono van mi séi siamiyá uno.” ¹² Máa síkan betí ankan iniren afová uren temí, “Béi ída veretifin ma kain yisi van tiyan mifo mai Farasisi kayo vá Sadyusi kéká báí kampun afova ma amiyain bayará dafíben bano van mi siyan mino.”

Pita Ma Yisasi Nan Tiya rafenu Ano Ma Aní Ukhein Banta Ono Ma Sein Baya Ino
(Maki 8:27-30; Ruku 9:18-21)

¹³ Yisasi ma Sisariá Piripai kayoi varafin ma oriven maen máa sen bei eyo iyampon kayorá inaemí, “Banta Anin nan banasi ano iye inó ten iniyan nafino.”

¹⁴ *Máa síkan betí ankan temí, “Manáa ano éi nan monó non péantan banta Yoni ino sin maen ena kéká ano Iraiya ino siyákan inká manáa ano sakhanampa vanta Yeremaiya fi áa mana ena sakhanampa vanta fin banten mino siyan mino.”

¹⁵ Máa síkan Yisasi vetí ankan inaemí, “Mai siretí ankan te nan iye inó té iniya rafono.”

¹⁶ *Máa síkan Saimon Pita evaránen temí, “Tiyarafenu ano ma aní ukhein bantan éi váke ayun para van oriyan ma vain Tiya rafenu Anin mono.”

¹⁷ *Máa síkan Yisasi evaránen béin tiamemí, “Yonin anin Saimoni oe, éi amusin ná ono éin ída mana varará banta ano ma veya anien mifo inarurá ma sen Tifóe vain manon aní uanten mino. ¹⁸ *Aní uantákái séi máa sé éin tiamé uno. Éi Pitan* ban ná mai onámaná daróí sesi vanasi ma mumunan iyain kéká o éke e éke uré átaru uan kaúdekun mai ma furin nanin banta ma o iyiyain barui ákona ano ída kanaíen mai kéká esantaren maman bararasí inten mino. ¹⁹ *Inaru yafisin pintena ki kayo séi minó éin amenté umpo

éi náí yanasá ma varará pákaan ákona intefo mai inarurá bá pákaan ákona inten mino. Pákaan ákona inten mifo éi ma ma varará ampinona yanasintan mai inarurá bá ampiantanten mino.” ²⁰ Máa siren Yisasi veyan nan Tiya rafenu ano ma aní ukhein banta ino sen ena nanin banta ída siamino van bei eyo iyampon kayo airo ananí uanten mino.

Yisasi Ma Veyan Púaren E Mantan Nain Nan Ma Sein Baya Ino

(Maki 8:31–9:1; Ruku 9:22-27)

²¹ Mai ráké ma Yisasi e manten Yerusalemí orintin ma ven aurá afoká inain daná máa vei eyo iyampon kayo siamen mino. Ánon banta kéká bá monó ánon banta kayo vá man baya ma afová ukhein banta kayo vá ayampin ma orintin béin pákaren namu arirí uren kamanini aruvín banta kéká ayampin kaintin aruan púdantin ma kanú manaú damusí intin maen evaránen aunan baren e mantanten mino.

²² Pita mai veya iniren Yisinin aviren akhempá moren béin ákonaen asemí, “Bafan noe, Tiya rafenu ano ída vá áintin ma yaná ano en aurá afoká ino.”

²³ Máa síkan Yisasi yo vaéaren Pitan nan temí, “Ban Anon noe, soyampá entavono. Éi senti aan iyariya ono. Éi ída Tiya rafenui ineine ánain dakhafiya ompo varará bantai ineine ánain mi yakhafiya ono.”

²⁴ *Máa siren Yisasi vei eyo iyampon kayo máa sen tiamemí, “Mana vanta ano ma sen tínain bákurono ma sinten ná bei anunu ampintin barará erafuvintin ná bei yaa unkamádan mamaren ná ten tínain bákurino. ²⁵ *Mai fara vara seyo, mana vanta ano ma vei aunan pákaan ákona ukharé intin maen mai veni aunan o afeyoranten mifo mana vanta ano ma se nan iniren ma vei aunan ampiádákaren maen mai ano vei aunan evaránen baranten mino. ²⁶ *Mana vanta ano ma minó ma vara ráke yanasinta ana ma variyá intin ma veni aunan ma o afeyorantin maen intesá uren ná mai minó danasinta

* **16:14:** Mat 14:1-2; Mak 6:14-15; Ruk 9:7-8 * **16:16:** Efe 2:20 * **16:18:** Pitan nan onámaná ino sen mino. Ruk 14:27 * **16:25:** Mat 10:39; Ruk 17:33; Yon 12:25 25:31; Rom 2:6; Rev 22:12

Yon 6:69 * **16:17:** Kar 1:15-16 * **16:18:** Yon 1:42; * **16:19:** Mat 18:18; Yon 20:23 * **16:24:** Mat 10:38; * **16:26:** Mat 4:8-9 * **16:27:** Íbo 62:12; Pro 24:12; Mat

ano véin aya inten nafino. Intéa yaná pókesá banta ano evaránen bei aunan miyaní inten nafino. ²⁷ *Para vara seyo, Banta Anin mano ma ve Afóeni kákan kakhan má bei enisori kayo vá ma erin nain maí damúi vanasi ano ma variyá inona avúaváká ten mi yaíden mana mana miyan aminten mino. ²⁸ Téi fura siré tiretí ankan tiamé uno. Ma ma saréa ma mantakheona kéká pinté ída manáa ano fúkesin mi Banta Anin mano kin an daven erinti onan nono.”

17

Yisasini Minó Bukhafa Ma Enará Ein Baya Ino

(Maki 9:2-13; Ruku 9:28-36)

¹ Dan manápá ifo afápá mana un kádan damú orivíkan Yisasi ano Pitan má Yemisin nú Yonin nú anavasan má avíaren mana ayá anurá un baren mino. ² *Un baren betí ankan onákan Yisasin au ano enará iyain má ben auná ano áau ma kheini íkan beni auí daná ano efanten uron en mino. ³ Máan tiyain má Mosesin nú Iraiya nú ano mairá afoká uven Yisasin má baya siyákan betí onen mino.

⁴ Ódaren Pita máa sen Yisasin tiamemí, “Bafan noe, setí ankan ma mará banuna mai kama ukhen mifo éi iniresirá iyon baran namun kanú manaú téi uvarano. Mana en nina vantin mana Mosesin nina vantin inká ena Iraiyan nina vantin ino.”

⁵ *Pita ma fara vaya siyákan maen mana fanu sikhein konan mano vetí ankan úkan daran má darákan mai konan pinté mana vaya ano máa semí, “Ma sen Tanin mino. Téi ve nan moeké tinunu iyá uno. Téi venan timusin iyá uno. Ben avaya vá ineno!”

⁶ Mai vaya ma vetí ankan iníden akhokho van iyan barará baven auná bara finien mino. ⁷ Máan tiyákan Yisasi vetí áde eriven au aruviyáken temí, “Tiretí ankan ída vá akhokho van eya orun mantano.” ⁸ Máa síkan betí ankan orun mantaven onákan Yisasi má ída mana ano van beya ana varen mino.

⁹ Betí ankan ma anuyon me ampiren eriyákan maen Yisasi ákonaen betín tiamemí, “Ma yaná ma siretí ankan oneona mai ída vá mana nanin banta siamikhesin ná Banta Anin ma van oriyon ma fúaren purin pinté e mantavinti vá tiameno.”

¹⁰ *Máa síkan eyo iyampon kayo ano véin inaemí, “Paraé tiren ná man baya ma afová ukhein banta kayo ano Iraiyan nare vá erivintin ná ino sé iyan nafino.”

¹¹ Máa sen ina íkan béi evaránen temí, “Mai fura vaya ino. Iraiya eriven minó daná evaránen puntáadanten mino.

¹² *Puntáadanten mifo séi siretin tiamé uno. Iraiya fefái erikhan minó nanin banta ano ída véin afová en pasen betí anunu ánain dakhafen béin aurá ara ara namu avúavasien mino. Máan avúavá anan Banta Anin aurá inten mino.”

¹³ *Yisasi ma máa siyákan maen betí ankan afová en monó non péantan banta Yoni van mi siyan mantino sen inen mino.

Namu Aunan Bá Ein Iyampon Ma Yisasi Ayofein Baya Ino

(Maki 9:14-29; Ruku 9:37-42)

¹⁴ Betí ankan ma vanasi vaintá erákan maen mana vanta ano Yisasi vaintá me aron kanan durafúden mátimen temí,

¹⁵ “Bafan noe, éi sen tanin nan arunan uantano. Béi auyayaní uaren kokhon damú irafin kákiyan non ádiyan iyá uno.

¹⁶ Ei eyo iyampon kayo vaipá avían morékun maen betí ankan ída kanaíen béin ayofaríen mino.”

¹⁷ Máa síkan Yisasi evaránen tiamemí, “Tiretí ankan ída mumunan ukheona nanin bantan banan mi siretí ineine vá avúavá bá ída funtáken mino. Nái máa yamusá téi siretin má para vante rafuno. Nái máa yádasá téi siretí uman evarané bariyá bante rafuno. Mai iyampon avire séi varunará ereno.” ¹⁸ Máa síkan mai iyampon avían meran Yisasi mai namu aunan ákonaen asiyain má me ampiren orivíkan beni aí kípen mino.

¹⁹ *Máan turákan inaimpáké beni eyo iyampon kayo ano ana aúpáké béi vaintá eriven inaemí, “Pará tetí ankan ída

* **17:2:** 2Pi 1:16-18

* **17:5:** Diu 18:15; Íbo 2:7; Ais 42:1; Mat 3:17; Mak 1:11; Ruk 3:22

* **17:10:** Mar 4:5

* **17:12:** Mat 11:14

* **17:13:** Ruk 1:17

* **17:19:** Mat 10:1

* **17:20-21:** Mat 21:21; Mak 11:23; Ruk 17:6;

1Ko 13:2

kanaíé namu aunan do siantiya rafuno.”
 20-21 *Máa síkan béi evaránen betí ankan tiamemí, “Tiretíi mumunan titó máan bákayai ída kanaí iya ono. Téi fura siré tiretin tiamiyá uno. Para vara seyo, siretíi mumunan mano ma mastati yaa aran aú an den ma sító suron ma vantiya mai siretí kanaíeya ma anuyon nan ma mesapá e afáne orono ma sesin maen orinten mino. Máan tiyasin maen mana yaná ano siretimpin ída kanaíen uman danten mino.*

Yisasi Veyan Ma Fúaren E Mantan Nain Nan Ma Kan Dádasí En Tein Baya Ino
 (Maki 9:30-32; Ruku 9:43-45)

22 *Betí ankan ma Karirí barafá o átaru uvin maen Yisasi máa sen betin tiamemí, “Banta Anin avían namuro kayo ayampin aminten mino. 23 Amirantin ma véin arintin púkaren maen kanú manaú damusí ma intin e mantanten mino,” síkan eyo iyampon kayo ano mai vaya iniren arunan en oreraen mino.

Kákan Monó Namun Ayain Moní Ma Karúdan Baya Ino

24 *Ínaimpáké Yisasin má bei eyo iyampon kayo vá ano Kapeniamú barurá onóbikan monó namun ma ayain moní ma varan banta kéká ano eren me Pitan máa sen inaemí, “Tiretíi arú ano kákan monó namun ma ayain moní amé iyan nafino.”

25 Máa sen ina íkan Pita evaránen temí, “Eyo amé iyan mino.” Máa siren ma Pita mápin un pében ída vaya sikhian maen Yisasin nare véin inaemí, “Saimoni oe, éi inte é teyá iniya fono. Ma vara ráke kin kayo ano ara ara sákisi iyen pinten ná baré iyan nafino. Betíi kéká pinten ná baré iyan nafi áa ena kéká pinten ná baré iyan nafino.”

26 Máa sen ina íkan Pita evaránen temí, “Ena kéká pinten nan baré iyan mino,” síkan Yisasi véin tiamemí, “Máan tukhan mi vetíi kéká ano ída vetíi sákisi amé iyan mino. 27 Máan té iyan mifo vetin aran amétifa nampo araveya vá morun non

akharumpin úku karúdareya esé ma ari- nona noyana oo yavódeya vá mai oofen- tena ma onanona monisá bareya kákan monó namun ma ayain ná erasantina mun ameno,” síkan mai ma seiní uren bare mun amen mino.

18

Inaru Yafisimpin Iyé Kákaní Inten Nafino Ma Sen Ina Ein Baya Ino
 (Maki 9:33-37; Ruku 9:46-48)

1 *Maí damú eyo iyampon kayo ano Yisasi vaintá eriven máa sen inaemí, “Inaru yafisimpin iyé kákaní inten nafino.”

2 Máa síkan Yisasi mana arará iyampon aran eríkan betin aúbaná avían manten mino. 3 *Avían mantaren máa semí, “Téi fura siré tiretin tiamiyá uno. Tiretí ma ída evaráne arará iyampon kayo an ma yanteya mai ída kanaíeya inaru yafisimpin orin nono. 4 Máan tukhantin mi iye anó beyan maman bararasí uren ná ma iyampon arará an ma yiyaré in- ain manon inaru yafisimpin kákaní inten mino.

5 *“Inká iyé ten nan iniren ná mana máan tukheín iyampon arará aya inten nafi mai sen mi siya inten mino.

Umeín Avúava San Ma Yafíken Ban Baya Ino
 (Maki 9:42-48; Ruku 17:1-2)

6 Máan tinten mifo ma iyampon arará kayo finté mana ano ma sentá mumunan ukharé intin ma mana vanta ano ma vetin maman umefin kaintin ma eraven ankantaré intin ínaimpá mai vanta moékan uman baran nafo véin amempin ná kákan konkamú onámaná kureya vá un nompin karúdan námen aravuken ná non ufuren purino.

7 “Intéa vanta anó ena kayo e yarifaan umefin kain ná eraven ankamiyan nafi mai kayo ano kákan uman uron mi varan- ten mino. Mai namu avúavá afoká inten mifo iyen banta fintesá mai yaná afoká inten nafi mai anon kákan uman uron

* 17:20-21: Manáa vompon dókifin ena vaya ves 21 fin máa sen asotú ukhen mino: Máan namu aunan mano ída fara orinten mifo yunan ma auraren amúkin manan oré iyan mino. * 17:22: Mat 16:21 * 17:24: Eks 30:13; 38:26 * 18:1: Ruk 22:24 * 18:3: Mat 19:14; Mak 10:15; Ruk 18:17 * 18:5: Mat 10:40; Ruk 10:16; Yon 13:20

* 18:8: Mat 5:29-30

baranten mino. ⁸ *Éin ayan arantan mano ma e yarifaan umefin ma kaintiya vá mai yo síkareya karúdan ná orino. Mana ayan má mana arantan má ana ma varéintiya mai ída furin ayun ma van oriyan ban aunan baran nono. Míkanan ayan má arantan má ma vantiya ma umeí ukharé inte mae mai ída kípan irafin mi karúdanti orin nono. ⁹ Éin auu ano ma e yarifaan umefin ma kaintiya vá mai auu yo vian karúdan ná orino. Mana auu ana ma varéintiya mai ída furin ayun ma van oriyan ban aunan baran nono. Míkanan auu ma vantiya ma umeí ukharé inte mae mai ma íra khiyan ma uman baren berai siyan purin barufin mi karúdanti aravin nono.

¹⁰⁻¹¹ *“Ma arará* kayo fintena siretí ankan oman tító danasí inampo yafían ná ákona ono. Inaru fáké betíi enisori kayo ano ena ena inarufá ma vain Tifóen avorái váé iyan mino.*

Sipisipi Afeyorantá Ma Sian Báédan Baya Ino
(Ruku 15:3-7)

¹² “Tiretí ankan inte esá té iniya rafono. Mana vanta ano ma mana antareti sipisipi yakaré intin mai fintena ma mana afeyóbintin maen mai van ída dosinten nafino. Ídá nainti naini (99) me khaintin anurá bantin ná mai mana sipisipi ma afeyókein nan dosinten nafino. ¹³ Dosiren ma avíaren mai mana sipisipi van ma amusin inain manon nainti naini (99) sipisipi ma ída afeyoran para vain nan ma amusin inain esantanten mino. ¹⁴ Máan manan en tiretí Afóe ma inarufá bain mano ma arará kayo fintena ída mana afeyorano van inikhen mino.

Mumunan Ayofi Afá Aváeyan Mano Ma Umeí Uantádanti Ma Funtaran Nona Fákena Vaya Ino

¹⁵ *“Mumunan ayofi afá aváe ano ma en nina yaná ma auí uran tiya vá éi

vempákesá béin o avíde vá beni namu avúava san tiamíde aúpasá tirékan puntarano. Puntaresin ma eni vaya ma véi ininti mae vá mai éi ei mumunan afá aváen mi evaráne avire ono. ¹⁶ *Aviran nompo véi ma eni vaya ída ininti mae vá “mana vanta fi kan banta fi avíareya oresin ná kan mano fi kanú manaú ano fi vá mai vaya mo iníden puntarano.” *Diu 19:15*

¹⁷ Máan tesi ma véi ída vetíi vaya ma inintiya vá mumunan nanin banta siamesin ná mai vaya iniren puntarano. Puntarantin ma ída inintiya vá mai véin manan ída mumunan bain banta kayo vá takisi varan banta kéká bá an dakhen mino vá tire onano.

¹⁸ *“Téi fura siré tiretí ankan tiamé uno. Inte yanasá ma varará pákaan ákona intefo mai inarurá bá pákaan ákona inten mifo éi ma ma varará ampinona yanasintan mai inarurá bá ampiantanten mino.”

¹⁹ *“Téi evaráne tiretin tiamé uno. Ma varará ma kan mano ma mana yaná barano van ma ará manafiní ureya ma amúkesin maen te Sifóe ma inarufá bain mano siré kanan aminten mino. ²⁰ Para vara seyo, kan nafi kanú manaú ano fi ma sen tiviká ma átaru intí maé mai séi vetin aúban banté uno.”

Ída Ena Van Arunan Uantan Doran Bantai Avúavá Baya Ino

²¹ Mairá Pita eriven Yisasin máa sen inaemí, “Bafan noe, sífá tiváe ano ma auí usintádanti maé mai náí máa yádasá béin tirá amente rafuno. Dan manápá ifo afápá kan un kádan dádasá fino.”

²² *Máa síkan Yisasi evaránen béin tiamemí, “Téi ída seveni yáda se sé éin tiamikhé uno seventi taims seveni (70 x 7)* yáda sen tikhé uno.*

²³ “Máan tukhein nan mi mana kin pintena ma vei yoran banta kéká ano ma manáa moní mantáin ma evaránen barano van ma funtaré iyainíi inaru

* **18:10-11:** Ibu 1:14 * **18:10-11:** Arara se ma sikhein mai varará kusen ban ma ída aau varan mumunan iyain kayo fi áa arará iyampon kayo varafin tikhen mino. * **18:10-11:** Manáa Tiyarafenui vompon dókifin ves 11 asotú en máa sikhen mino: Afeyóká ein kayo yosiré avirano van mi Banta Anin mano erikhen mino. * **18:15:** Ruk 17:3; Kar 6:1 * **18:16:** Yon 8:17 * **18:18:** Mat 16:19; Yon 20:23 * **18:19:** Mak 11:24; Yon 15:7 * **18:22:** Ruk 17:4 * **18:22:** Áa seventi seven * **18:22:** Seventi taims seveni mai ena ena yamusá ume ampiente oriya vano.

yafisin ukhen mino. ²⁴ Tiyan míkan miri-
oni moní ma mantaré ein banta nare fun-
tarano van béi vaintá aviren eren mino.
²⁵ Meran mai vanta ano ída kanaíen mai
moní evaránen amiyaimpin kin mano vei
yoran banta siamemí, ‘Ma vanta vá be aná
akhá bá bei minó danasinta vá sarí uresin
miyaní uaranti vá tesi moní máa ovaráne
simeno.’

²⁶ “Mai yoran banta ano ma mai vaya
iniren kin arantampin mo aron kan du-
rafúden mátimen ínanen inaemí, ‘Éi se nan
arunan usintádeya sive ukhesirá éin pinte
ma mantáeruna moní máa evaráne anona
ameno.’ ²⁷ Máa síkan mai kin mano vei
yoran banta van arunan uantáden ifáin
oren mino.

²⁸ “Ifá uantáden mai yoran banta ano
e khuven barufá aravuken onákan bei
mana yoran banta eríkan ben amen bana
oo fákaan ákona uaren máa sen tiamemí,
‘Éi ma sen pinte mantaré eona moní máa
anona aine simeno.’

²⁹ “Máa síkan bei mana yoran banta
ano mai vaya iniren aron kan durafúden
mátimen ínanen inaemí, ‘Éi se nan arunan
usintádeya sive ukhesirá éin pinte ma
mantáeruna moní máa evaráne anona
ameno.’

³⁰ “Máa síkan maen mai vanta ano ída
inin na vei mana yoran banta aviren
mo karavusifin kaurantin báken bei moní
evaránen anona amino van karavusifin
mo khaen mino. ³¹ Minó bei mana yoran
banta kéká ano véi ma varein avúavá
ódaren kákantá ará namu uren mai vaya
kin mo siamen mino.

³² “Mo siamíkan kin mano mai yoran
banta aran eríkan máa sen béin tiamemí,
‘Éi namu yoran banta ono. Éi ínane séi
vaipá inaen ná maéi éi ma mantaré eona
moní máa mo ifá uanté uno. ³³ Téi ma
en nan tirunan uanterunaí eya éi fará ei
mana yoran banta van ída arunan uante
fono.’ ³⁴ *Máa siren kin mano aran má
tíkan karavusirá ma yafisin banta kéká
ano mai yoran banta e fáken mo khaintin
báken béin pinte ma mantaré ein moní
máa anona evaránen amino van en mino.

³⁵ * “Tiretí ankan ma mununan afá
aváeyan má ayó má báí ume ma ída fura

seya aúkáké ampianiyaré esin maen te
Sifóe ma inarufá bain mano mai avúavasí
anan tiretin uantanten mino.”

19

Ábasu Ma Yurafurin Avúavá In Baya Ino (Maki 10:1-12; Ruku 16:18)

¹ Yisasi ma mai vaya kayo sian kíparen
Karirí bara me ampiren e manten Yodení
non e kháden Yudiá barafá oren mino.
² Oríkan kokhon nanin banta ano ven
bákuren orin maifin ma aí bá ein kéká
ayofen mino.

³ Ayofiyákan Farasisi kéká ano Yisasi
vaintá eriven béin mákaan onano van betí
ankan máa sen ben inaemí, “Éi inte esá té
iniya fono. Man baya ano kanaé tikhan ná
banta ano vei anunurá be aná tiantanten
nafino.”

⁴ *Máa síkan Yisasi evaránen betin
tiamemí, “Tiyarafenu ano esé aráintá ma
vanta vá anasi vá ma uvantá ein tiretí
ankan ídá bompon dókifin dankádé afová
ukhe fono. ⁵ * ‘Mai van mi vanta ano ve
anóe afóen me ampiren be aná bá o súpá
en mana vukhafái é iyan mino.’ *Esé 2:24*
⁶ Máan tukhein nan mi míkánan ída kanaí
ukhen mifo mana vukhafái ukhen mino.
Mai van mi Tiyarafenu ano ma vékan
maman túpá uran nain banta ano ída
yurafurinten mino.”

⁷ *Máa síkan Farasisi kéká ano véin
evaránen inaemí, “Pará Mosesini man
baya ano sen ná banta ano vá bompon
uvaman e aná amídeya vá tiantano sikhén
nafino.”

⁸ Máa síkan Yisasi evaránen betí ankan
tiamemí, “Tireti aú avétan in kékái vanan
mí Mosesi kana ino sikhaya anasi sianti-
yare ompo esé aráintá ída mai avúavá
baren mino. ⁹ *Téi siretí ankan tiamiyá
uno. Mana vanta aná ano ma ída ena
vanta yarifen non nain ma véin tiantáden
ma ena nanin baranten maen mai vanta
ano ena ana safi avafun nafi ma vare non
avúavái varen mino.”

¹⁰ Máa síkan eyo iyampon kayo ano mai
vaya iniren Yisasin tiamemí, “Tiyarafenu
ma esé aráintá ma sikhá ein baya ánain
dakhafin ma uman dakhantin maen mai
vanasi ano ída vá ábusuí ino.”

* **18:34:** Mat 5:25-26 * **18:35:** Mat 6:15; Mak 11:25; Efe 4:32; Kor 3:13 * **19:4:** Esé 1:27; 5:2 * **19:5:** Efe
5:31 * **19:7:** Diu 24:1-4; Mat 5:31 * **19:9:** Mat 5:32; 1Ko 7:10-11

11 Yisasi evaránen betí ankan máa sen tiamemí, “Ída minó ano ma vaya kanaíen ininten mifo Tiyarafenu ano ma manáa nanin banta ákona amikhein mai kayo ano anan mai vaya ánain dakhafinten mino. 12 Para vara seyo, manáa iyampon avankan namu ukhein kaé iyan mino. Inká manáa vanta ano avankan do visiyan maen inká manáa ano inaru yafisin pinta yorari ono van anasi varan airo ananí uren báe iyan mino. Máan tukhen mifo vanta ano ma ma vaya kanaíen ma inin nain mano vá mai ánain dakhafino.”

Yisasi Ma Arará Iyampon Arintan Avu Uantein Baya Ino

(Maki 10:13-16; Ruku 18:15-17)

13 Máa sirákan Yisasi ayan ánontá kaúden amúkuantano van banasi ano arará iyampon arinta aviren eríkan maen eyo iyampon kayo ano vetí ankan ákonaen asen mino.

14 *Asiyaimpin Yisasi máa semí, “Tiretí ankan áesin ná arará iyampon arinta se vaipá erino. Tiretí ída vá betin ayópá ono inaru yafisin mai arará iyampon arinta kayo an ma yákein nanin banta ina ino.”

15 Máa siren iyampon arinta ánontá ma véi ayan kaúden avu uantáden maen mai varu me ampíren oren mino.

Kokhon Ona Ma Vain Pumara Vantai Vaya Ino

(Maki 10:17-31; Ruku 18:18-30)

16 Oríkan mana vanta ano Yisasi vaintá eriven temí, “Aru soe, séi inte avúavasá kama urerá ayun ma fara van oríyan ban aunan barante rafuno.”

17 *Máa síkan Yisasi evaránen béin tiamemí, “Pará kama avúava sinta van téin ina iya fono. Tiyarafenu veyáká anan kama ukhen mifo éi ma ayun para van oríyan ban aunan ma varano sinte vá Tiyarafenui man baya kayo ánain ná dakhafono.”

18 Máa síkan mai vanta ano Yisasin in-aemí, “Inte man baya kayo vará éi siya fono.”

Síkan Yisasi evaránen béin tiamemí, “Máan ma síkhein man baya kayo van mi siyá uno.

‘Tiretí ankan ída vá ena nanin banta aruan purono.’

‘E ábasu ano ída vá ena ana safi avafun nafi vare nono.’

‘Tiretí ída vá umoyan barano.’

‘Tiretí ída vá kampun tireya ena nanin banta kó tiantano.’

19 ‘Tiretí ankan anóe afóeni aránaopa sá oreya vetin oo vá daiyono.’ *Eks 20:12-16; Diu 5:16-20*

Inká ‘eyan nan ma anunu iyaonaíe vá ena van anunu ono.’” *Riv 19:18*

20 Máa síkan mai fumara ano semí, “Téi minó mai man baya kayo ánain dakhafiyá umpo mai ena inte man baya ánain ná dakhafonte rafuno.”

21 Máa síkan Yisasi evaránen béin tiamemí, “Éi ma funtákeiní uron ma ono vará minó ei ona mo sarí ure vá ona ma ída van nanin banta vá mai moní ameno. Éi ma máan tinteya enina inarurá kokhon kama yana suron banten mifo éi ere sen bákurono.”

22 Máa síkan mai fumara ano kokhon ona yákaren pasen mai vaya iniren anomé inivaen ifá en oren mino.

23 Orivíkan Yisasi vei eyo iyampon kayo máa sen tiamemí, “Téi fura siré tiretin tiamé uno. Kokhon ona ma vain banta kayo ano ma inaru yafisimpin ma orin mai uman dakhen mino. 24 Téi enadá bá evaráné tiretin tiamenté uno. Kameri ano ma ufi aimpin ma ódin mai uman dakhen mifo kokhon ona ma yákein kéká ano ma Tiyarafenui yafisin barufin ma ódin mai moéken uman mi yakhen mino.”

25 Máa síkan eyo iyampon kayo ano mai vaya iniren anúden oreraen temí, “Máan ma ukhantin maen mai iye ná Tiyarafenu ano kanaíen aviranten nafino.”

26 *Máa síkan Yisasi vetin auufen kakháben temí, “Minó banta ano ída kanaí inten mifo Tiyarafenu ano veyáká anan kanaíen minó danasí inten mino.”

27 Máa síkan Pita evaránen temí, “Ineno minó daná teti me ampíré éin bákuriyá umpo mai setí ankan ena ná yanasá bará tifante rafuno.”

28 *Máa síkan Yisasi evaránen betin tiamemí, “Téi fura siré tiamiyá uno. Ínaimpá ma minó daná ma auyení uvintin

* 19:14: Mat 18:2-3 * 19:17: Riv 18:5; Ruk 10:28 * 19:26: Yop 42:2 * 19:28: Mat 25:31; Ruk 22:30; Rev 3:21

maen Banta Anin mano ma kákan bí maren bei kin karáká ma kumanin nain damúí sen tñain ma vákure nóinona vanta kéká ano sirantan kan orun kádan (12) kama ukhein kini karáká kumameya sirantan kan orun kádan (12) Isareri anantá dafisin nono. ²⁹ Inte kéká anó ten tivi san iniren ná be ama safi afá aváen nafi ayofin nafi ve anóe afóen nafi* inká be akhafana fi yunan ana fi ma me ampikharéin nain kéká anon ena antareti yádá bá (100) máden inká ayun ma fara van oriyan ban aunan má baranten mino. ³⁰ *Baranten mifo saréa ma esé an ma vain kayo ano ínainí intin maen anona ínain ma vain kéká ano un aní inten mino.

20

Uvaini Yunan Anafin Ma Yoran Banta Kékáká Ma Ovaéadan Baya Ino

¹ “Para vara seyo, inaru yafisin mai máan mi ukhen mino. Mana vanta ano vei uvaini yuna anafin dorano van banta kayo avirano van pe ákurá e manten oren mino. ² Mai vanta kayo van maná damúke na miyan amenté uno síkan kana ino sin betin tiantan uvaini yunampin dorantá oren mino.

³ “Nain kiroki inafá mai kákan banta ano oriyaren o onákan banasi ma átaruiyain barurá manáa vanta kéká ano fara mantakhen baren mino. ⁴ Mantakharé íkan béi máa sen betin tiamemí, “Tiretí ankan má dere oreya senti uvaini yunan anafin mo yoriyaréesí maé puntádé miyan amenté uno. ⁵ Máa sin mai kéká orivíkan mai kákan banta ano vayan bero vá inúpa kanú manaú áaurá bá evaránen máan mana en mino. ⁶ Inúpáké dan manápá áaurá béi oriyaren o onákan manáa vanta kayo fara mantakhen baré íkan béi máa sen betí ankan inaemí, ‘Náisá ukhayá ma áau ayá ayá pasavi mantakhé ba rafono.’

⁷ “Máa síkan betí ankan evaránen béin tiamemí, ‘Mana vanta ano ída setin doran timikhái vá tiféuno.’

“Máa síkan mai kákan banta ano vetin tiamemí, ‘Tiretin má dere oreya senti uvaini yunan anafin mo yorano.’

⁸ * “Máa siran doriyaréin ma inúpasí íkan maen mai uvaini yunan anan afóe ano vei yorantá ma ayafaí ukhein banta máa sen tiamemí, ‘Taréa ínainpáké ma me yorein kéká nare vá arái eya miyan ame ore ore vá esé ma me yorein kéká tasore ínainpasá mo ameno.’

⁹ “Inúpáké dan manápá áaurá ma me yorein kéká ano nare eriven maná damúkáke miyan puntáden mana yanka mádú mádú en mino. ¹⁰ Mamaran pe ákurá ma me aráien dorein banta kéká ano eriven tetí ankan kokhon moní i varanté uno siren iyaren mifo vetin má dere funtáden manaí ukhein miyan manan baren mino. ¹¹ Mai moní ma máden ódaren maen dunan afóen máa sen kouánten mino, ¹² ‘Tare ínainpa suron ma erein banta kéká ano mana áaurá me yódayai setin má manaí miyan amiya ompo seti fe ákura suron mi me ákonaé doriyákun kákan á tikhakhen mino.’

¹³ “Máa síkan dunan ana afóe ano mai vaya iniren mai yoran banta kéká pintena mana vanta evaránen tiamemí, ‘Tirona oe, séi ída namu iyá uno. Esé dorano van ma iyan ná ma maná damúkáke miyan nan ina éku mae ídá kana ino sikhare fono. ¹⁴ Ei miyan mamareya orono. Tesi sinunurái ínainpá ma erein banta kayo vá manaí miyan amiyá uno. ¹⁵ Mai sesina yaná ifo ídá tesi sinunurá tesi moní dai-monte rafuno. Téi ma ma vanta kayo kama avúavá uantiyaruna vará éi ará namu uantiya fono.’

¹⁶ * “Máan tukhanti mi ínain ma vain kéká ano esé un aní intin maen esé ma aní ukhein kayo ano ínainí inten mino.

Yisasi Veyan Ma Fúaren E Mantan Nain Nan Ma Kanú Manaú Dádasí En Tein Baya Ino

(Maki 10:32-34; Ruku 18:31-33)

¹⁷ Yisasi ma Yerusaremí ódiyáken maen tiyan mikan mifo sirantan kan orun kádan (12) bei eyo iyampon máa aviren mo áupá kaúden betí ankan máa sen tiamemí, ¹⁸⁻¹⁹ * “Taréa setí ankan ma Yerusaremí ódé tifékun maen manáa kéká ano Banta Anin avían monó ánon banta kéká bá

* **19:29:** Manáa vompompin anóen narafi áa vanta aná barafin tikhen mino. * **19:30:** Mat 20:16; Ruk 13:30

* **20:8:** Riv 19:13; Diu 24:15 * **20:16:** Mat 19:30; Mak 10:31 * **20:18-19:** Mat 16:21; 17:22-23

man baya ma afová ukhein banta kayo vá ayampin ma amintin maen béin aruan purino van monó namuntá ma yafikein kéká ano ena anan banta kéká ayampin aminten mino. Máan turantin béin máká maáká uren intiren dafiyopó ankáden daa unkamádantá arintin púkaren kanú manaú damusí ma intin evaránen e mantanten mino.”

Yonin Nú Yemisin Núi Anóe Ano Ma Yisasin Mana Inaein Baya Ino
(Maki 10:35-45)

²⁰ Ínaimpáké Sebetin anin kanan Yemisin nú Yonin nú anóe ano vékan má Yisasi vaintá eriven me aron kan durafúden mátimiyán be anin kan nan Yisasi arunan uren ayaino van inaein mino.

²¹ *Máa síkan Yisasi véin inaemí, “Éi ná nasará iya fono.”

Síkan mai nanin mano Yisasin tiamemí, “Ei yafisimpin kaná áesin ten tanin kanan mano en ayan kurompá mana ano kumanintin ná ayan ópá mana ano kumanintin inten nafino.”

²² *Máa síkan Yisasi mai vaya iniren evaránen tiamemí, “Tiretí ankan ma séin ina iyaona yaná ída afová ukha ono. Téi ma varanuna umán kanaisá é tiretí ankan má barante rafono.”

Máa síkan béin evaránen tiamemí, “Be-rasan kanaí é baranté uno.”

²³ Máa síkan Yisasi vékanan tiamemí, “Pura ino. Tiré kanan ten ma varanuna umán baran nompo iye anó ten tiyan kurompá kumanintin ná tiyan ópá kumanintin ná inten nafi mai ída sen tina yaná bain iyáantanté uno. Mai kará ma vain mai ma Sifóe ano ma aní ukhein kéká inan puntáadan ban mino.”

²⁴ Be anavasan mano ma Yisasin inaein baya van tiyan míkan eyo iyampon kayo ano iniren békán anan uanten mino.

²⁵ *Máan tiyákan Yisasi vetin arákan be vaintá erivin máa semí, “Tiretí ankan afová ukha ono. Ena anan nanin banta kayoi kin kéká bá kákan banta kayo vá ano vei kékáká ída kama yafisirí iyáken maen betíi vaya ánain bákurino van duvun en arirí é iyan mino. ²⁶ *Máan té iyan mifo siretimpin ída vá mai avúavá bano.

Tiretin pinté iye anó kákan bantaí ono van inten nafi mai ano vá tiretíi yoran bantaí intin ná ²⁷ inká iye anó esesí ono van inten nafi mai ano vá tiretíi ída miyan ban doran bantaisá ino. ²⁸ *Máan manan en mi Banta Anin ma erikhein mai vanta ano ven ayain dorarí ino vara erikhen naifo véi ano vetin ayaen bei aunan betin amiré kokhon nanin banta evaráne miyaní ono van mino.”

Auu Yufúkukhein Bantá Kanan Auu Ma Kama Ein Baya Ino

(Maki 10:46-52; Ruku 18:35-43)

²⁹ Yisasin má bei eyo iyampon kayo vá ma Yerikó baru me ampiren oriyain má kokhon nanin banta ano Yisasin bákuren oren mino. ³⁰ Oriyákan kankanan auu yufúkukhein bantá kanan mano aa akhempá kumantaren iníkan Yisasin nan eriyain mino siyaimpin avádóden oovararen temí, “Bafan noe, Devitin Anin mompo verasan nan arunan usintano!”

³¹ Máa sen oovarákan banasi ano iniren míkan nan baya fákano síkan mifo míkanan mano moéken avádóden oovararen temí, “Bafan noe, Devitin Anin mompo verasan nan arunan usintano!”

³² Máa síkan Yisasi mairá o mantaven míkan nan araaren inaemí, “Téi náisá tiré kanan uantano vará iya fono.”

³³ Máa síkan míkanan mano evaránen béin tiamemí, “Bafan noe, verasan tuu marano van muno.”

³⁴ Máa síkan Yisasi vékan nan arunan uren auu aruviyain má manáda auu kama uvin auu máben oniyáken Yisasin bákuren oren mino.

21

Yisasi Ma Kin An Daven Yerusaremí Ódein Baya Ino

(Maki 11:1-11; Ruku 19:28-40; Yoni 12:12-19)

¹ Yisasin má bei eyo iyampon kayo vá oriyaren Yerusaremí áde Orifí anurá Betfasí barurá o unen mino. O unaven Yisasi vei eyo iyampon kanan tianten ² temí, “Tiré kanan mesan barurá oresin ma mana donkin ma ayan nan kurantin arará bá ma van nain ná ayan nan utúde

* **20:21:** Mat 19:28; Ruk 22:30 * **20:22:** Mat 26:39; Yon 18:11 * **20:25:** Ruk 22:25-26 * **20:26:** Mat 23:11; Mak 9:35 * **20:28:** Ruk 22:27; Fir 2:7

vá míkanaan avire se varunarasá ereno. ³Eresin ma mana ano ma manáa vaya ma sinti vá tiré kanan máa ná teno, 'Míkani yoran Bafampin ban mino' ma sesin maen ainen mi siantanti avire erin nono."

⁴ Máan ma ein manon pefá ma sakhanampa vanta oo ráké uaren ma máa sikhá ein mi kanaíen mino.

⁵ "Saioní nanin banta siameno.

'Onano. Tiretí ankani kin mi eriyen mino.

Béi mana donkin ané kumamen aví ída van banta an daven eriyen mino.

Béi maen mana ané ída kumantá ein donkin amaniná kumamen eriyen mino.' "

Sek 9:9

⁶ Eyo iyampon kanan mano oren mai ma Yisasi siameiní mo en mino. ⁷ Máan turen mai donkin kan aviren meran betí ayá au anamun daváden arará donkin ané kaúdan Yisasi mai yaró kumanen mino.

⁸ Kumamen oriyákan kokhon nanin banta ano au anamun daváden aasá uvisen orin inká manáa ano yaa ayan tíkariyan uvisen orin en mino. ⁹ Máan tiyákan kokhon nanin banta ano Yisasin aufá orin oyampá erin iyáken máa sen oovaremí, "Devitin Anin avisá daní ino!"*

"Bafan aviká ma eriyain banta vá avu uantano!"

Íbo 118:25-26

"Dan uron ma vain Tiyarafenu avisá daní ono!"

¹⁰ Yisasi ma Yerusaremí barufin ódiyain má banasi ano anúden oreraen máa sen inaemí, "Ma vanta iye fino."

¹¹ Máa sen ina íkan mai ma oriyaré ein nanin banta ano semí, "Kariri varafá ma vain baru Nasaretíke sakhanampa vanta Yisasi ino."

Yisasi Ma Kákan Monó Namun Pinte Ma Minó Daná Saríin Banta Kayo Yo Siantein Baya Ino

(Maki 11:15-19; Ruku 19:45-48; Yoni 2:13-22)

¹² Yisasi monó dafufin un pében ona ma sarí iyá ein banta kayo sianten mino. Moní ma arun miyan ma nun kayo yáken sarí iyaré ein takhó bá kará kayo vá béi vanaan karúdan oreraen mino. ¹³ Banaan karúdiyáken máa sen betin tiamemí, "Tiyarafenui vompon dóki ano máa sikhen

mino, 'Banta ano séin tima san amúkin namun nen tinten' *Ais 56:7* mifo siretí maman 'umoyan banta kéká amasí' iya rono. *Yer 7:11*

¹⁴ Máan turen Yisasi kákan monó namumpin bakan auu yufúkukhein kéká bá arantan ma namu ukhein kayo vá ano véi vaintá eríkan kama uanten mino. ¹⁵ Máan tiyákan monó ánon banta kéká bá man baya ma afová ukhein banta kayo vá ano mai ma véi enará ukhein danasinta ma variyain oniyákan mai monó dafu finté iyamporinta kayo ano máa sen oovariyamí, "Devitin Anin avisá daní ino!" Máa síkan betí ankan ará namuen mino.

¹⁶ Ará namu iyáken Yisasin inaemí, "Ma iyamporinta ma siyain baya inká iniya nan nafino."

Síkan Yisasi evaránen betin tiamemí, "Eyo séi iniyá umpo

'minó arará iyamporinta anon éin aví daní é iyan ne' *Íbo 8:2*

ma sikhein baya siretí ankan ídá Tiyarafenui vompon dóki fintena yankáke rafono." ¹⁷ Máa siren béi Yerusaremí bá betin má me ampiren mai inuran Betaní barurá o varen mino.

Yisasi Ma Fiki Yaa Ana Asin Ma Kafurein Baya Ino

(Maki 11:12-14, 20-24)

¹⁸ Pe ákura suron Yisasi e mantaaren Yerusaremí evaránen oriyá íkan arafan puren mino. ¹⁹ Arafan puríkan béi onan mana fiki yaa ana aa akhempá baré íkan ádé oriven mai anafin onákan ída mana aran iren mifo anaa ana variyan baré íkan béi mai fiki yaa ana van temí, "Éi ída vá enádá bá aran irano!" Máa siyain má mai yaa ainen kafuren mino.

²⁰ Kafuriyain má eyo iyampon kayo ano ódaren takhaen oreraen temí, "Inte uáken ná ma fiki anaa ainen kafuren nafino."

²¹ *Máa sen ina íkan Yisasi evaránen betin tiamemí, "Téi fura siré tiretí ankan tiamiyá uno. Tireti ma ída kan ineine in ma fura seya mumunan uron ma inteya ma fiki yará ma eruna avúavá ana ída varan nampo ma anuyon nan ma e afáne un nompin orono ma sesin maen kasaen

* **21:9:** Iburu vaya finte 'Osana' ma sikhein mai 'avisá daní ino.' * **21:21:** Mat 17:20; Ruk 17:6; Yon 14:12; 1Ko 13:2 * **21:22:** Mat 7:7-11; 18:19

tiretí ma sinonaí inten mino. ²² *Tiretí ankan ma mumunan iya amúkinte mae mai ma varano van amúkin nona yaná baran nono.

Yisasini Ákona Van Ma Monó Átaru Namuntá Ma Ánoni Ukhein Banta Kéká Ano Ma Inaein Baya Ino

(Maki 11:27-33; Ruku 20:1-8)

²³ Yisasi ma monó namuni yafufin un pében monó baya siamiyákan maen monó ánon banta kéká bá Isareri kayoi ánon banta kayo vá ano Yisasi vaintá eriven máa sen béin inaemí, “Éi inte ákona fosá mai yanasinta variyákeya inká iye anó éin mai yorarí ono siren ná mai ákona amikhen nafino.”

²⁴ Máa sen ina íkan Yisasi evaránen betin tiamemí, “Tiretin má dere mana inain ina urékuya ma funtáde sisimiresí maéi mai ma yorarí ino van ma simikhein ákona ana siamenté uno. ²⁵ Banasi ma monó non péantan mai ákona Yoni inte fákená mantaren nafino. Mai ákona maen Tiyarafenu fintesá erikharen nafi áa varará banta fintesá erikharen nafino.”

Máa síkan betíyan ten inen emí, “Mai setí ma ‘Tiyarafenu finté erikhen mino’ ma sékun maen mai véi máa sen tetin ina inten mino, ‘Mai fará Yonini vayará ída mumunan iya fono.’ ²⁶ *Máa sinten mifo mai setí ma ‘varará banta fintéi erikhen mino’ ma sékun maen mai Yoni mana sakhanampa vantán bakan minó ano afová ukhein mifo seti vanasi vará perá tifano.”

²⁷ Máa siren betí ankan evaránen Yisasin tiamemí, “Teti ankan ída afová ukhé tiféuno.”

Síkan Yisasi vetin tiamemí, “Mai séin má dere iye anó ákona simikhará doriya rafu mai siretin ída siamenté uno.”

Kan Anavasantá Ma Ovaéadan Baya Ino

²⁸ Máa siren “tireti inte inin ná iniya rafono” sen inaemí, “Mana vanta ano ain iyampon kanan dáKaren esékena iyampon mo máa sen tiamemí, ‘Tanin noe, saréa uvaini yunampin ná mo yorano.’

²⁹ “Máa síkan mai iyampon mano semí, ‘Tifon kiyá uno,’ siren ineine uvákon den ínaimpáké oren mino.

³⁰ “Máa siran be afóe ano ena iyampon baintá onóben mai ma sein baya ana mo síkan mai iyampon mano ‘eyo oronté uno’ siren ída oren mino.

³¹ “Mai iyampon kanan pinté iye anó be afóen oo yaiyen nafino.”

Síkan betí ankan temí, “Eséke ano ino.”

Máa síkan Yisasi vetin tiamemí, “Téi fura siré tiretin tiamiyá uno. Takisi varan banta kayo vá pamúku nanin arinta vá ano naren tiretin esanten Tiyarafenui yafisimpin oferanten mino. ³² *Mai fara vara seyo, Yoni siretimpin afoká uven puntákein avúavá tiretin aní iya siretí ída ventá mumunan e ompo takisi varan banta kayo vá pamúku nanin arinta vá ano anan bentá mumunan en mino. Tiretí ankan mai ódare ompo ída ará baédeya ventá mumunan e ono.

Uvaini Yunan Anaará Ma Namu Yafisiri in Banta Kéká Pákena Ma Sian Baéadan Baya Ino

(Maki 12:1-12; Ruku 20:9-19)

³³ * “Ena ovaeran baya ifo vá tiretí ankan ná ineno. Mana vanta ano uvaini yunan dóden dafuí uren maen uvaini afu kúduren ma yasáden anu kasin nain masí maifin uáden inká dunan anará ma yafisin nain mana yan bain namun uvamá daren nentá bain barufá orono van iyáken manáa vanta kéká ano yafiantano van mai yunan anan me vetin ayampin kaen mino.” ³⁴ O varé íkan uvaini aran kúdin damusí íkan maifin ma yoriyain banta kayo vaípákana uvaini aran ma kúduádan o varano van bei yoran banta kéká tiantan oren mino.

³⁵ “Oríkan maen mai yunampin ma yoriyaré ein banta kayo ano mai yoran banta kéká dakhádan orera iyákan mana fákaren ankamen ena aruan puren inká ena onámaná ankamádan puren mino.

³⁶ Máan turan mai yunan ana afóe ano evaránen pe ma siantan orikhá ein esantaren kokhon doran banta siantan oríkan maen mai yunampin ma yoriyaré ein kayo ano mai ma fefá ma ukharé ein avúavá ana mai yoran banta kayo amaniná kaen mino. ³⁷ Máan mana iyaimpin ‘te sanin avayan ininten mino’

* 21:26: Mat 14:5 * 21:32: Ruk 3:12; 7:29-30 * 21:33: Ais 5:1-2

siren dunan afóe ano ínaimpáké be anin tiantan mai kéká baípa oren mino.

³⁸ **“Oríkan maen mai yunampin ma yoran banta kayo ano ve anin ódaren betiyan máa sen oreraemí, ‘Ma vanta anon minó be afóen nina yanasinta varanten mifo erí tifé béin aruan púde benina yanasinta vará tifano.’* ³⁹ **Máa siren betí ankan béin pákaren mai yunan dafu fintena yarifen akhempá morúden aruan puren mino.*

⁴⁰ **“Máan ten mifo siretí ankan inte esá té iniya rafono. Ínaimpá mai uvaini yunan afóe ma eriven maen mai yunampin ma yoriyá ein banta kayo amaniná inte yaná avúavasá kainten nafino.”*

⁴¹ **Máa síkan betí ankan béin tiamemí, ‘Mai ma namu avúavá barein banta kayo me aruan púden maen uvaini aran ma kúdin damú ma erintin ma kúduren bariyan ma véi siran nain máa uvaini aran ma kanaíen béin ameren kéká ayampin mi mai yunan ana kainten mino.’*

⁴² **Máa síkan Yisasi vetin tiamemí, ‘Tiretí ankan ídá Tiyarafenui vompon dókifin ma ma vaya vain mai yankáke fono. Mai vaya máan mi sikhen mino,*

“ ‘Má uvaran banta kayo ano ma yo manaman karúdein onámaná ano mamanan má dádaimpin mana ákona onámanasí ukhen mino.

Mai Bafan mánon máan turan mai anon tetin tivorá kama ukhen mino.’ ”

Íbo 118:22-23

⁴³ **“Máan tukháí séi siretin tiamiyá uno. Tiyarafenu ano siretí ankan ayan pintena vei yafisin baru e yafiaren maen maifin ma kamaen aran iran nain nanin bantan aminten mino. ⁴⁴ Banta ano ma mai onámaná daró ma erave ankaminona ano kisikhasi inono. Inká mai onámaná ano ma mana vanta amaniná ma eravinten ankaman tafin tafin uádanten mino.”**

⁴⁵ Yisasi ma yunan anará namu yafisirí in banta kayorá ma sian baerein baya van monó ánon banta kéká bá Farasisi kayo vá ano setin nan mi siyan mino sen afovaen mino. ⁴⁶ Afová uren betí ankan Yísisin pákano van en mifo vanasi ano Yisasi nan sakanampa vanta ino sen iniyákan mai

van betí ankan banasi van péden ifá en mino.

22

Anasií In Omáká Ma Ovaéadan Baya Ino (Ruku 14:15-24)

¹ Yisasi ena vaya máa sen tian baéan betin amemí, ² “Inaru yafisin máan mi ukhen mino. Mana kin mano ma ve anin anasi iman ameno van iyákan ma kákan dunan tariyainíi ukhen mino. ³ Tarano van ma iyáken maen mai ma fefá arakhá ein kéká ano mai omáká eriven dunan nano van bei yoran banta kéká tiantan mo siamíkan ifá en oreraen mino.

⁴ **“Máa siyaimpin béi evaránen manáa kokhon doran banta siantan oriyákan tiamemí, ‘Mai ma fefá arakheruna kayo vá tiameno. Téi afon kao kayo vá kákan aino víkakhein tafúna kayo vá inka aruré tamádé umpo eriven ná ma anasií in omáká ma samáderuna yunan ná nano sen mino vá te siameno.’*

⁵ **“Doran banta kéká ano mo máa sen tiamíkan maen mai kayo ano ída inen mino. Mana ano me ifá en bei yunampá oríkan inká ena ano me ifá en bei moní dorantá orin en mino. ⁶ *Máan tíkan manáa ano mai kini yoran banta kéká*

pákaren namu arirí uren aruan puren mino. ⁷ Aruan púdeimpin kin mano aran karen bei aruvín banta kéká tiantan mai ma vei yoran banta kéká arein banta kayo mo aruan minó kíporen betíi varu saman kauren mino.

⁸ **“Taman kaúdan kin mano vei yoran banta kayo máa sen tiamemí, ‘Anasií in dunan inka samádan ban mifo mai sarampin erino van ma areruna kéká ano inian kaumpan uren pasen ída eren*

⁹ mifo siretí ankan oriveya aayana fáke ma onanona nanin banta avire eresin ná anasií in dunan me nano.’ ¹⁰ Máa síkan doran banta kayo ano ayanafá orera uven kama nanin banta vá namu nanin banta vá iyanuan meran mai namun e víkaven mai yunan nen mino.

¹¹ **“Niyákan kin mano vanasi ma e iyukhein onano van mai namun un pében onákan mana vanta ano anasií in damú*

* **21:38:** Mat 27:18 * **21:39:** Ibu 13:12 * **21:42:** Rom 9:33; 1Pi 2:6-8 * **21:44:** Manáa feanten bompon dókifin mai vesi ída van mino. * **22:6:** Mat 21:35

ma uren oriyain buí daná ída ukharen mino. ¹² Ída ukharé íkan kin mano véin inaemí, ‘Tirona oe, náisá iyá éi ída anasií in damú ma iyain buí daná ureyá e va fono.’ Maa síkan mai vanta ano ída veya sen mino.

¹³ *‘Ída veya siyaiimpin kin mano máa sen doran banta kayo siamemí, ‘Tiretí ankan béin ayan arantantá damureya karúdan títípaín o váken ifí diyan aveantuntá inkekípiyan bano.’

¹⁴ “Para vara seyo, kokhon nanin bantan Tiyarafenu ano arakhen mifo manáan aní ukhein mino.

Kamanin Ma Takisi Amin Baya Ino
(Maki 12:13-17; Ruku 20:20-26)

¹⁵ *Maa siyaiimpin Yisasin mákádantin manáa ída funtákein baya sirantí beni vayará kó tiantano van Farasisi kayo ano o átaru uven baya sen inen en mino. ¹⁶ Betí ankan betí eyo iyampon kayo vá manáa Erotini anan banta kéká bá tiantan Yisasi vaípá oriven mo máa semí, “Aru soe, setí ankan afová ukhekuya éi fura veya ana sin banta ono. Éi fura sikhein baya fóké anan Tiyarafenui avúavá baya sian banasi amé iya ono. Aví bain banta fi ída aví bain banta fi éi minó manaí ukhein baya anan ída feran tiamé iya ono. ¹⁷ Maa té iya ompo ei ineine setin tisimeno. Sisan ma sakisi amin mai kama ukhen nafino áa ída fino.”

¹⁸ Maa síkan Yisasi vetí ankani ineinefin pe afová ukhen temí, “Tiretí veya ana siren ída mai veya ánaín dakhafin banta kéká ompo fará tiretí ten mákaan oniya rafono. ¹⁹ Takisi ma amé iyaona mai moní mana aní onano.” Síkan betí ankan mana moní baren béin me amen mino. ²⁰ Amirákan Yisasi vetí ankan máa sen inaemí, “Ma iyen aman má iyen aví basá ban nafino.”

²¹ *Maa síkan betí ankan evaránen temí, “Sisan nina ino.”

Síkan béi vetin tiamemí, “Sisan nina yanasá Sisan ame vá inká Tiyarafenu ina yanasá Tiyarafenuun ná ameno.”

²² Maa síkan betí ankan mai veya iniren kokhon ineine uvákon béin me ampiren oren mino.

Púkaren Ma E Mantaven Ábasuí Inain Baya Ino
(Maki 12:18-27; Ruku 20:27-40)

²³ *Maí damú ana Sadyusi kéká ano Yisasi vaintá eren mino. Mai kéká ano furin banta van ída evaránen e mantanten ne siyain bákan máa sen betí Yisasin inaemí, ²⁴ *‘Aru soe, Mosesi máa sen tetin tisimikhen mino. Mana vanta ano ma anasi mantaren ída iyampon kainton ma fúbintin maen ná ben afá aváe ano vá mai nanin máden ná mai vanta avikasá iyampon kauantantin ná ben aví ída vá kípano. ²⁵ Maa sikhan mi fefá tetimpin dan manápá ifo afápá kan un kádan anavádano varen esékena ano anasi mantaren ída iyampon kain na fúbin be afá ano mai nanin baren mino. ²⁶ Mantaren mai ven ánaín tena vanta ano ída iyampon kainton púbíkan mai rákena vanta ano mai nanin mana mantaren púbin e máan ten oriyan minó dan manápá ifo afápá kan un kádan anavádano anon mai mana nanin manan mantaren mino. ²⁷ Mantaren minó banta ano fúbíkan inaimpáké mai nanin dere furen mino. ²⁸ Maa tukharen mifo inaimpá ma furin banta ma evaránen e mantan nain damú mai nanin mano yan manápá ifo afápá kan un kádan anavádano mantaren mifo mai véi iyen anasá banten nafino.”

²⁹ Maa síkan Yisasi evaránen betin tiamemí, “Tiretí ankan Tiyarafenui vompon dókifin ma vain baya vá beni ákona vá ída afová ukheyan baya asuse iya rono.

³⁰ Purin banta kéká ma evaránen e mantan nain damú mai nanin banta kéká ano ída ábasuí inten mifo inaruráke enisori kayo an manan den orera inten mino.

³¹ Maa tinten mifo furin bantai e mantan nan ma siyaona vayará téi siretin inaintó uno. Tiyarafenu ano ma siretin nan máa sikhein baya ídá dankáke rafono. ³² *‘Téi Abaraamun má Aisakin má Yekopun mái Ayarafenu uno.’ *Eks 3:6*

* **22:13:** Mat 8:12; 25:30; Ruk 13:28 * **22:15:** Mak 3:6 * **22:21:** Rom 13:7 * **22:23:** Apo 23:8 * **22:24:** Diu 25:5 * **22:32:** Mat 8:11

Béi ída furin nanin bantai Ayarafenu ifo ayun ma fara vain nanin bantai Ayarafenu ino.”

³³ Maa síkan banasi ano veni vava iniren takhaen oreraen mino.

Moéken Kákani Ma Ukhein Man Baya Fákena Vava Ino

(Maki 12:28-31; Ruku 10:25-28)

³⁴ Yisasi ma mai vava sein nan Sadyusi kéká ano ída vava siyaimpin Farasisi kayo ano mai vava iniren betiyan o átaru en mino. ³⁵ Betí aúbaná mana man baya ma afová ukhein banta varen Yisasin akhenóka uan onen máa semí,

³⁶ “Aru soe, intéa man baya anó minó man baya esantaren ná esesí ukhen nafino.” ³⁷ Maa síkan Yisasi evaránen temí, “‘Ei Bafan Tiyarafenun ná e aú amafon má ei ineinefó basá anunu ono.’ *Diu 6:5*

³⁸ Ma esé ma araién kákani suron ukhein man baya ino. ³⁹ Mairá ben oyampá ma ven má manaí ukhein man baya máan mí ukhen mino. ‘Eyan nan ma anunu iyaonaie vá ena van anunu ono.’ *Riv 19:18*

⁴⁰ *Ma man bayá kanan manon mai minó man baya vá sakhanampa vanta kayoi vava vái ana uron mi van mino.”

Tiyarafenu Ano Ma Aní Ukhein Banta Mai Iyen Anin Nafino

(Maki 12:35-37; Ruku 20:41-44)

⁴¹ Farasisi kayo ma átaru ukhen baré íkan maen Yisasi vetin inaemí, ⁴² *‘‘Tiyarafenu ano ma aní ukhein banta van tiretí inte esá teyá iniya rafono. Mai véi iyen anin nafino.”

Maa síkan betí ankan evaránen temí, ‘Devitin anin mino.’

⁴³ Maa síkan Yisasi vetin inaemí, ‘Mai intéa ukhan ná Kantá Aunan mano ineine Devitin amin ná mai vanta van Bafan ne sen nafino. Deviti máa sikhén mino,

⁴⁴ *‘‘Bafan mano senti Bafan máa sen tiamemí,

‘‘Ei sen tiyan kurompá kumantesirá eni namuro maman

en aránaópá kaúdéku vá ono.’” *Íbo 110:1*

* **22:40:** Rom 13:10; Kar 5:14 * **22:42:** Yon 7:42 * **22:44:** Mat 26:64 * **23:3:** Mar 2:7-8 * **23:5:** Eks 13:9; Nam 15:38-39; Diu 6:8; Mat 6:1 * **23:11:** Mat 20:26; Mak 9:35; Ruk 22:26 * **23:12:** Yop 22:29; Pro 29:23; Ruk 14:11; 18:14

⁴⁵ Mai vanta van ma Deviti Bafan ne sikhén tiya mai siretíi intéa eyá ben nan Devitin Anin ne sinte fono.” ⁴⁶ Maa sirákan mana ano ída anona evaránen Yisasini vava siamin nainí eimpin péden mai ráké betí ankan ída mana yana san béin inaen mino.

23

Yisasi Ma Farasisi Kayo Van Amaan Baya Sein Mino

(Maki 12:38-39; Ruku 11:43, 46, 20:45-46)

¹ Maa sen inauren mairá Yisasi vei eyo iyampon kayo vá banasi vá tiamen temí, ² “Man baya ma afová ukhein banta kéká bá Farasisi kayo vá anon Mosesi ma iyá einien mi man baya vaéan tiretin amiyan mino. ³ *Maaan tukhanti vá minó baya ma veti siamin nain inire vá mai ánain ná dakhafono. Dakhafin nompo vetí ankan ma variyain avúavá ída vá barano. Kokhon baya veti siren ída mai vava kayo ánain dakhafé iyan mino. ⁴ Betí ankan mana uman dakhein bayafó banasi siamin mai uman baren oriyan mifo vetí ída mana yáman máafó mai kayo e aya é iyan mino.

⁵ *‘‘Banasi ano onano van mi minó daná betí ankan baré iyan mino. Kákan amúkin ana ayafentá damuren inká anan kayo vetíi ayá au anamun átontá damiyan é iyan mino. ⁶ Kákan omá dunan ma sariyan ma átaruimpin betí ankan esé an kará ana variyáken inká monó átaru namun kayofin ina esé avorú karáká anan kumanin kayo ino. ⁷ Minó daná ma kain miyaní in barurá banasi ano vayan mino siyantín inká aru soe sen arano van mi vetí ankan anunu iyan mino.

⁸ ‘‘Maaan tiyan mifo siretin nan banasi ano ída vá aru soe sino. Para vara seyo, siretíi Kákan manan bákayan tireti minó ano mana nanin banta an mi yakha rono.

⁹ Ma varará ída vá mana vanta van tiretí ankan mano sífoe oe seno. Mana Afóe anan beyaká inarufá ban mino. ¹⁰ Minó ano ída vá éin nan aru soe sino. Para vara seyo, Tiyarafenu ano ma aní ukhein

banta anan tirití arú ban mino. ¹¹ *Tirití ankaní ánon banta ano vá tirití yoran bantai sá ino. ¹² *Mai fara vara seyo, ve aví ma yaní inain banta aví barará eravintin maen inká be aví ma vararasí inain banta ano kákan bí baranten mino.”

Yisasi Ma Farasisi Kayo Asein Baya Ino (Maki 12:40; Ruku 11:39-52, 20:47)

¹³⁻¹⁴ Yisasi evaránen máa semí, “Tirití Farasisi kayo vá man baya ma afová ukheona vanta kéká ba soe, vaya ma sireya ída mai ánain dakhafé iya ono! Inaru yafisini ona munkiya vákeya siretiyantá ída maifin oferiya ono. Banasi ano ma maifin oferano van ma iya mae vetin ida áen nan oferiyain mai sirití kákan uman uron mi varan nono.*

¹⁵ “Man baya ma afová ukheona vanta kayo vá Farasisi kéká ba soe, kákan uman uron mi varan nono! Tiriti vaya ma sire ída mai ánain dakhafé iya ono. Tirití ankan ma varará bá un nompin má ma noreya ma mana vanta o avían tiritimpin kauren nan ma siritin an davi mae véin maman aron ída van ma ira kiyan uman baren berai siyan purin baru finte vanta an daádiya ono. Tirití ankan manon béin avíade nan mi véi moéken tiritin esantaren namu avúavá bariyan mino.

¹⁶ * “Tirití ankan auu yufúkukhein kéká anon banta aa aní uantano van iyaona siriti kákan uman uron mi varan nono. Tirití ankan máa sé iya ono. ‘Banta ano ma Tiyarafenu amáká ma o siaren asíká ayan befió uren ma fura ódino siren té iyain mai sitó daná ifo Tiyarafenu amápin ma vain korirá ma o siaren ma asíká ayan befió ma uranten ná mai ma véi siran nainisá ino.’ ¹⁷ Tirití ankan auu yufúkukha óen banta kéká soe! Inte yaná anó kákan daná ban nafino. Kori anó kákaní ukhen nafi áa kákan monó namun manó kori maman kantasí ukhen nafino. Tirití ankan afová ukha ono kákan monó namun mai anon kákaní ukhan mai Tiyarafenu inan ban mino. ¹⁸ Tirití ankan máa sé iya ono. Mana ano ma íkun uan

amin onámaná ma karánará ukheintá ma o siaren asíká ayan befió é iyain mai sitó daná ifo íkun uan amino van ma amiyain danasintará ma o siaren asíká ayan befió uranten ná mai ma véi siran nainisá ino. ¹⁹ Tirití ankan auu yufúkukhein banta kéká soe! Inte yaná anó kákan daná ban nafino. Íkun ma uan amin danasinta anó kákaní ukhen nafi áa íkun ma uan amin onámaná ma karánará ukhein manó mai ma íkun uan amin danasinta maman kantasí ukhen nafino. Tirití ankan afová ukha ono yunan ma íkun uan amin kará daró ma vain mai anon kákaní ukhan mai Tiyarafenu ina ino. ²⁰ Máan tukhan mi mana ano ma íkun uan amin onámaná ma karánará ukheintá ma o siaren asíká ayan befió é iyan, mai anon íkun ma uan amin kará bá mai yaró ma íkun uan amin danasinta ma vaintái vei vaya sian ákonaé iyan mino. ²¹ Máan té iyan mifo mana ano ma Tiyarafenu amáká ma o siaren ma asíká ayan befió é iyain mai anon Tiyarafenu vá ben amáká báí vei vaya sian ákonaé iyan mino. ²² * Mana ano ma inaru van o siaren ma asíká ayan befió é iyan mai anon Tiyarafenui kumanin karái vákan mairá béi kumantan mi vei vaya sian ákonaé iyan mino.

²³ * “Máan tiyan mifo sirití ankan man baya ma afová ukheona vanta kayo vá Farasisi kéká bá ano vaya ma sireya ída mai ánain dakhafin kékái vaona kákan uman uron mi varan nono. Tirití ankan dunan ana fintena yanasinta siyan míkan pintan daídeya mana masiman Tiyarafenu améiya ompo man bayafin ma moéken kákaní ukhein man baya máan tirití ampikha ono. Mai ma funtákein avúavá baya máa mai máan mi ukhen mino. Puntákein avúavá póké ma vanta yaimiyain má arunan in má inká Tiyarafenu vá ma súpá ukhen ban má ino. Ma máa man baya anon moéken kákaní ukhen mifo mai máa ánain ná dakhafiyáke ída vá ena man baya kayo vá dere amp-eno. ²⁴ Tirití ankan auu yufúkukhein kékái

* **23:13-14:** Manáa Tiyarafenui vompon dókifin manáa vaya ma asotú ukhein mai vaya vesi 14 fin ban mino: 14 Man baya ma afová ukheona kéká bá Farasisi kayo vá ano kákan uman uron mi varan nono. Mai fara vara seyo, sirití ankan ída ayave váka varé nanin kayo mo mákade vetin nina yanasinta variyáke maeya inká kampun te ayáká amúké iya rono. * **23:16:** Mat 15:14 * **23:22:** Ais 66:1; Mat 5:34 * **23:23:** Riv 27:30; Mai 6:8

vákeya sitó danasinta yo aían karúdiya ompo kamerin nankuriya rono.

25 **“Máan tiyan mifo siretí ankan man baya ma afová ukheona vanta kayo vá Farasisi kéká bá ano veya ma sireya ída mai ánain dakhafin kékái vaona kákan uman uron mi varan nono. Tiretí fereti vá kápi vá dantena ana seséin kéká ompo ena ina yaná ma aran nan avúavá bá eyan nan mana ma in avúavá bá ano anan mai aúpin bíkakhen mino. 26 Auu yufúkukhein Farasisi kéká soe! Pereti vá kápi vá aú pinte nare vá tesé uresin ná ínaimpákesá dantena me avusese ino.*

27 **“Máan tukhen mifo siretí ankan man baya ma afová ukheona vanta kayo vá Farasisi kéká bá ano veya ma sireya ída mai ánain dakhafin kékái vaona kákan uman uron mi varan nono. Banta masíká ma efanten peni fédan ma kama ukhan oniyainí ukha rofo masípin ma vanta ayampa kayo vá púta yanasinta vá ma vainíi siretí ukha rono.* 28 *Tiretí ankan má máan mi ukhe va ono. Banta ano siretin dan bukhafarái ódaren tiretin nan puntákein banta kéká ino sen iniyan mifo aúpin kampun avúavá bá man baya yurafurin avúavá bá bíkakhein kéká ono.*

29 Yisasi evaránen máa semí, *“Tiretí ankan man baya ma afová ukheona vanta kayo vá Farasisi kéká bá ano veya ma sireya ída mai ánain dakhafin kékái vaona kákan uman uron mi varan nono. Tiretí ankan mano sakhanampa vanta kayoi masí uantádeya inká puntákein kékái masíká kama aú uan kain banta kayo ono. 30 Máan tiya váke siretí ankan máa séiya ono, ‘Pefá tinafu siráo ma vá ein damú tetin má baré ída kanaíé betin ayaé sakhanampa vanta kayo aruan puronté erunaren mino.’ 31 *Máan ma siyaona anon sakhanampa vanta kéká ma aruan púkaré ein mai vanta kayo anavasin mi vá uno seya siretíyan aní iya ono. 32 Oriveya anafu aráo ano ma namu avúavá arái urein ná mo maman kípano!*

33 **“Tiretí ankan namu osafáe akhafana ono! Tiyarafenu ano ma siretin ma kó*

tiantáden ma ira kiyan uman baren be-
rai siyan purin baru ma iyáantákein mai
intesá eyá akhakhante rafono. 34 Máan
tukhen mifo vá tiretí ankan ineno. Téi
sakhanampa vanta kéká bá kama ineine
vain banta kayo vá man baya ma afová
ukhein banta kayo vá tiantékun tireti
vaipá erinten mifo siretí ankan manáa
yaa unkamádantá aruan puriya manáa
siretí monó átaru namun kayofin aviáde
yafiyó ankamiya mae manáa kéká baru
vaintá e yakháan more mere esin or-
era inten mino. 35 *Máan tukhein nan
mi mai ma funtákein banta kéká ma
Eborin táké arái ure ma are eriya ma
Barakian anin Sekaraiyan ma Tiyarafenu
amá bá íkun uan amin takhó aúbaná bá
ma aruan pureona kékái nare miyan tiretí
ankan amaniná erinten mino. 36 Téi
fura siré tiretin tiamiyá uno. Mai namu
avúavái miyan maen tare ma vaona nanin
bantafin mi afoká inten mino.”

*Yisasi Ma Yerusaremí Baru Van
Arunaná Barein Baya Ino
(Ruku 13:34-35, 19:41-44)*

37 Yisasi evaránen temí, *“Yerusaremi oe,
Yersaremi oe, éi sakhanampa vanta kayo
aruan puriya ono. Máan tiyákeya Ti-
yarafenu ano ma siretimpin tiantan erein
banta kéká aruan purono van onámaná
ankamiya ompo séi kokhon dádái anasi
kokore ano ma ve ayan aránaópá be
akhafana avían kaeiníi iyáku ompo siretí
ankan ída ine ono. 38 *Ída inen nan
Tiyarafenu ano eni kákan monó namun
oyan amiran dúken mino. 39 Máan tukháí
séi siretin tiamiyá uno. Enádá bá tiretí ída
sen tonan bare maeya maná damusí intiya
‘Bafan aviká ma eriyain banta vá avábá
uantano’ sin nono. *Íbo 118:26**

24

*Kákan Monó Namun Ma Varákin Nain
Baya Ino
(Maki 13:1-2; Ruku 21:5-6)*

1 Yisasi ma kákan monó baru me am-
piren oriyákan maen bei eyo iyampon

* 23:25: Mak 7:4 * 23:27: Apo 23:3 * 23:27: Iburu kayo ma vanta masí é iyain mai on boraádampin mi kaiyain bakan mai on masíká efanten penifó peré iyan mino. * 23:28: Ruk 16:15 * 23:31: Apo 7:52 * 23:33: Mat 3:7; 12:34; Ruk 3:7 * 23:35: Esé 4:8; 2Kr 24:20-21 * 23:38: 1Ki 9:7-8; Yer 22:5 * 24:2: Ruk 19:44

kayo ano ve vaintá eriven kákan monó namun kayo aní ono van en mino. ²*Máan tikan béi vetin inaen temí, “Tiretí ankan ma kama namun kayó oniya rafono. Téi fura siré tiretin tiamé uno. Namuro ano me varákuren maen minó onámaná ída áintin ben ané ben ané ukhen banten mifo varakuádantin eraven asuse inten mino.”

Ma Vara Kípan Akhempá Ma Aní Daná Afokáin Nain Baya Ino

(Maki 13:3-13; Ruku 21:7-19)

³ Yisasi ma Orifí anu yontá kumantá íkan beni eyo iyampon kayo máa ano oriven béin inaemí, “Éi setin tisimeno. Inte yamusá mai yaná afoká inten nafino. Inte yaná ma afoká intirá tetí ankan onesá éin nan inka erintéin ma vara kípannten mino sente rafuno.”

⁴ Máa síkan Yisasi evaránen betin tiamemí, “Banta ano siretin mákasin nafo yafían ná ákona ono. ⁵*Para vara seyo, kokhon nanin banta ano eriven ten tiví tiaren máa sinten mino. Tiyarafenu ano ma aní ukharé ein bantan téi eré uno siren maen kokhon nanin banta máka sinten mino. ⁶Tiretí ankan inesin aruvín baya vá aruvono van ma siyan nain baya vá mai van tiretí ída vá anú duman duman ono. Mai yanasinta erivintin maen inaimpákéi ma vara ma kípan damú afoká inten mino. ⁷Mana anan banta kéká ano e mantaaren ena anan banta vá aruvintin mana kini kéká ano e mantaaren ena kini kéká bá aruvintin manáa akhempá kákan anan afoká intin maen ma vara kaya intin inten mino. ⁸Máan tinten mifo mai yanasinta ma afoká inain mano mai anasi ano ma araíen inamun nan ineiníi inten mino.

⁹*“Máan ma intin maen ten naro siren tiretin ará namu uantáden avían namuro ayampin kaintin tiretin aruan purinten mino. ¹⁰Maí damú tentá ma mumunan ukháin nain nanin banta kéká ano vetíi mumunan ampintin erafuvintin beraran anan maran uaren ben avían namuro ayampin kain maran intin ¹¹*inká kampun sakhanampa vanta kayo afoká uven maen banasi máka siantanten mino. ¹²Namu avúavá ano kákaní intin maen kokhon nanin banta ano ena ma ará amin

avúavá an pinten mino. ¹³*An pinten mifo ákonaen ban ma oriyan baréin nain mai nanin bantan inaimpá ma ma vara kípan nain damú Tiyarafenu ano evaránen aviranten mino. ¹⁴*Tiyarafenui yafisin pintaena vava ma varará minó akhempá betí ano siamen orera intin ma minó nanin banta ano inirantín inaimpáke suron mi vara kípan damú erinten mino.

Mana Namu Yana Suron Ma Afoká Inain Baya Ino

(Maki 13:14-23; Ruku 21:20-24)

¹⁵*“Pefá ma sakhanampa vanta Danierin oorá ma sikharé einíen Tiyarafenui kantasí ukhein kákan monó namumpin mana namu yana suron afoká uven minó daná máden asuse intiya siretí ankan onan nompo ma vava ma yankafin nain mano vá mai vayai ana afová ino. ¹⁶Máa ma intin maí damusá Yudiá barafá ma vain nanin banta ano anufá ana vá karan orino. ¹⁷*Orintin maen ná be amá daró ma un baréin nain mano ída vá mana yaná be amá pintaena eravuvén barano van inino. ¹⁸Máan ma intin maen dunan anafá ma o varé inain mano ída vá evaránen be amá pintaena vei ayá au anamun o varano. ¹⁹Amú bá nanin kéká bá iyampon ma nan kuviyan bain nanin kayo vá ano maí damú ma erintin maen kákan uman mi varanten mino. ²⁰Á den iyon in damu safi Sabati yamu safi mai yaná afóka inafó amúkesin ná pasavi yamusá afoká inti vá karan orono. ²¹*Para vara seyo, ma vara ma araíen uvarein táké ma eren tare ma e vaona aúban ída máan uman afoká ukharé ein uman mi maí damú afoká inten mifo ída máan uman inaimpá afoká inten mino. ²²Tiyarafenu ano ma ída máan uman kayoi yamú ma maman asikáí intin maen minó nanin bantan afeyoranten mifo véi ma fe iyákein nanin banta van ma ininten maen maí damú maman asikáí inten mino. ²³*Maí damú ma mana vanta ano ma siretin tiamen ma onano, Tiyarafenu ano ma aní ukharé ein banta masi mafá ban mino áa mesapá ban mino

* **24:5:** Mat 24:23-24; 1Yn 2:18 * **24:9:** Mat 10:22

* **24:14:** Mat 28:19 * **24:15:** Dan 9:27; 11:31; 12:11

Mat 24:5 * **24:24:** Diu 13:1-3; 2Te 2:8-9; Rev 13:13-14

* **24:11:** Mat 24:5, 24; 1Yn 4:1 * **24:13:** Mat 10:22

* **24:17:** Ruk 17:31 * **24:21:** Dan 12:1 * **24:23:**

ma sintiya ída vá betíi vayará mumunan ono. ²⁴ *Para vara seyo, manáa kampun sakhanampa vanta ano eriven maen máa sinten mino, ‘Tiyarafenu ano ma aní ukharé ein téi mai vantán báké mana sakhanampa vantán bá uno.’ Máa siren maen ara ara aní danasinta vá kákan enará ukhein danasinta vá afoká inten mino. Afoká uren kokhon nanin banta aviren mo asuse iyáken Tiyarafenu ano ma veyan iyákein nanin banta vá dere kasaen kufa uádanten mino. ²⁵ Ineno. Mai yanasinta afoká intéií séi siretin pe o útúbé tiamiyá uno.

²⁶ *‘‘Tiamé umpo manáa ano ma siretí ankan tiamen ma Tiyarafenu ano ma aní ukhein banta mesapá banta ída van kámápá ban mino ma sintiya ída vá maifá orono. Ma namumpin aúpá ban ne ma sintiya siretí ída vá betíi vayará mumunan ono. ²⁷ *Tiretí ankan afová ukha ono. Áau e uní páké ma afayuí uaren ma áau orun perápá ma aravé iyain máa uran mi Banta Anin ma erin nain damú intin mi minó nanin banta ano onanten mino. ²⁸ *Purin banta kayo au ma asenten bain mai varurái sumpán kayo ano o átarué iyan mino.

Banta Anin Ma Overánen Erin Nain Baya Ino

(Maki 13:24-27; Ruku 21:25-28)

²⁹ *‘‘Mai kákan umán kayo ma kípán nain damú anan ‘áau ano sítipa intin

biyon ída ena vá kántin

ayon táké minó ofu kayo kararen erav-intin

minó ákona yaná ma inarurá báin nain mano kayamana inten mino.’’’

Ais 13:10; 34:4; Isi 32:7; Yoe 2:10, 31

³⁰ *‘‘Maí damú Banta Anini aní daná ma ayontá afoká intin mi varará nanin banta ano ifí diyáken onantin mi Banta Anin mano inaru fáké konan daró bei ákona vá kákan kakhan má erinten mino.

³¹ *Eriyáken maen bei enisori kayo sintin ufen kákaníen asiyáken ma vara minó

akhempá oriven beyan ma iyákaré ein nanin banta avían átaru inten mino.

Fiki Yaa Anará Ma Afova Varan Baya Ino

(Maki 13:28-31; Ruku 21:29-33)

³² *‘‘Tiretí ankan anna rasá afova varano. Anna amú ma eyavénan maeyan afeen aá kanten mino séiya ono.* ³³ Máan ten ma minó daná afoká inti oniya mae vá mai Banta Anin inka ádé anantá ereno van onará mantakhen mino vá te afová ono. ³⁴ *Téi fura siré tiretin tiamiyá uno. Ma ma saréa vaona nanin banta ano ída fúkesin mi mai yanasinta afoká inten mino. ³⁵ *Inaru vá bara vá kípanten mifo senti vaya ída uron mi kípanten mino.

Ída Mana Nanin Banta Ano Yisasi Ma Erin Nain Damú Bá Áau Vá Afová Ukhen Mino

(Maki 13:32-37; Ruku 17:26-30, 34-36)

³⁶ *‘‘Ída mana nanin banta ano maí damú bá áau vá afová ukhan inaru ráké enisori kéká bá ano ída afováin be Anin mano yere ída afová ukhen mifo ve Afóe veyáká anan afová ukhen mino. ³⁷ *Mai ma Noani yamú aniana iyáin ma afoká einí ukhein avúavá anan Banta Anin ma ereno van iyantin maen afoká inten mino.

³⁸ Ída ma á den non takhan banasi ano yunan táden non má niyáken anasi variyan inká arinta uviran maran en oriyain pintéi Noa votifin un peren mino. ³⁹ *Mai yaná ma afoká inain betí ankan ída afová ukharéin mi kákan á den non taaren banasi ufúan kípén mino. Máan tukhein avúavá anan Banta Anin ma erin nain damú afoká inten mino. ⁴⁰ Kankan banta ano ma yunampin baré intin Tiyarafenu ano mana avíaren mana ifá inten mino.

⁴¹ Kankan nanin mano ma vereti uvaran uviti yasamiyaré intin maen Tiyarafenu ano mana avíaren mana ifá inten mino.

⁴² *‘‘Máan tinten mifo siretíi Bafan ma erin nain damú ída afová ukha ompo yafíke vá bano! ⁴³ *Tiretí ankan mai vá afová ono. Umoyan banta ano ma inuran má barákin nain áau ma má afoé ano ma

* **24:26:** Ruk 17:23-24 * **24:27:** Mat 24:37-39 * **24:28:** Ruk 17:37 * **24:29:** 2Pi 3:10; Rev 6:12-13 * **24:30:** Dan 7:13; Sek 12:10; Rev 1:7 * **24:31:** 1Ko 15:52; 1Te 4:16 * **24:32:** Kriki veya finté fiki yaa ana e sikhen mino. * **24:34:** Mat 16:28 * **24:35:** Mat 5:18 * **24:36:** Apo 1:7; 1Te 5:1-2 * **24:37:** Esé 6:5-8 * **24:39:** Esé 7:21-23 * **24:42:** Mat 25:13 * **24:43:** Ruk 12:39-40; Rev 16:15

afová uren máká ma yafían ákona uvintin maen umoyan banta ano ída kanaíen mai namun barákuren ódinten mino. ⁴⁴ Máan tukhen mifo siretí ankan ná utare vá bano. Mai fara vara seyo, siretí ma ída erinten mino se ininona yamúi Banta Anin mano erinten mino.

Kama Yorán Banta Vá Namu Yorán Banta Vái Vaya Ino
(Ruku 12:42-46)

⁴⁵ “Inte yoran banta anó kama ineine vákan kama yorari íyan maen ná bei ayafa ano véin maman doran banta kayorá dafisiní uran báken ná dunan daíden amin áauí ma íkan ná mai yoran banta kéká daiman amé íyan nafino. ⁴⁶ Mai yoran ma kamaen doriyan baré intin ma vei ayafa ano ma ovaránen e onan nain doran banta ano vá kákan amusín ino. ⁴⁷ *Téi fura siré tiretí ankan tiamiyá uno. Ayafa ano mai yoran bantan maman kaintin benina yanasintará dafisinten mino. ⁴⁸ Dafisinten mifo namu yoran banta ano maen beyan nan máa sinten mino, ‘Sesi ayafa vanta ano ayákái o van ída ainen ovaránen erinten mino’ siren maen ⁴⁹⁻⁵⁰ arona yoran banta kéká ankamiyáken ma inká non naren óen iyain banta kayo vá oriven ma yunan nen non nen iyáken ma vei ayafa van ída erinten mino ma sen inin nain damúi erinten mino. ⁵¹ Eriyen maen mai yoran banta sika sika uren tiantantin baya siren ma ída mai ánain dakhafin banta kéká bá báken ifí diyan aveantuntá inkeki piyan berai siyan banten mino.

25

Tiyan Míkan Arintará Ma O Sian Baékein Baya Ino

¹ * “Maí damú inaru yafisin mano siyan míkan arintai vaya an mi yanten mino. Mana vanta anasi iman amintéin béi eriyákan maen mai arinta kayo ano yaamu on uruaren mai ma anasií ono van iyain arinta amápin o ave inton oren mino. ² Oren mifo yan manápá arintafin ída afova vákan inká dan manápá arintafin afova varen mino. ³ Mai ma ída afova vain arinta máa ano karasin ída varanton

daamu ana varen oren mino. ⁴ Mai ma afova vain arinta máa ano yaamu variyan botorefin karasin banaaren oren mino. ⁵ Oríkan mai ma anasi iman ameno van iyain banta ano ída ainen eriyaimpin mai arinta kayo auu nan aiíkan auun baren oreraen mino.

⁶ “Aun bakharen betí ankan iníkan inuran aúbaná mana vanta ano oovaren temí, ‘Anasi ma iman amin banta inka eren mifo varufá erafúbe avirano.’

⁷ “Máa siyain má minó arinta ano orun mantaven daamu avové en oreraen mino. ⁸ Máan tiyákan afova ma ída vain arinta kéká ano afova ma vain arinta kayo máa sen tiamemí, ‘Tetinti yaamu yusimirí iyá umpo manáa karasin timeno.’

⁹ “Máa síkan mai ma afova vain arinta kéká ano evaránen betin tiamemí, ‘Ída ino. Ma karasin mano minó tetimpin ída kanaí inten mifo siretí ankan orive vá mai ma karasin kaiyain pimpá dosiriya miyaní ono.’

¹⁰ “Máa síkan mai ma afova ída vain arinta kéká ano karasin barano van orivíkan anasi ma iman amin nain banta ano eren mino. Erikan mai ma útakhá ein arinta máa ano mai vanta vá anasií ono van ma yunan tamádan baré ein namumpin un pébin ona munken mino.

¹¹ * “Munkurákan ínaimpáké ena arinta kéká ano enóben temí, ‘Kákan banta oe, kákan banta oe, setin ona yisintano!’

¹² * “Máa síkan betin evaránen tiamemí, ‘Téi fura siré tiretin tiamiyá uno. Tiretin ída afová ukhé uno.’

¹³ * “Máan tukhein mifo vá Bafani erin damú bá áau vá tiretí ída afová ukha ompo yafían ná ákona ono.

Moníká Ma Kamaen Dafisin Nan Ma Sian Baéadan Baya Ino

(Ruku 19:11-27)

¹⁴ Máa siren Yisasi evaránen temí, “Mana vanta ano ayá barufá orono van iyáken ma vei yoran banta kayo átaru uren ma veina yanasinta vetin amintin dafisino van ma einí inaru yafisin mano ukhen mino. ¹⁵ * “Mana mana yoran bantai avúavá bá ákona vá béi iniyáken moní daíden mana vanta yan manápá tauseni (5,000) moní amen inká ena vanta kan

* **24:47:** Mat 25:21, 23 * **25:1:** Ruk 12:35; Rev 19:7
Mat 24:42 * **25:15:** Rom 12:6

* **25:11:** Ruk 13:25-27 * **25:12:** Mat 7:23 * **25:13:**

tauseni (2,000) moní amen ena vanta mana tauseni (1,000) moní amen uren béi me onen ena varufá oren mino. ¹⁶ Máan turen béi orivíkan mai ma yan manápá tauseni (5,000) moní ma mantaré ein banta ano ainen mai monípó dóáken ena yan manápá tauseni (5,000) veni aman moní o yóáden mino. ¹⁷ Máan tíkan inká kan tauseni (2,000) moní ma mantaré ein banta vá ano mai monípó dóáken ena kan tauseni (2,000) aman moní o yóáden en mino. ¹⁸ Máan ten mifo mana tauseni (1,000) moní ma mantaré ein banta ano ve ayafai moní baren mo varafin úden aúpá masíen mino.

¹⁹ “Mai yoran banta kékái ayafa vanta ano ayáká o varen ínaimpáké ovaránen eriven mai ma moní amikharé ein nan puntarano van aran eren mino. ²⁰ Eriven dan manápá tauseni (5,000) moní ma mantaré ein banta ano ma ena yan manápá tauseni (5,000) moní bá ma yóan kova urákaré ein baren meren máa semí, ‘Kákan banta oe, onano. Éi yan manápá tauseni (5,000) moní ma simeonafó téi yódé ena yan manápá tauseni (5,000) vá maman kovaé uno.’

²¹ * “Máa síkan beni ayafa vanta ano véin evaránen tiamemí, ‘Éi kama yoran bantan bákeya mai moníká kama e yafibeya yoreóna kokhon danáká tékuya yafisin nompo eriveya sen má manafin amusin ono!’

²² “Máa siran kan tauseni (2,000) moní ma mantaré ein banta vá ano yere eriven mai ma ena kan tauseni (2,000) moní bá ma yóan kova urákaré ein baren meren máa semí, ‘Ayafa vanta oe, onano. Éi kan tauseni (2,000) moní ma simeonafó téi yódé ena kan tauseni (2,000) vá maman kovaé uno.’

²³ “Máa síkan beni ayafa vanta ano véin evaránen tiamemí, ‘Éi kama yoran bantan bákeya mai moníká kama e yafibeya yoreóna kokhon danáká tékuya yafisin nompo eriveya sen má manafin amusin ono.’

²⁴ “Máa siran mana tauseni (1,000) moní ma mantaré ein banta vá ano eriven

temí, ‘Ayafa vanta oe, éi ákona vantan bákeya éi ma ída yókaré eona yunan unafiyákeya inká éi ma ída ayun pafasikharé eona yunan duyasiyaona vantan baná téi afová ukhéi ²⁵ e nan pédé eni mana tauseni (1,000) moní barafin mo aúpá masí urákaré umpo ma ei moní ifo onano!’

²⁶ “Máa síkan kákan banta ano evaránen béin tiamemí, ‘Éi avesara yoran banta ompo séi ma ída yokaréeruna yunan ma unafiyáké inká téi ma ída ayun pafasikharéeruna yunan ma yuyasiyáeruna mai máan in banta inó éi siya fono. ²⁷ Máan tiyaruna ifo éi fará tenti moní ída moní ma kain namumpin kaenan baré irá ovaráné ma ereruna yamú tesi moní bá aman moní bá bare rafuno.

²⁸ “ ‘Mai vará mana tauseni (1,000) moní ma mantá ein banta vaípáke vá dafian mai ma siyan míkan tauseni (10,000) moní ma yákein banta vá ameno. ²⁹ * Para vara seyo, kokhon danasinta ma yantin baréin nain nanin bantan móeken aminten mino. Inká ída ma yakáin nain kéká ina mai sanáa ma yaká intin mai vá deren minó baranten mino.’ ³⁰ * Máa siren temí, ‘Mai namu yoran banta karú desin ná barufá títipa ukheimpin orun báken ná ifi diyan aveantuntá inkekí piyan bano.’

Memé Bá Sipisipi Vaká Ma Sian Baékein Baya Ino

³¹ * “Banta Anin ma erin nain damú bei kakhan má kantasí ukhein kin karáká kumamen enisori kayo vá erinten mino.

³² * Kumamen erintin maen enisori kayo ano minó nanin banta o éke e éke uan béi vaintá me átaru urantin sipisipirá dafisin banta ano ma sipisipi yo aíáden memé do aíáden iyainí en kampintan daiminten mino. ³³ Daíden sipisipi kayo ve ayan kurompá kaen inká memé kayo ve ayan ópá kaen inten mino.

³⁴ “Máan turantin maen kin mano ayan kurompá ma vain nanin banta máa sen tiamintemí, ‘Tifóe ano siretin nan amusin uren avábá ein mai ma vara ma arái ein tákéi inaru yafisimpin tiretin ninan utaan

* **25:21:** Mat 24:45-47; Ruk 16:10 * **25:29:** Mat 13:12; Mak 4:25; Ruk 8:18 * **25:30:** Mat 8:12; Ruk 13:28

* **25:31:** Mat 16:27; 19:28 * **25:32:** Isi 34:17; Rev 20:11-13 * **25:35:** Ais 58:7

kaúantan baré ein mifo erive vá barano. ³⁵ *Para vara seyo, séi sirafan bákeya yunan timikhare ono. Téi non nan ékuya non timikhare ono. Téi enafá banta erékuya e amápin e sivían kae ono. ³⁶ Téi suí dana san ékuya simikhare ono. Téin tíiyá bákuya sentá dafíkare ono. Inká téi karavusifin bákuya o sontare ono.’

³⁷ “Máa sintin maen puntákein nanin banta ano evaránen béin máa sen tiamintemí, ‘Bafan noe, inte yamusá éi arafan nan ená dunan amiré non nan ená non amé é tife rafuno. ³⁸ Inte yamusá éi enafá bantá erenará aviré teti simá ore rafuno. Inte yamusá éi auí dana san enará amikharé tiferafuno. ³⁹ Inte yamusá éin aí iya vayá inká karavusifin bayá ukhenasá teti ankan o oné tiferafuno.’

⁴⁰ * “Máa sintin maen kin mano evaránen betin tiamintemí, ‘Téi fura sé tiretin tiamiyá uno. Mai ma sen tifá tiváeyan ída aví bain kéká ká ma mai yanasinta variyaréeron mai sentái variyare ono.’

⁴¹ * “Máan ma siren ayan ópá ma varéin nain kéká san kin mano máa sintemí, ‘Afeyoran nanin banta siretí ankan tifó uveya Ban Anon má bei enisori kéká bá ina ma ída kípan ira ma utaádan baré ein maifin ná orono. ⁴² Para vara seyo, séi sirafan bákeya yunan ída simikhare ono. Téi non nan ékuya non ída simikhare ono. Téi enafá banta erékuya e amápin ída e sivían kae ono. ⁴³ Téi suí dana san ékuya ída simikhare ono. Téin tíiyá bákuya sentá ída yafíkare ono. Inká téi karavusifin bákuya ída o sontare ono.’

⁴⁴ “Máan ma sintin maen betí ankan béin evaránen ina intemí, ‘Bafan noe, inte yamusá éi arafan nan eyá non nan eyá enafá bantá ereyá auí dana san eyá aí iya vayá inká karavusifin bayá ukhenará teti ankan ída aya é tiferafuno.’

⁴⁵ “Máan ma sintin maen béi evaránen máa sen betin tiamintemí, ‘Téi fura sé tiretin tiamiyá uno. Mai ma sen tifá tiváeyan ída aví bain kéká ká ma ída mai yanasinta variyaré eona mai sentái ída variyare ono.’

⁴⁶ * “Máa sirantin maen mai nanin banta ano ma namu miyan o varan nain mai ída kípan para van oriyan ma van nain aí danái varanten mifo funtákein nanin banta ano ída kípan para van oriyan ban aunan baranten mino.

26

Yisasin Arin Aa Van Ma Yosein Baya Ino
(Maki 14:1-2; Ruku 22:1-2; Yoni 11:45-53)

¹ Yisasi ma mai vaya kayo sian kíparen maen bei eyo iyampon kayo máa sen tiamemí, ² * “Tiretí ankan afová ukha ono. Avo Uantan Damú ma afoká inain mai kan damú ana ein mi vetí ankan Banta Anin avian namuro ayampin kaintin béin daa unkamádantá arinten mino.”

³ Máan ma siyákan maen monó ánon banta kéká bá banasii ánon banta kéká bá ano mana monó ánon banta kékái ánon banta Kaiafasin amá átaru ukhen ⁴ Yisasin ma kampun tiren pákaren aruan purin nain aa van aúpáké ten inen iyaren mino. ⁵ Máan tiyáken beti semí, “Banasi ano ódaren aruvin dákó inafó Avo Uantan Damú teti ída vá ma yanasi ó tifano.”

Betaní Barurá Ma Yisasin Ánontá Aunka Uveri Vanaein Baya Ino
(Maki 14:3-9; Yoni 12:1-8)

⁶ Betaní amon dana aí bain banta Saimonin amá Yisasi varé íkan ⁷ * mana nanin mano kama auna iyain uveri kákan miyantá bain mamaren mai namun un pében Yisasi yunan nan takhó akhempá kumanten dunan niyaré íkan auna uveri ánompin mun banaen mino.

⁸ Máan tíkan eyo iyampon kayo ano ódaren ará namuen oreraen temí, “Pará béi auna uveri savifá afe iyan nafino. ⁹ Ma kama aunka ma iyain uveri anan ma sarí uré moní mádé ona ma ída vain kéká ma ameren mino.”

¹⁰ Betí ma siyain baya Yisasi afová uren máa sen tiamemí, “Tiretí ankan pará ma nanin kakhirun ariyá ba rafono. Béi kama avúavasíi usintiyain mino. ¹¹ * Ena ena yamúi ona ída van kéká tiretin má banten mifo séi ída siretin má ena ena vanté uno. ¹² Anasi ano ma auna uveri ma sen

* **25:40:** Pro 19:17; Mat 10:42; Mak 9:41
12:1-27; Mat 20:18

* **25:41:** Mat 7:23
* **26:11:** Diu 15:11

* **25:46:** Dan 12:2; Yon 5:29

* **26:2:** Eks

turá bana iyain mai senti masípin orin mi úta sintiyan mino. ¹³ Téi fura siré tiretin tiamiyá uno. Ínaimpá ma kama vava ma varen minó bara akhempá ma orera intin ma nanin ma varein avúava san tiren ininten mino.”

Yudasi Ma Yisasin Namuro Ayampin Avían Kaono Van Kana Ino Sein Baya Ino
(Maki 14:10-11; Ruku 22:3-6; Yoni 6:70-71)

¹⁴ Maí damú tiyan míkan mifo sirantan kan orun kádan (12) eyo iyampon kayo fintena mana Yudas Iskariotin ne sin banta ano monó ánon banta kayo vaípa onóben ¹⁵ *betin máa sen mo inaemí, “Téi ma Yisasin avían amirékuya mae séin náí yanasá timinte rafono.” Máa síkan teti (30) siriva moní dankáan ben amen mino. ¹⁶ Amirákan betí ayampin ma Yisasin avían amin nain aa van Yudasi araíen dosen mino.

Yisasi Ma Vei Eyo Iyampon Kayo Vá Avo Uantan Dunan Típa Nein Baya Ino
(Maki 14:12-21; Ruku 22:7-14, 21-23; Yoni 13:21-30)

¹⁷ *Yisi Ída Van Bereti Ma Nan Omá Damú kayoi esé arái in damú eyo iyampon kayo ano Yisasi vaintá eriven máa sen inaemí, “Intefasá mo funtáádesá tetí Avo Uantan Dunan mo nanté tiferafuno.”

¹⁸ Máa síkan Yisasi evaránen betin tiamemí, “Tireti kákan Yerusalemí barufin orive mana vanta ma onante máa se vá mai vanta siameno, ‘Tesi yamú inka ádé iyái sesi eyo iyampon kayo vá en amápin mo Avo Uantan Dunan naran muno sen arú ano semantino’ vá teno. ¹⁹ Máa siran mai ma Yisasi siameiníen beni eyo iyampon kayo ano mo Avo Uantan dunan puntááden mino.

²⁰⁻²¹ Máan turan inúpakesí iyain má tiyan míkan mifo sirantan kan orun kádan (12) eyo iyampon kayo vá dunan nan takhoká Yisasi kumamen dunan niyáken temí, “Téi fura siré tiretin tiamiyá uno. Tiretin pinté mana ano sesi namuro ayampin téin tivían kain nono.”

* 26:15: Sek 11:12; Yon 11:57 * 26:17: Eks 12:14-20

* 26:23: Íbo 41:9 * 26:28: Eks 24:8; Yer 31:31-34; Sek 9:11; 1Ko 10:16 * 26:28: Manáa vompon dókifin máa sikhen mino: auyen kasen ban * 26:30: Ruk 22:39;

Yon 18:1 * 26:31: Yon 16:32

²² Máa síkan minó eyo iyampon kayo ano mai vava iníden arunan en orera iyáken mana mana ano máa sen Yisasin inaemí, “Bafan noe, ída sen ne sin nono.”

²³ *Máa sen orera iyákan béi evaránen temí, “Ma ma sen má ma ayan kain ma yunan dókifin araviyain mai anon téin namuro ayampin tivían kainten mino. ²⁴ Tiyarafenu ano vompon dókifin tikharé einíen Banta Anin mano furinten mifo Banta Anin ma namuro ayampin ma avían amin nain banta ano kákan uman uron mi varanten mino. Be anóe ano véin ída kaen baré intin mai kama inté ein mino.”

²⁵ Mai ma namuro ayampin ma Yisasin kain nain banta Yudasi ano máa sen béin inaemí, “Aru soe, séin nará tiya fono.”

Síkan Yisasi véin tiamemí, “Eyantái se ono.”

Yisasi Ma Vereti Vá Uvaini Vá Bei Eyo Iyampon Kayo Amein Baya Ino

(Maki 14:22-26; Ruku 22:15-23; 1 Korini 11:23-25)

²⁶ Betí ankan ma niyákan Yisasi mana vereti orun máden Tiyarafenu susu siantáden kisiren eyo iyampon kayo amiyan temí, “Ma séin tu ifo siretí ankan máde nano.”

²⁷ Niyákan mana uvaini kápi orun máden Tiyarafenu susu siantáden temí, “Tiretí ankan minó ano ma finte vá nano.

²⁸ *Para vara seyo, senti nare ma vanain nain manon minó nanin bantai ume arúantáden tiretin má ma manafin kasen ban* maman ákona inten mino. ²⁹ Téi siretin tiamiyá uno. Marákéi séi ída uvaini anu nan oriyaré maéi Sifóeni yafisimpin mi siretin má manafin auyen uvaini anu nanté uno.”

³⁰ *Máa siran betí ankan mana monó íf daren kákan baru me ampiren Orifí anufá oren mino.

Yisasi Ma Pita Nan Téin Oyan Timin Nono Sein Baya Ino

(Maki 14:27-31; Ruku 22:31-34; Yoni 13:36-38)

³¹ *Oriven Yisasi vei eyo iyampon kayo máa sen tiamemí, “Tare inuran manan minó daná ten turá afoká intiya ma

oniyasin mi siretí mumunan eravinten mino. Mai van Tiyarafenui vompon dókifin máa sikhen mino:

“Téi sipisipirá dafisin banta arurékun sipisipi kéká meren asuse en karan orera inten mino.” *Sek 13:7*

³² *Máan tinten mifo séi evaráné e man-taaré tiretin an uanté Karirifá oronté uno.”

³³ Máa síkan Pita evaránen béin tiamemí, “Éin aurá ma mai yaná afoká intin ma vetíi mumunan eravintin ma éin me ampíren karan orera intí maé téi ída uron mi éin me ampenté uno.”

³⁴ *Máa síkan Yisasi evaránen béin tiamemí, “Téi fura siré éin tiamiyá uno. Tare inuran manan kokore ída asikhan-tiya kanú manaú dádá ten nan ída afová ukhé uno sin nono.”

³⁵ Máa síkan Pita véin tiamemí, “Ída ino. Téi en má purono van pasé ída éin afová ukhé uno, sé ída uron mi senté uno,” síkan minó eyo iyampon kayo ano máan baya ana sen oreraen mino.

Yisasi Ma Ketsemani Amúkein Baya Ino (Maki 14:32-42; Ruku 22:39-46)

³⁶ Yiasin má bei eyo iyampon kayo vá mana Ketsemani se siyain dunan anafin oriven maen betin tiamemí, “Tiretí ankan mará kumante sirá téi mesápá orivé mo simúkono.” ³⁷ Máa siren Pita má Sebetin anin kanan má avíaren oriyáken be au kasiyan avádúan onákan ará uman den ben aufá ída kamaen mino. ³⁸ *Máan tiyáken betin tiamemí, “Téin tirá ma uman diyain mano ádé anantá téin tiruan purirí iyá umpo siretí ankan mará ten má ba vá dafiseno.”

³⁹ Máa siren béi manáa nentá oriven barará o mátimen auná bara finí uren máa sen amúkemí, “Téin Tifóe oe, éi kanaí ma ukhantiya mai kápi sen pintena yo varano van mi séi iyá umpo éi ída vá tenti sinunu yakhafono. Ei anunu ana vá dakhafono.”

⁴⁰ Máa sen amúkuren Yisasi evaránen kanú manaú eyo iyampon baintá oriven onan auun bakhare íkan Pitan inaemí, “Ídá mana áau rá ten má dafike onante rafono. ⁴¹ Akhenókain tiretimpin afoká

intiya erave ankamin nampo siretí ankan dafike vá amúkiya vano. Aú ano mai yana san asese ukhan mifo yan bukhafafin ída ákona van mino.”

⁴² Máa siren béi evaránen oriven máa sen amúkemí, “Tifóe oe, mai kápi ma ída yo vararí intí maé téi nanté umpo mai ei anunu ánan ná bákurono.”

⁴³ Máa sen amúkuren ovaránen bei eyo iyampon kayo vaintá eriven onákan betin auunan ai eimpin auun bakharen mino.

⁴⁴ Bakhan béi evaránen kanú manaú dádási en oriven mo mai ma amúkein amúkiri anaen mino.

⁴⁵ Amúkuren béi evaránen eyo iyampon kayo vaintá oriven máa sen betin tiamemí, “Tiretí ankan aun ná bakhé bayá avíkiyá ba rafono. Onano. Ume vanta kayo ayampin ma Banta Anin ma kain nain áauí inka en mino. ⁴⁶ *Mantá oró tifano. Namuro ayampin ma séin tivian kain nain banta masi inka eriyen mino.”

Yiasini Namuro Kayo Ano Ma Véin Pákein Baya Ino

(Maki 14:43-50; Ruku 22:47-53; Yoni 18:3-12)

⁴⁷ Yisasi mai vaya fara siyákan tiyan míkan mifo sirantan kan orun kádan (12) eyo iyampon kayo finte Yudasin ne sin banta eren mino. Monó ánon banta kéká bá banasii ánon banta kayo vá ano siantan kokhon banta ano sópe vá karápuna vá bariyan uaren béin má eren mino. ⁴⁸ Yudasi ano ma Yiasin aní intin pákan nain nan pefá máa sen tiamikharen mino, “Téi ma mo amónanuna vanta* mai Yisasi ifo vá mai vanta vá pákano.” ⁴⁹ Máa sirákaren béi manadá ainen Yisasi vaintá oriven temí, “Aru soe, inuran mino.” Siyan béin amónen mino.

⁵⁰ Dafayoriyain má Yisasi máa sen béin tiamemí, “Tirona oe, éi ma varano van ereona yaná aine varano.”*

Máa siyain má minó banta ano Yisasi vaintá oriven bein páken mino.

⁵¹ *Pákiyain má mana vanta ano Yiasin má baren tópe orun danúaren mana monó ánon banta kékái ánon bantai

* 26:32: Mat 28:7, 16 * 26:34: Mat 26:69-75 * 26:38: Yon 12:27 * 26:46: Yon 14:31 * 26:48: Mai amónan avúavá ma vain mai arona ma kamaen avábá in mino. * 26:50: Mánáa vompon dókifin máa semí, “Tirona oe, para éi mafá ere fono.” * 26:51: Yon 18:26 * 26:52: Esé 9:6; Rev 13:10

yoran banta átaren tíkaan kurúdan barará eraven mino. ⁵² *Eravíkan Yisasi máa sen béin tiamemí, “Ei sópe evaráneya veni anamumpin kuferano. Tópefó ma aruvín banta kéká tópe anon arintin purinten mino. ⁵³ Téin nan ída kanaíen Tifóe vaípa ina intin kokhon taufeni enisori kayo siantantin eriven téin tiya inten minó té tirití iniya rafono. ⁵⁴ Téi ma máan tékun maen Tiyarafenui vompon dókifin ma séin turá afoká ino van ma siká ein baya ano ída kanaíen afoká inten mino.

⁵⁵ *Mai áaurá ana Yisasi mai vanta kéká máa sen tiamemí, “Téi mana aau vantá bákuyá tirití ankan téin pákano van tópe vá karápuna vá mamareyá ere rafono. Ena ena yamú ma séi monó dafufin báké banasi monó baya siamiyákeya fará mai rákena séin ída fáke rafono. ⁵⁶ Sakhanampa vanta ano ma vompon uvamádan baré ein mai kanái ino van mi mai yanasinta afoká en mino,” Yisasi ma máa sirákan maen minó eyo iyampon kayo ano Yisasin me ampiren karan oreraen mino.

Yisasi Ma Kanisori Kéká Avorá O Mantain Baya Ino

(Maki 14:53-65; Ruku 22:54-55, 63-71; Yoni 18:13-14, 19-24)

⁵⁷ Yisasi ma fákein banta kayo ano véin aviren monó ánon banta kékái ánon banta Kaiafasin amápin mo khaen mino. Mai namumpin man baya ma afová ukhein banta kayo vá banasii ánon banta kéká bá ano átaru ukharen mino. ⁵⁸ Átaru ukhan Pita ano Yisasin bákuren oren mifo ída áde orinton nen táké en oriaren monó ánon banta kékái ánon bantai yafufin ódiven inte yanasá Yisasin aurá afoká inten nafi mai onano van dafisin banta kéká bá un kumanen mino.

⁵⁹ Monó ánon banta kayo vá Kanisori kéká bá ano Yisasini mana aau yosiré mai anará béin aruan purono van kampun baya sin banta kéká san dosen mino.

⁶⁰ Dosiyákan kokhon banta kayo ano eriven kampun baya kayofó ben aufen kurádiyán ten mifo ída mana aau kanaíen tian afoká uren mairá béin aruan purin

nainíen mino. Máan tiyákan ínainpáké kan banta ano eriven ⁶¹ *máa semí, “Ma vanta ano Tiyarafenui kákan monó namun nan ‘téi kasaé barákuré kanú manaú damú ana evarané uvaranté uno,’ sikharen mino.”

⁶² Máa síkan monó ánon banta kékái ánon banta ano e mantaven Yisasin máa sen inaemí, “Ma ma éin aufen kuráden tiyain baya kayo van éi náiesá tinte fonó. Éi ídá mana vaya anona evaráne sinte fonó.” ⁶³ *Máa síkan Yisasi ída mana vaya seimpin monó ánon banta kékái ánon banta ano véin tiamemí, “Para ma ayun ban oriyan bain Tiyarafenu avikasá éi fura seya setin tisimeno. Éi Tiyarafenu ano ma aní ukhein bantá bákeyá Ben Anin ná ba fonó.”

⁶⁴ *Máa síkan Yisasi evaránen betin tiamemí, “Mai inka eyantái se ompo séi siretin tiamiyá uno. Ínainpáké Banta Anin mano Minó Ákona Vain Tiyarafenui ayan kurompá kumamen inaru fáke konan daró erintiya onan nono.”

⁶⁵ *Máa siyain má monó ánon banta kékái ánon banta ano anú diyán bei au anamun bararó iyáken temí, “Béi Tiyarafenui varun bariyan mino. Tiretin má inikhen nan mi véi Tiyarafenui varun barein beyantái aau varanten mifo náí vará tetí ankan enadá bá manáa vanta arékun ná béini aau me sian amá inten nafino. ⁶⁶ *Ída ino! Tiretin ankan inte esá té iniya rafono.”

Máa síkan betí ankan oovaren temí, “Béimpin aau van mifo vá arin purino!”

⁶⁷ *Máa siren Yisasin aufen akhare siyan ayan daná ankamen mino. Inká ena kéká ano ápa ankamiyáken temí, ⁶⁸ “Éi seya Tiyarafenu ano aní ukhein banta uno séiya ompo inte vanta kayo anó éin ankamiyan nafi mai kayo aví éi sakhanampái eya setin tisimeno.”

Pita Ma Yisasin Nan Ída Afová Ukhé Uno Sein Baya Ino

(Maki 14:66-72; Ruku 22:56-62; Yoni 18:15-18, 25-27)

* 26:55: Ruk 19:47; 21:37 * 26:61: Yon 2:19-21 * 26:63: Ais 53:7; Mat 27:12 * 26:64: Íbo 110:1; Dan 7:13; Mat 24:30 * 26:65: Mat 9:3; Yon 10:33 * 26:66: Riv 24:16; Yon 19:7 * 26:67: Ais 50:6; 53:5

⁶⁹ Máan tiyákan mai yafufin Pita kumantaré in mana yoran arinta ano veni áde eriven máa semí, “Kariri fáke vanta Yisasín má éi nore ono.”

⁷⁰ Máa síkan Pita minó banta avorá temí, “Ída ino. Mai ma éi siyaona vaya séi ída afová ukhé uno.”

⁷¹ Máa siren ínaimpáké béi yafu onará oríkan ena yoran arinta ano ven ódaren mairá ma varé ein nanin banta máa sen tiamemí, “Ma vanta maen Nasaretíke Yisasín má baré ein banta ino.”

⁷² Máa síkan Pita evaránen asiká ayan befio uren temí, “Pura ódino! Téi ída mai vanta afová ukhé uno!”

⁷³ Máa siren manáa vákan mairá áde ma mantakharé ein banta kayo ano Pita vaintá eriven máa sen tiamemí, “Pura seya éi mai kéká pintena vantán banan en amen avaya ano éin inka maman dákó en mino.”

⁷⁴ Máa síkan Pita ákonaen tiyáken, “Téi ída mai vanta afova ukhé umpo séi ma ída fura sékun maen ná Tiyarafenu ano séin uman timino,” ma siyain má ana kókore asen mino. ⁷⁵ *Kókore ma asiyain má Yisasi ma síkhá ein baya Pita ovaren me inen mino, “Kókore ma ída asikhantiya éi kanú manáú dádái sen nan ída afová ukhé uno sin nono.” Pita mai vaya ovaren me iniren barufá aravuvén kákan ifíden mino.

27

Monó Ánon Banta Kéká Ano Ma Pairotin Ayampin Yisasín Kaein Baya Ino (Maki 15:1; Ruku 23:1-2; Yoni 18:27-32)

¹ Do khakhiyain má pe ákura suron monó ánon banta kéká bá banasii ánon banta kayo vá ano Yisasín ma aruan purin nain baya sian damuáden mino. ² Máan turan ínaimpáké ben ayantá damuren aviren kamanini ayafa vanta Pairotin ayampin mo khaen mino.

Yudasi Ma Veyantá Aren Purein Baya Ino (Aposeri 1:18-19)

³ Namuro ayampin ma Yisasín amein banta Yudasi ano onákan kó tiantáden Yisasín aruan purono van iyampin béi arunan iyáken kokhon ineine uvákon mai

ma monó ánon banta kéká bá banasii ánon banta kayo vá ano ma teti (30) siriva moní ma amikharé ein evaránen baren betin mo ameno van oren mino. ⁴ Mo amiyáken temí, “Ída mana aau vain bantan téi umeiéi siretin ayampin kaé uno.”

Síkan betí evaránen béin tiamemí, “Mai éin nina yaná ifo ída setin tina yaná ino.”

⁵ *Máa siyampin Yudasi mai siriva moní baren kákan monó namumpin mo karúdaren beyantá mo anan aren mino.

⁶ Monó ánon banta kayo ano mai siriva moní mamaren temí, “Ma moní mai vanta aruan purintáke miyan mifo setí ankan ída vá monó namunpintena moní bá manafíní erá man baya yurafuró tifano.” ⁷ Máa siren betí ankan baya sian damuaren bara kave ma uvaran banta kayo fintena mana vara miyaní uren mai vara maman enafáke vanta kayoi vanta masí in baraíen mino. ⁸ Máan turákan mai van mi mai vara aví den Nare Eravukhein Bara e síkhan mi saréa yere fara máa sen aví tiyan mino. ⁹ Máan ma ein manon pefá ma sakhanampa vanta Yeremaiyan oorá ma Tiyarafenu ano siádan baré ein mi fura sen afoká en mino. Béi máan mi síkharen mino: “Isareri kéká ano mai vanta teti (30) siriva monípói miyaní onté uno siren ma yan baré ein moníí vetí ankan baren oren mi ¹⁰ Bafan mano ma sisimikhá einíen mi mai monípóké bara kave uvaran banta kayoi vara o miyaníen mino.” *Sek 11:12-13; Yer 19:1-13; 32:6-9*

Yisasi Ma Pairotin Avorá O Mantein Baya Ino

(Maki 15:2-5; Ruku 23:3-5; Yoni 18:33-38)

¹¹ Máan tiyákan kamanini ayafa vanta Pairotin avorá Yisasi o mantavin béin inaemí, “Éi Yutan kayoi kin na fono.”

Síkan Yisasi evaránen tiamemí, “Eyo. Mai inka eyantá te ono.”

¹² *Máa síkan monó ánon banta kéká bá banasii ánon banta kayo vá ano kokhon bayafó Yisasín aúfin kuráden ten mifo véi ída mana vaya anona evaránen ten mino.

¹³ Ída mana vaya siyampin Pairoti ano evaránen béin inaemí, “Ara ara vaya kayofó ma éin aúfin kuráden ma vetí ankan

* **26:75:** Mat 26:34 * **27:5:** Mat 26:14-15; Apo 1:18-19

* **27:12:** Ais 53:7

tiyain mai éi ídá iniya fono.” ¹⁴ Maa síkan Yisasi ída mana veya anona evaránen Pairotin tiamiyaimpin béi kákantá anomé inen mino.

Pairoti Ano Ma Yutan Kéká Ayampin Yisasin Amein Baya Ino

(Maki 15:6-15; Ruku 23:13-25; Yoni 18:38b-19:16)

¹⁵ Ena ena oranará Avo Uantan Dunan ma Nan Damú ma erin maen banasi ano ma aví tein karavusin kamanini ayafa vanta ano útúantan oré iyan mino. ¹⁶ Maí damú mana kákan aau vanta Barabasin ne sin karavusifin bákan banasi ano afová ukharen mino. ¹⁷ Maañ tukharé íkan banasi o átaru uvin Pairoti ano inaemí, “Iyen ná útúantékun ná tireti vaípa orino vará iya rafono. Barabasin nafi áa Tiyarafenu ano ma aní ukhein banta Yisasin nafino.” ¹⁸ *Mai fara va Pairoti ano maa sen inaen naino. Béi afová ukhan monó ánon banta kéká auuyaniyáken Yisasin ará namu uantiyan kópin aviren erikhan mino.

¹⁹ Maa siren ma véi ma kó inin karáká kumantan maen be aná ano mana veya maa siádan eremí, “Éi ída vá mai ma aau ída vain banta aurá mana avúavasí ono. Téi sare inuran mana kain ódákékun tirá uman diyá ineine iyá bá uno.”

²⁰ Maa sirákan maen Barabasin ifáesin erinti vá Yisasin aruan purono vá teya Pairotin tiameno siren monó ánon banta kéká bá banasii ánon banta kayo vá ano vanasi arápinien mino.

²¹ Maa siyákan kamanini ayafa vanta ano vetin inaemí, “Tiretí ankan anunu ano má kan banta finte inte vantá útúantékun ná orinten nafino.”

Maa síkan minó nanin banta ano oovararen temí, “Barabasi ná útúantano!”

²² Maa síkan Pairoti ano vetin inaemí, “Mai Tiyarafenu ano ma aní ukhein banta Yisasin intesá ino vará iniya rafono.”

Maañ ma siyain má minó ano oovararen temí, “Daa unkamádantá béin arono!”

²³ Maa síkan Pairoti ano vetin inaemí, “Para vae. Béi náí auisá ukhen nafino.”

Maa siyan mifo vetí ankan avádóden oovararen temí, “Daa unkamádantá béin arono!”

²⁴ *Avádóden oovariyáken Pairotin avaya ída inirien banasi ano aruvin áde eimpin béi manaa non dáden betin avorá be ayan tesé uren temí, “Ma vantai nare ano ída sen tiyantá banten mifo mai siretin nina yaná ino.”

²⁵ *Maa síkan minó nanin banta ano evaránen oovararen tiamemí, “Béini nare ano áesin ná tetin tina yanasá baren ná tetin tikhafanafin ná bano.”

²⁶ Maañ turen Pairoti ano Barabasin útúantan betí baípa oríkan inká aruvin banta kayo van tíkan Yisasin anan dafiyópó ankádan daa unkamádantá arino van betin ayampin amen mino.

Aruvin Banta Kéká Ano Ma Yisasin Máká Máká Ein Baya Ino

(Maki 15:16-20; Yoni 19:2-3)

²⁷ Amíkan kamanini ayafa vantai aruvin banta kéká ano kamanin amápin Yisasin aviren múden minó ano ven man aúban kaúden iyen eúken mino.

²⁸ *Iyuvén beni au anamun do yaváden mana nararé au anamun maman uanten mino. ²⁹ Uantáden betí ankan mana ayankun anan máden anouren damuan kini kamamó ma einí uren ben árontá afu uanten mino. Afu uantáden mana ayonta maman ayan kuompá pákaantáden aron kanan durafúden mátimiyán maa sen ben máká maáká iyan temí, “Yutan kayoi ákona kin noe, en aví daní iyá tiféuno!”

³⁰ *Maañ turen ben aufen akhare siren mai ma véin ayampin pákaantan baré ein ayonta máden ben árontá kokhon dáda ankamen mino. ³¹ Betí ankan minó ano véin máká maáká uren mai ma nararé au anamun ma uantákaré ein do yaváden beni au anamun evaránen uantáden daa unkamádantá aruan purono van aviren oren mino.

Daa Unkamádantá Ma Yisasin Arein Baya Ino

(Maki 15:21-32; Ruku 23:26-43; Yoni 19:17-27)

³² Aviren oriyaren Sairiní baru rákeSaimonin ne sin banta ano aasá eriyá íkan aruvin banta kéká ano ódaren béin divun íkan Yisasini yaa unkamádan ayaen baren oren mino. ³³ Baren Korkota e ma

* 27:18: Yon 11:47-48; 12:19 * 27:24: Diu 21:6-9 * 27:25: Apo 5:28 * 27:28: Ruk 23:11 * 27:30: Ais 50:6 * 27:34: Íbo 69:21

siyain barurá o unen mino. (Mai ví ma yákein mai Ánon Dampai Varu inon tikhen mino). ³⁴ *Mairá moren betí ankan aí barasin uvarano van uvaini non máden mana ita yaná bá opé uren Yisasin amíkan béi naan óden mai non ifá en mino. ³⁵ *Arugin banta kéká ano Yisasin daa unkamádantá antópó aruren maen beni au anamun barano van mairá kati sen mino.* ³⁶ Máan turen mairá kumanten bentá dafíken baren mino. ³⁷ Béin ma kó tiantein baya máa ven ánontá bompon uvaman kain baren mino. Mai vaya máa sen uvantaren mino: “MA YUTAN KAYOI KIN YISASI INO.” ³⁸ *Yisasini ádé umoyan bantá kanan arukharen mino. Mana anon ayan kurompá ma vain daa unkamádantá aren inká ena anon ayan ópá ma vain daa unkamádantá aren ukharen mino. ³⁹ *Máan turákan banasi ano ma onóbe enóbe iyáken béin ayanavan baya siyáken maen ánon karú darú iyan ⁴⁰ *temí, “Éi eyantá eyan aya ono. Éi kákan monó namun barákureya kanú manaú damú ana evaráne uvaran banta ono. Éi fura seya Tiyarafenu Anin ma vanteya mai yaa unkamádan táké me ampire varará erano.”

⁴¹ Monó ánon banta kéká bá man baya ma afová ukhein banta kayo vá banasii ánon banta kéká bá ano yere máan mana sen ayanavan baya semí, ⁴² “Béi ena kayo anan aya iyaren mifo véi ída kanaíen beyan aya iyan mino. Béi Isarerii kin ma vanten maen ásin daa unkamádan me ampiren erantí maéi setí ankan bentá mumunan ó tifantéuno. ⁴³ *Béi Tiyarafenu ádé mumunan iyáken mi sen téi Tiyarafenu Anin muno siyaren mifo Tiyarafenu ano ma ven nan ma anunu ukhanten maen ásin mai saréa véin kanaíen aya ino. ⁴⁴ Mai ma umoyan bantá kan ma yaa unkamádantá ben má aruran baré ein kanan mano yere vá béin ayanavan baya ana sen mino.

*Yisasi Ma Furein Baya Ino
(Maki 15:33-41; Ruku 23:44-49; Yoni*

19:28-30)

⁴⁵ Bayan aúbanasí íkan ma vara minó dun maren títipa ukhen ban áau eraven kanú manaú áauíen mino. ⁴⁶ *Kanú manaú áauí irí iyákan Yisasi avádóden ovaraaren máa semí, “Eri, Eri rema sabaktani?” Mai vayai ana máan mi ukhen mino. “Tenti Tiyarafenu oe, senti Tiyarafenu oe, éi fará téin oyan timiya fono.

⁴⁷ Manáa vanta ma mairá ádé mantakhá ein kéká ano mai vaya iniren temí, “Ma vanta ano Iraiyan mi ariyan mantino.”

⁴⁸ *Máa siren mana ano savaen oren mómfen ma einí ukhein daná o máden uvainifin kain maifin pébin mana yankará damuren Yisasi nano van kain óden mino. ⁴⁹ Kain ma ódiyákan manáa ano semí, “Iraiya ano véin me aya inain pimpá ifo áuke ódaré ono.”

⁵⁰ Yisasi enáda avádóden oovariyain má beni aunan kípan puren mino.

⁵¹ *Mai áaurá ana kákan monó namumpin ma kuran baré ein davaráe ano yanté kafasen barápá morúden maman kaníen mino. Máan tikan bara khaya iyain má kákan onámaná kayo ma varé ein kauren oreraen mino. ⁵² Máan tiyain má banta masí kayo khayosen oriaren duvavin Tiyarafenui kantasí ukhein nanin bantai ma fefá púkaré ein kéká ano e manten mino. ⁵³ Ínaimpáké Yisasi ma evaránen e mantavíkan maen betí ankan masí me ampiren kantasí ukhein baru Yerusaremí afoká íkan kokhon mano vetin onen mino.

⁵⁴ Arugin banta kayoi ayafa vanta vá arugin banta kéká bá ano Yisaintá dafíkaren onákan bara khayain minó danasí iyaimpin moéken kákantá akhokho van uren betí máa semí, “Ma vanta fura sen Tiyarafenu Anin mi varen mino.”

⁵⁵ *Kokhon nanin kayo ano ma Yisasin aya ono van ma Kariri fáké béin bákuren erikharé ein nanin kayo ano manáa nentá mantakhen oniyan baren mino. ⁵⁶ Maifin ma mantakharé ein nanin kéká mai kákan baru Makdaráke Marian má Yemisin nú

* **27:35:** Íbo 22:18 * **27:35:** Manáa Tiyarafenui vompon dókifin ena asotúin baya máa sikhemí, “Betí ma mai au anumuntá ma kati sein manon” pefá ma sakhanampa vanta oorá ma sikhá ein bayai kanaíen mino. * **27:38:** Ais 53:12 * **27:39:** Íbo 22:7; 109:25 * **27:40:** Mat 26:61; Yon 2:19 * **27:43:** Íbo 22:8 * **27:46:** Íbo 22:1 * **27:48:** Íbo 69:21 * **27:51:** Eks 26:31-33; Ibu 10:19-20 * **27:55:** Ruk 8:2-3

Yosepin nú anóe Maria má inká Sebeti anin kanan anóen mái varen mino.

Yisasin Ma On Aimpin Masí Ein Baya Ino

(Maki 15:42-47; Ruku 23:50-55; Yoni 19:38-42)

⁵⁷ Inupasí iyákan Aramatiá baru rákena moní banta Yosepin ne sin mano eren mino. Béin má mai mana Yisasini eyo iyampon mi varen mino. ⁵⁸ *Baren mi Yisasin au amintí barano van béi oren mo Pairotintá ina íkan Pairoti ano aruvin banta kayo van Yisasin au Yosepin ameno sen mino. ⁵⁹ Yosepi ano Yisasin au máden avusese en efanten ukhein davaráe fóké úke en mino. ⁶⁰ *Mai masí Yosepi ano manáa vanta kéká tíkan ompin boraádan baré íkan mai aimpin mo khauren mana kákan onámaná baébaé uan ain oyirá iyáden oren mino. ⁶¹ Makdaráke Marian má ena Maria má ano mai masí ádé kumanten oniyán baren mino.

Masíka Ma Aruvin Banta Kéká Dafikaré ein Baya Ino

⁶² Sabati rákena yaná ma Útavin Damú orivíkan ená damú* monó ánon banta kéká bá Farasisi kayo vá ano Pairotin o onen mino. ⁶³ *O ódaren betí ankan máa sen ben tiamemí, “Kákan banta oe, mai kampun banta ano ma fara váken maen kanú manaú damú ma orivintí téi evarané e mantanté uno ma sikharé ein baya van mi seti ovaré me ineine iyá tiféuno. ⁶⁴ Máa sikhán mifo éi sesin ná masí oyirá ákonaen áta urantin ná kanú manaú damú orino. Ída ma máan tesin maen beni eyo iyampon kayo ano ven au e umoyan uaren béi ínka evaránen purin pinté e manten mino sintin mai kampun baya ano fefá ma véi sikharé ein kampun baya esantaren mo kákaní inten mino.”

⁶⁵ Máa síkan Pairoti ano evaránen betin tiamemí, “Tiretí ankan aruvin banta kéká tesin ná mai masíka dafisino. Tiretí oreya vá mai masíka ma ákona ono ma se iniyaona yanasisá mo ono.” ⁶⁶ Máa sirákan betí ankan oren mo mai masí oyirá

ákonaen áta uren aruvin banta kayo síkan mai masíka dafisen mino.

28

Yisasi Ma Evaránen E Mantein Baya Ino
(Maki 16:1-8; Ruku 24:1-12; Yoni 20:1-10)

¹ Sabati yamú kípavin esé arái in damú ákura suron áau eunono van iyákan Makdaráke nanin Marian má ena Marian má masíka onano van oren mino.

² Oriyain má manáda kákantá bara khayá íkan Bafani enisori ano inaru me ampiren eraven masí oyi rákena onámaná do vaébaé uan kaúden mai yaró kumantaren mino. ³ Kumantán mai enisori aufáke afayu ma fanu seiní iyákan inká beni auí daná ano efanten uron en mino. ⁴ Máan tíkan betí ankan oniyán avinantan nan iyain má mai ákona ano minó aruvin banta kéká do ankaman karúdan barará baren orera uven purin banta kayo an den mino.

⁵ Máan tukhan enisori ano mái kan nanin tiamemí, “Tiré kanan ída vá akhokho van ono. Mai ma yaa unkamádantá ma arein banta Yisasin nan doseno van mi eriyán ná téi afová ukhé uno. ⁶ *Béi ída mafín ban mino. Pefá ma véi sikaré einien béi ínka e mantakhen mifo véi ma vakharé ein takhópin eriveya onano. ⁷ “dare aine evaráne ore vá beni eyo iyampon kayo vá mo máa se siameno, ‘Béi ínka furin pinté evaránen e mantakhein tiretin an uanten Karirifá o vantiya mai fákena o onan noná’ mai vaya siretin tiamintói eré uno.”

⁸ Máa síkan míkan nanin mano akhoko van uren ainen masí me ampiren beni eyo iyampon kayo siameno van amusín iyan tavaen oren mino.

Yisasi Ma Mákaráke Nanin Marian Avorá Dáko Ein Baya Ino
(Maki 16:9-11; Yoni 20:11-18)

⁹ Oriyá íkan Yisasi ainen manáda aasá afoká uven temí, “Ákurá ino.” Máa síkan míkan beni ádé oriven ben arantan bana fákaren míkan mano ventá monó tiyan aví danien mino. ¹⁰ *Monó tirákan Yisasi vékan máa sen tiamemí, “Tiré kanan

* 27:58: Diu 21:22-23 * 27:60: Ais 53:9 * 27:62: Ená damú maen mai Sabati yamú ino. * 27:63: Mat 12:40; 16:21; Mak 9:31; 10:33-34; Ruk 9:22; 18:31-33; Yon 2:19-21 * 28:6: Mat 12:40; 16:21 * 28:10: Mat 26:32

ída vá akhokho van iyáke ore vá te sifá tiváeyan mo siamesin Karirifá oriven maifá kena vá ten tonano.

Masí Oyirá Ma Yafíká ein Banta Kékái Vaya Ino

¹¹ Míkan nanin mano ma oriyaintena aruvin banta kéká ma masíká dafíkaré ein pinté manáa ano kákan barufin ódiven mai ma afoká ein baya máa monó ánon banta kéká tiamen mino. ¹² Tiamíkan monó ánon banta kéká bá banasii ánon banta kayo vá ano mai aruvin banta kéká kokhon moní amiren ¹³ temí, “Mana ano ma siretin inainti maeya máan ná teno, ‘Setí ankan inuran tuun baverunaren beni eyo iyampon kayo ano ven au e umoyan baren oren mino.’ ¹⁴ Kamanini ayafa vanta ano ma mai vaya inintí maé tetí ankan mai vaya ven má puntádékuya sireti ída aau varan nono.” ¹⁵ Aruvin banta kéká ano mai moní mamaren kákan banta kayoi vaya ánain dakhafen mino. Máan tíkan mai vaya ano minó Yutan kayofin orera uvin mai vaya sen eriyaré íkan taréa yere fara mai vaya sé iyan mino.

Yisasi Ma Vei Eyo Iyampon Kayo Ákona Yoran Amein Baya Ino

(Maki 16:14-18; Ruku 24:36-49; Yoni 20:19-23)

¹⁶ *Tíyan míkan mifo sirantan mana orun kádan (11) eyo iyampon kayo ano Karirifá oren Yisasi ma veti nan mai anurasá orono ma sikhare ein anurá o unen mino. ¹⁷ O unaven ma vetí ankan Yisasin oniyáken bentá monó tiyan aví danien mifo manáa ano kan ineine iyaren mino. ¹⁸ *Máan tiyákan Yisasi veti vaintá eriven tiamemí, “Inaru ráke yaná bá bara ráke yaná bá dafisino van Ti-yarafenu ano minó ákona séin inka simen mino. ¹⁹ *Máan tukhein nará tiretí ankan oriveya vá minó nanin banta maman tenti eyo iyamponí ureya vá be Afóen má be Anin má beni Kantá Aunan má ayikasá betin monó non péantano. ²⁰ Péantáde vá tiretin ma ameruna vaya kayo vá betin afova amiresin ná mai ánain bákurino. Téi fura sé tiretí ankan má ena ena yamú bá oriyá bákun mi yamú mo akhení inten mino.”

* **28:16:** Mat 26:32 * **28:18:** Yon 13:3; Efe 1:20-22 * **28:19:** Mak 16:15-16; Apo 1:8

MAKINI KAMA VAYA INO (Maki) Makini Kama Vaya Ma Uvanteí Pákenai Afova Vaya Ino

Ma vompon ma uvantein banta ino.

Yerusaremíke nanin Marian anin Yon Maki Banabasin afóna anon uvanten mino. Porin nú Banabasin nú bá béin esé araíen monó baya varen orin dorarí ukharen mino. Oo siádan baya ano siyáken béi anon Pitan oo vantaí ukhen beni vaya o vaéan banasi amiyaren mino. Máan tiyákan Pita anon ma vompon ma uvaran danas-inta véin amikhen minon ten manáa ano inikhen mino.

Uvarein orana ino.

AD sikisti-fo (64) ráké sikisti-faiپی (65) fin mi uvanten minon ten kokhon afova vanta kayo ano inikhen mino.

Ma vompon ma uvantein baru ino.

Kákan baru Romú ino.

Ma vompon ma uvaman amikhein kéká ino.

Romu kamani ano ma yafíkein baru kayofin má ena anan kéká pinté ma monó tiyain kayon uvaman amikhen mino. Peyante monó dóki fintena vaya ma sakhanampaí uádan ma varé ein baya kayo ída kokhon mafin ban maen inká Yutan kékáj anafu aráoni avúavá bá inan tian dákó en ukhen mino.

Nái ana vará ma vompon uvanten nafino.

Yisas Karaisi maen minó ákona vain Tiyyarafenu Anin mifo ume nanin bantaí miyan ída van doran bantaí uven ma ume fintena aya uren ma miyaní ukhein mi aní ukhen mino.

Mónó Non Péantan Banta Yoni Ano Ma Aa Uvisein Baya Ino

(Matiu 3:1-12; Ruku 3:1-9, 15-17; Yoni 1:19-28)

* 1:4: Apo 13:24; 19:4 * 1:6: 2Ki 1:8; Mat 11:8 * 1:7: Apo 13:25 * 1:11: Íbo 2:7; Ais 42:1; Mat 12:18; Mak 9:7 * 1:13: Íbo 91:11-13

¹ Yisas Karaisi Tiyyarafenu Anini kama vaya araí in máan mi ukhen mino. ² Sakhanampa vanta Aisaiyani vompon dókifin Tiyyarafenu ano máa sen uvantaren mino,

“Ineno! Téi vaya varen orin banta siantékun éin an uanten oren eni aa mo uvisinten mino!” *Mar 3:1*

³ “Kámá barafá mana vanta ano oovaren máa siyan mino,

‘Bafani aa uvíde vá beni aa funtarano.’” *Ais 40:3*

⁴ *Aisaiya máa sikáin monó non péantan banta Yoni ano kámá barafá afoká uven temí, “Ará baéde non baresin ná Tiyyarafenu ano siretíi ume ampiantano.”

⁵ Máa síkan Yerusaremí baru fáké bá Yudiá bara fáke nanin banta kayo vá ano Yoni vaintá eriven betíi ume sian páman urákan béi Yodení nompin monó non péanten mino. ⁶ *Béi kameri ayo fóké uvaran au anamun uren kao au fóké amú anan uren báken panon má bonkampun anu vá niyaren mino. ⁷ *Niyáken béi máan mi siyaremí, “Ten toyampá ma eriyaini ákona ano senti ákona moéken esantakhen mino. Téi ída funtákeruna ída kanaí é matime beni arantan anamun anan útufonté uno. ⁸ Téi non pokéi féantiyá umpo véi Kantá Aunan pokéi féantanten mino.

Yoni Ma Yisasin Monó Non Péantein Baya Ino

(Matiu 3:13-17; Ruku 3:21-22)

⁹ Maí damú Yisasi Kariri varafá Nasaretí baru fáké eríkan Yoni ano Yodení nompin béin monó non péanten mino. ¹⁰ Péantádan Yisasi non pinté e ayoren édiyan onákan inaru ona yivin kukhofá avúaváká ten Kantá Aunan mano véin ánotá eren mino. ¹¹ *Erákan inaru fáké mana oova ano máa semí, “Éi sen tanin uron mono. Éin nan moeké tinunu ukheruna iyampon mi van ná timusin iyá uno.”

Ban Anon Mano Ma Yisasin Akhenóka Ein Baya Ino

(Matiu 4:1-11; Ruku 4:1-13)

¹² Máa siyain má Kantá Aunan mano Yisasin ainen tiantan banta ída van kámá barafá oren mino. ¹³ *Maifá foti (40)

yamú o vakan Ban Anon mano Yisasi eraven ankan mino van akhenóka uan onen mino. Béi kámá barafá afá uraran kayo vá ana vakan enisori kayo ano ventá dafíkaren mino.

Yisasi Ma Karirifá Monó Doran Mo Araí Ein Baya Ino

(Matiu 4:12-17; Ruku 4:14-15)

14 *Eroti ma Yonin karavusifin pákaan kaúdan maen inaimpáké Yisasi Karirí barafá Tiyarafenui kama vaya siamen oren mino. 15 *Oriyáken temí, “Damú inka afoká íkan Tiyarafenui Yafisin inka ádé e van mino. Ará baéde vá Kama Vayará mumunan ono.”

Yisasi Ma Araí En Bei Eyo Iyampon Kayo Avirein Baya Ino

(Matiu 4:18-22)

16 Maná damú Yisasi Kariri non akhempá oriyaren onákan Saimonin má be afá Endurun má noyana van baseí iyaren mino. Mai fara va ino. Betí ankan noyana arin kékái váken baseí iyaren mino. 17 Máan tiyaré íkan Yisasi vetin araren temí, “Ten má eresí aní ékuya noyana ma vaseí iyaonaí ureya vanasi avirano.” 18 Maa síkan békanaan manádá base kayo me ampiyan béin bákuren oren mino.

19 Yisasi ma non akhempá manáa oriyan onákan Sebetin anin kanan Yemisin nú Yonin nú botifin base kayo yókiyan baren mino. 20 Dókiyaré íkan békán nan ariyain má betí afóe Sebetin má doran banta kayo vá me ampiren Yisasin bákuren oren mino.

Yisasi Ma Namu Aunan Do Siantein Baya Ino

(Ruku 4:31-37)

21 Betí ankan Kapeniamú barurá o varé íkan Sabati yamú ma afoká íkan maen Yutan nanin bantai monó átaru namumpin Yisasi ódiven monó baya siamen mino. 22 *Tiamíkan banasi ano iniren takhaen orera iyan temí, “Beni vaya ano Yutan kayoi man baya ma afová uhein banta kéká ano ma vaya seinisa iyan naino. Ída ino. Pura sikhein ákona vá ma vain banta ano ma seiníi iyan mino.”

23 Maa siyákan namu aunan ma vain banta ano mai monó átaru namumpin baren mino. 24 *Mai vanta ano vádiyan temí, “Nasaretíke vanta Yisasi oe, éi setin namu ono vará ere fono. Tetí ankan éin afová ukhékuya éi Tiyarafenui Mana Kantasí ukhaona uron mono!”

25 Maa síkan Yisasi mai namu aunan nan arankaan táden temí, “E avaya fákare véin pinté entavono!” 26 *Maa siyain má namu aunan mano mai vanta máden dómeron uren me ampiren bádiyan oren mino.

27 Máan tiyain má mai ma iyukhen oniyaré ein nanin banta ano sakha iyáken betiyan inain maran en temí, “Ma naísá iyan nafino. Ma auyen afovan bakan mai ákona fókéi namu aunan kayo yo siantiyan mai kéká ano véin oo yaiyiyan mino!”

28 *Máan turákan Yisasi ma varein avúavá baya ano ainen Kariri varafá oreraen mino.

Yisasi Ma Pitan Aná Anóen Ayofein Baya Ino

(Matiu 8:14-15; Ruku 4:38-39)

29 Yisasi ma mai monó átaru namun me ampiren Saimonin nú Enduru nú amapin orin maen Yemisin nú Yonin nú bá béin bákuren oren mino. 30 Oríkan betí ankan temí, “Saimonin aná anóen aí iyáken aufá ira kharo iyan bakhen mino” sen Yisasin tiamen mino. 31 Maa síkan mai nanin ma vakhein ádé ódiven ayan bana fákaaren avían mantiyain má manádá aí kípavin mai nanin mano vetíi yunan taren mino.

Yisasi Ma Kokhon Nanin Banta Ayofein Baya Ino

(Matiu 8:16-17; Ruku 4:40-41)

32 Mai inúpá áau ma orun periyain má kokhon aí nanin banta vá namu aunan mano ma fákakhein kéká bá ina Yisasi vaintá aviren ere en mino. 33 Máan tiyákan Kapeniamú baru ráke nanin banta ano o vúten Yisasi ma varan nain avúavá onano van onará e átaru en mino. 34 *Máan tuvin ara ara aí ma váein kayo ayofiyáken namu aunan ma fákakhá ein kéká pinte ina yo sianten mino. Máan ten mifo namu aunan kayo ano Yisasi iyé ban nafi mai véin afová ukhan pasen ída áikan manáa vaya sen mino.

* 1:14: Mak 6:17 * 1:15: Mat 3:2 * 1:22: Mat 7:28-29 * 1:24: Mak 5:7 * 1:26: Mak 9:26 * 1:28: Mat 4:24 * 1:34: Mak 3:10-12

*Yisasi Ma Karirí Akhempá Monó Dorarí
Ein Baya Ino*

(Ruku 4:42-44)

³⁵ *Ená damú ída kakhakhan Yisasi fe ákura suron e mantaaren amúkono van banta i van kámá barafá beyaká oren mino. ³⁶ Orivíkan ínaimpáké Saimonin má manáa kéká bá Yisasin doseno van oren mino. ³⁷ Oren ma o oman afoká uren maen temí, “Éin nan minó ano yosiyán mino.”

³⁸ Maa síkan Yisasi evaránen betin tiamemí, “Monó baya siameno van mi erikhé umpo erítifé ena varu kayo fimpá orivé maifá ina mo siameno.” ³⁹ *Maa siren Kapeniamú me ampíren Karirí barafá ma vain baru kayo fimpá oriven Yutan nanin bantai monó átaru namun kayofin monó baya siamiyáken kokhon nanin banta fintena yere namu aunan kayo yo sianten mino.

*Amon Dana Aí Bain Banta Ma Yisasi
Ayofein Baya Ino*

(Matiu 8:1-4; Ruku 5:12-16)

⁴⁰ Maná damú amon dana aí bain banta ano véin ayofano van Yisasin arantampin me aron kan durafúden temí, “Éi ma anunu iyanteya senti sí daná tiyofasintan nono.”

⁴¹ Maa síkan Yisasi arunan máden ayan dan orin au aruviyan temí, “Eyo, ayofé umpo aí daná kípano.” ⁴² Maa siyain má anan mai amon dana aí manadá kípen mino. ⁴³ Kípin Yisasi mai vanta siantan oriyan ákona veya siamemí, ⁴⁴ * “Ída vá ena nanin banta ma veya siamiyáke funtáde ore vá monó doran banta aufasá mo aní ono. Maa ture fefá ma Mosesi sikhán amon dana aí ma vá ein kéká ano ma variyá ein avúavasí eya vá manáa yanasinta vare mo ákonte esin ná banasi ano mai ma aí kípein ná onano.”

⁴⁵ Maa síkan mifo mai vanta ano oriven banasi avorá Yisasi ma véin aí ayofein baya mo siamin iniren minó nanin banta ano Yisasi vaintá eren mino. Maa tiyaimpin Yisasi ma minó baru kayo fimpá orono sikhá ein me ifá uren banta ída vain akhempá o vákan minó akhen páke nanin banta ano kasaen be vaintá oren mino.

* **1:35:** Mat 14:23; Mak 6:46 * **1:39:** Mat 4:23; 9:35

2

Ai Ayan Púká Ein Banta Ma Yisasi Ayofein Baya Ino

(Matiu 9:1-8; Ruku 5:17-26)

¹ Manáa yamú ma orivíkan Yisasi evaránen Kapeniamú barurá o van mai veya ano ainen mai varufin oreraen mino. ² Orera íkan banasi ano o vúten mai ma váein namun e víkaaren onará ina ída afokhan bákan Yisasi monó baya siamen mino. ³ Tiamiyákan kamí kamí banta ano ayan arantan púká ein banta kúkútafin kaúden aviren eren mino. ⁴ Eríkan banasi ano víkakhan ída kanaíen Yisasi vaintá aviren orin nainí iyaimpin má nantá ódiven amompin kápóden anan póké kúkútará damuren mai aí banta Yisasi vaintá kain araven mino. ⁵ Aravíkan Yisasi ma mai máa vantaí mumunan ódaren maen mai ma ayan arantan púká ein banta siamemí, “Te sanin noe, eni ume ampianten mino.”

⁶ Maa tiyan maen maifin manáa man baya ma afová ukhein banta kéká ina kumantaren maa ineine en oreraen mí, ⁷ “Ma vanta ano fará máa siyan nafino. Béi Tiyaarafenui oyampá baya siyan mino! Mana vanta ano ída kanaíen ume ampiantanten mifo Tiyaarafenu veyafin mí mai ákona van mino!”

⁸ Maa ineine en orera iyákan Yisasi afová uren betin tiamemí, “Ma avúavá ma variyaruna van tiretí ankan pará Tiyaarafenui oyampá baya siyan mino sé iniyara fono. ⁹ Ayan arantan púká ein banta van inte veya ma seruna anó teso sikhén nafino. Eni ume ampianté uno ma seruna ano fi áa orun mantave ei kúkúta mamare orono ma seruna ano fino.” ¹⁰ Mai avúavá ma variyaruna anon Banta Animpin ma varará ákona vákan ume ampiantian mino sé aní iyá uno.” Maa siren Yisasi mai ma ai ayan púká ein banta van temí, ¹¹ Aí daná kípen mifo mantave ei yuvasí mamare varufá orono.” ¹² Maa ma siyain má mai vanta ano orun mantaaren duvasí mamaren mai ma oniyaré ein nanin banta yo éka náka iyáken oren mino. Mai ma iyukhá ein nanin banta ano mai avúavá ma oniyáken,

* **1:44:** Riv 14:1-32

“Máan avúavá tetí ankan pefá ída ontaré eruna yanái afoká en mino!” siyáken Tiyarafenu aví daníen mino.

Yisasi Ma Rivain Ne Sin Banta Arein Baya Ino

(Matiu 9:9-13; Ruku 5:27-32)

¹³ Máan turen Yisasi evaránen non akhempá oríkan banasi ano ve vaintá o iyuvín monó baya siamen mino. ¹⁴ Tiamíden oriyaren ma Arafiusin anin Rivain onákan takisi varan namumpin kumantaréin maen béin ariyan temí, “Tesi eyo iyamponí in nampo ereno.” Síkan béi e mantaaren Yisasín bákuren oren mino.

¹⁵ Mai inúpá Rivai ano Yisasín má bei eyo iyampon kayo vá arákan be amápin mo yunan niyan maifin takisi varan banta kéká bá ume nanin banta vá inan baren mino. Máan avúavá bá bain nanin banta vá dere anon Yisasi ma oreipá bákuren noren mino. ¹⁶ *Mai kéká bá ma Yisasi yunan niyákan man baya afová ukhein Farasi khayó ano Yisasini eyo iyampon kayo ina iyan temí, “Para Yisasi sakisi varan banta kayo vá ume nanin banta vá manafin dunan niyan nafino.”

¹⁷ Mai ma ina iyain baya ma Yisasi iniyáken betin tiamemí, “Aí ma vain nanin banta ano anan ayofan banta vaipá oré iyan mifo ída ma aí bain nanin banta ano ída ayofan banta vaipá oré iyan mino. Puntákein nanin banta arano vara erikhe raumpo ume nanin banta arano van mi eriké uno.”

Dunan Ma Aurá Pákena Van Ma Yisasín Inaein Baya Ino

(Matiu 9:14-17; Ruku 5:33-39)

¹⁸ Yonini eyo iyampon kayo vá Farasisi kayo vá ano yunan auraren bákán maná damú manáa nanin banta ano Yisasi vaintá eriven béin inaemí, “Yonini eyo iyampon kayo vá Farasisi kayo vá ano yunan auraren ban mifo fará ei eyo iyampon kayo ano ída yunan auriyan nafino.”

¹⁹ Maa sen ina íkan Yisasi evaránen betin tiamemí, “Mana vanta ma anasi iman ameno van iyan maen mai omápin ma arakhá ein kéká ano yunan auré iyan nafino. Anasi iman amin banta vá ma váken ída kanaíen duna auranten mino.

²⁰ Maná damusí intin anasi iman amin banta ma aviren orivintin maen dunan auranten mino.” ²¹ Maa siren temí, “Mana vanta ano ída auyen davaráe kafádan póké peyante yavaráe ma yákkheimpin mo yamparen amu é iyan mino. Auyen davaráe fóké ma yamparen amu urantin o fáke e fáke uaren kákantái yáken orera inten mino.” ²² Inká auyen uvaini anu kháan peyante memé aufin ída khaé iyan mino. Peyante memé aufin ma auyen uvaini anu khaintin maen paútiaren eravin nain nan mino. Auyen uvaini anu káan auyen memé aufin mi khaé iyan mino.”

Yisasi Ma Veyan Nan Sabatii Bafan Muno Sein Baya Ino

(Matiu 12:1-8; Ruku 6:1-5)

²³ Mana Sabati yamú ma Yisasi má bei eyo iyampon kayo vá arokhú dunampin oriyan maen bei eyo iyampon kayo ano arokhú ankanen oriyaren mino. ²⁴ *Máan tiyákan Farasisi kayo ano ódaren Yisasín tiamemí, “Sabati yamú ma arokhú ankaniyain mai ída vá doran barano sikhein damúi vakan man bayan durafuriyan mino. Mai ída ma máan toren mino.”

²⁵ *Maa síkan Yisasi evaránen betin tiamemí, “Deviti má bei kéká bá arafan puríkan ma mantá ein avúavá turetí ankan bompon dóki finte ídá dankádé afová ukhe fono. ²⁶ *Abiata ma monó ánon doran pákakhein damú béi Tiyarafenui mápin un pében monó ánon doran pákakhein kéká ano ana kantasí ukhein bereti niyain un máden niyáken bei kéká amin nakhen mino. Máan ma ein mai man baya yeren durafunten mino.” ²⁷ *Maa siren betin tiamemí, “Banasi aya ino van mi Sabati uvádan ban mifo vanasi ano Sabati aya ono vara uvamádan ban naino. ²⁸ Mai van mi Banta Anin mano Sabatii Bafan ban mino.”

3

Yisasi Ma Mana Ayan Púkein Banta Ma Sabati Yamú Ayofein Baya Ino

(Matiu 12:9-14; Ruku 6:6-11)

* 2:16: Mat 11:19 * 2:24: Diu 23:25 * 2:25: 1Sa 21:1-6 * 2:26: Riv 24:5-9 * 2:27: Diu 5:14

¹ Ená damú Yisasi evaránen Yutan nanin bantai monó átaru namumpin ódíkan aiayan púkein banta ano maifin baren mino. ² Maí damú Sabati varé íkan Yisasin nan manáa avúavá mádantí béin aufin pákaan kaono van ben ma namuroí uantiyain kéká ano sen inen uaren béintá daffian ákona ukharen mino. ³ Máan tukhan Yisasi mai ma aiayan púkein banta siamemí, “Minó avorá mará e mantano.” ⁴ *Máa siren Yisasi vetin inaemí, “Sabati yamú ma kama avúavá mamantan manó kama ukhen nafi áa namu avúavá ma mamantan manó kama ukhen nafino. Má damú banta aruan puró tifante rafuno áa ayaó tifante rafuno.” Máa síkan betí ankan baya ída sen mino. ⁵ Máan tiyainpin Yisasi onen eúkiyáken betin ará ákona ukhan aran daná máden mai ma aiayan púkein banta van temí, “Ayan antúkano” síkan ayan antúkiyain má evaránen ayan kamaen mino. ⁶ *Máan tiyain má Farasisi kayo ano ainen e manten oren Erotini kéká bá mo Yisasin ma aruan purin nain aa van ten inen en mino.

Kokhon Nanin Banta Ano Ma Yisasin Bákuren Orein Baya Ino
(Ruku 6:17-19)

⁷ Yisasin má bei eyo iyampon kayo vá ano Karirí non akhempá oríkan kokhon nanin banta ano véin bákuren oren mino. ⁸ Yisasi ma variyain dana san ma vanasi ano inen Yudiáke safi Yerusalemike safi inká Idumiáke safi Yodení non ufáke safi inká Taiya vá Saidoní akhen páke nanin banta ano fi mai ma variyain avúavá onano van ere ere en mino.

⁹ Máan tiyan kokhon nanin banta ano eyu akhempá bíkiyákan boti varen erino van Yisasi vei eyo iyampon kayo siamen mino. ¹⁰ *Maí damú kokhon nanin bantan ayofen mino. Máan ma iyain avúava san aí nanin banta ano Yisasin au aruvono van béi vaintá oren mino. ¹¹ *Máan tiyákan namu aunan ma varé ein kayo ano Yisasin ma oniyáken béin anafin o ankamiyan bá diyáken, “Éi Tiyarafenu Anin mono” sen mino. ¹² *Máa ma síkan béi iyé ban nafi ída sian páman ino van

Yisasi vetí ankan kákan airo ananí uanten mino.

Tiyan Míkan Mifo Sirantan Kan Orun Kádan (12) Eyo Iyampon Kayo Ma Yisasi Aní Ein Baya Ino

(Matiu 10:1-4; Ruku 6:12-16)

¹³ Ínaimpáké Yisasi anurá ódiven bei kékasi ma inain banta kayo arákan béi vaintá oren mino. ¹⁴ Onóbin tiyan míkan mifo sirantan kan orun kádan (12) banta aviden béi má nóken monó baya varen orino van aposeri kéká ino sen aren mino. ¹⁵ Araren namu aunan ma yo siantan ákona vetin amen mino.

¹⁶ *Ma sirantan kan orun kádan (12) banta ma avirein kékái aví ino. (Ínaimpáké Pita ne sen ma arein banta) Saimoni ino.

¹⁷ *Sebetin anin Yemisin nú be afá Yoni nu san Boanekesi ne sen mino. Mai víi ana maen aafa ma kankaré tiyain anin kanan nen tikhen mino.

¹⁸ Inká Enduru ne sen, Firipi ne sen, Batoromu ne sen, Matiu ne sen, Tomasi ne sen, Arafusín anin Yemisi ne sen, inká Tadiasi ne sen, mana Serotí anan banta van Saimoni ne sen, ¹⁹ inká (ínaimpáké ma namuro ayampin avían amin nain banta van) Yudas Iskariotin* ne sen en mino.

Yisasi Má Beseburin Mái Vaya Ino

(Matiu 12:24-32; Ruku 11:14-23, 12:10)

²⁰ Ínaimpáké ma Yisasi evaránen béi ma varé ein namumpin ma oríkan kokhon nanin banta ano evaránen o átaru iyákan béi má bei eyo iyampon kayo vá ano ma yunan nan afokhan ída varen mino. ²¹ Máan tiyain baya ma Yisasini kéká ano iniren “béin nan óen mi iyan mino” siren aviré barufá orono van eren mino.

²² *Eríkan Yutan kayoi man baya ma afová ukhein kéká ma Yerusalemiké erein kayo ano semí, “Beseburin ne sin namu aunani ánon banta anon béimpin báken mí namu aunan ma yo siantan ákona amiyan mí namu aunan do siantiyan mino.”

²³ Máa síkan Yisasi iniren betin aran eríkan baya o vaéden tiamemí, “Ban Anon mano kanaisá ená Ban Anon do siantan-ten nafino. ²⁴ Mana vantai yafisimpin

* **3:4:** Ruk 14:3 * **3:6:** Mat 22:15-16 * **3:10:** Mat 14:36 * **3:11:** Ruk 4:41 * **3:12:** Mak 1:34 * **3:16:** Yon 1:42 * **3:17:** Ruk 9:54 * **3:19:** Yudas Iskarioti e ma siyain Iskariotí baru ráke vantan ban mino. * **3:22:** Mat 9:34; 10:25

ma yaíden aruvinten maen ída kanaíen ákona ukhen banten mino. ²⁵ Inká mana namun pinté ma yaíden beraran aruvinten maen ída kanaíen ákona ukhen banten mino. ²⁶ Inká Ban Anon mano ma veraran daiminten maen mai inté en ná mantaan ákona ukhen banten nafino. Ída ino. Máan ma inten ída ayáká banten mifo ainen mo kípanten mino.” ²⁷ Maa siren ena vaya sian baéan amen temí, “Mana vanta ano ída kanaíen ákona vanta amá pintena ódiven beni ona umoyan baranten mino. Béin nare ma anan póké damuan kaúden manan beni minó ona umoyan baranten mino.” ²⁸ Máan tukháí siretin pura vayan tiamenté uno. Minó ume khayó vá Tiyarafenu ma oyampá baya sin ume khayó vá Tiyarafenu ano kasaen ampiantanten mifo, ²⁹ Kantá Aunan ma oyampá baya sin ume ana ída kanaíen ampiantanten mino. Mai ume ano fara van oriyán banten mino.”

³⁰ Yutan kayoi man baya afova mantein kéká ano ma Yisasi nan “namu aunan máí va ono” ma sein nan mi mai vaya sen mino.

*Yisasini Mana Kékasí Ma Iyain Baya Ino
(Matiu 12:46-50; Ruku 8:19-21)*

³¹ *Maa siyákan Yisasin anóen má be afá kayo vá ano véi ma vain namun baintá eren mino. Barurá e iyuyen Yisasin mun tiamintin barufá erantí béin má baya seno van baya yan óden mino. ³² Kokhon nanin banta ano Yisasin maman aúban den iyukháin manáa vanta ano véin tiamemí, “E anóen má e afá kayo vá ano onano van barurá e iyukhen éin nan ina iyan mino.”

³³ Maa síkan Yisasi evaránen inaemí, “Iyé ten tinóe vákan iye néné ten tifá tiváeyan ban nafino.” ³⁴ Maa siren mai ma iyukhá ein nanin banta onen eúkiyáken temí, “Ma ma iyukhein nanin banta mai se sinóen má te sífá tiváeyan máí van mino. ³⁵ Intéa nanin banta anó Tiyarafenui oo yayiyian nafi mai kéká pura sen te sintun mi van mino.”

4

*Danayun Ma Fafasin Bantará Ma Ovaéádein Baya Ino
(Matiu 13:1-9; Ruku 8:4-8)*

¹ *Yisasi evaránen Kariri non akhempá oriven monó baya siyákan kokhon nanin banta ano eyu akhempá o átaru en mino. Átaru iyaimpin botifin un kumamen manáa e afánen o váken monó baya siamiyan mino. ² *Máan tiyáken maen minó baya vaédiyáken banasi siamiyain pintena mana o vaeran baya máa semí,

³ “Ineno, Mana vanta ano yanayun mo fafa seno van oren mino. ⁴ Danayun ma mamaren oriyákan manáa ayun mano aa akhempá eravíkan nun kayo ano mai ma eravein aien nen mino. ⁵ Manáa ayun mano manáa vara on daró baré íkan mai yaró eravukharen ainen orun ampamen mino. ⁶ Ampantaré in ma áau édaviyain ma kákan á kan maen mai ma ampamein ayun mano ída kokhon bara varéin pasen ainen kafuren mino. ⁷ Inká manáa ayun ma ayankun namampin eravukhá ein mano ma e ampamen édavin ayankun naman mano úkuaren mákáká uádan ída aran iren mino. ⁸ Manáa ayun mano kama varafin eravukharen mai ano ampamaren kokhon aran iren mino. Manáa ano teti (30) irákan inká manáa ano sikisti (60) iran inká manáa ano mana antareti (100) vá manáa moéken imádan en mino.” ⁹ Maa siren Yisasi semí, “Átaren ma van nain kayo áesin ná ma vaya iniren afová ino.”

*Yisasi Ma Ovaeran Baya Fákena Ma Sian Amá Ein Baya Ino
(Matiu 13:10-17; Ruku 8:9-10)*

¹⁰ Ínaimpáké banasi ma orivíkan Yisasin má bei eyo iyampon tiyan mikan mifo sirantan kan orun kádan (12) má manáa nanin banta kayo vá ana váken máa sen Yisasin inaemí, “Éi ma vaéde siya ona vaya kayoi ana mai intesá ukhen nafino.”

¹¹ Maa síkan betin evaránen tiamemí, “Tiyarafenui yafisimpin ma aúpá baya vain mi siretin aní iyá umpo vanasi ano ma ída sentá mumunan iyain kayo ano ída kanaíen tian baeran bayai ana afová inten

* **3:31:** Mak 6:3; Yon 2:12; Apo 1:14 * **4:1:** Mak 3:7-9; Ruk 5:1-3 * **4:2:** Mat 13:34; Mak 4:33-34 * **4:12:** Apo 28:26-27

mino. ¹² *Mai van mi Tiyarafenui vompon dóki ano máa sikharen mino. “Téi ma variyarúna avúavá betí ankan onanten mifo ída veni ana afová inten mino. Tenti vaya vetí ankan ininten mifo ída kanaíen beni ana afová inten mino. Máan tiyáken ume finté ída ovaránantin betíi ume ifá uantante mino.” *Ais 6:9-10*

Danayun Pafasí Pákenai Ovaeran Baya Ma Sian Amá Ein Baya Ino (Matiu 13:18-23; Ruku 8:11-15)

¹³ Máa siren Yisasi semí, “Mai vaeran baya ma siretí ankan ída afová inteya mai minó baya ma vaédiyá tiamenunai ana inté ureyá afová inte rafono.” ¹⁴ Máa siren betin tiamemí, “Mai yanayun ma fafasein banta ano Tiyarafenui vayan pafa siyan mino. ¹⁵ Asá ma manáa yanayun eravein mai Tiyarafenui vaya ma vanasi ano iniran ma Ban Anon mano ainen eriven betin aúkáke yo varé iyan mino. ¹⁶ Inká manáa yanayun ma on daró eravein mai vanasi ano ma ainen Tiyarafenui vaya iniren amusin é iyain mino. ¹⁷ Máan té iyan mifo vetíi arú ano ída námen aravukhan mi ída ayáká báe iyan mino. Máan tukhan mi Tiyarafenui vaya ma siyaintá ma uman nafi aafi ma erin maen ainen eraven ankamé iyan mino. ¹⁸ Manáa yanayun ma ayankun namampin eravein mai Tiyarafenui vaya ma iniyain mino. ¹⁹ *Iniren ma vara ráke yana san ma in ineine ma erin maen Tiyarafenui vaya me ampiren ainen oré iyan mino. Moní ona van in nafi inká bara ráke yaná kokhon barano van in avúavá anon Tiyarafenui vaya me yaramádan ída aran iré iyan mino. ²⁰ Inká kama varafin ma eravein danayun kayoi mai vanasi ano ma Tiyarafenui vaya iniren ma aran iré iyain kékái aní ukhen mino. Manáa ano teti (30) irákan inká manáa ano sikisti (60) iran inká manáa ano mana antareti (100) vá manáa moéken imádan é iyan mino.”

Daamu Ma Antúduan Kain Nan Ma Sian Baékein Baya Ino (Ruku 8:16-18)

* **4:19:** Mat 19:23-24 * **4:21:** Mat 5:15; Ruk 11:33 * **4:22:** Mat 10:26; Ruk 12:2 * **4:24:** Mat 7:2 * **4:25:** Mat 13:12; 25:29; Ruk 19:26 * **4:29:** Yoe 3:13; Rev 14:15

²¹ *Yisasi vetí ankan tiamemí, “Mana vanta ano ma yaamu antúduren kurafin ná kuferé iyan nafino. Áa sakhó aránaó pasá kaé iyan nafino. Ída ino. Takhókái kaé iyan mino. ²² *Minó daná ma aúpá ma váin nain mai ínaimpáké dákó inten mino. Mana vanta ano ma mana yaná dará dantin báin nain mai yaná ínaimpá afoká inten mino. ²³ Átaren ma vantin ineno van inain mano áesin ná inino.”

²⁴ *Máa siren betin tiamemí, “Sireti ma vaya inire mai vayai ana kama e vá afová ono. Tiretí ankan ma ena nanin banta siamamesin maen Tiyarafenu ano máan avúaváká anan tiretin má amiren ena vá moéken aminten mino. ²⁵ *Manáa vantá ano inireya yoran baresin maen Tiyarafenu ano moéken afova aminten mino. Inká manáa vanta ano ma iniren doran ída varantin maen Tiyarafenu ano véin pintena mai ma mantáin nain afova yo varanten mino.

Danayun Ma E Ampamintá Ma Sian Baékein Baya Ino

²⁶ Yisasi evaránen temí, “Tiyarafenui yafisimpin máan mi ukhen mino. Mana vanta ano yunan barafin danayun mo fafasen mino. ²⁷ Pafa siren e váken inuran má bayan má intesá en ná ban nafi ída afová íkan mai yanayun mano veyantá e ampamen mino. ²⁸ Mana ano ída ayaíkan barai ákonará anan mai yanayun mano e ampamen mino. E ampamaren araíen amun ana ódiaren aran imádákaren mi ínaimpáké afukhé iyan mino. ²⁹ *Afu khakharé íkan ínaimpáké dunan duyasin damusí ma in maen mai vanta ano sope fóké mai yunan duyase iyan mino.

Titó Daa Arantá Ma Sian Baékein Baya Ino

(Matiu 13:31-32; Ruku 13:18-19)

³⁰ Yisasi evaránen temí, “Téi inté uresá Tiyarafenui Yafisin pintena vaya siamente rafuno. Mai vaya inte yaná kasá tian baerante rafuno. ³¹ Mana Yudia nanin bantai varafá ma mastati e sin daa ma vain mai aran aú an mi yakhen mino. Mai aran aú ano ída ena yaa aran aú an dakhen mifo

véi sító aúi van mino. ³² Máan tukhan mi mana vanta ano ma mai aú dódan baren e ampamen kákaní uaren nun kayo ano ma kasaen o yomaniríen ayan dan orera uven konesí é iyan mino.”

³³ Máan baya khayó fókéi vanasi ano ma kasaen afová oren avúaváká Yisasi ano vava vaédiyan mana siamiyaren mino. ³⁴ Banasifin ma váken mana vava ída funtáden tiamiyaren mifo minó baya vaédiyan manan tiamiyaren mino. Ínaimpáké bei eyo iyampon kayo vá ana ma váken mi mai vayai ana sian amá uan amiyaren mino.

Yisasi Ma Kákan Uva Yo Siantein Baya Ino

(Matiu 8:23-27; Ruku 8:22-25)

³⁵ Maí damú áau eraven inúpasí íkan Yisasi vetin tiamemí, “Eritifé non e khádé ena ufá oró tifano.” ³⁶ Maa síkan betí ankan mai nanin banta me ampiren Yisasi ma kumantá ein bótifin un kumamen oríkan manáa voti kayo ano vetin dakhafen oren mino. ³⁷ Oriyaré íkan kákan uva uaren non karantó en botifin avanen ódiaren mai votifin non mano víkaríen mino.

³⁸ Máan tiyákan Yisasi mai voti oy-ampáke kanuká ánon kaúden bakharen mino. Bakharé íkan betí ankan beín avoren temí, “Aruso oe! Ádé anantá tetí ankan non ufuró tifanté umpo éi ídá mai van iniya fono.”

³⁹ Maa síkan Yisasi e mantaaren uva asiyáken non nan temí, “Kípantiya! Púkekhan!” Maa siyain má uva kípán non mano evaránen púkekhen mino. ⁴⁰ Máan turen Yisasi vei eyo iyampon kayo siamemí, “Pará turetí ankan akhokho van iya fono. Turetí ankampin mumunan ídá ban nafino.”

⁴¹ Maa síkan betí ankan kákantá akhokho van uren betiyan ten oreraen temí, “Ma vanta véi iyé bákan ná uva vá non má ano véin avaya iniyan nafino.”

5

Yisasi Ma Namu Aunan Bain Banta Ayofein Baya Ino

(Matiu 8:28-34; Ruku 8:26-39)

* 5:7: Mak 1:24

¹ Yisasi má bei eyo iyampon kayo vá ano Kariri non e kháden Kerasá barafá oren mino. ² Yisasi ma voti finté eraviyain má mana namu aunan mano fákakhan óen iyain banta ano vanta ma masí ukheí páké béin onano van eren mino. ³ Mai vanta ano vanta ma masí uran bain pimpá baren nókan mana vanta ano véin ída kanaíen ayanan kuvirí ukhan inká seni anan póké dere ída kanaíen kuviyaren mino. ⁴ Seni anan póke safi ankati fo safi kokhon damú ayan arantantá damuran mai anan antáden tító tító iyákan ída kanaíen mana vanta ano véin pákaan kaiyaren mino. ⁵ Máan tiyáken mai vanta ano inuran má bayan má banta ma masí ukhein pimpa safi inká anuyon kayo fimpa safi nóken bá diyan maen eraven onámaná kayorá be au kaviyaren mino.

⁶ Máan tiyaren mai vanta ano manáa nen táké Yisinin óden maen tavaen oren béin aufá mo aron kanan durafúden mátimen mino. ⁷ *Mátimen avádóen oovararen temí, “Yisasi oe, Éi Yan Bain Tiyarafenu Anin mompo séin náisá usintano vará eriya fono. Téin ma ída namu inteya mai Tiyarafenu aviká purase sisimeno van muno.” ⁸ Mai fara va máa sen naino. Yisasi ma siyáken, “Namu aunan mompo mai vanta finté eravono,” ma sein nan mino.

⁹ Maa síkan Yisasi mai vanta inaemí, “Éin aví iye fino.”

Síkan béi semí, “Te siví kokhoná uno. Mai fara vara seyo, setí ankan kokhon kékái vá tifeuno.” ¹⁰ Maa siren mai namu aunan kayo ída siantantin mai varu me ampiré nentá orono van ákonaen Yisasi vaípa ínanen inaen mino. ¹¹ Maa siyákan mai ádé tító anurá kokhon pon kayo iyukhen dunan niyaren mino. ¹² Máan tiyákan mai namu aunan kayo ano Yisasi vaípa ínanen tiamemí, “Éi sétin tisintesi mesan pon kayo aúpin oferá tifano van muno.” ¹³ Maa síkan Yisasi kana ino siyain má mai namu aunan kayo ano mai vanta me ampiren oren pon kayo aúpin oferen mino. O fébikan kan tauseni (2,000) fon kayo ano savaen mana kákan ayafin aravuaren non akharumpin orun áduven ufuren puren mino.

¹⁴ Máan tíkan pontá ma yafisiyaré ein banta kayo ano karan oriyáken kákan baru kayofin má mai akhempá ma vain baru kayofin má mai ma afoká ein baya e siamen oriyákan betiyantá onano van ore ore en mino. ¹⁵ Minó nanin banta ano Yisasi vaintá oriven onákan mai ma namu aunan ma fákakhá ein banta ano yavaráe íden kamaen kumantan o óden akhokho van en mino. ¹⁶ Máan tíkan ma o onein kayo ano mai ma namu aunan pákakhá ein banta vá pon kayo vá amaniná ma afoká ein avúavá baya vanasi me siamen mino. ¹⁷ Máa síkan banasi ano iniren Yisasin nan mai vara me ampiren enafá orino van ákonaen baya sen mino.

¹⁸ Máa síkan Yisasi ma evaránen botifin ódin maen mai ma fefá namu aunan mano fákakhá ein banta ano véin má orono van ínanen inaen mino. ¹⁹ Máa síkan maen Yisasi mai vanta siamemí, “Bafan mano ma arunkaren éin kama uantein nan barufá ore ei kéká mo siameno.” ²⁰ Máa síkan mai vanta ano oren mai ma véin aya ein baya Dekaporisí barafá mo sian afokáin minó nanin banta ano kokhon ineine iyáken takhaen oreraen mino.

*Yisasi Ma Fúká Ein Arinta Avían Manten
Ma Aí Nanin Ayofen Ma Ein Baya Ino
(Matiu 9:18-26; Ruku 8:40-56)*

²¹ Máan turen Yisasi evaránen botifin Karirí non e kháden ena ufa oriven non akhempá o vákan kokhon nanin banta e átaru en mino. ²² Átaru ukhan mana monó namuntá ma ánoní ukhein banta Yairasin ne sin mano eren mino. Béi Yisasin onen ben arantampin e matimen mino. ²³ Matimen Yisasin ákonaen inaemí. “Te siraun arará purono van iyá umpo éi kaná ereya véintá mo ayan kaúde ayofesin ná evaránen asefa inten nafino.”

²⁴ Máa síkan Yisasi véin avákuren oriyákan kokhon nanin banta ano mákáká uven oren mino. ²⁵ Tiyan míkan mifo sirantan kan orun kádan (12) oranará biyon aí daná baren oriyan baré ein nanin má maifin baren mino. ²⁶ Mai nanin mano kokhon damú ayofan banta kayo vaípá bei moní mo miyaní uan kíparan mai aí daná ano moéken aí ana iyan ída kípaanten mino. ²⁷ Mai nanin mano Yisasiní veya ma siamin iníden maen banasi mákáká

ukheimpin oriaren ben oyampáké beni ayá au anamun aruven mino. ²⁸ Mai farava máanten naino. “Téi ma siyan máa ma veni au anamuntá kaonté evaráne kama onté uno,” sen iniren mino. ²⁹ Máa sen iníden ma aruviyain má manadá ainen beni nare vo íkan béi aváduan onákan mai aí daná kípen mino.

³⁰ *Máan tíkan Yisasi afová in manáa vei ákona oríkan do vaéaren máa sen inaemí, “Iyé tenti su anamun aruven nafino.”

³¹ Máa síkan bei eyo iyampon kayo ano máa sen béin tiamemí, “Éi oniya fono. Kokhon nanin banta anon éin mákáká ukhen mifo éi fará, ‘Iyé tén tu anamun tiruviyan nafino,’ siya fono.”

³² Máa siyákan maen Yisasi vei au anamun ma aruvein onano van onen eúken mino. ³³ Máan tíkan mai nanin mano ve aurá ma afoká ein dana san pé den avinantan má Yisasi vaintá aron kánan mo yurafúden matimen be aurá ma afoká ein dana san tiamen mino. ³⁴ *Tian míkan Yisasi véin evaránen tiamemí, “Tiraun noe, Éini mumunan manon ení aí kípaanten mifo ará kusin masá orono.”

³⁵ Yisasi ma fara veya siyákan maen monó átaru namuntá ma ánoní ukhein banta Yairasin amá pinté manáa vanta kayo ano eren me véin máa sen tiamemí, “Éin araun inka furen mifo ída vá enadá arú uman ameno.”

³⁶ Máa siyákan mai veya Yisasi ída avové en inin nan monó átaru namuntá ma anoní ukhein banta máa sen tiamemí, “Éi ída vá akhokho van iyáke mumunan mana vá ono.” ³⁷ Máa siren béi minó nanin banta ayópá uren Pitan má Yemisin má be afá aváe Yonin má mai máa ano anan Yisasin má oren mino. ³⁸ Monó átaru namuntá ma ánoní ukhein banta Yairasin amá barurá ma vetí ankan orivin maen Yisasi onákan kokhon nanin banta ano sisuvo siyáken kákantá ifí diyaren mino.

³⁹ Máan tiyákan Yisasi maifin un pében betin máa sen tiamemí, “Para siretí ankan ifí diyákeyá kákantá tisuvo siya rafono. Ma arinta arará ída fúken béi faran auun bakhen mino.”

⁴⁰ Máa síkan minó nanin banta ano véin nan intíkan béi mai nanin banta yo siantan barufá arafuvíkan mai arinta anóe

* 5:30: Ruk 6:19 * 5:34: Mak 10:52; Ruk 7:50; 17:19

* 5:41: Ruk 7:14

afóen má bei eyo iyampon kanú manáú bá avíaren mai arinta ma kain bain kara-farampin un peren mino. ⁴¹ *Um pében mai arinta ayan bana fakáaren máa semí, “Tarita kumi,” Mai vayai ana máan mi sikhen mino. “Titó arinta oe, séi éin tiamé umpo éi e mantano.” ⁴² Máa siyain má mai arinta arará ano manadá ainen e mantaaren oren mino. (Mai arintai orana sirantan kan orun kádan (12) mi varen mino.) Oríkan mai namumpin ma varé ein nanin banta ano ódaren kákantá anúden oreraen mino. ⁴³ Máan tíkan mai ma afoká in onein dana san ena nanin banta ída siamino van Yisasi ákonaen betin tiamíden mai arinta arará ana yunan amino van tiamen mino.

6

Nasaretí Nanin Banta Ano Ma Yisinin Oyan Amein Baya Ino

(Matiu 13:53-56; Ruku 4:16-30)

¹ Yisasi mai varu me ampiren bei eyo iyampon kayo vá bei varu anará Nasaretí oren mino. ² *O varen Sabati yamú Yisasi monó átaru namumpin ódiven Ti-yarafenui veya vanasi siamiyákan iniren kokhon mano anúden oreraen temí, “Ai! Inte fákená ma vanta ano mai ákona vá afova vá mamáken ná ma avúavá danas-inta afoká iyan nafino. ³ Pura sen béi mana má uvaran bantan ban mino. Béi Marian anin mi váken Yemisi, Yosepi, Yudasí, Saimoni siren mai kékái afá aváe ino. Béin ayómái setin má mafin ban mino,” siren béin namu inin mananten mino.

⁴ *Máan tiyákan Yisasi vetin tiamemí, “Sakhanampa vanta avíena varufá ban mifo vei varu anará bá minó bei mana nare vá be amápin má ída véin aví báé iyan mino.” ⁵ Betíi mumunan ída ákona ukhan pasen mi Yisasi mai varurá ída manáa avúavasí ina aí ma vain kéká aurá anan ayan kaúden ayofiyaren mino. ⁶ Máan tiyan ma vanasi ano ída mumunan iyain nan Yisasi kokhon ineine en mino.

Yisasi Vei Eyo Iyampon Kayo Siantan Ma Monó Dorantá Orera Ein Baya Ino

(Matiu 10:5-15; Ruku 9:1-6)

Máan turen Yisasi mai akhempá ma varé ein baru kayo fimpá oriven monó baya e siamen oren mino. ⁷ Máan tiyáken baya varen orino van tiyan mikan mifo sirantan kan orun kádan (12) eyo iyampon kayo araren namu aunan ma yo siantan ákona amíden kaní uriyan tiantan oren mino.

⁸ *Tian tiyáken maen Yisasi vetin máa sen tiamemí, “Ída vá mana yaná bare vá ayonta ana vá pákare orono. Ída vá dunan nafi unan nafi inká moni safi ída vá maman unampin bádo ono. ⁹ Tíretí ankan arantan anamun máa vá ure orin nampo ída vá ena au anamun má mamare orono. ¹⁰ Tíretí ankan ma mana varurá orinte mae mana namumpin mana vá bareya ínainpáké mai varu me ampeno. ¹¹ *Mana varurá oresin ma ída avían má naumpin kaen ma inká tíretíi veya ma ída ininti mae mai varu vá me ampire vetíi namu vara ma arantantá dampakháin nain ná me fupá tian karú dano. Mai anon betíi namu avúavá aní intin betiyantá afová inten mino.”

¹² Máa sirákan banasi ano ará baerano van eyo iyampon kayo ano oriyan monó baya e siamen oren mino. ¹³ *Oriyáken betí ankan namu aunan kayo yo siantiyáken aí ma vain nanin banta aufá uveri féantan mai kayo ano asefaen mino.

Monó Non Ma Féantan Banta Yoni Ma Furein Baya Ino

(Matiu 14:1-12; Ruku 3:19-20, 9:7-9)

¹⁴ *Yisasi ma variyain avúavá baya ano minó akhempá orera íkan banasi ano ma mai veya ana sen orera iyan maen Kin Eroti inen mino. Manáa kéká ano siyáken, “Monó Non Péantan Banta Yoni anon purin pinté evaránen e mantakhan mi enará ukhein ákona ano véimpin doriyan mino.” ¹⁵ Máa síkan manáa ano sen, “béi Iraisá ino,” sin inká ena kéká ano sen, “péfá ma vá ein sakhanampa vanta kayo an dakhen mai véi mana sakhanampa vantán ban mino.”

¹⁶ Máa síkan Eroti mai veya kayo iniren temí, “Péfá ma séi anuran tíkeruna vanta

* **6:2:** Yon 7:15 * **6:4:** Yon 4:44 * **6:8:** Ruk 10:4-11 * **6:11:** Apo 13:51 * **6:13:** Yem 5:14 * **6:14:** Mat 16:14; Mak 8:28; Ruk 9:19-20

Yoni anon purin pinté evaránen e mantakhanten mino.”

¹⁷ Mai farava máa sen naino. Eroti ano ve aná Erodiasin amusin ameno van bei aruvin banta kéká tíkan Yonin pákaan karavusifin kain baren mino. Be afá aváe Firipin aná Erodiasin ma véi mantaré ein mai van mi Yonin karavusií ukharen mino. ¹⁸ *Erotin nan ma Yoni ano sen, “Éi e afá aváen aná ma yafeona mai ída kama ukha ono,” ma sein nan mino. ¹⁹ Máa ma sikhein nan Erodiasi ano Yonini aran naná máden béin aruan purono van iyaren mifo véimpin ída mai ákona varen mino. ²⁰ Máan tiyákan maen Yoni funtáken kantasí ukhein banta vákan Eroti ano véi ma siyain baya kayo van kokhon ineine iyáken béin aya ono van inikharen mino.

²¹ Erodiasi ma Yonin arin nain aa van dosiyaré íkan Erotin ma ve anóe ano khaein damú e afoká en mino. Maí damú Eroti kákan dunan tariyáken béi kamanimpin ma ánoní ukhein banta kayo vá aruvin banta kayoi ánon banta vá Kariri fáké ánon banta kéká bá aran e átaru en mino. ²² E átaru ukhan Erodiasin arauñ mano mai ma iyukheimpin eriven danisiien mino. Danisií íkan Erotin má mai ma yunan niyaré ein kéká bá ano kákan amusin en mino. Máan tíkan Kin Eroti ano mai arinta van temí, “Éi ma sinona mai yaná téi fara amenté uno.” ²³ Máa siren Eroti asíká ayan befiyó uren béin tiamemí, “Éi ma sinona yaná téi fara amenté uno. Tesi yafisin nan ma aúban daíde simeno ma sesí mai fara máan tonté uno.”

²⁴ Máa síkan mai arinta ano oren be anóentá mo inaemí, “Náinasá inantékun ná Kin mano siminten nafino.” Máa síkan be anóe ano evaránen béin tiamemí, “Monó non péantan banta Yonin ánon nará inan teno.” ²⁵ Máa síkan mai arinta ano ainen evaránen Kin baípa o nóben temí, “Monó non péantan banta Yonin ánon mana yókifin kaúde simeno van muno.”

²⁶ Máa siyain má Kin mano kákantá ará uman den mifo véi má ma váken dunan niyá ein kayo avorá ma asíká ayan befiyó uren tikhá ein nan iniren ída mai

arinta avaya yo yurafuren mino. ²⁷ Mai van Yonin ánon mo síkaren baren erino oren karavusi finte Yonin ánon mo síken mino. ²⁸ Tikaren maen Yonin ánon man dókifin kaúden mai arinta me amíkan baren be anóen mo amen mino. ²⁹ Yonin ma arin baya vei eyo iyampon kayo ano iniren béin au e varen mo masien mino.

*Yisasi Ma Yan Manápá Tauseni (5,000)
Vanta Yunan Amein Baya Ino*

(Matiu 14:13-21; Ruku 9:10-17; Yoni 6:1-13)

³⁰ *Yisasi ma vei eyo iyampon kayo siantan dorantá orikhá ein mai ovaránen e átarú uven betí ma yoriyá ein má banasi ma siamiyá ein baya kayo vá béin tiamen mino. ³¹ Kokhon nanin banta ano eriven oriven iyákan Yisasi má bei aposeri kayo vá ída yunan narí eimpin Yisasi máa sen betin tiamemí, “Eritifé banta ma ída van naipá o váké tiviká tifano.”

³² Máa siren betí ankan mana voti maren banta ma ida vain afokhantá oren mino. ³³ Orikan kokhon nanin banta ano veti ma oriyain afová uren minó kákan baru ráke nanin banta ano non akhempá tavaen mai ma orin naintá betin nare o varen mino. ³⁴ *O varé íkan Yisasi non akhempá oriven mai nanin banta oniyáken sipisipi kayo ano ma ída vetintá dafisin banta vákan iyukhen bainí ukharé íkan kákantá arunan uanten mino. Mai van kokhon danasinta vetin afova amen mino.

³⁵ *Afova ma amiyán áau eraven inúpasí íkan maen bei eyo iyampon kayo Yisasi vaintá eriven temí, “Banta i van akhempái e varé étifékun mi áau eraven mino. ³⁶ Éi vanasi siantesin oriven ná ádé ma van nain baru khayó finte vetíi yunan miyaní ino.”

³⁷ Máa síkan Yisasi evaránen betin tiamemí, “Tireti yantasá betin dunan ameno.” Máa síkan betí ankan evaránen béin tiamemí, “Kankan antareti moní kasá* bereti o miyanié betin me amenté tife rafuno.”

³⁸ Máa síkan Yisasi vetin tiamemí, “Tiretí ankan náí máa veretí denan ban nafino oriveya onano.” Máa síkan betí

* **6:18:** Riv 18:16 * **6:30:** Ruk 10:17 * **6:34:** Nam 27:17; Mat 9:36 * **6:35:** Mak 8:1-9 * **6:37:** Mai kan antareti moní ma vain mai yan manápá ifo afápá kanú manau un kádan biyontá ma varyiain moní ino.

ankan o oman afová uren me siamemí, “Dan manápá bereti vá kankanan noyana vái van mino.”

³⁹ Máa síkan minó nanin banta sintin kata yaró manafin kumádú ino van betin tiamen mino. ⁴⁰ Tiamíkan manafin mana antareti (100) ano kumaniyan inká enafin fifti (50) ano kumaniyan en oreraen mino. ⁴¹ Máan tuvíkan Yisasi mai yan manápá bereti vá kankanan noyana vá pákaaren inarufá kakháben mai yunan nan Ti-yarafenun tusu sianten mino. Máan turen mai vereti kayo vá noyaná kanan má máden kisikisi uren bei eyo iyampon kay-orá dákan mai nanin banta amen oreraen mino. ⁴² Amíkan minó ano kanaíen nen mino. ⁴³ Narákan mai yunan antan tiyan míkan mifo sirantan kan orun kádan (12) unan bíken mino. ⁴⁴ Mai yunan ma naran banta máa ma yankafein mai yan manápá tauseni (5,000) ino.

*Yisasi Ma Non Daró Orein Baya Ino
(Matiu 14:22-33; Yoni 6:16-21)*

⁴⁵ Narákan Yisasi ma vanasi siantan orera iyan maen bei eyo iyampon kayo van betin nare ainen botifin káusiven non e kháden Betsaidá akhempá orino van tiamen mino. ⁴⁶ *Máan turen mai oyampáké béi amúkono van anufá óden mino.

⁴⁷ Inupasi íkan mai voti ano non aúbaná bákan Yisasi veyáká non akhempá para varen mino. ⁴⁸ Báken béi onákan uva ano voti e avékaan more mere iyákan betí ankan ákonaen non intaniyaren mino. Máan tiyákan ma kúkarosíen kakhano van in maen Yisasi non daró oriaren betin esantano van en mino. ⁴⁹ *Máan tikan bei eyo iyampon kayo ano véin onan non daró oríkan betí ankan béin nan ban mi eriyen mino sen iniren báden oreraen mino. ⁵⁰ Minó ano véin ódaren kákantá akhokho van iyaimpin Yisasi ainen betin máa sen tiamemí, “Téi umpo ída vá tiretí ankan periya vano.” ⁵¹ *Máa siren béi votifin un bákan uva kípavin minó ano sakha iyáken kokhon ineine en mino. ⁵² Yisasi ma vereti kisián ameiini avúavái ana vetí ankan ída afová ukharen mino. Mai fara va ino. Betin aú ano ákona ukhan ída mumunan ban mino.

⁵³ Betí ankan ma non e kháden Kene-saretí akhempá ódiven maen boti anan kuan kaen mino. ⁵⁴ Máan turen ma vetí ankan boti finté eraviyain má banasi ano ainen Yisasin afová en oreraen mino. ⁵⁵ Afová uren banasi ano mai akhempá oriviyan aí kéká ma varé ein aviren Yisasi vaintá duvasiká mo khaen oreraen mino. ⁵⁶ Mai akhempá tító baru kayo vá kákan baru kayo vá inká akhempá ma vain baru kayo fimpá bá ma Yisasi orin maen banasi ma átaru iyain barurá aí nanin banta ayofano van béi vaintá aviren oriyaen mino. Aí nanin banta ano Yisasin nan áintí beni ayá au anamun áton aruvono van ínan en ina iyaren mino. Aí nanin banta ano ma inaúden aruvin maen mai kékái aí kípantiyaren mino.

7

*Banasi Ma Maman Avusese Iyain
Danasinta Fákena Van Ma Yisasi Siamein
Baya Ino*

(Matiu 15:1-9)

¹ Farasisi kayo vá manáa Yerusaremi fáké man baya ma afová ukhein banta kayo vá Yisasi vaintá e átaru ² *uven onákan manáa Yisasini eyo iyampon kayo ano Yutan nanin bantai avúavá durafuren ída ayan nare sesé inton dunan pákaren nen mino. ³ Minó Farasisi kayo vá Yutan kayo vá be anafu aráoni avúavá dakhafen ayan ma ída kamaen tesé ukhen maen ída yunan pákaren né iyan mino. ⁴ *Betí ankan ma máketifá noren ma ovaránen eriven ma ída non péken maen mai yunan ída né iyan mino. Kokhon avúavá daná ma vetí anafu aráopintena ma mantein mai ánain mi yakafen betí kápi, kura, yóki, takhó tesé é iyan mino. ⁵ Máan tiyain mi vakan Farasisi kayo vá man baya ma afová ukhein banta kayo vá Yisasin inaen temí, “Éini eyo iyampon kayo ano ma ída ve anafu aráoni avúavá dakhafen ayan ída sesé iyain mai intesá ukhen nafino.”

⁶ Máa síkan Yisasi vetí ankan evaránen tiamemí, “Tiretí ankan kampun banta kayon banan mi fura sen tiretin nan mi

* 6:46: Ruk 5:16 * 6:49: Ruk 24:37 * 6:51: Mak 4:39 * 7:2: Ruk 11:38 * 7:4: Mat 23:25

sakhanampa vanta Aisaiya ano máa siren bompon uvamádan baren mino.

“Ma vanta kayo ano oo máafói séin tiví daní iyan mifo vetí ankan ará ano nenta suron ban mino.

⁷ Betí ankan bantai man baya ma siamiyain mai van mi ‘Tiyarafenui vaya ino’ sé iyan mino. Máan tiyáken betí ankan téinta faran monó máan tiyan mino.’ ⁸ Tiretí ankan Tiyarafenui man baya me ifá ureya vantai avúavá máa anan ákona e fákare va ono.” *Ais 29:13*

⁹ Mairá Yisasi vetin máa sen tiamemí, “Tiretí anafu aráoni avúavá ánain dakhafono van mi kama aafáke Tiyarafenui man baya yo ékiya ono. ¹⁰ Para vara seyo, Mosesi sikhen mino, ‘Ei e anóe afóeni vaya ánain ná dakhafono.’ *Eks 20:12; Diu 5:16* Inká ena vá tiyáken, ‘Mana vanta ano ma ve anóe afóen nan ma namu vaya sin nain ná arintin purino.’ *Eks 21:17; Riv 20:9* ¹¹ Purinten mifo siretí máa sé iya

ono, ‘Mana vanta ano ma ve anóe afóen ayain moní dákaren békanaan tiamé iyan mino, “Téi ma moní Tiyarafenu ameno van derúna ino.”’ ¹² Mai máan ma inten béi ída vá be anóe afóen kama ino. ¹³ Tiretí ankan ma anafu aráon pintena vareona mai avúavá ánain dakhafiyákeya Tiyarafenui vaya ma kantifin karú dareya siretí ma avúavá daná kokhon mano variya ono.”

Banasi Ma Maman Painí Íyai Pákena Van Ma Yisasi Sein Baya Ino (Matiu 15:10-20)

¹⁴ Máa siren evaránen Yisasi vanasi aran erin tiamemí, “Tiretí ankan téinti vaya inere vá afová ono. ¹⁵ *Mana yaná ma mafá baren banta aúpin ma aravin mai ano ída vanta fainí é iyan mifo vanta aupinté má édan mai yaná kayo ano anan banta fainí é iyan mino. ¹⁶ Átaren ma van nain banta ano vá ineno.”

¹⁷ Béi ma mai nanin banta me ampiren má naumpin orivíkan bei eyo iyampon kayo mai vaya ma sian baé ádeini anavan béintá inaen mino. ¹⁸ Ina íkan béi vetin tiamemí, “Tiretí bá dere ídá inikke fono. Minó daná ma mafá bare ma vanta aúpin

aravin mai ano ída vanta fainí é iyan mino. Ída ino! ¹⁹ Mai yaná ano ída vanta amafompin oré iyan mino. Mai yaná ano arápin araven arái íkan ara masípin mo karákan aravé iyan mino.” Ma vaya fókéi Yisasi minó dunanan avusese ukhen ne sen mino.

²⁰ Mairá béi máa semí, “Mana yaná ma vanta aúpin varen ma édiyain manon banta maman painí é iyan mino. ²¹ Minó daná ma ineine finté afoká é iyain mai yana sinta ino. Minó namu ineine in avúavá, pamúkuí in, umoyan in, banta aruan purin, ²² ábasu yurafurin, ena ina yana san kampun tin, ara ara namu avúavasí in, baya atákaré en kampuntin avúavá bá Tiyarafenu ará namu uanten béin oyampá baya sin avúavá bá baya átakharé uren be au kákaní in avúavá bá óen in avúavá bá ²³ minó mai namu avúava sinta anon banta aúpin baren ma éden maen mai anon maman banta fainí é iyan mino.”

Mana Fonisiá Nanin Mano Ma Yisasintá Mumunan Ein Baya Ino (Matiu 15:21-28)

²⁴ Yisasi mai varu me ampiren Taiyá barafá e manten oren mino. Oriven béi mana namumpin un pében ída mana vanta ano afová ino van en mifo véi ída kanaíen aúpa baren mino. ²⁵ Mana nanin mano véi ma o vain baya iniren be araun namu aunan mano fákakhan baré in mai nanin mano Yisasin arantampin mo aron kanan durafú den matimen mino.

²⁶ Siriá barafin Fonisiá kaein Kiriki váken béi Yisasin nan be araun aúpin ma namu aunan bain do siantano van tiamen mino. ²⁷ Yisasi evaránen béin tiamemí, “Tetí iyampon nare vá dunan amékun ná kanaí en nano. Ída vá iyamponi yunan tetí maman iyan oofen karú dá tifano.”

²⁸ Máa síkan mai nanin mano evaránen béin tiamemí, “Bafan noe! Pura siya ompo sakhó aránaópá bain iyan kayo ano iyamponi yunan antan ma eravein mi né iyan mino.”

²⁹ Máa síkan Yisasi evaránen béin tiamemí, “Ei ma máa seona rá namu aunan mano inka e araun aú pinté me ampiren oren mifo éi evaráne orono.”

* 7:15: Apo 10:14-15

³⁰ Maa síkan mai nanin mano evaránen be amápin o onákan namu aunan mano ve akhá me ampiren orivíkan béi sakhópin bakhen baren mino.

Yisasi Ma Átaren Kontan Ída Kama En Baya Siyain Banta Ayofein Baya Ino

³¹ Mai ráké Yisasi e mantaaren Taiyai vara me ampiren Saidonii vara aúbana oriaren Kariri non akhempá orun nóben Dekaporisi varafá oren mino. ³² Oríkan manáa ano mana átaren kontan ída kamaen baya siyain banta avían Yisasi vaintá meren, “Béin nan ayan kaú antano,” sen mino. ³³ Maa síkan Yisasi mai vanta avíaren minó nanin banta me ampiren manáa nentá békan mana oriven mai vanta átarempin Yisasi ayantá akhare siren mai vanta amafintá kaen mino. ³⁴ Máan turen Yisasi inarufá kakháben avádóden aunan mamaren mai vantavan Aramaiki veya finté temí, “Efata.” Mai máan ma semí, “Divono.” ³⁵ Maa siyain má mai vanta amafintá ma yampakhen uman diyá ein daná orivin átaren inen baya kamaen ten mino.

³⁶ *Máan turen Yisasi vetí ankan airo ananí uantá den ída vá ma avúavá baya ena nanin banta siamero. Maa siren béi ákonaen airo ananí urákan betí ankan mai avúavá moéken tian afoká en mino. ³⁷ *Máan tíkan minó ano anúden oreraen temí, “Átaren ma kontaré ein mano kamaen iníkan inká baya ma ída siyaré ein mano veya síkan Yisasi ma minó avúavá barein mano kamaen mino.”

8

Yisasi Ma Kamí Kamí Tauseni (4000) Vanta Yunan Amein Baya Ino (Matiu 15:32-39)

¹ *Máan ten nókan maná damú kokhon nanin banta ano Yisasi vaintá átaru ukhan betíi yunan ída vaimpin bei eyo iyampon kayo arákan erin tiamemí, ² “Kanú manaú damúi ma nanin banta sen má bakan betíi yunan minó kípavíkan dunan ída van tirun kiyan mino. ³ Manáa ano ayá aa sáké erikhein betí ankan ma arafan tiantékun betíi varufá oriyaren ayanafá auu entave entave intin aasá o ankaminten mino.

* **7:36:** Mak 1:43-45 * **7:37:** Ais 35:5 * **8:1:** Mak 6:35-44 * **8:12:** Mat 12:39; Ruk 11:29 * **8:15:** Ruk 12:1

⁴ Maa síkan bei eyo iyampon kayo ano maa sen béin tiamemí, “Ma vanta ída van kámá barafá ifo setí kanaisá erá bereti máderá ma nanin banta amenté tiferafuno.”

⁵ Maa síkan Yisasi vetí ankan inaemí, “Tiretí náí maa vereti yáke fonó.”

Síkan betí ankan temí, “Dan manápá ifo afápá kan un ká dan mino.” ⁶ Síkan mairá béi minó nanin banta van barará kumameno síkan barará kumamin dan manápá ifo afápá kan un kádan bereti máden Tiyarafenun tusu siantáden kisiren bei eyo iyampon kayorá dákan banasi amen mino. ⁷ Bei eyo iyampon kayo ano manáa sító noyana kayo kain baré íkan Yisasi mai máden Tiyarafenun tusu siantáden bei eyo iyampon kayorá dákan betí ankan máden banasi amen mino.

⁸ Amíkan minó nanin banta ano kanaíen naran antan o éke e éke uren daa manápá ifo afápá kan un kádan unan bíken mino.

⁹ Kamí kamí tauseni (4,000) vanta anon mai yunan narákan Yisasi vetí ankan tiantan oren mino. ¹⁰ Orivíkan béi votifin bei eyo iyampon kayo vá un kumamen Daramanuta varafá oren mino.

Farasisi Kayo Ano Ma Yisasin Nan Inaru Fáke Avúavá Aní Intin Onano Van Ein Baya Ino

(Matiu 16:1-4)

¹¹ Maná damú Farasisi kayo ano Yisasin akhenóka uan onono van béi vaintá mana inaru fákena avúavasí í oná tifano sen inaen mino.

¹² *Maa síkan Yisasi veyan avádúan onan uman diyaimpin temí, “Teréa ma vain nanin banta ano náí vará téin nan mana avúavá aní ino van tiyan nafino. Téi fura siré tiretin tiamé uno, Tiretí ankampin téi mana avúavá daná ída aní onté uno.” ¹³ Maa siren béi votifin un kumamen non e kháden ena ufá oren mino.

Erotin Má Farasisi Kayo Vái Yisirá Ma Siádein Baya Ino

(Matiu 16:5-12)

¹⁴ Eyo iyampon kayo ano áúden ída vereti varanton oriyákan mana vereti ana votifin baren mino. ¹⁵ *Yisasi vetí ankan

amaan temí, “Tiretí ankan Farasisi kayoi yisi vá Erotini yisi vasará antan ono.”

¹⁶ Maa síkan betí ankan Yisasini vaya ída afová ukhen betiyan ten orera emí, “Teti ankan ída vereti yákékun mai van mi véi sen mino.” ¹⁷ *Maa siyákan Yisasi afová uren betin inaemí, “Nái vará tiretí ankan bereti ída yáké uno sé orera iya rafono. Tiretí ankan ída afova vá e ine ukhen nan mi siretin ará ano uman diyan mino. ¹⁸ Tiretí ankan auu vákaya ompo ída oniya ono. Tiretí ankan átaren bákaya ompo ída veya iniya ono. ¹⁹ *Téi ma yan manápá bereti ma yan manápá tauseni (5,000) nanin bantafin kisirékun ma mai vereti antan ma fara vá ein náí máa unan ná bá de fono. Á unten nafino.”

Síkan betí ankan temí, “Tiyán míkan mifo sirantan kan orun ká dan mino (12).”

²⁰ Maa síkan Yisasi vetí ankan inaen temí, “Ená damú ma séi yan manápá ifo afápá kan un kádan bereti ma kamí kamí tauseni (4,000) bantafin ma kisiré amékun ma minó ano narákan mai antan bereti náí máa unan ná tiretí ankan bíkhe fono.”

Maa síkan betí ankan temí, “Dan manápá ifo afápá kan un kádan mino.”

²¹ Síkan béi vetin tiamemí, “Mai siretí ankan ídá afová ukhe rafono.”

Yisasi Ma Auu Yufúkukhein Banta Ayofein Baya Ino

²² Yisasi vei eyo iyampon kayo vá Bet-saidá oríkan manáa nanin banta ano mana auu yufúkukhein banta avian Yisasi vaintá me khaúden béin nan mai vanta aurá ayan kaono sen mino. ²³ Síkan Yisasi mai auu yufúkukhein banta ayan pákaaren mai varu me ampíren aviren oren morun baru akhempá kaúden mai vanta auufen akhare siren be ayan mai vanta aurá kaúden inaen temí, “Éi kaná manáa yanasinta oniya fono.”

²⁴ Maa síkan mai vanta ano yan auu mááken onen temí, “Eyo, téi vanasi oniyá umpo vetí ankan daa ana kayo ma kayamanaen noíní iyan mino.”

²⁵ Maa síkan Yisasi evaránen mai vanta auufen ayan kaúan tádan auu kama uvin

mai vanta ano kákantá auu mariyáken minó daná kamaen onen mino. ²⁶ Máan turen mai vanta Yisasi siantan be amápá oriyákan temí, “Ída vá mai varufin umperano.”

Pita Ma Yisasi Nan Tiyarafenu Ano Ma Aní Ukhein Banta Ono Sein Baya Ino
(*Matiu 16:13-20; Ruku 9:18-21*)

²⁷ Mai ráké Yisasi vei eyo iyampon kayo vá e manten Sisaria Firipaí barufimpá oriyákan ayanafá Yisasi vei eyo iyampon kayorá inaemí, “Minó nanin banta ano séin nan iye inó tiyan nafino.”

²⁸ *Maa síkan betí ankan evaránen bein tiamemí, “Manáa nanin banta ano éin nan monó non péantan banta Yoni ino síkan inká ena kéká ano sakanampa vanta Iraiya ino síkan ena kayo ano mana feyan sakanampa vanta ino siyan mino.”

²⁹ *Maa síkan Yisasi inaemí, “Tiretí iye inó téin nan tiya rafono.”

Síkan Pita evaránen tiamemí, “Éi Karaisi* Tiyarafenu ano ma fefá ma sen minó nanin banta evaráne aviranono ma sikaré ein banta ono.” ³⁰ *Maa sirákan Yisasi vei eyo iyampon kayo airo ananí uanten ten mino. Pura ifo séi Karaisi umpo ída vá mai veya ena nanin banta siameno.

Yisasi Ma Veyan Púaren E Mantan Nain Baya Sein Mino

(*Matiu 16:21-28; Ruku 9:22-27*)

³¹ Maa siren mairá betí ankan afova amen temí, “Banta Anin mano kákan aí barantin minó ánon banta kayo vá monó ánon banta kéká bá man baya ma afová ukhein banta kayo vá béin oyan amiren béin aruan purinten mino. Aruan púdantin kanú manáu damú orivintin béi evaránen e mantanten mino.” ³² Maa siren Yisasi mai veya ana afoká amá uan betí ankan amirákan Pita ano véin do aviren akhempá mo khaúden araien asen temí, “Mai ma siyaona veya ída vá teno.”

³³ Maa siyákan Yisasi yovaéan bei eyo iyampon kayo oniyáken Pitan asen temí, “Ban Anon noe. Téin toyampá entavono.

* **8:17:** Mak 6:52 * **8:19:** Mak 6:41-44 * **8:28:** Mak 6:15 * **8:29:** Yon 6:68-69 * **8:29:** Kiriki veya finté Karaisi ma sikhein mai Tiyarafenu ano ma vei vanasi evaránen avirano van ma aní ukhá ein banta van mi sikhen mino. Ruk 20:41, 22:67, 23:35; 24:26, 46; 23:35; 24:46; Apo 3:20; 1Yo 5:1; Rev 11:5 fin ná dere onano. * **8:30:** Mak 9:9

Éi ída Tiya rafenui ineine ánain dakhafiya ono. Ída ino. Éi vantai ineine ánain mi yakafiya ono.”³⁴ *Mairá Yisasi minó nanin banta vá bei eyo iyampon kayo vá arákan béi vaintá eríkan betí ankan tiamemí, “Mana vanta ano ma séin tínain ma vákuro no van beyan maman bararasí urená bei yaa unkamádan mamaren ná téin tínain bákurino.”³⁵ Para vara seyo, mana vanta ano ma vei aunantá ma yafisintin maen mai veni aunan o afeyoranten mifo vanta ano ma séi má tenti kama vaya va san ma iniren bei aunan ampirákaren mai ano evaránen bei aunan baranten mino.”³⁶ Mana vanta ano ma minó ma vara ráke yanasinta ma mamarantin beni aunan ma aiyóbintin minó daná ano intesá ená béin ayainten nafino.”³⁷ Mai náí yaná pókesá banta ano evaránen bei aunan miyaní inten nafino.”³⁸ *Taréa ma ume vá nanin banta ma vaimpin ma mana vanta ano ma séin má tenti vaya vasa ma ayave iyá intin maen Banta Anin mano ma ve afóeni kakhan má kantá enisori kayo vá ma ayompin erin nain damú mai vanta van be yeren ayave uantanten mino.

9

¹ *Yisasi vetí ankan máa sen tiamemí, “Téi fura siré tiretin tiamiyá uno. Ma ma mantakhein pinté manáa ano ída fúkantin mi Tiya rafenui yafasin mano vei ákona vá erintin mi vetí ankan onanten mino.”

Yisasin Au Vukhafá Ma Enará Ein Baya Ino
(*Matiu 17:1-13; Ruku 9:28-36*)

² *Dan manápá ifo afápá mana un kádan damú orivíkan Yisasi ano Pitan má Yemisin má Yonin má aviáren mana ayá anurá betí ankan mana un báken Yisasi vetí avorá be au ayúden ena vukafáien mino.”³ Béini auí daná ano oon ma kheini íkan efanten uron en mino. Ma vara ráke mana ano efanten davaráe sesé urantín ída kanaíen maman máan efanten inten mino.”⁴ Máan tiyain má Iraiyan nú Mosesin nú betí ankan baintá afoká uven Yisasin má baya siyákan betí onen mino.

⁵ Máan tíkan Pita ódaren Yisasin tiamemí, “Aru soe, setí ankan ma sító namun kanú manaú en nina vá Mosesi nina vá Iraiya nina vá ma uvará tífanuna mai kama ukhen mino.”⁶ Pita kákantá akhokho van iyáken béi ma sin nain baya ída afová ukhan inká Yemisin nú Yonin nú bá dere kákantá akhokho van iyaren mino.

⁷ Mairá máan tiyain má konan mano eriaren betí ankan me úkuá darákan mai konan pinté mana oova ano máa semí, “Ma séin tanin uron mino. Béin nan téin moéken tiraniyan mino. Béin avaya vá inero.”⁸ Máa siyain má manadá betí ankan onen eúkin ída ena vanta vákan Yisasi veyáká ana vetin má baren mino.”⁹ Betí ankan mai anu me ampíren eriyákan Yisasi vetin airo ananí uanten temí, “Ma yanasinta ma oneona mai siretí ída vá ena vanta sian mikhesin ná Banta Anin ma masí pinté orun mantavinti vá tiameno.”¹⁰ Máa sirákan betí ankan mai vaya fákaan ákona uren betiyan mana sen oreraen mino, “Mai ma masí me ampíré e mantanté uno ma sikhein mai náí yana sará ten nafino.”

¹¹ *Betí ankan Yisasin inaemí, “Pará man baya ma afová ukhein banta kayo ano sen ná peyan sakhanampa vanta Iraiya nare vá erino siyan nafino.”

¹² *Máa síkan Yisasi evaránen betin tiamemí, “Eyo mai fura ino. Iraiya ovaránen eriven minó daná maman puntaranten mifo feyan sakhanampa vanta kayo ano máa sikhen mino, ‘Banta Anin mano uman baren berai sintin béin oyan aminten mino’ sen pará tikhan nafino.”¹³ *Máa síkhan mifo séi seretin tiamé uno. Iraiya inka fe erikhen mino. Bompon mano ma síkhá einíen betíi anunu kípen ara ara avúavá ben amaniná kaen mino.

Namu Aunan Bá Ein Iyampon Ma Yisasi Ayofein Baya Ino
(*Matiu 17:14-21; Ruku 9:37-43*)

¹⁴ Máa siren betí ankan araven eyo iyampon kayo ma varé eintá o uníkan kokhon nanin banta vetin má iyukhan man baya ma afová ukhein banta kayo

* 8:34: Mat 10:38-39; Ruk 14:27 * 8:38: Mat 10:33 * 9:1: Mak 13:30 * 9:2: Apo 3:22; 2Pi 1:17-18 * 9:11: Mar 3:1 * 9:12: Íbo 22:1-18; Ais 53:3; Mar 4:5-6 * 9:13: Mat 11:14

ano vava fóké betin má aruvein an di-yaren mino. ¹⁵ Máan tiyan baren mai nanin banta ano onákan Yisasi orin minó ano anúden orera uren tavaen mo véin kamaen mino. ¹⁶ Máan turan mairá béi vetin inaemí, “Tiretí ankan náí vará baya fóké man baya ma afová ukhein banta kayo vá aruvein an diya rafono.

¹⁷ Máa síkan mai nanin banta aúbanáké mana vanta ano evaránen Yisasin máa sen tiamemí, “Aru soe, séin tanin namu aunan mano véimpin bákan orá iyákái éi vaipá béin aviré eré uno. ¹⁸ Kokhon damú mai namu aunan mano ákonaen béin pákaren barará maman asédan bavín oo fenté efanten akhare avanen eravin maen aveantuntá inkékípiyákan béin au ano kafifi sé iyan mino. Máan tiyákái éini eyo iyampon kayo van mai namu aunan do siantano sékun betí ankan ída kanaíen mino.”

¹⁹ Máa síkan iniren Yisasi evaránen banasi siamemí, “Ída mumunan bain nanin banta oe! Náí máa yádasá téi siretin má para vante rafono. Náí máa yádasá téi siretíi uman barante rafono. Tiretí ankan mai iyampon avire séi ma varunará ereno.” ²⁰ Máa síkan betí ankan mai iyampon aviren Yisasi vaintá eriyain má mai namu aunan mano Yisasin onen mai iyampon ainen ankaman karúdan barará baven baé baé íkan efanten akhare oo fenté avanen mino. ²¹ Máan tiyain má Yisasi ve afóenta inaemí, “Náí máa yádasá béi máan tiyan nafino.”

Síkan be afóe semí, “Béi ma araráká ma vá ein táké ino. ²² Kokhon damú mai namu aunan mano véin aruan purono van irafin nafi nompin nafi yauman karú diyan mifo éi kaná tétin nan arunan ureyá tiya inte fonó.”

²³ *Máa síkan Yisasi véin tiamemí, “Éi ma mumunan inte ya éi kanaíeya minó daná baran nono.”

²⁴ Máa siyain má mai iyampon afóe ano evaránen temí, “Téi mumunan ukhé umpo senti mumunan tiyaesin mo ákona ino.”

²⁵ Máan tiyákan banasi savaen e átaruin Yisasi ódaren mai namu aunan béi asen temí, “Éi átarenen konen oo uman dan aunan noe. Téi éin tianté umpo mai iyampon

ampireya entavuveya enádá bá ída vá béimpin oferano.” ²⁶ *Máa siyain má mai namu aunan mano avádóden bádiyan mai iyampon máden antú antú iyáken béin me ampíren orivíkan mai iyampon purein an davin minó ano óden temí, “Béi inka furen mino.” ²⁷ Máa siyain má Yisasi mai iyampon ayan bana fákaren orun ayanoran béi e manten mino.

²⁸ Mantavíkan Yisasi ínaimpáké mánaumpin oríkan bei eyo iyampon kayo ana váken béin inaemí, “Mai náisá ukhará tetí ankan ída kanaí erá mai namu aunan do sianté tiferafuno.”

²⁹ Máa síkan Yisasi evaránen betí ankan tiamemí, “Tiretí ma Tiyarafenu vaipá ma kokhon dáda amúkinte maen máan namu aunan kanaíe yo siantan nompo ena aa ída van mino.”

Yisasi Ma Veyan Púaren E Mantan Nain Nan Ma Kan Dádasí En Tein Baya Ino (Matiu 17:22-23; Ruku 9:43-45)

³⁰ *Mairá betí ankan mai varu me ampíren Kariri vara aúban oriyáken mana ano ída afová ino van Yisasi inen mino.

³¹ *Para va ino. Bei eyo iyampon kayo vei furin afova ameno van mino. Béi semí, “Banta kayo ayampin Banta Anin amintin béin aruan purinten mino. Aruan púdantin ma kanú manaú damú orivintin béi evaránen e mantanten mino.” ³² *Máa síkan betí ankan ída mai vava afová ukhen béin inain nan peren mino.

Inaru Yafisimpin Iyé Kákaní Inten Nafino Ma Sen Ina Ein Baya Ino (Matiu 18:1-5; Ruku 9:46-48)

³³ Mairá betí ankan Kapeniamú oren mino. Oriven béi ma mápin báken betin inaemí, “Ayanafá tiretí ankan náí vará asive asive iya rafono.” ³⁴ Máa síkan bei eyo iyampon kayo ano iyé minóti kákan ban nafino siren ayanafá asiven eriyaren béin ída siamen mino. ³⁵ *Maira Yisasi kumamen tiyan míkan mifo sirantan kan orun kádan (12) eyo iyampon aran eríkan betí ankan tiamemí, “Mana vanta ano ma kákaní ono van minó banta ánaimpá báken ná minóí eyo vá bariyan bano.”

* **9:23:** Mat 21:21; Mak 11:23 * **9:26:** Mak 1:26 * **9:30:** Yon 7:1 * **9:31:** Mak 8:31; 10:32-34 * **9:32:** Ruk 9:45 * **9:35:** Mat 20:25-27; Mak 10:43-44; Ruk 22:24-26

³⁶ Maa siren Yisasi mana arara iyampon avian betin aubanapin mantaan taden bein ayan bana fakaren o yafayoden beti ankan tiamemi, ³⁷ **“Iye anó téin nan inireyá mana máan tukhein iyampon arará aya inten nafi mai ano séin mi siya inten mino. Inká iye anó téin tiya inten nafi mai ída séin tiya inten mifo Tifóe ma séin tisintá erikheruna mai véin mi aya inten mino.”*

*Iyé Ída Setinti Namuroí Inten Nafino,
Mai Setin Tirona Ino Ma Sein Baya Ino
(Ruku 9:49-50)*

³⁸ Yoni véin tiamen temi, “Aru soe, seti ankan onékun mana vanta ano éin avikanamu aunan do siantiyaren mifo véi ída seti ankan ma manápá noin bantan bakái véin airo anani uanté uno.”

³⁹ Maa síkan Yisasi véin tiamemi, “Tireti ankan ída vá bein airo anani uantano. Mana vanta ano ma séin tiviká ma mana avúavá daná ma uvariyaen mai vanta ano ída ainen téin nan namu veya sinten mino. ⁴⁰ *Setin ma ída namuroí iyain banta mai setin tirona ino. ⁴¹ *Téi fura siré tiretin tiamé uno mana ano ma siretin nan Yisasini kéká ino siren ma non daan amin nain mano fura siren bei miyan baranten mino.

Umein Avúava San Ma Yafiken Ban Baya Ino

(Matiu 18:6-9; Ruku 17:1-2)

⁴² “Banta ano ma mana auyen monó kéká ma séintá mumunan ukharé intin ma veti ankan pinte ma e avia dantin ma umefin orintin mae vá mai vanta amempin ná kakan onámaná kurená un noppin karúdantin námen aravino. ⁴³⁻⁴⁴ *Éin ayan mano ma umefin ma avian kaintiya mai ayan ná tikareya karú dano. Mana ayan mana ma éin baréinti kanaie éi ída kipan aunan baran nono. Mai kama inten mifo éin ma kankanan ayan ma áesin báken mana ayan mano umei iyá intin mae ída kipan íra ma kiyán ma uman baren berai siyan purin barufin mi orin nono. * ⁴⁵⁻⁴⁶ Éin arantan mano ma umefin

ma avian kaintiya mai arantan ná tikareya karú dano. Mana arantan mana ma éin baréintiya ída kipan aunan kanaieya varan nono. Mai kama intenmifo éin ma kankanan arantan ma áesin báken mana arantan mano ma umei iyá inti mae ída kipan íra ma kiyán ma uman baren berai siyan purin barufinmi orin nono. * ⁴⁷ *Éin auu ano ma umefin ma avian kaintiya mai auu vianá karúdan orino. Mana auu ana ma éin baréinti Tiyarafenui yafisimpin oferan nono. Mai kama inten mifo éi ma kankanan auu ma áesin báken mana auu ano ma umei iyá inti mae ída kipan íra ma kiyán ma uman baren berai siyan purin barufin mi orin nono.

⁴⁸ Mai varufin titó bintókéna kayo ma veti ankan augin bain mai ída furintin íra ída yusiminten mino. *Ais 66:24*

⁴⁹ Tiyarafenu ano minó nanin banta kama ino van ara ara uman betin ané ma kaiyain mano irará ma iyó uren antereini iyan mino. * ⁵⁰ *Un kama yaná ifo veni ase ma kipavintiya sireti ankan náisá uresin ná evaránen ase inten nafino. Éi un ande vá afá aváen má manafin kamaeya vano.

10

*Ábasu Ma Yurafurin Avúavá Baya Ino
(Matiu 19:1-12; Ruku 16:18)*

¹ Yisasi mai varu me ampiren Yudia varafá oriaren Yodan non e kháden ena ufá oríkan kokhon nanin banta ovaránen béi vaintá e átaru íkan béi ma iyain avúavasien Tiyarafenui veya veti ankan tiamen mino.

² Tiamiyákan Farasisi kayo ano véi vaintá eriven bein akhenókaen temi, “Tetinti man baya ano kanaisá intin ná mana vanta ano ve aná ifá uantanten nafino.”

³ Maa síkan Yisasi evaránen beti ankan tiamemi, “Tireti ankan Mosesi ano intéa man bayá amikhan nafino.”

⁴ *Maa síkan beti ankan temi, “Banta ano ve ábasu ma yurafurin bompon uvamá daren ná be aná ifá uantanon Mosesi sikharen mino.”

⁵ Maa síkan Yisasi evaránen beti ankan tiamemi, “Tireti ankan átakharé en nan

* **9:37:** Mat 10:40 * **9:40:** Mat 12:30; Ruk 11:23 * **9:41:** Mat 10:42 * **9:43-44:** Mat 5:30 * **9:43-44:** Manáa vompon mano ves 44 kaen mino. Mai vesi ano ves 48 vá manaí ukhen mino. * **9:45-46:** Manáa vompon mano ves 46 kaen mino. Mai vesi ano ves 48 vá manaí ukhen mino. * **9:47:** Mat 5:29 * **9:49:** Riv 2:13 * **9:50:** Mat 5:13; Ruk 14:34 * **10:4:** Diu 24:1-4; Mat 5:31

mi Mosesi ma man baya siretin uva-man amikhan mino. ⁶ PefáTiyarafenu ma araíen minó daná ma uvarein damú “béi vanta vá anasi vá uvaren mino.” *Esé 1:27; 5:2*

⁷ *Máan tukhan mi vanta ano ve anóe afóen ampíren be aná bá manafin kasukhen mino.* ⁸ Mai vanta vá anasi vá ano mana vukhafái ukhen mino. *Esé 2:24*

⁹ Máan tukhan ma Tiyarafenu ano veyantái vanta vá anasi vá maman kasuantákein mai vanta ano ída yaimin nono.”

¹⁰ Máa siran betí ankan ínaimpáké má naumpin oriven Yisasintá bei eyo iyampon kayo ano mai vaya van evaránen inaen mino. ¹¹ *Inaíkan béi vetí ankan tiamemí, “Mana vanta ano ma ve aná ifá uren ma ena nanin ma o varanten mai vanta ano mai nanin má pamúkuíi inten mino. ¹² Inká mana nanin mano ma ve avafun ifá uren ma ena vanta ma o varanten mai nanin mano mai vanta vá pamúkuíi inten mino.”

Yisasi Ma Arará Iyampon Arintan Avu Uantein Baya Ino

(Matiu 19:13-15; Ruku 18:15-17)

¹³ Manáa ano Yisasin nan ayan árontá kaú antanovare siren arará iyampon arinta aviren eríkan beni eyo iyampon kayo ano vetí ankan asen mino. ¹⁴ Asíkan Yisasi vetí ankan onan aran kiyaimpin temí, “Tiretí ankan áesin arará iyampon arinta séi varunafá erino. Tiyarafenui Yafisin mai kayo ma einí ukhein nanin banta ina ino. ¹⁵ *Téi fura siré tiretí ankan tiamiyá uno mana nanin banta ano ma ída arará iyampon arinta anden ma Tiyarafenui Yafisin ída varanteya maifin ída kanaíeya oferan nono.” ¹⁶ Máa siren mai iyampon-inta yafayó diyan ayan árontá kaúden avu amen mino.

Kokhon Ona Vain Pumarai Vaya Ino

(Matiu 19:16-30; Ruku 18:18-30)

¹⁷ Mairá Yisasi e manten oríkan mana vanta ano savaen me aron durafúden matimen temí, “Kama aru soe, séi inté ma erá ídakípan aunan barante rafuno.”

¹⁸ Máa síkan Yisasi véin tiamemí, “Pará éi séin nan kama e siya fono. Tiyarafenu veyáká anan kama ukhen mino. ¹⁹ Man baya éi afová ukha ono.

‘Ída vá banta aruan purono.’

‘Ída vá ábasu namu ono.’

‘Ída vá umoyan daná barano.’

‘Ída vá ena vanta kampun kó tiantano.’

‘Ída vá kampun tire ena ína yaná barano.’

‘E anoifon aránaó pasá bano.’ ” *Eks*

20:12-17; Diu 5:16-20

²⁰ Máa síkan mai vanta ano Yisasin tiamemí, “Aru soe, séi ma iyampon táké eré tare ma e varúna mai man baya kayo máa minó bákuriyá uno.

²¹ Máa síkan Yisasi véin ódaren arunaná máden béin tiamemí, “Éi mana yaná o útúka ompo ei ona minó mo sarí ure vá ona ma ída van nanin banta mai moní ameno. Amiráka mae mai ínaimpáké inaru fáke kama yaná baran nompo eriveya séin tivákurono.” ²² Máa síkan mai vanta ano kokhon ona kaúdakaréin ará ano uman diyaimpin me ampíren oren mino.

²³ Orivíkan Yisasi vei eyo iyampon kayo onen eúkiyan temí, “Ona ma kokhon kain ma vain banta ano Tiyarafenui yafisimpin ída kanaíen oferanten mino. ²⁴ Máa síkan bei eyo iyampon kayo mai vaya van anúden orera íkan Yisasi evaránen betí ankan tiamemí, “Tikhafana oe, banta ano ma Tiyarafenui yafisimpin ma oferan mai ákona yoran mino.* ²⁵ Kameri ano ma ufi aimpin ódin mai uman dakhen mifo kokhon ona ma yákein kéká ano ma Tiyarafenui yafisin barufin ma ódin mai moéken uman mi yakhen mino.

²⁶ Máa síkan beni eyo iyampon kayo anú duren betiyan ten orera emí, “Máan ma ukhantin maen mai iye ná Tiyarafenu ano kanaíen aviranten nafino.”

²⁷ Máa síkan Yisasi vetí ankan kakháben temí, “Minó danápin banta ano ída kanaí inten mifo Tiyarafenu veyáká anan kanaí inten mino.”

²⁸ Máa síkan Pita ano Yisasin mana vaya siamemí, “Ineno setí ankan minó daná me ifá uréi éin dakhafiyá uno.”

* **10:7:** Efe 5:31-33 * **10:7:** Manáa vompompín ída “be aná bá manafin kasukhen mino” sikhen mino. * **10:11:** Mat 5:32 * **10:15:** Mat 18:3 * **10:24:** Manáa vompompín ena vaya asotú ukhen mino: “Kokhon ona ma varano van inikhein kéká ano ma Tiyarafenui yafisimpin ma oferan mai ákona yoran mino.”

²⁹ Maa síkan Yisasi semí, “Téi fura siré tiretin tiamé uno. Manáa vanta kayo ano ma sen má tenti kama vaya va san ma iniren afá aváen má ayofin má anóe afóen má iyampon má dunan ana vá ma me ampikharen maen ³⁰ betí ankan ena mana antaretivá (100) baranten mino. Betí ankan ma varará para vantin Ti-yarafenu ano vetí ankan ma fefa mantá ein danasinta esantaren kokhon daná aminten mino. Betí ankan kokhon má bá afá aváen má ayofin má anóe afóen má iyampon má dunan ana vá barantin maen manáa vanta kayo ano vetin namu avúavá uantanten mino. Máan uantiyaré intin ínaimpá ma yamú afoká intin ída kípan para oriyain ban aunan baranten mino. ³¹ *Baranten mifo aní maen oriyain nanin banta kayo ano ínainí intin ínainí maen oriyain nanin banta kayo ano anona aní inten mino.

Yisasi Ma Veyan Púaren E Mantan Nain Nan Ma Kanú Manaú Dádasí En Tein Baya Ino

(Matiu 20:17-19; Ruku 18:31-34)

³² *Maa siren ínaimpáké betí ankan e mantan Yarusaremí ódono van aayana oren mino. Yisinin nare an orikan beni eyo iyampon kayo ano kokhon ineine iyákan betí ankan ma avákuren noré ein nanin banta ano akhokho van en mino. Máan tikon Yisasi sirantan kan orun kádan (12) eyo iyampon kayo ádun avían kaúden be ané ma afoká inain baya enádá evaránen tiamen mino. ³³ “Yerusaremí ódé tifékun maen mana vanta ano Banta Anin maman monó ánon banta kayo vá man baya ma afová ukhein banta kayo vá ayampin kaintin béin aruan purono van betí ankan kó tiantanten mino. Béin ída Yutan banta anampin aminten mifo ena anan bantafin mi aminten mino. ³⁴ Amintin maen betí ankan mano véin ayanavan baya sen akhare sen dafiyó ankamen uren béin aruan purinten mino. Aruan púdantin kanú manaú damú oriv-intin maen béi evaránen e mantanten mino.”

Yemisin Nú Yonin Nú Ano Ma Yisinin Inaein Baya Ino
(Matiu 20:20-28)

³⁵ Maa sirákan Sebetin anin kanan Yemisin nú Yonin nú ano véi vaintá eriven temí, “Aru soe, berasan mana yana san ina urékuya éimai yanasí berasan usintano van muno.”

³⁶ Maa síkan béi evaránen békanaan tiamemí, “Tiré kanan téi náí yanasísá uantano vará iya fono.”

³⁷ Maa síkan béin tiamemí, “Ínaimpáké ma éi ma kákan Kiní uvesí berasan pinta mana ano éin ayan kuompá kumanintin mana ano ayan ópá kumanintí ono van muno.”

³⁸ *Maa síkan Yisasi evaránen békanaan tiamemí, “Tiré kanan ma séi ma inaiyaona mai yaná ída siré kanan afová ukhe ono. Téi ma saréa ma nanuna kápifin tiré kanan kanaí neyá inká téi ma feranuna non pereyá inte rafono.”

³⁹ *Maa síkan békanaan béin tiamemí, “Berasan kanaí onte uno.”

Síkan Yisasi vékanaan tiamemí, “Pura ino saréa ma séi ma nanuna kápifin tiré kanan má maifin nan nono. Téi ma feranuna non tiré kanan má peran nono. ⁴⁰ Máan tin nompo séin tiyan kuompá kumanintin tiyan ópá kumanintin ma in mai ída sen tina yaná ino. Ti-yarafenu veyantái mai kumanin manáa vanta kayo aminten béi fefái vetin nina funtáadan ban mino.”

⁴¹ Maa síkan tiyan mikan eyo iyampon kayo ano iniren Yemisin nú Yonin nú anan uanten mino. ⁴² *Anan uantákan Yisasi vetí ankan arákan béi vaintá erikan betin tiamemí, “Tiretí ankan afová ukha ono ánon banta kayo ma ída Ti-yarafenurá ma mumunan iyain nanin banta kayorá ma yafisé iyain mai vetí ankani ákora vákan mi yafisé iyan mino. ⁴³ *Dafisiyan mifo siretí ankampin ída vá ma avúavá bano. Tiretí pinté ma kákaní ma ono van béi vá tiretí yoran banta vá bano. ⁴⁴ Mana ano ma siretí ánon bantaí ma ono van béi vá minói miyan ída van doran banta vá bano. ⁴⁵ Mai fara vara seyo, Banta Anin ma erikhein mai véin ayaen dóantano vará erikhen naino. Ída ino. Béi vanasi ayaen

* **10:31:** Mat 20:16; Ruk 13:30 * **10:32:** Mak 8:31; 9:31 * **10:38:** Mak 14:36; Ruk 12:50 * **10:39:** Apo 12:2; Rev 1:9 * **10:42:** Ruk 22:25-26 * **10:43:** Mat 23:11; Mak 9:35

doren be aunan amintin mai ano kokhon nanin banta miyaní uren avirano van mino.”

Yisasi Ma Auu Yufúkukhein Banta Auu Kama Uantein Baya Ino

(Matiu 20:29-34; Ruku 18:35-43)

⁴⁶ Betí ankan Yerikó barurá oren mino. Béi Yerikó me ampiren oríkan bei eyo iyampon kayo vá kokhon nanin banta kayo vá béi oriyákan Timeasin anin Batiemeasin auu yufúkukhan aa akhempá kumanten banasi vaípa moni san inantiyaren mino. ⁴⁷ Inantiyaren iníkan Nasaretiké Yisasi eriyen mino síkan béi avádóden oovaren temí, “Devitin anin Yisasi oe, séin nan éi arunan usintano.”

⁴⁸ Maa síkan kokhoná banta ano véin asen temí, “Ei vaya fákano.”

Maa síkan mai vanta ano moéken avádóden enádá oovaren temí, “Devitin anin noe, séin nan éi arunan usintano.”

⁴⁹ Maa síkan mairá Yisasi o mantaven temí, “Béin aresin erino.”

Síkan betí ankan mai auu yufúkukhein banta araren béin tiamemí, “Éin ará ano vá ákona ino. Éin ariyan mifo e mantano.” ⁵⁰ Maa síkan béi vei au anamun me karúdaren e manten Yisasi vaintá oren mino.

⁵¹ Oríkan Yisasi véin tiamemí, “Éin náisá téi uantano vará inikhe fono.”

Maa síkan mai auu yufúkukhein banta ano véin tiamemí, “Aru soe, séi evarané onarami iyá uno.”

⁵² *Maa síkan Yisasi véin tiamemí, “Éini mumunan mano éin evaránen kama uanten mifo orono.” Maa siyain má manádá ano ainen béin auu kama uvin oniyáken Yisasin bákuren ayanafá oren mino.

11

Yisasi Ma Kin An Daven Yerusaremí Ódein Baya Ino

(Matiu 21:1-11; Ruku 19:28-40; Yoni 12:12-19)

¹ Máan turen Yisasi má bei eyo iyampon kayo vá ano Yerusaremí áde suron oriven Orifí Anuyon áde ma Betfakhé baru vá Betaní baru vá baintá oren mino. ² Oriven mai ráké Yisasi vei eyo iyampon kayo fin-tena kankanan tianten temí, “Tiré kanan

ma mesan barufá oriveya onesin maen mana ano ída ané kumantan nain donkin ayanan kurantin banten mino. Mai vá ayanan utú deya séi varunará bare ereno. ³ Eresin ma mana ano ma siré kanan inaen ma ‘fará máan tiya fono’ ma sintiya vá béin ná tiameno, ‘Bafani yoran bakan mi véi sisintá e aviriyarúna veni yoran ma kípantin ainen ovaránen tiantantin erinten mino.’” ⁴ Maa síkan beni eyo iyampon kanan mai varufin oriven onákan aa akhempá mana namun onará ayanan kurran baré íkan míkanan mai donkin ayanan mo útufen mino. ⁵ Útufíkan manáa vanta mairá áde mantakharen békanaan inaemí, “Tiré kanan náisá intoyá mai arará donkini ayanan útufiya fono.” ⁶ Maa sen ina íkan Yisasi ma vékanaan tiamein baya máa mai kayo siamíkan “Kana ifo avirano” síkan mai donkin békanaan aviren oren mino. ⁷ Oren mo Yisasi vaintá mai donkin kaúden békanañi au anamun davá den mai donkin ané uvídan Yisasi mairá kumanen mino. ⁸ Kumamen oríkan kokhon nanin banta ano vetíi au anamun davá diyen aasá uvisin manáa ano yaa ayan iyaren uvisien mino. ⁹ Máan tiyákan manáa nanin banta ano auufá orin manáa ano oyampá orin iyáken oovaren temí, “Bafani avisá daní ono!”

“Bafani aviká ma eriyain avisá daní otifano!” *Íbo*
118:25-26

¹⁰ “Ma ma eriyain tétin tinafu Devitini yafisin an dakhein mifo avábasá ino.”

“Tiyarafenui avisá moéke yani suron ono!”

¹¹ Maa siyákan Yisasi Yerusaremí o unaven monó namumpin un pében minó daná onen eúkiyan áau eraven inúpasí íkan bei sirantan kan orun kádan (12) eyo iyampon máa vá Betaní oren mino.

Yisasi Ma Fiki Yaa Ana Asin Kafurein Baya Ino

(Matiu 21:18-19)

¹² Ená damú Betaní me ampiren eriyá íkan Yisasin arafan puren mino.

¹³ *Arafan puriyan eriyaren béi onákan manáa nentá mana ananoni ukhein fiki anaa ampantan béi mai anafin aranan

doseno van oren mino. Mai fiki ano ma aran iran damusí ída ukhan ananon dakhaní ana ukhan mai yaa anafin oriven onákan ída mana aran baren mino. ¹⁴ Máan tukheimpin Yisasi mai fiki yaa van temí, “Éini aran mana ano ída vá evaránen nano.” Máa síkan bei eyo iyampon kayo mai vaya inen mino.

Yisasi Ma Kákan Monó Namun Pinte Ma Minó Daná Sarín Banta Kayo Yo Siantein Baya Ino

(Matiu 21:12-17; Ruku 19:45-48; Yoni 2:13-22)

¹⁵ Betí ankan Yerusaremi oriven Yisasi kákan monó namumpin ódiven maifin ma sarí iyan ma miyaní iyá ein kéká bá inká moní arumiyán ma nun kayo sarí urákan ma miyaní iyá ein takhó bá kumanin má banaan karú diyáken do sianten mino.

¹⁶ Banaan karú daren betí ankan ma minó daná baren kákan monó namumpin ma non airo ananí uanten mino. ¹⁷ Uantáden betí ankan tiamemí, “Tiyarafenui vompon dóki ano ída máa sikhen nafino,

‘Téin timá ma vain mai minó nanin banta ano vá amúkin namun mino vá teno.’ *Ais 56:7*

Máan ná tin nompo ‘siretí ankan mano mai namun maman umoyan banta kayoi aúpá baruí e ono.’” *Yer 7:11*

¹⁸ *Máa siyákan monó ánon banta kayo vá man baya ma afová ukhein banta kayo vá ano mai vaya iniren béin ma arin nain avan aráien dosen mino. Dosiyan mifo minó nanin banta ano véini vaya van kákantá anúden orera iyan mai van béin nan betí ankan peren mino. ¹⁹ Mairá inúpasí íkan Yisasin má bei eyo iyampon kayo vá Yerusaremi me ampiren oren mino.

Mumunani Ákona Fákena Vaya Ino

(Matiu 21:20-22)

²⁰ Ená damú pe ákurá betí ankan ori-yaren onákan mai fiki yaa ana anaa vá arú bá minó ira khakhan onen mino.

²¹ Ódaren Pita mai van ovaren inen temí, “Aru soe, inuran ma ma fiki yaa van ma

namu ono ma seona mai inka irakhen mifo onano.” ²² Máa síkan Yisasi evaránen tiamemí, “Tiyarafenu rasá mumunan ono.

²³ *Téi fura sé uno. Éi kanaíeya ma anuyon nan teya ‘anuyon noe, e ankábore un nonafin oferano ma’ sesin maen mai ano fara éi ma sínonaí inten mifo éi ma ída kankanane ineine vanti ma mumunan ma ukhesin mi Tiyarafenu ano mai yanásí

uantanten mino. ²⁴ *Tiretí ankan ma mana yaná baranton iyáke ma amúkiya mumunan e ma fura mai yaná tetí baranté uno ma sesin mai ma siretí ankan ma varano van muno ma sinona yaná ano afoká inten mino. ²⁵⁻²⁶ *Inten mifo siretí ankan ma mana vanta ano ma namu uantáká inti mae amúkiya mai vantai ume vá ifá uantano. Ifá ma uantesin maen mai siretí afóe ma inarufá bain mano siretíi ume ifá uantanten mino.*

Yisasini Ákona Van Ma Monó Átaru Namuntá Ma Ánoni Ukhein Banta Kéká Ano Ma Inaein Baya Ino

(Matiu 21:23-27; Ruku 20:1-8)

²⁷ Enadá Yisasin má bei eyo iyampon kayo vá Yerusaremi oriven béi kákan monó namumpin nókan monó ánon banta kayo vá man baya ma afová ukhein banta kayo vá ánon banta kayo vá ano véi vaintá eren mino. ²⁸ Eriven betí ankan béin inaemí, “Éimpin intéa ákoná bayá éi máan tiya fono. Iye ano éin mai ákona amiren ná éin nan mai yorará ono sikhen nafino.” ²⁹ Máa síkan Yisasi evaránen betí ankan tiamemí, “Téi mana yana san tiretí ankan ina onté uno. Inaéku ma ovaráne mai vaya ma séin tisimidesíi mai séi ma manté doriyarúna ákona siretin tiamenté uno. ³⁰ Tiyarafenu anó Yonin monó non péantan doran amen nafino áa vanta ano mai yoran amen nafino. Tiretí ovaráne vaya séin tisimeno.” ³¹ Máa síkan betiyan ten orera emí, “Teti ma sé Tiyarafenu anon mai yoran Yoni amikhan mino ma sékun mai siretí ankan, ‘Pará ída mairá mumunan iya rafono,’” sinten mino. ³² Máa sinten mifo setí ma sé, ‘Banta anon mai yoran amikhen mino,’

* **11:18:** Mak 14:1 * **11:23:** Mat 17:20 * **11:24:** Mat 7:7 * **11:25-26:** Mat 6:14-15 * **11:25-26:** Pefa v. 26 ída feyante kama Iburu vompompin baréin ínaimpáké bompon uvaran banta kayo mai vaya asotú en mino. Ma vaya Matiyu 6:15 vá manaí ukhen mino: “Ifá uantanten mifo siretí ankan ma ena vantai ume ma ída ma ifá uantesin mai siretí afóe ma inarufá bain mano siretíi ume ída ifá uantanten mino.”

ma sékun mai ano ída kanaí inten mino.” Yoni sakhanampa vanta uron mino sen minó nanin banta ano inikhan mai van mi vetí ankan peren mino. ³³ Maa siren betí ankan evaránen Yisasin tiamemí, “Tetí ankan ída afová ukhé tiféuno.” Maa síkan Yisasi vetí ankan tiamemí, “Téininte ákoná bará doriya rafuno. Mai siretin ída siamenté uno.”

12

Uvaini Yunan Anaará Ma Namu Vanta Kéká Ano Ma Yafiká Eintá Ma Ovaéadan Baya Ino

(Matiu 21:33-46; Ruku 20:9-19)

¹ *Yisasi araíen baya vaédiyan betin tiamemí, “Mana vanta ano uvaini yunan dóden dafuí uran baré íkan mai vanta ano uvaini ma yasamin nain masí uáden inká dafisin banta amá uvamá den uran baren mino. Baré íkan manáa vanta kayo ano maifin dorarí uré moní barano van íkan mai vanta kayo ayampin me ampiren béi enafá ayáká oren mino.

² Oriklaréin ínaimpáké uvaini aran kúdin damusí íkan béi mana vei yoran banta siantan mai ma uvaini yunampin doriyá ein banta kayo vaipá oren mino. Mai vanta kayo ano manáa uvaini aran mai yunan pintena véin amino van tiantan oren mino. ³ Oríkan betí ankan mai yoran banta fákaren namu arirí uren ída mana yaná amin para siantan oren mino.

⁴ Oriyámpin mai vanta ano evaránen ena yoran banta siantan oríkan betí ankan mai vanta ánon ankáden béin máden namu uren ayave amen mino. ⁵ Máan tiyámpin béi mana vei yoran banta siantan oríkan betí ankan mai vanta aruan puren mino. Aruan puriyámpin béi kokhoná bei yoran banta kayo siantan oríkan betí ankan manáa ankamiyan manáa aruan puriyan en mino.

⁶ Máan turákan béi ma anunu ukhein-mai ve anin mana ana en mino. Mai iyampon típá kípan uron béi siantan mai ma yunampin ma yoriyain banta kayo vaipá oríkan béi semí, “Téin tikhái vayan ininten mino.”

⁷ Mai yunampin ma yoriyá ein banta kayo ano vetiyan ten orera emí, “Ma vanta

anon minó be afóen nina yaná baranten mifo erítifé béin aruan purono. Aruan púdé maé tetí ankan mai yunan dafu varátifano.” ⁸ *Maa siren betí ankan mai iyampon pákaren aruan púden béin au yaiyó uan mai yunan dafu akhempá mo kharúden mino.

⁹ Karúden mifo mai yunan dafu afóe ano intesá inten nafino. Béi eriven maen mai yunan dafufin ma yoriyá ein banta kayo me aruan púden mai yunan dafu e maman ena vanta kayon aminten mino. ¹⁰ Tiyarafenui vompon dóki ano ma máa sikhein mai siretí ankan ídá dankáke rafono.

“Má uvaran banta kayo ano ma yo mamán karúdein onámaná ano maman má dádaimpin mana ákona onámanasí ukhen mino.

¹¹ Mai Bafan mánon máan turan mai anon tetin tivorá kama ukhen mino.” *Íbo 118:22-23*

¹² Yisasi ma sian baeriyain baya mai vetí ankan nan tiyákan afová uren béin pákano van uvaen banasi van péden me ifá en oren mino.

Kamanin Ma Takisi Amin Baya Ino
(Matiu 22:15-22; Ruku 20:20-26)

¹³ *Ínaimpáké Yisasin mákasino van betí ankan manáa Farasisi kayo vá Erotini vanta kayo vá tiantan Yisasi vaipá eren mino. ¹⁴ Eriven betí ankan béin tiamemí, “Aru soe, setí ankan afová ukhé uno éi fura vaya ana sin banta ono. Éi ída mana vanta van kokhon ineine in banta ono. Minó banta ano manaí ana ukhayai éi Tiyarafenui fura sikhein baya afova amé iya ompo setin tisimeno. Sisan ma takisi amin mai funtákein ná tetí amé tifante rafuno áa ída fino.”

¹⁵ Maa síkan Yisasi vetí ankani kampun afová ukhen betin tiamemí, “Tiretí ankan pará téin akhenóka iya rafono. Mana aran moní bareya eresí onano.” ¹⁶ Maa síkan betí ankan mana moní aran maman bein me amíkan betin inaemí, “Ma moníká iyen aunasa baná inká iyen avisá mairá uvanten nafino.”

Maa síkan betí ankan evaránen temí, “Kin Sisan mino.”

* 12:1: Ais 5:1-2 * 12:8: Ibu 13:12 * 12:13: Ruk 11:53-54 * 12:17: Rom 13:7

17 *Síkan Yisasi vetí ankan evaránen tiamemí, “Sisan nina yaná Sisan ame vá inká Tiyarafenu ina yaná Tiyarafenu vá ameno.”

Síkan betí ankan kákantá anúden mino.

Púkaren Ma E Mantaven Ábasuí Inain Baya Ino

(Matiu 22:23-33; Ruku 20:27-40)

18 *Sadyusi kéká ano furin nanin banta van ída e mantanten ne siyain bakan betí ankan Yisasi vaintá eriven béin inaen mino. 19 *‘‘Aru soe, mana vaya Mosesi ano setí ankan nan máa siren bompon uvanten mino. ‘Mana vanta ano ma iyampon ída kainton ma fúbintin ben aná ma fara váintin maen ná béin afá aváe ano vá mai nanin baré mamákená be afá aváen ayaená iyampon kauantano.’ 20 Dan manápá ifo afápá kan un kádan anavádano varé íkan mai finté esé banta ano nare mana nanin mamákaren ída mana iyampon kainton mai vanta furen mino. 21 Púbíkan béin ánaintena vanta ano mai nanin mantaren ída iyampon kaina mai vanta furen mino. 22 Mai nanin minó dan manápá ifo afápá kan un kádan anavádano mádiyan ída iyampon kaina yo fúdú uvíkan mai nanin inaimpáké puren mino. 23 Máan tukhen mifo ínaimpáké ma furin banta ma evaránen e mantan nain damú mai nanin iyen anasá banten nafino. Mai éi afová ukha ono mai nanin manan minó dan manápá ifo afápá kan un kádan banta ano mantaren mifo éi sétin tisiminte fono.

24 Máa síkan Yisasi evaránen betí ankan tiamemí, “Tirarafenui vaya vá ákona vá turetí ankan ídá afová ukheyá baya namu iya rafono. 25 Purin nanin banta ma masí pinté ma evaránen e mantan nain damú ída vanasi ano ábasuí inten mifo vetí ankan enisori kayo ma inarufá bain an mi yen banten mino. 26 Banten mifo furin nanin banta ma evaránen e mantan nain baya ma Moseni vompon dókifin ma sító daa anan ma ira kiyan ma Tiyarafenu ano ma Mosen tiamen ma, ‘Téi Abaraamuni Ayarafenu uno. Téi Aisakini Ayarafenu uno. Téi Yekopuni Ayarafenu uno,’ Eks 3:2, 6

ma sein mai siretí ankan ídá dankáke rafono. 27 Purin nanin bantai Ayarafenu vaino. Ída ino. Para ma vain nanin bantai Ayarafenu bákaya siretí ankan tavi aaimpin mi oriya rono.”

Moéken Kákaní Ma Ukhein Man Baya Fákena Vaya Ino

(Matiu 22:34-40; Ruku 10:25-28)

28 *Máa siyákan mana man tinbanta ano eriven iníkan betí ankan baya fóké aruviyákan béi inin Yisasi kama vaya fóké evaránen betí ankan tiamiyákan iniren béi Yisinin inaemí, “Intéa man baya anó minó man baya esantaren ná esesí ukhen nafino.” 29 Máa síkan Yisasi evaránen béin tiamemí, “Esésí ma ukhein mai ma man baya ino: ‘Turetí ankan Isareri nanin banta oe, setisi Bafan Tiyarafenuveyáká anan Bafan ban mino. 30 Ban mifo vá ei Bafan Tiyarafenu vá ei aú amafon má ei ineine vá ei ákona vasá minó o éke e éke ureya vá anunu ono.’ *Diu 6:4-5*

31 Mai man baya ánai ma vain man baya mai ma man baya ino. ‘Eyan nan ma anunu iyaonaie vá ena van anunu ono.’ Ída ena kákan man baya váken mai ano má kanan man baya esantakhen mino.” *Riv 19:18*

32 Máa síkan mai man baya ma afová ukhein banta ano máa sen Yisinin tiamemí, “Aru soe, éini vaya kamaen mino. Pura ino. Tiyarafenu veyákái Bafan ban mino. 33 *Ban mifo seti vá minó tú timafon má minó ineine vá minó ákona vá pókesá béin nan tiran ná tifano. Teti ankan ma seyan nan ma iyarúna máan ná esá enavan tiran ná tifano. Teti ankan ma maí kanan man baya ánain ma vákurékun maen mai avúavá anon ira ma sáden minó akonte iyain má ara ara akonte vá esantakhen mino.”

34 Máa síkan Yisasi inin mai vanta ano ma evaránen tein baya van mai mana kama afova vain banta ano ma seiní íkan Yisasi evaránen béin tiamemí, “Éi ída Tiyarafenui yafisimpin nentá ba ono.” Máa síkan minó nanin banta kayo ano akhokho van uren Yisinin ída enádá bá mana vaya inaen mino.

* 12:18: Apo 23:8 * 12:19: Diu 25:5 * 12:28: Ruk 10:25-28 * 12:33: 1Sa 15:22; Ose 6:6

Tiyarafenu Ano Ma Aní Ukhein Banta Mai Iyen Anin Nafino

(*Matiu 22:41-46; Ruku 20:41-44*)

³⁵ Yisasi átaru namumpin báken banasi vava siamiyaren béi semí, “Intesá ukhan ná man baya ma afová ukhein banta kayo ano Karaisi nan Devitin akhá ino siyan nafino.” ³⁶ Mai van Kantá Aunan maño Devitin ineine amíkan Deviti veyantá máa semí,

“Bafan mano senti Bafan ne máa sen tiamen mino,

“Éi sen tivan kurompá kumaneno.

Ínaimpáké eni namuro kayo séi maman

éin aránaópá kaonté uno.” ’ *Íbo 110:1*

³⁷ Deviti veyantá béin nan Bafan ne sikhen mifo véi intesá urená bei anin bavae.”

Máa síkan bení vava kokhon nanin banta ano amusin iyan inen mino.

Yisasi Ma Au Khákan In Banta Kayo Van Ma Sein Baya Ino

(*Matiu 23:1-36; Ruku 11:37-54, 20:45-47*)

³⁸ Iniyákan Yisasi vanasi afova amen temí, “Tiretí ankan man baya ma afová ukhein banta kayo vará dafiseno. Betí ankan kama ukhein ayá au anamun ma uren orin má átaru varu ráke ma vanasi ano ódaren bayan mino ma sin ma san aranakhen mino. ³⁹ Betí ankan monó átaru namun kayofin banasi avorá ma kumamen inká kákan dunan nan damú ma esé karáká ana ma kumanin nan mi aranakhen mino. ⁴⁰ Betí ankan baré nanin kayo kampun tiriyan betí ona umoyan iyáken au khákan en ayáká amúké iyan mifo mai kéká anon Tiyarafenui kópin kákan uman baranten mino.

Baré Nanin Mano Susu Sin Moní Ma Karú Dein Baya Ino

(*Ruku 21:1-4*)

⁴¹ Maná damú kákan monó namumpin Yisasi moní kain anan ádé kumanten oniyákan banasi ano susu sin moní mai anampin kuferiyákan kokhon moní ma yákein kayo ano kokhon ná moní kuferiyan mino. ⁴² Máan ten kuferiyákan mana ve avafu fúkein baré nanin ída kokhon ona vain mano eren me kankanan

tító moní kanan mana ten toeya ma (10t) eini ukhein kuferen mino.

⁴³ *Kuferiyákan Yisasi vei eyo iyampon kayo aran eríkan betí ankan tiamemí, “Téi fura siré tiretin tiamé uno. Ma ma ona ída van ma ve avafu fúkein baré nanin mano kákan moní kuferen mino. Béi ma átaru namumpin bain anampin ma kuferein moní ano minó nanin banta esanten mino. ⁴⁴ Esanten mifo ona ma yákein nanin banta ano kokhoná dáken mai finténa manáan anafin kufé dan araviyan mifo ma nanin mano ona ída van o útúken mi yunan ma nan nain moní ída antan á inton minói kuferen mino.”

13

Kákan Monó Namun Ma Varákin Nain Baya Ino

(*Matiu 24:1-2; Ruku 21:5-6*)

¹ Yisasi kákan monó namun me ampiren eriyákan mana vei eyo iyampon mano véin tiamemí, “Aru soe, onano ma monó namun kákan onámaná kayo vá kama yanasinta vá pókéi uvádan ban mino.”

² *Máa síkan Yisasi evaránen béin máa sen tiamemí, “Éi ma kákan má oniyaona mai finténa ída mana onámaná áintin benané benané ukhen banten mino. Ída ino. Minó onámaná barákuan karúdantin barará erafuvintin ída mana onámaná benané benané ukhen banten mino.”

Ma Vara Kípan Akhempá Ma Aní Daná Afokáin Nain Baya Ino

(*Matiu 24:3-14; Ruku 21:7-19*)

³ Ínaimpáké kákan monó namun e omaren Orifí Anurá Yisasi kumantan Pitan má Yemisin má Yonin má Endurun má betí ana váken betí ankan Yisasin inaemí, ⁴ “Tetin tisimeno, inte yamusá mai yanasinta afoká inten nafino. Intéa aní daná naré afoká intí tetí óde afová erá mai yanasinta inka afoká in ádé en mino sente rafuno.”

⁵ Máa síkan Yisasi vetí ankan tiamemí, “Manáa nanin banta ano siretí ankan maka sinten mifo yafian ná ákona ono.

⁶ Kokhon banta ano eriven téin tiví taraaren tinten mino séi Tiyarafenu Anin banasi avirantá ma siantan erikhá ein banta uno siren betí ankan mano kokhon nanin banta máka sinten mino.

⁷ Ínaimpáké turetí ankan ma aruvin baya vá aruvono van ma siyan nain baya vá ma ininteya ída vá turetí ankan anú duman duman ono. Mai yanasinta afoká uvintin mi kípán damútasoren mí erinten mino. ⁸ Mana anan banta ano e manten ena anan banta vá aruvintin inká mana kini kéká ano e manten ena kini kéká bá aruvintin inka manáa akhempá bara kaya intin kákan arafan purinten mino. Mai yanasinta maen anasí ano ma iyampon kaono van inamunan iniyan ai san aureiníi inten mino.

⁹ *Máan mi inten mifo siretí ankan dafían ná ákona ono. Betí ankan mano vetíí ánon banta kayorá turetín kó tiantanten mino. Kó tiantáden betíí monó átaru namun kayofin turetín ankaminten mino. Ankáden betí ankan téin tiví maman bararasí ono van iniyáken kamanin banta kayo vá kin kayo vá avorá mantaan táden duvun intiya séinti veya vetí ankan tiamin nono. ¹⁰ Ínaimpá mai yanasinta afoká inten mifo kama veya nare vá minó nanin banta siameno. ¹¹ *Máan tinten mifo veti ankan ma siretí ankan pákaren ma kópin mo khaintiya sireti ída vá akhokho van eya inte vayá tente rafuno sireya ineine ono. Mai áaurá ma eni ineinefin ma erin nain mai Tiyarafenu anon amen mifo mai veya vá teno.

¹² *Máan intin be afá aváe ano e mantaren be afá aváen aruan purino van namuro vanta kayo ayampin aminten mino. Amintin be afóe ano e mantaren be akhá aruan purino van namuro vanta kayo ayampin aminten mino. Amintin be akhafana ano e mantaren be anóe afóe aruan purinten mino. ¹³ *Minó banta ano siretín namu uantanten mifo mai farava ino séin tiví turetimpín bantín mino. Máan tinten mifo éi iye anó ákona iyá inte fono mai kípán damú éin Tiyarafenu ano evaránen aviranten mino.

Mana Namu Yana Suron Ma Afoká Inain Baya Ino

(Matiu 24:15-28; Ruku 21:20-24)

¹⁴ *Baru ma namu inain mai namu yana suron mi erintiya siretí ankan onan

ono. Béin nan ída vano ma sikhá ein mai varurái mantakhen banten mifo ma veya ma yankafin nain mano kama vá en inino. Máan ma inain damú minó nanin banta ma Yudiá ma vain mano vá anu yonpimpasá karan orino. ¹⁵ *Máan ma intin maen má daró ma váin nain banta ano ída vá erafuven má naumpin un pében be amá pinte yanasinta varano. ¹⁶ Máan ma intin dunampá ma orikháin nain mano ída vá evaránen bei au anamun ovarano. ¹⁷ *Máan ma intin maí damú amúbá nanin kayo vá arará iyampon ma nan kuviyain nanin kayo va san mi sirunken mino. ¹⁸ Amúkesiná mai avúava sinta iyon ma in damú ída vá afoká ino. ¹⁹ *Maí damú kákan uman mi vanten mifo esé ma Tiyarafenu ano ma araien inaru vara ma uvarein táké ma eren tare ma varúnará ída máan ukhein uman pefá afoká ukharen mino. Ínaimpá ída máan uman banten mino. ²⁰ Bafan mano ma máan damú ída ma maman asíkaí intin maen minó nanin bantan afeyoranten mifo veyan ma fe iyákein nanin banta van ma iniyáken maen maí damú maman asíkaí inten mino. ²¹ Máan ma intin maí damú manáa vanta ano siretí ankan tiaminten mino, “Onano masí na Tiyarafenu ano ma aní ukhein banta van mino. Áa mesápá ban mifo onano.” Máan ma sintiya siretí ankan ída vá mai van mumunan ono. ²² *Manáa vanta kayo ano eriven kampun ten máa sinten mino, “Téi Tiyarafenu Anin banasi avirano van ma siantan erikhein banta uno. Téi mana sakhanampa vanta uno,” siren ara ara avúavá daná afoká en ara ara yoran baranten mino. Máan tinten mifo veti ankan ma kanaí inten Tiyarafenu ano ma veyan iyádan bain nanin banta kéká kanaíen kufa uádanten mino. ²³ Máan tukhen mifo siretí dafíaná ákona ono. Téi minó dana san inka siretín tiamé uno.

Banta Anin Ma Overánen Erin Nain Baya Ino

(Matiu 24:29-31; Ruku 21:25-28)

²⁴ *Máa siren Yisasi enadá betí ankan tiamemí, “Mai minó uman ma kípavintin

* **13:9:** Mat 10:17-20 * **13:11:** Ruk 12:11-12 * **13:12:** Mat 10:21 * **13:13:** Mat 10:22; Yon 15:21 * **13:14:** Dan 9:27; 11:31; 12:11 * **13:15:** Ruk 17:31 * **13:17:** Ruk 23:29 * **13:19:** Dan 12:1; Rev 7:14 * **13:22:** Rev 13:13 * **13:24:** Yoe 2:10, 31; 3:15; Rev 6:12-13

“Áau ano ída e unintin
biyon mano enádá ída kanten mino.
25 Máan tintin inaruráké ofu kayo kararen
eravintin
inarurá ma ákona yanasinta vain
mano kayamana inten mino.’ *Ais*
13:10; 34:4
26 * “Máan ma sin nain maí damú betí
ankan onantin mi Banta Anin mano
kakhan má ákona vá mamaren ayompin
erinten mino. 27 * Eriven maen maí damú
bei enisori kayo siantantin oriven beyan
ma iyákaré ein nanin banta avían átaru
inten mino. Béi mino inaru vá bara vá
ma o útúkein akhen páke yeren aviranten
mino.

Fiki Yaa Anará Ma Afova Varan Baya Ino
(*Matiu 24:32-35; Ruku 21:29-33*)

28 Ena aní daná ba san Yisasi afova
siamemí, “Fiki yaa ana ano sétin afova
simé iyan mino. Daa ayan mano ma
amun amun in ma auyen amun basen
oriyan maen mai inka á kanten mino
siya ono. 29 Máan manan ukhen mino
ínaimpá ma siretí ankan onesin ma mai
yanasinta afoká inti vá mai inka erikhen
onará mantakhen mino vá te afová ono.
30 Téi fura siré tiritin tiamé uno. Ma
ma saréa ma vain mai nanin banta ída
fúkantin mi minó mai yanasinta afoká
inten mino. 31 Máan tintin maen inaru
vá bara vá kípanten mifo séinti veya ída
aiyoranten mino.

Ída Mana Nanin Banta Ano Yisasi Ma Erin Nain Damú Bá Áau Vá Afová Ukhen Mino
(*Matiu 24:36-44*)

32 “Ída mana nanin banta ano mai yamú
bá mai áau vá afová ukhen mino. Inarurá
bain enisori kéká bá Tiyyarafenu Anin má
ano yere ída afová ukhen mifo ve Afóe
veyáká anan mai yaná afová ukhen mino.
33 Máan tukhen mifo siretí ankan utá are
yafíke vá bano. Tirití ankan ída afová
ukha ono inte áau rasá mai afoká inten
nafino. 34 Mai máan mi ukhen mino.
Mana vanta ano ma ve amá me ampíren
enafá orono van maen bei yoran banta
kayorái veina yaná daíden amé iyan mino.

Máan turen maen mi onará ma yafisin
banta van kama vá eya yafiseno sé iyan
mino.

35 * “Máan tukhen mifo siretí ankan
dafian ná ákona ono. Tirití ankan ída
afová ukha ono intéa yamusá mai má
afóe erinten nafino. Béi inúpákesá erinten
nafi áa inuran aúbanasá erinten nafi áa
kokore asin pintesá erinten nafi áa ákura
sá erinten nafino mai siretí ída afová ukha
ono. 36 Tirití ankan aunká bakharé esin
béi ainen eren e onanten mino. 37 Ma ma
séi ma siretin tiamerúna mai veya anan
minó tiamé uno, ‘Tirití dafíke vá bano.’ ”

14

Yisasin Arin Aa Van Ma Yosein Baya Ino
(*Matiu 26:1-5; Ruku 22:1-2; Yoni 11:45-53*)

1 Yisi Ída Van Bereti Ma Nan Omá Damú
ma afokáin mai kan damú ana ukhan
monó ánon banta kayo vá man baya ma
afová ukhein banta kayo vá temí, “Intesá
urerá tetí Yisasin kampun tirerá pákaré
béin aruan puró tifante rafuno.” 2 Maa
siren betí ankan temí, “Mai kantá damú
ída vá tetí ankan máan tono mai vanasi
ano e manten aruvín afoká inten mino.”

Betaní Barurá Ma Yisasin Ánontá Aunka Uveri Vanaein Baya Ino
(*Matiu 26:6-13; Yoni 12:1-8*)

3 * Máan tiyákan Yisasi Betaní barufá
oren amon daná aí bain banta Saimonin
amá karáká o kumamin mana nanin mano
kákan esantakhein moníká bain aunka
uveri anan mamaren eriven mai aunka
uveri anan me yuvaren Yisasin ánontá
banaen mino.

4 Bana íkan maifin manáa vanta kayo
varen aran naná máden betiyan ten or-
eraen temí, “Pará ma aunka uveri fasavifá
afe iyan nafino. 5 Tetí ankan ma kanú
manáú antareti (300) moníká sarí uré ma
mai moní mádé ma ona ída van nanin
banta ameren mino. Maa siren betí ankan
mai nanin asen mino.

6 Asíkan Yisasi vetí ankan asen temí,
“Tirití ankan mai nanin áduantaro. Nái
vará tirití ankan béin uman amiyara fono.
Béi ano séin kama avúavái usintíyan mino.

7 * Ona ída van nanin banta kayo ano ena

ena siretin má bantiya aya ono ma sinte aya in nampo séi ída siretin má ena ena vanté uno. ⁸ *Anasi ano ma variyain mai yaná inka véi máantin kípen mino. Téin tufá ma véi aunka uveri ma vanaein mai séi ma masípin oronunan úta sinten mino. ⁹ Téi fura siré tiretin tiamé uno. Minó bara akhempá ma monó baya ma siamin nain maifimpá deren ma nanin mano ma varein avúavá dana san tiren béin nan ininten mino.”

Yudasi Ma Yisasin Namuro Ayampin Avían Kaono Van Kana Ino Sein Baya Ino (Matiu 26:14-16; Ruku 22:3-6; Yoni 6:70-71)

¹⁰ Maí damú tiyan míkan mifo sirantan kan orun kádan (12) eyo iyampon kayo finte mana Yudas Iskariotin ne sin mano monó ánon banta kayo ayampin Yisasin ameno van oren mino. ¹¹ Oren mo síkan betí ankan maí iniren amusín uren béin ma moní miyaní inain iyá antádan Yudasi ma vetí ankan ayampin ma Yisasin amin nain áau vá aa va san araíen dosen mino.

Yisasi Ma Vei Eyo Iyampon Kayo Vá Avo Uantan Dunan Típa Nein Baya Ino (Matiu 26:17-25; Ruku 22:7-14, 21-23; Yoni 13:21-30)

¹² *Yisi Ída Van Bereti Ma Nan Omá Damú esé damú afoká en mino. Maí damú betí ankan Avo Uantan dunaní ma in sipisipi ararái aré iyan mino. Yisasini eyo iyampon kayo ano véin tiamemí, “Intefasá tetí ankan mo avové uré kuyá éi Avo Uantan dunan nante fono.”

¹³ Máa síkan eyo iyampon kanan tianta Yerusalemí oriyákan máa sen tiamemí, “Tiré kanan Yerusalemí barufin oresin ma mana vanta ano ma kákan non kave mamaren ma fókanti mai vanta ánain ná bákurono.” ¹⁴ Bákure oresin béi ma mana namumpin un perantiya mai namun afóen máa seya vá tiameno, ‘Arú ano semantino senti karafaran intesin ná bain tesi eyo iyampon kayo vá Avo Uantan dunan nante rafuno.’ ¹⁵ Tesin maen béi siré kanan mana yan bain kákan karafaran aní inten mino. Maifin dunan ma nan takhó bá kumanin kará bá pe funtáken mino. Mai karafarampin ná tiré kanan tétisi yunan puntá ádano.”

¹⁶ Máa síkan eyo iyampon kanan mai varufin oriven onákan mai ma Yisasi ma vékanan tiameiníen mino. Máan tíkan békanan Avo Uantan dunan ma mo nan nain puntáan kaen mino.

¹⁷ Inupáké Yisasi má bei eyo iyampon tirantan kan orun kádan má (12) eren mino. ¹⁸ *Mairá betí ankan takhóká kumanten dunan niyákan Yisasi semí, “Téi fura siré tiretin tiamé uno. Tiretin aúbaná pinté mana vanta ano senti namuro kayo ayampin téin aminten mino. Ma ma séin má manafin dunan niyain mano ino.”

¹⁹ Máa síkan bei eyo iyampon kayoi ará uman dákan mana mana ano vetí ankan Yisasin araíen inaemí, “Téi funo áa iye fino.”

²⁰ Mairá Yisasi vetí ankan tiamemí, “Mai siretí tirantan kan orun kádan (12) kayo aúbaná pintena mana vanta ano ino. Mai vanta ano vereti fákaren dókifin ma séin má manamani kain araviyain mai ano ino. ²¹ Mai fura ino vompon mano fefá béin nan tikharé einíen mi Banta Anin purinten mino. Purinten mifo namuro kayo ayampin ma Banta Anin ma amin nain mai vanta van mi kákantá tirun ken mino. Mai séin ma namuro ayampin kain nain banta namu ukhen mifo moéken kama ukhen mino véin ída kaen na ino.”

Yisasi Ma Vereti Vá Uvaini Vá Bei Eyo Iyampon Kayo Amein Baya Ino (Matiu 26:26-30; Ruku 22:15-23; 1 Korin 11:23-25)

²² Mairá betí ankan dunan niyákan Yisasi mana vereti máden Tiyarafenu susu siantáden kisiren betí ankan amen temí, “Máde nano. Ma séin tu ino.”

²³ Mairá béi uvaini kápi máden Tiyarafenu susu siantáden betí ankan amemí. Amíkan minó ano mai nen mino.

²⁴ *Narákan béi vetí ankan tiamemí, “Ma senti nare ano siretin ákona uranti kokhon nanin banta ano Tiyarafenu vá ará manafiní ureya vano van téi vanaé uno. ²⁵ Téi fura siré tiretin tiamé uno. Téi ída enádá bá uvaini aran anu nanté umpo maí damusí ma intí Tiyarafenui yafisimpin auyen uvaini anun nanté uno.

²⁶ Máa sirákan betí ankan mana monó í daren Orifí Anufá oren mino.

* **14:8:** Yon 19:40 * **14:12:** Eks 12:6 * **14:18:** Íbo 41:9 * **14:24:** Eks 24:8; Yer 31:31-34; Sek 9:11; 1Ko 10:16; Ibu 9:20

Yisasi Ma Pita Nan Téin Oyan Timin Nono Sein Baya Ino

(Matiu 26:31-35; Ruku 22:31-34; Yoni 13:36-38)

²⁷ Mairá Yisasi vetí ankan tiamemí, “Monó bompon mano máa sikhén mino, “Téi sipisipirá dafisin banta aruréken minó sipisipi karan orera inten mino.”

Sek 13:7

Máa sikhén tiretíi mumunan minó asuse en namu inten mino. ²⁸ *Téi ma evaráné e mantaré ten naren tiretin an uanté Karir-ífa oronté uno.”

²⁹ Máa síkan Pita véin tiamemí, “Minó kayoi mumunan asuse en namu inten mifo senti mumunan ída asuse en namu inten mino.”

³⁰ Máa síkan Yisasi véin tiamemí, “Téi fura siré éin tiamé uno. Taréa inuran kokore ída kankanán dádá asikhan tiya éi séin nan kanú manaú dádá ída afová ukhé uno sín nono.”

³¹ *Máa síkan Pita enádá ákonaen temí, “Ída ino. Téi éin má manafin puronté uno. Téi éin nan ída afová ukhé uno ída senté uno. Ída uron mino!” Máa síkan minó eyo iyampon kayo ano veyan máa sirú en oreraen mino.

Yisasi Ma Ketsemani Amúkein Baya Ino
(Matiu 26:36-46; Ruku 22:39-46)

³² *Mairá betí ankan oren mana yunan anafin o unen mino. Mai vara aví Ketsemani ino. Mairá oriven Yisasi vei eyo iyampon kayo siamemí, “Téi simúkono van mumpo siredí ankan marasá kumante vá bano.” ³³ Máa siren Pita, Yemisi, Yoni siren aviran oriyáken aváduan onákan ará umán dan au ira khen mino. ³⁴ *Máan tiyampin béi vetí ankan tiamemí, “Téin tirá ano kákantá umán dein téi inka furonté uno. Tiretí ankan mará bákeya vá dafian ákona ono.”

³⁵ Máa siren béi manáa e afánen oriven barará o vaven amúken mino. Béini anunu ano mai vei furin ma eriyain kanaisá ená béin akhakhanten nafino siren inen mino. ³⁶ *Iniren béi semí, “O tifóe oe. Éi kana minó danasí in nompo séin pintena ma kápi yovarano van mi iyá umpo mai éi ída vá tenti sinunu ánain dakhafono. Éi ei anunu vá dakhafono.”

* **14:28:** Mat 28:16; Mak 16:7 * **14:31:** Yon 11:16 * **14:32:** Yon 18:1 * **14:34:** Yon 12:27 * **14:36:** Mak 10:38; Yon 6:38 * **14:44:** Amónan avúavá ma vain mai arona ma kamaen avábá in mino.

³⁷ Máa siren béi oren o onákan bei eyo iyampon kayo auun bakharé íkan béi Pitan tiamemí, “Saimoni éi auunábakhe fono. Éi ída ena mana áau vá dafisinte fono. ³⁸ Tiretí ankan dafíkeya amúkono. Tiretí ankan ma akhenókain daná erinten mino. Para vara seyo, aú ano anunu ukhan mifo yan bukhafa ano avesara iyan mino.”

³⁹ Máa siren béi evaránen mo enádá mai ma esé amúkein amúkirí anaen mino. ⁴⁰ Amúkuren béi ovaránen bei eyo iyampon kayo e onákan betí ankan au ano kákantá umán dákanaunká bakharen mino. Béin ma evaránen tiamin nain baya vetí ankan ída afová ukharen mino.

⁴¹ Yisasi ovaránen kanú manaú dádásí en eriven betí ankan tiamemí, “Tiretí ankan pará auun bakhe vákeyá avikiyá ba fono. Mai kana ifo senti áauí inka en mino. Onano Banta Anin inka ume vanta kayo ayampin amen mino. ⁴² Tiretí ankan mantavesí oró tifano. Téin ma vetí ankan ayampin ma amin nain banta inka eren mifo onano.”

Yisasini Namuro Kayo Ano Ma Véin Pákein Baya Ino

(Matiu 26:47-56; Ruku 22:47-53; Yoni 18:3-12)

⁴³ Yisasi mai vaya fara siyákan tiyan míkan mifo sirantan kan orun kádan pintena (12) mana Yudasi eren mino. Kokhon banta kayo ano vaenati variyan dan bariyan uaren béin má eren mino. Monó ánon banta kayo vá man baya ma afová ukhein banta kayo vá ánon banta kayo vá ano vetí ankan tiantan eren mino.

⁴⁴ Mai Yisasin ma vetí ankan ayampin ma amin nain banta ano mana aní inain baya vetí ankan tiamikharen mino, “Téi ma mo amónanuna vanta* mai Yisasi ifo vá pákareya vá ákona e yafíbeya avire orono.” ⁴⁵ Máa sikharen Yudasí e unen eriaren ainen Yisasi vaintá oriven temí, “Aru soe!” siyáken béin amónen mino. ⁴⁶ Máan tiyain má betí ankan ayan dan orin Yisasin páken mino. ⁴⁷ Pákiyain má mai ma véin má ma mantakhá ein kéká pinté mana vanta ano vaenati orun

danúaren mana monó ánon bantai yoran banta átaren ankáboren kaven mino.

⁴⁸ Kavíkan Yisasi vetí ankan tiamemí, “Tiretí ankan téin pákano vará baenati vá dan má mamareyá mana umoyan banta ma fákano van einí e fono.” ⁴⁹ *Ena ena yamú ma séi siretí ankan má monó namun kumanté afova amiyákeya siretí ída séin páke ompo vompon pintena vaya ano vá pura sen afoká ino.” ⁵⁰ *Máan tiyain ma minó beni eyo iyampon kayo véin me ampíren karan oreraen mino.

⁵¹ Karan orera iyain má mana fumara ano efanten davaráe minó aurá ukhuren Yisasin avákuren oriyá íkan betí ankan béin páken mino. ⁵² Pákaáðaran béi efanten davaráe me yavaman kaúden au urontá karan oren mino.

Yisasi Ma Kanisori Kéká Avorá Ma O Mantein Baya Ino

(Matiu 26:57-68; Ruku 22:54-55, 63-71; Yoni 18:13-14, 19-24)

⁵³ Mairá betí ankan Yisasin aviren monó ánonbanta kékái ánon banta vaintá oríkan minó monó ánon banta kayo váánon banta kayo vá man baya ma afová ukhein banta kayo vá e átaru en mino. ⁵⁴ Pita ano Yisasin bákuren oriyan mifo véi nentá o útúbiyan onen oren mino. Béi mai monó ánon bantai ánon bantai yafufin ódiven piripo kayo vá báken ira kaniyan baren mino.

⁵⁵ Bákan minó monó ánon banta kayo vá minó Kanisori kayo vá ano manáa vanta kayo arákan eriven Yisasi ma variyá ein avúavá ana me sirú en mino. Betí ankan béini aau ma vantí mairá béin aruan purono siren dosíkan beni aau ída mana varen mino. ⁵⁶ Kokhon banta ano kampun baya fóké béin augin kuráden ten mifo mai vaya kayo ano ída manaíen mino.

⁵⁷ Ída manaí eimpin manáa vanta ano e mantaaren kampun baya fóké Yisasin augin kuráden temí, ⁵⁸ * “Tetí ankan inékun béi máa sen mino, ‘Banta ano ma ayampó uvantein monó namun téi varákurékanú manaú damú ananmai monó namun uvaranté umpo mai namun banta ano ayampóké ída uvaranten mino.’ ” ⁵⁹ Máa

sen mifo mai kayo ma sein baya vá ano mo asusein ída kanaíen mino.

⁶⁰ Mairá monó ánonbantai ánon banta ano aúban mantaven Yisasin inaemí, “Éi ída mana vaya ovaráne sintó iya fono. Betí ankan ma éin augin kurariyain baya mai intesá ukhen nafino.” ⁶¹ Máa síkan Yisasi ve avaya fákaren kofakhen ída mana vaya evaránen ten mino.

Evaránen monó ánon banta kékái ánon banta ano véin inaemí, “Éi avábá in Tiyarafenu Anin Karaisi fono.”

⁶² Máa síkan Yisasi semí, “Mai séi umpo siretí ankan onesin maen Banta Anin mano minó ákona vain Tiyarafenui ayan kurompá kumamen béi inaru fáke konantá erinten mino.”

⁶³ Máa síkan monó ánonbanta kékái ánon banta ano aran kiyaimpin bei au anamun bararó uren temí, “Tetí ankan ída vá manáa vanta kayo vá arékun beni vaya me sino van ó tifano. ⁶⁴ *Tiretí ankan inka inen nan béi Tiyarafenu oyampá baya sen mifo siretí inté esá teya iniya rafono.”

Máa síkan minó ano vaya manafin máa sen Yisasin nan temí, “Béimpin aau van mifo véi vá purino.” ⁶⁵ Mairá manáa vanta ano aráien béin augin akhare siyákan betí ankan béin aunáká davaráe yamuan iyádenankamiyan temí, “Éi sakhanampa vanta omposaréa aví teno iye ano éin ankamiyan nafino.” Máan tiyákan piripo kayo ano véin avíden ankamen mino.

Pita Ma Yisasin Nan Ída Afová Ukhé Uno Sein Baya Ino

(Matiu 26:69-75; Ruku 22:56-62; Yoni 18:15-18, 25-27)

⁶⁶ Máan tiyákan bararasí ukheintá dafufin Pita varé in monóánon banta kékái ánon bantai yoran arinta ano eren mino. ⁶⁷ Eriven mai arinta ano onan Pita ira kaniyaré íkan mai yoran arinta ano véin purefure en ódaren temí, “Éi mai Nasaretíke Yisasin má bare ono.”

⁶⁸ Máa síkan Pita ída ino sen mino. “Téi véin ída afová ukherúna vayan éi siya ono.” Máa siren béi e manten barufá ona akhempá aravin mana kokore asen mino.

⁶⁹ Máan turan mai yoran arinta ano véin ódaren mairá áde ma mantakhá ein banta

* 14:49: Ruk 19:47; 21:37; Yon 18:20 * 14:50: Íbo 31:11 * 14:58: Yon 2:19-21 * 14:64: Riv 24:16; Yon 19:7

kayo siamemí, “Ma vanta ma vain mai véi mai kayoi kéká ino.” ⁷⁰ Maa síkan béi evaránen temí, “Ída ino.”

Maa siren bákan manáa ádé ma mantakhá ein banta kayo ano ínaimpáké evaránen Pitan nan temí, “Pura ino éi mai kayoi vanta Kariri fáké ono.”

⁷¹ Maa síkan mairá Pita ákora uron en maa semí, “Pura ódino séi maisiretin ma siyaona vanta ída uron mi afová ukhé uno.”

⁷² Maa siyain ma kokore ainen asian kani iyain má PitaYisasi ano ma véin tiamein baya ovaren inemí, “Kokore ída kankanan dádá asíkantiya éi kanú manau dádá téin nan ída afová ukhé uno sin nono.” Mai veya iniren Pita ífi den mino.

15

Pairoti Ano Ma Yisasi Vaya Yaimein Baya Ino

(Matiu 27:1-2, 11-14; Ruku 23:1-5; Yoni 18:28-38)

¹ *Pe ákura suron monó ánon banta kéká bá ánon banta kayo vá man baya ma afová ukhein banta kayo vá minó kanisoro kayo vá manafin baya siaren Yisasi ayantá damuren aviren mo Pairotin amen mino.

² Amíkan Pairoti ano véin inaemí, “Éi Yutan kayoi kin na fono.”

Síkan Yisasi evaránen béin tiamemí, “Éi mai inka se ono.”

³ Maa síkan monó ánon banta kéká ano véin aúfin kokhon baya fóké kuráden ten mino. ⁴ Tiyákan Pairoti ano véin evaránen enádá inaen temí, “Éi ídá anona evaráne mana veya sinte fono. Onano vetí ankan náí maa veya fókesá éin aúfin kurariyan nafino.”

⁵ *Síkan Yisasi ídaevaránen anona veya siyainpin Pairoti ano anú duren kokhon ineine en mino.

Pairoti Ano Ma Yutan Kéká Ayampin Yisasi Amein Baya Ino

(Matiu 27:15-26; Ruku 23:13-25; Yoni 18:38-19:16)

⁶ Ena ena orana Avo Uantan damú ma erin kamani ano mana vanta karavusi fintena útuanté iyan mino. Mai minó nanin banta ano ma útuantano ma sein mai vantano útuanté iyan mino. ⁷ Maa

tiyain bákan mana Barabasin ne sin banta karavusifin baren mino. Béi manáa vanta kayo vá kaminin má arugin duváden manáa vanta aruan púdan mai vanbetí ankan má karavusi uran baren mino. ⁸ Mairá banasi ano oriven Pairotin nan pefá ma iyaonaí ono siren oovaren mino.

⁹ Oovarákan Pairoti ano evaránen betíi veya anona siamemí, “Tiretí ankaní anunu ano Yutan kayoi kin na ifá ékun orino van iya rafono.” ¹⁰ Mai véi afova ukhan monóánon banta kéká ano Yisasi inian namu unantáden kópin aviren mo kain baren mino. ¹¹ *Bákan mai monóánon banta kéká ano vanasi arápin antaran betí ankan Pairoti vaípa oovaren temí, “Barabasin ifá uantan erino Yisasi ída ino,” sen mino.

¹² Maa síkan Pairoti ano enádá evaránen mai nanin bantará inaemí, “Mai siretí ankan ma Yutan kayoi kin mino ma siyaona mai vanta séi náisá béin onte rafono.”

¹³ Síkan betí ankan evaránen oovararen temí, “Béin daa unkamádantá arono.”

¹⁴ Síkan Pairoti ano evaránen enádá betin tiamemí, “Paravae náí auisá béi ukhavae.” Maa síkan minó nanin banta ano moéken avádóden oovararen temí, “Béin daa unkamádantá arono.”

¹⁵ Maa síkan Pairoti ano vanasi arápin amusin amen Barabasin ifá uantan betí baípa oríkan béi Yisasi arugin banta kayo ayampin kaíkan anan dafiyópóké nare ankáden daa unkamádantá béin arino van amin aviren oren mino.

Aruvin Banta Kéká Ano Ma Yisasi Máká Máká Ein Baya Ino

(Matiu 27:27-31; Yoni 19:2-3)

¹⁶ Mairá arugin banta kayo ano Yisasi aviren kamanini yafufin má naun ódiyáken minó arugin banta kayo arakan oren mino. ¹⁷ Oriven betí ankan kini narare au anamun Yisasi untáden ayankun anan póké mana kini kamamo uváden béin ánotá afú uanten mino. ¹⁸ Maa tuantáden betí ankan e mantaven taró uanten máká maáká iyan temí, “Yutan kayoi ákora kin noe, en aví daní iyá tifeuno!” ¹⁹ Maa siren betí ankan mana ura yafiyópóké béin ánon ankáden aufen akhare siren aron duráfúden

* 15:1: Ruk 22:66 * 15:5: Ais 53:7; Mak 14:61 * 15:11: Apo 3:13-14

matimen béin kampun amusin uanten mino. ²⁰ Máan turen aruvin banta kayo ano véin ayanavan baya siren intiren mai kini narare au anamun do yaváden beni au anamun evaránen uantáden béin daa unkamádantá arono van aviren oren mino.

Daa Unkamádantá Ma Yisasin Arein Baya Ino

(Matiu 27:32-44; Ruku 23:26-43; Yoni 19:17-27)

²¹ *Oríkan Yisasi ída ákona íkan mana Sairini varu fáke vanta Saimoni Arek-isanda nú Dufasin nú afóe ano kákan barufá Yerusaremi orono van aasá eríkan aruvin banta kayo ano ákonaen duvun íkan béi Yisasini yaa unkamádan ayaen baren oren mino. ²² Mairá betí ankan Yisasin aviren mana Korikhota e sin anurá mo khaen mino. Mai Korikhota e ma siyain beni ana máan mi sikhén mino. “Ánon Dampa Anuen” tikhen mino. ²³ Mairá avían mo Yisasin kauren betí ankan uvaini vá aí ma kusiantan non má* opé uren amíkanmaen béi ifá en mino. ²⁴ *Ifá íkan betí ankan béin daa unkamádantá antópóké aruren beni auí daná daváden betiyan maman kaúden mai auí danáká kati siren ayá nampa ma fákein mano mana yaná mádu en mino.

²⁵ Dan manápá ifo afápá kamí kamí un kádan áaurá Yisasin daa unkamádantá aren mino. ²⁶ Mai véin ánontá ben ma kó tiantein baya máa siren uvaremí, “Yutan Kayoi Kin Mino.” ²⁷⁻²⁸ Máan turen betí ankan umoyan banta kanan má daa unkamádantá aren mino. Mana véin ayan kurompá aren mana ayan ópá aren en mino. ²⁹ *Banasi ano onóbe enóbe iyáken béin ayanavan baya sen máa semí, “Odo! Éi monó namun barákureya kanú manauí damú ana uvaran banta ono. ³⁰ Máan tin banta ompo éi eyan ayaeya yaa unkamádantáké erano.”

³¹ Máa siyákan monó ánon banta kéká bá man baya ma afová ukhein banta kayo vá ano yere oyampá baya sen betiyan máa

semí, “Béi ena nanin banta ana ayaiyan mifo veyan ída kanaíen béi ayainten mino. ³² Mai Karaisi Isareri kayoi kin mano véi kanaíen daa unkamádan me ampíren erantí tetí ankan ódé béintá mumunan otifanté uno.” Máa siyákan mai ma yaa unkamádantá béin má manará ma arukhein bantá kanan má ano yere ven nan oyampá baya sen mino.

Yisasi Ma Furein Baya Ino

(Matiu 27:45-46; Ruku 23:44-49; Yoni 19:28-30)

³³ Bayan áau siya yavanin dun maren titipá ukhan áau inúpá kanú manausí emí.

³⁴ *Áau sitipá ukhen kanú manausí íkan Yisasi avádóden oovaren máa semí, “Eri, Eri rama sabáktani” Mai máan mi sikhémí, “Tenti Ti yarafenu oe! Tenti Ti yarafenu oe! Éi fará téin me oyan time fono.”

³⁵ Máa sikan manáa vanta kayo mairá adé mantakharen betí ankan mai iniren temí, “Ineno! Béi feyan sakhánampa vanta Iraiyan mi ariyan mino.”

³⁶ *Siyáken mana vanta ano savaen mómofen ma einí ukhein daná máden uvaini vá íta non má ma upí urampin daren ura yankará damuren Yisasi nano van amiren mai vanta ano semí, “Ave ukhesí oná tifano Iraiya ano véin e aví adantin ná eranten nafino áa ída fino.”

³⁷ Máa siyain má Yisasi avádóden bádiyan puren mino.

³⁸ Puriyain má kákan monó namumpin makákan davaráe kuran ma varé ein mai veyantá danté kafasen barará morúdan maman kankananién mino. ³⁹ Aruvin bantai ánon ayafa ano mairá Yisasini adé mantakharen béini furin ódaren béi semí, “Pura uron ma vanta Ti yarafenu Anin mino.”

⁴⁰ *Máa siyákan manáa nanin kayo nentá mantakhen oniyan baren mino. Mai vetin pintena mana Makdaráke Mariaí inká ena mai Yemisin nú Yosepin nú anóe Maria má ena Saromii. ⁴¹ Mai fefá ma Yisasin ma Karirifá ma vákan maen mai nanin kayo ano avákuren nóken

* **15:21:** Rom 16:13 * **15:23:** Ái ma kusiantan non nan mi Mer ne siyan mino. * **15:24:** Íbo 22:18 * **15:27-28:** Pefá ves 28 ída varéin inaimpáké mana vanta ano kaemí, Máan tikan mai mana monó baya ma vompompin ma vá ein pura sen afoká en mino. Mai vaya máan mi sikhámí, “Béin áau vanta kayo vá manafin e yankaádanten mino.” (Ais 53:12 fin ná onano). * **15:29:** Íbo 22:7; 109:25; Mak 14:58 * **15:34:** Íbo 22:1 * **15:36:** Íbo 69:21 * **15:40:** Ruk 8:2-3

béin aya iyaren mino. Mai véin má ma Yerusaremí orein nanin kayo yere mairábaren mino.

Yisasin Ma On Aimpin Masí Ein Baya Ino

(*Matiu 27:57-61; Ruku 23:50-55; Yoni 19:38-42*)

⁴² Inuran Sabati yamú bantéin mai útain damú inúpasíen mino. ⁴³ Inúpasí íkan Arimatiaké Yosepi ano eren mino. Béi mai mana kama aví bain kanisoro ifo véin má deren Tiyyarafenui Yafisin ave ukharen mino. Mairá Yosepi orein ída feranto Pairotin avorá o mantaven Yisasin au varen mo masí ino van béintá inaen mino. ⁴⁴ Ina íkan Pairoti ano kokhon ineine uren temí, “Béi inká púken nafino.” Maa siren aruvin bantai ánon ayafa aran eríkan béintá inaemí, “Yisasi inká púken nafino áa ída fino.” ⁴⁵ Mairá béi máa siren aruvin bantai ánon ayafai vava iniren Yosepin nan kana ifo véin au varano sen mino.

⁴⁶ Maa síkan Yosepi efanten davaráe o miyaní uren béin un maman barará aséden mai efanten davaráefin ukhuren béin mo on aimpin kaúden ain oyirá kákan onámanáo vaé baé uan ataen mino. ⁴⁷ Kaiyákan Makdaráke Maria nú Yosesin anóe Maria nú intefasá béin kaiyan nafi siren o váken onen mino.

16

Yisasi Ma Evaránen E Mantein Baya Ino

(*Matiu 28:1-10; Ruku 24:1-12; Yoni 20:1-10*)

¹ Sabati yamú kípavíkan Makdaráke Maria má Yemisin anóe Maria má Saromin má kama aunka iyain uveri kayo vetí ankan Yisasin aufá mo féantano van miyaníen mino. ² Esé arái in damú pe ákura suron asaréa áau e unin betí ankan masíká oren mino. ³ Oriyáken betiyan ten orera emí, “Iye anó masí oyi rákena onámaná do setin eka sintanten nafino.”

⁴ Maa siren onákan mai onámaná ída masí oyirá baren mino. Mai kákan onámaná ifo mana vanta ano fefá do avékakharen mino. ⁵ Mai masí aimpin betí ankan ódiven onákan mana fumara

ano ayan kurompáayá efanten au anamunuren kumantaré íkan betí ankan ódaren akhokho van en mino.

⁶ Akhokho van íkan béi vetí ankan tiamemí, “Tiretí ankan ída vá akhokho van ono. Nasaretíke Yisasin onano van ere ompo véin ma yaa unkamádantá ma antópó arukhá ein mai inka véi fe e mantakhen mifo onano véin ma kain báeimpin ída van mino. ⁷ *Tiretí ankan ore vá beni eyo iyampon kayo vá Pita má mo siameno, ‘Béi ma fefá tiretin tiamikhá einíen tiretin an uanten Karirifá orikhen mifo mai fákena vá tiretí ankan béin o onano.’”

⁸ Maa síkan mai nanin kayo masí ain pinté e khuyen eravuaren anú duman duman en karan oriyáken péden ída mana vanta vá baya sen mino.*

Yisasi Ma Mákdaráke Nanin Marian Avorá Dákó Ein Baya Ino

(*Matiu 28:9-10; Yoni 20:11-18*)

⁹ Esé arái in damú pe ákura suron Yisasi e mantáaren Makdaráke Marian avorá naren o afoká en mino. Yisasi mai nanin au fintena yan manápá ifo afápá kan un kádan namu aunan kayo yo siantein mino. ¹⁰ Maria orein minó Yisasi má ma nóein banta kayo mo siamemí. Mai minó banta kayo ano ará umandan ifi diyan baren mino. ¹¹ Baré íkan Maria vetí ankan tiamemí, “Yisasi ída furin para vá téi oné uno.” Síkan betí ankan mai vava iniren ída mumunan en mino.

Eyo Iyampon Kan Mano Ma Yisasin Ayana Fáke Onein Baya Ino

(*Ruku 24:13-35*)

¹² Ínaimpáké bei eyo iyampon kanan mano mana aayana oriyaréin Yisasi enará uven békanaan baintá o afoká en mino. ¹³ O afoká íkan ódaren békanaan manáa eyo iyampon kayo mo siamíkan betí ankan ída vékanani vava vá mumunan en mino.

Yisasi Ma Vei Eyo Iyampon Kayo Avorá Ma Afoká Ein Baya Ino

(*Matiu 28:16-20; Ruku 24:36-49; Yoni 20:19-23*)

¹⁴ *Ínaimpáké tiyan míkan mifo sirantan mana orun kádan (11) eyo iyampon máa ano kumanten duna niyaréin Yisasi vetí

* **16:7:** Mat 26:32; Mak 14:28 * **16:8:** Pefa esé Makini vompompin ves 9-20 ída varéin ínaimpáke ena vanta ano mai vava (ves 9-20) uvaman asotú en mino. * **16:14:** 1Ko 15:5

ankan baintá afoká uven betí ankampin mamumunan ída vákan ma véi ma e mantein ma onein nanin banta ano ma siamin ma vetí ankan ará uman daren ída mumunan iyain nan béi vetin asen mino.

¹⁵ *Máa siren béi vetí ankan tiamemí, “Tiretí ankan ore vá barará minó akhempasá kama vaya mo vanasi siameneno.

¹⁶ *Banta ano ma mumunan uven ma non baran nain mai Tiyarafenu ano evaránen avirantin ben ninaí inten mino. Máan tinten mifo vanta ano ma ída mumunan inain mai ano kópin afeyoranten mino. ¹⁷ *Tiyarafenu ano mumunan ma inain banta kayo ayantá máan avúavá daná afoká inten mino. Téin tiviká betí ankan namu aunan do siantiyáken auyen baya sinten mino.

¹⁸ *Betí ankan ayampó osafáe fákarantin ída untaranten mino. Betí ankan beyantá uvá naren ída furinten mino. Betí ankan banta aurá ma ayan kaintin mai aí bantan ano e asefa inten mino.”

*Yisasi Má Inarufá Ódein Baya Ino
(Ruku 24:50-53; Aposeri 1:9-11)*

¹⁹ *Bafan Yisasi ano vetí ankan baya siamirákan Tiyarafenu ano aviran inarufá óden Tiyarafenui ayan kurompá un kumanten mino. ²⁰ *Minó eyo iyampon kayo ano minó akhempá oreraen beni kama vaya mo siamen mino. Bafan mano vetí ankan má manafin doriyáken betíi vayafin ákora amíkan manáa avúavasí ma íkan mai afoká iyaren mino.

* **16:15:** Apo 1:8 * **16:16:** Apo 2:38 * **16:17:** Apo 2:4; 8:7 * **16:18:** Ruk 10:19; Apo 28:3-6 * **16:19:** Apo 1:9-11; 2:33-34 * **16:20:** Apo 14:3; Ibu 2:3-4

RUKUNI KAMA VAYA INO (Ruku) Rukuni Kama Vaya Ma Uvanteí Pákenai Afova Vaya Ino

Ma vompon ma uvantein banta ino.

Ena anan pinte vanta Ruku ayofan banta vákan ma minó ano anunu iyan ma inká Porini kama arona váken ma ven má manápá non ma monó dorarí iyá ein manon ma vompon uvanten mino.

Uvarein orana ino.

AD sikisti-tu (62) fin ma Kama Vaya Varen Orin Banta (Aposeri) Kayoi Yoran Bompon ída uvanten mino. Manáa afova vanta kéká ano siyáken AD fifti-eiti (58) ráké sikisti (60) fin ma Sisareá barurá ma Porin karavusií ukhá ein damúí ma vompon uvantan mino. Máan tukhan mi Yisas Karaisini Kama Vaya vá Baya ma Varen Orin Banta (Aposeri) Kayoi Yoran Avúavá bá bompon ma uvaran danasinta vá maí damú anan ovare evare uan átaru ukhen mino.

Ma vompon ma uvantein baru ino.

Kiriki varafin ma vain baru Ákaia safi áa Sisarea safin uvanten nen ten inikhen mino.

Ma vompon ma uvaman amikhein kéká ino.

Ída afová ukhé tiferuna vanta Tiofirasin mifo kákan ineine maen Kiriki varafin ma vain kéká bá inká ena anan kéká ma monó tiyain kayofin má ino.

Nái ana vará ma vompon uvanten nafino.

Yisasini yoran ma oniyáken afová ukhá ein kéká anon mai yoran nan tian amá ukhen mino.

Rukuni Esé Baya Ino

¹*Kákan banta Tiofirasi oe. Pefá kokhon banta kayo ano Yisasi ma setin aúbaná

afoká uáðakaré ein daná baya van uva-man one one iyaren mino. ² Mai yaná avúavá ma afokáin ma ontaré ein banta kayo mai Tiyarafenui yoran banta kayon bákan esé anará ma afokáin ma onein daná bayan uvaman tetin timen mino. ³ Máan tukhein nan mi séi yere ayá damú ina uré mai vaya ana kamaé afová uréi ma funtákein bompon uvaman amé uno. ⁴ Pefá ma siamikharé ein baya mai fura vaya ino seya yankáde afová ono van mi ma vompon uvaman amé uno.

Yoni Monó Non Péantan Banta Ma Kain Nain Baya Ino

⁵ Eroti ma Yudia kayoi kini ukhá ein damú Abiya ma monó ánon bantaí ukhan maen mana monó doran banta Sekaraiyan ne sin banta vákan ben aná Erisabeti Eronini kéká pintenan baren mino. ⁶ Békanan Tiyarafenu avorá puntáken minó man baya ánain dakhafiyáken Bafan oo yayien puntáden Tiyarafenu avorá baren mino. ⁷ Békanan ayokhuvini ukharen mifo Erisabeti a naniní ukhan mikanan ída iyampon kaúkaren mino.

⁸ Maná damú Sekaraiyani monó ánon banta kéká ano monó namumpin mo yorarí iyákan Sekaraiya má maifin Tiyarafenu avorá doriyaren mino. ⁹ *Maí damú monó doran banta kayo ano yanka iya iya uren asíka vá ayá danka kayo vá ma yanufin nain banta anon mun monó namumpin Tiyarafenu íkun uan aminten mino sirákan* Sekaraiya ano ayá danka yanú dan béin tiantan monó namumpin óden mino. ¹⁰ Íkun uantan áauí iyákan kokhon nanin banta ano monó barurá átaru ukhen amúkiyan mino.

¹¹ Amúkiyákan Sekaraiya vaintá mana Bafani enisori ano mai ma kama aunka íkun uantan takhó ádé afoká uven ayan kurompá mantakhan mino. ¹² Mantakharéin Sekaraiya mai enisori ma onen anú diyan akhokho van en mino. ¹³ Akhokho van íkan mai enisori ano Sekaraiyan máa sen tiamemí, “Ída vá akhokho van ono. Tiyarafenu ano eni amúkin inka inen mino. En aná Erisabeti

* 1:1: Apo 1:1 * 1:9: Eks 30:7 * 1:9: Danka yanufin avúavá mai kati ma siyainí ukharen mino.

afon iyampon kainten mifo ven avisá Yoni ne se vá aví dano.” ¹⁴ Mai iyampon ma afoká inain damú éin ará ano kama intiya amusin esin maen kokhon nanin banta ano yere moéken amusin intin maen ¹⁵ *béi Bafan auufen kákan bí baranten mino. Be anóen amúpin ma vantin Kantá Áunan mano ven aúpin bíkanten mifo véi ída vá uvaini vá óen non má nano. ¹⁶ Béi anon kokhon Isareri nanin banta ará maman baéden evaránen betí ankani Bafan Tiyarafenu vaípa aviren orinten mino. ¹⁷ *Béi Iraiyaní ákona vá avúavá bá mamaren Bafan an uanten oriven maen mo ve akhafana vá be afóeyan má ará maman manafiní uantanten mino. Máan tuantáden maen man baya ma átakharéin kékái ineine maman puntáden kama ineine ma vain kayo an daantanten mino. Béi vanasi maman arakhoku urantin Bafani erin nan ave inten mino.”

¹⁸ Síkan Sekaraiya evaránen máa sen enisori siamemí, “Téi intesá uré mainá afoká inten mino siré éini vaya afová onte rafuno. Te síbasu afova nanin bantan bá uno.”

¹⁹ *Máa síkan mairá enisori ano máa sen tiamemí, “Téi Kebrieri uno. Téi Tiyarafenu auufen manté iyarunan bakan mi Tiyarafenu anon tisintá ma kama vaya éin tiameno van eré uno. ²⁰ Ineno. Tenti vaya ma éi ída mumunan eonafá éin oo uman dantiya éi ída vaya sin basin mi mai yaná afoká inten mino. Beni yamusí ma intin mi senti vaya ano yákó inten mino.”

²¹ Minó nanin banta ano Sekaraiya monó namumpin ayáká bakan ave ukhen bavakon kokhon ineine en mino. ²² Ínainpáké monó namun pinté Sekaraiya ekhuven barufá eraven béi ída vaya semí. Máan tikan betí ankan afová en ten mino. “Mai monó namumpin ben avorá ena yaná afoká ukhan ayampó ana avavé navé iyáken oo uman dan ída vaya siyan mino.”

²³ Ínainpáké Sekaraiyaní yoran kípán be amá barufá oren mino. ²⁴ Oriklaré íkan ínainpáké be aná Erisabeti amú basí en mino. Amú basí uven dan manápá biyontá umeraren baren Erisabeti sian páman en mino, ²⁵ “Bafan mano séin avábá

usinten mino. Mai avábá ano vanasi avorá ten tiyave yo arútinten mino.”

Yisasin Ma Kain Baya Ino

²⁶ Erisabetin dan manápá ifo afápá mana un kádan biyon esantavin Tiyarafenu ano enisori Kebrierin tiantan Kariri varafá Nasaretí barufá oren mino. ²⁷ *Oren mana Kin Devitini anan pintena vanta Yosepin ne sin banta amikharé ein arinta Marian ne sin ída mana vanta vá bakharé ein arinta vaípa enisori ano oren mino. ²⁸ Mairá Kebrieri véi vaintá onó ben máa semí, “Anasi oe, bayan mino. Bafan mano éin má ban mino. Tiyarafenu ano éin moékentá avu uren éin kama uanten mino.”

²⁹ Síkan Maria mai vaya iniren anú duren mai náí vayá ten nafino siren kokhon ineine en mino. ³⁰ Máan tikan mairá enisori ano máa sen Marian tiamemí, “Maria oe, ída vá éi akhokho van ono. Tiyarafenui anunu ano éi má ban mino. ³¹ *Ineno. Éi amúbasí ukhareya mana afon iyampon kain nono. Kaúde vá mai iyampon avisá Yisasi ne vá teno. ³² *Béi ayafa vanta vantin béi nan Moéken Dan Bain Tiyarafenu Anin mino siyantín Bafan Tiyarafenu ano véin maman be anafu Devitin an den kiní uantanten mino. ³³ Kiní uantádan tin béi Isareri kékái kin bantin maen beni yafisin doran mano fara van oriyan ban ída kípanten mino.”

³⁴ Máa síkan Maria evaránen enisori inaemí, “Intesá uren ná mai ná afoká intéi vae séi ída vanta manté uno.”

³⁵ Máa síkan enisori ano evaránen béin tiamemí, “Kantá Aunan mano éimpin erivintin Moéken Dan Bain Tiyarafenui ákona ano éi má banten mino. Máan tukhantin mai iyampon ma ínainpá kainona ano kantasí ukhein bantan bantin ben nan Tiyarafenu Anin ne sinten mino. ³⁶ Afová ukha ono ei kéká pintena nanin Erisabetin nan ma a nanin báken iyampon ída kainten mino siyan mifo mai saréa véi afovaí uvein pimpá amú basí ukharéin dan manápá ifo afápá mana un kádan biyon orikhein afon iyampon mi kainten

* **1:15:** Nam 6:2-3 * **1:17:** Mar 3:1; 4:5-6; Mat 17:11-13 * **1:19:** Dan 8:16; 9:21 * **1:27:** Mat 1:16, 18

* **1:31:** Ais 7:14; Mat 1:21-23 * **1:32:** 2Sa 7:12, 13, 16; Ais 9:7 * **1:37:** Esé 18:14

mino. ³⁷ *Para vara seyo, minó danápin Tiyarafenu ano kanaí inten mino.”

³⁸ Maa síkan Maria evaránen temí, “Téi fura sé Bafani yoran nanin muno. Éi ma sítimeona mai veni anunu ifo vá maina sá dákó ino,” síkan enisori ano Marian me ampiren oren mino.

Maria Ano Ma Erisabetin Onano Van Beni Varufá Orein Baya Ino

³⁹ Manáa yamú orivin Maria e manten Yudiá barafá anu yompin bain barufin oriven ⁴⁰ Sekaraiyan amápin ódiven Erisabetin nan mo vayan ne sen mino. ⁴¹ Erisabetin nan ma vayan mino ma sein baya ma Erisabeti iniyain má ana ven amúpin ma vain iyampon mano kausen ódiven eraven iyain má Kantá Aunan mano véin aúpin bíken mino. ⁴² Maaan tikan béi avádóden oovaren temí, “Tiyarafenu ano éin kama uanten mi ena nanin kayo ano ma variyain mai avu moéken esantakhein avun éin amen mino. Maaan tukhein mi en amúpin ma vain mai iyampon má ano yere Tiyarafenui avu varen mino. ⁴³ Téi iyé bákun ná tenti Bafan anóe ano se varunafá eriyen nafino. ⁴⁴ Para vara seyo, éi ma sen nan bayan mino sená ma iniyaruna vá anan ten timúpin ma vain iyampon mano amusin iyáken kausen ódiven eraven en mino. ⁴⁵ Mai ná Bafan mano afoká inten mino siyáke mumunan e ompo mai vará éi amusin nono.”

Mariani Í Ino

⁴⁶ *Maa síkan Maria máa sen ídemí, “Ten tirá ano Bafan aví daní iyan

⁴⁷ ten taunan mano moéken Ten Tiyain Tiyarafenu van amusin iyákái

⁴⁸ séi veni yoran nanin mi váké paen danái vaken mifo véi sen nan iniren mi séin kamaen tarisari ein mi saréa fi inaimpáke safi vanasi ano sen nan Tiyarafenu ano kákan amusin amikhein nanin mino sinten mino.

⁴⁹ Tiyarafenu Minó Ákona Vain mano kákan danasintan ten turá afoká uren ten tiyaen mifo béin avisá kantasí ino.

⁵⁰ *Beni aránaópá ma orein nanin banta ma avábá uanté iyain mano sare ma vain nanin banta vá inaimpáke ma afoká inain nanin bantafin má dere máan mana en oriyen bantin

⁵¹ *béin ayan mano kákan dorarí ukhantín beyan nan ma kákan muno siren be aví ma yaní iyá inain mai nanin banta yo siantantín orera iyantín

⁵² *ákona kin kéká maman bara finí uren aví ma ída vain banta kayo maman daníen mino.

⁵³ *Nanante vanante ma iyá ein kayo véi kokhon kama yaná póké kanaí uanten kama yaná ma kokhon kain baré ein kéká do siantan para oríkan

⁵⁴⁻⁵⁵ * Abaraamun má be ana akhá bá ma avábá onté uno síkhá ein baya van béi ovaren me iniyáken bei Isareri nanin banta ayaen mino.”

⁵⁶ Maa sen ídaren béi Erisabetin má kanú manaú biyontá baren me afaen bei varufá oren mino.

Yoni Monó Non Péantan Banta Ma Kain Baya Ino

⁵⁷ Erisabetini iyampon kain damú afoká íkan béi afon iyampon kaen mino. ⁵⁸ Kaúdákan mana varu ráke nanin banta vá bei kékábá ano Tiyarafenu ma Erisabetin avábá uantein nan iniyáken béin má minó ano amusin en mino.

⁵⁹ *Amusin urákan dan manápá ifo afápá kanú manaú un kádan damú orivíkan mai iyampon au khaviyan be afóen avavaníden Sekaraiya ne seno van aviran eríkan ⁶⁰ be anóe ano, “Ída ino. Ben aví Yoni ne vá teno,” semí.

⁶¹ Maa síkan minó ano véin tiamemí, “Ída Yonin bí tetimpin bain mino.”

⁶² Maa siren betí ankan ayampó ana avavé nave iyáken be afóentá mai iyampon aví san inaen mino. ⁶³ Inaíkan béi vetí ankan nan mana vompon ma uvaran dóki

* **1:46:** 1Sa 2:1-10 * **1:50:** Íbo 103:13, 17 * **1:51:** 2Sa 22:28 * **1:52:** Yop 5:11; 12:19; Íbo 147:6 * **1:53:** Íbo 34:10 * **1:54-55:** Esé 17:7; Íbo 98:3; Mai 7:20 * **1:59:** Esé 17:12; Riv 12:3; Ruk 2:21

vare ereno síkan baren meran mairá bompon máa sen uvaremí, “Ma iyampon aví Yoni ino,” sirákan betí ankan anú duren kokhon ineine en mino. ⁶⁴ Máan tiyain má Sekaraiya oo saferen baya siyan Tiyarafenu aví daníen mino. ⁶⁵ Máan tiyain má beni varu ráke kayo ano mai yaná ma afoká ein ódaren akhokho van uren e siádan Yudiá barafin anufá ma vain baru-fimpá oreraen mino. ⁶⁶ Bafani ákona ano véin má bakan minó nanin banta ano mai vaya iníden anúden orera iyan temí, “Mai iyampon ínaimpá interená inten nafino.”

Sekaraiyani Í Ino

⁶⁷ Mai iyampon afóe Sekaraiyan aúpin Kantá Aunan mano vikavíkan sakhanampa vaya máa sen mino:

⁶⁸ * “Bafan avisá daní ó tifano. Béi Isareri nanin bantai Ayarafenu ino.

Béi ma varará eraven barará nanin banta kama uren ume fintena evaránen avíken mino.

⁶⁹ * Tetin evaránen tivirano van bei yoran banta Devitini kéká pintena béi mana ákona vanta maman dákó uáden mino.

⁷⁰ Pefá ma vei kantasí ukhein sakhanampa vanta kayo oorá ma sikhá einí en mino.

⁷¹ * Béi ma siyáken namuro ayan pintena vá tetin ma ará namu usintiyain kéká ayan pintena vá ma evaráne tivirano van ma sikhá ein mi yákó en mino.

⁷² * Tetin tináuyan arunan uren aya ukharen mino. Pefá ma manafin kasukhen ban kantasí ukhein baya ma veyantá tikharé ein mai van béi ovaren me inen mino.

⁷³ * Tetin tinafu Abaraamun avorá ma ayan befiyó uren ódino fura sé uno ma véi sikharé ein danái saréa setimpin afoká en mino.

⁷⁴ Ma mai ma véi iyáantan baré ein mino. Béi ano namuro ayan pintena setin tivían ádun kaintí báké ída feran beni yorarí ó tifanté uno.

⁷⁵ * Ena ena yamú béin avorá teti kantasí é puntáké ana vá bá tifano.

⁷⁶ * Mai van mi se sanin noe, ínaimpá éi nan Moéken Dan Bain Tiyarafenui sakhanampa vanta ino siyantiya éi ano Bafani an uante oreya aa uvisin nono.

⁷⁷ * Bei vanasi evaránen aviran nain afova amiresin betí ankani ume arúantanten mino.

⁷⁸ * Para vara seyo, Tiyarafenu ano vei sarisarifói máan tinten mino. Mai maen Yisasi ano kakhan an den Tiyarafenu vaípáké teti vaípá eranten mino.

⁷⁹ * Minó nanin banta ma anukheimpin báken ma umefin purein an dakhein mai on mano kakhaantantin ará kusin aintá oró tifanté uno.”

⁸⁰ Ínaimpá mai iyampon e anoní íkan Kantá Aunan mano véin aúpin bikhavíkan kámá barafá o van damú afoká íkan e unen Isareri nanin bantafin dákó eren mino.

2

Yisasin Ma Kaein Baya Ino (Matiu 1:18-25)

¹ Sisa Okastasi ano ma Romu kamanini ánon bantai ma ukhein pimpá Romu kamanin mano ma yafikein barafin ma vain nanin banta minó avisá bompompin uvarano siren ákona vaya siádan oreraen mino. ² Mai yaná afoká ein mai Kuiriniasi ma Sirian barafin kamaniní ukharé ein damúi esé aráien afoká en mino.* ³ Máa siyaimpin kamani ano aví barano van minó nanin banta ano evaránen betí varu anará oreraen mino.

⁴ Orera iyákan Devitini kéká pintena vantán Yosepi maen Kariri varafá Nasaretí barurá baren e mantén Devitini varu anará Yudiá barafá Betariamú oriyáken ⁵ ben ma varano van tiantan ma váein arinta Maria amúbá baré íkan kamani ano aví barano van avíaren oren mino. ⁶ Békanan o varéin Maria inamun nan iniyaimpin ⁷ miyaní ma uren baran namun bíkakhen ída afokhan baimpin me khoen kao amápin óden mun esékena afon iyampon kauren davaráe yo úkuren kaoin yunan nan dókifin kaen mino.

* **1:68:** Íbo 72:18 * **1:69:** Íbo 18:2 * **1:71:** Íbo 106:10 * **1:72:** Esé 17:7; Íbo 105:8-9 * **1:73:** Esé 22:16-17

* **1:75:** Tai 2:12-14 * **1:76:** Ais 40:3 * **1:77:** Yer 31:34 * **1:78:** Ais 60:1-2 * **1:79:** Ais 9:2 * **2:2:**

Yudiá baru maen Siriá barafin mi van mino.

Sipisipirá Dafisin Banta Kéká Bá Enisori Kayo Vái Vaya Ino

⁸ Mai inuran maen mai varu akhempá manáa sipisipirá dafisin banta kéká ano sipisipirá dafíkaré íkan ⁹ Bafani enisori ano veti vaintá eriyain má Bafani kakhan mano vetin eúkuádan akhokho van en mino. ¹⁰ Akhokho van iyain má enisori ano vetí ankan máa sen tiamemí, “Tiretí ankan ída vá akhokho van ono. Téj kama vaya varé tiretin tiameno van mi eré umpo mai kama vaya ma minó nanin banta ano ma ininten moéken amusin inten mino. ¹¹ Tare inuran manan Devitini varufin mana nanin mano afon iyampon kaein mai iyampon manon tiretin ayainten mino. Béi Bafan mi vákan Tiyarafenu ano ven nan mi minó nanin banta evaránen avirante ne sikharen mino. ¹² Máan tukhantiya ma yanákái véin o ódeya afováin nono. O onesin maen davaráe yo úkuren kaoui yunan nan dókifin asédantin banten mino.”

¹³ Máan ma siyain má manádá ainen inaru fáké iyankaforen enisori kéká bá ano mai enisori vaintá afoká uven Tiyarafenu aví daníen máa semí,

¹⁴ * “Dan uró bain Tiyarafenu avisá daní ono.

Be ma aní ukhein nanin banta ano vá ará kusin masá barará bano.”

¹⁵ Máan turen mai enisori kéká ano ma inarufá evaránen ódivíkan maen sipisipirá ma yafisin banta kéká ano vetiyan ten oreraemí, “Eritifé ma ma Bafan mano ma setin tisimein baya ánaín dakhafé mai yaná ma Betariamú barufin ma afoká ukhein o onátifano,” siren ¹⁶ betí ankan ainen oriven Yosepin nú Maria nú mo yosiádaren onákan mai iyampon kaoui yunan nan dókifin asédan bakharen mino. ¹⁷ Bakharé íkan betí ankan mai iyampon oniyáken enisori ano ma vetin tiamikhá ein baya sian páman íkan ¹⁸ mai vaya ma inein kéká ano kokhon ineine iyan maen ¹⁹ * Maria mai vaya kayo inian be aúpin kaúden iniyan baren mino. ²⁰ Máan turen sipisipirá dafisin banta kéká ano evaránen oriyáken mai ma enisori ano siamin iniren

ma onein dana san Tiyarafenu aví daní iyáken amusin uanten mino.

Yisasin Ma Au Kharen Bafan Amein Baya Ino

²¹ * Dan manápá ifo afápa kanú manaú un kádan damú orivíkan mai iyampon au khaiyáken pefá ma ve anóen arápin ída afoká ukhan ma enisori ano ve anóen tiamikhá einíen Yisasin bí amen mino.

²² * Mosesini man baya ano ma sikhá ein damú afoká íkan Yosepin nú Maria nú ano Bafan avorá avusesein doran dóan kípiyan mai iyampon Bafan mo ameno van békanaan Yerusaremí barufá aviren oren mino. ²³ Mai ma orein mai man baya ano máa sikharen mino, “Mana nanin mano ma esékana ain iyampon ma kaúden maen ná mai iyampon Bafan aníen ná eni kéká pinte ino siren ná mai iyampon mo aminó.”

Eks 13:2, 12

²⁴ Amiyan kankanan kukhofá nun nafi kukhun nafi varen mo íkun uan ameno van Yerusaremí monó namumpin oren mino.

Riv 12:8

Simioni Ano Ma Yisasin Avu Amein Baya Ino

²⁵ Maí damú mana Simionin ne sin banta Yerusaremí báken mumunampin béi funtákan Kantá Aunan mano ven aúpin bíkakkan Isareri nanin banta ma ará kusiantáden ma evaránen aviran nain banta onano van ave ukharen mino. ²⁶ Kantá Aunan mano véin pefá tiamemí, “Éi ída furin para vasin mi Bafani vanasi ma evaránen aviran nain banta yákó intiya onan nono.” ²⁷ Bafani man baya ano ma sikheiníen Yosepin nú Maria nú ano Yisasin aviren monó namumpin ódiyákan Kantá Aunan mano Simionin aviren maifin múdan ²⁸ mai iyampon un daumaren Tiyarafenu aví daní iyáken máa semí,

²⁹ “Bafan noe, fefá éi ma siáden nan baré einí eya

ei yoran banta saréa áesin ná ará kusin masá orino.

³⁰ * Banasi ma ayaino van ma aní ukhá eona mai inka se suu fóké oné uno.

* **2:14:** Ruk 19:38 * **2:19:** Ruk 2:51 * **2:21:** Ruk 1:31 * **2:22:** Riv 12:1-8 * **2:30:** Ais 52:10; Ruk 3:6; Tai 2:11 * **2:32:** Ais 42:6; 49:6; 52:10

³¹ Mai minó nanin banta ano onano van utaan kaukare ono.
³² *Mai véi mana on mi vain ena anan nanin banta kakhaan táden maen Eni Isareri kéká kákan bí aminten mino.”
³³ Máa síkan mai iyampon nan ma Simioni sein baya van be anóe afóe ano anú diyan kokhon ineine iyákan
³⁴ *Simioni vetin avu uantáden mai iyampon anóe Marian máa sen tiamemí, “Tiyarafenu ano ma iyampon nan mi siyan béi anon kokhon Isareri nanin bantai eraven ankamin má ena kokhon Isareri nanin bantai e mantan mái mana aní banta vantin banasi ano véin oyampá baya sinten mino. ³⁵ Máa siyantín béi ano vanasii aúpa ineine maman dákó intin éin dere vaenati ano arápin kéká inten mino.”

Sakhanampa Nanin Ana Ano Ma Yisisin Nan Tiyarafenu Tusu Siantein Baya Ino

³⁶ Asani anan pinte Fanuerin araun mana sakhanampa nanin Ana varen afovaí ukharen mino. Béi ve avafun má dan manápá ifo afápá kan un kádan oranará baré íkan ³⁷ be avafu fúbin eiti fo (84) oranará baré báken ena ena inuran má bayan má ída monó namun baru me ampiyan maen manáa yamú dunan auraren Tiyarafenu amúkiyáken beni yoran pákaren baren mino. ³⁸ Maí damú ana véi má dere vetíi áde eriven Tiyarafenu susu siantian Yerusaremí nanin banta ma Tiyarafenu ano evaráné aviranté uno síkhan ma afoká intí onano van ma iyá ein nanin banta kayofin mai iyamponi veya sian dákóen mino.

Yosepin Má Be Aná Bá Yisasi Má Ma Evaránen Nasaretí Barufá Orein Baya Ino

³⁹ *Bafani man baya ano ma síkharé einíen Yosepin nú Maria nú ano mai yoran dóan kíparen bei varufá Karirí barafin Nasaretí oren mino. ⁴⁰ O vákan mai iyampon ákona vá e anoní iyákan Tiyarafenui avábá ano ve má bakan kama ineine ano véimpin bíken mino.

Yisasi Ma Tiyán Míkan Mifo Sirantan Kan Orun Kádan (12) Oranaí Uven Ma

Yerusaremí Monó Namumpin O Vá Ein Baya Ino

⁴¹ *Minó oranafin ma Avo Uantan Dunan Nan Damú ma erin maen be anóe afóe Yerusaremí oriyaren mino. ⁴² Tiyán míkan mifo sirantan kan orun kádan (12) oranaí Yisasi ukharen betin anóe afóen má anafu aráoni avúavá ánain dakhafen Avo Uantan Dunan Nan Damú oren mino. ⁴³ Orikhá íkan Avo Uantan Dunan ma Nan Damú kípvákan Yisasi ma Yerusaremí bain ída afová en onanton be anóe afóe evaránen barufá oren mino. ⁴⁴ Oriyáken be anóe afóe ma inein mano Yisasin nan be arona kayo vái oriyan mino ana siren ída ve nan dosin mana vayan orivíkan ínaimpá be nan mo yose me yose iyan mana varuráké ma orikharé einta safi arona kayora safi me inae inae en mino. ⁴⁵ Békanan dosivaen ída onarí iyaimpin evaránen Yerusaremí mo yoseno van oren mino. ⁴⁶ Békanan dosiyan kanú manaú damú orivíkan béi monó namuni yafufin arú kayo aúbaná kumanten betí ankan ma sein baya iniyáken manáa veya evaránen betimpin inauren iniyán baré íkan o onen mino. ⁴⁷ Beni veya ma inein banta kéká ano veni afova vá inain baya vá ma evaránen tiyain ma san anúden oreraen mino. ⁴⁸ Békanan ma Yisasin o onen kákantá anú diyáken be anóe máa sen béin tiamemí, “Tanin noe, éi fará ma avúavá afóe rašan usinténar á berasan tirá ano uman diyasá éin nan dosiyare rafuno.”

⁴⁹ Máa síkan béi evaránen békanan tiamemí, “Pará te nan dosé no vae séi se sífóen* amái vanté umpo ídá tiré kanan afová ukhe fonó.” ⁵⁰ Máa síkan mai ma véi siyain baya ana ída vékanan afová en mino.

⁵¹ *Máan turen ben avíaren betí evaránen Nasaretí oren o váken be anóe afóe ma sein baya máa iniren oo yaiyiyákan inká Yisasi ma sein baya máa ve anóe ano maman aúká kaúden pákaan ákonaen mino. ⁵² *Máan tiyáken Yisasi e anoní íkan beni afova ano mo kákaní íkan Tiyarafenu vá minó barará nanin banta vá ano moéken béin nan anununen mino.

* **2:34:** Ais 8:14; Mat 21:42; 1Pi 2:8 * **2:39:** Mat 2:23 * **2:41:** Eks 12:24-27; 23:14-17; Diu 16:1-8 * **2:49:** Manáa Tiyarafenui vompon dókifin ena asotúin baya máa síkhen mino, “se sífóeni yoran mi varanté umpo...”
 * **2:51:** Ruk 2:19 * **2:52:** 1Sa 2:26; Pro 3:4

3

Monó Non Péantan Banta Yoni Ano Ma Yisasini Aa Uvíden Puntáantein Baya Ino (Matu 3:1-12; Maki 1:2-8; Yoni 1:19-28)

¹ Sisa Taiberiasi ano ma Romú barafá ma kiní ukhan tiyan míkan mifo sirantan dan manápá orun kádan (15) oranaí ma iyákan inká Pontiasi Pairoti ano Yudiá barafá kamaniní ukhein damú anan Eroti Antipasi ano Karirí barafá kamaniní ukhan ben afá Firipi ano Ituriá bá Tarakonitisi bara vái yafisiní in mi inká Risaniasi ano Abiriní barafá dafíkan ² ma ukhein damú anan Aanasin nú Kaiafasin nú ano monó ánon banta kékái ánon bantá kaní ukhan maen Sekaraiyan anin Yoni ano vanta ída van kámá barafá bakan Tiyaarafenui vaya ano véimpin eren mino. ³*Ervíkan béi Yodení non akhempá ma vain baru kayo fimpá oriven banasi siamemí, “Ará baédesin Tiyaarafenu ano siretí ankani ume ampiantá dantiya vá non barano.” ⁴Sakhanampa vanta Aisaiya ano máa sen bompon uvantaremí, “Kámá bara fáké maña vanta ano oovaren máa sinten mino,

‘Bafani aa uvídeya funtarano.

⁵ Masisí ma ukheimpin bara kaesin édavintiya

anuyon kayo úan avai éya

aa ma koren ukhein maman puntareya

namu ma ukheimpin kama uresin ná

⁶ Tiyaarafenu ano ma evaránen minó nanin banta ma aviran dorarí ma inain mai minó anon onanten mino.’” *Ais 40:3-5*

⁷ *Máa siyákan kokhon nanin banta ano Yoni vaintá monó non péantano van eríkan betí ankan máa sen tiamemí, “Eeeee, tirití ankan namu osafáe akhafana ompo iye anó tiritin afova amikhayá Tiyaarafenui aran naná ma siretin amaniná ereno van iyain nan karan orono van iya rafono. ⁸ *Tirití ankan ma fura seya ará baédante vá beni aran ná iran nompo siretí ída vá ‘teti Abaraamun akhafana uno’ seno. Téi siretí ankan tiamé uno. Tiyaarafenu ano kanaíen ma onámaná kayo sintin Abaraamun

akhafanaí inten mifo ⁹ *ída ma kamaen aran iran nain daa ana sikaren ira sarano van Tiyaarafenu ano fefá tasume anafin kain ban mino.”

¹⁰ Máa síkan banasi ano Yonini vaya iniren máa sen béin inaemí, “Mai setí náisá onte rafuno.”

¹¹ Máa síkan Yoni evaránen betí ankan tiamemí, “Kankanan au anamun ma yákanona ano ída ma yákan nain ná mana au anamun amesin ná dunan ma yákanona vá dere ano máan mana vá ono.”

¹² *Takisi varan banta kéká ano yere non barano van erikharen betí máa sen inaemí, “Aru soe, setí intesá ótifante rafuno.”

¹³ Máa síkan Yoni evaránen betin tiamemí, “Tirití ankan ma takisi variyákeya vá kamani ano ma sin nain mai máa ana vá bareya ída vá mairá manáa mo asotú ono.” ¹⁴ Máa síkan manáa aruvin banta kéká bá ano yere Yonin inaemí, “Teti ankan náisá ótifante rafuno.”

Síkan Yoni vetin tiamemí, “Tirití ankan ída vá banasi namu uante vetí moní máká tire umoyan bareya ída vá betí ankan kampun kó tiantáde moní bare vá kamani ano ma miyan amin nain mai máa moní ana vá amusin iya varano.

¹⁵ Máa síkan banasi ano Yonin oniyáken betí ankan kokhon ineine uren be nan mai ma Tiyaarafenu ano ma varará nanin banta evaránen aviranten mino ma sikhareé ein mai vanta ino sen inen mino. ¹⁶ *Máan ineine iyákan Yoni evaránen betí ankan máa sen tiamemí, “Téi non máa fói siretin péantiya umpo sen toyampá ma eriyaini ákona ano senti ákona moéken esantakhá téi ída funtákeruna ída kanaí é matimé beni arantan anumun anan útufonté umpo véi Kantá Aunan má irafó báí siretin monó non péantanten mino. ¹⁷ Kákan poki ma ayampin pákakhein banta an daven béi ereno van iyain ma eriven maen bei uviti namun pintena aitan má asuí ma ukhein ma yo ínáan karúdaren uviti o éke e éke uren bei uviti namumpin kauren aitan má asuí ma ukhein má ída yusimin irafin taman kaurinten mino.” ¹⁸ Yoni ano kokhon baya kayofó banasi ará mantano

* **3:3:** Apo 13:24 * **3:7:** Mat 12:34; 23:33 * **3:8:** Yon 8:33, 39 * **3:9:** Mat 7:19 * **3:12:** Ruk 7:29 * **3:16:** Apo 13:25

van Tiya rafenui kama vava siamiyaren mino.

Eroti Ano Ma Yonin Karavusifin Kaein Baya Ino

¹⁹ *Eroti ma kamanini ukhen maen be aváen aná Erodiasin ma yafein má ena kokhon aauí ma ukhá ein masan Yoni ano vanasifin páman uren asirákan iniren
²⁰ Eroti moéken ena vá namu avúavasien Yonin pákaan karavusifin kaen mino.

Yoni Ano Ma Yisasin Monó Non Péantein Baya Ino

(Matiu 3:13-17; Maki 1:9-11)

²¹ Kokhon nanin banta ma non bariyákan Yisasin má dere non mamaren amúkiyain má inaru ona yivíkan ²² *Kantá Aunan mano kukhofá nun an daven ámaren Yisasin ánotá e yomaniyain má inaru fáké máa sen oovaren temí, “Éi sen tanin uron mono. Téi éin nan moéké tinunu ukhé éi nan timusin iyá uno.”

Yisasin Anafu Yan Ma Ayun Man En Erikheí Pákena Vaya Ino

(Matiu 1:1-17)

²³ *Yisasi ma teti (30) oranaí ma uven bei monó doran arai íkan banasi ano ma inein mano véi nan Yosepin anin mino sen iniyákan

Yosepi mai véi Erin anin mino.

²⁴ Eri maen Matatin anin bákan Matati maen Rivain anin bákan Rivai maen Merikin anin bákan Meriki maen Yanain anin bákan Yanai maen Yosepin anin mino.

²⁵ Yosepi maen Matatiasin anin bákan Matatiasi maen Amosin anin bákan Amosi maen Naumin anin bákan Naumi maen Esirin anin bákan Esiri maen Nakhain anin mino.

²⁶ Nakhai maen Matatin anin bákan Mati maen Matatiasin anin bákan Matatiasi maen Semenin anin bákan Semeni maen Yosekin anin bákan Yoseki maen Yodan anin mino.

²⁷ Yoda maen Yoananin anin bákan Yoanani maen Resan anin bákan Resa maen Serubaberin anin bákan Serubaberi maen Siaritierin anin bákan Siaritieri maen Nerin anin mino. ²⁸ Neri maen Merikin anin bákan Meriki maen Adin anin bákan

Adi maen Kosamun anin bákan Kosamu maen Erimadamun anin bákan Erimadamu maen Erin anin mino.

²⁹ Eri maen Yosuan anin bákan Yosua maen Eriesan anin bákan Eriesa maen Yorimin anin bákan Yorimi maen Matatin anin bákan Matati maen Rivain anin bákan maen

³⁰ Rivai maen Simionin anin bákan Simioni maen Yudan anin bákan Yuda maen Yosepin anin bákan

Yosepi maen Yonamin anin bákan Yonami maen Eriakimin anin mino.

³¹ Eriakimi maen Mereanin anin bákan Mereani maen Menan anin bákan Mena maen Matatan anin bákan Matata maen Netanin anin bákan Netani maen Devitin anin mino.

³² *Deviti maen Yesin anin bákan Yesi maen Obetin anin bákan Obeti maen Boasin anin bákan Boasi maen Saromonin anin bákan Saromoni maen Nasonin anin mino.

³³ Nasoni maen Aminadapin anin bákan Aminadapi maen Ramun anin bákan

Ramu maen Arinin anin bákan Arini maen Esaronin anin bákan Esaroni maen Peresin anin bákan Peresi maen Yudan anin mino.

³⁴ Yuda maen Yekopun anin bákan Yekopu maen Aisakin anin bákan

Aisaki maen Abaraamun anin bákan Abaraamu maen Teran anin bákan Tera maen Nahon anin mino.

³⁵ Nao maen Serukun anin bákan Seruku maen Reun anin bákan Reu maen Perekin anin bákan Pereki maen Seranin anin mino.

³⁶ *Serani maen Kainanin anin bákan Kainani maen Apaksatin anin bákan Apaksati maen Siemin anin bákan Siemi maen Noan anin bákan Noa maen Ramekin anin mino.

³⁷ Rameki maen Metuseran anin bákan Metusera maen Inokin anin bákan Inoki maen Yaretin anin bákan Yareti maen Maararerin anin bákan Maarareri maen Kenanin anin mino.

³⁸ *Kenani maen Enosin anin bákan Enosi maen Setin anin bákan Seti maen Adamun anin bákan Adamu maen Tiya rafenu anin mino.

* **3:19:** Mat 14:3-4; Mak 6:17-18 * **3:22:** Yon 1:32 * **3:23:** Ruk 4:22; Yon 6:42 * **3:32:** Rut 4:17-22 * **3:36:** Esé 11:10-26 * **3:38:** Esé 4:25-26

4

*Ban Anon Mano Ma Yisasin Akhenóka Ein Baya Ino**(Matiu 4:1-11; Maki 1:12-13)*

¹ Yisasi Yodení non me ampiren oríkan Kantá Aunan mano véin aúpin bíkaaren aviren kámá barafá oríkan ² Yisasi foti (40) yamú dunan ída nanton arafan bákan Ban Anon mano véin akhenóka uan onen mino.

³ Ban Anon mano máa sen béin tiamemí, “Éi fura se Tiyarafenu Anin ma vanteya ma onámaná tesin ná beretií ino.”

⁴ Máa síkan Yisasi véin evaránen tiamemí, “Tiyarafenui vompon dóki ano máa sikhen mino, ‘Banasi ano veretirá ana ída fara ayun ban ákona varé iyan mino.’” *Diu 8:3*

⁵ Máa síkan Ban Anon mano Yisasin do aviren dan bain anurá mun kaúden minó ákona vara kayo ma ma varará bain aníen mino. ⁶ Aní iyáken Ban Anon mano véin máa sen tiamemí, “Ma vara kayo éin amiré éin ákona amé kuyá dafisiyáke kákan bí baran nono. Minó danasinta sen tinan bain téi ma sinunu onunan amenté uno. ⁷ Amenté umpo aron durafúde matimeya ma sentá monó tiresí maé mai yanasinta minó éin amenté uno.”

⁸ Máa síkan Yisasi evaránen béin tiamemí, “Tiyarafenui vompon dóki ano máa sikhen mino, ‘Ei Bafan Tiyarafenuaná ana vá monó tiante vá beya aránaópá ana vá bano.’” *Diu 6:13-14*

⁹ Máa síkan Ban Anon mano Yisasin do aviren Yerusaremí monó namun amontá mun kaúden béin máa sen tiamemí, “Éi fura se Tiyarafenu Anin ma vanteya ma má amon táké káuseya aravono. ¹⁰ Mai fara vara seyo, Tiyarafenui vompon dóki ano máa sikhen mino,

“ ‘Béi vei enisori kéká tiantantin éintá dafian ákona inten mino.’”

¹¹ Ákonaen entá dafíben ayan dóki uvídatiya

mai yaró aravesin onámaná ano ída arantampin un peranten mino.’”

Íbo 91:11-12

¹² *Máa síkan Yisasi evaránen béin tiamemí, “Tiyarafenui vompon dóki ano

máa sikhen mino, ‘Éi ída vá ei Bafan Tiyarafenu akhenóka ono.’” *Diu 6:16*

¹³ *Ban Anon mano ma Yisasin akhenóka uan kípáren me ifá en orein ená damusan o ave en mino.

Yisasi Ma Karirifá Monó Doran Mo Araí Ein Baya Ino

(Matiu 4:12-17; Maki 1:14-15)

¹⁴ Kantá Aunani ákonará Yisasi evaránen Karirí barafá oríkan mai varafin ma vain nanin banta ano véi ma o vain baya iniren afová en oreraen mino. ¹⁵ Béi monó átaru namu kayofin ódiven monó baya siamiyákan banasi ano iniren ben aví daníen mino.

Nasaretí Nanin Banta Ano Ma Yisasin Oyan Amein Baya Ino

(Matiu 13:53-58; Maki 6:1-6)

¹⁶ Béi ma araraká baren e anoní ukhaein mai Nasaretí barufá orikharen bei avúavá baren Sabati yamú monó átaru namumpin ódiven monó bompon dankafono van orun mantavíkan ¹⁷ sakanampa vanta Aisaiyani vompon dóki varen mo amíkan béi kaváden máa ma sikhein baya yankafen mino.

¹⁸ “Minó daná ma ída vain kéká Bafan mano vei kama vava siamino van téin aní uran Beni Kantá Aunan mano sen má ban mino.

Karavusifin ma vain nanin banta siamékun karavusi útufiyantin auu ma yufúkukhein auu kama iyantin

ena kéká ano ma vetí ankan maman bararasí uren ma uman amiyain má kípantin ino van mi

téin tisintá eré uno. ¹⁹ Bafan mano ma vei vanasi kama inain damú inka afoká en mino sen tian dákó ino van mi véi sen tisintá eré uno.” *Ais 61:1-2*

²⁰ Máa siren Yisasi vompon dóki evaránen dádaeren mai vompon dókirá ma yafisin banta amiren kumamíkan minó nanin banta ano yovariyáden béin mana urú onen mino. ²¹ Oniyákan béi máa sen betí ankan tiamemí, “Tiyarafenui vompon dóki ano ma síkhá ein bayan tiretin átaren mano inka inin mai yaná taréa afóken mino.”

* **4:12:** 1Ko 10:9 * **4:13:** Ibu 2:18; 4:15 * **4:22:** Ruk 3:23; Yon 6:42

²² *Máa síkan betí ankan Yisasin aví daní iyáken mai ma kama vava kayo ma ven oo fenté eriyain nan kokhon ineine en orera iyáken betí máa semí, “Ma vanta Yosepin anin mi vá tetí afová ukhé umpo intesá uren ná ma kama vava kayo siyan nafino.”

²³ Máa síkan Yisasi máa sen tiamemí, “Minó nanin banta ano ma siyain baya ma mádeya mae sireti se nan, ‘Ayofan banta oe, éi eyantá e au kama ono’ seya sisimiyákeya ‘éi ma Kapeniamú ma vare-ona avúavá ma setí inikheruna mai ei varu anará barano van muno.’”

²⁴ *Máa siren béi evaránen betí tiamemí, “Téi fura uron mi siré tirétin tiamé umpo mana sakhanampa vantai varu rákena nanin banta ano ída ven avaya iné iyan mino. ²⁵ *Téi fura siré tiretí ankan tiamé uno fefá Iraiyaní yamú be avafun ná púbíkan kokhon baré nanin kéká bákán inarurá á pákaran kanú manaú orana ifo yan manápá ifo afápá mana un kádan biyontá ída á dákan kákan anan afoká íkan ²⁶ *Tiyarafenu ano Iraiyan ída Isarerí baré kéká baípa tiantan oren mifo véin Serefatí barufá Saidonii varafin mana ve avafu fefá púkein baré nanin baípaí siantan oren mino. ²⁷ *Máan tukharéin inká ena sakhanampa vanta Iraisá ma varé ein damú ana amon dana aí bain kéká Isarerifin kokhon bíkakhá ein pintena mana vanta au ída evaránen kamaen mifo Siriá banta Namanin beyaká anan aya íkan amon dana aí kípen mino.”

²⁸ Máa síkan monó átaru namumpin ma varé ein nanin banta kayo ano mai vava iniren moéken aran nan en mino. ²⁹ Aran nan uaren mai varu anu yontá baré íkan Yisasin do siantan mai varu finté ekhuven aravíkan béin ayafin avékaan karúdano van do yarifen oren mino. ³⁰ Darifen oriyain má Yisasi mai nanin banta aúbaná oriaren mai aya oyi ráke me ampiren oren mino.

Yisasi Ma Namu Aunan Do Siantein Baya Ino
(Maki 1:21-28)

* 4:24: Yon 4:44 * 4:25: 1Ki 17:1, 7 * 4:26: 1Ki 17:8-16 * 4:27: 2Ki 5:1-14 * 4:32: Mat 7:28-29
* 4:41: Mat 8:29; Mak 3:11-12

³¹ Karirí barafá Kapeniamú barurá béi orun baren Sabati yamú monó baya aráien banasi siamen mino.

³² *Tiamiyákan béi ma siyain monó baya ano ákona vá eriyákan minó nanin banta ano iníkan aví bain banta ano ma siyainí iyaimpin minó ano anúden oreraen mino.

³³ Maí damú mana namu aunan mano fákakhein banta ano mai monó átaru namumpin un baren avádóden bádiyan máa semí, ³⁴ “Nasaretíke Yisasi oe, éi ída vá tétin namu ono! Tetí éin afová ukhé uno. Éi Tiyarafenui mana kanta suron mono.”

³⁵ Máa síkan Yisasi mai namu aunan máa sen asemí, “E avaya fakareya mai vanta aú pinté entavono,” síkan namu aunan mano mai nanin banta avorá mai vanta maman barará aséden béin me ampiren oriven ída uman amen mino.

³⁶ Máan tíkan minó nanin banta ano anú duren betiyan ten oreraemí, “Aii! Ma náí vayá tiyan nafino. Ákona uron ukhein bayafó béi síkan namu aunan kayo ano ven oo yaiyen oriyan mino.” ³⁷ Máan turákan mai ma Yisasi varein avúavá baya ano ainen minó mai varafin oreraen mino.

Yisasi Ma Pitan Aná Anóen Ayofein Baya Ino

(Matiu 8:14-15; Maki 1:29-31)

³⁸ Yisasi mai monó átaru namun me ampiren Saimonin amápin oríkan Saimonin aná anóen aufá irakharo uaren aí uádan bakharéin béin ayaino van betí ankan Yisasin inaen mino. ³⁹ Ina íkan Yisasi ádé o mantaven aí ano mai nanin me ampiren orino van ákonaen baya síkan aí orivin mai nanin mano manadá orun mantaven betí yunan taren mino.

Yisasi Ma Kokhon Nanin Banta Ayofein Baya Ino

(Matiu 8:16-17; Maki 1:32-34)

⁴⁰ Áau ma yo úbefen eravíkan banasi ano ara ara aí ma vain kéká Yisasi vaintá aviren ere ere íkan béi mana mana aurá ayan kaúantádan betí ankan evaránen kamaen mino. ⁴¹ *Máan turen Yisasi namu aunan kayo yo siantan kokhon nanin banta ma me ampiren oriyáken máa sen oovaren mí, “Éi Tiyarafenu Anin mono.”

Máa síkan béi vetin asiren baya ída sino van airo ananí uanten mifo mai fara va ino varará nanin banta ma evaránen avirano van ma Tiyarafenu ano aní ukharé ein mai vantán béi vákan betí afová ukhan mino.

Yisasi Ma Ena Varu Kayo Fimpá Monó Dorarí Ein Baya Ino (Maki 1:35-39)

⁴² Pe ákura suron Yisasi mai varu me ampíren mana vanta ída van akhempá oren mino. Orivíkan banasi ano ven nan dosen oren o ódaren betín ída véi me ampíren orino siren ayópá ono van en mino. ⁴³ Ayópá ono van íkan béi máa sen betín tiamemí, “Téi ena varufimpá basá orivé Tiyarafenui yafisin pintena kama vava minó nanin bantafin tiamino van mi véi sen tisintá erikhé uno.” ⁴⁴ *Máa siren Yudiá barafá ma minó barurá bain monó átaru namun kayo fimpá oriven monó baya vanasi siamen mino.

5

Yisasi Ma Pitan Nan Base Karúðare Noyana Fákano Sein Baya Ino (Matiu 4:18-22; Maki 1:16-20)

¹ *Maná damú Yisasi Kenesaretí non akhempá mantakharé íkan* kokhon nanin banta ano véi vaintá ere ere uven Tiyarafenui vava siamintin ineno van béin maman aúban kaúden iyen eúken mino. ² Iyen eúkukhan Yisasi mo onákan kankanan noyana arin boti non akhempá bákán mai voti kanampin ma noyana ariyain banta kéká ano vase sesé iyan mino. ³ Máan tiyákan Yisasi mana Saimonini votifin ódiven béin tiamin mai voti avékan manáa nompín orivín mai votifin kumanten monó baya vanasi siamen mino.

⁴ Monó baya sian kíparen ínaimpáké béi Saimonin máa sen tiamemí, “Ma voti vareya mesan non aúbaná oriveya vase karúdesin nompín aravintiya noyana fákano.”

⁵ *Máa síkan Saimoni evaránen temí, “Bafan noe, inuran tákéi o vase karúde

erékun me kakhá ída mana vá noyana fáké umpo en oo yayié base karúðanté uno.”

⁶ Máa siren base karúðarákan noyana ano mai vase víkaaren dákaríen mino. ⁷ Base víkaaren dákarí iyaimpin ena votifin ma varé ein kéká arákan erin mai votifin má noyana yaiman kaúdan mikánan boti víkaaren nompín orun peraríen mino.

⁸ Saimon Pita ma mai yaná oniyáken maen Yisasin arantampin mo aron kanan durafúden mátimen temí, “Bafan noe, séi ume vanta umpo sen ampíreya orono.”

⁹ Máa siren béin má be arona vanta kayo vá ano mai noyana kayo oniyáken moékentá anúden orera íkan ¹⁰ Sebetin anin kan Saimoni arona Yemisin nú Yonin nú bá anú diyákan Yisasi máa sen Saimonin tiamemí, “Ída vá akhokho van ono. Tare ráké arái eya éi vanasi avían timin nono.” ¹¹ *Máa siran betí ankan mai voti vá mai yanasinta vá baren non akhempá me khaúden Yisasin bákuren oren mino.

Amon Dana Aí Bain Banta Ma Yisasi Ayofein Baya Ino (Matiu 8:1-4; Maki 1:40-45)

¹² Mana varurá amon dana aí bain banta varen Yisasin onen barará amupáké baven berai semí, “Bafan noe, éi ma anunu iyanteya séin tu kama usintano.”

¹³ Máa síkan Yisasi ayan dan orin béin au aruviyan máa sen tiamemí, “Téi sinunu iyá umpo éi kama ono,” síkan mai vantái amon dana aí ma varé ein manádá kípen mino.

¹⁴ *Mai vanta ma Yisasi ayofaren maen ákonaen tiamemí, “Ma avúavá ma en aurá afoká ein mai ída vá mana vanta siameno. Mosesi ma sikhá einí eya vá monó doran banta avorá e au mo aní iyákeya vá e aí ma kípein nan Tiyarafenu íkun uan amesin ná minó nanin banta ano eni aí kípen mino sen afová ino.

¹⁵ Máa síkan mifo Yisasi ma yoriyain avúavá baya van e siádan minó barufá ainen orera íkan kokhon nanin banta ano veni vava iniyantin betí ankaní aí kípaantano van ere ere en mino. ¹⁶ Máan tiyákan kokhon damú Yisasi vanasi

* 4:44: Mat 4:23 * 5:1: Mat 13:1-2; Mak 3:9-10 * 5:1: Mai Kenesaretí non má Kariri non má mana non mino. Kan bí ifo mana non mana ino. * 5:5: Yon 21:3-8 * 5:11: Mat 19:27 * 5:14: Riv 14:1-32

me ampiren banta ídavan afokhampá amúkono van beyaká oriyaren mino.

Ai Ayan Púká Ein Banta Ma Yisasi Ayofein Baya Ino

(Matiu 9:1-8; Maki 2:1-12)

¹⁷ Maná damú Yisasi monó baya siamiyákan Karirí bara fáke safi Yudiá bara fáke safi inká Yerusaremí baru fáke safi Farasisi kayo vá man baya ma afova ukhein banta kéká bá kumantákan Bafani ákona ano Yisasimpin bíkavíkan aí nanin banta ayofen mino. ¹⁸ Yisasi ayofiyan mápin bakan mana ayan arantan púkein banta kúkútafin kaúden manáa vanta kayo ano veni adé ka ono siren daiyó en eren mino. ¹⁹ Mai kúkúta yaiyó en eríkan banasi víkaaren ída afokhaní ukhan me khoen mai kúkúta yaiyen má daró ódiven má amon káponaren mai kúkútará anan damuren kain Yisasi vaintá araven mino.

²⁰ *Máan tíkan Yisasi vetí ankani mumunan ódaren máa semí, “Tirona oe, eni ume inka ampianté uno.”

²¹ Máa síkan man baya afová ukhein kéká bá Farasisi kayo vá ano vetiyan ten oreraemí, “Ma vanta ano Tiyarafenui varun bariyan mifo véi iye fino. Ída mana vanta ano kanaíen ume ampiantan-ten mifo Tiyarafenu veyafin mi mai ákona van mino.”

²² Máa siyákan Yisasi vetí ankani ineine fe afová iyáken máa sen tiamemí, “Nái vará tiretí mai ineine iyara fono.

²³ ‘Arantan ayan ma fúkein banta van ma mantaveya ei kúkúta mamare orono’ ma senuna fi áa ‘eni ume ampianté uno’ ma senuna mai anó teso sikhen nafino. ²⁴ *Banta Anin mano ma varará ume ifá uantan ákona manten mino sireya siretí ankan afová ono van mi séi inikhé uno.”

Máa siren Yisasi máa sen ayan arantan púkein banta siamemí, “Ei e mantaveya ei kúkúta mamare e amápá orono.”

²⁵ Máan ma siyain má ana mai nanin banta avorá mai ma ayan arantan púkaré ein banta ano orun mantaven bei yuvasí mamaren Tiyarafenu aví daní iyáken be amápá oren mino. ²⁶ Minó nanin banta

ano Tiyarafenui ákona ódaren anúden orera iyáken temí, “Taréa ena yanái oné tiféuno,” siren ben aví daníen mino.

Yisasi Ma Rivain Ne Sin Banta Arein Baya Ino

(Matiu 9:9-13; Maki 2:13-17)

²⁷ Máan turen Yisasi oriyaren o onákan takisi varan namumpin takisi varan banta Rivain ne sin mano kumantaré íkan béin ódaren máa sen tiamemí, “Ere sen bákurono.” ²⁸ Máa síkan Rivai minó daná mairá me ampiren béin bákuren oren mino.

²⁹ Orono van iyáken Rivai ano Yisasin nina kákan dunan tamá daran takisi varan kéká bá ena nanin banta kayo vá ano maifin e átaru uven békanaan má dunan nen mino. ³⁰ *Niyákan man baya ma afová ukhein banta kéká bá Farasisi kayo vá ano kóiyáken beni eyo iyampon kayo inaemí, “Tiretí ankan pará takisi varan banta kéká bá ume nanin banta kayo vá manafin dunan niyara fono.”

³¹ Máa síkan Yisasi evaránen betin tiamemí, “Aí ma vain nanin banta ano anan ayofan banta vaipá oré iyan mifo aí ma ída vain nanin banta ano ída oré iyan mino. ³² Máan tukháí funtákein nanin banta aran novara séi ererauno ume nanin banta arékun ará baerano van mi séi erikhé uno.”

Dunan Ma Aurá Pákena Van Ma Yisasin Inaen Baya Ino

(Matiu 9:14-17; Maki 2:18-22)

³³ Máa síkan betí ankan máa sen Yisasin tiamemí, “Kokhon damú Yonini eyo iyampon kayo vá Farasisi kayoi eyo iyampon kéká bá ano yere yunan auraren amúké iyan mifo eni eyo iyampon kayo ano fará ída yunan auranton ná niyan nafino.”

³⁴ *Máa síkan Yisasi evaránen betin tiamemí, “Kanaisá ená anasi ma iman amin nain banta ma vei kéká bá para vantin maen beni kéká ano yunan auranten nafino. Ída ino. ³⁵ Anasi ma iman amin nain banta ma aviren orivintin maen maí damúi veni kéká ano yunan auranten mino.”*

³⁶ Máa siren béi ena vaya máa sen tian baé amemí, “Peyante au anamun

* 5:20: Ais 43:25; Ruk 7:48 * 5:24: Yon 5:8 * 5:30: Ruk 15:1-2 * 5:34: Yon 3:29 * 5:35: Yisasi maen anasi ma iman amin nain banta ino.

ma yákvintin mana vanta ano ída auyen davaráe vararó ureya mairá mo yampare amuin nono. Maa ma esin maen ída kanaíen o yampaan ákona uven míkanan ída manaí inten mifo mai au anamun kákantá anan e yáken orera inten mino. ³⁷ Maañ tukhantin mi mana vanta ano ída feyante memé au unampin auyen uvaini anu vanainten mino. Auyen uvaini anu ma feyante memé au unampin ma vanaresin maen mai uvaini anu ano feyante memé au unan dákaaren banaen eravintin mai unan má dere namu inten mino. ³⁸ Maañ tin nain nan mi auyen uvaini anu auyen memé au unampin mi vanai nono. ³⁹ Maañ tukhein nan mi feyante uvaini anu ma naren maen ída auyen uvaini anu né iyan mifo mai fara vara seyo feyante uvaini anu ano moéken kama ukhen ne sé iyan mino.”

6

Yisasi Ma Veyan Nan Sabatii Bafan Munu Sein Baya Ino

(Matiu 12:1-8; Maki 2:23-28)

¹ *Mana Sabati yamú Yisasi uviti yunampin nókan bei eyo iyampon kayo ano uviti araní uren ayantá kasekhasu faren aitan do fútian karúdaren niyaren mino. ² *Niyákan manáa Farasisi kayo ano ódaren betí ankan máa sen tiamemí, “Sabati yamú ma vanta ano ma mai avúavá baran are ukhein mifo fará tiretí ankan bariya fono.”

³ *Maa síkan Yisasi evaránen betí ankan tiamemí, “Devitin má bei kéká bá ma arafan nan uaren ma mantaré ein daná tiretí ankan ídá dankádeyá afová ukhera fono. ⁴ *Tiyarafenu amá ma Deviti un pében ma monó doran banta kéká ano ana vá nano ma siren Tiyarafenu avorá kain baré ein bereti ma véi un máden bei kéká bá ma nein mai vaya sireti ída afová ukhe fono.” ⁵ Maa siren Yisasi evaránen betí ankan tiamemí, “Banta Anin béi Sabatii Bafan mino.”

Yisasi Ma Mana Ayan Púkein Banta Ma Sabati Yamú Ayofein Baya Ino

(Matiu 12:9-14; Maki 3:1-6)

⁶ Ena Sabati yamú Yisasi monó átaru namumpin un pében baya sian banasi amiyákan maifin mana vanta ayan kurompákena fúkein banta vá baren mino.

⁷ Yisasi monó baya siamiyákan man baya ma afová ukhein banta kéká bá Farasisi kayo vá ano maifin báken Sabati yamú aí nanin banta ayofantí ódé béin avían kópin ka ono siren aa van dosiyáken béintá dafikaren mino. ⁸ Dosiyákan Yisasi vetí ankani ineinefin afová iyáken mai ma ayan púkein banta van máa sen tiamemí, “Ei vanasi avorá orun mantano,” síkan mai vanta ano orun manten mino.

⁹ Mantavíkan Yisasi vetí ankan tiamemí, “Tiretí inaé umpo kasaerá Sabati yamú banasi kama uantante rafu áa namú uantante rafuno. Banasi aruan puronte rafu áa ayaékun ná para vanten nafino.”

¹⁰ Maa siren Yisasi minó nanin banta onen eúkiyáken mai vanta máa sen tiamemí, “E ayan antúkano,” síkan mai vanta ano máan tíkan evaránen béin ayan kamaen mino. ¹¹ Maañ tíkan man baya ma afová ukhein banta kayo vá Farasisi kéká bá ano kákantá Yisasi nan aranan iyáken betiyan ten orera emí ma vanta setí ankan náisá ótifante rafuno.

Tiyan Míkan Mifo Sirantan Kan Orun Kádan (12) Eyo Iyampon Kayo Ma Yisasi Aní Ein Baya Ino

(Matiu 10:1-4; Maki 3:13-19)

¹² Maí damú Yisasi amúkono van mana anurá ódiven mai inuran Tiyarafenurá béi amúken oriyan bákan mo kakhen mino.

¹³ Kakhan áau édavíkan bei eyo iyampon kayo aran erin tiyan míkan mifo sirantan kan orun kádan (12) banta aní uren betí ankan aposeri ví amen mino. ¹⁴ Mana Saimoni varé íkan be nan Pitane sen mino. Maa siren Saimonin afá Enduru ne sen Yemisi ne sen Yoni ne sen Firipi ne sen Batoromiu ne sen ¹⁵ Matiu ne sen Tomasi ne sen Yemisi Arifusín anin ne sen mana Serotí anan banta Saimoni ne sen ¹⁶ Yemisin anin Yudasi ne sen inká ínaimpáké ma véin ma namuroí iyain banta kayo ayampin ma avían amin nain banta Yudas Iskarioti* ne sen en mino.

* **6:1:** Diu 23:25 * **6:2:** Yon 5:10 * **6:3:** 1Sa 21:1-6 * **6:4:** Riv 24:5-9 * **6:16:** Yudas Iskarioti e ma siyain Iskarioti baru ráke vantán ban mino.

Yisasi Ma Aí Nanin Banta Ayofein Baya Ino
(*Matiu 4:24-25; Maki 3:7-12*)

¹⁷ Máan turen Yisasin má bei eyo iyampon kayo vá amempá aravuaren kama ukhein avará ena kokhon bei eyo iyampon kayo vá Yudiá ankina fáke nanin banta vá Yerusaremí bá un non akhempá ma vain barú kan Taiyá bá Saidoni vá ano varéin orun manten mino. ¹⁸ Béini vaya iniyantin betí ankani aí ayofaantano van mi erikharéin mi namu aunan mano ma váken ariyá ein nanin banta Yisasi ayofen mino. ¹⁹ Máan tiyákan minó nanin banta ano onan béin pinté enará ukhein ákona eriyáken aí nanin banta ayofiyaimpin minó ano ayan dan orikan ben au aruvono van en mino.

Yisasi Ma Vanasi Ano Avu Vá Uman Má Ma Varan Nain Afova Amein Baya Ino
(*Matiu 5:1-12*)

²⁰ Máan tiyákan Yisasi vei eyo iyampon kayo oniyáken máa semí,
“Tiretí minó daná ma ída vain kayo ano amusin na ono.
Tiyarafenui yafisin tiretin nina ino.
²¹ *Taréa ma arafan nan iyaona kayo ano vá amusin ná ono.
Ínaimpáké naresin amú kurinten mino.
Taréa ma ifídiya vaona kayo ano vá amusin ono.
Ínaimpáké intin ono.
²² *Banasi ano siretin onantiya ma Banta Anin ma yakhafiyasin maen betí ankan pura sen tiretin ará namu uantiyáken namu vaya siyan éin avi san namu ukhen mino siren do ékanten mino. Máan tintin ma mai yanasinta ma afoká intiya vá tiretí ankan ná amusin ono.
²³ “Betí ankan ma máan avúavá ma siretin uantantiya vá tiretí amusin iya vá ará kama uron ono. Para vara seyo, inarufá kákan miyan tiretin ave ukhen mino. Pefá betí ankan anafu aráo ano máan avúavá anan sakhanampa kéká uantákaren mino.

²⁴ “Máan tukharen mifo siretí moní nanin banta kéká ano vá dafiseno.
Tiretí ará ma kamain daná máa fefái manta ono.
²⁵ Taréa ma yunan naren nan ma amúkunta vaona kéká ano vá dafiseno.
Ínaimpá arafan nan inono.
Taréa ma intiya vaona kéká ano vá dafiseno.
Ínaimpá auufenté ánu eravinten mino.
²⁶ Minó nanin banta ano ma siretí ankan avi ma yaní iyantiya vá tiretí dafiseno.
Pefá betí anafu aráo ano kampun sakhanampa kéká manaí ukhein avúavá anan bariyaren mino.”

Tiretí Namuro Ma Avábá Uantan Baya Ino
(*Matiu 5:38-48*)

²⁷ Máa siren Yisasi semí, “Téinti vaya ma iniyaona nanin banta kayo ano vá tiretí namuro vará ananu iyákeya siretí ankan ma ará namu uantiyain banta kayo vá kama ono. ²⁸ Kama iyákeya vá manáa kéká ano ma siretin nan ma Tiyarafenu ano vá namu uantano ma sintiya vá tiretí ankan Tiyarafenun amúkuon amesin ná betin avu ino. Tiretí ankan Tiyarafenurá amúkesin ná tiretin ma namu uantan nain kékasá avábá ino. ²⁹ Máan tiyantín ma manáa kéká ano ma maná páke ápa ankamintiya mae vá tefáke yere vá do véan betí baípasí ono. Manáa kéká ano ma yante afuin ma yafintiya áesin ná námente afuin má dere o varano. ³⁰ Manáa yana san ma vanasi ano éi vaípa ma inantintiya éi kasae vá ameno. Mana ano ma éin nina yaná ma mantaré intiya éi ída vá evaránen amino van ákona eya inanteno. ³¹ *Máan tiyákeya vá ena nanin banta ano siretin intéa avúavasá uantano vará ukhanten nafi mai avúavá ana vá betin má uantano.
³² “Tiretí ankan ma anunu iyain kéká ana ma anunu inte ya iye anó tireti nan inen ná kama nanin banta ino sinten nafino. Umeí ma iyain kéká ano yeren betin nan ma anunu iyain kéká anunu é iyan mino. ³³ Tiretí ankan ma kama avúavá uantiyain kayo ana ma kama

* 6:21: Íbo 126:5-6; Ais 61:3; Rev 7:16-17

* 6:22: Yon 15:19; 16:2; 1Pi 4:14

* 6:31: Mat 7:12

avúavá uantan teya iye anó tiretin nan inen ná kama nanin banta ino sinten nafino. Umeí ma iyain kéká bá ano yere manái ukhein avúavá anan baré iyan mino. ³⁴ Betí ankan manoi kanaíen anona ovaráne siminten mino ma sireya amiyaona mai iye anó tiretin nan inen ná kama nanin banta ino sinten nafino. Ume vanta kayo vá ano yeren umeí ma iyain kéká kasaen timinten mino sen afová iyáken amé iyan mino. ³⁵ Máan té iyan mifo siretíi namuro vá anunu iyákeya vetin ná kama avúavá uanteyavá tiretin ma ída kanaíen anona evaránen ameren ukhein kayo vá ameno. Béin ma ída susu siantiyain kéká bá namu kéká bá deren béi kama é iyan mifo siretí máan tiyare vá kákantá moékakhein miyan inaímpá mamareya vá Dan Bain Tiyarafenu akhasí puraseya ono. ³⁶ Tiretí ankan Afóe ano ma vetin nan ma arunan uantiyainí eya vá tiretin má dere vá betin nan arunan uantano.

Banasii Avúavá Ma Yaimin Baya Ino
(Matiu 7:1-5)

³⁷ *Tiyarafenu ano yere máa mana en tiretíi avúavá bá daiminafo siretí ankan ída vá enai avúavá daídeya vá namu vanta kayo ino siyákeya vetíi ume vá áuantesin ná Tiyarafenu ano siretíi ume áuantano. ³⁸ *Tiretí ankan ma ena nanin banta amesin maen Tiyarafenu ano siretin má aminten mino. Béi ma avarí inain mai víkaren morun avékaren kaiyantín bíkaaren avanen eraviyantín mi siretin aminten mifo sireti ma avarí iyá inona mai avúaváká anan temi siretin aminten mino.”

³⁹ *Yisasi máa siren betí ankan mana veya sian baéan amemí, “Kanaisá ená auu yufúkukhein banta ano ena auu yufúkukhein aviren orinten nafino. Ída ífo míkanan mano masípin mana o ádinten mino. ⁴⁰ *Afova ma variyain kayo ano ída vei arú esantakhé iyan mifo véi ma kamaen afova ma mamaren mi vei arú bá mun manái é iyan mino.

⁴¹ “Máan té iyan mifo éi fará e afá aváen auufen ma sító kanti vain nan mana oniyákeyá e auufen ma kákan daa

khaeádan ma vain nan ída iniya fono. ⁴² Máan tukhen mifo éi fara e afá aváen auufen ma sító kanti yo varano van iyákeyá e auufen ma yaa khaeádan mano ma iyákein ídá oniya fono. Éi kampun baya sire ída mai ánain dakhafin nanin banta ono. Esé e auufen ma yaa khaeádan ma vain nare yo kanire vá kama e oniyáke vá e afá aváen auufen ma sító kanti khasae vá do varano.”

Daa Ana Vá Beni Aran Mái Vaya Ino
(Matiu 7:16-20, 12:33-35)

⁴³ Máa siren Yisasi evaránen temí, “Kama yaa ano ída namu aran irákan inká namu yaa ano ída kama aran iran é iyan mino. ⁴⁴ Banasi ano yaa aran naren ódaren kama ukhen nafi namú ukhen nafi siren oman afová é iyan mino. Banasi ano ída ayankun anan kayo rákena fiki aran kúden inká ayankuníen namu ukhein daa kayo rákena ída uvaini aran kúden é iyan mino. ⁴⁵ Kama vanta aúpin kokhon kama ineine víkakan béi kama avúavá baré iyan mifo namu vanta ano ven aúpin namu ineine víkakan béi namu avúavá baré iyan mino. Máan ineine ma aúpin ma víkakhein mi oo ano sian dáko é iyan mino.”

Kama Afova Vain Banta Vá Ída Kama Afova Vain Banta Vá Ano Ma Má Uvaran Baya Ino
(Matiu 7:24-27)

⁴⁶ *Máa siren Yisasi evaránen temí, “Tiretí ankan pará Bafan noe, Bafan noe, se nan tiyákeyá te ma siamiyaruna veya ánanin ídá bákuriya rafono. ⁴⁷ Máan tiya ompo mana ano ma se varunafá eriven ma senti veya iniren mai ánain ma vákurin nain nanin bantai avúavái siretin tiamenté uno. ⁴⁸ Mai máan mi ukhen mino. Mana vanta ano ma má uvarano van ma mana kákan onámaná daró masí ufen námen araven morun kaúden ma simenti upí uren maifin kain araven ontá orun ákona uvin ma má uvá dakaréin ma anon non taaren mai má avékan maen mai vanta ano ákona namun uvantaréin ída varáké iyainíi ukhen mino. ⁴⁹ Máan tukhen mifo senti veya ma iniren ma ída mai ánain bákuriyain nanin banta mai

* 6:37: Mat 6:14 * 6:38: Mak 4:24 * 6:39: Mat 15:14 * 6:40: Mat 10:24-25 * 6:46: Mat 7:21

veí mana vanta ano ma ída simentifó ákona inton para varará ana ma uvareiníi ukharéin ma ínaimpáké non taven ma mai má avékan ma ainen barákuaren namu ma einíi ukhen mino.

7

Mana Antareti (100) Aruvin Banta Kayoi Ayafa Vanta Ano Ma Mumunan Ein Baya Ino

(Matiu 8:5-13)

¹ Yisasi monó baya ma vanasi siamían kípáren Kapeníamú barufin óden mino. ² Ódíkan mai varufin mana antareti (100) aruvin banta kayoi ayafa vanta ano mana vei miyan ída van doran banta van béi anunu iyaré ein banta kákan aí íkan ádé anantá purono van en mino. ³ Purono van iyákan aruvin banta kayoi ayafa vanta ano Yisasin nan evan ne sin baya iniren bei miyan ída varan doran banta eman ayofano van Yutan kayoi ánon banta kéká tiantan Béin oman tiamen mino. ⁴ Tiantákan betí Yisasi vaintá oriven ákonæen Béin tiamemí, “Aruvin banta kayoi ayafa vanta mai kama vanta ífo éi kanaíeya véin ayain nono. ⁵ Tetí Yudiá kéká san béi anunu iyáken tetinti monó átaru namun beyantá uvantintein banta ino.”

⁶ Máa síkan Yisasi vetí ankan má mai má ádé oríkan aruvin banta kayoi ayafa vanta ano vei aronará baya siádan Yisasin me siamemí, “Bafan noe, séi ída kama vantán baruna éi ída kanaíeya séin timápin édan nono. ⁷ Máan tukháí séi ída kama vantán báké teyantá ída kanaíé éin o onanté umpo vaya máa vá éi se siná tenti miyan ída van doran bantai aí kípáno. ⁸ Téi farava máa siya rauno. Tentá manáa vanta kéká ano yafiká betíi aránaópá téi váken maen manáa aruvin banta kayo ano senti aránaópá báká mana van ma orono sékun maen oriká ena van ma ereno sékun maen eré iyan mino. Tesi miyan ída van doran banta van ma ma yorarí ono sékun maen mai yoran baré iyan mino.”

⁹ Máa síkan Yisasi mai vaya van anú duren ben ma yakhafen noré ein nanin

banta yovéaren máa sen tiamemí, “Isareri kékápin ma vantaí mumunan ma einíi ukheín banta ída mana van mino.” ¹⁰ Máa sirákan aruvin banta kayoi ayafa ano ma siantan orikhá ein banta kayo ano evaránen oren mápin o onákan mai miyan ída van doran bantai aí kípákan mino.

Yisasi Ma Varé Nanin Anin Púkaréin Evaránen Avían Mantein Baya Ino

¹¹ Ínaimpáké Yisasi Naini se sin kákan barufá oríkan bei eyo iyampon kayo vá kokhon nanin banta vá ano véin bákuren oren mino. ¹² Oriaren mai varui yafu ona ádé o mantaven onákan mana varé nanin mano mana iyampon uró ana kain baren mai iyampon púkaré íkan beni kúkúta manáa vanta kayo ano yayióen erákan be anóen má kokhon nanin banta ano vákuren eren mino. ¹³ Erákan Bafan mano mai nanin ódaren moéken arunan uren máa sen béin tiamemí, “Ída vá ifídano.”

¹⁴ Máa siren béi mai ma fúkein banta ma yayien oriyá ein ádé o mantaven kúkútará ayan kaíkan mai ma yayien eriyá ein kayo ano o mantavíkan Yisasi semí, “Pumara oe, séi éin nan tiyá umpo orun mantano.”

¹⁵ *Máa síkan mai ma fúká ein pumara ano orun mantaan kumamen aráien baya síkan Yisasi evaránen be anóen amen mino.

¹⁶ *Amirákan minó nanin banta ano Tiyarafenui kákan ákona ódaren akhokho van uaren Tiyarafenu aví daní iyáken temí, “Mana sakhanampa vanta inka setí aúbaná afoká ukhan Tiyarafenu ano vei vanasi aya ono van inka e van mino.”

¹⁷ Máa siren banasi ano mai ma Yisasi varein avúavá baya e siádan Yudiá barafin ma vain baru kayo fimpá bá ádé barafá ina vá mai vaya ano oreraen mino.

Monó Non Péantan Banta Yonin Nú Yisasi Núi Vaya Ino

(Matiu 11:2-19)

¹⁸ Orera íkan Yonini eyo iyampon kayo ano Yisasi ma variyain dana san béin mo siamen mino. ¹⁹ *Tiamirákan Yoni vei eyo iyampon kanan araren Bafan baípá tiantian temí, “Tiyarafenu ano ma siantantin erino van ma sikhá ein éi mai

* 7:15: 1Ki 17:23; 2Ki 4:36 * 7:16: Ruk 1:68 * 7:19: Íbo 40:7; Mar 3:1; Rev 1:8

vanta fono áa ená tetí ankan ave ótifante rafuno,” sen inaino van tianten mino.

²⁰ Tiantákan míkangan mano Yisasi vaintá oriven temí, “Éi nan mo inaino siren monó non péantan banta Yoni ano verasan tisintá eré umpo mai ma Tiya rafenu ano siantantin erino van ma siádan baré ein banta fono áa ená ave ótifante rafuno.”

²¹ Maí damú Yisasi ara ara aí daná ma varé ein nanin banta ayofiyáken namu aunan mano ma fákakharéin kayo fintena yo siantan namu aunan oriyákan auu ma yufúkukharé ein kéká evaránen auu kama uantan onan en mino. ²² *Máan iyákan Yisasi evaránen Yonini eyo iyampon kanan tiamemí, “Taréa siré kanan náí yanasá oniyá iniyá iya fono mai vá Yonin mo siameno. Auu ma yufúkukhá ein kayo ano evaránen onákan arantan ma namu ukhá ein kéká ano oríkan aúfá ma amon dana aí ma varé ein evaránen kama íkan átaren ma kontaré ein kayo ano vava iníkan pefá ma fúká ein kéká ano orun mantan maen ona ma ída vain kayo ano kama vava iniyán en mino. ²³ Máan tukhein nan mi vanasi ano ma senti yoran ódaren ma mairá ída eraven ankamin nain kayo ano vá amusin ino. Mai kéká anon avu varanten mino.”

²⁴ Yonini vava ma varen erikhá ein bantá kanan orivíkan Yisasi Yonin nan banasi máa sen tiamemí, “Tiretí ankan ma vanta ída van kámá barafá ma oriyaré eona mai náí yanasá onano vará oriyare fono. Uva ano mana ópen ná kayaiyayá onano vará oriyare fono. Ída ino. ²⁵ Tiretí ankan náiyasá onano vará oriyare fono. Mana vanta ano kama auí danasá uren bayá onano van oriyare fono. Ída ino. Kama auí daná ma ukhein banta kéká ano kin amápin mi váé iyan mino.

²⁶ *Máan té iyan mifo siretí ankan nai yanasá onano vará oriyare fono. Tiretí ankan mana sakhanampa vantan onano van mi oriyare ono. Oriyá enái séi siretin tiamé uno. Minó sakhanampa vanta kayo véi ano esantakhen mino. ²⁷ Mai vanta van mi Tiya rafenui vompon dóki ano máa sikharen mino,

‘Ineno. Séi mana vanta siantékun tenti vava varen éin anuanten

eni aa mo uvíantanten mino.’ *Mar 3:1*
²⁸ Téi siretí ankan tiamé uno ma vara rákena minó banta Yoni ano esantakhen mifo Tiya rafenu ano ma yafikein barufin ma sitosí ukhen bain banta anon Yonin esantakhen mino.”

²⁹ *Máa síkan betí ankan mai vava iniren Yonin ayantá ma non mantaré ein nan ovaren me iniyáken takisi varan kéká bá banasi vá ano semí Tiya rafenui avúavá puntáken mino. ³⁰ *Máan tukhan mifo Farasisi kayo vá man baya ma afová ukhein banta kéká bá ano Tiya rafenui kama ineine oyan amen Yoni ma monó non péantiyain ída mantaren mino.

³¹ Máa siren Yisasi evaránen temí, “Taréa ma vain nanin bantai avúavá inte yanákasá tiádante rafuno. Betí inté ukhein nanin bantá ban nafino. ³² Betí ankan maen arará iyampon kayo ano ma varu aúbaná kumanten ma ena iyampon kayo van ma oovariyáken,

“Tiretí ankan nan danisí ono van mi setí ankan okhaxhan asiyákuya
 siretí ída amusin danisí e ono.
 Ída amusin e ídiyaonafin mi setí ifisana yékuya
 siretí ída ifídiyan ná uno.”

³³ Máa siren Yisasi evaránen temí, “monó non péantan banta Yoni ano vereti vá uvaini vá ída niyákaya siretí ankan teya véimpin namu aunan mano van mino siyare ono. ³⁴ *Máa siyaré e nan mi Banta Anin mano saréa eriven uvaini vá dunan má niyákaya siretí ankan teya onano sakisi varan banta kayo vá ume vanta kéká báí aronan báken mi kókhon ná dunan má uvaini vá niyáken óen iyan mino siya ono.

³⁵ Tiretí ankan máa siya ompo Tiya rafenui afova ma mantein nanin banta ano vetí afova ano fura yanasí ukhan mi setin aní iyan mino.

Ume Nanin Mano Ma Yisasin Kama Aunka Iyain Uveri Féantein Baya Ino

³⁶ Mana Farasisi vanta ano véin má mo yunan nano van Yisasin arákan mai vanta amápin béi yunan nano van o kumanen mino. ³⁷ *O vákan mana namu avúavá

* 7:22: Ais 35:5-6; 61:1; Ruk 4:18 * 7:26: Ruk 1:76
 15:2 * 7:37: Mat 26:7; Mak 14:3; Yon 12:3

* 7:29: Ruk 3:12 * 7:30: Mat 21:32 * 7:34: Ruk

baren noin nanin mano mai varurá bain bákán Yisasi nan Farasisi vanta amápin dunan niyan mino síkan mai nanin mano mana on botorefin kama auna iyain uveri mamaren eren mino. ³⁸ Eriaren Yisasin ayompá arantan ma vain ádé o mantaven ifí diyán baren mino. Ifí diyákan auufenté ánu kararen Yisasin arantantá arafúbíkan mai nanin mano ve ánon do fóké arúanten mino. Arúan tiyáken kokhon dáda Yisasin arantan amónaren kama auna ma iyain uveri anan máden béin arantantá péanten mino.

³⁹ Máan tiyákan Yisasin ma arákan erein Farasisi vanta ano mai nanin ma variyain danasinta ódaren béi máa sen inemí, “Ma vanta fura sen sakhanampa vanta ma varen ma nanin mano ma ventá ayan kaiyain afová iyáken béini avúavá bá dere afová inainten mino. Ma nanin béi ume yaná baren noin nanin mino.”

⁴⁰ Mai Farasisi vantai ineine Yisasi afová iyáken máa sen béin tiamemí, “Saimoni oe, sémpin mana vaya váká éin tiamintó uno.”

Máa síkan Saimoni máa semí, “Aru soe, ei vaya seno.”

⁴¹ Máa síkan Yisasi semí, “Kankanan banta ano mana vanta vaípákéna moní inantiren mantaren anona evaránen ameno van baren mino. Mana vanta ano yan manápá tauseni (5000) moní barákan ena vanta ano yan manápá antareti (500) moní máa ana varen mino. ⁴² Mamákaren mikanan banta ano ida kanaíen anona mai moní evaránen amirí ukheimpin mai vanta ano mikanan ma mantaré ein ifá uanten mifo éi ma iniyaona vekanán pinté intéa vanta anó béin nan moékentá anunu inten nafino.”

⁴³ Máa síkan Saimoni evaránen temí, “Mai ma yan manápá tauseni (5000) ma mantaré ein banta ma ifá uantein mano ino,” síkan Yisasi véin tiamemí,

“Mai eni ineine ano mo funtaren mino.”

⁴⁴ Máa siren Yisasi yo vaében mai nanin oniyáken Saimonin tiamemí, “Éi ma nanin oniya fono. En amápin erékuya éi ida sirantan teséin non time nan mi ma nanin manoi ve ánufoi sirantan tesé usintáden be ánon dofókéi yo arútinten mino. ⁴⁵ En amápin ma yun bákuya éi ida simó nen nan

mi ma nanin mano anan mai ma éderuna ráké ten tirantampin timónen eriyán ban mino. ⁴⁶ Éi ida uveri fétinten nan mi ma nanin manon auna uveri varen me sir- antantá banaren péтинен mino. ⁴⁷ Máan tukháí séi en tiamé uno. Ma nanin ná teti ódesá afová ó tifano véi sen nan moéken anunu iyákan mi Tiyarafenu ano veni kokhon ume arúanten mino. Arúanten mifo sító ume ma variyá inain bantai ume ma arúantá dantin mai vanta ano sító máarái anunu inten mino.”

⁴⁸ Máa siren Yisasi mai nanin máa sen tiamemí, “Eni ume kayo inka séi arúanté uno.”

⁴⁹ Máa síkan dunan nan takhoká ma ve má kumantá ein banta kayo ano vetiyan ten orera emí, “Ma vanta véi iye uraná bákén ná ume yere arúantiyan nafino.”

⁵⁰ *Máa siyákan Yisasi mai nanin tiamemí, “Eni mumunan mano síkaya Tiyarafenu vá taréa kama e va ompo éi ará kusin masá orono.”

8

Manáa Nanin Mano Ma Yisasin Bákuren Noré Ein Baya Ino

¹ Ínainpáké Yisasi kákan baru kayo fimpá bá tító baru kayo fimpá bá nóken Tiyarafenui yafisin baru fintena kama vaya kayo vanasi siamen oriyákan tiyan mikan mifo sirantan kan orun kádan (12) beni eyo iyampon kayo vá ano véin bákuren noren mino. ² *Bákuren nókan pefá ma Yisasi ano ma manáa nanin kéká pintena ma namu aunan kayo ma yo siantiyan ma aí kipaantiyan ukharé ein nanin kayo ano véin má oriyaren mino. Oriyákan mai kayo fintena mana Mákdara kena Marian ne sin nanin ma yan manápá ifo afápá kan un kádan namu aunan ma véin pintena yo siantákaré ein nanin má dere maifin oriyaren mino. ³ Oriyákan maifin Erotin amáká ma yafisin banta Kusan aná Yoanan má Susanan má inká ena nanin kayo vá ano vákuren oren mino. Mai nanin kayo ano vetí ina yaná póké Yisasin má bei eyo iyampon kayo vá aya iyákan dorarién noren mino.

* **7:50:** Ruk 8:48; 18:42 * **8:2:** Mat 27:55-56; Mak 15:40-41; Ruk 23:49

Danayun Ma Fafasin Bantará Ma Sian Baéádein Baya Ino

(Matiu 13:1-9; Maki 4:1-9)

⁴ Kokhon nanin banta ano minó baru fáké Yisasi vaintá e átaru uvin mana veya véi sian baéan betí ankan amen mino. ⁵ “Mana vanta ano vei yunan barafin danayun pafaseno van oren mino. Mo fafasiyákan manáa yanayun mano aasá eravíkan banasi ano arantampó me yasamiyan nun kayo ano e aidiyan nan en mino. ⁶ Manáa yanayun mano ompin eravukharen orun ampamaren barai anu ída vákan mai kayo ano ainen kafuren puren mino. ⁷ Manáa yanayun mano ayankun namampin eravukharen orun ampamin ayankun nan mano úkuaren daramáden mino. ⁸ Máan tiyákan manáa yanayun mano kama varafin eravukharen e ampamaren kokhon ná antareti (100) aran iren mino.” Yisasi máa siren béi oovaren temí, “Áesin ná átaren ma van nain nanin banta ano vá ma veya inino.”

Yisasi Ma Ovaeran Baya Fákena Ma Sian Amá Ein Baya Ino

(Matiu 13:10-17; Maki 4:10-12)

⁹ Máa síkan beni eyo iyampon kayo ano véi ma ovaeran baya sikhaini ana siamino van béin inaen mino. ¹⁰ Inaíkan béi máa sen temí, “Tiyarafenu ano inka aní ukha vei yafisin baru fintena aúpá baya fefá afová ukha ompo

‘ena nanin banta kayo ano ovaeran baya inídaren onano van kokhon dádá onanten mifo vetí ankan ída mana yaná onanten mino.

Kokhon dádá iniren mai ana vetí ankan ída afová inten mino.’” *Ais 6:9-10*

Danayun Pafasí Pákenai Ovaeran Baya Ma Sian Amá Ein Baya Ino

(Matiu 13:18-23; Maki 4:13-20)

¹¹ Máa siren Yisasi evaránen temí, “Mai vaeran bayai ana máan mi ukhen mino. Danayun mai Tiyarafenui veya ino. ¹² Mai veya iniren ma vetí ankan mumunan intin Tiyarafenu ano aviran nae siren ma Ban Anon mano inaimpáké eriven betin aú pinta mai veya ma yovariyain mai nanin

banta anoi yanayun ma aasá eravé iyain an mi yakhen mino. ¹³ Mai veya ma iniyáken amusin iyan ma variyain kéká ano on daró ma eravukharéin ma arú ída yan araviyainíi ukhen mino. Betí ankan manáa afokhantá anan mumunan iyaréin ma akhenókain damusí ma íkan betí eraven ankamen Tiyarafenu me ampiren oré iyan mino. ¹⁴ Ayankun namampin ma eravein danayuni ana maen mai veya iniren ma orein kékái vampin uman má minó daná baran má bara rákena amusin má ano mai kéká pákaan ákona uran ída kama aran ire iyain mino. ¹⁵ Máan té iyan mifo kama varafin ma fafasein danayun an ma yakein kéká ará ano kamaen puntákein kéká anon ákonaen báken mi aran iriyan báé iyan mino.

Oon Ma Uruan Takhóká Kai Pákena Ovaeran Baya Ino

(Maki 4:21-25)

¹⁶ *Máa siren Yisasi ena ovaeran baya vanasi siamemí, “Mana ano ída kanaíen oon uruan takhó aránaópá kaen maen kurafin kuferen é iyan mifo sakhó darói vákan maen mi vanasi ano fanu ma siyain ódaren ódé iyan mino. ¹⁷ *Aupá ma vain danasinta ano inaimpáké afoká iyantin maen banasi ano ma yarariyá inain danasinta ano inaimpáké afokasí intin minó nanin banta ano mai yanasinta afová inten mino. ¹⁸ *Máan tukhein nan mi siretí ankan dafian ákona uveya vá kamaeya veya ineno. Manáa nanin banta ano ma manáa afova yákantin Tiyarafenu ano manáa vá aminten mifo intéa nanin banta anó mana afova ída yáken ná mai afova van béi inen ná inká yáké uno siren ma veya ída inin nain mai kéká ina Tiyarafenu ano minó do varanten mino.”

Yisasin Anóen Má Be Afá Kayo Vái Vaya Ino

(Matiu 12:46-50; Maki 3:31-35)

¹⁹ Maí damú ana Yisasin anóen má be afá kayo vá ano véin onano van eríkan kokhon nanin banta ano víkavin ída afokhaní ukhan beti ída kanaíen beni ádé oriríen mino. ²⁰ Máan tiyákan manáa ano

* **8:16:** Mat 5:15; Ruk 11:33 * **8:17:** Mat 10:26; Ruk 12:2 * **8:18:** Mat 25:29; Ruk 19:26

Véin tiamemí, “E anóen má e afá kayo vá éin onano van barurá e ave ukhen mino.”

²¹ Maa síkan Yisasi evaránen betin tiamemí, “Tiyarafenui vaya ma iniren dakhafiyain nanin banta mai séin tinóen má tifá tiváen má ino.”

Yisasi Ma Kákan Uva Yo Siantein Baya Ino

(Matu 8:23-27; Maki 4:35-41)

²² Maná damú Yisasi vei eyo iyampon kayo siamemí, “Eritifé ma non ekháde mesan ufá oró tifano,” siren betí ankan botifin un kumanen oren mino. ²³ Oriyákan Yisasi mai votifin auun bakharen mino. Bavíkan mairá kákan uva uaren békon unen non karantó en mai votifin un bíkaaren áde anantá banairí íkan betí umampin oriríen mino.

²⁴ Máan tíkan betí ankan Yisasin mo avoriyan temí, “Bafan noe, Bafan noe, setí ankan áde anantá non ufurirí iyá uno,” síkan béi orun mantaven mai uva vá kákan non ma karantó iyain má kípano van ákonaen asíkan mai uva vá kákan non ma karantó iyá ein má kípaaren ída evaránen kayaen mino. ²⁵ Kípavíkan béi máa sen betin inaemí, “Tiretíi mumunan intesá ukhen nafino.”

Maa síkan mai kéká ano akhokho van iyáken beraran ten oreraemí, “Ma vanta iyé báken ná uva vá non má tiamíkan ná béin oo yaiyiya nafino.”

Yisasi Ma Namu Aunan Bain Banta Ayofein Baya Ino

(Matu 8:28-34; Maki 5:1-20)

²⁶ Máan turen Yisasin má bei eyo iyampon kayo vá Karirí non ankinafá bain Kerasá* barufá oren mino. ²⁷ Oriven mai voti finté ma káusen non akhempá ma araviyain má ana mana namu aunana pákakhein banta ayá damú avápa váken ída mápin barana vanta masí ukhein pimpá ana varen noré ein má o fóken mino. ²⁸ O fókavíkan mai vanta ano Yisasin oniyain avádóden bádiyan ben arantan áde o vaven oovararen máa semí, “Yisasi oe, éi yan bain Tiyarafenu Anin mompo éi náisá téin into fonó. Téin ída vá namu usintano van mi éin tiamiyá uno.” ²⁹ Béi farava vádenaino mai vanta namu aunan

mano me ampiren orino van Yisasi fefá tiamíkan mino. Kokhon dádá mai vanta ayan arantantá seni ananpoké damuan ákona uren ma kaúdan maen béi mai seni anan bempáké antádan maen namu aunan kayo ano véin do aviádan kámá barufá oriyaren mino.

³⁰ Máan tiyaréin Yisasi véin máa sen inaemí, “E aví iye fino,” síkan pefái mai vanta aúpin kokhon namu aunan kayo varé íkan mai vanta ano máa semí, “Ten tiví kokhon ná aruvin banta kayo ino.”

³¹ Maa síkan namu aunan kayo ano váden berai siyan Yisasin tiamemí, “Éi ída vá teti ankan aron ída van masípin tisintano.”

³² Máa siyan mo onákan ayo fákena fon kayo iyukhen dunan niyaré íkan mai namu aunan kayo ano verai siyan ákonaen Yisasin inaemí, “Éi áesirá mesan pon kayo aúpin oferá tifano,” síkan béi “kana ino” siren ifáin oren mino. ³³ “Kana ino” síkan namu aunan kayo ano mai vanta me ampiren pon kayo aúpin ofébíkan mai fon kayo ano ayampaíen tava uaren ayafin araven nompin orun áduven ufuren puren mino.

³⁴ Máan tíkan mai fon kayorá ma yafíkaré ein kéká ano mai yaná ma afoká ein ódaren betí ankan karan oriaren mai vaya e siádan áde ma vain kákan barufin má akhempá ma vain baru kayo fimpá bá dere oreraen mino. ³⁵ Mai vaya orera íkan banasi ano iniren mai ma afoká ukhein daná onano siren minó nanin banta ano evúten oriyaren o onákan mai ma namu aunan kayo ano ma me ampiren orein bantai ineine kama uvíkan aú daná uren Yisasin arantan ádá kumantan betí ankan akhokho van en mino. ³⁶ Akhokho van iyákan mai yaná ma afokáin ontaré ein kéká ano eriven intesá ená mai vanta aú pinté namu aunan mano me ampiren orivin ná kamaen nafi mai vaya vanasi siamin inen mino. ³⁷ Tiamíkan Karasá baru rákena nanin banta ano Yisasi ma ákona yorarí ukhein nan betí ankan akhokho van uren betin me ampiren orino van ákonaen tiyaimpin Yisasi votifin káusen ódiven evaránen oren mino.

* **8:26:** Manáa vompompin Kadarenesi e sen inká ena vompompin Kekesenesi e sen ukhen mino. 8:37 dere vá onano.

³⁸ Tiantan Yisasi me onen oriyákan mai ma namu aunan ma fákakharé ein banta ano ven má orono siren iyaní íkan béin evaránen tiantian máa semí, ³⁹ “Éi evaráne ei varufá oriveya vá mai ma Ti-yarafenu ano ma éin ayaen kama uantein baya vá tesin banasi inino,” síkan mai vanta ano vei varufin oriven eúkiyáken Yisasi ano ma véin ayaen kama uantein baya e siamen oren mino.

Yisasi Ma Fúká Ein Arinta Avían Mantén Ma Aí Nanin Ayofen Ma Ein Baya Ino (Matiu 9:18-26; Maki 5:21-43)

⁴⁰ Yisasi non ekháden ena ufá oríkan banasi ano véi ma oriyain ave ukharen ben onen amusin en mino. ⁴¹ Amusin iyákan mana monó átaru namuntá dafíkein ánon banta Yairasin ne sin mano mairá eriven Yisinin arantampin aron kanan mo yurafúden ben má orino van béin ákonaen inaen mino. ⁴² Parava véin inaen naino véi mana arinta anan dan baren tiyan míkan mifo sirantan kan orun kádan (12) oranaí ukharen aí baren ádé anantá purono van iyan mino. Máa sen ina íkan Yisasi ven má orin kokhon nanin banta ano véin dakhafen mákaka suron uven oren mino. ⁴³ Oriyákan maifin mana nanin tiyan míkan mifo sirantan kan orun kádan (12) oranará ena ena yamú biyon aí daná bariyákan* mana vanta ano ída kanaíen béin ayofiyaren mino. ⁴⁴ Máan tiyaré íkan mai nanin mano Yisinin ayompá oriven ayan dan orin beni ayá au anamun áton aruvíkan manadá beni nare kípen mino.

⁴⁵ Máan tíkan Yisasi máa sen inaemí, “Iye anó téin tiruviya fono,” síkan minó nanin banta ano “ída ino” sen orera íkan Pita semí, “Bafan noe, kokhon ná nanin banta anon éin amáden mantén eúkukhen mi avékiyan mino.”

⁴⁶ Máa síkan Yisasi semí, “Mana ano séin tiruvin mi senti ákona ano sen me ampiren oriyái afová iyá uno.”

⁴⁷ Máa síkan mai nanin mano iníkan avinantan den ída umerarí eimpin Yisinin arantampin mo aron kan durafúden mátimen minó nanin banta avorá pará ben aruvin ná bei aí ainen kípen nafi mai yaná tiamen mino. ⁴⁸ *Máa síkan Yisasi

semí, “Tiraun noe, éini mumunan manon éin ayofen mifo ará kusin masá orono.”

⁴⁹ Máa siren Yisasi fara vaya siyan bakan monó átaru namuni ánon banta Yairasin amá pinté mana vanta ano eren me véin tiamemí, “E araun inka furen mifo éi ída vá enadá bá arú banta uman ameno.”

⁵⁰ Máa síkan Yisasi mai vaya iniren mai ánon banta evaránen tiamemí, “Éi ída vá akhokho van eya vá mumunan mana vá ono e araun asefa inten mino.”

⁵¹ Máa siren Yisasi mai ánon banta amápin ódiyáken Pitan má Yonin má Yemisin má mai arinta anóe afóen má ana avíaren banasi ída áíkan maifin béin má óden mino. ⁵² Ódíkan pefá ma mápin baré ein nanin banta ano mai arinta van arunaná baren ifí diyan baréin Yisasi vetin máa sen tiamemí, “Béi ída fúken paran auun bakhen mifo sireti ída vá ifí daro.”

⁵³ Máa síkan betí ankan mai arinta ma fúkein afová ukhen béin nan inten mino. ⁵⁴ Intiyákan Yisasi mai arinta ayan pákaaren máa semí, “Tiraun noe, orun mantano.” ⁵⁵ Máa síkan mai arinta aunan mano ovaránen béimpin eríkan ainen orun mantavin mai arinta yunan amino van Yisasi vetin tiamen mino. ⁵⁶ Tiamirákan mai arinta anóen má afóen má ano anú duren akhokho van íkan Yisasi vékanan ákonaen tiamemí, “Tiré kanan ída vá ma yaná ma afoká ein ena nanin banta siamen.”

9

Yisasi Vei Eyo Iyampon Kayo Siantan Ma Monó Dorantá Orera Ein Baya Ino (Matiu 10:5-15; Maki 6:7-13)

¹ Yisasi vei eyo iyampon kayo sirantan kan orun kádan (12) ma aran eríkan maen namu aunan ma yo siantan má aí nanin banta ma ayofan ákona vá mai kéká amiyáken ² Ti-yarafenui yafisin baru fintena vaya siamiyáken uren aí nanin banta ayofano van tiantan oren mino. ³ *Tiantan oriyákan Yisasi vetin máa sen tiamemí, “Tireti ankan ída vá unan má bereti vá moní bá ayonta vá bare vá inka ída vá kankanan afuin barano. ⁴ Mana

* **8:43:** Kokhon bompopin máa sikhemí, ‘Minó bei moní ayofan bantan amian kípakhan mino.’ * **8:48:** Ruk 7:50 * **9:3:** Ruk 10:4-11

varurá ma siretí ankan oriveya mana namumpin ma ódinte vá mai namun mana vá bareya mai namundesá mai varu me ampire orono. ⁵ Mana varu rákena nanin banta ano ma siretin ída e avían be amápin kainti vá mai varu ma me ampire oriya vá arantantáke kayó me fúpá tian karúdesin ná banasi afová ená teti namu é uno sino.” ⁶ Maa sirákan eyo iyampon kayo ano varu-fimpá orera uven kama veya siamiyáken minó akhen pákena aí nanin banta ayofen mino.

Eroti Ma Yisasi Iye Fino Van Ma Afová Ono Van Ina Ein Baya Ino
(*Matiu 14:1-2; Maki 6:14-16*)

⁷ *Máan tiyákan manáa vanta kayo ano siyáken, “Yoni evaránen masí pinté orun mantakhen mino,” siyákan Eroti kamanini ánon banta ano Yisasi ma variyain danas-inta van iniren kokhon ineine iyákan ⁸ manáa kéká ano sen pefá ma vá ein mai sakhanampa vanta kéká pintena mana anon orun mantakhen mino síkan manaá kéká ano sen Iraiyan afoká ukhen mino síkan en mino. ⁹ *Maa síkan Eroti máa semí, “Téi fefái Yonin amen tíkakhé umpo ma vanta iye uron ná bakan ná banasi ano véi ma ena yaná dorarí iyain baya siyará iniya rafuno.” Maa siren Yisasin onano van en mino.

Yisasi Ma Yan Manápá Tauseni (5,000) Vanta Yunan Amein Baya Ino
(*Matiu 14:13-21; Maki 6:30-44; Yoni 6:1-13*)

¹⁰ Beni eyo iyampon kayo ano ovaránen eriven betí ankan ma yoren noré ein baya kayo Yisasin tiamiran betin mana yo avíaren ena nanin banta kéká me ampiren Betsaida se sin kákan barufá oren mino. ¹¹ Orivíkan kokhon nanin banta ano Yisasi ma orein afová uren béin bákuren orikan amusin iyáken Tiyarafenui yafisin pintena veya siamin iniyákan aí ma varé ein kayo ayofen mino.

¹² Inúpasi íkan tiyan míkan mifo sirantan kan orun kádan (12) beni eyo iyampon kayo ano véi vaintá eriven béin máa sen tiamemí, “Ma ma setí baruna akhempá ída mana nanin banta van mifo éi kaná

betin tiantesin ná kákan baru kayo fimpá bá tító baru kayo fimpá bá oriven ná betíi yunan má baran ma san dosino.”

¹³ Maa síkan Yisasi evaránen betí ankan tiamemí, “Tiretí ano vá mai nanin banta yunan ameno,” síkan betí ankan temí, “Dan manápá bereti vá kankan noyana vá anan dékun ban mifo ena vá dunan o miyaní é ma nanin banta me amente rafuno.” ¹⁴ Dan manápá tauseni (5000) fumara vanta vákan Yisasi vei eyo iyampon kayo máa sen tiamemí, “Mai nanin banta siamesin fifti (50) ano me kumádu kumádu ino.” ¹⁵ Maa síkan eyo iyampon kayo ano mai ma seiní íkan minó nanin banta ano kumanen mino. ¹⁶ Kumamíkan Yisasi mai yan manápá bereti vá kankan noyana vá máden inarufá kakháben Tiyarafenurá tusu siren mai vereti vá noyana vá kisikisi uren dákan bei eyo iyampon kayo ano masiman en mino. ¹⁷ Masiman íkan minó nanin banta ano kanaíen narákan antan dunan ma fara varé ein eyo iyampon kayo ano manafin o éke e éke uan átaru uren tiyan míkan mifo sirantan kan orun kádan (12) basiketi unan kayo víken mino.

Pita Ma Yisasi Nan Tiyarafenu Ano Ma Aní Ukhein Banta Ono Sein Baya Ino
(*Matiu 16:13-19; Maki 8:27-29*)

¹⁸ Maná damú Yisasi veyáká amúkiyan bakan bei eyo iyampon kayo ano véin má baré íkan béi máa sen betin inaemí, “Téin nan iye inó banasi ano siyan nafino.”

¹⁹ *Maa síkan betí ankan evaránen béin tiamemí, “Manáa kéká ano éin nan monó non péantan banta Yoni ino síkan inká manáa kayo ano Iraiya ino síkan inká manáa ano fara sen pefá ma sakhanampa vanta kayo varé ein pinté mana ano orun mantakhen ne siyan mino.”

²⁰ *Maa síkan betí ankan béi máa sen inaemí, “Tiretí ankan téin nan mai iye inó tiya rafono.” Síkan Pita evaránen béin tiamemí, “Tiyarafenu ano ma sian damuádiyáken ma sesi vanasi evarané avirano van tiantékun orintene ma sikhare ein mai vantán éi va ono.”

²¹ Maa síkan Yisasi vei eyo iyampon kayo van ída vá ena nanin banta siameno

* **9:7:** Mat 16:14; Mak 8:28; Ruk 9:19 * **9:9:** Ruk 23:8 * **9:19:** Ruk 9:7-8 * **9:20:** Yon 6:68-69 * **9:22:** Ruk 9:44; 18:32-33

siren ákonaen areuanten mino. ²² *Máa siren béi semí, “Banta Anin mano kokhon uman barantin maen ánon banta kayo vá monó ánon banta kéká bá man baya ma afová ukhein banta kéká bá ano véin oyan amiren aruan púdantin maen kanú manaú damusí intin béi evaránen orun mantanten mino.”

²³ *Máa siren minó eyo iyampon kayo véi máa sen tiamemí, “Mana nanin banta ano ma séin bákurono van anunu iyanten bei anunu maman bararasí uren ná ena ena yamú bei marípo yaa mamaren ná téin bákurino. ²⁴ *Mana nanin banta ano ma ve aunan pákaan ákona intin béini aunan mano o afeyoranten mifo mana nanin banta ano ma séi nan iniren ma ve aunan ampín nain kayoi aunan mano fara kamaen banten mino. ²⁵ Banten mifo mana nanin banta ano ma ma vararakena yanasinta variyáken ma veyan namuen afeyókantin maí yanasinta ano intesá uren ná béin ayainten nafino. ²⁶ *Mana nanin banta ano ma senti vava vá téin ma san ma ayave van iyaré esin ma Banta Anin mano ma vei kákan kakhan má be Afóeni kakhan má kantasí ukhein enisori kayoi kakhan má ma ínaimpáké erinten maen maí nanin banta van dere véi ayave van uantanten mino. ²⁷ Téi fura urá tiré tirití ankan tiamiyá uno. Mará ma saréa mantakheona kéká pinté manáa ano ída fúken mi Tiyarafenuí yafisin baru onanten mino.”

Yisasin Au Vukhafá Ma Enará Ein Baya Ino

(Matiu 17:1-13; Maki 9:2-13)

²⁸ Yisasi maí vava kayo siran dan manápá ifo afápá kanú manaú un kádan damú esantavíkan Pitan má Yonin má Yemisin má avíaren amúkono van mana anurá óden mino. ²⁹ Ódiven amúkiyan baré íkan béin auná enarasí íkan béini ona ano maman efaní iyan moéken panu sen afayu an den mino. ³⁰⁻³¹ *Máan tikan kankanan banta Mosesin nú Iraiya nú dákó iyain má békanan au fáké moéken panu siyákan Yisasin ma Yerusaremí arintin púaren ma ma vara me ampíren orinaí pákena vava siyaren mino. ³² *Máa

siyákan Pitan má ena eyo iyampon kanan má auunan aí iyaimpin betí ankan aunká bakharen orun mantaaren Yisasini kakhan má kankanan banta vá ano ma mantakhein onen mino. ³³ Oniyákan ma míkanan banta ano Yisasin ma me ampíren oriyákan maen Pita ano máa sen Yisasin tiamemí, “Bafan noe, setí ankan ma mará baruna maí kama ukhen mino. Tetí kanaíé kanú manaú iyon baran namun uvádékun mana éin nina vantin mana Mosesin nina vantin mana Iraiyan nina vantin ino.” Pita maí vava sen mifo veyan náiesá tiya rafuno sen ída afová ukharen mino.

³⁴ Pita maí vava fara siyan bakan mana konan mano vetí ankan me ukuan dararan akhokho van en mino. ³⁵ *Akhokho van iyákan maí konan pinte mana oovaren máa semí, “Ma se sanin pefá aní ukheruna ifo véini vava vá ineno.” ³⁶ Maí vava ma sian kíparákan Yisasi veyáká ana mairá mantakhan betí ankan óden maí damú ma afokáin onein danasinta veti maí damú ana ída ena nanin banta siamen mino.

Namu Aunan Bá Ein Iyampon Ma Yisasi Ayofein Baya Ino

(Matiu 17:14-21; Maki 9:14-29)

³⁷ Ená damú Yisasin má Pitan má Yemisin má Yoni má ano maí anuyon me ampíren araviyain má kokhon nanin banta ano vetin má efóken mino. ³⁸ Maí aúbanáké mana vanta ano oovaren máa semí, “Aru soe, éi kana eriveyá te sanin onante fono. Maí mana iyampon manan téi yékun baren mino. ³⁹ Kokhon damú mana namu aunan mano véin aúpin ódivin maen béi namu vá dákan maen maí ano véin máden antu antu íkan efanten akhare ano ven oo fenté eriyákan maen maí namu aunan mano véin au máden namu uren ída ainen me ampíren orin nainí é iyan mino. ⁴⁰ Máan tiyáká téi ákonaé berai sé eni eyo iyampon kayo van maí namu aunan do siantano van tiamiyákan mifo vetí ankan ída kanaíen tiantan nainí iyan mino.”

⁴¹ Máa síkan Yisasi semí, “Tirití ída munun in nanin banta kayo ompo siretíi ineine vá avúavá bá ída funtáken mifo náí

* 9:23: Mat 10:38; Ruk 14:27 * 9:24: Mat 10:39; Ruk 17:33; Yon 12:25 * 9:26: Mat 10:33; Ruk 12:9 * 9:30-31: Ruk 9:22 * 9:32: 2Pi 1:16-18 * 9:35: Ruk 3:22

máa yamusá téi siretin má bákerá turetí uman bariyá bante rafuno.” Máa siren mai vanta van “E anin avire mará ereno,” sen tiamen mino.

⁴² Máa síkan mai iyampon mano ma Yisasini ádé eríkan maen mai namu aunan mano véin karúdan barará aravúbin béin máden antu antu iyain má Yisasi mai namu aunan asíkan mai iyampon mano evaránen kama uvíkan be afóen amen mino.

Yisasi Veyan Ma Fúaren E Mantan Nain Nan Ma Kan Dádasi En Tein Baya Ino

(Matiu 17:22-23; Maki 9:30-32)

⁴³ Máan túkan minó nanin banta ano Tiyarafenui kákan ákona ódaren akhokho van iyáken Yisasi ma variyain dana san kokhon ineine iyákan Yisasi vei eyo iyampon kayo van máa sen tiamemí, ⁴⁴ *Kamaeya vá átaren kaúde ma vaya ineno. Banta Anin maen mana ano namuro kéká ayampin avían aminten mino.” ⁴⁵ *Eyo iyampon kayo ano mai vayai ana ída afová en mino. Mai vayai ana ano vetimpin aúpá bakan ída afová iyáken mi mai vaya inain nan betí ankan akhokho van uren ída véin inaen mino.

Inaru Yafisimpin Iyé Kákaní Inten Nafino Ma Sen Ina Ein Baya Ino

(Matiu 18:1-5; Maki 9:33-37)

⁴⁶ *Maná damú eyo iyampon kayo ano veraran iye anó o esesí inten nafino siren asive asive iyaren mino. ⁴⁷⁻⁴⁸ *Máa siyákan Yisasi vetí ankani ineine afová iyáken mana arará iyampon aviren bei ádé me mantaantáden eyo iyampon kayo máa sen tiamemí, “Iye anó téin nan inireyá mana máan tukhein iyampon arará aya inten nafi mai ano séin mi siya inten mino. Inká iye anó téin tiya inten nafi mai ída séin tiya inten mifo Tifóe ma séin tisintá erikheruna mai véin mi aya inten mino. Para vara seyo, siretí ankampin ma aví ída vain nanin banta anon o esesí inten mino.”

* **9:44:** Ruk 9:22 * **9:45:** Ruk 18:34 * **9:46:** Ruk 22:24 * **9:47-48:** Mat 10:40 * **9:50:** Mat 12:30; Ruk 11:23 * **9:54:** 2Ki 1:9-16 * **9:54:** Tiyarafenui manáa vompon dókifin ena asotúin baya máa sikhemí, “Pefá Iraiya máan tukharen mino.” * **9:56:** Tiyarafenui manáa vompon dókifin ena asotúin baya máa sikhemí, Béi máa semí, “Tiretí ankan intéa aunan niná bafo mai sireti ída afová ukha ompo Banta Anin mano ída vanasi namu ono van eren mifo véi evaránen avirano van mi eren mino.

Iyé Ída Setinti Namuroí Inten Nafino Mai Setin Tirona Ino Ma Sein Baya Ino

(Maki 9:38-40)

⁴⁹ Máa síkan Yisasini vaya Yoni iniren béin evaránen tiamemí, “Bafan noe, setí ankan onékun mana vanta ano éin avíká namu aunan tiantiyáken éin ída vákuren nói setí ankan mano véin are uantano van é uno.”

⁵⁰ *Máa síkan Yisasi véin máa sen tiamemí, “Tiretí ankan ída vá béin airo ananí uantano. Tiretin ma ída namuroí iyain kéká ano mai siretin arona ino.”

Sameriá Kéká Ano Ma Yisasin Oyan Amein Baya Ino

⁵¹ Tiyarafenu ano ma Yisasin evaránen avirantín inarufá ódin nain ádé iyákan Yisasi Yerusaremí orono van ákona inin bariyaren mino. ⁵²⁻⁵³ Béi manáa vanta kéká tiantan minó ben nina yána utaono van mana Sameriá bain barurá oríkan mai varu rákena nanin banta kayo ano afová iyáken béi Yerusaremí orono van mino siren betí amápin ída Yisasin e avian kaen mino. ⁵⁴ *Máan tikan beni eyo iyampon kanan Yemisin nú Yonin nú ano mai ma Sameriá nanin banta ano ma variyain avúavá baya iniren béin máa sen inaemí, “Bafan noe, éi anunu iyan nona vará tetí ankan inarufákana ira arékun ná morun betin ken kaurinten nafino.”* ⁵⁵ Máa síkan Yisasi yo vaéaren míkanan asiren ⁵⁶ betí ankan ena varufá oren mino.*

Yisasin Ánain Dakhafiain Nan Ma Uman Baran Baya Ino

(Matiu 8:19-22)

⁵⁷ Oriyaré íkan aasákana mana vanta ano Yisasin máa sen tiamemí, “Éi ma orinona akhempá téin má bákuré nonté uno.”

⁵⁸ Máa síkan Yisasi evaránen béin tiamemí, “Afá iyan kayo ina vara ain ban maen nun kayo ina nan báé iyan mifo Banta Anin mano ma avíken baran kanú ída van mino.”

⁵⁹ Maa siren Yisasi ena vanta van temí, “Éi ereya séin dakha fono,” síkan mai vanta ano semí, “Bafan noe, éi áesisá te sífôen nare mo masí uresá ono.”

⁶⁰ Maa síkan Yisasi véin maa sen tiamemí, “Áesin purin nanin banta ano vetiyan ná púkein kéká masí iyantiya éi oriveya Tiyarafenui yafisin baru fintena vaya sian dákó ono.”*

⁶¹ *Maa síkan ena vanta ano Yisasin maa sen tiamemí, “Bafan noe, séi en bákurono van ukhé umpo éi kaná áesirá tesi kéká mo susu siantádesá ono.”

⁶² Maa síkan Yisasi evaráne véin tiamemí, “Sitia fákaráken ma ena ena yovaébiyan oyampá ma onan nain kéká ano ída kanaíen Tiyarafenui yafisin baru fintena yorarí inten mino.”

10

Yisasi Ano Ma Seventi-tu (72) Vantan Avían Kaúden Tiantan Orein Baya Ino

¹ *Ínaimpáké Bafan mano seventi-tu (72) vanta avíden beyan ma orono van ukhein barufá tiantan béin anuanten kankanan orirú en mino. ² *Oriyákan mai kéká maa sen tiamemí, “Dunan anafin kokhon ná dunan afukhakhán mai yunan ma yuyasin banta kayo ída kokhon ban mifo siretí ankan mai yunan ana afóentasá amúkesin ná béi kanaíen doran banta kéká tiantan tiná mai yunan anafin oriven ná duyasio. ³ *Tiretí ankan orin nompo vá ineno. Téi siretí ankan afá iyan aúbaná ma sipisipi arará kayo ma siantan oreiní é uno. ⁴ *Tiretí ankan ída vá moní kain unan má ona khain unan má arantan anamun má bare vá oriyáke mae ída vá aasá ma esantanona nanin banta van bayan mino inúpá ino seno.*

⁵ “Oriyare ma mana namumpin ma oferante vá esé arái in baya vá maa seno, ‘Áesin Tiyarafenu ano vá tire antun ná ará kusin amino.’ ⁶ Mai namumpin ma mana ará kusin má bain banta ma vantin maen Tiyarafenui ará kusin mano mai vanta vá

bei kéká bápín banten mifo máan banta ma ída vantin maen Tiyarafenui ará kusin mai vanta vá bei kéká bápín ída vantin mino. ⁷ *Tiretí ankan mai namumpin mana vá bákeya mai finté ma amin nain dunan má non má ana vá nano. Para vara seyo, yoriyá ein banta ano miyan baré iyan mifo siretí ankan ída vá ena namumpin e fere khuve ono.

⁸ *Máan tin nompo siretí ankan ma mana kákan barurá ma oresin ma kama iyáken aviren má naumpin ma mo kaúden ma amin nain dunan ná parav á nano. ⁹ Tiretí ankan mai varu rákena aí nanin banta kayo ayofiyáke vá Tiyarafenui yafisin baru inka siretí ankani ádé erikhein mino seya vá betí tiameno. ¹⁰ Tiretí ankan ma mana varufin oresin ma mai varuráké kéká ano ma ída e avían mápin ma kaintiya siretí ankan mai varui aasá o mantaveya vá maa seno, ¹¹ *‘Tiretí ankani varu rákena kayó ano setí ankan tirantantá dampakhein ma yo fúpá tian karúdanuna anon tiretí ankan aní iyáken mai avúavá ma vareona ano umei e ono’ se vá betin tiamiyákeya vá ‘Tiyarafenui yafisin baru inka ádé erikhein mifo siretí ankan kama e vá ineno,’ seya vá betí ankan tiameno. ¹² *Téi siretí ankan tiamiyá uno. Banasi ma yaimin damú ma Tiyarafenu ano aní ukheintá ma afoká intin mai varu rákena nanin bantai uman mano Sodomú baru rákena nanin bantai uman esantanten mino.

Ída Ma Ará Baeran Nain Baru Kayo Ano Ma Kákan Uman Baran Nain Baya Ino (Matiu 11:20-24)

¹³ Maa semí, “Korasíníke nanin banta oe, sirun uron mi ke ono. Betsaidáke nanin banta oe, sirun uron mi ke ompo mana vanta ano ma Taiyá bá Saidoní báí varufin ma oriven máan avúavá daná ma mo afoká intin maen betí ankan kanaíen ará baéden arunaná aúí daná uren amon ánompin kakhufaren kumanten betíí ume van arunan inté ein mino. ¹⁴ Banté ein

* **9:60:** Manáa afova vanta kayo ano ma iniyain esé purin maen aú iyampompin ma fúkein mino. Mai rákena furin maen dan bukhafa ma fúkein mino. * **9:61:** 1Ki 19:20 * **10:1:** Mak 6:7 * **10:2:** Mat 9:37-38; Yon 4:35 * **10:3:** Mat 10:16 * **10:4:** Mat 10:7-14; Mak 6:8-11; Ruk 9:3-5 * **10:4:** Ma vaya ana máan mi sikhen mí, ayáká ída o mantakhe vá bano aine vá ore yorano. * **10:7:** 1Ko 9:6-14; 1Ti 5:18 * **10:8:** 1Ko 10:27 * **10:11:** Apo 13:51; 18:6 * **10:12:** Esé 19:24-25; Mat 10:15; 11:24

mifo Tiyarafenu ano ma vanasi yaiminton ma aní ukhein damú ma yákó intin tiretin amaniná ma afoká inain uman maño Taiya sú Saidoni úpin ma afoká ukhá ein uman moéken esantanten mino. ¹⁵ Máan tinten mifo éi Kapeneamú baru oe, éin iye ano avían dan ayontá kainten nafino. Ída mana ano aviranten mifo pefá ma fúkein nanin bantai varufin manan aravin nono.”

¹⁶ *Máa siren Yisasi mai seventi-tu (72) vanta siamemí, “Tiretí ankani vaya ma iniyain nanin banta ano séinti vayan iniyain mifo inká tiretí ma oyan amiyain nanin banta ano mai séin mi oyan timiyain mino. Téin ma oyan timiyain nanin banta ano séin ma sisintá ererunan oyan amiyain mino.”

Seventi-tu (72) Vanta Ma Yisasi Siantan Orikhá ein Kéká Ma Ovaránen Ereín Baya Ino

¹⁷ Ínaimpáké seventi-tu (72) vanta ma siantan orikhá ein kéká ano ovaránen amusin iyan eriven me siamemí, “Bafan noe, setí ankan ma éin aví arékun maen namu aunan kayo ano setinti vaya ánain bákuren mino.”

¹⁸ *Máa síkan Yisasi vetí ankan evaránen tiamemí, “Téi onékun Ban Anon mano inaru me ampiren afayuí ma einíen eraven mino. ¹⁹ *Ineno. Téi siretí ankan inka ákona amikheruna sireti kanaíeya osafáe kayo vá banta untaran danasinta vá dasádeya siretí ankan kanaíeya siretíi namuro minó ákona esantaresin béi ída kanaíen tiretíi minó daná namu inten mino. ²⁰ *Máan tinten mifo siretí ankan ída vá amusin iyáke seya namu aunan mano setin too yaiyiyan mino seno. Inarufá ma Tiyarafenu ano ma vei vompon dókifin ma siretin aví uvantein nará amusin ono.

²¹ Maí damú Kantá Aunan mano Yisasin arápin amusin amíkan béi máa semí, “Tifóe oe, éi ma vara vá inaru vái Bafan bákeya éi ma kama afova vain kéká ma ma yaná aúmanantádeya ma arará iyampon kayo an dakhein kéká ma aní eona van tusu sé uno. Tifóe oe, éi fura sireya e anunun dakhádeya éi máan te ono.

²² *“Te Sifóe ano minó danái sen tiyampin kaúken mino. Mana ano ída ve Anin afová ukhen mifo ve Afóe ano anan afová ukhan mi inká mana ano ída ve Afóen afová ukhen mifo ve Anin mano ma aní ukhein kéká bá be Anin má ano anan béin afova ukhen mino.”

²³ Máa siren Yisasi yo vében bei eyo iyampon kayo oniyáken temí, “Tiretí ankan ma oniyaona yanasinta ma onan nain kéká ano vá amusin ino. ²⁴ Pefá kokhon ná sakhanampa vanta kayo vá kokhon ná kin kayo vá ano siretí ma saréa oniyaona yana onano van anunu iyaren mifo ída onen mino. Inká tiretí ma iniyaona vaya ineno van anunu iyaren mifo ída inen mino.”

Sameriá Banta Ano Ma Kama Avúavá Mantein Pákena Ma Ovaékein Baya Ino

²⁵ *Mana man baya ma afová ukhein banta ano Yisasin akhenóka uan onano van orun mantaven béin máa sen inaemí, “Aru soe, séi intesá uresá para van oriyán ban aunan barante rafuno.”

²⁶ Máa síkan Yisasi evaránen béin inaemí, “Man bayafin intéa vayá bákayá dankaféiya fono.”

²⁷ Síkan man baya ma afova ukhein banta ano evaránen temí, “Tiretí ankani aú amafon má ákona vá ineine vá pokesá pura uró tire vá Bafan Tiyarafenu van anunu iyáke vá

Diu 6:5

eyan nan ma anunu iyaonaíe vá ena van anunu ono.”

Riv 19:18

²⁸ *Máa síkan Yisasi véin tiamemí, “Mai ma seona mai fura se ompo vá mai ma seonai ureya vá para van aunan barano.”

²⁹ Máa síkan man baya ma afová ukhein banta ano veyan nan puntákein banta ino sino van Yisasin máa sen inaemí, “Man baya ano iyen nará tiretíi arona kayo e sikhen nafino.”

³⁰ Máa síkan Yisasi evaránen béin tiamemí, “Mana vanta ano Yerusaremí me ampiren Yerikó barufá araviyaré íkan umoyan banta kayo ano aasá dafíkaren béin pákaren namu arirí uren beni ona varen karan orivíkan béi aasá bakhen áde anantá purono van iyaren mino. ³¹ Maí damú ana mana monó doran banta ano mai aasá dakhafen araviyaren

* **10:16:** Mat 10:40; Ruk 9:48; Yon 5:23 * **10:18:** Yon 12:31; Rev 12:8-9 * **10:19:** Íbo 91:13; Mak 16:18
* **10:20:** Fir 4:3; Rev 3:5 * **10:22:** Yon 3:35; 10:15 * **10:25:** Mat 22:35-40; Ruk 18:18 * **10:28:** Riv 18:5

onákan mai vanta ano aasá bakhen bákan akhempá o úkuaren esanten oren mino. ³² Orivíkan mana Rivai vanta ano máan mana en mairá oriaren mai vanta e onen akhempá o úkuaren esanten oren mino. ³³ Orivíkan mana Sameriá banta ano mai aintá ana araviyaren mai vanta ma vaintá oriven onen moéken arunan uanten mino. ³⁴ Mai vanta van arunan uren béin ádé oriven ben ma arurampin uveri féantiyan uvaini vanaan tiyan uren mai namon damuanten mino. Damuantáden bei donkin daró dauman ka íkan kumamin do aviren aasá ma miyaní uren bariyain namumpin mo kaúden kamaen dafisen mino. ³⁵ Dafisen bakharen ená damú mai má afóen kankanan siriva moní amiyáken máa sen tiamemí, “Ma vanta vá éi kama e vá dafiseno. Dafisiyáke ma manáa ei moní ma ventá kíparákaréesí ma séi ovaráné erenté maé éin mai máa moní evaráné amenté uno.”

³⁶ Máa siren Yisasi ano man baya ma afova ukhein banta inaen temí, “Éi ma iniyaona mai máa kanú manaú banta kayo finté intéa vanta anó umoyan banta kayo ano ma aruádan baré ein banta van anunu ukharen nafino.”

³⁷ Máa síkan mai vanta ano semí, “Mai ma véin nan arunan uren aya ein banta ino,” síkan Yisasi véin tiamemí, “Éi orive vá máa avúavasá barano.”

Mata Nú Maria Nú Amápin Ma Yisasi O Varé Ein Baya Ino

³⁸ Máa siren Yisasi má bei eyo iyampon kayo vá oriyaren mana varurá onóbíkan mai varu ráke mana Matan ne sin nanin mano Yisasín aviren be amápin oren mino. ³⁹ *Mo orákan mana Matan aun Marian ne sin nanin baren béi Yisasín arantan ádé o kumanten béini vaya iniyaren mino. ⁴⁰ Baya iniyákan Mata veyáká dunan taran tasusasu iyáken kokhon ineine uvaen Yisasi vaintá oriven béin in-aemí, “Bafan noe, se sun mano séin me ampiráká teyan dunan tariyá umpo mai van ídá ovaré iniya fono. Béin tiamesin ná téin me siya ino.”

⁴¹ Máa síkan Bafan mano evaránen béin tiamemí, “Mata. Mata oe, éi kokhon dana san ineine iya ompo ⁴² *mana yana san mana vá ineno. Maria kama yanái varano van anunu iyain téi ída kanaíé béin ma varano van iyain daná béin areuantanté uno.”

11

Yisasi Ma Amúkin Afova Amein Baya Ino (Matiu 6:9-15, 7:7-11)

¹ Maná damú Yisasi mana akhempá amúkiyan baren kíparan mana vei eyo iyampon mano máa sen béin tiamemí, “Bafan noe, fefá ma Yoni ano ma vei eyo iyampon kayo ma amúkin afova ma amikharé einí eya éi setin afova simeno.”

² Máa síkan Yisasi evaránen betí ankan máa sen tiamemí, “Tiretí ankan ma amúkinte vá máan ná teno, “Tifóe oe,*

en avisá kantasí intin ná éini inaru yafisin ná erino.*

³ Mana mana yamúkáke yunan ná timeno.

⁴ Éi setinti ume vá ampisintano.

Para vara seyo, ena kayo ano ma sétin umeí usintáká ein ampiantéiyá tiféuno.

Éi ída vá áesí tirá mantan akhenókafin oferá tifano.’”*

⁵ Máa siren betí ankan evaránen tiamemí, “Tiretin aúbanáké mana ano ma vei arona varé intin ma mai vanta vaípa inuran aúban oriven ‘kanú manaú bereti anamun timikaréesí anona evaráné ameno’ sinten mino. ⁶ Para vara seyo, mana sirona ano ayá káké eriyen baren te simá e vaká béin ma amenuna yunan ída vá uno.’

⁷ “Máa sin maen mápin ma vain banta ano evaránen tiamemí, ‘Ten má te sikhafana vá bakhékun ona fefái munkukhein téi ída kanaíe e mantavé éin mana yaná amenté umpo ída vá téin uman timeno.’ ⁸ Téi siretí ankan tiamé uno, béi ve arona ifo má afóe ano ída kanaíen orun mantaven bereti aminté ein mifo véi ma

* **10:39:** Yon 11:1; 12:2-3 * **10:42:** Mat 6:33 * **11:2:** Tiyarafenui manáa vompon dókifin ena asotúin baya máa sikhemí, ‘Inarufá baona Sifóe oe,...’ * **11:2:** Tiyarafenui Manáa vompon dókifin ena asotúin baya máa sikhemí, ‘...erino. Inarufá ma en anunu yakhafiyainisá ma varará dere ino. * **11:4:** Tiyarafenui manáa vompon dókifin ena asotúin baya máa sikhemí, ‘Namu yaná pinte vá tétin do sivirano’ áa ‘Ban Anon ayan pinte vá tétin do sivirano.’

ínanen onará ankamiyan bain nan mi má afóe ano orun mantaven minó béi ma inantiyaré ein daná máa aminten mino.

⁹ Máan tukhein nan mi siretí ankan tiamé uno. Inantesin maen Tiyarafenu ano kanaíen aminten mino. Dosiyaaré esin maen Tiyarafenu ano kanaíen aní intiya ona nono. Onará ma ankamiyaré esin Tiyarafenu ano kanaíen ona yiantanten mino. ¹⁰ Para vara seyo, iye anó inantéiya nafi mai anon baré iyan mino. Iye anó dosé iyan nafi mai ano oman dákó é iyan mino. Onará ma ankamein dianté iyan mino.

¹¹ “Tiretí iyampon afóe yan ma vaonafá ma e anin mano* mana noyana van ma inan tintiya éi kaná mana osafáe aminte fono. ¹² Áa éi vaipá ma kokore amú timeno ma sinti mae iyavan ná dauman aminte fono. ¹³ Tireti namu vanta kéká báke ompo sireti akhafana ma kama yaná amin ma afová ukhante mae mai Kantá Aunan nan ma inantinona kékái inaru fáké Afóe ano moéken aminten mino.”

Yisasi Má Namu Aunani Ánon Banta Van Ma Beseburi E Ma Siyain Mái Vaya Ino (Matiu 12:22-30; Maki 3:20-27)

¹⁴ Mana vantafin namu aunan báken béin oorá iyádan ída vaya sin baré ein Yisasi ano mai namu aunan do siantan orivin mai vanta ano vaya siyákan banasi ano anúden oreraen mino. ¹⁵ *Máan tiyákan manáa kéká ano semí, “Béi namu aunani ánon banta Beseburini ákonarái namu aunan do siantian mino.” ¹⁶ *Máa síkan manáa vanta ano inaru fáke aní daná aní ino van Yisasin akhenókaen mino.

¹⁷ Máa siyákan Yisasi vetíi ineine fefá afová iyáken máa sen tiamemí, “Mana vantai yafisin aúpin ma aúban daiminten maen mai avúavá ano kákan uman maman dákó intin inka mana namunté ma aúban daimintin maen mai namun mákúken eravinten mino. ¹⁸ Máan tinten mifo Ban Anon mano ma veyan daimintin maen inté ená beni yafisin ákonáen mantanten nafino. Para vara séi máa siya rauno. Tiretí ankan mano

siyáke Beseburini ákonarái namu aunan do siantian minon tiyan ná uno. ¹⁹ Tare ma namu aunani ánon banta avíká ma séi namu aunan do siantiyáku mae mai siretíi ánain ma yakhafin nain kayo ano iyen avikasá namu aunan kayo yo siantanten nafino. Mai kayo ano vá tiretíi avúavá daimino. ²⁰ Máan tinten mifo Tiyarafenui ákonafó ma namu aunan do siantiyáku maen Tiyarafenui yafisin ákona ano inka sirétimpin erikhen mino.

²¹ “Mana ákona vanta ano ma aruvin danasinta utaaren ma ve amáká dafikantin maen ben nina yanasinta kamaen banten mino. ²² *Banten mifo mana veni ákona esantakhan nain banta ano ma eriven mai vanta vá aruvúden ma véin aruren maen mi veni aruvin danasinta vá ona vá máden béi ma anunu iyain kékái yaiman aminten mino.

²³ * “Éi iye anó téin má ída vante fono mai éi senti namuro ono. Inka éi iye anó téin ída siyaé banasi avían átaru inte fono mai éi anon banasi intan ne sin orera inten mino.

Namu Aunan Kayo Ano Ma Evaránen Banta Aúpin Oriyain Baya Ino (Matiu 12:43-45)

²⁴ “Mana vanta ma namu aunan mano me ampiren kámá barafá oren maen bei avíkan baru van dosen orin ma avíkan baru ma ída van máa sé iyan mino, ‘Evaráné mai ma me ampíré ereruna namun oronté uno.’ ²⁵ Máa siren o onákan mai namun bakhari uren puntaádan baren mino. ²⁶ Bantin ma ódaren maen béi evaránen oren dan manápá ifo afápá kan un kádan namu aunan kayo vetíi namu avúavá ano veni namu avúavá esantakhein kayo o avían morantin mai namumpin o vanten mino. Pefá mai vanta ano namu ukharen mifo saréa véi moéken namu uron inten mino.”

Inte Kéká Anó Kákan Amusin Baranten Nafino

²⁷ *Mai vaya Yisasi siyákan banasi aúbanáké mana nanin mano oovaren temí, “Éin ma kaúden nan amein nanin mano vá amusin ino.”

* **11:11:** Tiyarafenui manáa vompon dókifin mará ena asotúin baya máa sikhemí, mana vereti van ma inan tintiya éi kaná mana onámaná aminte fono. Áa...” * **11:15:** Mat 9:34; 10:25 * **11:16:** Mat 12:38 * **11:22:** Kor 2:15

* **11:23:** Ruk 9:50 * **11:27:** Ruk 1:28, 42, 48

²⁸ Maa síkan béi evaránen temí, “Tiyarafenui vava ma iniren oo yayien bákuriyain kéká ano vá amusin ino.”

Yisasi Ano Yonan Pin Ma Aní Daná Afoká Ukhá Ein Baya Sen Mino
(Matiu 12:38-42; Maki 8:12)

²⁹ *Maa siyákan banasi e átaru en kokhoní iyain má Yisasi máa sen betin tiamemí, “Tare má damú ma vain nanin banta mai namu nanin banta ino. Enará ukhein avúavá aní intí onano van ina inten mifo vetí ankan ída kanaíen mana aní daná onanten mino. Mana sakhanampa vanta Yonani aní daná anan betí onanten mino. ³⁰ Maañ tukhein nan mi Yona maen Ninivé nanin bantai aní danasí ukháintin pasen Banta Anin mano yere sare ma vain nanin bantai aní danasí inten mino. ³¹ *Saotikena Kuini ano* vanasii yaimin damú ma yáko intin maen e mantaven má damú ma vain nanin bantai avúavá daíden uman aminten mino. Para vara seyo, mai kuini maen bara akhen páké Soromonini kama afova vava ineno siren eriven inein mifo saréa Soromonin esantakhein mano e van mino. ³² *Ninivé nanin banta ano orun mantaven maen má damú kena nanin bantai avúavá daíden uman aminten mino. Para vara seyo, Yona ano ma monó bava vetí ankan tiamin maen mai kéká ano ará baeren mifo saréa mana Yonan esantakhein mi eren mino.

Auu Ma Vain Mai Au Vukhafai On Mino
(Matiu 5:15, 6:22-23)

³³ *Ída mana vanta ano yaamu uruan aúpa safi kavefin nafi kaé iyan mifo yan takhókái kain báken panu sen kakhayan mi maifin ma ódiyain kayo ano kamaen oné iyan mino. ³⁴ Éin auu ma vain mai eni aúfin ma kakhantan on mi van mifo en auu ma kama ukhan maen minó bukhafafin panu sikha vá ompo auu ma namu intin maen mai minó bukhafan titípa inten mino. ³⁵ Maañ tinten mifo éin aúpin ma vain kakhan mano sítípa inafa vá dafian ná ákona ono. ³⁶ Maañ tukhein nan mi eni minó bukhafa ma fanu sikhantín ma mana akhempá ída sítípa ukhantín maen mai fanu ano en aúfa daamu ma kheiní inten mino.”

* **11:29:** Mat 16:4 * **11:31:** 1Ki 10:1-10 * **11:31:** Saotikena Kuini maen mai Seba kékái kuini ino. Taréa mai vara aví Yemeni e sikhen mino. * **11:32:** Yna 3:5-10 * **11:33:** Mak 4:21; Ruk 8:16

Yisasi Ma Farasisi Kayo Van Amaan Baya Sein Mino

(Matiu 23:1-36; Maki 12:38-40; Ruku 20:45-47)

³⁷ Yisasi ma vava sian kíparan maen mana Farasisi vanta ano véin má mo yunan nano van ina íkan mai vanta amápin óden dunan kaúden nan takhóká un kumanen mino. ³⁸ Un kumamen Yisasi ída ayan tesé inton dunan niyákan mai Farasisi ano kokhon ineine en mino.

³⁹ Kokhon ineine iyákan Bafan mano máa sen tiamemí, “Tiretí Farasisi kayo ano kápi vá disi vá dante anan teséiya ompo siretin aúpin ída avarí avúavá bá namu avúavá bá vikakhen mino. ⁴⁰ Tiretí óen kéká soe! Ída mai ma yan bukhafa uvarein mano aú bukhafa vá uvanten nafino. ⁴¹ Maañ tukhein mifo mai ma disifin bain danasá ona i van nanin banta amesin ná tiretí minó danasinta avusese ukhen bano.

⁴² “Tiretí Farasisi kayo ano vá dafiseno. Tiretí ankan tiyan mikampintan ma yaídeya Tiyarafenuñ mana masin man ma yunan ana fintena sító daná ma safofin ase amin dana kayo amiya ompo ída véin anunu iyáke namu avúavá anan bariya ompo kama avúavá banasi uantiya vá Tiyarafenu van anunu ono.

⁴³ “Tiretí Farasisi kayo ano vá dafiseno. Tiretí esé an bain kará máde monó átaru namun kayofin kumaneno van anunú iyákeya átaru varurá banasi ano kama uren amo sino van manan éiya ono.

⁴⁴ “Tiretí ankan dafike vá bano. Para vara seyo, furin banta kayo ma aúpa barafin masí uran bákan banasi ano ída onanton ma mai yaró onóbe enóbe iyan ma Tiyarafenu avorá painí ein an mi yakharono.”

⁴⁵ Mana man bava ma afová ukhein banta ano mai vava iníden Yisasin evaránen tiamemí, “Aru soe, éi ma mai vava seona mai sétin má inan tinkayan te ono.”

⁴⁶ Maa síkan Yisasi evaránen tiamemí, “Tiretí man bava ma afová ukheona vanta kéká basá dafiseno. Tiretí ankan ma afova amiyaona ano vanasi amaniná kákan

uman amenan bariya ompo ída mana yáman kaureya ayaiya ono.

⁴⁷ “Tiretí ankan dafiseno. Tiretin anafu yan mano sakhanampa vanta kéká arin púkaréiyai mai masí kayoi siretí úádiya ono. ⁴⁸ Pefá ma siretin anafu aráo ano ma varein danái sare siretin avúavá ano aní iyan mifo mai kéká ano sakhanampa vanta kayo aruan púdákái siretí ano mai kayoi masí kama iya va ono. ⁴⁹ Mai van mi Tiyarafenu ano vei inimpin tiyáken, “Téi sakhanampa vanta kayo vá baya varen orin banta kéká bá tiantékun betí baipá orintin maen manáa kéká aruan puriyáken inká manáa kéká para uman aminten mino.” ⁵⁰ Mai anarái ma vara ma araien uvarein táké ma furen eriyen baré ein sakhanampa vanta kayoi nare miyan ná tare ma vaona nanin banta ano vá barano. ⁵¹ Eborin táké arái uren eriyen maen ikun uan amin takhó bá monó namun aúbaná ma Sekaraiyan eman aruan purein mai kékái nare miyan tare ma vaona nanin banta amanináí afoká intéíi séi siretin tiamiyá uno.

⁵² “Tireti man baya ma afová ukheona vanta kéká ano yafíke vá bano. Mai aasá ma ódiyain kayoi aa iyariya vákeya veti ma kamaen afová uren ódono van iyain do maman karúdiya va ompo siretiyantá ída mai aasá ódikha ono.”

⁵³⁻⁵⁴ Maa siren Yisasi mairá me ampiren oriyákan Farasisi kayo vá man baya ma afová ukhein kéká bá ano véin nan aran nan uren ara ara yana san ina iyan Yisinin máká dantin béi intéa vayá tintirá béin pákante rafuno siren dafian ákonaen mino.

12

Amaan Baya Kayo Vá Ará Ákona Uantan Baya Kayo Vá Ino

(Matiu 10:26-27)

¹ Máan tiyákan kokhon tauseni nanin banta e átaru en baru víkaaren makaká uven arantan dasamin maran en mino. Máan tiyákan Yisasi vei eyo iyampon kayo nare máa sen tiamemí, “Tiretí ankan Farasisi kayoi yisi vará dafian ná ákona ono. Beti ma kampun tiren ma mai vaya ánain ma ída yakhafiyain nan mi siyá uno.

² *Máan tukhantin inte yanasá aúpá dará dantin baré inten nafi mai Tiyarafenu ano maman dákó intin maen inká minó aúpá baya vanasi ano kanaíen afova inten mino. ³ Máan tukhen mifo minó baya ma siretí ankan dunteimpin ma siyaré esin maen mai vaya minó nanin banta ano karái ininten mino. Minó baya ma siretí ankan ma aúpá mápin ma kafaya sikharé esin maen mai vaya má amon táké oovaren banasi siaminten mino.”

Namuro Kayo Van Ma Ída Feran Baya Ino

(Matiu 10:26-31)

⁴ Maa siren Yisasi evaránen tiamemí, “Te sirona kéka soe, séi siretin tiamé uno. Tiretí ída vá dan bukhafa máa ma aruan puré iyain kéka san perano. Inaímpaké beti ída evaránen kanaíen mana yanasí inten mino. ⁵ Máan tukhen mifo iyen nará perante fono mai séi siretin tiamenté uno. Tiyarafenu vará tiretí ankan perano. Tiyarafenu ano ma vanta aruan púden maen béimpin ákona vákan uman baren berai siyan purin barufin karúdanti aravin nompo vá Tiyarafenu van mana vá perano. ⁶ Tuenti toya máafó ma yan manápá nun arará máa ma miyaní é iyain tiretí afová ukha ono. Mai nun arará kayo fintena Tiyarafenu ano ída mana áuné iyan mino. ⁷ *Máan tukhan mi Tiyarafenu ano siretin ánon do minó dan káan kíparen tiretí ankan minó afova suron ukhen mino. Máan tukhen mifo siretí ankan manon kokhon nun arará kayo esantare kákaní ukha ono.

Yisasini Vaya Sin Nan Ma Ída Ayave In Baya Ino

(Matiu 10:32-33, 12:32, 10:19-20)

⁸ Maa siren Yisasi evaránen temí, “Téi siretí ankan tiamé uno. Mana nanin banta ano ma sen nan beni kékápin bá uno ma sintin maen mai Banta Anin má ano yeren Tiyarafenui enisori kayo avorá bá tiamen ma véi senti kékápin bain nanin banta ino sinten mino. ⁹ Maa sinten mifo mana vanta ano ma se nan beni kéká pinte vanta séi ída vá uno ma sintí maé ten má deren Tiyarafenui enisori kéká avorá béi nan ída sentina ino senté uno.

* 12:2: Ruk 8:17 * 12:7: Ruk 12:24; Apo 27:34

10 Inká banasi ano ma Banta Anin nan ma oyampá baya sinteya mai ume Tiyarafenu ano ampiantanten mifo Kantá Aunan ma oyampá baya sinteya mai ume Tiyarafenu ano ída kanaíen ampiantanten mino.

11 **“Máan tinten mifo vetí ankan ma siretin aviren monó átaru namun kayofin ná orinten nafi áa kamanin kayo vá aví bain banta kéká bá avora safi ma aviren orintiya inte vayá anona evaráné tente rafuno. Máa sireya ída vá perano. 12 Maí áaurá anan Kantá Aunan manon mai ma vetin evaráne siaminona vaya sireti ankan afova aminten mino.”*

Ída Kama Inin Bain Moní Bantai Ovaeran Baya Ino

13 Máa siyákan mai nanin banta áubanáké mana vanta ano máa sen Yisasin tiamemí, “Aru soe, se siváen tiamesin ná berasan tifóe ma furiyáken me kaútintein danasinta aúban daiden ná timino.”

14 Máa síkan Yisasi evaráen mai vanta máa inaemí, “Iye ano séi nan tire anavasani ona van daíde vá masiman uan ameno siren ná mai yoran timikhen nafino.” 15 *Máa siren béi vanasi siamemí, “Tiretí ankan kokhon daná kaúdakeya ena vá moéke varano van inampo mai minó eina yanasintará ída kanaíeya aunan bara nompo yafianá ákona ono.”

16 Máa siren béi ena vaya vetin tian baéan amemí, “Mana moní bantai yunan anafin kokhon ná dunan aran intaren mino. 17 Máan tukhan mai vanta ano veyan ovaren me ineine emí, “Tesi yunan ma kaonuna namun ída kanaí ukhen mifo séi intesá onte rafuno.”

18 Máa sen iniren mai vanta ano semí, “Téi máan tonté uno. Tesi yunan kain namun kayo minó barákuré evaráné kákan má kayo uvádé maifin tesi uviti aran má minó kama yanasinta vá átaru uan kaonté uno.” 19 Máan ma uré maé teyan nan máan mi senté uno. Téi kokhon oranará ma van kama yanasinta inka kaeruna sivikiyá báké kákan dunan má non má niyáké timusin iyá banté uno.”

20 Máa síkan maen Tiyarafenu ano véin tiamemí, ‘Éi óen banta oe. Sare inuran mana vá purono. Éi ma fúbesin maen iye

anó éi ma o éke e éke uan átaru uádeona yanasinta varanten nafino.’

21 *Máa siren Yisasi semí, “Kokhon danasinta ma o éke e éke uan átaru iyan bain kékápin mi ma yaná afoká inten mifo Tiyarafenu avorá betí ankan ída ona vain kéká an mi yakhen mino.”

Ída Ma Kokhon Ineine In Baya Ino (Matiu 6:25-34)

22 Máa siren Yisasi vei eyo iyampon kayo máa sen tiamemí, “Máan tukhen náí séi siretin tiamé uno. Tiretíi van nan ída vá kokhon ineine ureya máa seno, ‘Tetí ankan náinasá nante rafuno.’ Inká tiretí ankan ída vá tiretí au van kokhon ineine ureya vá máa seno, ‘Tetí náí suí danasá uré bá tifante rafuno.’ 23 Ayun ma fara van aunan mano yunan esantakhan maen inká au ano auí daná esantakhen mino. 24 Tiretí ankan kame kayo vá onano. Betíi yunan ma yóden duyáden ma má uváden kain ída van mifo Tiyarafenu anon betin dunan amé iyan mino. Tireti vanasi ano Tiyarafenu avorá nun kayo esantakha ono. 25 Máan tukhen mifo ayáká bantó uno sire ma kokhon ineine iya vanteya mae kanaíená mai inin mano eni van asotú uantante nafino. Ída uron mino. 26 Máan tukhanti siretí ankan ma ída kanaíeya sító daná ma varanteya faraé tireyá ena kokhon danasinta van ineine iyá ba fonó.

27 Paravan ma ampantein ná kamaeya vá onano. Betíi yavaráe ída uvaré iyan mifo séi sirétin tiamé uno. Kin Soromonini kama auí daná ano mana faravan má ída manaí ukhen mino. 28 Titó mumunan bain nanin banta oe! Afova sá ono. Taréa varé intin inuran tikaren ira saran nain káta ma Tiyarafenu ano auí uantiyantiya mai káta kayo esantaren mi siretin auí daná aminten mifo 29 siretí ankan ída vá náí yunan ná nante rafu náí non ná nante rafu sireya kokhon ineine iya vá bano. 30 Ída ma mumunan in nanin banta ano kokhon ineine iyáken mai yansinta van dosé iyan mifo siretíi Afóe ano inaru fákei mai yanasinta van mi iyaono sen pefái afová ukhen mino. 31 Máan tukhen mifo veni yafisin baru van ma yosesin maen minó dana san ma iyaona aminten mino.

* 12:11: Mak 13:11; Ruk 21:12-15 * 12:15: 1Ti 6:9-10 * 12:21: Mat 6:19-20

Moní Bá Ona Vá Ma Kaiyan Ban Baya Ino
(*Matiu 6:19-21*)

³² “Máan tinten mifo sanáa sipisipi ma vaona ano ída vá perano. Tiretí Afóe ma inarufá bain mano amusin iyáken inaru yafisin tiretin ameno van tikhen mino. ³³ *Áesin ná ena kayo ano en nina yanasinta miyaní uaranti vá mai moní ona ma ída van bain kékasá ameno. Máan ma ínteya moní ma kain unan ída ainen dáke iyain mi siretiyantá uvaran nono. Ída manáa yaná afeyorantin umoyan banta ano ída varantin minó daná ída antan danú nan baru inarufasá tiretí ina yanasinta ka ono. ³⁴ Máan tukhen mifo siretí kama yanasinta ma kaesin ban nain barufin mi siretí kákan inin banten mino.

Dafian Ákona Ukhen Ma Van Baya Ino

³⁵ *Máa siren Yisasi evaránen temí, “Tiretí ankan Tiyarafenui yorariín ona ureya siretí oon áesin para kiyan bantiya utaare vá bano. ³⁶ Kákan banta ano ma anasií in omápin orikhan ma ereno van iyákan ma vei yoran banta kéká ano ma véi ma onará me ankamintí ainé ona yiantano van ave einisá tiretí ankan ono. ³⁷ Ída auun baranton ma auu sapé ukharé intin ma kákan banta ano ma eren ma e onan nain doran banta kéká ano vá amusin ino. Kákan banta ano veyantái yunan kuvin ona uren betin tintin dunan nan takhóká kumanintin maen dunan kuan aminten mino. ³⁸ Máan tinten mifo yo kakhano siren ma arái in kókore ma asiyain áaurá ma kákan mano eriyaren e onantin ma yoran banta kayo ano ma ída auun baran para varé inten amusin ná ino. ³⁹ *Máan tukhein nará tiretí ankan ma yanasá afová ono. Umoyan banta ano ma erin nain áau ma má afóe ano afová uren maen ída ifá intin mai umoyan banta ano ven amá me varákuren un peranten mino. ⁴⁰ Banta Anin nan ída erinten mino se siretí ankan ininona yamúi véi erinten mifo sireti utaare vá bano.”

Kama Yoran Banta Vá Namu Yoran Banta Vái Vaya Ino
(*Matiu 24:45-51*)

⁴¹ Máa síkan Pita evaránen Yisasi in-aemí, “Bafan noe, setin maná mai vaeran baya sisimiya fono áa minó basa fino.”

⁴² Máa sen ina íkan Bafan mano evaránen tiamemí, “Íntéa yafisin banta anó kama ineine vákan ná bei yoran kamaen doriyaré inten nafino. Ayafa ano máan dafisin bantan tikan bei yoran banta kayorá dafisiyáken dunan amin áauí ma íkan maen dunan masiman uan doran banta kayo amé iyan mino. ⁴³ Máan dorarí ma iyáin nain doran banta ma vei ayafa ano eren ma eman onan nain mano vá amusin ino. ⁴⁴ *Téi fura siré tiretí ankan tiamé uno. Ayafa vanta ano mai vantantintin minó ben nina yanáká dafisinten mino. ⁴⁵ Máan tinten mifo mai yoran banta ano ma ve aúpin ovaren ineine iyáken ma sesi ayafa ída ainen erinten mino siren ma aráien be arona yoran nanin banta ma ankamiyáken dunan niyan non nen óen inten mino. ⁴⁶ Máan tiyaré intin ma maná damú mai yoran banta ano ída afová en útakharé inain áaurá ma vei ayafa vanta erinten maen mai yoran banta me aruren tíka síka uren ída ma mumunan in nanin banta vá mana varufin kainten mino.

⁴⁷ * “Ínká mana yoran banta ano vei ayafa vantai anunu afová ukhen ma ída veni anunu ánain bákuriyáken ma ída utaaren baré intin maen mai yoran banta kokhon dádá ankaminten mino. ⁴⁸ Máan tinten mifo mana yoran banta ano ma ída vei ayafa vantai avúavá afová ukhen ma yafiyó ankamoren avúavá ukharé intin maen mai ayafa vanta ano manáa yádái ankaminten mino. Tiyarafenu ano ma kákan avu amikharé inain nanin banta vaipákena evaránen ena kéká ayain nan onanten mino. Tiyarafenu ano ma kákan ákona amikharé inain nanin banta vaipákena moéken ma yókaré inain ákona van evaránen ina inten mino.”

Yisasi Ída Kusin Baren Eren Mifo Vanasi Aúban Daimin Mi Varen Eren Mino
(*Matiu 10:34-36*)

⁴⁹ Máa siren Yisasi evaránen temí, “Téi ma varará ira iniseno van mi ereruna mai ira ano ainen kano van mumpo

* **12:33:** Ruk 18:22 * **12:35:** Mat 25:1-13 * **12:39:** Mat 24:43-44; 1Te 5:2 * **12:44:** Mat 25:21, 23 * **12:47:** Yem 4:17 * **12:50:** Mak 10:38-39

ída kiyan mino. ⁵⁰ *Téi ma uman baré barafin aravonuna non peranté uno. Mai non téi ída fékékun tirá ano uman uron diyá uno. ⁵¹ Téi ma erikheruna van ma vara rákena minó aruvin kípaaantano van mi erikhen minó teyá tiretí ankan iniya rafono. Ída ino. Téi siretí ankan tiamé uno. Banasi aúban daimono van mi séi erikhé uno. ⁵² Taréa ráké ma orin nain mai yan manápá antun mano ma mana namumpin baren maen mai antun mano yaíden kankanan mano manápá okhábintin kanú manaú ano enafá ekhábintin uven namuroí uantantín maran inten mino. ⁵³ *Máan ma intin maen be afóe ano ve anin namuroí uantantín be anin mano ve afóen namuroí uantantín inká be anóe ano ve araun namuroí uantantín be araun mano ve anóen namuroí uantantín anasi anafú ano ve anafú namuroí uantantín be anafú ano anasi anafú namuroí uantanten mino.”

Aní Danasinta Ma Yaíden Afováin Baya Ino
(*Matiu 16:2-3*)

⁵⁴ Máa siren Yisasi kokhon nanin banta máa sen tiamemí, “Áau orun perápá ma konan édavíka mae ainen á danten mino sen nan maen á dé iyan mino. ⁵⁵ Inká tiretí ankan onen nan ma sautíké ákóna uva ma eríka maeya kákan á kanten mino ma sen nan maen kákantá á ké iyan mino. ⁵⁶ Tireti kampun baya sire ída mai ánain dakhafin nanin banta ono. Minan ayontá bá barará bá ma afoká iyain danasintai ana yaíden afová éiya ompo náí vará taréa ma afoká iyain danasinta ana ma yaimin avúavá tireti ída afová ukhera fono.

Puntákein Avúavá Pó Ma Ará Manafiní In Baya Ino
(*Matiu 5:25-26*)

⁵⁷ “Pará puntákein avúavá tiretiyan ída yaídeya afova variya fono. ⁵⁸ Mana vanta ano ma éin kó tiantano van ma oriyanti vá ben má aayanafasá aine veya sire siná ará kusintin ná ará manafiní inaifo éi ma ída máan tesin maen éin aviren mo kó banta ayampin kaintin kó banta ano firipo ayampin kaintin piripo ano avían mo karavusi namumpin kainten mino. ⁵⁹ Téi fura siré éin tiamé uno, éi ída karavusi namun

pinte aineya erin nompo éin ma miyan aví tiantákaré inain miyan ma sipá karúdaan kipa nona yamúi erin nono.”

13

Ída Ma Ará Baeranteya Purin Nono

¹ Yisasi vei veya sian kípáran Karirifá ma manáa vanta kayo ano Tiyarafenu íkun uan amiyáin ma Pairoti ano ma vei aruvin banta kéká tiantan ma Kariri vanta kéká ma mo arein mai kayoi nare vá Tiyarafenu ma íkun uan amin tafúnai nare vá ma manafin ópé ein baya mai kéká pinté evaránen Yisasin tiamen mino. ² *Máa síkan Yisasi evaránen betí ankan tiamemí, “Mai Karirí nanin banta kayo ano ma mai uman barein nan tiretí ankan ma iniyaona vetí ano ena Karirí nanin banta esantaren moéken umeín kéká inó tiya rafono. ³ Ída uron mino. Tiretí ankan ma ída ará baeranteya siretin má deren mai uman bare furin nono. ⁴ Siroamí ma ayá ayá namun baré ein mano ma varákuáken eitini (18) vanta yararan ma furein nan ma siretí iniyaona anó Yerusaremí ma vain nanin banta ano ma namu avúavá bariyain esantaren ná bariyaren nafino. ⁵ Ída uron mino. Tiretí ankan ma ída ará baeranteya siretin má deren mai uman bare furin nono.”

Fiki Yaa Ana Ma Ída Aran Ireintá Ma Ovaéadan Baya Ino

⁶ Máa siren béi mana ovaeran baya siamemí, “Mana vanta ano vei uvaini yunan barafin mana fiki yaa ana yódan baré íkan mai vanta ano aran intein onano van oriyán baren o onákan ída mana aran intaren mino. ⁷ *Máan tukheimpin mai yunan anará ma yafíkein doran banta véi máa sen tiamemí, ‘Kanú manaú oranarái ma fiki yaa ana séi o oné erékun béi fasavifái váken bara anu variyan ban ída mana aran iriyan mifo síkaan karúdano.’

⁸ *Máa síkan mai yoran banta ano véin evaránen tiamemí, ‘Kákan banta oe, mana oanará bá áesin para vantí mai anafin kanan ariyá kao ara kaúan onano. ⁹ Máan tékun ma ena oranafin ma aran iranten

* 12:53: Mai 7:6 * 13:2: Yon 9:2 * 13:7: Ruk 3:9

* 13:8: 2Pi 3:9, 15

mai kama inten mifo ída ma aran iranti mae síkaan karúdan nono.’ ”

Yisasi Ano Ma Ayorun Davénakhein Nanin Sabati Yamú Ayofein Baya Ino

¹⁰ Mana Sabati yamú Yisasi mana monó átaru namumpin banasi monó baya siamiyaren mino. ¹¹ Tiamiyákan eitini (18) oranará mana namu aunan mano fákaan ákona uran bain nanin má dere maifin baren mino. Bákan mai namu aunan mano véin ayorun punkantan ída kanaíen béi funtáden mantiyaren mino. ¹² Máan tiyá íkan Yisasi véin óden aran eríkan máa sen tiamemí, “Éini aí inka séi kipaanté uno.” ¹³ Máa siren be ayan kain orin mai nanin ayorun aruviyain má ainen puntáben orun mantaaren Tiyarafenu aví daníen mino.

¹⁴ *Máan tikan monó átaru namuntá ma ánoní ukhein banta ano Yisasi ma Sabati yamú ayofiyain nan aranan uren máa sen banasi siamemí, “Dan manápá ifo afápá mana un kádan damúi yoran damú ban mifo maí damú kayofin ná eresin ayofana ifo ída vá Sabati yamú ereno.”

¹⁵ *Máa síkan Bafan mano evaránen béin tiamemí, “Tireti kampun baya sire ída mai ánain dakhafin nanin banta ono, Tiretíi veya vá avúavá bá ano ída manái ukhen mino. Sabati yamú tiréti ídá kao vá donkin mái má ona yiantádeyá non nano van anan utúantádeyá avire oréiya rafono. ¹⁶ Ma nanin maen Abaraamun araun mi Ban Anon mano eitini (18) oranará pákaádan baren mifo mai ma véin pákaádan baré ein daná ma yo varantó iyaruna mai ídá Sabati yamú barante rafuno.”

¹⁷ Máa síkan beni namuro kayo ano ayavevan en mifo vanasi ano mai ma kama yanasinta ma véi varein nan amusin en mino.

Mastati Arantá Ma Ovaéádan Baya Ino (Matiu 13:31-32; Maki 4:30-32)

¹⁸ Máa siren Yisasi evaránen inaemí, “Tiyarafenui yafisin baru ano intéa yaná aná dakhen nafino. Intéa yanákasá tian baerante rafuno. ¹⁹ Mai ano mana Mastati yaa aran ma ein an dakhan mi mana

vanta ano varen bei yunan barafin mo yódákaréin mai ano e ampamaren kákan daai uvíkan ayompin ma noin nun kayo ano mai yaa ayan kayorá mo nan uvaren mino.”

Yisirá Ma Ovaéádan Baya Ino (Matiu 13:33)

²⁰ Máa siren Yisasi evaránen inaemí, “Téi intéa yanákasá Tiyarafenui yafisin baru sian baéádante rafuno. ²¹ Mai ano yisi ma ein an dakhan mi mana nanin mano ma máden kokhon paravá bá manafin opé uren ma upí uran maen mai ano mai faravápin oreraen pameiní ukhen mino.”

Titó Onai Vaya Ino (Matiu 7:13-14, 21-23)

²² Máa siren Yisasi Yerusaremí aayana oriyáken mai akhempá ma sító baru vá kákan baru kayo vá ma vain pimpá e monó baya siamen oriyaren mino. ²³ E siamen oriyákan manáa kéká ano véin máa sen inaemí, “Bafan noe, manáa nanin banta aná Tiyarafenu ano evaránen aviranten nafino.”

Máa síkan béi evaránen betin tiamemí, ²⁴ “Ayampa máareya vá tító onafin ódono. Kokhon mano ódono van iyái séi sirétin tiamiyá umpo vetí ída kanaíen ódinten mino. ²⁵ *Maná damusí ma intin má afóe ano e mantaaren má ona ma munkurantiya siretí ankan barufá e mantaveya verai siyáke onará ankamesin maen béi evaránen tiretin máa sen tiaminten mino, “Tiréti inte fákesá eriya vae. Mai séi ída siretin afová ukhé uno.’

²⁶ *Máa ma sintiya siretí ankan evaráne véin máa se siamin nono, “Tetí ankan éin má manafin dunan má non má niyákuya setisi aasá éi oriveya monó baya sisimiya ono.’

²⁷ *Máa sesin maen béi evaránen tinten mino, “Tiretí inte fákena kékasá ere vae. Mai séi ída afová ukhé umpo siretí namu avúavá baran kéká ompo minó ano sífó ono.’

²⁸ *Máa ma siren tirétin tiantantiya mai ma uman baren berai sin barufin orun bákeya Tiyarafenui yafisin barufin

* **13:14:** Eks 20:9-10; Diu 5:13-14 * **13:15:** Ruk 14:5 Mat 8:11-12

* **13:25:** Mat 25:10-12 * **13:27:** Íbo 6:8 * **13:28:**

onesin maen Abaraamun má Aisakin má Yekopun má minó sakhanampa vanta kayo vá ma maifin bantiya siretí ankan kákan ífí diyákeya aveantuntá inkekípa nono. ²⁹ *Máan ma iyasín maen ma varai áau e uní pákena vá áau orun perá pákena vá saotíke vá notíke nanin banta ano ere ere uven maen Tiyaarafenui yafisin barufin ma vain omápin e varu varen kumamen mai yunan nanten mino. ³⁰ *Máan tukhein nan mi saréa ma ínainí ukhein kéká ano un aní intin maen aní ma ukháin nain kéká ano evaránen ínainí inten mino.”

Yisasi Ma Yerusaremi Baru Van Arunaná Barein Baya Ino
(Matu 23:37-39)

³¹ Maí damú ana manáa Farasisi kéká ano Yisasi vaintá eriven béin máa sen tiamemí, “Eroti ano éin arono van iyan mifo éi ma varu me ampireya ena akhempá orono.”

³² Máa síkan Yisasi evaránen betin tiamemí, “Tiretí ankan oreya mai afá iyan mo máa sevá tiamento, ‘Taréa vá inuran má téi namu aunan kayo yo siantiyáké maé aí nanin banta kéká ayofanté umpo kanú manaú damusí ma intíi sesi yoran kípanté uno.’ ³³ Máan tontéi saréa vá inuran má ídamú bá téi fara oronté uno. Maí fara vara seyó, sakhanampa vanta ano ída Yerusaremi ankináfá o furinte mifo véi Yerusaremi anan purinten mino.

³⁴ Yerusaremi oe, Yerusaremi oe, éi ano sakhanampa vanta kayo arureya Tiyaarafenu ano ma éi vaípa tiantein banta kéká onámaná ankádeya iyan ná náimáa yádasá téi enan tirun nan urerá en akhafana o éke e éke uan anasi kókore ano ma ve ayampin deiní iyáku ompo siretí ída anunu iya ono. ³⁵ Onano. Tiretí ankani varu saréa ída yafisé toyan amirékun namu ukhen para vanten mino. Téin ída evaráne son nan bareya máa sin nono, ‘Bafan aviká ma eriyain banta vá Tiyaarafenu ano avu ino.’ ” *Íbo 118:26*

14

Yisasi Ma Farasisi Vanta Amá O Varééí Pákena Vaya Ino

¹ Mana Sabati yamú Yisasi ano mana Farasisi kayoi ánon banta amá mo yunan niyákan betí ankan mano véintá dafian ákonaen mino. ² Máan tiyákan mana au famin aí bain banta ano maifin béin ádé baren mino. ³ *Bákan Yisasi máa sen Farasisi kéká bá man baya ma afová ukhein kayo vá inaemí, “Sabati yamú kaná aí nanin banta ayofanten nafino áa ída fino.” ⁴ Máa síkan betí ankan púkekhaben ída mana vaya siamiyaimpin Yisasi mai vanta au fákaren beni aí kipaantáden tiantan oren mino.

⁵ *Orivíkan béi máa sen betí ankan inaemí, “Tiretí ankan pinté mana ano ma mana ain iyampon nafi* burumákao fi ma yaká esin Sabati yamú ma non bain masípin ma áduvintiya éi ída aineya orun darifaádan akhempá édanten nafino.” ⁶ Máa sen ina íkan betí ankan ída mana vaya sen mino.

Tiretíyan Ma Maman Bararasí In Baya Ino

⁷ Máan tiyákan mai omápin ma erikharé ein kayo onákan dunan nan takhói an karáká ana kumaniyaimpin béi máa sen betin ma vaya ovaéden tiamen mino. ⁸ * “Mana vanta ano ma anasi iran omápin ma éin arantiya ma orinte ída vá esé karáká o khumaneno. Éin esantakhein banta vá deren arakhanten mino. ⁹ Máan tukhá esin maen tirekánan ma arein banta ano ma ínaimpáké erintin ei kará ma vanta ameno sintiya éi kákan ayave van iyáke ínaintena karáká o khumanin nono. ¹⁰ Máan tinafo vá omáká ma aranti orikhe mae oyampá ma vain karakasá o khumanantá esin ná mai omá afóe ano ma onanten maen ‘tirona oe, manteya an bain karáká un kumaneno’ sinti ma un kuman esin maifin ma varé inain kéká ano ma onanti vá kákan bí barano. ¹¹ *Baran nampo ve aví ma maman daní inain kéká Tiyaarafenu ano maman bararasí inte mifo ve aví ma maman bararasí in nain kéká Tiyaarafenu ano kákan bí aminten mino.”

* 13:29: Íbo 107:3 * 13:30: Mat 19:30 * 14:3: Ruk 6:9 * 14:5: Mat 12:11; Ruk 13:15 * 14:5: Manáa vompon dókifin donkin ne sikhen mino. * 14:8: Pro 25:6-7 * 14:11: Mat 23:12; Ruk 18:14

Éi Ma Anona Ída Ameren Kéká Ma Amí Pákena Vaya Ino

¹² Maa siren dunan me nano van ma ven arein banta máa sen tiamemí, “Éi ma mana omasí iyákeya éi ída vá e arona fi e afá aváe fi e anóe afóeni kéká safi e ádé ma moní nanin banta vain nafi arano. Éi ma arakharé esin maen éin e araan betí ankani omápin kaúden anona evaránen dunan aminten mino. ¹³ Maa n tinten mifo éi ma kákan omasí ma inte vá minó daná ma ída van nanin banta vá au ma namu ukhein kayo vá arantan ma namu ukhein kayo vá auu yufúkukhein kayo vá ana vá arakháesin ¹⁴* ma éin ída evaránen amintiya vá éi amusin ná ono ínaimpá ma funtákein nanin banta ma orun mantan nain damúí Tiyarafenu ano éin evaránen amusin aminten mino.”

Kákan Omáká Ma Ovaeran Baya Ino (Matiu 22:1-10)

¹⁵ *Maa síkan mai ma véin má dunan niyaré ein kayo finté mana vanta ano mai vaya iniren máa sen Yisasin tiamemí, “Tiyarafenui yafisin barufin ma omasí in-aimpin ma o khumamen dunan nan nain nanin banta ano vá amusin ino.”

¹⁶ Maa síkan Yisasi evaránen béin tiamemí, “Mana vanta ano kákan dunan taranton iyáken mai omápin kokhon nanin bantan aren mino. ¹⁷ Arakharen mai ma kákan dunan taran damusiin pefá ma arakhá ein nanin banta van inka minó dunan taman úbefaráken ariyan ne sen tiamino van mai vanta ano vei yoran banta siantan oren mino.

¹⁸ Oríkan minó nanin banta ano ída ino ana sen orera en mino. Maa siyákan mana vanta ano máa sen tiamemí, “Téi saréa anan mana yunan ana miyaní uádákéi mai o onantó umpo sirun noe, séi ída oronté uno.”

¹⁹ Síkan inká ena ano máa semí, “Téi saréan tiyan míkan doran burumákao kéká miyaní uakéi mai kéká mo yóan onano van oriyá umpo sirun noe, séi ída oronté uno.”

²⁰ *Síkan inká ena vá ano máa sen tiamemí, “Taréa uron mi anasi iman timikhein téi ída oronté uno.”

²¹ “Maa síkan mai yoran banta ano evaránen bei kákan banta vaintá oriven

mai ma vetí ankan téin baya kayo véin tiamíkan kákan aranan uren bei yoran banta máa sen duvun emí, ‘Éi aineya kákan barui kákan aasá bá tító aasá bá oriveya minó daná ma ída vain nanin banta vá arantan ma namu ukhein kéká bá auu ma yufúkukhein kayo vá au ma namu ukhein kéká bá avire vá ereno.’

²² Maa síkan mai yoran banta ano mai ma seiní uren béi evaránen bei kákan banta vaintá oriven béin máa sen tiamemí, ‘Kákan banta oe, mai ma éi seonáí urékun má naumpin manáa afokhan para van mino.’

²³ Síkan kákan banta ano evaránen bei yoran banta siamemí, “Ten timápin bíkano van mi séi sununuiyá umpo éi kákan baru me ampireya minó kákan aa kayo vá dunan anafimpá bá oriveya éi ma onanona nanin banta siamesin ten timápin erino. ²⁴ Téi siretí ankan tiamiyá uno. Mai ma séi fefá ayusikhá eruna kayo finté mana nanin banta ano ída kanaíen tenti omá pinte yunan me nanten mino.’”

Yisasin Ánain Ma Vákurin Mai Ída Sesosikhen Mino (Matiu 10:37-38)

²⁵ Kokhon nanin banta ano Yisasin má oriyá íkan béi yovaéaren betin máa sen tiamemí, ²⁶ * “Téi vaípa ma ereno van inona ano ma e anóe afóen má e aná akhafana vá e afá aváen má ayofin má ei vampin má ma namuroí iyanona ano ída kanaíeya senti eyo iyamponí in nono. ²⁷ Inká ei yaa unkamádan ma ída m- mareya ma séin tínain ma vákurin nona ano ída kanaíeya senti eyo iyamponí in nono.

²⁸ “Tiretí ankan pinté mana ano ma kákan ayá namun ma uvarano van inten maen ná esé béi ídá kumanten ná bei moní kaná bain ná mai namun uvaman kípanté rafuno siren ná daíden afová inten nafino. ²⁹ Mai fara vara seyo mai vanta ano ma ída mai yanasinta átaruin ma varu avantaren simeni upí uren kaen orera uren ma namádan daféden ma mai namun ída uvaman kípan me ifá urantin maen ena nanin banta ano ma oniyáken ída kama ineine vain banta ino siren oyampá

* 14:14: Yon 5:29 * 14:15: Ruk 13:29 * 14:20: 1Ko 7:33 * 14:26: Ruk 9:23

baya sen ³⁰ máa sintemí, ‘Mai vanta ano má uvarano siren uvaman arái uren ída mai namun uvaman kípen mino.’

³¹ “Inká mana kin mano ma ena kin má mo aruvono siren maen ídá búi kumanten ná bei siyan míkan tauseni (10,000) aruvin banta ano kanaisá ená tuenti tauseni (20,000) aruvin banta ma namuro kin mano ma iyanen eriyain má aruvin náfino siren ná daiminten náfino. ³² Daíden inintin ma ída kanaí ukhantín maen namuro kin ma nentá eriyantín mi vei yoran banta siantantín oren mi namuro kin mo ará kusin baya sen inainten mino.

³³ “Máan mana en mi mana ano ma ída ve ina yanasinta ma me ifá inten maen mai ano ída kanaíen tenti eyo iyamponí inten mino.

Yisasi Siyáken Banasi Ano Un An Mi Yakhen Mino
(*Matiu 5:13; Maki 9:50*)

³⁴ “Un maen kama yana ifo veni ase ma kípvinti mae intesá uresin ná evaránen ase inten náfino. ³⁵ Mai un maen ída varafín mo kama inti inká ída kanaíeya vurumákao ara vá upí ure varafín kain nompo savifái maman karúdan nono.

“Átaren ma van nain kayo ano vá ineno.”

15

Sipisipi Afeyorantá Ma Sian Baéádan Baya Ino
(*Matiu 18:12-14*)

¹ Takisi varan banta kayo vá ume nanin banta kéká bá ano Yisasini vaya ineno van béin ádé eiyen mino. ² *Máan tíkan Farsisi kayo vá man baya ma afova ukhein kéká bá ano mai van aranan uren máa semí, “Ma vanta ano ume nanin banta kayo anan aronái iyáken betí ankan má anan dunan niyan mino.”

³ Máa siyaimpin Yisasi ma vaya ovaéden tiamemí, ⁴ * “Tiretí ankan pinté mana ano ma mana antareti (100) sipisipi kaúdkaré intin ma mai finté mana afeyóbintin maen ídá nainti naini (99) sipisipi me kaúden ná mai ma mana sipisipi afeyókein nan e yosen oriyan baren ná o onanten náfino.

⁵ O óden maen búi kákan amusin iyáken mai sipisipi yauman be afuntá kaúden ⁶ aviren barufá ma moren maen be arona kayo vá be amá ádé ma vain nanin banta kéká bá e araan manafín átaru uren maen betín máa sen tiaminten mino. ‘Mana sipisipi ma se sina afeyoká ein inka yosé umpo sen má eriveya amusin ítifero.’ ⁷ Téi fura siré tiretí ankan tiamiyá uno. Ma ma einí anan en mi nainti naini (99) funtákein nanin banta ano ída ará baeran nan ininten mifo ume nanin banta finté mana ano ma ará baerantín maen inarufá kákan amusin uron mi inten mino.”

Mana Moní Afeyorantá Ma Sian Baéádan Baya Ino

⁸ “Mana nanin mano ma siyan míkan aintain moní kaintin baré intin ma mai fintena mana aintain ma afeyóbintin maen búi ídá daamu antúduren avové en bakhari uren ná dosiren mai aintain baranten náfino. ⁹ Búi yosiyan baren ma mai aintain moní dosiaren maen be arona kayo vá be amá ádé ma vain nanin banta kéká bá e araan manafín átaru uren maen betín máa sen tiaminten mino. ‘Tesi mana aintain moní ma afeyókaré ein inka yosé umpo sen má amusin ono.’ ¹⁰ Téi fura siré tiretí ankan tiamiyá uno. Ume nanin banta finté mana ano ma ará baerantín maen Tiyarafenui enisori kayo ano máan manan en mi kákan amusin inten mino.”

Mana Ain Iyampon Ma Afeyorantá Ma Sian Baéádan Baya Ino

¹¹ Máa siren Yisasi evaránen temí, “Ma vanta ano kankanan ain iyampon kain baren mino. ¹² Kain baren ínainte iyampon mano ve afóen máa sen tiamemí, ‘Tifóe oe, minó daná ma séin masiman uantimeno van ma iyá eona yanasinta saréa ana séin timeno van muno,’ síkan be afóe ano vei minó daná míkanampin daimen mino.

¹³ “Máan turan ínainte iyampon mano ída ayáká banton minó beina yanasinta mamáren mana nentá bain barafá o váken bei minó moní pa savi yanáká afe en mino.

¹⁴ Kíparákan mai varafín kákan anan afoká íkan béimpin ída mana yaná baren mino.

¹⁵ Ída vaimpin mai vara fintena vantafín mo yorano van ina íkan mai vanta ano

* 15:2: Ruk 5:30 * 15:4: Isi 34:11, 16; Ruk 19:10

vei fon kayorá dafisino van pon dafufin tiantan oren mino. ¹⁶ O vákan mana nanin banta ano ída véin mana yunan amiyaimpin arafan nan uaren pon kayo ano ma niyain basá aítan máden nano van iyaren mino.

¹⁷ “Máan tiyáken béi ovaren me ine iyan máa semí, ‘Te sifóeni yoran banta kayo ano kokhon dunan ban niyákái séi mará kákan tirafan nan iyá bá uno.’

¹⁸ *Máan tiyá baruna saréa séi e manté te sifóe vaípa evaráné orivé maé béin máa sé tiamenté uno, ‘Tifóe oe, Tiyarafenu vá éin má umeí uanté uno.’ ¹⁹ Taréa séi ída kama ukhé umpo éi ída vá e anin ne seya séin tariyáke vá téin maman ná ei mana yoran banta aná dano.’ ²⁰ Máa siren béi e manten be afóe vaípa oren mino.

“Béi ma nentá eriyákan ma ve afóe ano véin oniyáken kákan arunan uren tavaen o yafayóden amónen mino.

²¹ “Máan tíkan be anin mano véin máa sen tiamemí, ‘Tifóe oe, Tiyarafenu vá éin má umeí uanté uno. Taréa séi ída kama ukhé umpo éi ída vá e anin ne seya séin tarano.’

²² Máa síkan be afóe ano vei yoran banta kayo araren máa sen tiamemí, ‘Tenti moéken kama ukhein ayá tu anamun aine o vare me uantiyákeya ayampin rini afu uante vá arantampin arantan anamun uante ono. ²³ Uantáde mae inókein burumákao o vare me aruresí tádé niyáké timusin ó tifano. ²⁴ *Mai fara vara seyo, se sanin mano furein an dakharen mi evaránen ma manteiníen mino. Béi afeyókaréi evaráné dosé tiféuno.’ Máa siren betí ankan aráien amusin en mino.

²⁵ “Máan tiyákan esékena iyampon mano yunan anafá doren noren má ádé eriven musikí avaya vá danisí ma iyain má inen mino. ²⁶ Iniren mana yoran banta araren máa sen béin inaemí, ‘Mai náisá iyan natino.’ ²⁷ Síkan mai yoran banta ano evaránen béin tiamemí, ‘E afá erikhan mi véi ma ovaránen ma kamaen erein nan mi e afóe ano mana inókein burumákao arurákan mi amusin iyan mantino.’

²⁸ “Máa síkan esékena iyampon mano aranan uren maifin ída ódíkan be afóe ano ekhuven barufá eravuken ará kusin

baya véin tiamen mino. ²⁹ Máa síkan béi evaránen be afóen tiamemí, ‘Onano. Ayá oranará téi eni yorarí para oé eriyá báké éi ma seona vaya kayo ída mana átakharé iyákuya mae éi ída mana memé arará timen ná te sirona kayo vá timusin iyaré uno.’

³⁰ Máan tiyareyá ma ma éin nina yanasinta ma aasá non nanin arintará ma mo asuse ein iyampon ma ovaránen mápin ereintái éi amusineya inókein burumákao are ono.’

³¹ “Máa síkan be afóe ano semí, ‘Tanin noe, minó damú éi sen má anan baonan ban mi minó daná ma sentina vain mai éin ninaíi ukhen mino. ³² Máan tukhen mifo saréa erisá tetí ankan timusin ékun ná tétin tirá ano kama ino. Mai fara vara seyo, e afá ano furein an dakharen mi evaránen ma manteiníen mino. Béi afeyókaréi evaráné dosé tiféuno.’”

16

Anona Ma Evaránen Ameno Van Mantaré Ein Kayo Ma Funtaraein Ayafai Ovaeran Baya Ino

¹ Yisasi vei eyo iyampon kayo máa sen tiamemí, “Mana moní banta ano ve ina yanasintará dafisino van mana ayafa yan baré íkan manáa vanta kayo ano moní banta vaípa oriven mo máa sen tiamemí, ‘En nina yanáká má ayafái ukhein banta ano en nina yanasinta máden tavifá asuse iyan mino.’ ² Máa sen tiamirákan moní banta ano ve ina yanáká ma ayafái ukhein banta aran erikan máa sen inaemí, ‘Éi náisá iyanan ná ena kayo ano me sisimí iniya rafuno. Evaráne orive vá ten tina yanasinta ma fákakhe ona mai máa vompompin uvádeya vá bare me simeno. Éi ída evaráne sen tina yanasintará ayafái inono.’

³ “Máa síkan mai ayafa vanta ano veyan nan máa semí, ‘Téi intesá onte rafuno. Tesi kákan banta ano yoran pintena séin do sisintiyain mino. Téimpin bara ápomin ákona ída van inká ena vaípa ma minó daná inantin nan tiyave iyan mino. ⁴ Máan tiyá umpo sesi yoran ma kípánuna yamú ma vanasi ano ma séin e sivían betí

* 15:18: Íbo 51:4 * 15:24: Efe 2:1, 5

amápin kain nain aafákena inka afová é uno.'

⁵ "Máa sen iniren mairá mana mana vanta ano ma véi kákan banta vaípá ma anona evaránen amin daná ma mantaré ein kéká arákan béi vaintá erivin mairá mana vanta nare ayafa vanta ano inaemí, 'Éi náí máa yanasá tenti kákan banta vaípákena evaráne ameno siré manta fono.'

⁶ Máa sen ina íkan mai vanta ano semí, 'Uveri khave mana antareti (100) máa ino,' síkan mairá mai ayafa ano siamemí, 'Mai ma amiyáken ma amikhá ein bompon bare aine e khuman me mai vompompin fifti (50) khave máa ino sire uvarano.'

⁷ "Ínaimpáké ena vanta inaemí, 'Éi náí máa mantare fono,' síkan 'mana antareti (100) máan uviti unan mantaré uno,' síkan mairá mai ayafa ano siamemí, 'Mai uviti unan amiyáken ma amikhá ein bompon bare eriveya eiti (80) unan máa ino se uvarano.'

⁸ "Máan turan mai moní banta ano namu ayafa ano ma varein avúava san iniren amo sen mino. Para va ino véi kama ineine ma vain banta an mi yaran mino. Ma vara ráke avúavá ma yakhafiyain nanin banta ano ara ara aa fákéi vetíi yoran bariyan pasen mi kakhantá ma vain nanin banta esantakhen mino. ⁹ Máan tukhein nan mi sirétin tiamé uno. Ma varará ma yakeona yanasinta fosá ena nanin banta amiya mai kéká avían tiretí aronáí uraká esin ná mai yanasinta ma mo kípán nain damú amusin iyan ná Tiyarafenu ano siretin e avían ayun ma fara van oriyán ban barufin kaino.

¹⁰ *"Mana nanin banta ano ma sító danáká kamaen dafisinten maen mai véi kanaíen kákan danáká bá dere yafisinten mino. Inká mana nanin banta ano ma sító danáká ma ída funtákein avúavá ma inten maen mai véi kákan danáká bá ída funtákein avúavá inten mino. ¹¹ Máan tinten mifo siréti ma vara rákena namu moní ma ída kanaíe yafisinte mae mai iye anó pura yana suron amintiyá tiréti yafisinte fono. ¹² Mai van mi siréti ma ída kama e ma ena ina yanáká ma yafisinte

mae mai iye anó tiretin nina yana se siren ná amintiya yafisinte fono.

¹³ *Mana yoran banta ano ída kanaíen kankanan dafisini aránaópá banten mino. Máan ma inten maen mana van anunu uren ena ará namu uanten maen inká mana avaya inen maen ena avaya oyan aminten mino. Éi ída kanaíe Tiyarafenu vá moní báí aránaópá ban nono."

Yisasi Ma Tiyarafenui Yafisin Má Man Baya Vá Ma Siamein Baya Ino

¹⁴ Máa síkan Farasisi kéká moni san ukhein kayon baren Yisasi ma sein baya iniren béin auná mun uanten mino.

¹⁵ *Auná mun uantiyákan béi máa sen betin tiamemí, "Tiretí ankan nan ena vanta kayo ano funtákein avúavá ana varan banta kéká ino sen inino van in kayo ono. Máan tin kéká ompo Tiyarafenu ano siretí ankan aúpin má ineinefin má aúpa ma vain danasinta fe afová ukhen mino. Banasi ano ma kama uron ukhein daná ino ma sen iné iyain mai yaná ano Tiyarafenu avorá namu uron ukhen mino.

¹⁶ *"Man baya vá sakhanampa vanta kayoi vaya vá ano eriyán baren monó non péantan banta Yonini yamúi me kanaí uvíkan mai rákéi Tiyarafenui yafisin pinta kama vaya sian dákó iyákan kokhon mano maifin umperano van ákona iyan mino. ¹⁷ *Inaru vá bara vá tesosen o afeyoranten mifo Tiyarafenui man baya maen tító máa ída afeyoranten mino.

Umeín Avúavá Ano Ma Vanasi Aunan Namu Uanté Iyain Baya Ino

(Matiu 19:1-12; Maki 10:1-12)

¹⁸ Yisasi ena vaya máa sen tiamemí, "Mana vanta ano ma ve aná me ifá en ma ena nanin ma o varanten maen mai vanta ano famúku avúavái inten mino. Inká mana vanta ano ma ifá uantan nanin ma o varanten maen mai vanta vá ano famúku avúavái inten mino."

Moní Banta Vá Rasarusin Máí Vaya Ino

¹⁹ Máa siren Yisasi ena vaya máa sen tiamemí, "Pefá mana moní banta váken mai vanta ano kama uron ukhein nararé au anamun uren báken mai vanta ano kama yunan mana minó damú niyaren

* **16:10:** Ruk 19:17-26 * **16:13:** Mat 6:24 * **16:15:** Mat 23:28; Ruk 18:9-14 * **16:16:** Mat 11:12-13 * **16:17:** Mat 5:18

mino. ²⁰ Máan tiyákan mai moní banta amá onará mana ona ída van namon mana en paerí ukhein banta Rasarusin ne sin aviren mo asemádan báken ²¹ mai moní bantai yunan nan takhokáké ma yunan antan karúdan ona ádé ma eravein nano van iyákan iyan kayo ano yere veni namon me arúniyan mino.

²² “Máan tiyaren maná damú ona i van banta fúbíkan enisori kayo ano e aviren Abaraamun má mo kain bakan inká moní banta vá dere fúbin mo masíen mino. ²³ Masí uran mai moní banta ano furin nanin bantai varufin aí bá beraifin má báken dan mun onan Abaraamu nenta suron bakan Rasarusi véin má baren mino. ²⁴ Bakan mai moní banta ano máa sen oovaremí, ‘Tifóe Abaraamu oe, éi sen nan arunan ureya Rasarusin tiantesin ná mana ayamú máa non daaren tima fintá me kaú dantin iyon usintano. Para vara seyo, kákan irafin mi vákun tufá ira siriyá uno.’

²⁵ “Máa síkan Abaraamu evaránen béin tiamemí, ‘Tanin noe, ovare vá me ineno. Éi ma fa vákeya éi kama yanasinta variyan nan maen Rasarusi namu yanasinta mantaren mifo saréa ma varufin béi kamaen kusen bákaya inká éi aí bá beraifin má ba ono. ²⁶ Ba ompo ena yaná mai siretin má tetin má aúbaná mana kákan on ban mino. Máan tukhein nan mi ma ufá ma vain kéká ano mai ma vaona ufá orono van inten mifo vetí ída kanaíen orintin maen inká mai u fáké ída kanaíen ma ufá é dantin inten mino.’

²⁷ “Máa síkan moní banta ano evaránen béin tiamemí, ‘Tifóe oe, máan ma ukhantiya éi kanaisá eyá Rasarusin tiantesin ná te sífóen amápin oriven ná ²⁸ béi ano se sífá tiváe ma yan manápá bain mo ákonæen tiamintin ná betí avúavá maman puntáden ná ma ma sí bá beraifin má baruna varufin ída vá erino.’

²⁹ “Máa síkan Abaraamu evaránen béin tiamemí, ‘Mosesin má sakhanampa vanta kayoi vaya vá betimpin ban mifo áesin ná mai ma sikhein baya vá inino.’

³⁰ “Máa síkan mai moní banta ano máa semí, ‘Tifóe Abaraamu oe, mai ída kanaí inten mifo mana furin banta ano ma masí pinté e manten oren ma vetin mo

siamintin ma iniren mai anan betí ará baeranten mino.’

³¹ “Máa síkan Abaraamu véin tiamemí, ‘Mosesin má sakhanampa vanta kayoi vaya vá ma ída ininti mae mai ifasá ono. Púkein banta ano yere ma masí pinté e manten betin ma mo siamintin maen mai vaya vá dere ída ininten mino.’ ”

17

Umeín Avúava San Ma Yafíken Ban Baya Ino

(Matiu 18:6-7, 21-22; Maki 9:42)

¹ Yisasi vei eyo iyampon kayo máa sen tiamemí, “Ara ara yaná afoká intin banasi ano mai yanáká eraven ankamen umeí inten mifo mai yanasinta ma maman dákó inain nanin banta van mi sirunken mino. ² Máan tiyaré intin mai vanta ano ma mamá dan nain danáká iyampon arará kayo finté mana ano umeí ukharé intin ínaimpáké béi moékan uman baran nafo véin amempin kákan konkamú onámaná ma kureya karúdesin un nompin aravintin maen mai ano anan kanaí inten mino. ³ *Máan tinten mifo siretí aurasá dafiseno.

Tirétin afá aváeyan mano ma umeí inti vá béin ákona e siamesin ná bei avúavá maman puntarano. Bei avúavá ma maman puntáden ma ará baeranti vá beni ume ampiantano.”

⁴ Béi ma yan manápá ifo afápá kan un kádan dádá ma mana vayában ma umeí uantáden ma inká dan manápá ifo afápá kan un kádan dádá ma véi ovaránen me sirun noe sé uno ma sinti vá beni ume ampiantano.”

Yisasi Ma Mumunan In Avúava San Tiamein Baya Ino

⁵ Máa síkan baya varen orin banta kayo ano Bafan máa sen tiamemí, “Éi sétisi mumunan asotú usintesin mo kákaní ino.”

⁶ *Máa síkan Bafan mano evaránen betin máa sen tiamemí, “Tiretíi mumunan mano ma mastati aran an den ma sító mumunan ma vantí mae kasae mana yaa ana van tiyáke arúbá e yare un nompin o ampan mono ma sesin maen eni vaya ininten mino.”

* 17:3: Mat 18:15 * 17:6: Mat 17:20; 21:21

Yisasi Ma Mana Yoran Bantará O Sian Baéádan Baya Ino

⁷ Maa siren Yisasi ena vava máa sen tiamemí, “Tiretí ankan pinté mana ano ma ei yoran banta siantesin ma mo vará ápomiyá inten nafi sipisipira sá dafisiyaren ná erinten nafi mai kanaisá eyá ‘aine e khumame yunan nano’ sinte fono.

⁸ Ída ino. Kákan banta ano vei yoran banta van máan mi sintemí, “Tenti yunan tamádaya ei kama auí daná ure vá dunan puntádesí ten nare naréku vá éi ínaimpasá nanon,’ tinten mino. ⁹ Kákan banta ano kaná bei yoran banta ano ma véin oo yayiein nan tusu siantanten nafino. Ída uron mino. ¹⁰ Máan tukhein nan mi síretí ankan ma Tiyarafenu ano amin nain doran ma oo yayie yódanteya máan ná teno, “Téi ída kama yoran bantan bákéi sen ma simikhein doran mi yoré uno,’ vá teno.

Yisasi Ano Ma Siyan Míkan Amon Daná Aí Ma Vain Banta Kéká Ma Ayofein Baya Ino

¹¹ Yisasi Yerusalemí orono siren ori-yaren Sameriá bara vá Karirí bara vá aifin oren mino. ¹² Oriyaren mana varurá ma oriain má tiyan míkan banta maen amon dana aí pákakhein kéká ano mai aasá Yisasin má e fóke náke uven nentá e mantaven ¹³ *avádóden oovaren temí, “Kákan banta Yisasi oe, setin nan arunan usintano.”

¹⁴ *Maa síkan Yisasi vetí ankan oniyáken máa sen tiamemí, “Tiretí ore vá monó doran banta kékasá tireti au mo aní ono,” síkan betí ankan oriyákan mai amon dana aí ma varé ein kípen mino.

¹⁵ Betí ankan pinté mana vanta ano onákan be au kama iyaimpin béi ovaránen Yisasi vaipá eriyáken oovararen Tiyarafenu aví daníen mino. ¹⁶ Mai vanta ano Yisasi vaintá onóben mo aron durafúden ben arantampin mátimen tusu sianten mino. Mai veí Sameriá banta ino.

¹⁷ Tusu siantiyákan mai vanta Yisasi oniyan temí, “Tiyán míkan bantan ayofé uno seruna ifo yan manápá ifo afápá kamí kamí un kádan banta ano intesá uvi fono.

¹⁸ Ídá ena vanta vá erin ná ma ena anan banta ano veyáká aná me Tiyarafenu aví daníen ná tusu siantiyán nafino.” ¹⁹ Maa siren Yisasi mai vanta siamemí, “Mante orono. Eni mumunan mano éin ayofen mino.”

Tiyarafenu Yafisin Ma Erinaí Pákena Vaya Ino

(*Matiu 24:23-28, 37-41*)

²⁰ Maná damú Farasisi kéká ano Yisasin máa sen inaemí, “Inte yamusá Tiyarafenui yafisin erinten nafino.” Síkan Yisasi evaránen betin tiamemí, “Tiyarafenui yafisin ma erin nain ída mana aní daná ma afoká einí intin banasi ano auu fóké onanten mino. ²¹ Máan tukhantin ída mana nanin banta ano siyáken ‘onano masi mafá bane’ áa ‘mesápá bane’ sinten mino. Para vara seyo, Tiyarafenui yafisin ákona fefái siretimpin ban mino.”

²² Maa siren Yisasi vei eyo iyampon kayo siamemí, “Ínaimpá ma yamú afoká inti mae Banta Anin onano van in nompo ída onan nono. ²³ *Ída onan nompo vanta kéká ano siamiyan ma ‘orive onano mesápá bane’ áa ‘erive onano masi mafá bane’ sinten mifo ída vá mai vava ánain dakháan more mere ono. ²⁴ Afayuí ma iyain minó ayompin mo fanuse me fanuse iyain bantin mi Banta Anin ma erin nain mai afayu an mi yantin minó nanin banta anon onanten mino. ²⁵ Onanten mifo véi kokhon uman nare varen aí o yosintin maen maí damú ma varéin nain nanin banta ano ven oyan aminten mino.

²⁶ “Noani yamú ma afoká ukhá ein avúavá an dakhein avúavá anan Banta Anin ma erin nain damú afoká inten mino. ²⁷ Noani yamú maen banasi ano omasí iyáken dunan ben amin ben amin iyáken anasi varampin nafi vanta varampin tasu sasu en oriyákan Noa votifin umperiyain má kákan á den non taaren minó daná dararan ufuren puren mino.

²⁸ * “Rotini yamú banasi ano máan avúavasí anan en omasí iyáken dunan ben amin ben amin iyáken minó daná miyaní in maran iyan dunan doriyan má

* **17:13:** Riv 13:45-46 * **17:14:** Riv 14:2-3; Mat 8:3-4
19:25

* **17:23:** Mak 13:21; Ruk 21:8 * **17:28:** Esé 18:20;

uvaren dararen iyaren mino. ²⁹ Máan tiyákan mi Roti ma Sodomú baru me ampen oriyain má anan inaru fáké ira vá ira khiyain onámaná bá ano á ma ereinien minó danasinta irakhen kauren mino.

³⁰ “Máan tukhein mi vantin Banta Anin ma erin nain damú mai avúavá anan afoká inten mino. ³¹ *Maí damú ma mana vanta ano ve amá daró ma un baren maen bei kama yanasinta ma má naumpin baré intin ída vá erayuyen barano van ino. Máan mana ená mana vanta ano ma yunan anafá ovaré inten maen ída vá evaránen mana yaná barano van mápin orino. ³² *Rotin aná amaniná ma afoká ukhá ein danasará ovare me ineno. ³³ *Be aunan ma fákán nain nanin bantái aunan mano o afeyoranten mifo ve aunan ma ampian kain nain nanin bantái aunan para vanten mino. ³⁴ Téi siretí ankan tiamé uno. Banta Anin mano ma erin nain inuran kankanan mano ma mana sakhópin bakharé intin maen Tiyyarafenu ano mana aviáren mana ifá inten mino. ³⁵⁻³⁶ Máan mana en mi kankanan nanin mano ma uviti yasamiyaré intin maen Tiyyarafenu ano mana nanin aviáren mana me ifá inten mino.”*

³⁷ Máa síkan bei eyo iyampon kayo ano mai vaya iniren máa sen Yisasin inaemí, “Bafan noe, mai yanasinta intefasá afoká inten nafino.” Síkan béi evaránen betin tiamemí, “Purin danasinta au ma asenteintái sumpan kayo ano ákané iyan mino. Máan ma inti afováisá ono Tiyyarafenui yaimin damú afoká inten mino.”

18

Baré Nanin Mano Ma Ínanen Inaein Baya Ino

¹ *Máa siren Yisasi vei eyo iyampon kayo van ída avesaraen ena ena amúkino van ovaeran baya fóké betin aní iyan tiamemí, ² “Mana varurá mana vaya yaimin banta váken béi ída Tiyyarafenu van peren inká banasi oman kaumpan iyaren mino. ³ Máan tiyákan mai varufin mana varé nanin báken ena ena yamú mai

nanin mano mai ma vaya yaimin banta vaípá oren mo yuvunen máa siyamí, “Tesi namuro ano séin uman timeno van iyá umpo éi siyae mai uman puntátintano.”

⁴ Máa siyákan inian aniana iyaren mifo ínaimpáké beyan ovaren me inen temí, “Téi ída Tiyyarafenu van periyáké banasi oman kaumpan iyá umpo ⁵ ma varé nanin mano ma me yuvunen oren ein nan mi véini uman aya urékun maen béi ma eren oren iyain mai ída sivesara simino van muno.”

⁶ Máa siren mairá Bafan mano semí, “Namu yaimin banta ano inte vayá tikhen nafi mai vá turetí ineno. ⁷ Tiyyarafenu ano ma veyan iyákein nanin banta ano ma ena ena inuran má bayan má ma ifí den oriyan bantin maen betin ída ayain ná oyan amiyan maná banten nafino. ⁸ Téi siretin tiamé uno. Béi ainen betin ayainten mifo Banta Anin ma erinten maen mumunan nanin banta ma varará bantin ná e onanten nafino.”

Farasisi Vanta Vá Takisi Varan Banta Vái Ovaeran Baya Ino

⁹ Manáa ano ma vetiyan nan teti puntáké uno siren ma ena kéka san ída funtáken ne ma siyain nan Yisasi ma vaya ovaéden tiamen mino. ¹⁰ “Kankanan banta ano amúkono van monó namumpin oren mino. Mana maen Farasisi vanta ifo ena takisi varan banta ino. ¹¹ Farasisi vanta ano o mantaven beyan nan máa sen amúkemí, “Tiyyarafenu oe, séi ída manáa vanta an dé maé umoyan iyá namu avúavasí iyá inká ena vanta aná baré nó maé inká téi ída ma ma sakisi varan banta ma e vain an dakteruna van mi éin tusu siantiyá uno. ¹² *Mana uvikifin kan bayan mi séi yunan turiyáké maé téi ma varé iyaruna yanasinta minó tiyan míkan pintan daidé mana masiman éin amé iyá uno.”

¹³ * “Máa siyákan takisi varan banta ano nentá e mantaven inarufá ída mun auu máan onan mátimen be akorá ankamiyáken máa semí, “Tiyyarafenu oe, séi ume vanta umpo arunará usintano.”

* **17:31:** Mat 24:17-18 * **17:32:** Esé 19:17, 26 * **17:33:** Ruk 9:24 * **17:35-36:** Manáa vompon dókifin ena vaya ves 36 fin asotú ukhen mino: 36 Kankanan banta ano ma yunan anafin baré intin maen Tiyyarafenu mana aviáren mana ifá inten mino. * **18:1:** Kor 4:2; 1Te 5:17 * **18:12:** Ais 58:1-4; Mat 23:23 * **18:13:** Íbo 51:1
* **18:14:** Mat 23:12

14 *Máa siren Yisasi semí, “Téi siretí ankan tiamé uno. Mai ma sakisi varan banta ma ve amápin orein mai véi Tiyarafenu avorá puntákein bantan oren mifo Farasisi vanta ída ino. Máan tukhantín betiyan ma maman daní inain kéká Tiyarafenu ano vetin aví maman bara finí inten mifo vetiyan ma vara finí inain kéká Tiyarafenu ano vetin aví maman daní inten mino.”

Yisasi Ma Arará Iyampon Arintan Avu Uantein Baya Ino

(Matiu 19:13-15; Maki 10:13-16)

15 Yisasi avu amino van banasi ano véi vaintá iyampon arará kayo aviren ore ore íkan bení eyo iyampon kayo ano óden mai nanin banta ákonaen asen mino. 16 Asiyaimpin Yisasi mai iyampon kayo arákan be vaintá erivin máa semí, “Arará iyampon kayoi aa ída vá iyáante áesin ná téi varunafá erino. Para vara seyo, ma kéká an ma yákein nanin bantai nan Tiyarafenui yafisin baru van mino. 17 *Téi fura uron mi sé tiretí ankan tiamé uno. Mana nanin banta ano ma ída ma iyampon arará kayo an den ma Tiyarafenui yafisin baru varanten maen mai kéká ano ída kanaíen mai varufin ódinten mino.”

Kokhon Ona Ma Vain Bantai Vaya Ino
(Matiu 19:16-30; Maki 10:17-31)

18 *Mana ánon banta ano Yisinin máa sen inaemí, “Kama aru soe, séi intesá urerá para ma ayun ban oriyan ban aunan barante rafuno.”

19 Máa síkan Yisasi evaránen béin tiamemí, “Pará te nan kama ukha ono siya fono. Ída mana ano kama ukhen mifo Tiyarafenu veyá anan kama ukhen mino.

20 Éi man baya kayo afová ukha ono.

‘Ída vá ena ana safi ena avafun nafi vare nono.’

‘Ída vá ena aruan purono.’

‘Ída vá umoyan ono.’

‘Tiretí ankan ída vá ena nanin banta kam-pun tire kó tiantano.’

‘Tiretí anóe afóen aránaó bákeya vá betin oo yayiono.’” *Eks 20:12-16; Diu 5:16-20*

21 Máa síkan mai ánon banta ano semí, “Téi sirará iyampon tákéi mai man baya kayo minó dakhaké uno.”

22 Máa síkan Yisasi mai vaya iniren mai ánon banta siamemí, “Mana yana san éi fara o afasí ukha ono. E ina yanasinta minó sarí ureya minó daná ma i vain nanin banta ameno. Máan ma inte éi inarufá kama yanasinta khaesin banten mino. Máan ture éi ere sen tínain bákurono.”

23 Máa síkan mai ánon banta ano kokhon daná dákaren pasin mai vaya iníkan ará uman den mino. 24 Uman den iniyaimpin Yisasi véin oniyáken máa semí, “Moní bá kokhon ona vá ma yan bain kéká ano ma Tiyarafenui yafisin aúpin ma orin uman dakhen mino. 25 Pura ino, kameri ano ma ufi aimpin ma ódin mai uman dakhen mifo kokhon ona ma yákein kéká ano ma Tiyarafenui yafisin barufin ma ódin mai moéken uman mi yakhen mino.”

26 Máa síkan mai vaya ma inein kéká ano semí, “Máan ma ukhantín maen mai iye ná Tiyarafenu ano kanaíen aviranten nafino.”

27 Máa sen ina íkan Yisasi semí, “Banta ano ma ída kanaíen bararen daná Tiyarafenu ano kanaíen baranten mino.”

28 Máa síkan Pita véin tiamemí, “Éin ánain bákurono van pefái setisi minó danasinta me ampikhé uno.”

29-30 Máa síkan Yisasi máa sen betin tiamemí, “Téi fura siré tiretí ankan tiamiyá uno. Tiyarafenui yafisin baru van ma iniren ma vei varu vá be aná akhafana vá be afá aváe má be anoifon má ma me ampiren ma orin nain kéká ano ma ma varará báken ma yantin ban nain danasinta esantaren moékakhein danasintan Tiyarafenu ano aminten mifo ínainpá ma yamú afoká intin maen ayun ma fara van oriyan ban aunan baranten mino.”

Yisasi Veyan Ma Fúaren E Mantan Nain Nan Ma Kanú Manaú Dádasí En Tein Baya Ino

(Matiu 20:17-19; Maki 10:32-34)

31 *Máa siren Yisasi vei sirantan kan orun kádan (12) eyo iyampon kayo aviren mo kaúden máa sen tiamemí, “Pefá ma

sakhanampa vanta kayo ano ma Banta Anin amaniná afoká inain dana san ma vompon uvamádan ma varé ein taréa Yerusaremí orétifékun maen pura sen afoká inten mino. ³² *Afoká ma intin maen banta kayo ano véin pákaan ena anan nanin banta kéká amintin mai kéká ano véin máká maáká en oyampá baya siyan dafiyó ankáden auufen akhare siren aruan purinten mino. ³³ Púkaren maen kanú manaú damusí intin béi evaránen orun mantanten mino.”

³⁴ *Máa síkan bei eyo iyampon kayo ano mai vayai ana ída uron afová en mino. Mai vaya ana ano aúpá bakan inte vará béi siyan nafi mai vetí ída afová en mino.

Yisasi Ano Moni San Ma Inantin Auu Yufúkukhein Banta Auu Evaránen Kama Uantein Baya Ino

(Matiu 20:29-34; Maki 10:46-52)

³⁵ Yisasi ma Yerikó barurá e unen oriyán maen mana auu yufúkukhein banta ano aa akhempá kumanten banasi vaipá moni san inantiyaren mino. ³⁶ Máan tiyaren iníkan banasi ano mai aasá tisuvo sen entaviyaimpin náisá iyan nafino sen inaen mino. ³⁷ Ina íkan mai ma oriyá ein kéká ano véin tiamemí, “Nasaretí banta Yisasin entaviyan mino.”

³⁸ Máa síkan mai vanta ano mai vaya iniyáken oovaren temí, “Devitin anin Yisasi oe, éi se nan arunan usintano.”

³⁹ Máa síkan an ma oriyá ein nanin banta ano mai vanta asiyan temí, “E avaya fákano,” síkan béi moékentá oovaren temí, “Devitin anin noe, séin nan arunan usintano.”

⁴⁰ Máa síkan Yisasi o mantaven temí, “Mai vanta avire mará ereno”, síkan aviren ádé meran Yisasi véin inaemí, ⁴¹ “Éi sen nan náisá uantano vará iniya fono,” síkan mai vanta ano evaránen temí, “Bafan noe, séi suu mábé onano van muno.”

⁴² Síkan Yisasi véin tiamemí, “Eni munan manon éin ayofein auu maran nono.” ⁴³ Máa siyain má ana mai vanta auu kama uvíkan Yisasin ánain bákuren oriyán Tiyaarafenu aví daní iyákan minó

nanin banta ano mai ódaren betin má dere Tiyaarafenu aví daníen mino.

19

Sakiasi Sakisi Varan Bantai Vaya Ino

¹ Yisasi Yerikó barufin ódiaren mai varu aúbaná orikhein aa yakhafen oren mino.

² Oriyákan mai varufin mana Sakiasin ne sin banta váken béi sakisi varan banta kayoi ánon banta van maen béi kokhon moní kain baren mino. ³ Báken Yisasi inté ukhein bantá ban nafino siren béi onanton en mifo véi asíka vanta váken kokhon nanin bantafin ída kanaíen béin onan nainíen mino. ⁴ Máan tiyaimpin mai ma Yisasi oriyain aasá béi afová iyáken ainen tavaen orein mano mana fiki yaa ana aa akhempá baré íkan béin onano van maifin óden mino. ⁵ Un baré íkan Yisasi mai yaa anafin o mantaven mun oniyáken béin máa sen tiamemí, “Sakiasi oe, éi aine erano saréa anan en amápin téi o vanté uno.” ⁶ Máa síkan béi ainen mai yaa ana finté eraven kákan amusin iyáken Yisasin e aviren be amápin oren mino.

⁷ *Oriyákan kokhon nanin banta ano ódaren betí anan iyan temí, “Béi ume vanta amápin mi oriyán mino.”

⁸ *O vákan Sakiasi e mantaven Bafan máa sen tiamemí, “Bafan noe, minó daná ma se sina vain taréan aúban daidé maé ída ma minó daná bain nanin banta kayo amiyáké maé inká intéa nanin banta iná mana yaná kampun tirerá mantaré onte rafu. Mai séi evarané kamí kamí dáda mairá kaúde amídú onté uno.”

⁹ *Máa síkan Yisasi véin tiamemí, “Taréa anan Tiyaarafenu ano ma e antun aviren mino. Mai fara vara seyo, ma vanta vá dere Abaraamun anin mino. ¹⁰ *Mai ma afeyóká ein nanin banta kayo yosiré evarané avirano van mi Banta Anin mano erakhen mino.”

Moní Ma Yafisin Banta Kayoi Ovaeran Baya Ino

(Matiu 25:14-30)

¹¹ Máa siyákan banasi ano ovaren me inen maen béi Yerusaremí ádéi oriyain taréa anan Tiyaarafenui yafisin baru afoká

* **18:32:** Ruk 9:22, 44 * **18:34:** Mak 9:32 * **19:7:** Ruk 15:2 * **19:8:** Eks 22:1; Nam 5:6-7 * **19:9:** Ruk 13:16; Apo 16:31 * **19:10:** Ruk 15:4; Yon 3:17; 1Ti 1:15

inten mino sen iniyákan Yisasi mana ovaeran baya siamen mino. ¹² Béi máa semí, “Mana kin anin mano ena varafá orintin béin maman kiní urantí ovarané erivé bei kékáká dafiseno van oren mino. ¹³ Oriyáken bei siyan míkan doran banta aran eríkan mana tausen kina, mana tausen kina (K1,000) uariyan minó máa amiren béi máa sen betin tiamemí, ‘Ma moní póké para yore oriya vasirá téi ovarané ereno.’

¹⁴ “Máa siren orivíkan bei mana varu rákena kayo ano véin inian namu uantáden ‘béi ída sétinti kiní ino van muno’ sen mo siamino siren manáa vanta kéká tiantan mai ma orikhein barufá oren mino.

¹⁵ “Máa síkan betii vaya ída inin mai vanta maman kiní urákan béi ovaránen bei varurá eriven bei yoran banta kayo ma fefá moní amikharé ein kayo van náí máa aman monisá dóáden nafi siren béi onano van betin aren mino.

¹⁶ “Máa siren arákan mana vanta ano nare esé eren me máa semí, ‘Kákan banta oe, séi ano eni mana tausen kina fóké tiyan míkan tausen kinan aman moní dóan kaékun ban mino.’

¹⁷ * “Máa síkan bei kin mano evaránen béin tiamemí, ‘Ei senti kama yoran bantan bai kama yorari eono. Éi ma sító danáká ma kama yafisirí eonafá taréa séi ano éin maman kákaní urékuya siyan míkan kákan baru máará dafisin nono.’

¹⁸ “Máa sirákan ena yoran banta ano mairá eriven temí, ‘Kákan banta oe, eni tausen kina fóké téi yan manápá tausen kinan aman moní dóan kaékun ban mino.’

¹⁹ “Máa síkan kin mano evaránen béin tiamemí, ‘Ei yan manápá kákan barurasá dafiseno.’

²⁰ “Máa sirákan ena yoran banta ano mairá eriven temí, ‘Kákan banta oe, masina eni mana tausen kina moní dayaráefin úkuré kaékun baré íká baré eré uno. ²¹ Para vara seyo, séi ma en oniyaruna éi sinko vanta vákeya inká ena vanta ano ma kain baré ein daná éi kasae variyákeya ena vanta ano ma yoká ein dunan éi kasae unafé iya ono. Máan ma iyaona van mi séi en nan peré uno.’

²² “Máa síkan kin mano evaránen béin tiamemí, ‘Ei namu yoran banta uron

mono. En avayarái éin daimonté uno. Éi afová ukhen ná téi sinko vanta váké téi kasaé ena vanta ina yaná bariyá inká ena ano ma yoká ein dunan kasaé o unafiyaré uno. ²³ Kasaé o unafiyaruna ifo faraé tireyá tenti moní ída moní ma kain namumpin kaen nan baré irá téi ma ovarané erivé mai moní ano ma yóádein aman má mai moní bá evare rafuno.’

²⁴ “Máa siren mai ma ádé mantakhá ein kayo van temí, ‘Béin pintena mai moní dafireya mai ma siyan míkan tausen kina ma kain bain banta ameno.’

²⁵ “Máa síkan betí ankan evaránen béin tiamemí, ‘Kákan banta oe, béi fefá tiyan míkan tausen kina manten mino.’

²⁶ * “Máa síkan béi evaránen betin tiamemí, ‘Téi siretí ankan tiamé uno. Kokhon danasinta ma yantin baréin nain nanin bantan móeken aminten mino. Inká ída ma yakáin nain kéká ina mai sanáa ma yaká intin mai vá deren minó baranten mino. ²⁷ Máan tinten mifo mai ma senti namuro kayo ano ma séi nan ída vá betí ankani kiní ino van ma sein kéká avireya mará me kaúde sen tivorá arono.’ ”

Yisasi Ma Kin An Daven Yerusaremí Ódein Baya Ino

(Matiu 21:1-11; Maki 11:1-11; Yoni 12:12-19)

²⁸ Yisasi mai ovaeran baya siamíden mai oyampáké Yerusaremí ma ódikhen aintá ben nare óden mino. ²⁹ Ódiyaren Betfasí baru vá Betaní baru vá ádé bain anu Orifi se sin dontá ódiven bei eyo iyampón kanan tiantian temí, ³⁰ “Tiré kanan mesan barurá oriveya mai varufin un pébe onetin ma mana ano ída amaniná kumantein donkin ma anan kuádantin banti mai vá útufe ereno. ³¹ Máan tesin ma mana ano ma siré kanan ina iyan ma fara mai anan útufiya fono ma sintiya vá Bafan mano veni yoran ban tí uno vá te véin evaráne siameno.”

³² Máa síkan mai ma siantan orein bantá kan mano o onan mai ma Yisasi siameini ukharen mino. ³³ Máan tukharéin míkanan mai donkin anan útufiyaréin mai donkin afóe ano míkanan máa sen inaemí, “Tiré kanan pará mai donkin anan útufiya rafono.”

* **19:17:** Ruk 16:10 * **19:26:** Mat 13:12; Ruk 8:18

³⁴ Maa síkan míkanan mano evaránen betin tiamemí, “Bafan mano veni yoran bami sisintá uno.”

³⁵ Maa siren mai donkin baren Yisasi vaintá mo kaúden betí au anamun póké mai donkin amaniná uvíden Yisinin ayain mai yaró un kumanen mino. ³⁶ Béi mai donkin ané un kumamen oriyákan banasi ano ayá au anamun kayo yavádiyan aasá uvísen oren mino.

³⁷ Orifi se sin Anu ma me ampíren araviyain aa ádé béi erivíkan ben ma vákuren noin nanin banta ano véi ma enará ukhein danasinta ma afoká iyan ma oniyará ein nan avádóden oovararen Tiyarafenu aví daní iyáken amusin en mino.

³⁸ *Máan tiyáken beti oovaren temí, “Bafan aviká ma erikhein kin ná Tiyarafenu ano avábá ino. *Íbo 118:26*

Tiyarafenu ano seti vanasi ará kusin timen mifo véin avisá daní ó tifano.”

³⁹ Maa siyákan manáa Farasisi kayo ano mai nanin bantafin baren betí ankan Yisinin máa sen tiamemí, “Aru soe, ei eyo iyampon kayo asesin ída máan baya kayo sino.”

⁴⁰ Maa síkan Yisasi evaránen betí ankan máa sen tiamemí, “Téi siretin tiamiyá uno. Ma nanin banta ano ma ve oo fákaren ma ída veya sintin maen ma onámaná kayo ano kasaen oovararen Tiyarafenu aví daní inten mino.”

Yisasi Ma Yerusaremí Ban Ifí Dein Baya Ino

⁴¹ Maa siren béi Yerusaremí ádé oríven mai varu oniyáken ifí daanten mino. ⁴² Ifí daren temí, “Yerusaremí oe, saréa ma éin ará kusin daná ma varen me amin afová ono van téi inikhé umpo éi mai yaná afová e varé esin Tiyarafenu ano éin ará kusin amin nainten mifo mai yaná ano saréa siretin avorá aúpasí ukhein ída onan nono. ⁴³ Ineno. Maná damú afoká intin maen eni namuro kayo ano eni yafu akhempá bara khaen eúkuren maen minó ankinafa yafisinten mino. ⁴⁴ *Máan turen maen éin ankaman barakuádanti varafin eravesin éin má e akhafana vá maifin ma váin nain dere vá aruren namu uantanten mino. Máan turantin maen mana onámaná ano ída ena onámaná daró

banten mino. Mai farava máan tinten na ino. Tiyarafenu ano ma éin aya ono van ma éi vaipá erein damú éi ída kamaeya afová ukharé esin mino.”

Yisasi Ma Kákan Monó Namun Pinte Ma Minó Daná Sariin Banta Kayo Yo Siantein Baya Ino

(Matiu 21:12-17; Maki 11:15-19; Yoni 2:13-22)

⁴⁵ Maa siren Yisasi monó namun da-fufin ódiven maifin ma sarí iyá ein danasinta kayo yo maman karúdiyan tiantan barufá araven mino. ⁴⁶ Máan turen betin tiamemí, “Tiyarafenui vompon dóki ano máan mi sikhemí, ‘Tenti má maen mai amúkin namun’ *Ais 56:7*

ne sikhein mifo siretí ano maman ‘umoyan banta kayoi má an diya ono.’ *Yer 7:11*

⁴⁷ *Máan turen béi ena ena yamú monó namumpin oríven maen monó baya sian banasi amiyákan monó ánon banta kéká bá man baya ma afová ukhein banta kéká bá banasirá ma ánoní ukhein banta kayo vá ano Yisinin ma aruan purin aa van dosiyaren mino. ⁴⁸ Máan tiyákan banasi ano ákonaen béini veya iniyan pasen béin ma arin aa vetí ankan ída kanaíen dosen mino.

20

Yisasini Ákona Van Ma Monó Átaru Namuntá Ma Ánoni Ukhein Banta Kéká Ano Ma Inaein Baya Ino

(Matiu 21:23-27; Maki 11:27-33)

¹ Maná damú Yisasi monó namun da-fufin kama veya sian banasi amiyákan monó ánon banta kéká bá man baya ma afová ukhein banta kéká bá banasii ánon banta kayo vá ano véi vaintá eren mino.

² Eríven betí ankan máa sen béin tiamemí, “Ei setin tisimeno. Nái ákonarasá mai yanásí iya fono. Iye anó mai ákona éin amikha fono.”

³ Maa síkan béi evaránen betí ankan tiamemí, “Téin má deren tiretin ina onté umpo anona vá téin tisimeno. ⁴ Yoni ma vanasi monó non péantiyaré ein mai Tiyarafenui ákonarasá péantiyan nafi áa varará bantai ákonara safino.”

5 Maa síkan betiyan ten orera emí, “Inaru fáke na ino ma sé tifékun maen mai fará ída mairá mumunan iya rafono sinten mino. 6 Inká barará banta ina ino ma sé tifékun maen banasi ano Yonin nan sakhanampa vanta ino sen mumunan ukheintá tetin onámaná tinkaminten mino.”

7 Maa sen iniren betí ankan béin tiamemí, “Mai ma Yoni mantará ein ákona mai setí ída afová ukhé tifeuno.”

8 Maa síkan Yisasi evaránen betin tiamemí, “Iye anó ákona séin timikhará ma yorarí iya rafu, mai séin má dere ída siretin tiamenté uno.”

Uvaini Yunan Anaará Ma Namu Yafisiri in Banta Kéká Pákena Ma Sian Ovaéadan Baya Ino

(Matiu 21:33-46; Maki 12:1-12)

9 *Yisasi mana vava máa sen banasi sian baéan amemí, “Mana vanta ano uvaini yunan ana yóádákaren dunan ma yoran banta kayo van mairá dafíken dóden manáa uvaini aran betí miyan do variyan dunan afóen nina khaono siren ena varufá ayáká bano van oren mino.

10 Ovaren uvaini aran ma kúdin damusí íkan maifin ma yafíkein kayo ano manáa kúduan amino van béi iniren mana vei yoran banta siantan mai yafisin banta kayo vaípa onóbíkan mai kayo ano mai yoran banta ankáden tiantan ída mana yaná baran na fara evaránen oren mino.

11 Oríkan mai yunan ana afóe ano ena yoran banta siantákan betí baípa orin mai kéká ano mai vanta vá dere namu ankamirí uren evaránen tiantan para oren mino. 12 Oriyaimpin béi kanú manáa dádasí en ena yoran banta vá tiantan oríkan mai kéká ano mai yoran banta namu arirí uren darifen dunan akhempá mo kharúden mino.

13 “Máan tiyaimpin mai uvaini yunan ana afóe ano semí, “Taréa séi intesá onte rafuno. Téi se sanin nan ma sinunu iyaruna fumara ma siantékun orintin maen mi vetí ankan kanaíen béin avaya ininten mino.”

14 “Máa siren mai fumara siantan oríkan mai yafisin kéká ano mai fumara oniyan temí, ‘Béi anon be afóeni minó daná

baranten mifo eresí béin arékun púbintirá ma yunan ana setiyan bará tifano.’

15 “Máa siren mai yunan ana fintena mai fumara yo yarifen akhempá morúden aruan puren mifo mai yunan ana afóe ano mai yafisin kéká náisá inten nafino. 16 Béi mai yafisin kéká me aruan púden maen mai yunan ana yafían ena kékái aminten mino.” Maa síkan banasi ano ena kéká ma amein baya iniren temí, “Béi ída vá máan tino.”

17 Maa síkan Yisasi vetin auufen kakháben inaemí, “Tiyarafenui vompon dókifin ma ma vava uvamádan baini ana ano naíesá tikhen nafino.

“Má uvaran banta kayo ano ma yo mamán karúdein onámaná ano maman má dádaimpin mana ákona onámanasí ukhen mino.’ ” *Íbo 118:22*

18 * “Máan tukhen mifo minó nanin banta ano ma mai onámaná daró ma eraven ankaminten maen morun ta finen tító tító inten mino. Inká mai onámaná ano ma mana nanin banta ané ma eravinten maen béin dasantan panten mino.”

19 Maa siyákan man baya ma afová ukhein kéká bá monó ánon banta kéká bá ano mai ma ovaeran baya ma véi siyain ovaren me inin betin oyampá baya siyaimpin maí damú ana véin pákano van uvaen banasi van péden ifá en mino.

Kamanin Ma Takisi Amin Baya Ino
(Matiu 22:15-22; Maki 12:13-17)

20 *Man baya ma afová ukhein kéká bá monó ánon banta kayoi ánon banta kéká bá ano Yisasintá dafían ákona uven manáa afurin banta kayo siantákan mai vanta kayo ano fura sen Yisasi vava iniyan mino sino van kampunién nóken Yisasi ma manáa vava me avá dantí mai vayará béin pákaan ánon kamanin ayampin kaono siráken afuriyaren mino. 21 Mai ma afurin kéká ano máa sen béin inaemí, “Aru soe, setí afová ukhé uno. Éi funtákein baya anan banasi siamiyákeya aví bain má ída ma aví bain kayo vá o éke e éke ureya manaí ukhein baya anan tiamiyáke mae fura vayafó anan Tiyarafenui avúavá tian dáko éiya ono. 22 Máan téiya ompo éi ma

* 20:9: Ais 5:1 * 20:18: Ais 8:14-15 * 20:20: Ruk 11:54

iniyaona setí kanaisá erá moní Sisan takisi amente rafuno áa ída fino.”

²³ Maa síkan betí ankan ma máká tiyain béi afová iyáken betin máa sen tiamemí, ²⁴ “Mana moní aní irá onano. Iyen aman manon má aví basá mai moníká ban nafino,” síkan ²⁵ betí ankan evaránen temí, “Sisan mino,” síkan béi vetin tiamemí, “Sisan nina yanasintá Sisan ná ame vá inká Tiyarafenu ina yanasá Tiyarafenun ná ameno.”

²⁶ Maa síkan betí ankan anú duren mai ma véi vanasifin tein bayará ída kanaíen ben pákarí iyaimpin ída vaya sen mino.

Púkaren Ma E Mantaven Ábasuí Inain Baya Ino

(Matiu 22:23-33; Maki 12:18-27)

²⁷ Sadyusi kayo finté manáa ano sen ma furiyain nanin banta ano ída evaránen orun mantanten ne ma siyain kayo ano Yisasin inaono van béi vaintá eren mino.

²⁸ *Eriven mai kéká ano máa sen béin tiamemí, “Aru soe, Mosesi ano seti sina máa sen bompon dókifin uvantaren mino, ‘Mana vanta ano ma anasi mamákaren ma ída iyampon kain na ma mai vanta ano fúbintin ná be afá aváeyan pinté mana ano vá baré mamáken ná mai nanintá mai ma furein nina iyampon kaúantano.

²⁹ Pefá dan manápá ifo afápá kan un kádan anavádano ano varen esékena vanta ano anasi mamaren ída iyampon kain na fara furen mino. ³⁰ Fúbin mai rákena ano mai varé mamaren máan mana en mino.

³¹ Máan turan kanú manaú banta ano yere mai varé mamaren osaní uvíkan mai máa yan manápá ifo afápá kan un kádan anavádano ano mai varé nanintá ída mana iyampon kain na máa mana en oriyan minó máa ano o furen mino.

³² Fúbíkan mai nanin má dere o furen mino. ³³ O furen mifo mai nanin maen dan manápá ifo afápá kan un kádan anavádano anon mantaren mifo ínaimpá ma furin nanin banta ma orun mantan nain damú béi iyen aná suron ná banten nafino.”

³⁴ Maa síkan Yisasi evaránen betin tiamemí, “Ma vararái vanasi ano ma ábasuíin ban mino. ³⁵ Máan tukhen mifo funtákein nanin banta ma furiyain nan Tiyarafenu ano evaránen orun mantanten

ne ma sikhein kayofin ábasuíin ída vanten mino. ³⁶ Mai farava ino. Tiyarafenu ano furin pintena vetin orun avían mantarantin maen béin akhafanaí uven ída furinton enisori an daven para vanten mino. ³⁷ Mai ma sító daa ana ira khiyákan ma Mosesi ano Bafan araaren ma Éi Abaraamun má Aisakin má Yekopun mái Ayarafenu ono ma sikhein mano furin nanin bantai e mantan mi Mosesi ano setin aní ukhen mino. *Eks 3:6*

³⁸ Aní ukhen mifo Tiyarafenu maen ída furin nanin bantai Ayarafenu ifo véi maen ayun ma fa vain nanin bantai Ayarafenun bantin mi ven avorá minó nanin banta ano ayun para vanten mino.”

³⁹ Man baya ma afová ukhein kayo finté manáa kéká ano mai ma Yisasi sein baya iniren béin máa sen tiamemí, “Aru soe, Éi kama vayan te ono.” ⁴⁰ Maa siran banasi ano evaránen béin mana vaya inain nan peren mino.

Tiyarafenu Ano Ma Aní Ukhein Banta Mai Iyen Anin Nafino

(Matiu 22:41-46; Maki 12:35-37)

⁴¹ Máan tiyákan Yisasi máa sen banasi inaemí, “Tiyarafenu ano ma vei vanasi evaránen avirano van ma aní ukhá ein banta van banasi ano faraé tiren ná Devitin anin mino siyan nafino. ⁴² Deviti veyantái Í Bompon dókifin tian páman en mi,

“Bafan mano senti Bafan tiamiyáken, “Ten tiyan kurompá kumantesirá

⁴³ eni namuro kayo maman

en aránaópá kaékun ná eni arantan kain karasisá ino.”’ *Íbo 110:1*

⁴⁴ Tiretí onano. Deviti veyantái venan Bafan ne sen arakhan mifo mai vanta ano inté uákená ben aniní inten nafino.”

Yisasi Ma Au Khákan In Banta Kayo Van Ma Sein Baya Ino

(Matiu 23:1-6; Maki 12:38-40; Ruku 11:37-54)

⁴⁵ Maa siyan minó nanin banta ano Yisasini vaya iniyákan béi vei eyo iyampon kayo máa sen tiamemí, ⁴⁶ “Man baya ma afová ukhein banta kayo vará dafiseno. Betí ankan ayá au anamun uren nono van anunu iyáken maen banasii átaru

* **20:28:** Diu 25:5

varurá nontin banasi ano kama yamú ino sen amé amé ino van anunu iyáken maen monó átaru namun kayofin má omá dunan ma saran naimpin má betí ankan esé an bain karáká kumaneno van mi anunu é iyan mino. ⁴⁷ Betí ankan baré nanin kayo mákáden maen mai nanin kayo amá pintena yanasinta umoyan bariyáken maen kampun ten ayáká amúké iyan mifo uman ma yaimin damú ma afoká intin mai kéká anon moéken uman baranten mino.”

21

Baré Nanin Mano Susu Sin Moní Ma Karú Dein Baya Ino
(Maki 12:41-44)

¹ Yisasi oniyán bákán moní nanin banta ano susu moní monó namumpin ma moní kain bokhise ma vaimpin kaiyaren mino. ² Kaiyákan mana ve avafu fúkan ona ída vain baré nanin mano kankanan toeya varen mai vokhisefin me kaiyákan béi onen mino.* ³ *Ódaren máa semí, “Téi fura uron mi siré tiretí ankan tiamiyá uno. Minó ona vain nanin banta ano ma kaein moní esantaren mi ma ona ída van baré nanin mano khaen mino. ⁴ Minó nanin banta ano kokhon ná moní dákaré ein pintena manáa moní yaimen me khaen mifo ma nanin mano ída kanaí ukhen mi veyan ma yunan máden nano van ma fákakharé ein moní minó máai me khaen mino.”

Kákan Monó Namun Ma Varákin Nain Baya Ino
(Matiu 24:1-2; Maki 13:1-2)

⁵ Yisasini manáa eyo iyampon kayo ano monó namun ma uvantein ódaren betí mai van máa semí, “Kama on kayo vá kama yanasinta vái Tiyarafenu amíkhan mi kamaen aní uran ban mino,” síkan Yisasi vetin tiamemí, ⁶ * “Taréa ma oniyaona yanasinta ano ináimpá maná damú afoká intin maen namuro kéká ano minó daná barákuon karúdantin barará ana eravintin maen mana onámaná ída áintin ena onámaná daró banten mino.”

* **21:2:** Kiriki vayafin kankanan repta en sikhein mino. 12:11-12 * **21:15:** Apo 6:10 * **21:16:** Mat 10:21-22

Ma Vara Ma Kípan Akhempá Ma Aní Daná Afoká Inai Pákena Vaya Ino
(Matiu 24:3-14; Maki 13:3-13)

⁷ Máa síkan betí ankan Yisasin inaemí, “Aru soe, inte yamusá mai yaná kayo afoká inten nafino. Inte yaná ma afoká intirá tetí afová erá mai yanasinta inka ádé anantá afoká inten mino sé tifante rafuno.”

⁸ Máa síkan Yisasi evaránen betí ankan tiamemí, “Tiretin me kampun tinten mifo yafian ná ákona ono. Mai fara vara seyo, kokhon nanin banta ano eriven maen téin tiví diyan máa sinten mino, ‘Téi ma mai vantán bákun damú inka ádé’ e ne sinten mifo siretí ída vá betin bákurono. ⁹ Ináimpáké ma inesin ma kákan aruvín afoká intin ma mana vara ano e manten ena vara vá aruvintin inká mana vara finté ma verara aúban dáiden aruvinti maeya siretí ankan ída vá akhokho van ono. Mai yanasinta naren afoká inten mifo ma vara ma kípan damú ída ainen erinten mino.”

¹⁰ Máa siren Yisasi evaránen betí ankan tiamemí, “Manáa vara kayo finte kéká ano e manten ena vara kayo finte kéká bá aruvintin maen inká manáa kini yafisin pintena kéká ano e manten ena kini yafis-impintena kéká bá aruvintin inten mino. ¹¹ Máan tintin maen ma vara kákantá kaya intin manáa akhempá kákan anan má kákan aí danasinta vá afoká iyantin inká minan ayontá aní daná bá akhokho yanasinta vá afoká inten mino.

¹² “Mai yanasinta ma ída afoká ukhantín maen tiretí ankan pákaren namu arirí inten mino. Betí ano siretin monó átaru namun kayofin kaúden maen baya yaíden aviren mo karavusifin kaiyan maen tiretin aviren kin kayo avorá bá kamanin kayo avorá bá orinten mifo mai fara va ino. Tireti senti eyo iyampon kayon basin pasen mi máan tinten mino. ¹³ Máan ma inain manon tiretí ankani aái intiyan betin monó baya siamin nono. ¹⁴ * Máan tin nampo sireti ída vá betin ma evaráne siaminona vaya van kokhon ineine ono. ¹⁵ * Mai fara vara seyo, seyantái siretin puntákein baya vá kama afova

* **21:3:** 2Ko 8:12 * **21:6:** Ruk 19:44 * **21:14:** Ruk

vá amiyákun maen turetí namuro kayo ano ída kanaíen téi ma amenuna vaya átakharé uren do varanten mino. ¹⁶*Turetí ankan anóe afóen má afá aváeyan má turetí kéká bá arona kayo vá ano yeren turetín namuro ayampin amintin arintiya siretin pinté manáa ano furin nono. ¹⁷Téin naro siren banasi ano siretin ará namu uantanten mino. ¹⁸Máan tuantanten mifo siretin ánon do finté ída mana ayo farusen eravinten mino. ¹⁹Máan tinten mifo siretí ankan mantaan ákona ukhareya vá ayun ma fara van oriyan ban aunan barano.”

Mana Namu Yana Suron Ma Afoká Inain Baya Ino

(Matiu 24:15-21; Maki 13:14-19)

²⁰Máa siren Yisasi evaránen tiamemí, “Tiretí ankan onesin ma arugin banta kayo ano ma Yerusaremí baru ma iyaren eúkintiya mairasá tiretí afová eya vá inka ádé anantá ma varu namu inten mino vá teno. ²¹Mái damú ma afoká intin ná Yudiá ma vain nanin banta ano vá anufá karan ódintin ná Yerusaremí ma vain kéká ano má varu me ampiren ena akhempá karan orintin ná Yerusaremí ankinafá ma vain kayo ano ída vá má varufin ódino. ²²*Mái fara vara seyo umeí ma iyá ein kéká ma uman amin damusí ma intin maen Tiyarafenui vompon dókifin ma uvamádan baré ein baya kayo ano fura sen afoká inten mino. ²³Ma varará kákan uman afoká intin Tiyarafenui aranan ná ano má nanin bantafin afoká inten mifo amúbá nanin kayo vá arará iyampon kayo ma nan kuviyá inain nanin kéká bá ano kákan uman baranten mino.” ²⁴*Uman baranten mifo namuro kayo ano me Yerusaremí kéká aruren maen aviren ena vara kayofá mo karavusií inten mino. Máan turantín ena anan banta anon Yerusaremí me aruren ayanavan en oriyantín baren maen Tiyarafenu ano ma vetintá dafisino sikhá inain ma mo akheníin damú ma afoká intin mairá mo kanaí inten mino.”

Tiyarafenu Anin Ma Overánen Erin Nain Baya Ino

(Matiu 24:29-31; Maki 13:24-27)

²⁵*Máa siren Yisasi evaránen betin tiamemí, “Mái damú ara ara aní daná ano áaura safi viyonta safi ofu kayora safi afoká inten mino. Máan tintin maen ma varará minó nanin banta ano un non ma karantó en e man paútin nain avaya ma iniren betí kokhon ineine iyáken berai siya akhokho van inten mino. ²⁶Máan tiyáken maen ma varará ma afoká ono van ma iyain danasinta van banasi avinantan dantin auu entave entave inten mino. Má farava ino inaru rákena kákan danasinta ano kayamana inten mino. ²⁷*Máan tintin máí damú banasi ano onantin Banta Anin mano konan daró bei kákan ákona vá panu vá erinten mino. ²⁸Mái yanasinta ma araién afoká inti vá tiretí ankan orun mantaan ákona uve vá anuran duvaserano. Máí fara vara seyo, Tiyarafenu ano ma siretin evaránen aviran damúí ádesí inten mino.”

Fiki Yaa Anará Ma Afova Varan Baya Ino

(Matiu 24:32-35; Maki 13:28-31)

²⁹Máa siren Yisasi evaránen ena ovaeran baya vetin tiamemí, “Tiretí ankan fiki yaa ana vá ena yaa ana kayo vasá onano. ³⁰Tiretí ankan onen nan ma auyen anaa varen orera íka maeyan tiretí afová eya áken afe inten mino séiya ono. ³¹Máa séiya ompo máa mana eya vá tiretí onesin ma máí yanasinta afoká intiya Tiyarafenui yafisin baru inka ádé eriyán mino vá teno.

³²“Téi fura siré turetín tiamiyá uno. Má damú kena nanin banta ano ída fúkesin mí ma yanasinta afoká inten mino. ³³Máan tintin maen ma vara vá inaru vá kípanten mifo séinti vaya ída kanaíen kípanten mino.

Eyo Iyampon Kayo Ano Ma Yafiken Ban Baya Ino

³⁴“Máan tinten mifo siretí ankan dafían ná ákona ono. Ena ena yamú óen non nareya óeniya vákeya namu avúavá bá tiretí ma vaona van ma ineine iyasin maen máí avúavá anon turetín maman bararasí intin Bafani erin mano oyivampin ma areiníen manádái afoká inten mino. ³⁵Para vara seyo, oyivan mano

* **21:22:** Yer 5:29; 46:10; Ose 9:7 * **21:24:** Íbo 79:1; Rev 11:2 * **21:25:** Ais 13:10; Isi 32:7; Yoe 2:31; Rev 6:12-13

* **21:27:** Dan 7:13; Mat 26:64; Rev 1:7

ma safúna fáké iyain an den ma vara rákena nanin bantafin maí damú afoká inten mino. ³⁶ Minó damú tirití ankan dafianá ákona ukhevaya vá ena ena Ti-yarafenu vaípa amúkiya vasin na ákona amino. Máan tiyare vá mai yanasinta ma afoká inain damú esantareya vá Banta Anin avorá o mantano.”

³⁷ Máa siren ena ena yamú Yisasi monó namun dafufin banasi mo monó baya siamiren maen inúpasí ma íkan Orifi se sin anufá un bariyaren mino. ³⁸ Máan tiyákan maen minó nanin banta ano véini monó baya ineno van ena ena ákurá orun mantaaren monó namun dafufin eriyaren mino.

22

Yiasin Arin Aa Van Ma Yosein Baya Ino
(*Matiu 26:1-5, 14-16; Maki 14:1-2, 10-11; Yoni 11:45-53*)

¹ Yisi Ída Van Bereti Ma Nan Omá Damu san ma Avo Uantan Damu se ma siyain maí damú afokáin ádé en mino. ² Maí damú afoká ono van iyákan monó ánon banta kéká bá man baya ma afová ukhein kéká bá ano vanasi van periyáken betí ma Yiasin aruan purin nain aa van dosen mino.

Yudasi Ma Yiasin Namuro Ayampin Avían Kaono Van Kana Ino Sein Baya Ino
(*Matiu 26:14-16; Maki 14:10-11; Yoni 6:70-71*)

³ *Dosiýákan tiyan míkan mifo sirantan kan orun kádan (12) eyo iyampon kayo finte Yudasi ne sen ma inká ena ví Isikari-oti ne ma sikhein banta aúpin Ban Anon mano un peren mino. ⁴ Un pébikan béi oren mo monó ánon banta kéká bá monó namuntá ma yafisin kéká bá ayampin ma Yiasin avían amin nain aa van bayaién mino. ⁵ Bayai urákan betí ankan amusin uren béin nan moní amenté uno sen mino. ⁶ Máa síkan Yudasi kana ino siren banasi ma ída véin má ma átaru inain damú Yiasin avían betin ayampin kaono van ave iyan aa van dosiyaren mino.

Yisasi Ma Vei Eyo Iyampon Kayo Vá Avo Uantan Dunan Típa Nein Baya Ino
(*Matiu 26:17-25; Maki 14:12-21; Yoni 13:21-30*)

⁷ *Yisi Ma Ída Veretifin Kain Damú afoká íkan betí ankan sipisipi arará aruren niyáken Ti-yarafenu ano ma Isareri nanin banta Avo Uantan ma kamaen baré ein nan ovaren me inintéin mi ⁸ Pitan nú Yonin nú Yisasi siantan oriyákan máa sen tiamemí, “Tiré kanan ore vá Avo Uantan Damú kena yunan ná teti sina mo funtáán kaono.”

⁹ Máa síkan békanan béin inaemí, “In-terasaí mai yanasinta mo funtáádante ra-funo.”

¹⁰ Máa sen ina íkan béi evaránen tiamemí, “Tiré kanan kákan Yerusaremí barufin ódesin ma mana vanta ano ma kákan non kura vá ma efókantiya mai vanta yakhafe vá be ma ódin nain namumpin ná ódono. ¹¹ Mai namun ma ódivinte vá má afóen ná máa se siameno, ‘Arú ano éin nan intesin ná mana karafaran bain ná tesi eyo iyampon kayo vá Ti-yarafenu ano ma Isareri nanin banta ma Avo Uantein dunan maifin nante rafuno,’ sen inaen mantino vá teno. ¹² Máa se ináesin maen béi mana kákan karafaran ma yan bain aní inti maen maifin ná dunan nan takhó bá kumanin kará bá banten mifo maifin ná dunan puntádeya saman ka ono.”

¹³ Máa síkan békanan oriyan o onákan mai ma Yiasin ano seiní ukhan mai yanasinta ódaren Avo Uantan dunan mo sáden puntáan kaen mino.

Yisasi Ano Ma Bereti Vá Uvaini Vá Bei Eyo Iyampon Kayo Amein Baya Ino
(*Matiu 26:26-30; Maki 14:22-26; 1 Ko-rini 11:23-25*)

¹⁴ Dunan nan áauí íkan Yiasin má bei eyo iyampon kayo vá ano yunan kaúden nan takhóká kumanen eúken mino. ¹⁵ Mai sakhóká kumanen eúkuvíkan betí ankan tiamemí, “Ínaimpá téi uman baranté umpo Ti-yarafenu ano ma Isareri nanin banta ma Avo Uantein dunan nare ma širetin má ma nan nan téi moéké tinunuiyá uno. ¹⁶ Téi širetí ankan tiamé uno. Téi ída evarané Ti-yarafenu Ano Ma Avo Uantein dunan nakhékun mi mai ma siran baré

* **22:3:** Yon 13:2, 27 * **22:7:** Eks 12:1-27

ein daná pura sen Tiya rafenui yafisimpin afoká inten mino.”

¹⁷ Maa siren uvaini non bain kápi máden Tiya rafenu susu siantáden betí ankan tiamemí, “Minó ano mai fintena masiman ure vá nano. ¹⁸ Para vara seyo, saréa fi ínaimpáke safi séi ída evarané uvaini non nakhékun mi Tiya rafenui yafisin afoká inten mino.

¹⁹ Máan turen mana vereti orun máden Tiya rafenu susu siantáden temí, “Ma se sui siretí ankan ayaino van amé umpo vá máan mana iyákeya vá te nan inisintano,” siren kisiariyan amen mino.

²⁰ Amin narákan uvaini non kápi orun mamaren mai ma ein avúavasí ana en máa semí, “Tiretin aya ino siré ma sesi nare vanaeruna mai ma uvaini kápi anon tiretin má ma kasen ban auyen avúavá aní inten mino.” ²¹ *Maa siren betí ankan tiamemí, “Téin ma sivían namuro ayampin ma kaono van inikhein banta vái ma yunan nan takhóká ten má manafin ban mino. ²² Tiya rafenu ano ma fefá tikhá einíen Banta Anin mano furinten mifo véin ma avían namuro ayampin kain nain banta vará arunan uantano.” ²³ Maa síkan eyo iyampon kayo ano mai vaya iníden betiyan inain maran en orera iyan temí, “Iye anó mai avúavasí inté iná tino.”

Eyo Iyampon Kayo Ano Ma Iyé Kákani Inten Nafino Sen Asive Asive Ein Baya Ino

²⁴ *Maa síran beni eyo iyampon kayo ano vetin aúbaná pinté iye anó kákani o inten nafi siren beraran araíen asive asive en mino. ²⁵ *Maa sen orera iyákan Yisasi vetin tiamemí, “Ma varará ma ena anan nanin bantai kin kéká bá aví bain banta kayo vá ano ákonæen banasirá dafisiyáken betin asen aren iyáken maen betiyan nan banasi ayain kayo uno sé iyan mino.

²⁶ *Máan tukhen mifo siretí ankan ída vá máan tiyáke vá tiretimpin ma kákani ukhein banta ano vá iyampon arará an dantin ná inká tiretí ánoní ma ukhein banta ano vá tiretíi yoran banta an ná dano. ²⁷ *Máan tukhen mifo iye anó kákani ukhen nafino. Mai ma kumanten dunan niyain banta ano fi áa mai ma

yunan kuan amiyain banta ano fino. Mai ma kumanten ma yunan niyain banta anon kákani ukhen mifo séi siretí aúbaná doran banta an dakhéi siretin aya iyá uno. ²⁸ Akhenókain danasinta ma sempin afoká iya mae siretí ankan ten má bare ono. ²⁹ Bare ompo se sifóe ma inaru yafisin téin timeiní ananéi siretin inaru yafisin amé uno. ³⁰ *Máan tukhantiya mai yafisimpin tiretí ankan tesi yunan nan takhóká kumame yunan má non má niyáke Kini kará kayorá kumameya sirantan kan orun kádan (12) Isareri anantá dafikeya vetin daimin nono.”

Yisasi Ma Pita Nan Téin Oyan Timin Nono Sein Baya Ino

(Matiu 26:31-35; Maki 14:27-31; Yoni 13:36-38)

³¹ Maa siren Yisasi semí, “Saimoni oe, Saimoni oe, ineno. Uviti yasáden ma antan má asu vá ma yo aireiní en tiretíi mumunan akhenóka uan onano van Ban Anon mano ina ukhen mino. ³² *Maa síkhen mifo Saimoni oe, éin ayaintin eni mumunan ída eravino van téi fefái simúkukhé umpo éi ma sirun noe sire ma ovaráne erinte vá e afá aváen ná ákona uantano.”

³³ Maa síkan Pita evaránen tiamemí, “Bafan noe, éin má karavusifin oré inká en má puré ono van útakhé uno.”

³⁴ Maa síkan Yisasi semí, “Pita oe, sare inuran manan kókore ída asikhantiya kanú manáu dádá téi nan ída afová ukhé uno sin nono.”

³⁵ *Maa siren Yisasi vei eyo iyampon kayo inaemí, “Tiretin nan ma sesi yorará ono van ma siantéku oriyákeya moní unan má arantan anamun má ona váin unan má ída mamareya ore ono. Ore ompo maí damú tiretí ankan manáa yana san o afasíe fono áa ída fino.”

Sikan, “Ída ino,” sen mino.

³⁶ Ída ino ma síkan maen Yisasi veti ankan tiamemí, “Mai saréa vá moní unan nafi ona váin unan nafi ma van nain banta ano varesin ná baenati ma ída van nain banta ano vá ei iyon au anamun ná mo sarí ure vá mai monípó mana

* 22:21: Íbo 41:9; Yon 13:21-22 * 22:24: Ruk 9:46

23:11; Mak 9:35 * 22:27: Yon 13:12-15 * 22:30: Mat 19:28

* 22:25: Mat 20:25-27; Mak 10:42-45 * 22:26: Mat

* 22:32: Yon 17:15 * 22:35: Ruk 9:3; 10:4

vaenati miyaní ono. ³⁷ Para vara seyo, Ti-yarafenui vompompin máa sikhán mino, ‘Banasi ano véin oman maña namu vanta an daren maen béin e yankáan ume nanin banta vá kainten mino’ *Ais 53:12* ma sikhá ein mai ano séin timaniná dákó intéii siretin tiamé uno. Ti-yarafenui vomp-pon dókifin ma sen nan tiádan baré ein baya ano inka yákó irí iyan mino.”

³⁸ Máa síkan bei eyo iyampon kayo ano semí, “Bafan noe, setí ankan kankanan baenati yékun ban mifo onano.”

Síkan Yisasi evaránen betin tiamemí, “Mai khanai ino.”

Yisasi Ma Ketsemani Amúkein Baya Ino (Matiu 26:36-46; Maki 14:32-42)

³⁹ Yisasi ma ena ena varé iyain avúavasíen kákan baru me ampíren Orifí anufá oríkan bei eyo iyampon kayo ano vákuren oren mino. ⁴⁰ Orifí anuyontá ma o unaven betí ankan máa sen tiamemí, “Ákonæ amúkiyare vá akhenókafin ída erave ankamono.” ⁴¹ Máa siren Yisasi vetí ankan me ampíren manáa e afánen nentá oriven aron mo yurafúden máa sen amúkemí, ⁴² “Tifóe oe, éi ma ananu iyante vá téin pintena ma uman do varan nampo mai ída vá téinti sinunu yakhafiyáke vá ei anunu ana vá dakhafono.” ⁴³ Máa síkan inaru fáké mana enisori ano véi vaintá eriven ákona amen mino. ⁴⁴ Yisasi ma ovaren me aváduan onan maen aufá uman dákan béi moéken ákonaen amúkiyan béin au fáké imúkan mano nare ma kapí kapí einíen barará eraven mino.* ⁴⁵ Béi amúkuan kíparen e manten evaránen bei eyo iyampon kayo vaípa oren o onákan betíi arunaná ano auunan ai íkan auun baren orera ukharen mino. ⁴⁶ Betí ankan auun bakharé íkan béi mo avoriyan temí, “Akhenókain mano siretí ankampin dákó intiya erave ankamin nampo ída auun bariya váke orun mantave amúkono.”

Yisasini Namuro Kayo Ano Ma Véin Pákein Baya Ino

(Matiu 26:47-26; Maki 14:43-50; Yoni 18:3-11)

⁴⁷ Yisasi fara vaya siyan maen kokhon nanin banta kéká ano eren mino. Eríkan maifin tiyan míkan mifo sirantan kan orun kádan (12) beni eyo iyampon kayo fintena mana Yudasín ne sin banta ano aní uanten eriaren Yisasín me amónano* van beni ádé eren mino. ⁴⁸ Eríkan Yisasi véin máa sen inaemí, “Yudasi oe, éi amónan avúavá pókesá Banta Anin avían namuro ayampin kaono vara fono.”

⁴⁹ Máan tiyain má Yisasín má ma varé ein eyo iyampon kayo ano onákan mai yaná afoká iyaimpin betí ankan máa sen Yisasín inaemí, “Bafan noe, éi eyo sinona vará ma kéká tetisi vaenati fóké aronte rafuno.” ⁵⁰ Máa siyákan mai finté mana ano vaenati máden monó ánon banta kékái ánon bantái yoran banta ayan kuron pákena átaren do síkaan karúdan barará eraven mino.

⁵¹ Máan tíkan Yisasi onen temí, “Mai avúavá ifá ano,” siyáken mai vanta átarentá ayan kaikan evaránen kamaen mino.

⁵² Máan turen monó ánon banta kéká bá inká monó namuntá ma yafisin kékái ánon banta vá banasii ánon banta kayo vá ma véin pákano van erein kéká máa sen tiamemí, “Mana umoyan bantá pákano vará tiretí ankan baenati vá dan má útaaré ere fono. ⁵³ Ena ena yamú ma séi siretí ankan má monó dafufin bákuya ída siretí ayan tentá kain na varéen nan mi sitípai ákona ano esantan inka siretíi yamusíen mino.”*

Pita Ma Yisasín Nan Ída Afová Ukhé Uno Sein Baya Ino

(Matiu 26:69-75; Maki 14:66-72; Yoni 18:15-18, 25-27)

⁵⁴ *Máa siran betí ankan Yisasín do fáken monó ánon banta kékái ánon banta amápin oriyákan Pita má dere vetin oy-ampá dakhafen manáa nentá oriyaren mino. ⁵⁵ Oren manáa vanta kayo ano mai namun ma vain dafu aúban ira sáden kumanen eúkukhan Pitan má maifin baren mino. ⁵⁶ Bákan mana yoran arinta ano Pitan onan irará kumantan ben ádé eriven

* **22:44:** Manáa feyante vompompin ves 43 vá 44 vá ída varen mino. * **22:47:** Mai amónan avúavá ma vain mai arona ma kamaen avábá in mino. * **22:53:** Ma sitípa maen mai Ban Anoni avúavá ino. * **22:54:** Mak 14:53-54

purefure en ódaren temí, “Ma vanta vá deren Yisasin má baren mino.”

⁵⁷ Maa síkan Pita umeren temí, “Anasi oe, séi ída uron mi véin afová ukhé uno.”

⁵⁸ Maa siren manáa vákan ena vanta vá ano yere óden temí, “Ein má dere veni kéká pintena vanta ono.” Síkan Pita umeren temí, “Ída ino. Téi ída veni eyo iyampon bá uno.”

⁵⁹ Maa siran mana áau orivíkan ena vanta ano ákonaen temí, “Ma Kariri fáke vantan báken béin má deren ben má baréikái fura siyá uno.”

⁶⁰ Maa síkan Pita evaránen temí, “Banta oe, mai ma éi siyaona vaya séi ída uron mi afová ukhé uno.” Maa siyain má anan kókore asen mino. ⁶¹ Asíkan Bafan mano yo vaéan Pitan oniyain má mai ma Bafan mano ma véin tiamen ma “Sare inuran kókore ma ída asikhantiya éi kanú manaú dádá téin nan ída afová ukhé uno sin nono.” Ma sen Pitan tiamikharé ein baya ovaren me inen mino. ⁶² Iniyáken béi varufá araven morun kákan ifí den mino.

Dafisin Banta Kéká Ano Ma Yisasin Máká Máká Ein Baya Ino

(Matiu 26:67-68; Maki 14:65)

⁶³ Maa tiyákan Yisasintá ma yafíká ein banta kayo ano véin máká maákáin baya siyáken ankamen mino. ⁶⁴ Maa tiyáken béin auurá davaráe anan póké damuren ankamiyáken máa sen inaemí, “Éi sakhanampaí eya aví dano iye anó ankamiyan nafino.” ⁶⁵ Maa tiyáken kokhon ída funtákein baya fóké béin asiren ankayanten mino.

Erotin Nú Pairotin Nú Ano Ma Yisasin Daimein Baya Ino

(Matiu 26:59-66; Maki 14:55-64; Yoni 18:19-24)

⁶⁶ Do khakhen ákurasí íkan man baya ma afová ukhein banta kéká bá monó ánon banta kéká bá ano manafin e átaru uaren Yisasin do aviren betíi uman ma yaimin banta kayo vaintá oren mino.

⁶⁷ *Aviren moren betí ankan temí, “Éi mai ma Tiyaafenu ano ma vei vanasi evaránen avirano van ma aní ukhá ein banta ma éi vanteya setin tisimeno.”

Síkan Yisasi evaránen temí, “Tiretí ankan ma siamékuya siretí ída mumunan inoná uno. ⁶⁸ Inká téi ma manáa vaya ma siretí ankan baonafá ma ina ekuya siretí ída ovaráne sisiminona van muno. ⁶⁹ *Maa tukhantin taréa ráké ma orin nain Banta Anin mano Tiyaafenu ma kákan ákona vaini ayan kuompái kuman inten mino.”

⁷⁰ Maa síkan minó banta kayo ano in-aemí, “Mai éi Tiyaafenu Anin na fono.”

Síkan béi evaránen temí, “Mai inka siretiyantá ten nan pura se ono.”

⁷¹ Maa síkan betí ankan temí, “Inka veyantá be oo fóké mai vaya sí inétiferuna ída ena vanta sékun beni avúavá eman tian páman inten mino.”

23

Monó Ánon Banta Kéká Ano Ma Yisasin Pairotin Ayampin Kaein Baya Ino

(Matiu 27:1-2, 11-14; Maki 15:1-5; Yoni 18:28-38)

¹ Maa siren minó banasii ánon banta kayo ano e manten Yisasin do aviren Pairoti vaipá oren mino. ² Mo khauren araién ben daimiyáken máa semí, “Tetí ankan onékun ma vanta ano setisi vanta anasii avúavá máden asuse uren maen kamanin ma takisi amin dere are usintiyáken inká beyanan Tiyaafenu ano ma vei vanasi evaráne avirano van ma aní ukharé ein kin muno siyaren mino.”

³ Maa síkan Pairoti ano Yisasin inaemí, “Éi Yutan kayoi kin na fono.”

Síkan Yisasi evaránen béin tiamemí, “Eyo mai inka eyantá te ono.” ⁴ Maa síkan Pairoti ano monó ánon banta kéká bá banasi vá máa sen tiamemí, “Ma vanta finte séi ída mana aau yosé uno.”

⁵ Maa síkan betí ákonaen temí, “Béi Karirí arái uren Yudiá ankinafá eúkiyáken banasi ará mantein monó baya o sen eriyen baren mi mará eren mino.”

⁶ Maa síkan Pairoti ano mai vaya iniren betí ankan inaemí, “Ma Kariri fákena vantá fino.” ⁷ *Maa sen ina íkan betí ankan eyo siyaimpin maí damú Eroti yere Yerusalemí e varé íkan Pairoti ano afová en béi ma yafíkein bara akhen pákena

* 22:67: Yon 3:12 * 22:69: Apo 7:56 * 23:7: Ruk 3:1

vantan Yisasi van mino siren béi vaípa tiantan oren mino.

⁸ Oriyain má Eroti ma Yisasin oniyen maen pefá beni vava ana iniyáken béi onano van iyaren pasen béi manáa aní danasí intí onano van anunu iyáken kákantá amusin en mino. ⁹ Amusin iyáken béi ano Yisasin kokhon danasinta van inaiyaren mifo véi ída evaránen mana vava véin tiamen mino. ¹⁰ Máan tiyaimpin monó ánon banta kéká bá man baya ma afová ukhein kéká bá ano ádé e mantaven Yisasin ákonaen daimen mino. ¹¹ Daidan Erotin má bei aruvin banta kéká bá ano Yisasin máka maáká uren kini ayá au anamun uantáden evaránen tiantákan Pairoti vaípa oren mino. ¹² Oriyákan Eroti ano fefá Pairotin namuroí uantiyaren maen maí damú ana míkanan evaránen aronaíen mino.

Pairoti Ano Ma Yutan Kéká Ayampin Yisasin Amein Baya Ino

(Matiu 27:15-26; Maki 15:6-15; Yoni 18:38b-19:16)

¹³ Máan turen mairá Pairoti ano monó ánon banta kéká bá banasii ánon banta kayo vá banasi vá arákan e átaru en mino. ¹⁴ E átaru uvíkan betin máa sen tiamemí, “Tiretí ma vanta avireya se vaintá mere véi ano vanasii avúavá máden asuse iyaren mino sen ná maé tiretin avorá mai ma siyaona yanasinta van ina uré ída mana uman dosé uno. ¹⁵ Máan tékun Eroti má deren máan mana en mi siretí ankan onano van ma vanta ovaránen tiantan tetí barunafá erikhein mi séi ída kanaíe béi nan purino senté uno. ¹⁶⁻¹⁷ Máan tukhein nan mi véin dafiyó anan ankádé tiantékun orinten mino.*

¹⁸ Máa síkan minó nanin banta ano mana mani oovararen temí, “Barabasin utúantesin tetimpin eriyantiya mai vanta aruan purono.” ¹⁹ Barabasi maen kamanin ma aruvin arái uren banta arin púbíkan mai van béin pákaan karavusifin kain baren mino.

²⁰ Pairoti ano Yisasin utúantantin orino van enadá bá betin inaen mino. ²¹ Ina iyákan betí ankan para oovariyan báken temí, “Arono, véin daa unkamádantá arono.”

²² Máa sen oovariyaimpin Pairoti ano kanú manaú dádasí en betin tiamemí, “Para vae. Téi ída ma vanta fintena mana uman dosikheruna ída kanaíe béin nan purinten mino senté umpo véi ná yaná auisá ukha vae,” siren béi semí, “Máan tukhein nan mi véin dafiyó ana ankádé tiantékun orinten mino.”

²³ Máa síkan Pairoti ano Yisasin daa unkamádantá arino van betí moékentá ákonaen oovariyan béini vava yararen mino. ²⁴ Máa siyaimpin Pairoti ano vetí ankani vava ánain dakhafen Yisasi nan purino sen mino. ²⁵ Máa siren betí ankani anunu yakhafen Yisasin betin ayampin amiyáken mai ma kamanin má aruvin arái uren ma vanta aruan púdan ma fakaan karavusii uran baré ein banta utúantan oren mino.

Daa Unkamádantá Ma Yisasin Arein Baya Ino

(Matiu 27:32-44; Maki 15:21-32; Yoni 19:17-27)

²⁶ Máan turan aruvin banta kéká ano Yisasin do aviren oriyaré ikan mana Saimonin ne sin Sairiní baru fáke vanta ano Yerusaremí ódono siren eriyaréin mai vanta fákaren duvun íkan Yisasin yaa unkamádan mamaren ben ánain bákuren oren mino. ²⁷ Oriyákan kokhon nanin banta ano Yisasin bákuriyan manáa nanin kayo ano ifisana yariyan béi nan e ifí den oriyaren mino. ²⁸ Máan ten oriyá íkan Yisasi yo vaében betí ankan tiamemí, “Yerusaremí nanin kéká soe, se nan ída ifí diyákeya sirétiyan má tiretí akhafana va san mana vá ífí dano. ²⁹ *Para vara seyo, ínaimpá damú afoká inti mae siretí máa sin nono, ‘Aa nanin kayo ma arápin ída iyampon báin ma inká ída ma iyampon nan kuyen ma ukhein kéká ano vá amusin ino.’ ³⁰ *Máa siren maen ‘Kákan anuyon kayo van betí máa sinten mino, “Un kaure setin dararano,” inká títo anuyon kayo van “tetin manan aúpasí ono.”’ *Ose 10:8*

³¹ Máa sinten mifo vanasi ano ma auyen daa ma irafin karúduantín maen ída kamaen kanten mifo kakhein daa ma

* **23:16-17:** Manáa Tiyarafenui vompon dókifin ves 17 asotúin baya máa sikhen mino. 17 Romu kaminini avúavá ano máan tukhemí, “Isareri nanin banta Avo Uantein Omá Damusá mana karavusi utúantantin ná orino.” * **23:29:**

irafin karúðantin maen ainen mi kanten mino. Máan mana en mi séi funtákeruna vanta ma namu avúavá usintiyaré esin maen Tiyarafenu ano namu nanin banta moékakhein uman mi aminten mino.”*

³² Aruvin banta kayo ano ena aau vantá kan Yisasin má arintin purino van aviren oren mino. ³³ Aviren Ánon Dampa e siyain dontá o unaven Yisasin aúban kaúden aau vantá kanan pintena mana Yisasini ayan kurompá kaen maen ayan ópá ena vanta khaen uren aren mino. ³⁴ *Máan turen aruvin banta kayo ano Yisasini ona varé oreraono van kati siyákan Yisasi máa semí, “Tifóe oe, vetí ankan ída afová ukhen mi mai yaná bariyan mifo vetí ume vá ampiantano.”*

³⁵ *Máa siyákan banasi ano mairá mantakhen oniyen maen ánon banta kéká ano Yisasin así mun uantiyan temí, “Ena nanin banta kayo anan ayaen noren mifo Tiyarafenu ano ma vei vanasi evaránen avirano van ma aní ukhá ein banta ma vanten maen ásin beyantá kanaíen beyan aya ino.”

³⁶ *Máa siyákan aruvin banta kayo ano yere eriven béin nan tiren intiyáken íta uvaini amiyan ³⁷ temí, “Éi fura se ma Yutan kayoi kin ma vanteya eyantá eyan aya ono.”

³⁸ Máa siren béin ánontá, “MA YUTAN KAYOI KIN MINO” sikhhein bompon uva-man kaen mino. ³⁹ Máan turan aau vantá kan ma arukhá ein pinté mana ano Yisasin máa sen oyampá baya semí, “Éi Tiyarafenu ano ma aní ukhá ein banta ma vanteya eyan aya uare verasan má dere siya ono.”

⁴⁰ Máa síkan ena vanta ano mai vaya iniren mai vanta asiyan temí, “Ma vanta ma variyainí ukhein uman manan e má dere variya ompo éi ídá Tiyarafenu van periya fono. ⁴¹ Erasan ma variyá eruna avúavákái ma uman bariyá umpo ma vanta ano ída mana aauí ukhen mino.”

⁴² Máa siren béi semí, “Yisasi oe, éi ma ei yafisin aúpin* ma orinona yamusá téi nan inisintano.”

⁴³ Máa síkan Yisasi evaránen béin tiamemí, “Téi fura siré éin tiamiyá uno. Taréa anan téin má inarufá ban nono.”

Yisasi Ma Furein Baya Ino

(*Matiu 27:45-46; Maki 15:33-41; Yoni 19:28-30*)

⁴⁴ Bayan aúbaní iyain má títipa ano ma vara yaranten bakan kanaú manaú áauí iyain má do kakhen mino. ⁴⁵ *Máan tiyan maen áauí fanu kípiyain má anan kákan monó namumpin ma kákan davaráe khuran baré ein mano veyantá áubána kanáaren maman kankananién mino. ⁴⁶ Máan tíkan Yisasi avádóden oovaren temí, “Tifóe oe, se saunan éin ayan arumpin kaé uno,” siyan puren mino.

⁴⁷ Máan tíkan aruvin banta kayoi yafisin banta ano mai yaná ódaren Tiyarafenu aví maman daní iyáken temí, “Pura uron ten ma vanta ída aau van puntákein banta ino.” ⁴⁸ Máa siyákan mai ma ariyain ma onano van e iyukharé ein nanin banta ano mai yanasinta ódaren arunaná pinté evaránen betíi varufá oreraen mino. ⁴⁹ Máan tiyákan Yisasin arona kayo vá béin ma yakhafen Karirí me ampiren erikhá ein nanin kayo vá ano manáa nentá e mantakhen mai yanasinta ma afoká iyain oniyaren mino.

Yisasin Ma On Aimpin Masí Ein Baya Ino

(*Matiu 27:57-61; Maki 15:42-47; Yoni 19:38-42*)

⁵⁰ Banasii ánon banta kéká pintena mana Yosepin ne sin kamaen puntákein banta varen mino. ⁵¹ Béi maen Arimatiá se sin Yudiá barafin bain baru ráke vanta váken béi Tiyarafenui yafisin baru van ave ukhen pasen ena ánon banta kayo ano ma Yisasin arono van tiyain baya van ída ará manafiní ukharen mino. ⁵² Máan tukharen mai vanta ano Yisasin au ifá intí barano van Pairoti vaipá mo inaen mino. ⁵³ Ina íkan kana ino síkan mai vanta ano

* **23:31:** Kiriki vaya máa sikhemí, Banasi ano ma auyen daará ma mai avúavá bariyaren maen ira ma kakhein daará intesá inten nafino. * **23:34:** Íbo 22:18; Ais 53:12 * **23:34:** Manáa feyante vompompin mai veya ída van mino. * **23:35:** Íbo 22:7-8 * **23:36:** Íbo 69:21 * **23:42:** Manáa Tiyarafenui vompon dókifin mará asotúin baya máa sikhemí, eni kini ákonafó * **23:45:** Ibu 6:19-20; 10:19-20

Yisasin au un mamádan barará eravíkan efanten davaráe fóké uke uke uren ompin mana masí boraádan bakan maifin ída mana vanta khaúkaré ein masípin baren mo khaen mino. ⁵⁴ Sabati ráke yanasinta utaren arakhókuin damú baré íkan áde anantá Sabati arái ono van en mino.

⁵⁵ Máan tiyákan Karirí má me ampiren ma Yisasin bákuren erein nanin kayo ano Yisasin au ma masípin kain nain onano van Yosepin bákuren oren mino. ⁵⁶ *Ódaren mai nanin kayo ano evaránen betí amápin oriven manáa aunka uveri vá pauran kayo vá utaádaren man baya ano ma sikheiníen Sabati yamú avíken mino.

24

Yisasi Ma Evaránen E Mantein Baya Ino
(*Matiu 28:1-8; Maki 16:1-8; Yoni 20:1-10*)

¹ Santé pe ákura suron anasi kayo ano mai ma kama aunka iyain uveri ma utaádan baré ein mamaren masíka oren mino. ² Betí ankan oren o onákan masí oyirá ma iyádan baré ein onámaná ano e vaébaé en orikharen mino. ³ Máan tukheimpin betí ankan maifin ódiven onákan Yisasin au ída varen mino. ⁴ Ída vákan betí ankan mairá mantakhen mai van kokhon ineine iyan baré íkan kankánan banta ano vetin áde e mantavíkan míkani auí daná kaké moéken afayu ma fanu seiníen mino. ⁵ Máan tikan mai nanin kayo ano akhokho van iyáken anuran bara finí íkan mai kanan banta ano máa semí, “Tiretí ankan pará purin banta kayoi varu finté ma evaránen aunan mamaren ma e mantakhein banta van me yosiya rafono. ⁶ *Béi fefái aunan mamaren e mantakhen mafin ída van mifo véi ma Karirifá báken ma siretin tiamiyaré ein baya vá ovare me ineno, ⁷ ‘Banta Anin ume vanta kayo ayampin amintin ná mai kéká ano véin daa unkamádantá arintin púkaren kanú manaú damusí ma intin ná béi evaránen aunan mamaren e mantano,’ sen béi siretin tiamikharen mino.” ⁸ Máa síkan mai ma véi sikharé ein baya vetí ankan ovaren me inen mino.

⁹ Ovaren me iniren betí ankan masí me ampiren evaránen orein mano mo siyan

míkan mifo sirantan mana orun kádan (11) eyo iyampon kayo vá ena nanin banta kéká bá mai ma afoká ein danasinta van tiamen mino. ¹⁰ Makdaráke nanin Maria má Yoana má inká Yemisin anóe Maria má ena nanin kayo vá anon masíka orikharen mi mai ma afoká ein danasinta van eyo iyampon kayo me siamen mino. ¹¹ Máa síkan eyo iyampon kayo ano vetin nan kampun bayan tiyan mino siren betí vayará ída mumunan en mino. ¹² Máa síkan Pita e manten tavaen masíka orein maifin o mátimen onákan davaráe kayo ana vaimpin béi evaránen mápin oriyáken mai náisá ukhen nafi siren kokhon ineine en mino.

Emeasí Ayana Fáke Ma Kankanan Banta Ano Yisasin Onein Baya Ino
(*Maki 16:12-13*)

¹³ Anasi kayo ma masíka orein damú anan kankanan eyo iyampon mano Yerusaremíke tiyan míkan mifo sirantan mana orun kádan (11) kiromitará ma vain baru Emeasí oren mino. ¹⁴ Oriyáken mai ma afoká ukhein danasinta van e sen oriyaren mino. ¹⁵ Míkanan mano mai yanasinta van kokhon baya sen oriyákan Yisasi vékanani áde afoká uven békan má oren mino. ¹⁶ Oriyákan manáa yaná ano vékanan aaurá iyábíkan Yisasi ino sen ída oman afová en mino.

¹⁷ Ída afová íkan béi míkanan máa sen inaemí, “Tiré kanan náí vayá té oriya fono.” Síkan míkanan o mantavín békanan auná ano arunaná bá ma vainíen mino. ¹⁸ Máa sen ina íkan míkanan pinté Kireopasin ne sin banta ano evaránen béin inaemí, “Éi enafákesá erikheyá Yerusaremí barufin ma saréa afoká ukhein danasinta ída afová ukhe fono.”

¹⁹ Máa síkan Yisasi vékanan evaránen inaemí, “Nái yanasinta fino,” síkan békanan evaránen béin tiamemí, “Nasaretíke Yisasin ne sin banta mai véi sakhanampa vanta váken Tiyyarafenu avorá bá banasi avorá bá ma vaya seipá ákonaen baya siyáken doriyaré ein banta amaniná ma mai yanasinta afoká ukhein nan mi siyá uno. ²⁰ Tetisi monó ánon banta kéká bá banasii ánon banta kayo vá ano véin kamanin ayampin kaíkan kamanin mano

* 23:56: Eks 20:10; Diu 5:14 * 24:6: Ruk 9:22 * 24:21: Ruk 19:11; Apo 1:6

véin nan arintin purino síkan daa un-kamádantá béin aren mino. ²¹ *Tetí ankan béin nan mumunan iyáké Tiyarafenu ano ma Isareri nanin banta evaráné avirano van ma aní ukharé ein banta ino siyá ékun mi véin arin púbíkan kanú manaú damusí ma iyain má mai ná dákó en mino. ²² Taréa fe ákura suron tetisi kéká pinté manáa nanin kayo ano masíká o onákan ²³ béin au ída vaimpin ovaránen tetí ankan tinú deruna vaya me sisimiyáken enisori kayo onékun mai kayo ano Yisasi nan evaránen aun mamaren e mantakhen mino. ²⁴ *Máa síkan tetí ankan pinté manáa vanta kéká ano masíká oriven mai ma anasi kéká ano ma sein danasinta onen mifo véin ída onen mino.”

²⁵ Máa síkan Yisasi vékanan tiamemí, “Tirékanani ineine ída vákai sakhanampa vanta kayo ano ma minó baya sikharé ein nan ída aine mumunan iya ono. ²⁶ *Mai ma Tiyarafenu ano ma vei vanasi evaránen avirano van ma aní ukharé ein banta ano vá uman nare mamaren ná inaimpákesá Tiyarafenui kakhampin un perano ma sikharé ein tiré kanan ídá afová ukhe fono.” ²⁷ *Máa siren Mosesi ma uvamádan baya ráké nare arai uren minó sakhanampa vanta kayo vá ano ma Tiyarafenui vompon dókifin ma veyan nan tiádan baré ein baya kayo míkanan tiamen mino.

²⁸ Máa sen oriyaren betí kanú manaú ma vano van inikharé ein Emeasi varu ádé ma oríkan maen Yisasi manáa vá orono van en mino. ²⁹ Orono van íkan békanan mano véin ákonaen ayópá iyáken temí, “Ádé anantá áau orun peranton iyain duninten mifo verasan má bano.” Síkan béi míkan má bano van mápin oren mino. ³⁰ Inaimpáké betí ankan dunan nano van íkan Yisasi míkan má dunan nan takhoká kumamen bereti máden Tiyarafenuun tusu siantáden békanan kisian amen mino. ³¹ Máan tiyain má békanan auu sapé tikan béin afová en oniyain má manádá afeyóbíkan ída onen mino. ³² Ída oniyáken míkanan ben inain maran iyan temí, “Erasan ma aayanafá eriyákun ma Tiyarafenui vompon pintena ana vaya ma

sisimiyákan maen erasan tirá mantiyaren mino.

³³ Máa siren míkanan ainen e manten Yerusaremí oren o onákan tiyan míkan mifo sirantan mana orun kádan (11) eyo iyampon kayo vá manáa kéká bá iyukhen baren mino. ³⁴ *Iyukharen máa sen békanan tiamemí, “Bafan mano evaránen e mantakharen pura sen Saimonin avorá dákosí ukhen mino.” ³⁵ Máa síkan inká békanan mano aayanafá ma afoká ein danasinta vá inká bereti ma kiseintá ma oman pámanein má betin tiamen mino.

Yisasi Ma Vei Eyo Iyampon Kayo Avorá Ma Afoká Ein Baya Ino

(*Matíu 28:16-20; Maki 16:14-18; Yoni 20:19-23*)

³⁶ Betí ankan mai ma afoká ukhein baya van para siyan baré íkan Yisasi veyantá mai aúbaná e mantaven máa semí, “Ará kusin masá bano.”

³⁷ *Máa síkan betí ankan ma inein mano mana van mi oniyá uno siren anú diyáken akhokho van en oreraen mino. ³⁸ Máan tikan Yisasi vetí ankan máa sen tiamemí, “Pará tiretí ankan anú diyákeyá kokhon ineine iya rafono. ³⁹ Téin bá umpo siyan tirantan oniyákeya su siruvúan onano. Téin tu ma oniyaonaíen ban kayo aurá ída amasi vá ayampa vá banten mino.”

⁴⁰ Máa siren be ayan arantan betin aníen mino. ⁴¹ Ani urákan betí ankan amusin mana iyáken ída mumunan in-ton kokhon ineine iyaimpin betin inaemí, “Tiretí ída manáa yunan mafin denan ban nafino.” ⁴² Máa síkan iyó uádan noyana manáa maman amíkan ⁴³ betí ankan avorá béi mai noyana máden niyákan onen mino.

⁴⁴ *Oniyákan béi máa sen tiamemí, “Téi ma siretin má ma fara váké Mosesini man baya vá sakhanampa vanta kayoi vaya vá í bompon má ano ma séin pákena sikharé ein mai minó daná ano vá pura sen afoká ino sé pefái mai yanasinta van tiamikharé uno.”

⁴⁵ Máa siren béi Tiyarafenui vompon dóki fintena vaya ana vetí ankan kamaen inino van afova amen mino. ⁴⁶ Béi máa sen betí ankan tiamemí, “Tiyarafenui

* **24:24:** Yon 20:3-10 * **24:26:** Ruk 9:22 * **24:27:** Íbo 22:1-21; Ais 53 * **24:34:** 1Ko 15:4-5 * **24:37:** Mat 14:26 * **24:44:** Ruk 9:22

vompon dókifin máan mi siádan baren mino, Tiyarafenu ano ma vei vanasi evaránen avirano van ma aní ukhá ein banta ano vá uman baren púaren ná kanú manaú damusí ma intin ná evaránen masí pinté e mantano. ⁴⁷ Béin avisá minó nanin bantafin tiamintin ná ará baerantin Tiyarafenu ano vá betíi ume ampiantano. Mai yoran Yerusaremisá arái ino. ⁴⁸ *Máa sikhareé ein paseya siretí anon ma ma afokái ma oneona yanasinta vá ena nanin banta mo siameno. ⁴⁹ *Tiretí ankan ma fefá te Sifóe ano ma Kantá Aunan ma iyáantákaré ein mai séi siantékun tireti vaipá eranten mifo ma kákan barurá ana vá bare vá ínaimpákesá mai Tiyarafenui ákona vá baran nono.”

*Yisasi Má Inarufá Ódein Baya Ino
(Maki 16:19-20; Aposeri 1:9-12)*

⁵⁰ Yisasi vetí ankan avían Betaní moren ayan daní uren avu uanten mino. ⁵¹ Avu uantiyákan Tiyarafenu ano véin aviran betin me ampiren inarufá óden mino. ⁵² Ódivíkan betí ankan aron durafúden bentá monó tiantáden amusin iyáken Yerusaremí evaránen óden mino. ⁵³ O váken ena ena vetí ankan monó namumpin Tiyarafenu aví daní iyan baren mino.

* **24:48:** Yon 15:27; Apo 1:8 * **24:49:** Yon 14:16; 15:26; Apo 1:4

YONINI KAMA VAYA INO (Yoni) Yonini Kama Vaya Ma Uvanteí Pákenai Afova Vaya Ino

Ma vompon ma uvantein banta ino.
Baya varen orin banta Sebetin anin Yoni
ano ino.

Uvarein orana ino.
AD nainti (90) ráké mana antareti (100)
fin mi ma vompon uvanten minon ten
inikhen mino.

Ma vompon ma uvantein baru ino.
Esiá barafin ma áau orun perápá ma
vain kákan baru Efesasi ino. Mai
vanta karavusií ono van Aisiní un
nompin Patmosí musóká tiantan o
váken mi Aúpá Baré ein Baya Ma Sian
Dákó Ukhein Bompon uvaren mino.

*Ma vompon ma uvaman amikhein kéká
ino.*

Minó Yisasintá ma mumunan iyain kéká
ino. Yutan kéká bá Kiriki kayo vá inká
Romú nanin banta ma monó tiyan
mumunan iyain kéká báí ino.

*Nái ana vará ma vompon uvanten
nafino.*

Ma vompon ma yankafin nain kéká ano
Yisasin nan Tiyarafenu Anin mino
siren afová ino van mino.

*Baya Ano Vantaí Uven Ma Varará Tetí
Ankan Má Baren Mino*

¹*Esé araién minó daná ída afoká ukhan
Baya varen mino. Baya ano Tiyarafenu
vá báken mai Vaya ano Tiyarafenu
baren mino. ²Esé araiéntá Baya ano Tiyarafenu
vá baren mino.

³*Tiyarafenu ano véin pinté anan minó
daná uvamádan afoká ukhen mifo mana
yaná ano veyan táké ída afoká ukhen
mino. ⁴*Ayun ma fara van oriyan ban
aunan béimpin bákan mai aunan manon

minó nanin banta oon uruanten mino.
⁵*Mai oon mano sítípañ kiyan bákan
maen títípa ano ída véin iyákaren mino.

⁶*Tiyarafenu ano monó non péantan
banta Yonin tiantan eren mino. ⁷Mai
ma erein béi ano mai ooni vaya sian amá
urantin minó nanin banta ano veni vaya
iniren mumunan ino van mino. ⁸Mai
ooni vaya máa sian amá ono van mi Yoni
eren mifo véi ída mai oon mino. ⁹*Mai
ma fura sikhein oon mano ma vanasi
kakhaantiyain manon ma varará eriyen
mino.

¹⁰Tiyarafenu ano véin pinté uaren bara
uvantaré íkan béi ma varará e van mifo
vanasi ano ída véin oman afová en mino.
¹¹Béi vei vara anará erin mifo vei kéká
ano ída véin aviren mino. ¹²Ída aviren
mifo véintá ma mumunan ein nanin ban-
tan maman Tiyarafenu akhafanaíen mino.

¹³*Betí ankan be anóe afóeni narera
safi aui anunura safi vantaí anunura safi
ída Tiyarafenu akhasí ukhen mino. Ti-
yarafenu ano veyantái vetin maman be
akhasí ukhen mino.

¹⁴*Baya ano vantaí uven ma varará
tetin aúbaná baren mino. Tetí ankan
inka veni kakhani ákona oné tiféuno. Mai
mana iyampon ma ve Afóe ano siantan
ma ereini kakhani bákan inká beni sarisari
vá puntákein avúavá bá béimpin bíkakhen
mino.

¹⁵Mai van mi Yoni máa sen oovaren
banasi siamemí, “Ten toyampá ma eriyain
banta mai séi ída vákun béi fe vá ein
bantan bákan beni ákona ano séin esan-
takhá ma vanta van mi séi fefá tiretin
tiamikharé uno. ¹⁶Mai vantañ tarisari
ano moéken bíkakhái setí ankan ena
yamú beni avábá bariyá tiféuno. ¹⁷*Para
vara seyo, Mosesin pinté uaren mi Ti-
yarafenu ano setí ankan man baya simen
mifo sarisari vá puntákein avúavá bá
mai Tiyarafenu ano ma aní ukhein banta
Yisasin pinte nan baré tiféuno. ¹⁸*Ída
mana vanta ano Tiyarafenu onten mifo
ve Anin mano anan be Afóen áde báken
mai véi Tiyarafenu ban mi ve Afóeni vaya
setin tisimen mino.

* **1:1:** Yon 17:5; 1Yn 1:1-2; Rev 19:13 * **1:3:** 1Ko 8:6; Kor 1:16-17; Ibu 1:2 * **1:4:** Yon 5:26 * **1:5:** Yon 3:19
* **1:6:** Mat 3:1; Ruk 1:13-17, 76 * **1:9:** Yon 8:12 * **1:13:** Yon 2:11; 3:3-6; 1Pi 1:23 * **1:14:** Fir 2:7 * **1:17:**
Eks 34:28; Rom 6:14 * **1:18:** Eks 33:20; Yon 6:46; 1Ti 6:16

Monó Non Péantan Banta Yoni Ano Ma Yisasini Aa Uvíden Puntáantein Baya Ino (Matiu 3:1-12; Maki 1:7-8; Ruku 3:15-17)

¹⁹ Yutan nanin bantai anon banta kayo ano monó doran banta kayo vá Rivai kayo* vá tiantákan Yerusaremí me ampiren Yonin mo máa sen inaemí, “Éi Tiyarafenu ano ma aní ukhein banta fono.”

²⁰ Máa síkan Yoni mai vava ída umeren mifo amáká máa sen tiádemí, “Tiyarafenu ano ma aní ukhein banta va uno.”

²¹ *Ída ino síkan betí ankan béin inaemí, “Mai éi sakhanampa vanta Iraiya fono,” síkan “Béi va uno” siyaimpin evaránen inaemí, “Mai éi sakhanampa vanta fono” síkan “Ída ino” sen mino.

²² Máa siyaimpin evaránen béin inaemí, “Mai éi eyan nan iye unó tiya fono. Setin tisimesirá evaráné mai ma sisintá erikheruna kayo mo siameno.”

²³ Síkan Yoni vetí ankan tiamemí, “Pefá ma sakhanampa vanta Aisaiyan oorá ma sen kámá bara fáké ma oovaren, ‘Bafani aa funtarano’ ma sikhá ein mai séi uno.” *Ais 40:3*

²⁴ Máa siyaimpin mai ma Farasisi kéká ano ma siantan erikhá ein kéká ano Yonin máa sen ²⁵ inaemí, “Mai éi ma ída Tiyarafenu ano ma aní ukhein banta fo Iraiya fo áa sakhanampa vanta fo ma vanteya mai fará banasi monó non péantiya fono.”

²⁶ Máa siyaimpin Yoni evaránen betí ankan tiamemí, “Téi nompói féantiyá umpo sirétin aúbanápin mai mana vanta váka ída afová ukha ono. ²⁷ *Téi ída funtákeruna ída kanaíé mai ma sen toyampá eriyain bantai arantan anamun anan útufonté uno.”

²⁸ Yodení non ufá mana sító baru Betaní Yoni monó non péantiyákan mi mai yaná afoká en mino.

Yisasi Maen Tiyarafenui Arará Sipisipi Ino

²⁹ *Ená damú Yisasi ma Yoni vaintá eríkan ma onen máa semí, “Onano. Mai Tiyarafenui sipisipi arará ino. Ma vara ráke nanin bantai ume ma arúantan mino.

³⁰ *Ten toyampá ma eriyain banta mai

séi ída vákun béi fe vá ein bantan bakan beni ákona ano séin esantakhe ne ma séku inikhá eona mai ma vanta van mi sikharé uno. ³¹ Téi ven ída afová é amino ukhéi Tiyarafenu ano ma aní ukhein banta ino sen Isareri nanin banta ano afová ino van mi monó non máan péantiyá uno.”

³² *Máa siren Yoni sian dákoén mí, “Téi onékun inaru fáké kukhofá nun avúaváká ten Kantá Aunan mano ven árontá eren mino. ³³ ‘Eren mifo séi seyantá bein ída afová ukhékun mi Tiyarafenu ano séin tisintá me vanasi nompó péantiyá uno. Pefá Tiyarafenu ano séin máa sen tisimikharen mino. Onesin ma mana vanta árontá ma Kantá Aunan ma eran nain mai vanta anon Kantá Aunan póké banasi non peántanten mino.’ ³⁴ *Máa sikhareí téi ódaréi Yisasin nan Tiyarafenu Anin mino sé tian amá é uno.”

Yisasi Ma Araí En Bei Eyo Iyampon Kayo Arein Baya Ino

³⁵ Máa sirákaren ená damú Yoni evaránen bei eyo iyampon kanan má mairá o mantakharen mino.

³⁶ *Mantakharen onan Yisasi entavíkan Yoni semí, “Onano. Mai Tiyarafenui sipisipi arará ino.” ³⁷ Máa síkan mai eyo iyampon kanan mano iniren Yisasin avákuren oren mino. ³⁸ Avákuren oríkan Yisasi yovaéan onen békanan máa sen inaemí, “Nái vará dosiyan tafono” síkan. Békanan evaránen inaen temí, “Aru soe, inte namuná éi vaonafino.”

³⁹ Máa síkan Yisasi evaránen békanan tiamemí, “Tiré kanan eriveya onano,” siren kamí kamí áauí iyákan aviren be ma vain namumpin o vákan e varen dunin baren mino.

⁴⁰ *Kankanan banta ano ma Yonin avaya ma iniyá ein pinté Saimon Pitan afá aváen Enduru anon Yisasin avákuren oren mino.

⁴¹ O varen ma Yisasin me ampiren maen Enduru ma esé daná barein mai ve afá aváe Saimonin dosiren máa sen tiamemí, “Tetí ankan inka Mesian oné uno.” (Mesia ne ma siyain mai máan mi sikhén mino. Tiyarafenu ano ma aní ukhein banta ino.)

⁴² *Máa sen tiamiren Enduru ano Saimonin aviren Yisasi vaintá oríkan Yisasi

* **1:19:** Rivai e ma siyain maen mai monó doran banta kékái ayain banta kayo ino. * **1:21:** Diu 18:15, 18; Mat 11:14 * **1:27:** Yon 1:15 * **1:29:** Ais 53:6-7; 1Pi 1:18-19 * **1:30:** Yon 1:15 * **1:32:** Mat 3:16 * **1:34:** Mat 3:17 * **1:36:** Yon 1:29 * **1:40:** Mat 4:18-20 * **1:42:** Mat 16:18

véin ódaren temí, “Yonin anin Saimoni oe, éi nan ínainpá Sifasin ne sinten mino. Mai avíi ana Kiriki vaya finté Pitan nen tikhen mino.*

Yisasi Ma Firipin Nú Natanierin Nú Arein Baya Ino

⁴³ Ená damú Yisasi Karirifá orono van iyaren Firipin onen tiamemí, “Éi ere sen tivákurono.” ⁴⁴ Endurun nú Pitan nú varu ana Betsaidái vákan Firipin má dere mai varu ráke vanta ino. ⁴⁵ *Firipi ano Natanierin o omáken tiamemí, “Mosesini man bayafin má sakanampa vanta kayoi vompompin má ma síkhá ein mai vanta Yosepin anin Nasaretiké Yisasin baréii setí ankan inka oné tiféuno.”

⁴⁶ Maa síkan Natanieri evaránen béin inaemi, “Nasaretiké kaná mana kama yaná afoká inten nafino.” Síkan Firipi evaránen béin tiamemí, “Erikhe vá onano.”

⁴⁷ Maa siran Yisasi vaintá Natanieri eríkan ódaren temí, “Onano, ma vantafin ída mana kampun baya vá avúavá bá bakan béi Isareri vanta uron mino.”

⁴⁸ Maa síkan Natanieri evaránen Yisasin inaemi, “Éi intesá ureyá téin afová ukhare vae,” síkan Yisasi evaránen béin tiamemí, “Firipi ma ída éin arakhaya fiki yaa anafin baná téi éin ontaré uno.”

⁴⁹ *Maa síkan Natanieri evaránen béin tiamemí, “Aru soe, éi Tiyarafenu Anin Isareri kayoi kin mono.”

⁵⁰ Maa síkan Yisasi evaránen béin tiamemí, “Téi fiki yaa ana ráke éin oné uno ma seruna mairasá éi mumunan iya fono. Ínainpáké mai esantakhein kákan danasintan onan nono.”

⁵¹ *Maa siren béin tiamemí, “Téi fura siré tiretí ankan tiamiyá uno. Ínainpáké tiretí onesin maen inaru ona yivintin Tiyarafenui enisori kayo ano Banta Anintá ódiven eraven inten mino.”

2

Yisasi Ma Non Maman Uvainii Ein Baya Ino

¹ Kan damú orivíkan Kariri varafin Kaná barurá anasi iran omá bakan maifin Yisasin anóen aran o varen mino. ² Yisasin

* **1:42:** Mái kan bíi ana mai onámana sen tikhen mino.

* **1:49:** Mat 14:33; 16:16; Mak 3:11 * **1:51:** Esé 28:12

má bei eyo iyampon kayo vá dere arákan mai omápin o varen mino. ³ O varé íkan uvaini kípavin be anóe ano Yisasin tiamemí, “Uvaini inka kípakhan mino.”

⁴ *Maa síkan Yisasi evaráne vein tiamemí, “Tinóe oe, pará téin e saraan maifin kaiya vae. Ída senti yamú erikhá uno.”

⁵ Maa síkan be anóe ano yoran banta kayo siamemí, “Béi ma siamin nain baya ánain ná dakhafe vá mai yaná barano.”

⁶ Yutan kayo ma vetíi monópin ma variyain avúaváká ma non peré iyain bara kave máa yan manápá ifo afápá mana un kádan bakan mai mana mana kavefin mana antareti (100) ritan non báiyán mino.

⁷ Yisasi yoran banta kayo siamemí, “Kave kayofin non dáan bíkano,” síkan betí ankan non dáan mai kave kayo vikaan kaen mino. ⁸ Bíkarákan Yisasi mai yoran banta kayo siamemí, “Mai fintena manáa non dafeya omá afóen mo ameno.” Síkan betí ankan dafen mo amen mino. ⁹ Amíkan mai ma omaká dafikáien banta ano mai uvaini máden naan onákan ase iyaimpin mai uvaini inte fáken nafi véi ída avofá ukharen mifo mai ma non dáan me amein kayo ano anan afová ukharen mino. Máan tukhan mai omá afóe ano anasi ma iman amin nain banta araren ¹⁰ béin máa sen tiamemí, “Kama ase ma iyain uvaini naren masiman uran ma minó banta kayo ano ma naran amu aruvín maen mi ínainpákéi ída ase uvaini amiyain mi éi kama uvaini fara kaúdákareya saréan bare ere ono.”

¹¹ Máan mi en Kariri varafin Kaná barurá Yisasi araíen enará ukhein daná ma afoká ein mai vei kakhan má ákono vá aní uran mai van mi vei eyo iyampon kayo ano ódaren béintá mumunan en mino.

¹² *Máan turan mai oyampáké Yisasi ve anóen má be afá kéká bá bei eyo iyampon kayo vá Kaná baru me ampíren Kape-niamú barurá manáa yamú orun baren mino.

Yisasi Ma Kákan Monó Namun Pinte Ma Minó Daná Saríin Banta Kayo Yo Siantein

* **1:45:** Diu 18:18; Ais 7:14; 9:6; Yer 23:5; Isi 34:23

* **2:4:** Yon 7:30; 8:20 * **2:12:** Mat 4:13

Baya Ino

(*Matiu 21:12-13; Maki 11:15-17; Ruku 19:45-46*)

¹³ *Baré íkan Yutan nanin bantai Avo Uantan Damú ádé iyaimpin Yisasi Yerusalemí oren mino. ¹⁴ Oriven onákan monó dafufin kao vá sipisipi vá kukhofá nun kayo vá sarí iyákan inká moní ma arumin kayo ano karáká kumaniyan kumantan mino. ¹⁵ Máan tiyákan Yisasi mana ákona anan máden unen unaren mai anan dafiyó póké mai ma monó dafufin ma yan baré ein kao vá sipisipi kayo vá ankamen intaniyáken moní ma arumiyá ein kayo vá dere vanaan karúdaren minó tiantan barufá araven mino. ¹⁶ Araviyain má dovaéaren kukhofá nun kayo ma yáken sarí iyá ein banta kayo siamemí, “Mai yanasinta mamare orono. Ída vá Tifóen amá minó daná kaúdiyan ma miyan baran namuní ono.”

¹⁷ Máan tiyan ma mai avúavá bei eyo iyampon kayo ano oniyáken Tiyarafenui vompon dókifin ma máa sikhare ein baya ovaren me inen mino.

“En ama san tiran nakhan mai ano súpin ira ma kheiní iyan mino.” *Íbo 69:9*

¹⁸ Yisasi máan tiyain má Yutan kayoi ánon banta kéká ano mai avúavá ódaren béin máa sen inaemí, “Tiyarafenu fintena ma éi mai avúavasí in ákona ma mantanteya mae mai éi mana enará ukhein aní daná aní í óderá mai fura yaná ino seno.”

¹⁹ *Máa síkan Yisasi evaránen betí ankan tiamemí, “Tiréti ankan ma kákan monó namun ma varákuresí maé téi kanú manaú damú anan evaráné uvaman kípanaté uno.”

²⁰ Máa síkan Yutan kayo ano evaránen temí, “Foti sikhisi (46) oranarái ma kákan monó namun uvantein mifo éi kanú manaú damú aná uvaman kípanató tiya vae.” ²¹ *Máa sen mifo mai Yisasi ve au van mi kákan monó namuntá o siáden mino. ²² *Béi ma masí pinté e mantavin maen mi veni eyo iyampon kayo ano mai ma sikhá ein baya afová uren mi Tiyarafenui vava ma vompon dókifin

uvamádan baré ein má Yisasini vava vá ovaren inen mumunan en mino.

Yisasi Ma Minó Nanin Bantai Avúavá Bá Ineine Vá Afová Ukhein Baya Ino

²³ *Avo Uantan Damú ma Yisasi Yerusalemí báken ma kokhon enará ukhein danasinta ma aníin onein nan minó nanin banta ano véintá ana mumunan en mino. ²⁴ Máan tiyan Yisasi minó nanin bantai ineine afová ukhen pasen betí ankan ída kamú máan amen mino. ²⁵ Mai véi ída afova van o afasí ukhantín pasen mana vanta ano ída véin tiaminten mino. Para vara seyo, minó nanin bantai avúavá bá ineine vá béi fefá afová ukhen mino.

3

Yisasi ma Nikodimasin Afova Amein Baya Ino

¹ *Mana Farasisi vanta Nikodimasi maen Yutan kayoi ánon bantan baren mino. ² Baren mana inúpá duntein pinté Yisasi má baya seno van eriven béi semí, “Aru soe, setí ankan minó ano éin afová ukhékun Tiyarafenu ano setí ankan afova simeno van tiantaya erikha ompo mana vanta fin ma Tiyarafenu ma ída vantín maen éi ma enará ukhein danasinta ma uvariyaonaíen ída uvaranten mino. ³ *Máa síkan Yisasi evaránen béin tian amá uan amemí, “Téi fura uron tiré éin tiamiyá uno. Banasi ano ma ída evaránen auyení inain mano ída kanaíen Tiyarafenui yafisin baru onanten mino.”

⁴ Máa síkan Nikodimasi evaránen béin inaemí, “Intesá uren ná anon bantai ma uvin nain mano evaránen auyení intéi vae. Be anóen arápin ná evaránen un pébintín ná enádá kainten nafino.”

⁵ *Máa síkan Yisasi evaránen béin tiamemí, “Pura uron tiré éin tiamiyá uno. Banta ano ma non nú Aunan núká ma ída auyení inain mano ída kanaíen Tiyarafenui yafisin barufin oferanten mino. ⁶ *Au ano ma afoká é iyain daná mai au ina ifo Kantá Aunan mano ma afoká é iyain mai yaná Kantá Aunan nina ino. ⁷ Evaráneya auyení ono ma séi siyaruna

* **2:13:** Eks 12:1-27 * **2:19:** Mat 26:61; 27:40 * **2:21:** 1Ko 6:19 * **2:22:** Ruk 24:6-8; Yon 12:16 * **2:23:** Yon 7:31 * **3:1:** Yon 7:50; 19:39 * **3:3:** Mat 18:3; 1Pi 1:23 * **3:5:** Isi 36:25-27 * **3:6:** Yon 1:13

vayará éi ída vá anú duman duman ono. ⁸ Uva ano vei anunurái minó pimpá orera iyákaya avaya anan iniyákeya inte fákesá eriaren intefasá oriyan nafi mai ída afová éiya ono. Kantá Aunantá ma auyení iyain kayo ano máan manan ukhen mino.” ⁹ Maa síkan Nikodimasi véin evaránen inaemí, “Mai ma siyaona yaná intesá en ná afoká intéi vae.”

¹⁰ Maa síkan Yisasi evaránen béin tiamemí, “Éi Isareri kayoi arú banta ompo intesá ukhayá ma yaná ída afová iya vae. ¹¹ Téti ankan ódaré afová ukheruna yana san mi fura siré tiritin tiamiyákeyai siréti ankan mai vayará ída mumunan iya ono. ¹² Téi ma vara rákena yana san mi siyákeya siretí ída mumunan iya ompo inaru rákena yana san ma sékuya intesá ureyá mairá mumunan inte fono. ¹³ Ída mana vanta ano inarufá ódikhen mifo Banta Anin mano veyákái inaru fáké erakhein béi anan evaránen ódinten mino. ¹⁴ *Pefá ma vanta ída van kámá barafin ma Mosesi ano ma osafáe aman manon uváden daa amankampin ma intáneinien Banta Anin maman daní urantin ma ¹⁵ *véintá mumunan inain nanin banta ano ída kípán para van oriyan ban aunan baranten mino.

¹⁶ *Para vara seyo, Tiyarafenu ano auanon tákena mana ain iyampon uró dákaren barará nanin banta van moéken anunu uaren mai iyampon betí ankan amen mifo véintá ma mumunan inain nanin banta ano ída o afeyoran para van oriyan ban aunan baranten mino. ¹⁷ *Banasi yaimin novara Tiyarafenu ano ve Anin tiantan barará eren na ino. Béi ma vara rákena nanin banta aya uren evaránen avirano van mino. ¹⁸ *Tiyarafenui auanon tákena mana iyampon uró ma vaintá ma ída mumunan iyain nanin banta kéká pefái yaimáan afeyorampin ban mifo mai mana iyampontá ma mumunan iyain kayo ano ída afeyoranten mino. ¹⁹ *Mai ma yaimin naini ana máan mi ukhen mino. Kakhan ma varará erakhen mifo vanasi ano namu avúavá anan bariyan kakhan nan ída aran

niyan mino. ²⁰ Namu avúavá ma variyain kéká ano mai kakhani namuron báken betí avúavá maman dákó inain nan péden ída kakhantá erinten mifo ²¹ funtákein avúavá ma variyain kéká anon kakhantá erintin Tiyarafenui ákonarái yoriyan mino sen onanten mino.”

Monó Non Péantan Banta Yoni Ano Ma Yisasin Aví Daní Ein Baya Ino

²² *Maa siren mai oyampáké Yisasin má bei eyo iyampon kayo vá ano Yerusaremí me ampiren Yudiá barafá o váken banasi monó non péantiyaren mino. ²³ Máan tiyákan monó non péantan banta Yoni ano Aenoní barurá Sarimí ádé bakan mairá kokhon non eraviyákan banasi ano monó non perano van eríkan Yoni vetí ankan monó non péantiyaren mino. ²⁴ Mai Yonin ma ída karavusifin pákaan kaúdakan mi máan tiyaren mino. ²⁵ Máan tiyain damú ana Yonini eyo iyampon kayo vá mana Yutan banta vá ano Tiyarafenu avorá ma avusesein avúava san aráien asive asive en mino. ²⁶ Máan turen Yonini eyo iyampon kayo ano véin me siamemí, “Aru soe, Yodani non ufákéna ma éi ódare ma mai vanta van Tiyarafenu ano aní ukhein banta ino ma seona vanta anon monó non péantiyan maifá anan banasi oriyáken tetí ankan barunafá ída eriyan mino.”

²⁷ Maa síkan Yoni evaránen betí ankan tiamemí, “Inarufá ma vain Tiyarafenu ano mana mana vanta yoran amídú ukhen mino. ²⁸ *Tiyarafenu ano ma aní ukhein banta vaumpo séi veni aa uvisen erin banta unon tékuyan inikha ono. ²⁹ Mana vanta ano ma anasi mádan mai nanin mano ven anasíi iyan mifo véin má ma avunté iyá ein mano ma anasi varan baya iniren amusin iyainíien téin túpin timusin bíken mino. ³⁰ Béin aví dani suron intiná ten tiví bararasá eravino.

³¹ * “Béi inaru fákéi erikhen pasen minó esantakhen mino. Téi ma vara ráke vantán báké ma varai avúavá anan afová ukhé umpo véi inaru fákéi erikhen mino. ³² *Máan tukhan mi véi iniren ódein dana san mi siamiyan mifo ída mana vanta

* **3:14:** Nam 21:9; Yon 8:28; 12:32 * **3:15:** Yon 20:31 * **3:16:** Yon 3:36; 10:28; Rom 5:8; 8:32; 1Yn 4:9-10
 * **3:17:** Ruk 19:10 * **3:18:** Yon 5:24 * **3:19:** Yon 1:5, 9; 8:12 * **3:22:** Yon 4:1-2 * **3:28:** Mat 11:10; Yon 1:20 * **3:31:** Yon 8:23 * **3:32:** Yon 3:11

ano mai vava fákaan ákona uren mairá mumunan iyan mino. ³³ Inte nanin banta anó mai vava fákaan ákona uren ná mairá mumunan iyan nafi mai anon Tiyarafenu van pura vava siya ne sé iyan mino. ³⁴ Tiyarafenu anon mai vanta siantan erikhen beni vayan tiyan mino. Para vara seyo, Tiyarafenui Aunan mano véimpin bíkakkan mino. ³⁵ *Be Afóe ano ve Anin nan anunu uren minó danáká ma yafisin ákona véin ayampin amen mino. ³⁶ *Be Anintá ma mumunan inain nanin banta ano ída kípan ayun para van oriyan ban aunan baranten mifo ve Anini vava ánain ma ída vákurin nain nanin banta ano ída kanaien aunan barantin Tiyarafenui aran daná ano vetin má banten mino.”

4

Yisasi Ma Sameriá Nanin Má Baya Sein Baya Ino

¹ *Yisasi ma vanasi monó non péantiyan ma veni eyo iyampon kayo mo kokhonien ma Yonini eyo iyampon kayo eantiyain baya Farasisi kayo ano inen mino. ² (Mai maen Yisasi va monó non péantiyaren naifo vei eyo iyampon kayo anon péantiyaren mino.) ³ Mai ma Farasisi kayo ano afová ein baya Yisasi iniren Yudiá bara me ampiren Kariri varafá evaránen oren mino.

⁴ Sameriá bara aúbaná ma orikhein aa vá béi yakhafen orino. ⁵ *Máan tukhan béi oriyaren mana Sameriái varu Sikha se sikhein barurá Yekopu ma ve anin Yosepin amikhá ein bara ádé oren mino. ⁶ Oríkan bayan áaui en ayá aintá ma eriyá ein mano Yisasin ayampa yíkan Yekopuni non masí mairá baré in mai masí avafá o khumanen mino. ⁷⁻⁸ O khumanen bei eyo iyampon kayo minó ano evúten dunan miyaní ono van kákan barufin orivíkan beyaká ana varéin mana Sameriá nanin mano non dafono van erin Yisasi véi nan temí, “Non dáan timí nano.”

⁹ *Máa síkan mai nanin mano anú duren temí, “Ída Yutan kayo vá Sameriá kayo vá manafiní ukhein mifo éi

Yutan bantan ban ná téi Sameriá nanin mi vá umpo éi fará non nan inantiya fono.” Mai fara va máa sen naino. Yutan kéká bá Sameriá kéká bá ída manafinien dunan má non má nakhein mi van mino.

¹⁰ *Máa síkan Yisasi evaránen mai nanin tiamemí, “Tiyarafenu ano ma ameno van iyain amusin má inká téi iyé bará éi vaípa non nan inantiya rafu mai éi afová e vareya séi vaípa inantesí mai ma fara van oriyan ban non amenunaren mino.”

¹¹ Máa síkan mai nanin mano semí, “Kákan banta oe, ma non masí námen mi vákayai éi ída non dafin kura vá anan má mantena sefo inte fákená mai ma fara van oriyan ban non dafinte vae. ¹² *Erasan tinafu Yekopu ano ma ve anin kayo vá kao vá sipisipi kayo vá ma niyá ein mai non masí ma setin timikhá ein mai vanta éi esantakhe vae.”

¹³ Máa síkan Yisasi evaránen béin tiamemí, “Banasi ano ma ma masí pintena non ma narantin evaránen non nan aiinten mino. ¹⁴ *Aiinten mifo séi ma amenuna non mano non nan ma aiin kipaantáden banasi aúpin non akharun mamen ída ma kípan para van oriyan ban aunan aminten mino.”

¹⁵ Máa síkan mai nanin mano semí, “Kákan banta oe, mai non pintena manáa simikhesin ná enadá ída non nan tiintisá ma masí pintena ída ovaráné e yafono.”

¹⁶ Máa síkan Yisasi mai nanin tiamemí, “Oreya e avafun o aviare ereno.”

¹⁷ Máa síkan mai nanin mano semí, “Te sivafu ída vain muno.” Sikan Yisasi semí, “Éi fura se ono e avafu ída vain mino. ¹⁸ Ída vain mompo fefá éi yan manápá bantan mantareya saréa ma ven má baona vanta mai ída en avafun baya fura siya ono.”

¹⁹ Máa síkan mai nanin mano semí, “Kákan banta oe, éi mana sakhanampa vanta ono. ²⁰ *Téin tisimeno. Para é tiren ná minó Yutan kayo ano Yerusaremíi mana monó tin baru van mino siren o átaru iná inká tetí tinafu siráo ano mará Kerisiní anurá ana monó tiyan nafino.”

²¹ Máa síkan Yisasi mai nanin evaránen tiamemí, “Téinti vayarasá mumunan ono.

* **3:35:** Mat 11:27; Yon 5:20 * **3:36:** Yon 3:16-18; 1Yn 5:12 * **4:1:** Yon 3:22 * **4:5:** Esé 33:19; Yos 24:32

* **4:9:** Esr 4:1-5 * **4:10:** Yon 7:37-38; Rev 21:6 * **4:12:** Yon 8:53 * **4:14:** Yon 6:35 * **4:20:** Diu 12:5-14; Íbo 122:1-5

Damú inka eriyain ída ayáká ban mara safi áa Yerusaremi safi Sifóentá minó ano monó tinten mino. ²² *Máan tin nampo sireti Sameriá kayo ano ma monó tiyaona mai yaná ída afová ukha ompo seti Yutan kéká ano ana ma monó tiyaruna mai yaná minói afova ukhé tifékun mi Tiyarafenu ano sétin aní uren banasi evaránen aviran doran timikhen mino. ²³ Timikhen mifo yamú eriyákan mafin inka fe e van mino. Kantá Aunani ákonará ma fura sikhein avúaváká ma Sifóentá monó tin nain mai nanin banta van mi Sifóe ano veyantá monó tino van anunu ukhen mino. ²⁴ *Tiyarafenu maen Aunan mi van mifo vá béintá ma monó tin nain kéká ano Kantá Aunani ákona vá pura avúavá bá pókesá banta monó tino.”

²⁵ Máa síkan mai nanin mano semí, “Téi afová ukhékun Tiyarafenu ano ma aní ukhein banta ma eriven maen mi véi anon kanaíen minó daná tian amá intí iné tifanté uno.”

²⁶ *Máa síkan Yisasi evaránen mai nanin tiamemí, “Mai ma siyaona vantán ma séi váankuno.”

Eyo Iyampon Kayo Ma Ovaránen Yisasi Vaípa Ereín Baya Ino

²⁷ Yisasi ma Sameriá nanin má baya siyá íkan ma vei eyo iyampon kayo ano ovaránen e oniyáken maen betí ankan anú duren mana ano véin nan pará mai nanin má baya siyayá náí bariya fono sen ída inaen mino.

²⁸ Mai nanin mano vei non kave me non masí avafá kaúden evaránen kákan barufin oriven minó nanin banta siamemí, ²⁹ “Mana vanta ano séin ma fefá bariyaeruna avúavá máa sisimiyán mifo mai maen Tiyarafenu ano ma aní ukhá ein bantá ban nafi eriveya onano.” ³⁰ Máa siyain má minó nanin banta ano mai varu me ampíren Yisinin onano van ere ere en mino.

³¹ Eriyain má Yisasi nan dunan nano van bei eyo iyampon kayo ano yuvun en mino. ³² Máa síkan evaránen temí, “Ída ino. Tenti yunan ma vain tirití ankan ída afová ukha ono.”

³³ Máa síkan beni eyo iyampon kayo ano veraran máa sen oreraemí, “Iye anó dunan baren ná me amikhan ná tino.”

³⁴ *Máa siyaimpin Yisasi evaránen betí ankan tiamemí, “Tenti yunan ma vain mai Tiyarafenui anunu ánain ma vákuren beni yorari uan ma kípan mino. ³⁵ *Tirití ankan ídá teyá ‘kamí kamí biyon ma orivití yunan duyasanté uno’ séiya fono. Tirití ankan ná minó pimpá one eúkono yunan inka karaaren duyasirí ukhen mino. ³⁶ Dunan ma yuyasin banta kayo ano kama miyan mi variyan mino. Mai yunan ma yuyasiyaini aran mi mai vanasi ma aviren ída kípan para van oriyan ban aunampin ma mo kaiyain mino. Máan tukhein nan mi yunan ma yoran banta vá dunan ma yuyasin banta vá ano amusín inten mino. ³⁷ Máan tukhan mi mai vava fura sikhantin mana vanta ano ma yunan dódákaré intin maen ena vanta anon mai yunan duyasinten mino. ³⁸ Máan tukhein nan mi sirití ankan ída yunan dore nan ena kayo ano ákona yorari uren dóádein dunampin mi siritin nan duyaseno van mi siantiyá uno.”

Sameriá Nanin Banta Ano Ma Yisasintá Mumunan Ein Baya Ino

³⁹ Para va mai varu ráke Sameriá kéká ano Yisasintá mumunan en naino. Mai nanin mano ma fefá bariyá ein danasinta ma evaránen tiamein baya ma mai nanin mano vanasi siamin iniren mino. ⁴⁰ Mumunan uren betí ankan mano véin o oniyáken maen ayópá íkan mai varurá kan damú báken ⁴¹ kama vava siyákan kokhon mano veni vava iníden mumunan en mino. ⁴² *Mumunan iyáken betí ankan mai nanin tiamemí, “Éin avaya inídesa seti mumunan erauno. Taréa setiyantái véini vava inídeí mumunan iyá uno. Béi fura sen barará nanin banta ma aya uren evaránen aviran nain banta ino.

Yisasi Ma Kamanini Ayafa Vanta Anin Ayofein Baya Ino

⁴³ Sameriá nanin banta vá bákan kan damú orivin maen Yisasi e mantén Karirifá oren mino. ⁴⁴ *Afovasá ono. Pefá

* 4:22: 2Ki 17:29-41; Ais 2:3; Rom 9:4-5 * 4:24: Rom 12:1; 2Ko 3:17; Fir 3:3 * 4:26: Mak 14:61-62 * 4:34: Yon 6:38 * 4:35: Ruk 10:2 * 4:42: 1Yn 4:14 * 4:44: Mat 13:57

Yisasi veyan nan máa sikhhan mino. “Ena varafimpái sakhanampa vanta aví bain mifo vei vara anará ída véin aví ban mino.” ⁴⁵ *Oríkan Karirí nanin banta ano ódaren amusin iyan* béin e aviren mino. Mai fara va ino Avo Uantan Damú béi ano Yerusaremí kákan monó dafufin enará ukhein danasí iyákan betí ankan ontaren mino.

⁴⁶ *Kariri varafin mana Yisasi oriyaren béi ma fefá non maman uvainíi ukhá ein Kaná barurá oríkan mana kamanini ayafa vanta anin aí iyan Kapeniamú barurá baren mino. ⁴⁷ *Baren iníkan Yisasin nan Yudiá me ampíren Karirifá e van ne siyaimpin mai vanta ano Kaná barufá oren Yisasin o yosiren béin má Kapeniamú oren mai ma ve anin aí iyan ma furono van iyain mo ayofano van ákonæen ínaen mino.

⁴⁸ *Máa síkan Yisasi evaráne véin tiamemí, “Enará ukhein daná bá aní danasinta vá ana afoká intiyá ódé mumunan ono van iya rafono. Ídá para mumunan inte rafono.”

⁴⁹ Máa síkan kaminini ayafa vanta ano ákonæen inaen temí, “Bafan noe, se sanin purin nafo aine ereno.”

⁵⁰ *Máa síkan Yisasi evaránen béin tiamemí, “E anin e asefa inten mifo evaráne ei varufá orono,” síkan mai vanta ano Yisasini vayará mumunan iyáken bei varufá oren mino.

⁵¹ Mai ayafa vanta ano ída Kapeniamú orikhen para ayanafá oriyákan manáa vei yoran banta kayo ano vava varen ayanafá e fóken tiamemí, “E anin inka asefaen mino.” ⁵² Máa síkan béi vetí ankan inaemí, “Nái áau rasá te sanin e asefaen nafino.” Síkan betí ankan evaránen béin tiamemí, “Inuran inúpa mana áauí in mi veni aí kípen mino.”

⁵³ Máa síkan mairá be afóe ano mai ma Yisasi sen ma e anin e asefa inten mino ma sein áau ovare me iniren ben má bei kéká bá ano Yisasintá mumunan en mino.

⁵⁴ *Yisasi ma Yudiáké eríaren ma Karirifá e varen ma ma yaná barein mai anon kan

dádasí en mi enará ukhein daná afoká en mino.

5

Yisasi Ma Mana Arantan Namu Ukhein Banta Ayofein Baya Ino

¹ Ínaimpáké Yutan kayoi kákan monó tin damú afoká íkan Yisasi evaránen Yerusaremí óden mino. ² Mai kákan dafu ona aví Sipisipii Ona e sikhein akhentá Yerusaremí kákan barufin mana non akharun bákkan mai non akharun aví Iburu vava finté Betesda e sikhhan mai akhempá dan manápá dusesí uádan baren mino. ³⁻⁴ Baré íkan mai yusé kayofin kokhon aí nanin banta vá auu yufúkukhein kayo vá arantan namu ukhein kayo vá ai ayan púkein kayo vá baren mino. * ⁵ Bákkan maifin mana vanta teti-eiti (38) oranará aí bain banta ano vakharen mino. ⁶ Mai vanta ayáká aí mantaréin Yisasi afová en ódaren béin inaemí, “Éin au evaránen kama ino vará iya fono.”

⁷ Máa síkan mai aí banta ano evaránen béin tiamemí, “Kákan banta oe, non ma karantó intin ma siyían ten nare ma nompin kain banta ída vákan ena kayo ano anan ainen ten esantaaren nompin araviyá uno.”

⁸ *Máa síkan Yisasi véin tiamemí, “Mantaveya ei yuvasí mamare orono.”

⁹ Máa siyain má mai vanta au ainen manádá kama íkan bei yuvasí dádaaren oren mifo mai Sabati yamúi mai avúavasíen mino. ¹⁰ *Máan tíkan Yutan kayo ano ódaren mai vanta máa sen tiamemí, “Sabati yamú doran nan airo ananí ukhein mifo éi fará ei yuvasí mamareyá no fono.”

¹¹ Máa síkan béi evaránen betin tiamemí, “Mai ma sen tu ma kama usintein banta anon ‘Ei yuvasí mamareya orono’ sen tisimikhá uno.”

¹² Máa síkan betí ankan manó véin ákonæen inaemí, “Intéa vanta anó éin tiamen ná ei yuvasí mamareya orono sen nafino.”

* **4:45:** Yon 2:23 * **4:45:** Banasi ano ma mana vanta amusin uanté iyain maen mai yufúdafú ma iyain mino.

* **4:46:** Yon 2:1-11 * **4:47:** Mat 8:5-6 * **4:48:** Yon 2:18; 1Ko 1:22 * **4:50:** Mat 8:13 * **4:54:** Yon 2:11

* **5:3-4:** Manáa Tiyarafenui vompon dókifin ena vava ano vesi 3 vá 4 vá máa sen asotú ukhen mino. *Bafani enisori ano mana mana yamú eriven non karantó in maen maifin ma esesíen aravein nanin bantai aí kípantiyaren mino.*

* **5:8:** Mat 9:6 * **5:10:** Nee 13:19; Yer 17:21

¹³ Maa siyákan kokhon nanin bantafin Yisasi ofébin mai ma au kama uantein banta ano aminoen mino. ¹⁴ Amino ukharéin maen inaimpáké Yisasi kákan monó namumpin ódiven onákan mai vanta varéin máa sen béin tiamemí, “Éi moéke kákan uman baran nampo vá au ma kama uveintá ída vá enádá umeí ono.” ¹⁵ Maa sirákan mai vanta ano Yutan kayoi ánon banta kéka san dosen oren mo vetin tiamemí, “Ten tu ma kama usintein banta mai Yisasi ino.”

Yisasi Ma Veyan Nan Tiyarafenu Anin Munu Ma Sein Baya Ino

¹⁶ Sabati yamú anan Yisasi ano vanasi ayofiyaimpin mi Yutan kayo ano mai van béin namuroí uanten mino. ¹⁷ Máan uantiyákan Yisasi evaránen betin tiamemí, “Te Sifóe ano fara yoren oriyán báken taréa yeren doriyan mifo mai fará téi ifá onte rafuno.” ¹⁸ *Sabatirá ma yoran are ukharé ein Yisasi yurafuriyáken ma inká Tiyarafenu van te Sifóe uron mino ma sein nan Yutan kayo ano iníkan Tiyarafenu vá un manái in baya siyaimpin mai van ben aruan purin aa van dosen mino.

¹⁹ *Máan tiyákan Yisasi afová iyáken betí ankan evaránen tiamemí, “Pura siré tiretí ankan tiamé uno. Be Anin mano ída kanaíen beyantá mana avúavási inten mifo ve Afóe ano ma varan nain mai avúavá máa anan be Anin mano varanten mino. ²⁰ Para vara seyo, be Afóe ano ve Anin moéken anunu iyáken mi ve ma variyain avúavá máan be Anin aní intin baranten mino. Máan intin ma ma ayofein banta esantaren moéken kákaní ukhein danasinta varantiya mai avúava san anúde orera inono. ²¹ Para vara seyo, fúká ein kéká ma ve Afóe ano orun avían mantiyainí anan en mi ve Anin mano ve ma anunu ináin kéká kasaen aunan aminten mino. ²² *Máan tukhan banta ma yaimin doran maen ída ve Afóe ano yaimé iyan mifo ve Anin mi mai yoran amikhen mino. ²³ *Máan tukhein nará be Afóen aví ma yaní iyaonái e vá be Anin avisá daní ono. Banta ano ma ve Anin aví ma ída yaní

inteya mai ven ma siantan erikhein Afóen aví ída yaní e ono.

²⁴ *Téi fura siré tiretí ankan tiamé uno. Mana vanta ano ma sen tivaya inire ma séin ma sisintá erikheruna Tiyarafenu máa ma mumunan inona ano ída kípan ayun para van oriyán ban aunan baran nono. Betí ume ma yaimin ída vanten mifo veti fefái furin dafu finté ekháden para van oriyán ban aunani yafufin erikhen mino.

²⁵ “Téi fura siré tiretí ankan tiamiyá uno. Damú ma afoká ono van iyá ein taréa inka afoká íkan pefá ma fúkaré ein nanin banta ano mai Tiyarafenu Anin avaya iniyantin inká mai vaya ma inin nain kéká ano fara ayun banten mino. ²⁶ Para vara seyo, ve Afóe ma veyampin aunan amin ákona vainíen be Anin má ákona amin be Anin má dere veyampin aunan ma amin ákona van mino. ²⁷ Inká béi Vanta Anin mi vákan banasii avúavá ma yaimin ákona amikhen mino. ²⁸ Máan tukhanti siretí ankan ída vá ma vaya van anú dureya kokhon ineine ono. Inka yamú adé irí iyain púkein nanin banta ano Tiyarafenu Anini vaya iníden maen ²⁹ *masí pinté evaránen e mantaven maen kama avúavá ma variyaré ein kéká ano ída kípan para ayun ban oriyán ban aunan barantin inká namu avúavá ma variyá inain kéká ma kó tiantan naimpin oferanten mino. ³⁰ *Máan tinten mifo séi mana yaná tesi ineine finté ída varanté umpo se Sifóen pintena ma vareruna vayan dakhafé banasii avúavá daiméiyá uno. Téi ída sesi sinunu yakhafin na séin ma sisintá erikheruna Sifóeni anunun dakhafiyái séi ma yaimiyaruna ano funtáken mino.

Tiyarafenu Ano Ma Yisasi Nan Pura Vanta Ino Sein Baya Ino

³¹ Téi ma sesi sivútivá bá doran ma san ma seyantá tian amá iyákun maen banasi ano mai vaya van beyantái siyan mino siren ída ininten mino. ³² Maa sen ininten mifo ena ano ma senti sivútivá bá doran ma san ma siyantiya mai furan tiyan mino.

* **5:18:** Mat 26:4; Yon 7:1; 10:30 * **5:19:** Yon 5:30 * **5:22:** Yon 5:27; Apo 10:42 * **5:23:** Fir 2:10-11; 1Yn 2:23 * **5:24:** Yon 3:15-18 * **5:29:** Dan 12:2; Mat 16:27; Apo 24:15 * **5:30:** Yon 5:19; 6:38

³³ Tiretí ankan Yonini vava o iniren me siamino van manáa vanta kayo sianten nan orikhan mifo véi fura sikhein baya van mi sian amá ukhen mino. ³⁴ Yonini avúavá baya ma siretin tiamiyaruna mai Tiyarafenu ano siretí ankan evaránen avirano van mumpo senti kama sivútivá bá doran baya vá ma sian amá inain mai ída varará banta kayoi yoran mino. ³⁵ Mana oon ma uruádeiní Yoni uven tiretin kakhaantayai sitó máará amusin erono.

³⁶ *Máan te ompo Yoni ma yoriyáken tenti vava sian afoká iyá ein mai séi veni yoran esantakhein dorarí iyáké kokhon enará ukhein aní danasinta variyá umpo mai minó doran Tifóe ano séin timikhen mino. Minó doran ma séi ma variyaruna ano vanasi avorá tian amá en Tifóe anon téin tisintá erikhé uno. ³⁷ *Erikhékun mi Sifóe ano veyantái sen nan tian amá ukhen mifo siretí ankan ída ven avaya ineya ayafen one ukha ono. ³⁸ Máan tukhesin pasen tiretí ankan aúpin ída veni vava vanten mino. Mai fara va ino. Béin ma siantan erikhein bantai vayará ída mumunan iya nan mino. ³⁹ *Tiretí ankan Tiyarafenui vompon dókifin dankáde mai vava yaíde afová e nan mai ano ída kípan ayun para van oriyan ban aunan timinten mino siya ompo mai Tiyarafenui vompon dóki ano séin nan mi siádan baré ikaya ⁴⁰ siretí ankan téi vaípá ída eriveya ída kípan ayun para van oriyan ban aunan bariya ono.

⁴¹ “Téi ma ma vava kayo ma siyaruna mai vanasi fintena kákan bí baranova rauno. Ída ino. ⁴² Máan tukhein mifo séi siretí ankan afová ukhé uno. Tiretí ankan aúkáké ída Tiyarafenu van anunu ukha ono. ⁴³ Téi Sifóen avíkái erikhé kuyai siretí ankan ída séinti vava variya ompo mana vanta ano ma ve avíká ma erintiya mae siretí ankan manádái mai vantai vava aine varan nono. ⁴⁴ Tiretiyan mi kákan bí baran maran iyáke Tiyarafenu ano ma amiyain bí ída variya ompo intesá ureyá mumunan inte rafono.

⁴⁵ “Tiretí ankan ída vá ten nan Tifóen avorá daiminten mino se vá ineno. Tiretí

ankan ma Mosesin nan tiya inten mino ma se inikhá eona mai vanta anon tiretí ankan daiminten mino. ⁴⁶ *Mosesini vayará pura sen mumunan e vareya mai senti vayará deren mumunan inonaren mino. Mai fara vara seyo, béi ma uvantaré ein bompompin mai sen nan mi sikhan mino. ⁴⁷ Máa sikhan mifo mai ma véi uvanteré ein bayará ma ída mumunan inte ya mai siretí ankan intesá ureyá tenti vayará mumunan inte fono.”

6

*Yisasi Ma Yan Manápá Tauseni (5,000)
Vanta Yunan Amein Baya Ino*

(Matiu 14:13-21; Maki 6:30-44; Ruku 9:10-17)

¹ Máa siran manáa yamú orivíkan Yisasi Kariri non ma ena ví Taibiriasi e siyain e kháden oren mino. ² Oríkan kokhon nanin banta ano véin e vákuren oren mino. Mai fara va ino véi ma aí nanin banta ayofantá ma enará ukhein daná ma variyan ma ontaré ein nan mino. ³ Bákuren oriyákan Yisasin má bei eyo iyampon kayo vá ano mana anuyontá un kumanen mino. ⁴ (Yutan kayoi Avo Uantan Damú áde eriyákan mino.) ⁵ Un kumantaren onákan kokhon nanin banta ano véi nan dosen amen édiyaimpin dovaéaren Firipin inaemí, “Tetí ankan ma ma nanin banta amékun nan nain dunan inte fákená miyaní ótifante rafuno.”

⁶ Béi ma mai vava ma sein mai veyan ma varan nain daná pé afová ukhen Firipin mi mai vayafó akhenóka uan onen mino.

⁷ Máa síkan Firipi evaránen béin tiamemí, “Tetí ankan ma kan tauseni monipó ma yunan miyaní urékun maen ma nanin bantafin ída kanaíen kova inten mino.”

⁸ Máa síkan mana vei eyo iyampon Saimon Pitan afá aváe Enduru ano evaránen Yisasin tiamemí, ⁹ “Masína mana iyampon mano yan manápá bereti vá kan noyana vá kain ban mifo ma nanin bantafin mai ano intesá uren ná kanaí inten nafino.”

¹⁰ Máa síkan Yisasi vetí ankan tiamemí, “Minó nanin banta siamesin kuman ino,” síkan mairá kokhon kata varé íkan mai yaró kumanen oreraen mino. Maifin

* 5:36: Yon 3:2; 14:11

* 5:37: Mat 3:17; Yon 5:32; 8:18

* 5:39: Ruk 24:27

* 5:46: Apo 3:22

ma varé ein banta máa mai yan manápá tauseni (5,000) ino. ¹¹ Kumamíkan Yisasi vereti kayo orun máden Tiyarafenu susu siantáden kisian banasi amíden ináimpáké noyana kánan máden máan mana uren amíkan minó nanin banta ano nákan amú kuren míno. ¹² Amú kuriyaimpin Yisasi vei eyo iyampon kayo siamemí, “Mai yunan antan tavifá eraven afein nafo aían átaru ono.” ¹³ Máa síkan mai ma yan manápá bereti finke ma kisian banasi amin narákan ma amú kurin ifá ein antan kayo o éke e éke uren tiyan mikan mifo sirantan kan orun kádan (12) unan bíken míno.

¹⁴ Máan tíkan mai ma enará ukhein daná ma aní ein minó nanin banta ano ódaren temí, “Pura uron ten mai ma Tiyarafenu ano siantantin ma ma varará erano van ma síkhá ein mai sakhanampa vanta ino. ¹⁵ *Máa síren banasi ano Yisasin duvun intin kiní ino van iyain baya véi iniren afová iyáken mairá me ampíren beyaká anufá óden míno.

Yisasi Ma Non Akharun Daró Orein Baya Ino

(Matiu 14:22-33; Maki 6:45-52)

¹⁶ Ódivíkan mai inúpá bei eyo iyampon kayo ano non akhempá orun béin ave ukharen míno. ¹⁷ Ave ukhan Yisasi ída ovaránen eríkan duniyaimpin non e kháden Kapeníamú orono van betí ankan botifin un kumanen míno. ¹⁸ Kumanen oriyaréin kákan uva uaren non karantó en míno. ¹⁹ Mai non aúbaná oriven onákan Yisasi non daró boti kakháaren oriyaimpin betí ankan akhokho van en míno. ²⁰ Akhokho van iyain má Yisasi oovaren temí, “Téin eriyá umpo ída vá akhokho van ono.” ²¹ Máa síkan betí ankan amusin iyáken béin botifin avían kaúdan mai voti ano manádá ainen mai ma oriyá ein barufá oren míno.

²² Ena ákurá banasi ano Yisasin onano van mai non avaruni ena ufá o átaru en míno. Mai fara va ino. Ben má bei eyo iyampon kayo vá ano manápá erikharen mi véin me afa uren eyo iyampon kayo ano ana votifin un kumamen oríkan ontaren míno. ²³ O átaru iyákan mai ma Bafan mano ma susu síren bereti

ma vanasi amin neintá manáa Taibiriasí kena voti kayo eren míno. ²⁴ Mairá o átaru uven onákan Yisasin má bei eyo iyampon kayo vá ída vaimpin minó nanin banta ano mai voti kayofin kumamiyan non akharun e kháden Kapeníamú mo Yisasin nan doseno van oren míno.

Yisasi Aunan Ma Amin Bereti Ino

²⁵ Banasi non e kháden ena ufá oriven Yisasin oniyáken mo véin inaemí, “Aru soe, inte áau rasá éi mafá ere fono.”

²⁶ Máa síkan Yisasi evaránen betin tiamemí, “Téi fura uron tiré tiretí ankan tiamiyá uno. Téi ma enará ukhein daná ma aní iyaruna van ída iniya ompo siretí ankan inuran ma vereti amékuya ma nen nan amú kurein mai máa van mi se nan dosiya ono. ²⁷ *Máan tiya ompo siretí ankan ída vá ainen pútaen ma namuin dunan barano van ono. Banta Anin mano ma fara van oriyán ban aunan ma amin nain ná tiretí ankan ayampa ure vá doseno. Para vara seyo, Tifóe Tiyarafenu ano mai van mi véin tiantan erikhen míno.”

²⁸ Máa síkan béin evaránen inaemí, “Teti ankan inté ma ontesá kanaí é Tiyarafenui yorarí onté tife rafuno.”

²⁹ *Máa síkan Yisasi evaránen betin tiamemí, “Tiyarafenu ano ma siretin amin nain dorán mai máan mi ukhen míno. Béi ma siantan ma erikhein bantarasá mumunan ono.”

³⁰ *Máa síkan betí ankan mai vaya iniren evaránen béin inaemí, “Mai éi intéa enará ukhein aní daná ma aniesirá teti ankan ódaresá éintá mumunan ótifante rafuno. ³¹ Para vara seyo, Tiyarafenui vompon dókifin máa síkhen míno. ‘Tinafu siráo ma kámá barafá nókan maen Mosesi ano inaru fáke manna e sin bereti amíkan nen míno.’ *Eks 16:14-15; Nam 11:7-9; Íbo 78:24*

³² Máa síkan Yisasi vetí ankan tiamemí, “Téi fura siré tiretí ankan tiamé uno. Mosesi ano va mai inaru fáke vereti amikhan naifo, se Sifóe anon amikharen mi inká taréa inaru fáke fura vereti amiyan míno. ³³ Para vara seyo, mai Tiyarafenui fura vereti uron manon inaru fáké erakhen barará nanin banta aunan amiyan míno.”

* 6:15: Yon 18:36 * 6:27: Yon 6:48-58 * 6:29: 1Yn 3:23 * 6:30: Mat 16:1; Yon 2:18

³⁴ Maa síkan betí ankan temí, “Kákan banta oe, ena ena yamú mai vereti vá tetin timeno.”

³⁵ *Maa síkan Yisasi vetí ankan evaránen tiamemí, “Téi aunan amin bereti umpo séi varunafá ma erin nain mano ída arafanan inten mino. Tentá ma mumunan inain mano ída enadá non nan ainten mino. ³⁶ Tiretí ankan téin tonte ompo ída mumunan iyanái siamiyá uno. ³⁷ Tiamiyá umpo Sifóe ma simikhein kéká ano ma se vaípa erintí maé téi ída uron mi vetí ankan evaráné tiantanté uno. ³⁸ Para vara seyo, séi sesi sinunu ánain dakhafo novara inaru me ampiré erakhe raumpo mai ma sisintá erakheruna Sifóeni anunu ánain dakhafono van mi erakhé uno. ³⁹ *Erakhé umpo mai ma séin tisintá erakheruna Sifóeni anunu máan mi ukhen mino. Ma vara ma kípán nain damú mai ma séin timikhein nanin banta finté mana ano ída afeyoranten mifo minó kékái avorékun e mantanten mino. ⁴⁰ Para vara seyo, te Sifóeni anunu máan mi ukhen mino. Be anin ma ódaren bentá ma mumunan ukháin nain nanin banta ano ínaimpá kípán damú téi avorékun orun mantaven maen ída kípán para van oriyan ban aunan barano van mino.”

⁴¹ Yisasi ma veyan nan téi inaru rákena vereti uno ma sein nan Yutan nanin banta ano iniren kakhí kakhá ten oreraen mino. ⁴² *Máan tiyáken betí ankan temí, “Ma vanta anóe afóen tetí ankan afová ukhékun béi Yosepin anin Yisasin ban mifo mai fará ten ná ‘téi inaru fáké erakhé uno’ siyan nafino.”

⁴³ Maa síkan Yisasi evaránen tiamemí, “Tiretí ankan ída vá kakhirun tiriya vano.

⁴⁴ *Para vara seyo, vanasi ano ída kanaíen te vaípa erinten mifo séin ma sisintá erikheruna Sifóe ano ma o avíádantin ma se vaípa erekharé intí maé ínaimpá kípán damú purin pintena evaráné avoran e mantanten mino. ⁴⁵ Sakhanampa vanta kayoi vompon dókifin ma vain baya ano máa sikhen mino. ‘Minó nanin bantan Tiya rafenu ano afova aminten mino.’ *Ais 54:13*

Tifóeni vaya ma iniren afová urein kayo anon te vaípa eré iyan mino. ⁴⁶ *Ída mana

ano Sifóen onten mifo Tiya rafenu vá ma varen erakhein banta ano anan Tifóen onten mino.

⁴⁷ *Téi fura siré tiretí ankan tiamiyá uno. Téintá ma mumunan iyain kayo ano fefái ída kípán aunan manten mino. ⁴⁸ *Téi ída kípán ayun ma fara van oriyan ban aunan ma amiyain bereti uno. ⁴⁹ Pefá tiretí ankan anafuyan mano kámá barafá manna e sin bereti nakharen mifo minó ano furein mino. ⁵⁰ Purein mifo inaruráké ma erakhein bereti ma vanasi ano nanten maen beti ída furinten mino. ⁵¹ Mai ma aunan bain bereti ma inaru fáké erein mai séi umpo mana vanta ano ma mai vereti nanten maen ayun ma fara van oriyan ban aunan baranten mino. Mai vereti ma amenuna mai varará nanin banta ano ída kípán aunan barano van tesi simasin amenté uno.”

⁵² Maa síkan Yutan kayo ano veraran asive asive iyáken temí, “Ma vanta ano intesá urená be amasi simintí nantékun ná tino.” ⁵³ Maa siyákan Yisasi vetí ankan tiamemí, “Téi fura uron tiré tiretí ankan tiamiyá uno. Banta Anini amasi vá nare vá ma ída nanteya mai siretí ankampin ayun ma fara van aunan ída vanten mino.

⁵⁴ Ída vanten mifo séin timasi vá nare vá ma nan nain kayo ano ída kípán ayun ma fara van aunan mantaré intí maé ínaimpá kípán damú betin avorékun e mantanten mino. ⁵⁵ Mai fara vara seyo, sen timasi maen mai fura sikhein dunan mi vákan inká tenti nare maen mai fura sikhein non mi vákan ukhen mino. ⁵⁶ Tenti simasi vá nare vá ma niyain kayo ano séimpin baká téi vetí ankampin bá uno. ⁵⁷ *Ayun ma fara vain Tifóe ano séin tisintá erikhékun mi veni ákonarái sen taunan para van mifo mana ano ma máan mana en ten ma nanten maen tenti ákonará ayun ma fara van aunan baranten mino. ⁵⁸ Téi mai inaru fáké ma erein pura vereti umpo fefá ma anafu aráo ano ma manna e sin bereti naren baren maen ínaimpáké puren mino. Purein mifo ma ma siyaruna vereti ano mai vá ída manaí ukhein ma ma nan nain mano ayun ma fara van oriyan ban aunan baranten mino.” ⁵⁹ Béi ma ma vaya kayo sein mai Kapeniamú barurá monó átaru

* 6:35: Yon 4:14 * 6:39: Yon 10:28-29; 17:12 * 6:42: Mat 13:55 * 6:44: Yon 6:65 * 6:46: Yon 1:18

* 6:47: Yon 3:15-16 * 6:48: Yon 6:32, 58 * 6:57: 1Yn 3:24

namumpin mi vanasi monó baya siamen mino.

Yisasin Anain Ma Yakhafen Nó Ein Kayo Finté Ma Kokhon Mano Véin Me Ampiren Orein Baya Ino

⁶⁰ Maa siyákan bei eyo iyampon kayo vá ano yere mai ma siyain baya iniren máa semí, “Amino eruna vayan tiyan mifo iye anó kanaíen ná ininten nafino.”

⁶¹ Mai ma vei eyo iyampon kayo ano ma vaya kokhon iyain Yisasi afová iyáken betí ankan tiamemí, “Ma vaya anó tiretí ankaní mumunan asuse iya nafino.

⁶² Tiretí ankan ma oniyasin ma Vanta Anin mano ma evaránen inarufá ódintiya mai inte esá té ininte fono. ⁶³ Kantá Aunan manon ída kípan ayun ma fara van aunan banasi amé iyan mifo vantai ákona ano setí ankan ída uron mi siya iyan mino. Ma vaya ma siretí ankan ma siamiyaruna mai aunan mi váken béi ayun ma fara van oriyan ban mino. ⁶⁴ *Ban mifo siretin pinté manáa ano séintá ída mumunan iya ono.” (Mai fara va máa sen naino. Iye anó béintá ída mumunan iyan ná inká iye anó béin namuro ayampin aminten nafi mai vei esé arái in táké afová ukharen mino.)

⁶⁵ *Maa siren enadá evaránen temí, “Tifóe ano ma ída ákona amin nain mano ída kanaíen te vaipá erinten mino. Mai ana van mi séi ma vaya siretin tiamé uno.”

⁶⁶ Yisasi ma mai vaya siran maen ben ma yakhafen noré ein kayo finté kokhon mano véin me ifá en tipá oren noren mino.

⁶⁷ Máan tikan Yisasi vei sirantan kan orun kádan (12) eyo iyampon kayorá inaemí, “Tiretí ankan masá téin me ifáeyá orinte fono.”

⁶⁸ *Maa síkan Saimon Pita evaránen temí, “Bafan noe, éini vayafin mi ayun ma fara van oriyan ban aunan ban mifo setí ankan iye vaipasá oronte rafuno. ⁶⁹ Éi Ti-yarafenui mana kantasi ukheona vantán ban ná tetí ankan afová ukhé mumunan iyá uno.”

⁷⁰ Maa síkan Yisasi evaránen betí ankan tiamemí, “Tiyan mikan mifo sirantan kan orun kádan (12) eyo iyampon mi séi aviké umpo mai aúbaná mana Ban Anon ban

mino.” ⁷¹ Iskariotíke vanta Saimonin anin Yudasi nan mi véi máa sen mino. Tiyan mikan mifo sirantan kan orun kádan (12) eyo iyampon pintena mai vanta anon Yisasi namuro ayampin amintin aruan purinten mino.

7

Yisasin Má Be Afá Kéká Báí Vaya Ino

¹ *Máan turen mai oyampaké Yisasi Kariri varafin mana váken minó baru-fimpá noren mino. Yutan kayo ano véin aruan purono van iyákan mai van béi ída evaránen Yudiá barafá orono van ukharen mino. ² *Ída orono van ukhan maen Yutan kayoi Iyon Baran Namun Kayo ma Uváden Monó Tin Omá ádé en mino. ³ Ádé iyákan be afá kéká ano véin du-vun uren tiamemí, “Ei varu me ampireya Yudiá barafá oriveya enará ukhein danas-inta aníesin ná ei eyo iyampon kayo ano onano. ⁴ Minó nanin bantafin ma mana vanta ano ma vei yoran aní ono van maen ída aúpá doré iyain mifo éi minó nanin banta avorá oriveyá ei yoran aníesin ná onano.” ⁵ *Mai fara va máa sen naino. Be afá kéká ano yeren bentá ída mumunan iyáken mi sen mino.

⁶ Maa síkan Yisasi evaránen betin tiamemí, “Tenti yamú ída afoká ukhen mifo siretí ma orono van inona yamú kasae orin nono. ⁷ Minó nanin banta ano ída kanaíen tiretí ankan namuroi uantanten mifo vetí namu avúavái sian páman iyákan mai van mi séin namuroí usintiyan mino. ⁸ Mai omasí ma iyaipasá tiretí ankan orono. Para vara seyo, senti yamú ída afoká ukhein téi ída oronté uno.” ⁹ Maa sen tiamiren Yisasi Karirifá karemen mino.

¹⁰ Karentan maen be afá kéká ano mai omápá orivíkan inaimpaké Yisasi aúpaké uaren maifá oren aúpá o varen mino.

¹¹ O vákan Yutan kayoi ánon banta kéká ano mai omápin benan dosi vaen banasirá inaemí, “Mai vanta intefasá ban nafino.”

¹² Maa síkan banasi ano kafaya sen orera iyákan manáa ano semí, “Béi kama vanta ino” siyákan inká ena kéká ano semí, “Ída ino. Béi vanasi kampun tiantan banta

* 6:64: Yon 13:11 * 6:65: Yon 6:44 * 6:68: Mat 16:16 * 7:1: Yon 5:18 * 7:2: Riv 23:34 * 7:5: Apo 1:14

ino.”¹³ Maa siyaren mifo vetí ankan Yutan kayoi ánon banta kéká san péden ída afoká tinton aúpa anan tiyaren mino.

Yisasi Ma Kákan Monó Dafufin Banasi Avorá Monó Baya Siamein Baya Ino

¹⁴ Mai omasí e en oriyan ma mo aúban nasí iyan maen Yisasi monó dafufin ódiven monó baya araíen banasi siamen mino.

¹⁵ *Tiamiyákan Yutan kayoi ánon banta kéká ano veni vaya iniren anú duren takhaen orera iyan temí, “Ma vanta ano ída afova ma varampin orikharen mifo inté uren ná béi ma afova manten nafino.”

¹⁶ *Maa siyákan Yisasi evaránen betí ankan tiamemí, “Ma vaya ma siretin ma séi siamiyaruna mai sesi vaya vaino. Ída ino. Tiyarafenu ano ma séin tisintá erikheruna mai veni vayan téi siamiyá uno. ¹⁷ Tiamiyá umpo mana ano ma Tiyarefenui vaya ánain ma yakhafono van ma iyanten mai anon kanaíen téi ma siyaruna vayai ana afová inten mino. Mai vaya senti ineine fintesá eriyán nafi áa Tiyarafenu fintesá eriyán nafi mai véin kanaíen afová inten mino. ¹⁸ *Mana vanta ano ve aví daní ino van mi vei ineine finte vaya sé iyan mifo ena vanta ano ma siantan erikhein banta mai fura vantan báken mai ma véin tiantan erikhein banta avíi yaní é iyan mino. ¹⁹ *Ídá Mosesi ano siretí ankan man baya amikharen nafino. Tiretí ankan pinté mana ano ída mai man baya ánain dakhafiya ompo fará téin tiruan purono van iya rafono.”

²⁰ *Maa síkan banasi ano evaránen béin tiamemí, “Éi óen mi iya ompo iye anó éin aruan purono van iya vae.”

²¹ Maa síkan Yisasi evaránen betin tiamemí, “Téi Sabati yamú ma vanta ayofan dorarí ma erúna van mi siretí ankan anúde orera iya ono. ²² *Mosesi ano au khavin avúavá amikhaya Sabati yamú deren iyampon au khaviya ompo mai avúavá ída véi araí ukhen mifo anafu aráon pintéi erikhen mino. ²³ *Máan tukhein nan mi siretí ankan Mosesini

man baya ánain dakhafeya ain iyampon au Sabatirá kaviya ompo séi ma Sabatirá ma vanta ayoferuna van pará tiretí séin nan aranan ná bariya rafono. ²⁴ Tiretí ankan puntákein avúavá posá minó daimin nampo ída vá auu máa fóké ódeya yaimono.”

Yisasi Mai Tiyarafenu Ano Ma Aní Ukhein Banta Fino Ma Sein Baya Ino

²⁵ Yerusaremiké manáa nanin banta ano máa sen oreraen mí, “Ma mai ma aruan purono van iyain banta fino. ²⁶ Béi minó avorá baya siyan mi setisi ánon banta kéká ano véin nan ída mana vaya siyan mifo Tiyarafenu ano ma aní ukhein banta inó ten afová iyanten nafino. ²⁷ *Tetí ankan beni varu afová ukhé tifé umpo Tiyarafenu ano ma aní ukhein banta ma erin nain mai mana ano ída veni varu afová inten mino.”

²⁸ *Yisasi ma monó dafufin banasi monó baya siamiyáken maen avádóden oovaraaren temí, “Tiretí ankan téin má tesi varu vá afová ukha ompo séi ída sesi sinunurá erikhé uno. Ben avúavá purasen puntákein manon téin tisintá erikhékuyan tiretí ída véin afová ukha ono. ²⁹ Téi ven má baréi véin afová ukhékun téin tisintá erikhé uno.”

³⁰ *Maa síkan ánon banta kéká ano mai vaya iniden béin pákano van en mifo véi ma uman baran nain damú ída erikhan mana ano ven au ída aruven mino. ³¹ Máan tiyákan kokhon nanin banta ano ventá mumunan iyáken temí, “Tiyarafenu ano ma aní ukhein banta ma erinten maen ma vanta ano ma variyain avúavá danasinta esantaren ná enará ukhein avúavasá baranten nafino.”

Monó Ánon Banta Kayo Ano Ma Yisasi Pákano Van Ein Baya Ino

³² Banasi ano Yisasi ma variyain avúavá dana san kafaya sen orera iyákan Farsisi kéká bá monó ánon banta kayo vá ano iniren Yisasin pákano van monó dafurá ma yafisin banta kéká tianten mino. ³³ Siantiyákan Yisasi vetin tiamemí, “Téi ída ayáká tiretí ankan má banté umpo séin

* 7:15: Mat 13:54; Ruk 2:47 * 7:16: Yon 12:49; 14:10 * 7:18: Yon 8:50 * 7:19: Apo 7:53; Rom 2:21-24

* 7:20: Yon 8:48; 10:20 * 7:22: Esé 17:9-13; Riv 12:3 * 7:23: Yon 5:8-10, 16 * 7:27: Yon 7:41; 9:29 * 7:28:

Mat 11:27; Yon 8:55 * 7:30: Yon 7:44 * 7:34: Yon 8:21; 13:36

ma sisintá erikheruna Sifóe vaípa evaráné oronté uno. ³⁴ *Orivékun mae siretí ankan te nan dosin nompo ída sonan nono. Inká téi ma o vanuna varufá ída kanaíe orin nono.”

³⁵ Maa síkan Yutan kayoi ánon banta kéká ano vetiyan ten oreraemí, “Béi inte-fasá orivintirá tetí ída ven onanté tifékun ná tiyan ná tino. Ena anan bantai varafá ma manáa setinti kéká ma o vaípasá béi o van ná monó baya siaminton ná tiyan nafino. ³⁶ Téin nan tiretí ankan dosin nompo ída kanaíeya sonan nono sen ma inká tiretí ída kanaíeya se ma o vanuna varurá erin nono ma sikhein mai veni ana intesá ukhen nafino.

Aunan Ma Vain Non Ma Yisasi Ano Iyáantein Baya Ino

³⁷ *Mai ma átaru en monó ten oriyaréin mo akheníen kípan kákan damú Yisasi orun mantaven avádóden oovararen temí, “Non nan ma aiiyain kayo áesin ná téi varunafasá eriven nano. ³⁸ *Sentá ma mumunan inain mano se varunafá eriven ná mai non nano. Mai fara vara seyo, Tiyarafenui vompon dóki ano máa sikhen mino. ‘Béin aú pinté ayun ma fara van non kayo oriyan banten mino.’ ³⁹ *Maí damú Yisasi ída fúaren kákan bí man-tan inká ída Kantá Aunan eran ukhan mi mai ma ventá mumunan inain kayo ano ma ínaimpá Kantá Aunan baran nain nan mi siyaren mino. ⁴⁰ *Maa síkan mai vava iniren manáa nanin banta ano semí, “Pura siren ma sakhanampa vanta uron mino.” ⁴¹ *Maa síkan manáa nanin banta ano semí, “Tiyarafenu ano ma aní ukhein banta ino.” Síkan inká ena kéká ano semí, “Inté uáken ná Tiyarafenu ano ma aní ukhein banta ano Kariri fáké erinten nafino.” ⁴² *Para vara seyo, Tiyarafenui vompompin máa sikharen mino. ‘Tiyarafenu ano ma aní ukhein banta ano Kin Devitini anan pintéi véi ma fefá bá ein baru Betariamúí afoká inten mino.’ ⁴³ Maa siyáken banasi ano Yisasi nan kokhon ineine uren kampintan daimen oreraen mino. ⁴⁴ Máan tiyáken manáa ano véin

bákudé pákano van en mifo ída mana ano ven au aruven mino.

Yutan Kayoi Ánon Banta Kéká Ma Ída Mumunan Ein Baya Ino

⁴⁵ Ída fákari iyaimpin monó dafurá ma yafisin banta kéká ano ovaránen monó ánon banta kéká bá Farasisi kayo vá baípa eríkan betin inaemí, “Tiretí ankan pará béin ída fákare aviré ere rafono.

⁴⁶ *Maa síkan monó dafurá ma yafisin banta kéká ano evaránen temí, “Ma vanta ano ma vava siyainíen pefá mana vanta ano ída sikharen mino.”

⁴⁷ Maa síkan Farasisi kéká ano vetin nan tiren intemí, “Tiretí ankan mái véi mákáden aviren oriyanten mino. ⁴⁸ *Tetí monó ánon banta kayo vá Farasisi kéká bá pinté béintá mumunan iyá tife rafuno.

⁴⁹ Ída ifo man baya ma ída afová ukhein nanin banta anon béintá mumunan iyain Tiyarafenui aran daná ano vetin má ban mino.” ⁵⁰ *Betí ankan pinté Nikodimasi ano Yisinin pe o ontaren betin inaemí, ⁵¹ “Tetinti man baya ano vanta fasavi avían kópin kaonó tikhen nafi áa veni vava ana nare inian puntádeya vá onó tikhen nafino.”

⁵² *Maa síkan betí ankan evaránen béin tiamemí, “Ein má dere Kariri fáke vanta fono. Tiyarafenui vompon dókifin kama e yankádeya vá afová ono. Ída mana sakhanampa vanta Karirifá afoká uaren eré iyan mino.”

Pefá ma vá ein Kiriki vayai vompompin 7:53–8:11 ída varen mino.

⁵³ Mai vava ma kípiyain má minó ano meren be amápá oreraen mino.

8

Mana Nanin Mano Ena Vanta Vá Noré Íkan Oman Páman Nein Baya Ino

¹ Orera uvíkan Yisasi Orifí Anufá óden mino. ² Ódikharen pe ákura suron béi evaránen kákan monó dafufin oríkan banasi e átaru uvin béi kumanten monó baya siamen mino. ³ Tiamiyákan mana vanta aná ano ena vanta kéká bá moré

* **7:37:** Riv 23:36; Ais 55:1; Yon 4:14 * **7:38:** Ais 58:11 * **7:39:** Yon 16:7; 20:22; Apo 2:4 * **7:40:** Diu 18:18; Yon 6:14 * **7:41:** Yon 1:46 * **7:42:** Íbo 89:3-4; Mai 5:2 * **7:46:** Mak 1:22 * **7:48:** Yon 12:42 * **7:50:** Yon 3:1-2 * **7:52:** Yon 7:41-42

íkan man baya ma afová ukhein banta kayo vá Farasisi kéká bá ano mai nanin aviren banasi avorá me khaúden ⁴ Yisasin tiamemí, “Aru soe, ma nanin mano ena vanta vá noré íkan minó ano onten mifo ⁵ *Mosesini man baya ano ma setin tisimikhein mai onámaná kayo fosá anka-man purono sikhen mifo éi inte esá teyá iniya fono.”

⁶ Betí ankan ma máa sein mai véi mana vaya sintí iniré mai vayará ben avían kópín kaono van ben máka sin maen Yisasi un baren mátimen ayampóké kayóká bompon uvaren mino. ⁷ *Uvariýákan betí ankan kokhon dádá inaiyan baimpin Yisasi orun mantaven betin tiamemí, “Tiretí ankan aúbaná pinté mana ume ma ída van nain banta ano nare vá onámaná ankamono.” ⁸ Máa siren evaránen mátimen kayóká bompon uvaren mino.

⁹ Uvariýákan mai kayo ano mai vaya iniren maen anon banta ráké nare arái uren oriyán minó orian kípavin Yisasi veyáká para kumantan mai nanin mano ana ve vaintá mantakharen mino. ¹⁰ Mantakhan Yisasi orun mantaven mai nanin tiamemí, “Anasi oe, mai ma éin kó tiantiyá ein kéká intefasá oren ná ída mana ano éin uman amiyan nafino.”

¹¹ *Máa síkan mai nanin mano semí, “Kákan banta oe, mana ano ída van mino.”

Síkan Yisasi semí, “Téin má dere éin ída kó tiantanté umpo orive ída vá evaráne umeí ono.”

Yisasi Ma Varará Ma Vain Nanin Bantai Oon Mino

¹² *Máa siren Yisasi evaránen banasi siamemí, “Téi ma varái oon mumpo séin tínain ma vákurin nain banta ano ída kípan aunan mamaren títípaín ída nonten mino.”

¹³ Máa síkan Farasisi kayo ano mai vaya iníden Yisasin evaránen tiamemí, “Éi ei yoran avúava san manan tiyan nan mi vanasi ano eni vayará ída mumunan iyan mino.”

¹⁴ *Máa síkan Yisasi evaránen betí ankan tiamemí, “Mai fura ino. Téi sesi sivútivá baya anan tiyá umpo mai vayará minó

ano vá mumunan ino. Mai fara vara seyo, séi inte fákesá erikherá inká intefasá oronte rafu mai séi afová ukhé umpo siretí ankan ída uron mi mayin afová ukha rono. ¹⁵ *Máan tukheyai ma vara ráke avúavá pói séin daimiya ompo séi ída mai avúavápó mana vanta yaimiyá uno. ¹⁶ *Máan tiyá umpo yaimono séi baré banasii avúavá puntádeí yaimon nunaren mino. Para vara seyo, seyaká ana ída vá umpo mai ma sen tisintá erikheruna Sifóen mái súpá ukhé uno. ¹⁷ *Erasanti man baya ano máa sikhen mino. Kankanan bantai vaya ano ma manaí intiya mai furan tinten mino. ¹⁸ *Máan tukhein nan mi séi seyantá tesi yoran avúavá baya siyákun mi inká ten ma sisintá erikheruna Sifóe ano yere senti yoran avúavá baya anan tiyan mino.”

¹⁹ Máa síkan betí ankan inaemí, “Intesiná e afóe va vae.”

Síkan Yisasi evaránen betin tiamemí, “Téin ma afová ukhanteya mai Sifóen má deren afová inompo séin ma ída afová ukhanteya mai Sifóen má deren ída afová inono.” ²⁰ *Kákan monó dafufin ma moní kaiyaintái Yisasi váken mi mai monó baya siyan mifo mana ano ída véin páken mino. Mai fara va ino. Beni yamú ída erikhan mino.

Ída Ma Ará Baeran Kayo Ano Ma Vetí Umefin Purin Nain Baya Ino

²¹ *Máa siren Yisasi evaránen ena vaya semí, “Téi orivékuya siretí ankan ten nan dosivaeya siretí umefin purin nono. Mai ma séi oronunafá tiretí ankan ída kanaíeya orin nono.”

²² Máa síkan Yutan kayo ano mai vaya iniren betiyan ten oreraemí, “Téi ma oronuna varufá tiretí ankan ída kanaíe orin nono ma siyain mai veyantasá beyan aruan purono vará tino.”

²³ *Máa sen orera iyákan Yisasi semí, “Tiretí bara ráke ompo séi yante uno. Tireti ma vara finte ompo séi ída ma vara finté uno. ²⁴ Máan tukháí siretí umefin purin nona van mi siamiyá uno. Para

* 8:5: Riv 20:10; Diu 22:22-24 * 8:7: Diu 17:7 * 8:11: Yon 5:14 * 8:12: Ais 49:6; Yon 1:4-9; 9:5; 12:46

* 8:14: Yon 5:31-32; 7:28 * 8:15: Yon 12:47 * 8:16: Yon 5:30; 8:29 * 8:17: Diu 19:15 * 8:18: 1Yn 5:9

* 8:20: Yon 7:30 * 8:21: Yon 7:34; 13:33 * 8:23: Yon 3:31

vara seyo, séi iyé bará teyan nan tiretin tiamiya rafu mairá ma ída mumunan inte ya mai siretí ume avúavápin puraseya furin nono.”

²⁵ Maa síkan betí ankan béin inaemi, “Mai éi iye fono.” Síkan Yisasi evaránen temí, “Mai ma séi nan iyé ba fono ma siyaona mai vayan o siamé eriyá bá uno. ²⁶ Tiamiyá umpo siretí avúavá ma yaimin baya kayo kokhon mi sempin ban mifo mai ifá iyá uno. Téin ma sisintá erikheruna vantaí avúavá puntákái véin pintena ma inireruna mai vayan kayo varará nanin banta siamiyá uno.”

²⁷ Be Afóen nan mi Yisasi siyákan betí ankan amino ukharen mino. ²⁸ *Amino ukheimpin Yisasi semí, “Banta Anin ma yaa unkamádantá ma yaní inona yamúi séi iyé bará téi uno siya rafu mai afová inono. Tesi sinunurá ída mana yanasí iyá umpo se Sifóe ma sisimein danasí iyá uno. ²⁹ Téin ma sisintá erikheruna ano sen má báken téin ída ifái teyaká bá uno. Para vara seyo, séi ma ena ena yamú bariyaruna mai anon béin amusin amiyan mino.”

³⁰ Maa siyákan mai vayan iniren kokhon nanin banta ano ventá mumunan en mino.

Abaraamun Akhafanaí Ma In Baya Ino

³¹ Béintá ma mumunan ein Yutan kéká maa sen tiamemí, “Tenti vayan ma ákona uan pákana ano fura uron teya senti eyo iyamponí inono. ³² Maa ma uveyan pura sikhein baya afová esin mi ma ma fura sikhein baya ano siretí ankan kampun bayai karavusi fintena utúantanten mino.”

³³ *Maa síkan betí ankan evaránen béin tiamemí, “Tetí Abaraamun anavasin mi váké pefá arái in táké eriyá ída mana vantaí miyan ída van doran bantaí ukhé tifé umpo éi fará pura sikhein baya ano kampun bayai karavusi fintena setin utúantanten mino siya fono.”

³⁴ *Maa síkan Yisasi evaránen temí, “Téi fura siré tiretí ankan tiamiyá uno. Umeí ma iyain kéká ano mai umei miyan ída van doran bantaí ukhen mino. ³⁵ Miyan i

van doran banta aví ída ven antumpin ban mifo ve anin aví ve antumpin para van oriyan bá éiyan mino. ³⁶ Maa tukhein mi ve Anin mano ma siretin nan mai utúanté uno ma sintiya mai siretí ankan pura uron tire kusen ban nono. ³⁷ Tiretí ankan Abaraamun anavasin mi vaná téi afová ukhé umpo siretí ankampin ída senti vayan vákayai séin tiruan purono van iya rono. ³⁸ Téi se Sifóen má ma váké ontaréeruna yaná maa tiretin tiamiyá umpo siretí ankan afóen pintena ma vareona afova ánain maa dakhafiya ono.”

³⁹ *Maa síkan Yutan kayo ano evaránen béin tiamemí, “Abaraamu setin tifóe ino.”

Síkan Yisasi evaránen temí, “Tiretí ankan pura se Abaraamun akhafana ma varé inte mae mai véi ma variyá ein avúavái varan nono. ⁴⁰ Maa tukhein nan mi Tiyarafenu ano ma fura vayan sisimein ma siretin tiamiyaruna van mi séin tirono van iya ompo Abaraamu ída maa tin nain ten mino. ⁴¹ *Maa tiyákeyan tiretí afóeyani avúavái variya ono.”

Síkan betí ankan béin tiamemí, “Tetí ankan ída aasá iyampon bá uno. Tiyarafenu veyáká anan tetin Tifóe uron ban mino.”

Ban Anon Akhafanaí Ma In Baya Ino

⁴² Maa síkan Yisasi vetí ankan tiamemí, “Tiyarafenu ma siretin Afóe ma varéintiya mai séin tivábá inonaren mino. Para vara seyo, Tiyarafenu vaipákéi séi eréi mará e vá uno. Téi ída sesi sinunurá erikhé umpo Tiyarafenu anon tisintá erikhé uno.

⁴³ Maa tukhé umpo senti vayan ma ída iniyaona mai anon tiretí ankan ída kama e afová iya ono. ⁴⁴ *Tiretí ankan Ban Anon akhafanan bákeyai siretí afóeni anunu ánain mi vákuriya ompo esé aráintá béi vanta aruan purin bantan báken béi ída fura sikhein avúavá ánain bákuriyan mino. Mai fara va ino. Pura sikhein avúavá ída vempin ban mifo kampun bantan báken kampun baya afóe uron mino. ⁴⁵ Maa tukhein nan mi séi fura sikhein bayan tiyamiyákeyan tiretí ankan ída mumunan iya ono. ⁴⁶ *Tiretí ankan onesí ma séi ma umei iyákuya mai senti namu yaná

* 8:28: Yon 3:14 * 8:33: Mat 3:9 * 8:34: Rom 6:16, 20 * 8:39: Mat 3:9 * 8:41: Ais 63:16 * 8:44: 1Yn 3:8 * 8:46: 2Ko 5:21; 1Pi 2:22

maman dákó inompo séi ma fura sikhein baya ma siyákuya mai fará ída mumunan iya rafono. ⁴⁷ *Tiyarafenu akhafana ano minó beni veya kamaen iniyan mifo siretí ankan ída ven akhafanan bákeyai veni veya ída iniya ono.”

Yisasi Ma Veyan Pákena Ma Sikhein Baya Ino

⁴⁸ *Máa síkan Yutan kayo ano evaránen bein tiamemí, “Éin nan ma Sameriá bantan ban nan en aúpin namu aunan ban mino ma siyáé tiferuna mai furá tiyá tifé rafuno.”

⁴⁹ Máa síkan Yisasi evaránen betí ankan tiamemí, “Téimpin ída mana namu aunan ban mifo séi se Sifóen avíi yaní iyákuyan tiretí ankan ten tiví bararasí iya ono. ⁵⁰ Téi se sivisa yaní ono van iya rauno. Ída ino. Tiyarafenu anon ten tiví daní iyáken béi anan daimin banta van mino.

⁵¹ *Máan tukhein nan mi fura siré tiretí ankan tiamiyá uno. Tenti veya ánain ma yakhafin nain nanin banta ano ída uron mi furinten mino.”

⁵² Máa síkan Yutan kayo ano semí, “Éimpin namu aunan mi varé iká taréan afová é tiféuno. Abaraamun má sakhanampa vanta kayo vá púkein mi vákayan éi siyákeyan tenti veya ánain ma yakhafinona vanta ano ída uron mi furin nono siya ono. ⁵³ Éi iye unó tiya fono. Erasan tiyavéno Abaraamu má sakhanampa vanta kayo vá ma fúkein mai kéká esantakheyá tiya fono.”

⁵⁴ Máa síkan Yisasi evaránen temí, “Téi ma se sivi daní ékun maen mai sen tiví paen danasíi inten mifo siretí ankan ma seya setisi Tiyarafenu ino ma siyaona anon ten tiví daní iyan mino. ⁵⁵ Máan tiyan mifo siretí ankan béin ída afová ukha ompo séi anan afová ukhé uno. Béin ída afová ukhé uno ma senté mai siretin an dé kákan kampun mi senté paséi séi ven afová ukhéi veni veya ánain bákuriyá uno. ⁵⁶ Bakuriyá umpo siretin afóe Abaraamu maen tenti yamú onano van amusin iyan ineine iyaren ódaren amusin en mino.”

⁵⁷ Máa síkan Yutan kayo ano semí, “Éi ída fifti (50) oranaí ukha ompo éi Abaraamun ontare vae.”

⁵⁸ *Máa síkan Yisasi evaránen temí, “Téi fura siré tiretí ankan tiamiyá uno. Abaraamu ída afoká ukhá téi fefái varé uno.” ⁵⁹ Máa siyain má betí ankan onámaná kayo máden ankamono van íkan Yisasi aupáké kákan monó namun me ampiren oren mino.

9

Inamumpá Auu Yufúkukhá Ein Banta Ma Yisasi Ayofein Baya Ino

¹ Be anóen amúpimpá auu yufúkukhan kain baré ein banta Yisasi oriyaren onen mino. ² *Oniyákan bei eyo iyampon kayo ano véin inaemí, “Aru soe, ma vanta ma inamumpá auu yufúkukhein ma kaein mai veni ume ano fi áa ve anóe afóeni ume ano fino.”

³ *Máa síkan Yisasi evaránen tiamemí, “Mai vanta vá be anóe afóen má ída umeíen mifo Tiyarafenui ákona afoká intin onano van mi véin auu yufúkukhein inamumpá kaen mino. ⁴ Taréa ma kakhakhein tasá mai ma séin tisintá erikherunai yorarísá ó tifano. Para vara seyo, yunintin maen ída mana vanta ano yoranten mino. ⁵ *Téi ma ma varará ma varúna mai séi ma vara kakhaantan oon muno.”

⁶ *Máa siren Yisasi varará akhare siren mai vara fákaren áposí uren mai vanta auufen dampaanten mino. ⁷ Dampaantáden mai vanta siamemí, “Oreya vá Siroamú non masípin ná mo non perano. (Siroamu e ma sikhein mai siantan oren nen tikhen mino.) Máa siren tiantan mai auu yufúkukhein banta ano mo non péden erin auu kama íkan kasaen minó daná onen mino.

⁸ Oniyákan béini ádé ma varé ein kéká bá inká béi ma fefá banasi vaípa moní inantiyan ma ontaré ein kayo vá ano vetiyan inaen oreraen temí, “Ma fefá ma kumanten banasi vaípa moní inantiyaré ein banta fino.” ⁹ Máa siyákan manáa ano sen “mai vanta ino” síkan inká ena kéká

* 8:47: 1Yn 4:6 * 8:48: Mak 3:21-22 * 8:51: Yon 5:24 * 8:58: Yon 1:1 * 9:2: Isi 18:20; Ruk 13:2, 4
* 9:3: Yon 11:4 * 9:5: Mat 5:14; Yon 8:12 * 9:6: Mak 8:23

ano semí, “Ída ino. Ena véiren banta ino” sin iyaimpin mai vanta ano semí, “Téi mai vanta uno.”

¹⁰ Maa síkan betí ankan béin inaemí, “Intesá uren nan ná auu kamaen nafino.”

¹¹ Maa síkan béi evaránen temí, “Yisasin ne ma siyain banta anon ápó pákaren tuufen damparen tisinten, ‘Siroamú non masípin mo non pereya ápó tesé ono’ síkái mo fédékun mi sen tuu kama íkái minó daná oniyá uno.”

¹² Maa síkan betí ankan béin inaemí, “Mai vanta intefasá ban nafino.

Síkan “téi ída afová ukhé uno,” sen mino.

Yisasi Ma Ayofiyain Avúava San Ma Farasisi Kayo Ano Vetí Aúban Kokhon Baya Sein Baya Ino

¹³ Maa siyaimpin mai kéká ano mai ma auu yufúkukharé ein banta yo aviren Farasisi kayo vaintá oren mino. ¹⁴ Sabati yamúi Yisasi mai vanta auu kama uanten mino. ¹⁵ Moran Farasisi kayo vá dere ano mai vanta auu ma kama ein nan ina íkan betin tiamemí, “Béin ten tuufen ápó damparái noppin mo sesé uré kamaé oné uno.”

¹⁶ Maa síkan manáa Farasisi kayo ano semí, “Tetí ankan afová ukhé uno. Tiyarafenu ano ma vanta ída siantan erakhen mino. Para vara seyo, véi Sabati yamú durafuren doriyan mino.” Síkan manáa ano semí, “Intesá urená ume vanta ano máan ten ná enará ukhein danasinta aní intéi vae.” Siren beraran aúban daimen mino.

¹⁷ *Máan tiyáken mai ma auu yufúkukhá ein banta vetí ankan mano evaránen inaemí, “Mai ma éin ma auu kama uantein banta van iye inó teyá éi iniya fono.”

Síkan mai vanta ano evaránen betin tiamemí, “Mai véi mana sakhanampa vanta inon té téi iniya uno.”

¹⁸ Maa síkan Yutan kayoi ánon banta kéká ano mai ma fefá auu yufúkukharéin ma saréa auu kama ukhein banta van ída mumunan iyáken mai vanta anóe afóen aren mino. ¹⁹ Arákan mikanan erin maen betí ankan maa sen inaemí, “Ma siré kanan anin nafino. Auu yufúkukhein ná inamumpá kaeona fino. Mai máan ma ukhantin intesá urená béi saréa auu kamaen oniyán nafino.”

²⁰ Maa síkan be anóe afóe ano evaránen betin tiamemí, “Ma verasan tanin inamumpá auu yufúkukhá kaerunan bá afová ukhé uno. ²¹ Máan tukhen mifo intesá uren ná auu kamain ná iye anó auu avové uanten nafi mai verasan ída afová ukhé uno. Béi anon mifo inaesin ná beyantá tinti vá inero.” ²² Para va vékan maa sen naino. Pefá Yutan kayoi ánon banta kéká ano siyáken Yisasin nan ma Tiyarafenu ano aní ukhein banta ino ma sin nain nanin banta monó átaru namun pintena yo siantanté uno sikhán mai van mi féden maa sen mino. ²³ Mai ana vami ve anóe afóe ano siyáken, “Béi anoní ukhein mifo véintá ina ono,” sen mino.

²⁴ Maa siyaimpin mai ma auu yufúkukhá ein banta evaránen araren tiamemí, “Tiyarafenu avíká pura vá teno. Para vara seyo, Yisasi ume vantán báká teti afová ukhé uno.” ²⁵ Maa síkan mai vanta ano evaránen betin tiamemí, “Béi ume vanta fi áa ída fi mai séi ída afová ukhé umpo fefá ma séin tuu yufúkukharen ma saréa kama ukhein mai anan afová ukhé uno.”

²⁶ Maa síkan betí ankan evaránen béin inaemí, “Béi ano éin náisá en nafino. Intesá urená éin auu kama uanten nafino.”

²⁷ Maa síkan béi evaránen betí ankan tiamemí, “Téi inka siretí ankan tiamikhé umpo fará tiretí ída inintoyá kokhon dáda inaiyá ba rafono. Tiretí ankan masá beni eyo iyamponí onova rafono.”

²⁸ Maa síkan mai Farasisi kayo ano véin asen temí, “Éi veni eyo iyampon mompo setí ankan Mosesini eyo iyampon kayo uno. ²⁹ Tetí ankan afová ukhékun Tiyarafenu anon Mosesin baya siamiyaren mifo mai vanta inte fákesá erikhen nafi mai setí ankan ída afová ukhé uno.”

³⁰ Maa síkan mai ma auu yufúkukhá ein banta ano evaránen betin tiamemí, “Mai ma séin tuu kama usintá ma suu mare-runa vanta van tiretí ankan ena vayan teya setí béin ída afová ukhé uno inte fákesá béi erikhen nafino siya ono. ³¹ *Tetí ankan minó ano afová ukhé tifeuno. Ume nanin bantai vaya Tiyarafenu ano ída iné iyan mifo mana vanta ano ma véin avaya iníden ma veni anunu yakhafen ma véinta ana ma monó tin nain bantai vayan ineno van ukhen mino. ³² Pefá arái in

* 9:17: Yon 4:19 * 9:31: Íbo 34:15

táké ma eren tare ma varunará ída mana inamumpá ma auu yufúkukhan kaein mai mana vanta ano evaránen auu kama uanten ne síká inikhé uno. ³³ Tiyarafenu ano ma ída mai vanta siantantin ma erikhanten maen béi ída kanaíen mana yanasi inten mino.”

³⁴ *Máa síkan betí ankan evaránen béin tiamemí, “Ei ume vái inamumpáké afoká ukha ompo éi fará tetí ankan afova simeno van iya fono.” Siren monó átaru namun pintena véin do yarifaan barufá karúdan araven mino.

Monó Avúavápin Ma Farasisi Vanta Kayo Ano Kufa Ukhein Baya Ino

³⁵ Mai vanta ma yarifaan karúdein baya Yisasi inireñ béin nan dosiren máa sen tiamemí, “Ei Vanta Anintá mumunan iya fo áa ída fino.”

³⁶ Máa síkan mai vanta ano evaránen temí, “Kákan banta oe, Vanta Anin iye fino. Mai éi sisimirá bentá mumunan ono.”

³⁷ Máa síkan Yisasi evaránen béin tiamemí, “Ma ma saréa éin má baya siyain mai vantan bákaya éi inka oniya ono.”

³⁸ Máa síkan mai vanta ano semí, “Bafan noe, séi entá mumunan iyá uno,” siren aron kan durafúden mátimen Yisasintá monó ten mino.

³⁹ Máan tiyákan Yisasi semí, “Téi vanta anasii avúavá daimono van mi ma varará erakheruna auu ma yufúkukhein kéká ano auu marantin auu ma kama ukhein nanin banta kayo auu yufúkinten mino.”

⁴⁰ *Máa síkan manáa Farasisi kéká mairá baren mai veya iniren béin inaemí, “Tetí ankan masá tuu yufúkukhayá éi siya vae.”

⁴¹ Máa síkan Yisasi evaránen betin tiamemí, “Auu ma fura sen dufúkukhantin mi siretí ankani ume ída vanten mifo sireti ma seya suu fara vá oniyá uno ma sinteya mai siretíi ume fara vanten mino.

10

Kamaen Ma Sipipirá Dafisin Banta Vá Bei Sipisipi Kayo Vái Vaya Ino

¹ Yisasi máa siren temí, “Téi fura siré tiretí ankan tiamiyá uno. Mana vanta ano ma sipisipii yafu ona ráké ma ída ódinton ma savi finté dafurá káusiven ma ódin nain mai umoyan bantan báken mi

enina yaná barano van ódinten mino. ² Ódinten mifo ona ráké ma ódin nain banta mai vei sipisipirá ma yafisin banta ino. ³ Máan tukhantin mi onará ma yafisin banta ano ma sipisipirá dafisin banta ma ona yiantá dantin minó sipisipi ano véin amen avaya afová ukantin mana mana sipisipi aví ararú intin ekhuven eranten mino. ⁴ Dorun ma iyuvintin maen béi an oriyantin minó sipisipi ano vein amen avaya afová ukhen á nain dakhafen orinten mino. ⁵ Orinten mifo ena vanta ano ma arantin maen mai vanta amen avaya ída afová ukhen pasen sipisipi kayo ano meren karan orera inten mino.”

⁶ Yisasi mai veya sian baéan betí ankan amiyan mifo veti ída véi ma siyain baya ana afová en mino. ⁷ Máan tiyaimpin Yisasi evaránen betí ankan tiamemí, “Téi fura siré tiretí ankan tiamiyá uno. Téi sipisipi kayoi yafu ona uno. ⁸ *Esé ma erein banta kayo maen mai ena ina yaná umoyan in banta kékái erikan mi mai sipisipi kayo ano vetii veya ída inen mino. ⁹ Máan tukháí séi ona umpo mana vanta ano ma sempin ma eriaren umperan nain bantan Tiyarafenu ano evaránen avidantin kasaen ódiven eraven iyáken kama yunan nanten mino. ¹⁰ Umoyan banta ma erein maen mai vetin aruré asuse iyáké umoyan barano van mi eren mifo séi ma erikheruna mai veti ankan aunan barantin betimpin bíkano van mi eré uno. ¹¹ *Téi sipisipirá kamaen dafisin banta uno. Kama yafisin banta anon bei sipisipi vare siren bei aunan ampiadé iyan mino. ¹² *Máan tiyan mifo mana vanta ano ma ída sipisipi afóe ma váken maen béi ída kamaen dafisin moníká ana ma yoriyaren onantin ma afá iyan erintin maen béi sipisipi kayo me karúden karan orivintin afá iyan mano sipisipi kayo vákúden arintin karan oreraen asuse inten mino. ¹³ Para vara seyo, mai vanta ano miyan baran máarái yoriyaren pasen sipisipirá ída yafisin meren karan orinten mino.

¹⁴ Téi sipisipirá kama yafisiríin bantan báké minó tesi sipisipi kayo afová

* 9:34: Íbo 51:5 * 9:40: Mat 15:14 * 10:8: Yer 23:1-2; Isi 34:2-3 * 10:11: Íbo 23:1; Rev 7:17 * 10:12: Apo 20:29

ukhékun betí ankan má téin afová ukhen mino. ¹⁵ *Tifóe ano ma séin afová íká ma séi ano véin afová ukheruna van mi mai sipisipi kayo aya ono van te saunan ampiádiyá uno. ¹⁶ *Tenti sipisipi kayo vá ano ena yafufin bain mai kayo vá o avían mana yafufin kaurékun ten timen avaya afová uven mana kékasí uvintin mana yafisin manan banten mino. ¹⁷ *Téi ma se saunan ampiádaré ma evaráné baranuna mai van mi se Sifóe ano se nan anunu iyan mino. ¹⁸ Ída mana vanta ano kanaíen tenti saunan do varanten mifo séi sesi sinunu fintéi se saunan ampenté umpo sempin ákona vantí saunan ma ampíré maé evaráné barantékun mi mai ákona Sifóe ano séin timikhén mino.

¹⁹ Yisasi ma mai vaya kayo siyain má Yutan kayo ano iniren beraran aúban daimen mino. ²⁰ Daimen orera iyáken kokhon banta ano semi, “Béimpin namu aunan mi vákan béi óen iyan mifo siretí ankan pará á kasédeyá beni vaya iniya rafono.” ²¹ Maa síkan ena kéká ano semí, “Ma ída namu aunan ma vain bantai vaya ifo kanaisá en ná namu aunan mano auu ma yufúkukháin nain evaránen kama uantanten nafino.”

Yisasi Ma Veyan Nan Tiyarafenu Anin Muno Ma Sein Baya Ino

²² Maí damú iyonin aúbaná bákan kákan monó tin damú* Yerusaremí afoká en mino. ²³ Maañ tukhan maí damú Yisasi maen monó dafufin Soromonini Yuséka noren mino. ²⁴ Noré íkan Yuta kayoi ánon banta kéká ano véin maman aúban den iyen eúkuven inaemí, “Éi iye uron ná baná tetí ankan éi nan amino iyá tife rafono. Tiyarafenu ano ma aní ukharé ein banta ma vanteya setin kamaeya sisimeno.”

²⁵ Maa síkan Yisasi evaránen betí ankan tiamemí, “Téi fefái siretin tiamikhé umpo siretí ída mumunan iya ono. Minó doran ma Sifóen avíká ma yoriyaruna mai anon tiretin aní iyan mifo ²⁶ siretí ankan ída senti sipisipi kéká pinte nan bákeya ída mumunan iya ono. ²⁷ Maañ tiya ompo senti sipisipi kayo ano sen timen avaya

afová ukhá téi vetí ankan afová ukhékun mi sen tínain dakhafé iyan mino. ²⁸ *Téi ena ena ma ayun para van oriyan ban aunan amirékun ída afeyoran para vantin maen mana vanta ano ída kanaíen tiyan pintena vetin do varanten mino. ²⁹ Mai fara vara seyo, se Sifóe anon mai kéká téin timikhan béimpin kákan ákona vákan minó esantakhein mana vanta ano ída kanaíen ben ayan pintena yo varanten mino. ³⁰ Para vara seyo, Tifóe rasan manan bá uno.”

³¹ Maa síkan Yutan kayoi ánon banta kayo ano véin aruan purono van evaránen onámaná kayo varen mino. ³² Maañ tiyaimpin Yisasi vetí ankan tiamemí, “Tifóe vaípáken nan kákan aní daná kayo siretin aní iyá umpo mai kayo fintena inte yaná ma variyarúna vará tiretí ankan onámaná tinkamono van iya rafono.”

³³ *Maa síkan Yutan kayo ano evaránen béin tiamemí, “Tetí ankan eni kama yoran nara iniré éin onámaná ankamono van iya rauno. Ída ino. Éi varará banta ano ma Tiyarafenui varu variyaona ano véin oyampá bayan tiyan ná mai van mi éin onámaná ankamono van iyá tiféuno.”

³⁴ Maa síkan Yisasi evaránen betí ankan tiamemí, “Tiretí ankani man bayafin Tiyarafenu ano vetin nan ayarafenu kayo an mi yakhaonó tikhen nafino. *Íbo 82:6*

³⁵ Pefá ma Tiyarafenu ano ma vanta kayo van ma ayarafenu ino ma sikharé intin barará banta kayo ano Tiyarafenui vompon dóki fintena vaya ída kanaíen durafurinten mino. ³⁶ Maañ tukhen mifo Tifóe ano séin iyátintáden mi ma varará tisinta erakhé uno. Erakhéi séi ma Tiyarafenu Anin muno ma siyákuya fará tiretí ankan teyá éi Tiyarafenui varú barano vará iya vae siya rafono. ³⁷ Téi ma Sifóeni yorari ma ída iyákuya mai siretí ankan ída vá tenti vayará mumunan ono. ³⁸ *Téi veni yorarii iyá umpo siretí ankan ma ída senti vayará mumunan inte ya mai séi ma minó doran ma yoriyaruna rasá mumunan ono. Maañ ma inteyan tiretí ankan kanaíeya

* **10:15:** Mat 11:27; 1Yn 3:16 * **10:16:** Ais 56:8; Isi 34:23 * **10:17:** Fir 2:8-9 * **10:22:** Mai monó tin damú maen oon ururen amusin in damusan mi Iburu vayafinté Anuka e siyan mino. * **10:28:** Yon 3:16; 6:39
* **10:33:** Riv 24:16 * **10:38:** Yon 14:10-11

afová inono. Tifóe sempin bá téi Sifóempin bá uno.”

³⁹ Maa síkan betí ankan béin enadá pákano van íkan béi vetin me ampiren oren mino. ⁴⁰ *Máan tikan Yisasi evaránen Yodení non ekháden Yoni ma fefá banasi monó non péantiyaré ein baru ádé o varen mino. ⁴¹ O vakan kokhon nanin banta ano véi vaintá eriven temí, “Pura ino Yoni vei vava ákona ino van ída mana avúavá anien mifo minó baya ma ma vanta van tiyaré ein mai furan tiyaren mino.” ⁴² Maa siren mai varu ráké kokhon nanin banta ano véinta mumunan en mino.

11

Rasarusini Furin Baya Ino

¹ *Mana Rasarusin ne sin banta vá be ayofi kanan Maria nú Mata nú bá Betaní barurá baréin Rasarusin aí en mino.

² *Mai ma inaimpáké ma kama auna iyain uverifó ma Yisasin arantantá banaren ma ve ánon do fóké ma yo arumin nain nanin mi Maria varéin be aváe Rasarusin aí iyan baren mino. ³ Baré íkan mikan anananosan mano Yisasi vaípa baya yan oríkan temí, “Bafan noe, mai ma éi moéke anunu iyaona vanta aí iyan ban mino.”

⁴ *Mai vava ma Yisasi iniyáken béi semí, “Mai aí ma vain mai fura sen purin aisa van naino. Tiya rafenu ano vei ákona vanasi aní intin mai finté uaren be anin mano kákan bí barano van mi mai aí pákakhen mino.” ⁵ Yisasi ano Rasarusin má be ayofi kanan Matan nú Marian nú ba san mi moéken anunu ukharen mino. ⁶ Máan tukharé íkan béi ma Rasarusini aí baya ma iniren maen mai ma véi varé ein barurá kan damú bá evaránen baren mino. ⁷ Baré íkan kan damú orivin bei eyo iyampon kayo siamemí, “Erí Yutan barafá evarané oró tifano.”

⁸ Maa síkan bei eyo iyampon kayo ano véin tiamemí, “Aru soe, sare uron mi Yutan kayo ano éin onámaná ankamono van ein mifo mai varufasá éi evaráne orono van iya fono.”

⁹ Maa síkan Yisasi evaránen betí ankan tiamemí, “Tiyán mikan mifo sirantan kan orun kádan (12) auará ídá kakhaken báe iyan nafino. Mana vanta ano ma kará ma

nóken ída eyúpóen ankaminten mino. Mai fara va ino, ma varai kakhán oniyán pasen mino. ¹⁰ Máan tiyaren ma yúdufumpin orinten maen béi eyúpóen ankaminten mino. Mai fara vara seyo, véin ma kakhántan oon ída van mino.” ¹¹ Maa siren Yisasi vetí ankan tiamemí, “Tetisi sirona Rasarusi maen aun mi vakhein mai finte mo avoranté uno.”

¹² Maa síkan bei eyo iyampon kayo ano mai vava iniren béin evaránen tiamemí, “Bafan noe, véi ma auun bakhá inten evaránen e mantanten mino.” ¹³ Rasarusini furí pákena van mi Yisasi siyákan bei eyo iyampon kayo ano yo inian aun mi vakhan man tino sen mino.

¹⁴ Máan tiyaimpin betí ankan pámanen tiamemí, “Rasarusi fúkái ¹⁵ shiretí ankan mumunan ono van mi iniré béin má mairá ída o varé unpo erí béin o onatifano.”

¹⁶ *Maa síkan Tomasi nan ma Didimasin ne siyain mano ena eyo iyampon kayo siamemí, “Erí tetí ankan má oré béin má manafin o furó tifano.”

Yisasi Ma Rasarusin Ayofi Kanan Ará Kusiantan Baya Ma Sein Baya Ino

¹⁷ Yisasi ma Betaní barurá oriven iníkan maen Rasarusin nan pe fúbin masí uran kamí kamí damú orikhen ne sen tiamen mino. ¹⁸ Betaní baru ráké ma Yerusaremí barurá ma oriyain mai kankanan maerin bakan ¹⁹ Yutan kayo ano Mata nú Maria nú ayofi ma fúkan bain nan ará kusiantano van e varen mino. ²⁰ Mata iníkan maen Yisasi nan eriyán ne síkan béin o onanono van oren mifo Maria maen ifá en mápin baren mino. ²¹ Mata ma Yisasin o oniyáken temí, “Bafan noe, éi mará baréesin te siyofi ída furin nainten mino. ²² Máan tukhen mifo saréa yere ma éi mana yana san Tiya rafenu vaípa ma inantesin maen éin amintéi téi afová ukhé uno.”

²³ Maa síkan Yisasi véin tiamemí, “E ayofi evaránen e mantanten mino.”

²⁴ *Maa síkan Mata véin evaránen tiamemí, “Inaimpá ma ma vara kípan nain damú ma minó nanin banta ano ma e mantiyantin maen béi e mantantéi mai séi afová ukhé uno.”

* **10:40:** Yon 1:28 * **11:1:** Ruk 10:38-39 * **11:2:** Yon 12:3 * **11:4:** Yon 9:3 * **11:16:** Mak 14:31 * **11:24:** Yon 6:40

²⁵ Maa síkan Yisasi véin tiamemí, “Evaránen ma e mantan má aunan ma varan má téi umpo sentá ma mumunan uven púkaréin nain mano mai finté evaránen aunan baranten mino. ²⁶ Baranten mifo iye anó para váken téintá mumunan inten nafi mai ano ída uron mi furinte mino. Mairá éi mumunan iya fonó.”

²⁷ *Maa síkan Mata evaránen béin tiamemí, “Eyo Bafan noe, éi Tiyarafenu Anin báke mai ma ma varafin erinten ne ma sen béi aní ukhá ein bantan baná téi mumunan iyá uno.” ²⁸ Mata ma maa siren maen evaránen oren be aunana Marian mo araan aúpa kaúden tiamemí, “Arú ano e váken éin nan ina iyan mino.” ²⁹ Maa sein baya ma Maria inen maen ainen e manten Yisasi vaípa oren mino. ³⁰ Yisasi ída mai varufin ódikhen mai ma Mata má o fóken baya seintá para varen mino. ³¹ Maria ma ainen e manten barufá aravíkan mai ma véin ará kusiantano van mápin baré ein Yutan kayo ano ma onen maen masíkái mo arunaná barano van mi oriyan mino siren betí ankan béin bákuren oren mino.

³² Oríkan Maria ma Yisasin o oniyáken béin arantampin o mátimen temí, “Bafan noe, éi mará bano se varé esin te siyofi ída furin nainten mino.”

³³ Maa siren Maria ifí dákan mai ma véin má orikhá ein Yutan kayo ano yere ifí diyaimpin Yisasi onan béin aúpin ákuna ano víken mino. ³⁴ Maa tiyáken béi inaemí, “Intefasá béin masí uren nan ban nafino.”

Síkan “Bafan noe, erive onano,” sen béin tiamen mino.

³⁵ Maa síkan Yisasi ifí den mino.

³⁶ Ifí dan maen Yutan kayo ano semí, “Onano. Aúkákéi véin nan anunu ukhen mino.”

³⁷ *Maa siyákan manáa ano semí, “Béi auu yufúkukhá ein kayo kama uantan oniyain mifo ma vanta ma ayaintin ída furoren mino.”

Rasarusi Fúkáin Ma Yisasi Ano Orun Avían Mantein Baya Ino

³⁸ Yisasin arápin evaránen arunaná édaviyaimpin masíkái oren mino. Mai masí maen ompin boraádan baré íkan maifin

masí uren oyirá onámaná iyádan baren mino. ³⁹ Baré íkan Yisasi semí, “Masí oyi ráke onámaná do varano,” síkan maen mai ma fúkein banta ayofi Mata semí, “Bafan noe, kamí kamí damú orikhein aunka inten mino.”

⁴⁰ Maa síkan Yisasi semí, “Téi ídá éin tiamerá mumunan ma inteya Tiyarafenu kakhán ákuna onan nono sikha rafuno.

⁴¹ Maa síkan betí ankan masí oyi ráke onámaná do mádan maen Yisasi inarufá kakháben máa semí, “Tifóe oe, éi ma senti simúkin iniyaona van mi susu sé uno. ⁴² Éi ena ena yamú tenti simúkin iniyaonan báí afová ukhé umpo ma ma iyukhein nanin banta ano éin nan mi séin tiantan erikhen mino sen afová iyáken mumunan ino van mi siyá uno.”

⁴³ Maa siren Yisasi avádóden oovararen temí, “Rasarusi oe, e khuve erano.”

⁴⁴ Maa sen Rasarusin ariyain má davaráe fóké minó bukhafa úkukhein mano e khuáden barufá erákan Yisasi mai nanin banta siamemí, “Davaráe yo utúantá desin orino.”

Yisasin Arin Aa Van Ma Yosein Baya Ino (Matiu 26:1-5; Maki 14:1-2; Ruku 22:1-2)

⁴⁵ *Maa tikan ódaren mai ma Maria má o van arunaná bariyá ein Yutan kayo ano Yisasintá mumunan en oreraen mino.

⁴⁶ *Mumunan iyákan mai finté manáa ano oren mai ma Yisasi varein avúava san mo Farasisi kéká tiamen mino.

⁴⁷ Tiamíkan monó ánon banta kéká bá Farasisi kayo vá ano Kanisori kéká aran e átaru uvin betin inaemí, “Ma ma enará ukhein aní danasinta ma uvaren dararen iyain banta amaniná naisá otifante rafuno. ⁴⁸ Tetí ankan ma véin á ékun mai avúavasí ma iyantin minó nanin banta ano véintá mumunan intin maen Romui kamanin mano eriven tetinti kákan monó namun má bara vá máden namu uren asuse inten mino.”

⁴⁹ Maa síkan mai aúbanté Kaiafasin ne sin banta mai oranafin monó ánon banta kékái ánon bantai ukharen e manten temí, “Mai ma siyaona vaya siretí ankan ídá afová ukha ono. ⁵⁰ Ída afová ukha ompo minó nanin banta ano o afeyoran nafo mana vanta ano ma vetin nan o furintin mai anan kama inten mino.”

⁵¹ Mai veya ma Kaiafasi sein mai ída vei ineine finté ten mifo mai oranafin monó ánon banta kékái ánon bantaí véi ukhen banasi aya ono van ma Yisasi furin nain nan mi sakhanampa vayan Yutan barafin ma vain nanin banta kayofin tiáden mino. ⁵² *Mai varafin ma vain nanin banta máa vara siáden naino. Mai ma minó barafá ma Tiyarafenu akhafana ma vain o avían átaru urantín mana kékasí ma inain mai va san mi siáden mino.

⁵³ *Máan tukhan béin ma arintin purin nain aa van maí damúké araién dosen mino. ⁵⁴ Dosiyákan mai van Yutan kayo avorá non nan Yisasi me ifá en Ifraimí baru ádé kámá barafá bei eyo iyampon kayo vá o varen mino.

⁵⁵ O vákan Tiyarafenu ano ma Isareri kéká Avo Uantein Damú ádé iyákan minó pimpáké banasi ano Tiyarafenu avorá avusese ono van Yerusaremí barurá ana óden mino. ⁵⁶ Un báken betí ankan Yiasin nan dosian more mere uvaen monó barurá o átaru uven beraran in-aemí, “Tiretí ankan náie té iniya rafono. Béi ma omápin erinten nafino.” ⁵⁷ Máa siren dosiyan maen monó anon banta kéká bá Farasisi kayo vá ano vanasi siamemí, “Yisasi ma onan nona ano vá me sisimirá o fáká tifano.”

12

Kama Auna Iyain Uveri Ma Yiasin Arantantá Banaein Baya Ino

¹ *Avo Uantan Damú ma afokáin nain mai yan manápá ifo afápá mana un kádan damú ana ukhan mai ma fúkaréin masí pinte avoran e mantein banta Rasarusini varurá Betaní Yisasi o unen mino. ² *Onóbin Yiasin nan amusín uren ma samádan dunan Mata kuviyákan mai ma Yisasi má ma yunan nan takhó ma mamáden kumanen eúkukhein kayo aúbaná Rasarusin má dere kumantaren mino. ³ *Kumantan Maria ano mana kama aunka iyain uveri anan aúbanáké ukhein baren me Yiasin arantantá banaren tesé uantáden be ánon do fóké

arumiyákan mai namumpin kama aunka ano víken mino.

⁴ Máan tiyaiimpin mai ma ínaimpáké Yiasin avían namuro ayampin amin nain banta Yudas Iskariotin* ne sin mano mai van ída amusín iyáken temí, ⁵ “Kákan moníká bain uveri anan mifo ídá áenasá baré mo sarí uresá mai monípó ona ma i vain kéká ame runo.” ⁶ Béi ma máa sein mai ona i van nanin banta aya onovara sen naino. Béi umoyan bantan báken moní unantá dafisiyan maifinte variyain bákan mi máa sen mino.

⁷ Máa síkan Yisasi evaránen béin tiamemí, “Ma nanin áesin máan tino. Téi ma masípin oronuna maí damúken pétintiyán mino. ⁸ *Ona ma i van nanin banta anon tiretín má ena ena vantí van nompo séi ída siretín má ena ena vanté uno.”

Rasarusin Ma Aruan Puroño Van Ein Baya Ino

⁹ Yutan nanin banta ano iníkan ma Yiasin nan Betaní barurá e van ne sin maen béin má inká mai ma fúkáin ma avían mantakhein banta Rasarusin má onano van oren mino. ¹⁰ Máan tiyákan monó ánon banta kayo ano Rasarusin dere aruan puroño van en mino. ¹¹ *Mai fara va ino. Yisasi ano ma Rasarusin orun avían mantakhein nan Yutan kayo ano monó ánon banta kéká me ampiriyan Yiasintá mo mumunan iyan mino.

Yisasi Ma Kin An Daven Yerusaremí Ódein Baya Ino

(*Matiu 21:1-11; Maki 11:1-11; Ruku 19:28-40*)

¹² Ená damú Yiasin nan Yerusaremí ereno van ayanafá eriyán ne sin baya ano mai ma Avo Uantan Damú monó teno van Yerusaremí barurá o iyiyá ein nanin bantafin orera íkan inen mino. ¹³ *Iniren minó nanin banta ano kefo anaí uaren béin aayana fáke o avirano van oriyan oovararen temí,

“Béin avisá daní ino!”

Bafan avíká ma eriyain banta vá avábá uantano! *Íbo 118:25-26*
Isarerii kin avisá daní ono!”

* **11:52:** Yon 10:16 * **11:53:** Yon 5:18 * **12:1:** Yon 11:1, 43 * **12:2:** Ruk 10:40 * **12:3:** Ruk 7:37-38
* **12:4:** Yudas Iskarioti e ma siyain mai Iskariotí baru ráke vantán ban mino. * **12:8:** Diu 15:11 * **12:11:** Yon 11:45 * **12:13:** Yon 1:49 * **12:13:** Iburu veya finte ‘Osana’ ma sikhein mai ‘avisá daní ino.’

14 Tiya rafenui vompon dóki ano ma sikhare einien mana ano ída ané kumantaré ein donkin arará Yisasi yosiren mai amaniná kumamen eren mino:

15 “Saioní nanin banta oe, onano mana ano ída ané kumantaré ein donkin arará amaniná tiretíi kin mano kumamen eriyay mifo ída vá akhokho van ono.” *Sek 9:9*

16 *Beni eyo iyampon kayo ano amino ukharen mifo Tiya rafenu ano ma Yisasin purin pinte orun avían mantaren kákan bí amiran maen ínaimpákéi vetí ankan afová iyáken bompon dóki ano Yisasin nan mi sikharen mino sen mai avúavá ma afoká ein nan ovaren me inen mino.

17 Máan tiyákan Rasarusi fúbin masí ukháin ma Yisasi ano aran e manten eran ma ontaré ein nanin banta ano ena nanin banta mo siamin mai vava ano oreraen mino. 18 Mai ma enará ukhein daná ma aní ein baya ma inikhá ein nanin banta anon béin aayana fáke o avirano van oren mino. 19 Máan tiyaiimpin Farasisi kayo ano veraran ten oreraemí, “Onano minó nanin banta ano ma véin bákuren oriyain mano setisi aái ída iyan mino.”

Yisasi Ma Vei Furin Baya Sian Amá Ein Baya Ino

20 Avo Uantan Damú ma vanasi ano Yerusaremí monó teno van ódiyan maen Kiriki kayo vá maifin o varen mino. 21 O varen mai kéká ano oren Karirí akhempá ma vain baru Betsaidáke vanta Firipi vaintá oriven inaemí, “Kákan banta oe, Yisasin onátifano van muno.” 22 Máa síkan Firipi ano Enduru mo siamíden míkanan mano Yisasin mo siamen mino.

23 *Tiamíkan Yisasi evaránen békanan tiamemí, “Banta Anin ma kákan bí baran nain maí damú inka afoká en mino. 24 *Téi fura siré tiretí ankan tiamiyá uno. Mana uviti ayun ma varafin ída aravinten maen ída e ampaminten mifo varafin ma orun peran nain manon e ampamaren kokhon aran imádanten mino. 25 *Máan tukhen mifo mana vanta ano ma vei aunan pákaan ákona iyáintin maen mai o afeyoranten mifo mana vanta ano ma ma

varará bei aunan ma ampiyáintin maen beni aunan pákarantin ayun para van oriyay banten mino. 26 Mana ano ma senti yorarí ono van téin tínain ná bákurino. Para vara seyo, senti yoran banta ano se ma vanunarái vanten mino. Te Sifóe ano mai ma senti yorarí iyáin nain bantan kákan bí aminten mino.”

Inaru Fáké Mana Oova Ano Ma Yisasin Aví Daní Ein Baya Ino

27 *Máa siren Yisasi semí, “Taréa sen tirá ano uman diyá umpo náiesá ten nuno. Tifóe oe, ma uman pinte siya onó tente rafuno. Ída ifo mai ma eriyain uman barano van mi erikharé uno. 28 Tifóe oe, e avisá maman kákaní ono” siyain má inaru fáké mana vava eriyáken temí, “Te siví inka maman kákaní uráké evaráne maman kákaní onté uno.” 29 Máa síkan mairá ma iyukhá ein nanin banta ano siyáken aafan kankaré tiyan mino síkan manáa ano enisori anon béin má baya siyan mantino sen mino.

30 Máa síkan Yisasi semí, “Mai ma ineona vava mai séin tiyain baya vaino. Ída ino. Tiretin ma ayain baya ino. 31 Barará nanin bantai avúavá ma yaimin damú inka afoká ein ma varará ma yafiká ein ánon banta* Tiya rafenu ano vákúdantin orinten mino. 32 *Máan tinten mifo ma vara ráke ma séin maman daní urantí maé minó nanin banta o aviádékun téi varunará erinten mino.” 33 *Yisasi ma mai vava sein mai veyan ma furin nain avúavá páken nan tiamen mino.

34 *Tiamíkan banasi ano semí, “Man bayafin inétifékun Tiya rafenu ano ma aní ukhein banta ano fara van oriyay banten ne sikhén mifo inté uáké Banta Anin man daní inte ne siya fono. Banta Anin mai iyé ban nafino.”

35 *Máa síkan Yisasi vetí ankan tiamemí, “Tiretí ankan ma kakhaantan oon mano sító máarái vantin dunin mano siretin maman barará danten mifo vá tiretimpin ma oon báken kakhaan tiyaintasá nono. Títípa fin ma oriyain banta ano mai ma véi

* 12:16: Yon 2:22 * 12:23: Yon 13:31-32; 17:1 * 12:24: 1Ko 15:36 * 12:25: Mat 16:25 * 12:27: Íbo 6:3; 42:5; Mat 26:38 * 12:31: Barará ma yafiká ein ánon banta mai Ban Anon mino. * 12:32: Yon 3:14 * 12:33: Yon 19:6 * 12:34: Íbo 110:4; Ais 9:7; Dan 7:14 * 12:35: Yon 8:12 * 12:36: Efe 5:8

oriyaípa ída afová ukhen mino. ³⁶ *Mai oon ma siretin má bain nan ma ákona mumunan inte mae mai oon akhafanaíi inono.” Yisasi ma mai vaya kayo vanasi siamáiden maen me onen aúpa oren mino.

Yutan Kayo Ma Yisasintá Ída Mumunan In Avúavú Ma Ákona En Pákakhein Baya Ino

³⁷ Yisasi ma enará ukhein danasinta ma vanasi avorá aníyan maen betí ankan ída véintá mumunan iyaren mino. ³⁸ Máan ma ein manon sakhanampa vanta Aisaiya ma siádan baré ein bayan mo kanaíen mino:

“Bafan noe, iye anó tetinti vayará mumunan iyan ná

inká intéa kékápin ná Bafan mano vei ayain ákona aní inten nafino.” *Ais*

53:1

³⁹ Para va vanasi ano ída mumunan en naino. Aisaiya ma ena vomppopin máa sikhein anará ino:

⁴⁰ “Tiyarafenu ano vetí ankan auu yufúkuádaren

aráká iyádan

mai van ída kanaíen oniyáken

aúkáké inen

ará baerái ída ayofé uno.” *Ais 6:10*

⁴¹ *Para va máa sikhannaino. Aisaiya ano Yisasini kakhan ákona ódaren mai van mi siádan baren mino. ⁴² *Máan tiyákan maí damú ana kokhon Yutan kayoi ánon banta kéká ano Yisasintá mumunan ukharen mifo Farasisi kayo ano monó átaru namun pinte yo siantan nain nan mi féden betí mumunan ída sian páman en mino.

⁴³ *Para va ino, Tiyarafenu ano ma vetin aví daní in nan ída fura anunu ukharen mifo vanasi ano ma vetin aví daní in nan mi moéken anunu ukharen mino.

Yisasintá Ma Mumunan Iyain Kéká Ano Mai Ve Afóentái Mumunan Iyan Mino

⁴⁴ Máan tiyákan Yisasi avádóden oovararen temí, “Mana vanta ano ma sentá mumunan iyain maí séintá ana va mumunan iyan naino. Mai ma séin tisintá erikheruna mai Tiyarafenu dereren mumunan iyan mino. ⁴⁵ *Máan tiyáken ma séin tonanten maen mai ma

séin tisintá erikheruna Tiyarafenu vái oniyannaino. ⁴⁶ Téintá ma mumunan in nain nanin banta ano ída yúdufumpin bano van mi séi ma varará oon an davé erikhé uno. ⁴⁷ *Mana vanta ano ma senti vaya iniren ída kamaen dafisin nain nan ída véin daimonté uno. Para vara seyo, vanasi yaimon novara erikhe rauno. Ída ino. Betin aya uré evarané avirano van mi erikhé uno. ⁴⁸ Erikhé umpo senti vaya ma iniren átakharé iyain kéká ma yaimin nain banta mai van mino. Mai ma vetin tiamiyaruna vaya anon ma vara ma akhení inain damú betin uman aminten mino. ⁴⁹ Para vara seyo, ída sesi ineine finté tiamiyá umpo se Sifóe ano ma sisintáden ma máan ná teno ma sen tisimikharé ein bayan tiamiyá uno. ⁵⁰ Téi afová ukhékun mi véi ma sisimikhein baya ano ayun para van oriyan ban aai aní ukhen mino. Máan tukháí mai vaya vá teno ma siren Tifóe ano ma sisimikhá ein bayan tiamiyá uno.”

13

Yisasi Ma Vei Eyo Iyampon Kayo Arantan Tesé Uantein Baya Ino

¹ Tiyarafenu ano ma Isareri nanin banta Avo Uantan Damú adé iyákan Yisasi veyan ma ma vara me ampiren ma ve Afóe vaípa orin nain damu inká afoká en mino sen béi afová en mino. Bei vanasi ma ma varará bain nan anunun iyaren mi véi ma furin nain manon mai anunu maman dákó inten mino. ² *Inúpáké betí ankan kumanten dunan niyákan mai ma Yisasin avían namuro ayampin kaintin ma arin nain banta Saimonin anin Yudas Iskaríotin aúpin Ban Ano mano fében ineine amen mino. ³ *Yisasi afová ukhan be Afóe ano minó daná ben ayampin mana amikhan béi Tiyarafenu vaípáké erikhein mai véi evaránen Tiyarafenu vaípa orinten pasen ⁴ dunan nan takhókáké orun mantaaren bei ayá au anamun do yavaman kaúden tauri maman avisafin damen

* **12:41:** Ais 6:1 * **12:42:** Yon 9:22 * **12:43:** Yon 5:44 * **12:45:** Yon 14:9 * **12:47:** Yon 3:17 * **13:2:** Ruk 22:3; Yon 13:27 * **13:3:** Yon 3:35; 16:28

mino. ⁵ Damuren mana yókifin non ba-
naan kaúden bei eyo iyampon kayo aran-
tan tesé uriyan mai ma avisafin damukhá
ein taurifó arúantádú en mino.

⁶ Máan ten oriyaren Pita vaintá oríkan
béi semí, “Bafan noe, pará éi sen tirantan
tesé into fono.”

⁷ Maa síkan Yisasi evaránen béin
tiamemí, “Taréa ma séi variyaruna yaná
éi ída afová ukha ompo ínaimpái afová
inono.”

⁸ Maa síkan Pita véin tiamemí, “Téin
tirantan ída vá tesé ono,” síkan Yisasi
evaránen béin tiamemí, “Éin arantan ma
ída sesé ékuya mae éi ída kanaíeya senti
eyo iyampon ban nono.”

⁹ Maa síkan Pita evaránen temí, “Máan
ma inte mae ída vá tirantan máa ana sesé
iyáke siyan má tínon má dere vá tesé ono.”

¹⁰ *Maa síkan Yisasi véin tiamemí, “Non
ma fékein banta ano avusese ukhen mai
van ída enádá non peré iyan mifo arantan
máan tesé é iyan mino. Tiretí ankan inka
avusese ukha ompo ída minó ano avusese
ukha ono.” ¹¹ Para va máa sen naino.
Namuro ayampin ma véin avían kain nain
banta Yisasi fé afová ukhen mai van mi
minó ano ída avusese ukha ono sen mino.

¹² Yisasi vetí ankan arantan ma sesé
uan kiparen bei ayá au anamun maman
uren takhoká kumamen máa sen betin
inaemí, “Ma ma séi vareruna yanái ana
siretí ankan afová ukhe fono. ¹³ Tiretí
ankan ma Aru soe Bafan noe ma se séin
tariyaona mai furan tiya ono. Para vara
seyo, séi siretí ankani Arú bá Bafan mái
vá uno. ¹⁴ *Téi Bafan má Arú bá ma
váké arantan tesé uanterunái e vá ena
nanin banta vasá arantan teséin maran
ono. ¹⁵ *Téi ma avúavái siretí ankan aní
é umpo ma ma sirétintá ma aníeruna mai
avúavá ana vá dakhafono. ¹⁶ *Téi fura
siré tiretí ankan tiamiyá uno. Doran banta
ano ída vei ayafa esantakhan inká baya
ma varen orin banta ano ven ma siantein
banta ída esantakhen mino. ¹⁷ Ma ma séi
ma siameruna vayai ana inka siretí ankan
afová e ompo mai vaya ánain ná kama e
vákuriya sin ná maen mi avábá banti van
nono.

*Yisasi Ma Yudasi Nan Éi Anon Namuro
Ayampin Tivían Kain Nono Sen Tian Amá
Ein Baya Ino*

(*Matiu 26:20-25; Maki 14:17-21; Ruku
22:21-23*)

¹⁸ “Téi ma avían tesinaí ukheruna mai
minó kayo vara siya rauno. Tiyarafenui
vompon dókifin ma máa sikhá ein mai fura
sen afoká inten mino. ‘Téin má ma mana
yókifin dunan niyain banta anon ten tínon
dasamono van arantan daní iyan mino.’

Íbo 41:9

¹⁹ * “Mai yaná ída afoká ukhái saréa
siretí ankan tiamiyaruna ínaimpá ma
afoká intiya séin nan mai ma Tiyarafenu
ano ma aní ukhá ein banta ino seya
afová ure mumunan inono. ²⁰ *Téi fura
siré tiretí ankan tiamiyá uno. Tenti
vaya ma varen orin nain banta ma kama
inteya mai sen má deren kama inono.
Téin ma kama inteya mai sen ma sisintá
erikheruna Sifóen má deren kama inono.”

²¹ Maa sirákan Yisinin ará ano uman
deimpin mairá béi semí, “Téi fura siré
tiretí ankan tiamiyá uno. Tiretí ankan
pinté mana ano sentin namuro ayampin
tivían kain nono.”

²² Maa síkan bei eyo iyampon kayo ano
iye nará tiyan nafi siren beraran onan
maran uren amino en mino. ²³ Amino
en orera iyákan mana Yisasi ma anunu
ukhein mai eyo iyampon mano veni áde
kumantaren mino.* ²⁴ Kumantaré íkan
Pita ano ánon póké tiamemí, “Iye anó
máan tinté iná tiyan nafi mai véin ina ure
ineno.”

²⁵ Maa síkan mai eyo iyampon mano
Yisinin áde e afánen o súpá uven inaemí,
“Bafan noe, éi iyen nará tiya fono.”

²⁶ Maa sen ina íkan Yisasi evaránen
tiamemí, “Dunan anufin ma vereti yaré
orun maman amenuna mai vanta ino,”
siyáken bereti máden dunan anu yókifin
daaren Saimonin anin Yudas Iskariotin
amen mino. ²⁷ *Amikan Yudasi ma mai
vereti naran maen Ban Anon mano véin
aúpin un periyain má Yisasi véin tiamemí,
“Éi ma varano van ineine iyaona yaná

* **13:10:** Yon 6:64, 70-71; 15:3 * **13:14:** Mat 20:28; Ruk 22:27 * **13:15:** Fir 2:5; Kor 3:13; 1Pi 2:21 * **13:16:**
Mat 10:24 * **13:19:** Yon 14:29; 16:4 * **13:20:** Mat 10:40 * **13:23:** Yisasi ma anunu ukhein eyo iyampon
mai Yoni ino. * **13:27:** Yon 13:2

aine varano.” ²⁸ Yisasi ma mai vaya Yudasin tiamiyákan mai yunan nan takhó akhempá ma kumanen eúkukharé ein kéká ano mai vaya ana ída afová en mino. ²⁹ Yudasi vetí ankani moníká dafisin banta bákán manáa ano ma inein mano véin nan mai ma Avo Uantan Damú ma nan nain dunan ná baranten nafi áa ona ma ída van kayo amino vará Yisasi véin tiamiyán nafi sen beti inikharen mino. ³⁰ Maa siyain má Yudasí ma mai vaya iniren ainen e manten dunteimpin barufá araven mino.

Yisasi Ma Vei Eyo Iyampon Kayo Auyen Man Baya Siamein Mino

³¹ *Yudasí ma e manten barufá aravuin maen Yisasi semí, “Taréa Vanta Anin mano kákan bí barantin maen Tiyarafenu ano Vanta Anintá kákan bí baranten mino. ³² *Máan ten ma Tiyarafenu ano kákan bí ma mamaren maen Banta Anin ainen kákan bí aminten mino. ³³ *Tikhafana oe, séi sító máarái siretin má baréeku mae sireti sen nan dosin nompo Yutan kayo ma siameruna mai vaya anan tiretí ankan tiamiyá uno. Téi ma oronuna varufá tiretí ankan ída kanaíeya orin nono.

³⁴ *Máan tukhein nan mi saréa auyen man bayan tiretin amiyá uno. Téi ma siretin nan ma sinunu iyarunaí ana eya vá ena van anunu ono. ³⁵ Ben nan anunuin maran ma esin ma minó nanin banta ano afová uren maen mi siretí ankan nan tenti eyo iyampon kayo ino sinten mino.”

Yisasi Ma Pita Nan Téin Oyan Timin Nono Sein Baya Ino

(*Matiu 26:31-35; Maki 14:27-31; Ruku 22:31-34*)

³⁶ Maa síkan Saimon Pita ano Yisasin inaemí, “Bafan noe, éi intefasá orinte vae.”

Síkan Yisasi evaránen béin tiamemí, “Téi ma oriyaruna varufá éi saréa ída kanaíeya sivákurin nompo ínaimpákéi orin nono.”

³⁷ Maa síkan Pita evaránen béin inaemí, “Bafan noe, séi en nan purono van mi útakhé umpo náisá ukhantirá taréa séi ída éin avákurontéku vae.”

³⁸ Maa síkan Yisasi evaránen temí, “Éi kanaisáeyá téin nan purinté tiya vae.

* **13:31:** Yon 12:23 * **13:32:** Yon 17:5 * **13:33:** Yon 7:33-34 * **13:34:** Yon 15:12, 17; 1Yn 3:23; 2Yn 5

* **14:3:** Yon 12:26 * **14:6:** Yon 11:25; Rom 5:1-2 * **14:7:** Yon 8:19 * **14:9:** Yon 12:45; Kor 1:15; Ibu 1:3

* **14:10:** Yon 12:49

Téi fura siré éin tiamiyá uno. Inuran kúkarópasí iyantin ma kokore ída asíkantiya éi kanú manaú dádá téin nan ída afová ukhé uno sin nono.”

14

Yisasi Ma Vei Eyo Iyampon Kayo Ará Kusiantan Baya Sein Mino

¹ “Tiretí ankan ída vá kokhon ineine ureya ará uman diya vá bano. Tiyarafenurá ma mumunan ukhan te vá mai sentá bá dere vá mumunan ono. ² Tifóen amápin kokhon karafaran bákái siretí ankani varu mo funtáantano van mi séi oronté umpo ída máan tukharé intí téi ma vaya siretin tiamen nunaren mino. ³ *Téi ma siretí ankani varu ma mo funtáadaré maé ovaráné eré tiretin e avirékuya sen má oreya séi ma varuna varurá tireti má o van nono. ⁴ O van nompo séi ma orono van iyaruna mai varufá ma orikhein mai aa inka sireti afová ukha ono.”

Yisasi Maen Be Afóe Vaipá Ma Orikhein Aa Ino

⁵ Maa síkan Tomasi véin inaemí, “Bafan noe, setí ankan ída afová ukhé umpo éi intefasá oriya vae. Intesá urerá tetí ankan mai aa afová onte rafuno.”

⁶ *Maa síkan Yisasi evaránen béin tiamemí, “Téi anan aa váké pura vayai ana váké inká ayun ma fara van oriyan ban aunan mi vá uno. Mana vanta ano ída kanaíeya ena aa sáké oriareya Sifóe vaipá orin nompo séin pinté uaren anan orin nono. ⁷ *Tiretí ankan ma séin pura se afová ukharé inteja mai Sifóen má kanaíeya afová inonaren mino. Taréan arái eya Sifóen afová e véin one ono.”

⁸ Maa síkan Firipi semí, “Bafan noe, e Afóen aní esí ma onékun mai anan kanaí inten mino.”

⁹ *Maa síkan Yisasi véin tiamemí, “Firipi oe, ayá damúi séi siretí ankan má bákeya ompo éi ídá téin afová ukhe fono. Banasi ano ma séin toniyain mai Sifóen mi oniyán mifo éi fará e Afóen aní ono siya fono.

¹⁰ *Téi Sifóempin bákun inká Tifóe ano séimpin ban ukhen mifo éi ídá mumunan

iya fono. Tesi ineine fintesa séi siretí ankan baya siamiya rauno. Ída ino. Sifóe ma sempin bain manon téin pinté uaren mi vei yorari é iyan mino. ¹¹ *Tifóe ma sempin bá ma séi véimpin ma varuna mairasá mumunan inompo ída ma mumunan inte ya mai ma minó doran ma séi variyáku oniyaona mairasá mumunan ono.

¹² *“Téi fura siré tiretí ankan tiamiyá uno. Téintá ma mumunan inain mano sen ma yoriyáeruna yoran manáa esantaren doranten mino. Para vara seyo, séi se Sifóe vaipái oronté uno. ¹³ *Tiretí ankan ma minó dana san ma sen tiviká inantesí maé mai yanasí kasaé uantanté uno. Para vara seyo, ve Anin mano ma mai yorari inaintá be Afóe ano kákan bí baranten mino. ¹⁴ Tiretí ankan ma minó dana san ma sen tiviká ma inaesí téi mai yanasí kasaé uantanté uno.

Yisasi Ma Kantá Aunan Tiantantin Eran Nain Nan Ma Iyáantein Baya Ino

¹⁵ *“Tiretí ankan ma sen nan anunu inte ya vá minó tenti vava ánaín ná kamaeya vákurono. ¹⁶ *Bákuriya sirá Tifóen tékun ná ena siretin Ayain amintin ná mai ano siretí ankan má ena ena van oriyan bano. ¹⁷ *Mai Ayain maen pura vava ana ma sin Aunan mino. Barará nanin banta ano ída kanaíen béin baren onen afová en inten mino. Mai fara vara seyo, siretí ankan má béi vákaya ven afová ukheona siretimpin mi vanten mino. ¹⁸ Téi ída me ifáékuya aso iyampon an dan nompo siretí ankan baonafá téi erenté uno. ¹⁹ Titó anantá barará nanin banta ano séin ída enadá tonanten mifo siretí ankan manan ten tonan nono. Téi saunan para vantí bákeya siretí ankan má aunan para vantiya van nono. ²⁰ *Téin ma furin pinte ma sivorantí e mantékuya maí damúi afová inono. Téi Sifóempin bákuya siretí ankan tempin baná téi siretimpin bá uno. ²¹ Tenti man baya ma mana ano ma iniren kamaen mai ánaín dakhafin nain mai ano sen nan mi anunu iyan mino. Mana ano ma sen nan anunu intin te Sifóe ano venan

anunu intí ten má dere véi nan tinunu uré teyan aní onté uno.”

²² Maa síkan Yudasí ano Yisasín máa sen inaemí, “Bafan noe, éi intesá eyá teti ankan mana eyan aní ureyá barará nanin banta ída kanaí e aní inte fono.” (Yudas Iskarioti ena ifo ena eyo iyampon ma manaí ukhein bí dakhein manon inaen mino.)

²³ Maa síkan Yisasi evaránen béin tiamemí, “Banta ano ma séin nan anunu uren tenti vava ánaín ma kamaen dakhafintin maen Tifóe ano mai vanta van anunu inten mino. Maañ tintí berasan mai vanta vá o vá ena ena fara vá oriyá banté uno. ²⁴ *Téin nan ma ída anunu iyain banta anon tenti vava ánaín ída kamaen dakhafiyán mino. Tenti vava ma iniyaona mai séin ma sisintá erikheruna Sifóeni vava ino.

²⁵ “Téi ma saréa siretí ankan má para varunarái ma yanasinta siamiyá uno. ²⁶ Tiamiyá umpo siretí ankan ma ákonaen ayain nain mai Kantá Aunan mino. Téin tivikái Sifóe ano véin tiantantin eriven tiretin minó daná afova amiren ineine orun mantaantiyai minó baya ma séi siretí ankan tiamiyáeruna van ovare me ineine inono. ²⁷ Téi siretí ankan me afa uré orono van mi ará kusin tiretin ameruna mai anon tiretin má banten mino. Barará nanin banta ano ma amiyainí ukhein ará kusin na séi ame raumpo siretí ankan ída vá ará uman dare akhokho van ono.

²⁸ *Tiretí ankan me ampiré orikharé maé ovarané erenté uno sé pefái siamékuya inikha ompo séin nan ma fura se anunu iyanteya mai siretí amusin ná ono. Para vara seyo, mai ma séin esantakhein Tifóe vaipái oronté uno. ²⁹ *Mai yanasinta ída afoká ukháí saréa o útúbé tiamiyaruna ínaimpá ma afoká intiyan mumunan inono. ³⁰ Téi ída siretí ankan má ayáká baya senté uno. Mai fara vara seyo, ma varará ma yafikein ánon banta ano eriyán mino. Béimpin ída mana ákona vain téin ída mana avúavasí me usintanten mino. ³¹ Maañ tinten mifo Sifóe ano ma sisimein danasintan téi variyákéi se Sifóen nan ma moéké tinunu

* **14:11:** Yon 10:38 * **14:12:** Mak 16:19-20 * **14:13:** Mat 7:7; Yon 15:16 * **14:15:** Yon 15:10; 1Yn 5:3

* **14:16:** Yon 14:26; 15:26; 16:7 * **14:17:** Yon 16:13 * **14:20:** Yon 17:21-23 * **14:24:** Yon 7:16 * **14:28:**

Yon 20:17 * **14:29:** Yon 13:19

iyaruna mai varará nanin banta ano afová ino van muno. Inka ifo erí oró tifano.”

15

Yisasi Fura Sikhein Uvaini Anan Mino.

¹ “Téi fura sikhein uvaini anan* mumpo se Sifóe uvaini yunan ana afóe ino.

² *Tenti siyan kayo ano ma ída aran iré iyain mai Sifóe ano yo iyákuan karúðaren aran ma iriyain ayan kayon kamaen ayaní uran kokhon aran iré iyan mino. ³ Téi ma siamiyaruna vaya ano inka siretin áténa yuren ariké iyákurayan kama ukha ono.

⁴ Tiretí ankan tempin asotú esirá inká téi siretimpin ná asotú ono. Para vara seyo, uvaini ayan mano ma anon kaufin ma ída o auntanten maen mai ano ída kaníen aran iranten mino. Tiretí ankan ma ída sentá e asotú inteya máan mana eya ída aran iran nono.

⁵ “Téi uvaini anan mi vákuya siretí ankan uvaini ayan mompo sentá ma súpá intí ma séi ventá túpá onuna anon kokhon aran iranten mifo siretí ankan ma sen ampinteya ída kanaíen mana yanasi ino.

⁶ *Máan tinten mifo mana vanta ano ma ída sentá ma asotú ukharé intin maen daa ayan ma avaneiní uádantin asa khavintin átaru uren irafin karúðantin ken kaurinten mino. ⁷ Ken kaurinten mifo siretí ankan ma sempin asotú esin ma senti vaya ano ma siretimpin banti mae siretí ma anunu inona yaná ma inantesin mai siretin aminten mino. ⁸ *Tenti eyo iyampon kayo anon pura se kokhon aran imádesin mairái Sifóe ano kákan bí baranten mino.

⁹ “Tifóe ano ma séin nan anunu iyainíi é téi siretin nan tinunu iyá umpo ena ena vá tiretí ankan tenti sinunu aúpin ná bano. ¹⁰ *Tiretí ankan ma senti vaya ánain ma kama e yakhafinteya mai senti avábá aúpin mi van nono. Téi ma Sifóeni vaya ánain ma kamaé bakúde ma veni avábá aúpin barunaii inono. ¹¹ Para va ma vaya siretin tiamiya rauno. Tenti simusin mano siretí ankampin bantin mai amusin mano víkaaren avanino van muno. ¹² *Tenti

man baya máan mi ukhen mino. Téi ma siretí ankan nan tinunu iyarunai e vá ben nan anunuin maran ná ono. ¹³ *Mana ano ma vei arona kayo van ma anunu uaren betí ankan aya ono van ma vei aunan ma ampian kaé iyain mai avúavá anon ena van ma anunuin avúavá esantakhen mino. ¹⁴ *Téi ma siretí ankan tiamerunai ma inteya mai sen tironan ban nono. ¹⁵ Para vara seyo, yoran nanin banta ano vei ayafa vanta ano ma variyain daná ída afová ukhé iyan mino. Téi Sifóen pinta ma vareruna vaya inka siretí ankan tiamiraké mai van mi siretí ankan nan téi ída yoran nanin banta e senté umpo se sirona en tenté uno. ¹⁶ Tiretí ankan ída séin aní ure siviáden ná bá umpo sireti oreya mo yoresin ayáká ma fara van aran kokhon imáðano van mi aní uré tiretin doran amikhé uno. Máan tiyáke ma sen tiviká Tifóe vaipá inantinona yanasinta mai véi kasaen aminten mino. ¹⁷ *Ben avábá in maran ono van mi siretin tiamiyá uno.”

Barará Nanin Banta Ano Ma Eyo Iyampon Kayo Ará Namu Uantan Baya Ino

¹⁸ Maa siren Yisasi evaránen temí, “Barará nanin banta ano ma siretí ankan ma namuroí uantantiya mai van tireti ída vá amino ono. Mai fefá betí ankan téin namuroí ukhá einíi inten mino. ¹⁹ *Tiretí ankan ma ma vara ráke vanta kayo an ma yakhesin maen banasi ano setisi kéká ino siren tiretin nan anunu inten mifo siretí ankan ída ma vara ráke vantán ba ono. Téi ma siretin aní uré ma o aviádeku vaona van mi varará nanin banta ano namuroí uantanten mino. ²⁰ *Téi ma siretí ankan tiamikháeruna mai vaya vá ovare me ineno. ‘Doran banta ano vei ayafa vanta ída esantakhein mino.’ Betí ankan ma séin namu usintákaren maen máan manan en tiretin má dere namu uantanten mino. Máan tinten mifo senti vaya ánain ma yakhákaren maen mai siretíi vaya ánain deren dakhafinten mino. ²¹ Téi ma sisintá erikheruna Ti-yarafenun barará nanin banta ano ída afová ukhen mi séin nare siren tiretin

* **15:1:** Uvaini aran ma iriyain mai anan manon iré iyan mifo ída yaa ana ino. * **15:2:** Mat 3:10 * **15:6:** Mat 7:19; 13:42 * **15:8:** Mat 5:16 * **15:10:** Yon 14:15; 1Yn 2:5 * **15:12:** Yon 13:34 * **15:13:** Yon 10:11; 1Yn 3:16 * **15:14:** Mat 12:50 * **15:17:** Yon 13:34 * **15:19:** Yon 17:14 * **15:20:** Yon 13:16

namuroí uantanten mino. ²² Téi ma ída erivé baya siamékun maen betí ankan ída umei miyan baranté ein mifo saréa vetí ankani ume ma aúmanin aa ída van mino. ²³ *Téin ma namuroí iyain nanin banta ano mai Sifóen máí namuroí uantiyan mino. ²⁴ Máan tiyan mifo vetin aúbaná ma váké mana vanta ano yoká ein doran ma ída yoriyákun maen umei miyan ída vetí baranten mino. Taréa enará ukhein danasintan téi aní iyákun betí ankan oniyáken mifo se Sifóe má téi má deren para namuroí usintiyan ban mino. ²⁵ Mai avúavá ma vetí ankan bariyain manon mai ma vetí man bayafin ma máa sikhá ein mi kanaíen mino. ‘Ída ana vaintá paran namuroí usintiyan mino.’ *Ibo 35:19; 69:4*

²⁶ *Tiretí ankan ma Ákona Uantan Aunan Tifóen má bain téi siantékun tireti vaonafá erinten mino. Pura vava sin Aunan mi Sifóen má bain eriven maen tenti sivútivá bá doran má me sian amá inten mino. ²⁷ Máan tinten mifo siredí ankan masá tenti vava vá tivútivá basá tian amá ono. Mai fara vara seyo, siredí ankan manon arái in táké ten má báke minó daná afová ukha ono.”

16

¹ “Tiretí ankan ída mumunan amp-eno van téi inikhéi siredin ma vava siamiyá uno. ² *Para vara seyo, yamú eriyain monó átaru namun pinte siredin do siantiyáken Tiyarafenui kama yorari iyá uno siren tiretín aruan purinten mino. ³ *Mai fara va ino, vetí ankan Tifóen má ten má ída afová ukhen mi mai avúavá baranten mino. ⁴ Máan tintéji séi siredin má ayáká bantéi ma vava fefá ída siamikharé umpo ínaimpá ma vanta kayo ano ma mai avúavá ma siredin amaniná kaintiya ma vava ovare me ineno van mi siamiyá uno.

Yisasi Ma Kantá Aunani Yorá Pákena Van Tein Baya Ino

⁵ “Téin ma sisintá erikháeruna Sifóe vaípái saréa oronté umpo intefasá oriya fono se ída mana ano ina iyan ná uno.

⁶ Téi ma ma vava siamiyaruna anon tiretin aúpin arunaná édavuaeren ákuna víkiyan mino. ⁷ *Uman diyan mifo séi furan tiré tiretí ankan tiamiyá uno. Téi siredí ankan aya ono van mi siredin me ampiré oronté uno. Téi ma ída orékun maen mai siredí ankan ma Ákona Uantan Aunan mano ída kanaíen tiretimpin erinten mifo séi ma orontéi mai véin tiantékun tireti vaípá erinten mino. ⁸ Béi ma eriven maen barará nanin bantai ume vá Tiyarafenui funtákein avúavá bá inká banasii avúavá ma yaimin nain má man banasii ineinefin kaintin ovaren me iniren afová inten mino. ⁹ Banasi ano ma ída séintá mumunan iyain mai vetí ume véi anon maman afoká intin onanten mino. ¹⁰ Béi anon puntákein avúavá maman afoká intin onanten mino. Para vara seyo, séi se Sifóe vaípá ma orivékuya siredí ankan ída evaráne séin tonan nono. ¹¹ *Béi anon Tiyarafenu ma vanasi yaimin nain avúavá maman afoká inten mino. Para vara seyo, ma vara ma yafikein ánon banta ma yaimin inka afoká ukhen mino.

¹² *“Téi kokhon baya siredí ankan tiameno van iyá umpo siredi ída kanaíeya saréa inin nono. ¹³ Inin nompó Fura sikhein Aunan ma eriven maen tiretí ankani ineine maman puntarantiya minó baya ma fura sin afová inono. Béi ída vei ineine finté baya sinten mifo mai ma iniran nain baya máan tiamiyáken inká ínaimpá ma afoká ono van iyain danasintan tian amá inten mino. ¹⁴ Béi ma sen pinte varan nain baya ma siredin timamin nain manon tenti kakhan maman dákó inten mino. ¹⁵ Minó Tifóen nína yaná ma vain mai sen tinan báí mai van mi senti vava véi mamaren tiretin tiaminten mino siyá uno.

Eyo Iyampon Kayoi Arunaná Ano Ma Maman Amusin Amin Baya Ino

¹⁶ *Yisasi evaránen temí, “Ádé anantá téin ída sonan nompó ínaimpáké evaráne sító máarái sonan nono.”

¹⁷ Máa síkan beni eyo iyampon kayo finté manáa ano veraran ten oreraemí, “Ádé anantái séin ída sonan nompó

* 15:23: Ruk 10:16 * 15:26: Yon 14:26 * 16:2: Mat 24:9; Ruk 6:22; Yon 9:22 * 16:3: Yon 15:21 * 16:7: Yon 14:16 * 16:11: Yon 12:31 * 16:12: 1Ko 3:1-2 * 16:16: Yon 14:19

ínaimpáké evaráne sító máarái sonan nono' sen ma inká 'te Sifóe vaípa oronté uno' ma siyain mai veni ana intesá ukhen nafino." ¹⁸ Maa siren betí ankan temí, "Titó máara' se ma siyain bayai ana mai seti ída kanaí é afová iyá tiféuno."

¹⁹ Maa siren betí ankan Yisasin inaono van iyákan béi fe afová uren betin tiamemí, "Téi ma sé, 'Ádé anantá tiretí ankan ída sonan nompo ínaimpáké evaráne sító máarái séin tonañ nono' ma sikheruna vará inain maran iya rafono." ²⁰ Téi fura siré tiretí ankan tiamiyá uno. Barará nanin banta ano kákan amusin inten mifo siretí ankan kákan ifí diyákeya moéke arunaná barañ nono. Máan ma iyantin tiretí ankan ará ano uman danten mifo ínaimpáké mai ano vaéaren kama amusiníi inten mino. ²¹ Anasi ano ma iyampon kain damú ma afoká íkan kákan aí pinté ma iyampon kaúden maen mai aí dana san ída iné iyan mifo auyen iyampon ma afoká uádein nan mi amusin é iyan mino. ²² Máan mi ukhantiya saréa siretí ankan ará uman dan nompo séi evarané tiretí ankan onékun maen tiretin ará ano amusin inten mino. Mana vanta ano ída kanaíen mai amusin do varanten mino. ²³ *Maí damú tiretí ankan ída mana yana san téi vaípa inantin nono. Téi fura siré tiretí ankan tiamé umpo séin tiviká ma mana yana san ma Sifóe vaípa inantesin maen béi kasaen aminten mino. ²⁴ Pefá tiretí ankan mana yaná barano van ten tivika ída inan tikhare ompo saréa ma araíe inantire varesin maen mai amusin mano siretin aúpin kanaíen bikanten mino.

Yisasi Ma Ma Varai Ákona Esantakhein Baya Ino

²⁵ "Te Sifóeni vaya kayo ma vaédiyá tiamiyaruna yamú ma afoká intí téi ída ena vá baya vaédiyá tiamenté umpo funtádeí siamenté uno. ²⁶ Maí damú ten tivikái Sifóe vaípa amúkin nono. Tiretini oo vare Tifóe vaípa timúkono vara siya rauno. Ída ino. ²⁷ *Para vara seyo, séi nan Tiya rafenu vaípakéi erikha ono sireya siretí ankan mano séin tivábá ureya

mumunan ukhen nan mai van mi Sifóe ano veyantá tiretin nan anunu iyan mino. ²⁸ Téi se Sifóe vaípakéi ma varará erikharéi saréa ma vara me ampíré Tifóe vaípa evarané oronté uno."

²⁹ Maa síkan beni eyo iyampon kayo ano semí, "Taréa éi ída vaya vaéde siya ompo funtádeyai siya ono. ³⁰ Minó daná afová ukhen ná tetí ankan ma inikheruna mai mana vanta ano ída éin inaono van inten mino. Máan tukháí éin nan Tiya rafenu vaípakéi erikha ono siré mumunan iyá tiféuno."

³¹ Maa síkan Yisasi evaránen tiamemí, "Taréa inká mumunan iya rafono."

³² *Máan tiya ompo yamú ano eriyaren inka e afoká ukhein tiretí ankan mere asuse eya siretíi varufá orera uve seyáká anan meran nompo mai ída seyáká ana vanté uno. Mai fara vara seyo, se Sifóe ano sen má banten mino. ³³ *Tiretí ankan téin má túpá uan ákona uvesin tiretin ará ano kusino van mi séi inikhéi ma vaya siretin tiamiyá uno. Ma varará ma vasin maen minó uman mano siretimpin afoká inten mifo ará kusin masá bano. Para vara seyo, séi ma varai ákona inka esantakhé uno."

17

Yisasi Ma Veyan Nan Amúkein Baya Ino

¹ Yisasi ma mai vaya kayo siamíden maen béi inarufá kakháben máa sen amúkemí, "Tifóe oe, yamú inka afoká en mifo vá e Anin kákan bí amesin ná inká e Anin mano éin evaránen kákan bí amino." ² Mai fara vara seyo, éi anon minó nanin bantará ma yafisin ákona véin amikha ono. Mai ma véin avían amikheona nanin banta véi anon kanaíen ayun ma fara van oriyán ban aunán aminten mino. ³ *Ayun ma fara van oriyán ban aunán mai máan mi ukhen mino. Mai aunán ma varan nain kayo anon éin nan manan pura sikhein Tiya rafenun ban mino sen afová en mi inká Tiya rafenu ano ma aní ukhein banta Yisasin nan éi anon tianten nan erikhen ne sinten mino. ⁴ *Éi ma sen timeona mai yoran inka yóan kípéi varará nanin bantafin éini kákan bí bá ákona vá aní é uno. ⁵ *Tifóe oe, fefá ma ma vara ída

* **16:23:** Mat 7:7 * **16:27:** Yon 14:21, 23 * **16:32:**

Mat 26:31, 56 * **16:33:** Yon 14:27; Rom 5:1; 1Yn 5:4

* **17:3:** 1Yn 5:20 * **17:4:** Yon 4:34 * **17:5:** Yon 1:1

afoká ukhá ma kákan bí bá ma váeruna mai kákan bí taréa simiresien má bano van mi ukhé uno.

Yisasi Ma Vei Eyo Iyampon Kayo Amúkuantein Baya Ino

⁶ Barará banta kéká ma éi sen timikhá eona mai kayo éin aví inka siamikhé uno. Betí ankan eni vanta kékái varéiyai séin inka simikhe nan mi vetí ankan eni vava kamaen dakhafiyen mino. ⁷ Minó daná ma séin timikheona mai en pinté anan erikhan mi vetí inka afová en mino. ⁸ Para vara seyo, mai ma sisimeona vava máa vetin tiamékun inka afová en mino. E vaípákéi séin nan erikhen mino sen afová iyáken inká en nan mi sen tiantan erikhen mino sen mumunan iyan mino. ⁹ Barará nanin banta aya onovara séi simúkiya raumpo éi ma sen timikheona mai eni kékái vá mai kayo van mi simúkiyá uno.

¹⁰ “Tenti vanasi ma vain mai eni nan bakan inká eni vanasi ma vain mai senti nan ban mino. Máan tukharé iyan minó mai nanin banta éi ovaráne sen timen nan mai anon téin kákan bí timen mino. ¹¹ Téi ma vara me ampíré éi vaonafá orivé ída vanté umpo vetí ankan mi ma varará banten mino. Kantasí ukheona Sifóe oe, mai ma séin timikheona ákona fókesá betin dafiseno. Máan tesin ná erasan ma mana varunaí e ná betí ankan mana vá bano. ¹² *Téi ma ma kéká bá báké maé éi ma sen timikheona ákona fóké betin dafikékun bare mino. Minó ano ída afeyoranten mifo eni vompon dóki ano ma sikharé einí en mana vanta ano anan o afeyoranten mino.

¹³ “Máan tintéi séi ma vetin má para váké maé kokhon bayan tiamiyaréi saréa éi vaonafá ma oriyákun maen mi senti simusin mano vetin aúpin bíkanten mino. ¹⁴ Eni vava máa inka vetin tiamikhékun mi ma vara ráke nanin banta ano vetin namuroí uantiyan mino. Para vara seyo, sen an den betí ankan ída ma vara ráke vanta kékái van mino. ¹⁵ *Ma vara rákena vetí ankan do aviran novara inaiya raumpo vetintá dafibesin Ban Anon mano ída vetin namu ino van mi simúkiyá uno. ¹⁶ Téi ída ma vara ráke vákun betin má dere sen an den ída ma vara ráke ino. ¹⁷ Minó ei fura

sikhein baya kayo fóké betí ankan afova amesin ná betin aúpin dorantin maman kantasí uven eni kékasí ino van muno. ¹⁸ *Éi ma sen tisinten ná ma varafin ererunaí é ma kéká tiantékun ma varafin orinten mino. ¹⁹ Para vara seyo, vetin nan ma sesi minó bukhafa éin amerunaí en betí minó bukhafa fura sen éin aminten mino.

Yisasi Ma Mumunan Nanin Banta Amúkuantein Baya Ino

²⁰ “Tenti eyo iyampon kayo ana aya ono vara simúke rauno vetí ankani vava ma iniren téintá ma mumunan inain mai kéká bá aya ono van mi simúké uno. ²¹ Téi ma simúkeruna mai minó nanin banta ano ará manafiní uren manafin bano van muno. Éi Sifóe sempin baná ma séi empin barunaíen betí ankan erasampin bantin éin nan mi se nan tiantan erikhen mino siren barará nanin banta ano mumunan inten mino. ²² *Éi ma kakhan má ákona vá ma séin timikhá eona mai séi vetin ameruna erasan ma sirá manafiní uré manafin barunaíen betí ankan ará manafiní uren manafin banten mino. ²³ Téi vetí ankan má bákuya éi sen má banái mai avúava san mi vetí ankan ará manafiní uren manafin bantin barará nanin banta ano afová en éin nan mi séin tiantan erikhan mi séin ma anunu iyainí en mi vetin anunu iyan mino sen afová inten mino.

²⁴ “Tifóe oe, ma ma sen timikheona nanin banta ano sen ma vanunará bano van mi inikhé uno. Ma vara ma ída afoká ukhaya ma éi sen nan anunu ure ma mai kakhan má ákona vá ma simikhá eona mai kakhan má ákona vá téin ma simikheona kéká ano onano van muno.

²⁵ “Puntákein Tifóe oe, minó barará nanin banta ano éin ída afová ukhen mifo séi anan éin afová ukhekun mi éi ma sen tisinten ná erikháeruna mai senti eyo iyampon kayo anon afová ukhen mino. ²⁶ Éin nan betí ankampin téi inka sian afoká uadákeruna éin nan para sian amáe oriyá bákuya mai ma éi sen tivábá iyaonaí eya vetin avábá esí maé téi vetimpin banté uno.”

* 17:12: Yon 6:39; 13:18 * 17:15: Mat 6:13; 2Te 3:3

* 17:18: Yon 20:21 * 17:22: Apo 4:32

18

Yisasini Namuro Kayo Ano Ma Véin Pákein Baya Ino

(Matiu 26:47-56; Maki 14:43-50; Ruku 22:47-53)

¹ Yisasi mai vaya siren bei eyo iyampon kayo vá Kidaroní ava e kháden ena ufá ódiaren orifí dunan anafin oferen mino. ² Yisasi kokhon damú bei eyo iyampon kayo vá mai yunan anafin o átaru iyain bákán béin ma namuro kayo ayampin avían amin nain banta Yudasi mairá afová ukharen mino. ³ Afová ukharen Yudasi ano aruvin banta kayo vá monó ánon banta kayoi yafisin kéká bá Farasisi kayoi yafisin banta kéká bá avíaran mai kayo ano aruvin danasinta vá oon má uruuran Orifí dunan anafin oren mino.

⁴ Oríkan Yisasi ve aurá ma afoká ono van iyain danasinta afová ukhen béi e afánen mai kéká ádé oriven máa sen inaemí, “Tiretí ankan iyen nará dosiya rafono.”

⁵ Máa síkan betí ankan evaránen temí, “Nasaretíke vanta Yisasin nan mi yosiyá tiféuno.”

Síkan Yisasi semí, “Mai séi uno.” Máa siyákan mai ma véin aní intin ma fákán nain banta Yudasi má mairá mantakharen mino.

⁶ Betí ankan iníkan ma Yisasi sen, “Mai séi uno,” ma siyain má mai vanta kayo ano e afánen oyampáké oro senten eraven barará ankamen oreraen mino.

⁷ Máan tiyain má Yisasi evaránen betí ankan inaemí, “Tiretí ankan iyen nará dosiya rafono.”

Síkan betí ankan temí, “Nasaretíke vanta Yisasin nan muno.”

⁸ Máa síkan Yisasi evaránen temí, “Mai séin báí siretí ankan tiamikhé umpo sen nan ma yosiyanteya mai ma vanta kayo áesin ná orino.” ⁹ * “Máan ma sein manon pefá ma máa síkhá ein bayan kanaíen mino. “Mai ma séin timikháeona nanin banta finté mana ano ída afeyoranten mino.”

¹⁰ Máa siyain má Pita mana vaenati yákaren orun danúaren monó ánon bantai ánon banta kékái yoran banta Marákusin ne sin ayan kuron pákena átaren do síkaan karúdan barará eraven mino.

¹¹ * Máan tiyain má Yisasi Pitan tiamemí, “Baenati evaráneya veni anamumpin kain orino. Te Sifóe ano ma simikhein non kápi sen nan ída nan novara fono.”

Aanasin Ne Sin Banta Ano Ma Yisasin Inaein Baya Ino

¹² Máan tiyain má aruvin banta kayo vá betí ankaní ayafa vá Yutan kayoi kákan monó namuntá ma yafíkein kéká bá ano Yisasin pákaren ayantá ákona anampó damen mino. ¹³ Kaiafasin anan Aanasin ne sin banta vaintá nare vetí ankan ben aviren oren mino. Mai oranafin Kaiafasi monó ánon bantai ánon bantai ukharen ¹⁴ * béi Yutan kayo fefá tiamikharemí, “Minó nanin banta ayaen ma mana vanta ano ma furin nain mai kama inten mino.”

Pita Ano Ma Esé Araí En Yisasi Nan Ída Afová Ukhé Uno Ma Sin Nain Baya Ino

(Matiu 26:69-70; Maki 14:66-68; Ruku 22:55-57)

¹⁵ Pitan má ena eyo iyampon má ano Yisasin bákuren oríkan monó ánon banta kékái ánon banta ano mai eyo iyampon afová ukhan pasen áíkan Yisasin avákuren monó anon bantai yafufin óden mino.

¹⁶ Ódivíkan Pita onará mantakharéin mai ma monó ánon banta kékái ánon banta ano ma afová ukhein eyo iyampon mano onará ma yafisin nanin tiamíkan Pitan áin dafufin éden mino. ¹⁷ Édiyain má mai ma onará dafisin nanin mano Pitan máa sen inaemí, “Éin má mai vantaí eyo iyampon na fono.” Síkan Pita semí, “Ída ino. Téi ída veni eyo iyampon bá uno.”

¹⁸ Dafisin banta kéká bá doran banta kayo vá ano iyon eimpin ira sáden mantakhen kaniyákan Pitan má maifin mantakharen mino.

Monó Ánon Banta Kékái Ánon Banta Ano Ma Yisasi Ina Ein Baya Ino

(Matiu 26:59-66; Maki 14:55-64; Ruku 22:66-71)

¹⁹ Mantakhan monó ánon banta kékái ánon banta ano Yisasi ma siyá ein baya kayo vá beni eyo iyampon kayo va san béin inaen mino.

²⁰ Ina íkan Yisasi evaránen tiamemí, “Téi afokái vanasi vaya siamiyaré uno. Monó

* **18:9:** Yon 6:39; 17:12 * **18:11:** Mat 26:39 * **18:14:** Yon 11:49-51

átaru namumpin nafi kákan monó namumpin nafi ma Yutan nanin banta átaru uví téi afokái vetí ankan baya siamiyaré umpo ída aúpa tiamiyaré uno. ²¹ Pará éi inaiya fono. Téi ma vaya siamiyá eruna mai vanta kayo vá ina ono. Betí ankan mi mai vaya afová ukhen mino.”

²² Yisasi máa síkan mana kákan monó namuntá dafisin banta ano mairá mantakharen Yisasin aunápin ankamiyan temí, “Monó ánon banta kékái ánon banta avorá mai inté ein bayá evaráne siamiya fono.”

²³ Máa síkan Yisasi evaránen béin tiamemí, “Téi ma namu vaya ma siyákeya mai vayai ana sian amá inompo séi ma kama vaya siyákeya éi fará ten tinkamiya fono.”

²⁴ Máa sirákan mai ma Yisasin ayantá ma ákona anan damukharé ein para vákan Aanasin ne sin banta ano véin tiantan monó ánon banta kékái ánon banta Kaiafasi vaipá aviren oren mino.

Pita Ma Evaránen Yisasin Nan Ída Afová Ukhé Uno Sein Baya Ino

(*Matiu 26:71-75; Maki 14:69-72; Ruku 22:58-62*)

²⁵ Máan tiyákan Pita irará mantakhen kaniyáin manáa ano véin inaemí, “Éin má beni eyo iyampon nafono.” Síkan béi semí, “Ída ino. Téi ída veni eyo iyampon muno.”

²⁶ Máa siyain má monó ánon banta kékái ánon bantai yoran banta ma Pita ano ma átaren tikein bantai kéká pinté mana ano semí, “Éi ven má orifí dunan anafin ban ná onte rafunon té iniyá uno.” ²⁷ *Máa síkan Pita enádá “ída ino,” siyain má ana kokore asen mino.

Pairotin Avorá Ma Yisasin Kótiantein Baya Ino

(*Matiu 27:1-2, 11-14; Maki 15:1-5; Ruku 23:1-5*)

²⁸ Kaiafasi ano Yisasin inaen eriyen me kípíyákan do kakhán ákurasí iyain má aruvin banta kéká ano véin do aviren Romú kayoi ánon kamanin amá oren mino. Mai namun ódikan béin ma namuroí uantiyain

Yutan kayo ano maifin ódikharé ékun Ti yarafenu auufen painí eono siren are usintantí mai ma Ayo Uantan Omasí ma inain pinte yunan ída nan nae siren maifin ída óden mino. ²⁹ Máan siren barufá baré íkan Pairoti ano eraven morun betin inaemí, “Nái anarasá ma vanta kó tian tiya rafono.”

³⁰ Máa síkan béin evaránen tiamemí, “Béi ída aaú vanta varé intí ída véin aviré éi vaonafá eré tifanunaren mino.”

³¹ *Máa síkan Pairoti ano vetin tiamemí, “Béin avire mo siretíi man bayafó puntarano.”

Síkan Yutan kayo ano evaránen temí, “Teti mano ma vanta aruan purin nan airo ananí ukhein mi vá uno. ³² *Máan ma sein manon Yisasi ma veyan purin nain avúava san ma fefá tikharé ein mi fura sen afoká en mino.

³³ Máa síkan Pairoti ano evaránen kamanin amápin ódiven Yisasin aran ódikan máa sen inaemí, “Éi Yutan kayoi Kin nafono.”

³⁴ Máa síkan Yisasi evaránen béin inaemí, “Éi ei ineine fosá mai vaya siya fo áa ena vanta kayo anó tiamikhayá tiya fono.”

³⁵ *Máa síkan Pairoti ano evaránen béin tiamemí, “Téi Yutan bantá báku vae. Ei kéká bá betíi monó ánon banta kayo vá anon éin avían téi varunará mera va ompo éi náí aaú manten nan nafino.”

³⁶ Máa síkan Yisasi evaránen béin tiamemí, “Tenti yafisin ída ma vara rákena van mino. Tenti yafisin ma vara rákena varé intin tenti yoran banta kayo ano kanaíen aruvintin ída mana vanta ano kanaíen Yutan kayo ayampin téin aminté ein mifo senti yafisin mai ena vara fákenan ban mino.”

³⁷ Máa síkan Pairoti ano véin inaemí, “Mai fura ifo éi mana Kin ná ba vae.” Síkan Yisasi evaránen tiamemí, “Téin nan ma Kin ne seona mai éi furan te ono. Pura sikhein baya sian banasí amin doraríin anarái sínóe ano séin kaen mino. Pura sikhein baya ma iniren mai ánain dakhafin nanin banta anon tenti vaya iné iyan mino.”

* 18:27: Yon 13:38 * 18:31: Yon 19:6-7 * 18:32: Yon 3:14; 12:32-33 * 18:35: Yon 1:11

Pairoti Ano Ma Yutan Kéká Ayampin Yisasin Amein Baya Ino

(*Matiu 27:15-31; Maki 15:6-20; Ruku 23:13-25*)

³⁸ Maa síkan Pairoti ano véin inaemí, “Pura sikhein baya mai náí yana safino,” siren evaránen Yutan kayo vaipá aravuvén betin tiamemí, “Ma vanta ma kó tiantan aau ída van mino. ³⁹ Ída van mifo ena ena oranafin Avo Uantan Damú ma eri mae mana karavusi ma útúantan avúavá afová ukheya sireti ma seona mai vantán karavusi útúdekun oré iyain mifo Yutan kayoi Kin ná útúantantin orino vará iniya rafono.”

⁴⁰ Maa síkan betí ankan evaránen oovararen temí, “Ída ino. Mai vanta ída ifo Barabasi ino.” (Barabasi mai kamanin má aruvin duváden banta aruan púká ein banta ino.)

19

Aruvin Banta Kéká Ano Ma Yisasin Máka Máka Ein Baya Ino

(*Matiu 27:27-31; Maki 15:16-20*)

¹ Maa sirákan Pairoti ano síkan ayankuní ukhein dafiyó póké Yisasin ankamen mino. ² *Ankamiyákan aruvin banta kéká ano mana ayankun anan máden mai fóké kini kamamó ma einí ukhein uváden ben ánotá afu uantáden mana nararé au anamun máden uanten en mino. ³ Máan tuantáden béin máka maáká iyan temí, “Yutan kayoi ákona kin noe, en aví daní iyá tifeuno!” siyáken béin auná ankamen mino.

⁴ Máan tiyákan Pairoti ano evaránen barurá aravuvén maa sen banasi siamemí, “Béin pinte mana aau ída yoseruna mai van mi véin aviré tireti vaonafá erenté umpo vá afová ono.”

⁵ Maa sirákan Yisasi mai ayankun anan kamamó ma ánotá uantein má nararé au anamun ma uantein má para ukhan ekhuvén barufá eravíkan Pairoti ano vanasi siamemí, “Ma mai vanta ifo onano.”

⁶ Máan ma siyain má monó ánon banta kéká bá kákan monó namuntá ma yafisiyain kayo vá ano oniyáken oovaraaren temí, “Aruan purono. Aruan

purono.” Síkan Pairoti ano vetin tiamemí, “Beni mana aau ída yosé umpo siretí ankan béin e avíde vá tireti yantasá daa unkamádantá arono.”

⁷ Maa síkan Yutan kayo ano evaránen temí, “Béi ma siyáken téi Tiyarafenu Anin muno ma sikhein mano mai setisi man bayan durafuntein mai anará béi vá purino.”

⁸ Maa síkan Pairoti ano mai vaya iniren moéken akhokho van en mino. ⁹ *Máan turen Yisasin evaránen aviren kamanin amápin un pében béin inaemí, “Éi inte varu fákesa fonó.” Síkan Yisasi ída mana vaya evaránen ten mino. ¹⁰ Máan tiyaiimpin Pairoti ano véin inaemí, “Ífá uantan ma orin má inká daa unkamádantá ma aruan purin ákona vá ma sempin bain éi ídá afová ukheyá ída ovaráne sen má baya siya fonó.”

¹¹ *Maa síkan Yisasi evaránen béin tiamemí, “Dan Banta ano ma éin ída ákona amikhá inti séin ída kanaíeya maman barará kainonaren mino. Mai fara vara seyo, séin ma en ayampin kaein mai vantai ume ano eni ume esantaren kákani suron ukhen mino.”

¹² *Maa síkan Pairoti ano iniren mai ráké Yisasin ma ífá uantantin orin nain aa van dosiyákan Yutan kayo ano oovaraaren temí, “Éi mai vanta ma ífá uantesin ma orintiya mai éi ída Sisan aronan ban nono. Inká mana vanta ano ma veyan nan ma séi kin muno ma sin nain mai ano Sisan mi namuroí uantiyan mino.”

¹³ Maa síkan Pairoti ano ma mai vaya iniren maen Yisasin evaránen barufá aviren morúden baya ma yaimin kará aví Onámaná Aa e sikhein karáká kumanen mino. (Aramaiki vaya finté Kabata e siyan mino.) ¹⁴ Tiyarafenu ano ma Isareri nanin banta Avo Uantein nan ma ovaren me inin omá kákena yunan útain damú bakan bayan aúbaní iyaimpin Pairoti ano Yutan kayo siamemí, “Tiretí ankani kin masi ifo onano.”

¹⁵ Maa síkan betí ankan oovararen temí, “Béin avire orono! Mo yaa unkamádantá aresin purino!”

* 19:2: Ruk 23:11 * 19:9: Mat 27:12 * 19:11: Yon 10:18; Apo 2:23; Rom 13:1 * 19:12: Ruk 23:2; Apo 17:7

Síkan Pairoti ano vetí ankan inaemí, “Tiretíj Kin ná daa unkamádantá arin no-varae.”

Máa síkan monó ánon banta kéká ano evaránen temi, “Tetisi kin ída ena van mifo Sisa veyáká anan ban mino.”

¹⁶ Máa síkan daa unkamádantá Yisasin arino van betin amen mino.

Daa Unkamádantá Ma Yisasin Arein Baya Ino

(Matíu 27:32-44; Maki 15:21-32; Ruku 23:26-43)

Amíkan aruvin banta kéká ano véin aviren oren mino. ¹⁷ Yisasi vei yaa unkamádan maman afuná uren Ánon Dampa e sikhein dontá oren mino. (Aramaíki vava finté *Korikhota* e sikhen mino.)

¹⁸ Mai yontá moren Yisasin daa unkamádantá aruren inká kan banta vá tefá tefá aren en mino. ¹⁹ Aruran maen Pairoti ano síkan betí ankan mana vava máa sen uváden Yisasini yaa unkamádantá ankantaaren mino, “YUTAN KAYOI KIN NASARETÍKE VANTA YISASI INO.”

²⁰ Pairoti ano síkan mai vava Yutan baya finté uvaren Romú baya finté uvaren Kiriki vava finté uvaren ukharen mino. Yisasin ma yaa unkamádantá arukhein mai Yerusaremí baru ádéi vákan Yutan kayo ano oriven mai vava yankafiyaren mino.

²¹ Máan tiyákan Yutan kayoi monó ánon banta kéká ano máa sen Pairotin me yuvun iyáken temi, “Éi ída Yutan kayoi kin ne sire uvarano. Ma vanta ano sen téi Yutan kayoi kin muno siyaren ne sire uvarano.”

²² Máa síkan Pairoti ano evaránen temi, “Ída ino. Téi ma uvanteruna vava mai inká uvanté umpo áesin ná para vano.”

²³ Aruvin banta kayo ano Yisasin daa unkamádantá aruren beni yante vuí daná kamí kamí pintan daíden mana mádú uaran námente au anamun mana en mino. Mai au anamun mana yavaráefó anan amu uran baren mino.

²⁴ Máan tukheimpin aruvin banta kéká ano semí, “Ma au anamun ída kafasé tifanté umpo kati (satu) siré tifékun esesí ma inain manon baranten mino.”

Mai avúavá ma vetí ankan barein manon Tiyaarafenui vompon dókifin ma máa síkhá ein mi kanaíen mino.

“Betí ankan tenti suí daná daíden baranten mino.

Mamaren betí ankan tenti su anamuntá kati sirákan mi esesí ma ein banta anon baren mino.” *Íbo 22:18*
Máan ma síkhá ein mai avúavá máan aruvin banta kéká ano varen mino.

²⁵ *Daa unkamádan ádé ma mantakharé ein kéká mai Yisasin anóen má be aunanan má Maria Koropasin aná bá inká Makdaráke nanin Marian mái mantakharen mino. ²⁶ *Mantakhan Yisasi ma moéken anunu ukhein eyo iyampon má ano vetin ádé báin Yisasi ve anóen mo oniyán tiamemí, “Anasi oe, mai e anin mino.” ²⁷ Máa siren mai eyo iyampon tiamemí, “Mai e anóe ino.” Máa siran maen mai eyo iyampon mano Marian aviren be amápin mo kaúdáken maí damúké araíen béintá dafisiyaren mino.

Yisasi Ma Furein Baya Ino

(Matíu 27:45-56; Maki 15:33-41; Ruku 23:44-49)

²⁸ Taréa anan tenti yoran minó kípen mino sen Yisasi iniyáken Tiyaarafenui vompon dókifin ma síkharé ein baya kanaí ino van béi máa semí, “Non nan tiíyá uno.”

Íbo 22:15

²⁹ *Síkan mana íta uvaini vain kave mairá ádé baré íkan betí ankan manáa mófófen ma einí ukhein daná máden ura yankará damuren mai kavéfin daaren orun maman kain Yisasin oorá óden mino.

³⁰ Ódikan Yisasi mai uvaini naan onen temi, “Mai inka kípen mino,” siyáken anuran durafuriyan bei aunan ampín orin puren mino.

Mana Aruvin Banta Ano Ma Bankan Póké Yisasin Ayorampin Antarein Baya Ino

³¹ *Avo Uantan Damú mai Sabatirá afoká intéin Sabati rákena yanasinta funtáádano van iyáken Yutan kayoi ánon banta kéká ano iníkan kákan damú ma furin banta kayo au ma yaa unkamádantá ban mai ída kama ukheimpin mai vanta kéká arantan iyarantin ainen púbintin daa unkamádantá kena ainen do varano van betí ankan Pairotin mo inaen mino. ³² Ina

* 19:25: Mat 27:55-56 * 19:26: Yon 13:23 * 19:29: Íbo 69:21 * 19:31: Diu 21:22-23

urákan Pairoti ano kanai ino sin aruvin banta kéká ano oren Yisasin má ma yaa unkamádantá arukharé ein bantá kanan arantan mo iyen mino. ³³ Iyaren maen betí ankan Yisasi vaintá oriven onákan bei fe fúkeimpin ída veni arantan iyen mino. ³⁴ Ída iyákan mana aruvin banta ano vankan póké ayorampin antariyain má nare vá non má ano manadá avanen barará eraven mino. ³⁵ *Mana vanta ano ve auufó pura sen ontaré ein danái siretí ankan má mumunan ono van mi sian amá en mino. ³⁶ Mai yanasinta ma afoká ein mai Tiyarafenui vompon dókifin ma máa sikhareé ein mi kanaíen mino. Mai vaya máan mi sikhán mino, “Beni mana yampa ída yurafurinten mino.” *Eks 12:46; Nam 9:12; Íbo 34:20*

³⁷ *Máa sikhán inká ena vaya vá Tiyarafenui vompon dókifin máa sikharen mino, “Bankan ma arukhá ein bantan betí ankan onanten mino.” *Sek 12:10*

Yisasin Ma On Aimpin Masí Ein Baya Ino
(*Matiu 27:57-61; Maki 15:42-47; Ruku 23:50-56*)

³⁸ Mai oyampáké Arematiáke vanta Yosepi ano Pairoti mo inaúde Yisasin au varano van oren mino. Yosepi véi Yutan kayoi ánon banta ifo mai véi mana Yisasini eyo iyampon mi váken ena ánon banta kayo van péden bei mumunan aúpasí uren baré íkan Pairoti ano kana ifo varano síkan Yisasin au o varen mino. ³⁹ *Yosepi ano mana inuran ma Yisasin o onein banta Nikodimasin má oren mino. Oriyákan daa anu fóké uvantan kama aunka iyain uveri* vá Nikodimasi maren oren mino. Mai auna uverii uman teti-foa (34) kiro ino. ⁴⁰ Yosepin nú Nikodimasin nú ano Yisasin au o máden Yutan kayo ano ma furin banta aurá ma variyain avuavasíen kama aunka iyain uveri vanaren kama yavaráe kayofó úken mino.

⁴¹ Mai ma Yisasin daa unkamádantá arukharé ein áde mana yunan ana vákan maifin auyen masí uádan bakan ída mana vanta kaúan arái ukhan mino. ⁴² Máan

tukhan Yutan kayo ano Sabati rákena yanasinta útaen arakhókuin damú ban maen mai masí áde baré ín Yisasin au yaiyen mai on aimpin mo masíen mino.

20

Yisasi Ma Evaránen E Mantein Baya Ino
(*Matiu 28:1-10; Maki 16:1-8; Ruku 24:1-12*)

¹ Santé* pe ákura suron Makdaráke nanin María ano masíká onano van ori-yaren o onákan masí ain oyi rákena onámaná do vaébaé uan kain baren mino. ² Máan tukháin ódaren María ovaránen tavaen Pita nú mai ma Yisasi moéken anunu ukharé ein eyo iyampon nú baípa eren me máa sen tiamemí, “Bafani au masí pintena yo ayóken mifo mai véin íntefasá kaúken nafi mai séi ída afová ukhé uno.”

³ Máa síkan Pitan má ena eyo iyampon má ano masí onano van tavaen oren mino. ⁴ Békanan tavaen oríkan mai ena eyo iyampon mano Pitan esanten ayam-paen ben nare masíká oren mino. ⁵ Oren o kharemen aimpin onákan kama yavaráe ma Yisasin úkuantákaré ein mana vákan óden mifo véi ída masí aimpin umperen mino. ⁶ Ben oyampáké Pita oren esavéden masí aimpin un pében onákan davaráe kayo ana vákan ⁷ mairá mana ena yavaráe Yisasin ánontá ma úkuantan baré ein mai vanta ano ma yádaren ádun kaeiní ukharen mino. ⁸ Máan tukhan mai ma esé aráien ma masíká orein eyo iyampon má ano masípin un pében mai yanasinta ódaren mumunan en mino. ⁹ *Tiyarafenui vompon dókifin ma Yisasin nan púaren evaránen e mantanten ne ma sikhá ein baya vetí ankan ída afová ukharen mino. ¹⁰ Máan turen mai eyo iyampon kanan mano evaránen barufá oren mino.

Yisasi Ma Máklaráke Nanin Marian Avorá Dákó Ein Baya Ino
(*Matiu 28:9-10; Maki 16:9-11*)

¹¹ Orivíkan masí ain oyirá María mantakhen ifí diyáken masí aimpin mátimen mun onen mino. ¹² Onákan enisorí kanan mano efanten buí daná uren Yisasin au

* **19:35:** Yon 21:24 * **19:37:** Rev 1:7 * **19:39:** Yon 3:1-2 * **19:39:** Kama aunka iyain uveri mai Mere ino.

* **20:1:** Kiriki vaya finté Santé san mi esé arái in damú se sikhén mino. * **20:9:** Apo 2:24-32; 1Ko 15:4

ma yan bakharé eintá mana ano ánompá kumanin ena ano arantampá kumanin ukharen mino.

¹³ Kumantaren míkanaan mano Marian inaemí, “Anasi oe, éi fará ifí diya fonó.”

Síkan béi evaránen békanaan tiamemí, “Tenti Bafan ma ayóden intefasá kaúken nafi séi ída afová ukhé mai van mi ifí diyá uno.”

¹⁴ *Máa siren dovaera senten onákan Yisasi oyampá mantakharen mifo ve nan ída Yisasi ino sen afová en mino. ¹⁵ Máan tiyákan Yisasi véin inaemí, “Anasi oe, éi fará ifí diyá inká iyen nará dosiya fonó.” Síkan dunan anará ma yafisin banta ino sen iniren temí, “Kákan banta oe, éi ma ven au ma vare mo kaurákan nonafá tisimesirá téi o varano.”

¹⁶ Máa síkan mairá Yisasi semí, “Maria oe,” síkan Maria yo vaéan onen Aramaiki vaya finté, “Rabonai oe,” sen aren mino. (Mai “Rabonai” e ma siyain baya Aru sen tiyan mino.)

¹⁷ *Máa síkan Yisasi véin tiamemí, “Téi ída Sifóe vaípa ódikhé umpo ída vá ten tu fákano. Éi oreya sen tifá tiváeyan mana mo siameno. ‘Te Sifóen má tiretí ankan Afóen má inká tenti Tiyarafenu vá tiretí ankani Ayarafenu vá baípaí ódónté uno.’”

¹⁸ Makdaráke nanin Maria ano evaránen oren mo máa sen eyo iyampon kayo siamemí, “Téi inka Bafan oné uno.” Siren Yisasi ma ven tiamein baya máa vetí ankan tiamen mino.

Yisasi Ma Vei Eyo Iyampon Kayo Avorá Ma Afoká Ein Baya Ino

(*Matíu 28:16-20; Maki 16:14-18; Ruku 24:36-49*)

¹⁹ Esé arái in damú áau eraven inúpasí íkan eyo iyampon kayo ano Yutan kayoi ánon banta kéka san péden má ona munkuan ákona uren iyukharé íkan Yisasi vetí aúbaná o mantaven máa sen betí ankan tiamemí, “Tiretí ankan ará ano kusen ná bano.” ²⁰ *Máa siren be ayan má ayoran má aníin bei eyo iyampon kayo ano onen mino. Aní uran bei eyo iyampon kayo ano ma vetí Bafan onein nan kákan amusín en mino. ²¹ Amusin iyákan Yisasi

enádá betí ankan tiamemí, “Tiretí ankan ará ano kusen ná bano. Te Sifóe ano ma sen tisintá erikhá erunai é téj siretí ankan tianté umpo vá oronó.” ²² Máa siyan be aunan pútiádan betí ankan baípa oriyán temí, “Tiretí ankan Kantá Aunan ná barano. ²³ *Tiretí ankan ma ena vanta kayoi ume ma ifá uantesin maen mai ume arúantanten mifo siretí ankan ma ena vanta kayoi ume ma ída ifá uantesin mai kayoi ume fara vanten mino.”

Yisasi Ma Tomasin Avorá Dakó Ein Baya Ino

²⁴ Yisasi ma vei eyo iyampon kayo vaintá ma o afoká ein inúpa Tomasin nan ma Didimasin ne sen ariyain eyo iyampon mano maifin ída varen mino. ²⁵ Máan tukharéin ena eyo iyampon kayo ano véin tiamemí, “Teti ankan inka Bafan oné uno.”

Síkan Tomasi evaránen betí ankan tiamemí, “Béin ayampin ma antó arukhá ein afun má ayoran afumpin má ma séi ída seyantá tiyan kaúan onté maé mai séi ída mumunan onté uno.”

²⁶ Máa siran dan manápá ifo afápá kanú manaú un kádan damú orivíkan Yisasini eyo iyampon kayo ano ona munkuan ákona uren mai namumpin bákan Tomasin má maifin baréin Yisasi vetí aúbaná mantaven máa semí, “Tiretí ankan ará ano kusen ná bano.” ²⁷ Máa siren béi Tomasin tiamemí, “Éi eriveya siyan má tiyoran má tifumpin ayan kaúdeya onano. Ída vá anomé iniyákeya mumunan mana vá ono.”

²⁸ Máa síkan Tomasi evaránen béin tiamemí, “Tenti Bafan Tiyarafenu uron mono.”

²⁹ *Máa síkan Yisasi evaránen béin tiamemí, “Éi sen tódeyan mumunan iya ompo séin ma ída sonten para ma mumunan iyain nanin banta ano vá amusín ino.”

Ma Vompon Dókii Ana Vaya Ino

³⁰ Yisasi vei eyo iyampon kayo avorá kokhon enará ukhein aní danasinta afoká ukharen mifo séi ída ma vompon dókifin minó uvaré uno. ³¹ *Ída uvaré umpo ma vompon ma séi uvareruna mai Yisasin nan Tiyarafenu ano ma aní ukharé ein

* **20:14:** Ruk 24:16; Yon 21:4 * **20:17:** Rom 8:29; Ibu 2:11-12 * **20:20:** Yon 16:22; 1Yn 1:1 * **20:23:** Mat 16:19 * **20:29:** 1Pi 1:8 * **20:31:** Yon 3:15; Rom 1:17; 1Yn 5:13

banta ino seya inká béi Tiyarafenu Anin mino se ureya véintá mumunan ono van mi uvaré uno. Béintá ma mumunan inona ano fara van oriyán ban aunán baran nono.

21

Yisasi Ma Yan Manápá Ifo Afápá Kan Un Kádan Eyo Iyampon Kayo Avorá Ma Afoká Ein Baya Ino

¹ Ínaimpáké Yisasi Kariri non akharun* akhempá bei eyo iyampon kayo vaintá enádá afokáen mino. Mai máan mi en béi afoká en mino. ² Saimon Pitan má Tomasín nan ma Didimasín ne siyain má Kariri varafín Kaná baru ráke vanta Natanierín má Sebetín anín kan má ena kankanán eyo iyampon má ano manafín iyukharen mino. ³ *Íyukharéin Pita máa sen betí ankan tiamemí, “Noyana arono van oriyá uno.” Síkan betí ankan temí, “Tetin má orinton muno.” Siren minó ano mana votifín un kumamen oren mifo mai ínuran betí ankan ída mana noyana aren mino.

⁴ Máan tiyákan do kakhiyain má Yisasi non akhempá e mantakhan bei eyo iyampon kayo ano véin ída oman afová en mino.

⁵ Máan tiyákan Yisasi oovararen temí, “Tirona kayo oe, ídá manáa noyana arukhe rafono.”

Síkan betí ankan evaránen tiamemí, “Ída ino.”

⁶ Máa síkan betín tiamemí, “Ayan kurón pákena mai voti akhempá base karúdaresín manáa noyana ferantiya varano.” Síkan betí ankan base maman karúdan aravuvín kokhon noyana víkavín betí ankan ída kanaíen mai vase orun darifaan botifín kaoren en mino.

⁷ *Máan tiyákan Yisasi ma moéken anunu ukharé ein eyo iyampon mano Pitan tiamemí, “Bafan mantino.” Síkan Pita au anamun davamádaen doriyaren iníkan “Bafan mantino” siyain má béi ainen au anamun e maman uren nompín káusiven ayan nakhosá den akhempá oren mino. ⁸ Mai ráké ma akhempá orín ída nentá baren mifo nainti (90) mita

máan bákan manáa eyo iyampon kayo ano mai votifín para váken basefín ma noyana víkakhein darifén oriyaren mino. ⁹ Betí ankan ma non akhempá oriven onan maen ira kiyákan maifín manáa noyana iyó uran bákan mai akhempá bereti kayo vá baren mino.

¹⁰ Bákan mairá Yisasi máa sen betí ankan tiamemí, “Taréa ma fákeona noyana kayo finte manáa vare ereno.”

¹¹ *Máa siyain má Saimon Pita votifín káusén ódivén base un darifén eyurá merén mino. Mai vasefín ma kákan noyana fékaré ein mai mana antareti ifo fiftitri (153) noyan nan baren mifo ída mai vase yáken mino. ¹² Máan turákan Yisasi vetín tiamemí, “Erive yunan nano.” Síkan eyo iyampon kayo ano afová en béi Bafan mino siren béin inain nan péden mana ano éi iyé fono sen ída inaen mino. ¹³ Máan tiyákan Yisasi mairá oriven bereti vá noyana vá maman betí ankan amen mino. ¹⁴ *Yisasi ma furín pinté e mantaven ma vei eyo iyampon kayo avorá afoká ein mai ma anon kanú manaú dádasí en mino.

Pitan Nan Ma Yisasi Ano Séin Nan Anunu Iya Fono Sein Baya Ino

¹⁵ Betí ankan ma yunan narákan Yisasi Pitan inaemí, “Yonín anín Saimoní oe, éi ma sen nan anunu iyaona ano ma vanta kayo ma sen nan anunu iyain mai esantakhen nafino.”

Máa síkan Pita semí, “Eyo Bafan noe, éi afová ukha ono. Téi en nan tinunu ukhé uno.”

Máa síkan Yisasi véin tiamemí, “Máan ma sinteya mai senti sipisipi arará kayo vá dunan amisintano.”

¹⁶ *Máa siren Yisasi evaránen Pitan inaemí, “Yonín anín Saimoní oe, éi sen nan anunu ukhe fono.”

Síkan Pita semí, “Eyo Bafan noe, éi afová ukha ono. Téi en nan tinunu ukhé uno.”

Máa síkan Yisasi véin tiamemí, “Tenti sipisipi kayorasá dafítintano.”

¹⁷ Máa siren evaránen Yisasi kanú manaú dádasí en Pitan inaemí, “Yonín anín Saimoní oe, éi sen nan anunu ukhe fono.”

* **21:1:** Karirí noni ena ví mai Taiberiasí ino. * **21:3:** Ruk 5:4-7 * **21:7:** Mat 14:29; Yon 13:23 * **21:11:** Ruk 5:6 * **21:14:** Yon 20:19, 26 * **21:16:** Apo 20:28

Síkan kanú manaú dádasí en ma Yisasi inaiyain nan Pita anomé iniyáken temí, “Bafan noe, éi minó daná afová ukha ompo séi en nan tinunu ukhé uno.”

Máa síkan Yisasi véin tiamemí, “Tenti sipisipi kayo vá dunan amisintano. ¹⁸ Téi fura siré éin tiamiyá uno. Éi fumara ma vákeyai eyantá amú anan damure mae eyan ma orono seonafá oriya ompo éi ma afovaí uveya ayan kanan daní uresin ena vanta anon amú anan damuantáden éi ída orono sikhana varufá aviren orinten mino.”

¹⁹ *Pita inte avúavá puririsá intin ná Tiyarafenu ano kákan bí baranten nafi mai véi afová ino van mi Yisasi ma vaya sen mino. Máa siren Yisasi semí, “Téin tivákurono.”

²⁰ *Pita yo vaében onákan mai ma Yisasi moéken anunu ukhein eyo iyampon mano vékanan oyampá avákuren eren mino. Dunan ma nein inuran ma Yisasin má o súpá uven ma “Bafan noe, iye anó éin namuro ayampin kaintéi vae” ma sein mai vanta ino. ²¹ Pita ma véin ódaren Yisasin inaen temí, “Bafan noe, ma vanta vá intesá inten nafino.”

²² Máa síkan Yisasi evaránen béin tiamemí, “Béi fara vantí téi ovarané ereno van inikhé umpo mai ano éin intesá intéi vae. Téin mana sivákurono.” ²³ Mai eyo iyampon ída furinten mino ma sein baya ano mumunan nanin banta vaípa oreraen mifo Yisasi véin nan ída furinte ne vaya ída sen mino. “Béi fara vantí téi ovarané ereno van inikhé umpo mai ano éin intesá intéi vae.” Máan manan béi sikhén mino.

Kípan Baya Ino

²⁴ *Mai eyo iyampon mano anan mai yanasinta van tian afoká uren ma vompon uyamá den mino. Mai ma véi ma sian afoká ein baya mai setí ankan afová ukhé tifékun mai fura vaya uron mino.

²⁵ *Yisasi ma minó avúavá bariyá ein mai kokhon ban mifo séi ma iniyaruna mana mana yanái vompon dóki uvaman kaúdú kaúdú ono sen báintin mai vompon dóki kayo ma kain afokhan ma varará ída kanaí inté ein mino.

* **21:19:** Mat 16:24-25; 2Pi 1:14 * **21:20:** Yon 13:23-25 * **21:24:** Yon 19:35 * **21:25:** Yon 20:30

**BAYA VAREN ORIN
BANTA (Aposeri) KAYO
MA YÓKEIN BAYA INO
(Aposeri)
Aposeri Vompon Ma
Uvanteí Pákenai Afova
Vaya Ino**

Ma vompon ma uvantein banta ino.

Ena anan pintena ayofan banta ma Porin arona váken ma ena ena véin má nókan ma minó ano anunu iyá ein banta Ruku ano ino. (Korosi 4:14 fin ná onano).

Uvarein orana ino.

AD sikisti-tari (63) fin Porin ma Romu kamaní ano ma karavusií ukharé in ma kíparí iyain oranafin mi ma vompon uvanten mino.

Ma vompon ma uvantein baru ino.

Romú barurá ifo mai vompon ma uvaran danasinta Sisareá barurái ovare evare uan átaru uádaren mi uvanten mino.

Ma vompon ma uvaman amikhein kéká ino.

Ída afová ukhé tiferuna vanta Tiofirasi maen Romu kamaníni kákan doran banta váken monó tiyan mumunan iyá ein banta vá inká ena anan pinté ma monó tiyan mumunan ukhá ein kayo vá ino.

Nái ana vará ma vompon uvanten nafino.

AD teti (30) oranafin ma Porin karavusi fáken Romui varafá orein baya vá inká monó doran ma arái uren dorein baya vá afová ino van uvaren mi inká mepifin aníen ukhen mino.

Kantá Aunan Amin Nain Nan Ma Yisasi Siamein Baya Ino

¹ *Tiofirasi oe, Yisasi ma araién doriyáken monó baya minó nanin banta

* **1:1:** Ruk 1:3 * **1:2:** Mak 16:19; Ruk 24:49-51 * **1:3:** Ruk 24:36-49; Apo 10:41 * **1:4:** Ruk 24:49; Yon 14:16-17; Apo 2:33 * **1:5:** Mat 3:11 * **1:6:** Ruk 24:21 * **1:7:** Mak 13:32 * **1:8:** Mat 28:19; Ruk 24:48 * **1:11:** Mat 26:64; Ruk 21:27

siamen eriyá ein bompon pefá uvaman amikhá uno. ² *Doren eriyán mai ma vei yorarí ino van ma vaya varen orin kayo me Kantá Aunani ákonafó monó baya siamin doran aní uran mi Tiyarafenu ano véin aviren inarufá óden mino. ³ *Béi uman o varen púaren masí pinté e mantavin beni vaya ma varen orin kayo ano ódarákan béin nan pura sen aun manten mino sino van betin avorá foti (40) yamúpin kokhon dádasí iyáken betí baintá afoká uviyan Tiyarafenui Yafisin pintena vaya siamen mino. ⁴ *Maná damú ma Yisasi vetí ankan má duna niyáken máan mi sen tiamikharen mino, “Tiretí ankan ída vá Yerusaremí me ampire ena varufá orera iyákeya mai ma se Sifóe ano ameno van tianten mino séku ma inikhá eona yanasará ave ono. ⁵ *Monó non máa fói Yoni monó non péanten mifo ída ayáká basin mi Kantá Aunampó tiretin monó non péantanten mino.”

⁶ *Máa sirákan maen bei eyo iyampon kayo e átaru uven béin inaemí, “Bafan noe, saréa Isareri vara evaráne maman ákona uantádesin ná mana kin mano yafisinten nafino áa ída fino.”

⁷ *Máa síkan béi evaránen betí ankan tiamemí, “Mai áau fi yamu safi ída siretí ankan nina yaná banti ída kanaíe afová in nompo Tifóe veyákái aní uren maináká dafiken mino. ⁸ *Máan tukhein Kantá Aunan ma siretimpin erivinti mae ákona mamareya séin pákena vaya Yerusaremí barufin má minó Yudiá bara akhempá bá Sameriá barafá bá inká ma varai minó akhempá deren mo siamin nono.”

*Yisasi Ma Inarufá Ódein Baya Ino
(Maki 16:19-20; Ruku 24:50-53)*

⁹ Máa siran betí ankan avorá Tiyarafenu ano véin aviran inarufá ódiyain má mana konan mano véin iyádan ída onen mino.

¹⁰ Béi ódivíkan betí ankan ayompin kakhaken baré in efanten buí daná ukhein bantá kanan mano manádá betin ádé e manten mino. ¹¹ *E mantaven máa semí, “Karirí banta kayo oe, pará tiretí ankan

mará mantakheya ayompin kakhaké bara fonó. Mai Yisasi ma Tiyarafenu ano saréa siretin pinte aviren inarufá ódi ma oneona avúaváká ten mi véi umbaránen eranten mino.”

Matiasin Avían Tiyan Míkan Mifo Sirantan Mana Orun Kádan (11) Baya Ma Varen Orin Kayofin Asotú Ein Baya Ino*

12 *Máa siran mairá eyo iyampon kayo ano Orifí Anuyon ne ma siyain anu me ampiren Yerusaremí oren mino. Yerusaremíké ma Orifí Anuyontá oriyain mai mana kiromita ino. 13 *Mai varufin oriven betí ankan ma fefá baré ein namumpin ódiven dan bain karafarampin un baren mino. Maifin ma un baré ein kéká mai Pita, Yoni, Yemisi, Enduru, Firipi, Tomasi, Batoromiu, Matiu, Arfiusin anin Yemisi inká Serotí kéká pintena vanta Saimoni, inká Yemisin anin Yudasí siren mino. 14 Mai vanta kéká bá anasi kayo vá inká Yiasin anóe Marian má be afá kayo vá e átaru uven ará manafiní uren amúkiyaren mino.

15 Maí damú kayofin ma Yiasintá munan iyá ein nanin banta maen mai mana antareti ifo tuenti (120) nanin bantan átaru ukhen bákan mai finte Pita e mantaven 16 *máa semí, “Mumunan tiyofi sífá tiváeyan noe, pefá Tiyarafenui vompompin Kantá Aunan mano Devitin oo ráké naren Yudasín nan Yiasín avían namuro ayampin kainten ne ma síkhá ein mano fura sen dákóen mino. 17 Pefá Yudasí setimpin báken monó doran manaíen tetin má doriyaren mino.”

18 *Máan tukhan maen mai Yudasí ano vei namu avúavákáke miyampó mana vara o miyaní uren mai varafin beyantá ánon páké eraven ankamíkan ben amú pautivin ará kakhufen barará eraven mino. 19 Ínaimpáké Yerusaremí barufin ma vain nanin banta ano mai vaya iniren maen mai vara van betí avaya finté Akeradama e sen mino. Mai víi ana mai nare vanakhein bara en tikhen mino.

20 Máa siren Pita evaránen temí, “Ma vaya van Í Bompompin máa síkhen mino, ‘Béi ma varé ein afokhan áesin para vantín ná
mai afokhampin ída vá mana vanta ano vano.’ *Íbo 69:25*
Inká mai vompompin mana ena vaya máa síkhen mino,

‘Ena vanta áesin ná beni varu varano.’ *Íbo 109:8*

21 Máan tukhein nará minó banta kéká pinte mana vanta ano ma setí ankan má nókan Yisasi ma yoren non maen ontaré ein banta vá tetí avían kaékun ná beni varu varano. 22 *Yoni ma araíen monó non péantiyá ein táké ma eriaren ma Tiyarafenu ano Yiasín aviran inarufá ódein ma ontaré ein banta vá avían kaesin tetin tiyaen ná Yisasi ma fúaren e mantakhá ein baya vanasi siamino.

23 Pita máa sirákan kankánan banta avían kaen mino. Mana vanta maen kanú manaú bí ariyaren mino. Mai vanta van Yosepi ne sen ariyan inká Basabasin ne sen ariyan inká Yastasin ne sen ariyan mino. Ena vanta maen Matiasín ne sin avían kaen mino. 24 Mai vantá kanan avían kaúden máa sen amúkemí, “Bafan noe, eyaká anan minó nanin banta aúpin afová ukha ompo ma kanan pinte ma éi anunu ukhanona vanta vá tetin aní uresín ná 25 Yudasí vei yoran me ifá uren be nan ma vano síkhá ein barufá bano van oren mifo vékanan pinté iye anó Yudasíni varu varen ná eni vaya varen orin doran bantaí inten nafino aní ono.” 26 Máa siren ayá danka vá asíka yanka vá punkikhaan ayampin pákaran Matiasí ayá danka yanúden e aní uvíkan béin avían tiyan míkan mifo sirantan mana orun kádan (11) baya ma varen orin kayofin asotú en mino.

2

Pentíkosi Yamú Ma Kantá Aunan Ereín Baya Ino

* 1:11: Baya ma varen orin kayo mai Aposeri en tiyan mino. * 1:12: Ruk 24:50-53 * 1:13: Mat 10:2-4
* 1:16: Íbo 41:9 * 1:18: Mat 27:3-8 * 1:22: Mak 1:9; 16:19; Yon 15:27 * 2:1: Riv 23:15-21; Diu 16:9-11
* 2:1: Avo Uantan dunan ma amusin iyan do naran mi mai oyam páké fifti yamú orivíkan Kantá Aunan erakhan mai vami Pentikosie siyan mino. * 2:3: Mat 3:11

1 *Pentíkosi yamú* e uníkan mumunan iyá ein nanin banta minó mana namumpin e átaru ukharen mino. 2 Átaru ukháin inaru fáké manadá kákan uva ma en ereiní uaren mai ma vetí ankan bá ein namumpin e víken mino. 3 *Máan tiyain má betí ankan onákan banta amafin ten kayo ano ira anafun ma karékará en oreiní uaren mai namumpin ma varé ein kayo ánontá mana mana en o yoman nen mino. 4 *Máan tiyain má Kantá Aunan mano vetí ankan aúpin bíkaven aya íkan araién ara ara vaya sen mino.

5 Maí damú Tiyarafenu van ma féden bentá monó tiyain Yutan kayo ano minó bara fáké ere ere en Yerusaremí e varen mino. 6 E varen mai ma uariyain ma inein kayo ano akhokho van e átaru uven mai ma siyain baya van takhaen oreraen mino. Mai fara va ino Yisasini vayan be avaya finté tiyan iníden mino. 7 Iniren Yutan kéká ano anú diyáken temí, “Ma Karirí bara fáke nanin bantan banten mino. 8 Máan tukhen mifo inté uáken ná mana mana si vaya finté tiyará iniyá tife rafuno. 9 Para vara seyo, Patiá bara fáké eriyen Midiá bara fáké eriyen Eramiké eriyen Mesopotemiaké eriyen Yudiaké eriyen Kapadosiaké eriyen Pontasíké eriyen Esiaké eriyen 10 Frikhiaké eriyen Pamfiriaké eriyen Isipíké eriyen Sairiní baru ádé Ribiaké eriyen Romuké arona eriyen 11 inká Yutan kéká bá ena kéká bá ma setinti monó tiyain kéká bá Kirití kayo vá Arebia kayo vá anon iniyá tifékun tetinti vayafó Tiyarafenu ano ma ákona yorarí ukhein baya siyan mino. 12 Betí ankan anú diyáken kokhon ineine iyan betiyan ten inemí, “Ma yaná ma afoká eini ana mai intesá ukhen nafino.”

13 Máan tiyákan manáa kayo ano vetin nan taró tiyan temí, “Auyen uvaini kokhon naráken óen iyan mino.”

Pita Ma Vanasi Monó Baya Siamein Baya Ino

14 Maa siyákan Pitan má ena siyan mikan mifo sirantan mana orun kádan (11) eyo iyampon kayo vá ano e mantavin Pita oovaren máa semí, “Tirona Yutan kayo vá

ena vara fáké ma Yerusaremí e vaona kéká ba soe, átaeren ná mafá desin erivintirá mai ma afokáí oneona yanái ana siaméku vá ineno. 15 Tiretí ankan ma iniyaona ano ma kayo van óen non mi naráken óen iyan mino ma siyaona mai ída uron mino. Tare uron mi kakhakhan dan manápá ifo afápá kami kami un kádan (9 kiroki) áauí ukha ákurái va ono. 16 Ma yaná ma afoká iyain nan pefá sakhanampa vanta Yoeri ano siádan baren mino.

17 “Tiyarafenu ano siyáken ma vara ma kipano van iyantí maé tesi Kantá Aunan minó nanin banta amaniná banaékun

tiretin anin kayo vá inká tiren araun kayo vá ano sakhanampa vanta an danten mino.

Máan tiyantín pumara kéká auu vaédantin oniyantin ayokhuvin banta kayo ano kokhon kain onanten mino.

18 Maí damú ana sesi yoran nanin má bantafin má dere sesi Kantá Aunan banaá dékun orintin maen sakhanampa vaya sinten mino.

19 Máan tiyantí maé ara ara yaná ayompin maman dáko é maé inká barará ara ara aní danasí ékun maen ira vá nare vá kákan íkun má édavinten mino.

20 Máan tintin áau ano sítipa intin inká biyon mano nare an den nararé inti ma ódaresin maen inainpákéi Bafani erin mai kama uran en panu sikhein damúi erinten mino.

21 Máan tiyantín intéa kéká anó ayaino van Bafan aví aranten nafi mai kéká aya uren evaránen aviranten mino.’

Yoe

2:28-32

22 “Isarerí nanin banta oe, Nasaretíke vanta Yisasini vaya senté umpo vá ineno. Tiretí afová ono van maen Tiyarafenu ano véin pinté uaren enará ukhein ákona vá aní daná bá uvaren dararen iyákaya sireyantá afová ukha ono. 23 Tiyarafenu ano afová ukhen pefá beyantá tiádan baré ein ángin dakhafen mi mai vanta siretin ayampin kaíkan namu vanta kayo ano

* 2:4: Mak 16:17; Apo 4:31; 10:44-46; 19:6

siretin ayaen daa unkamádantá antópó béin arin puren mino. ²⁴ Aruan púden nan purini ákona ano ída kanaíen béin pákaan dan baren mino. Mai fara va ino Tiyarafenu ano fúká ein pinte véin orun avían mantaren ída áin purini aí bá beraifin baren mino. ²⁵ Pefá Deviti ano véin nan máan mi sikhhan mino, “Téi onékun Bafan mano minó damú te má túpá ukhen mino.

Para vara seyo, véi sen tiyan kurompá bain mana yana san téi ída feranté uno.

²⁶ Mai vará ten tirápin kama intirá timusin baya seno.

Máa sé umpo sen tu vá dere ano vá mai van ave ino.

²⁷ Para vara seyo, éi ída áená purin nanin banta ma vaimpin báku mae inká ei kantasí ukhein banta ída áesin masípin púta inten mino.

²⁸ Éi fefái aun ma varan ain aní ukha ompo áesíen má bákuya moékan timusin timeno. *Íbo 16:8-11*

²⁹ *Mumunan tifá tiváeyan noe, setin tinau Devitini veya sian páman uan amenté uno. Béi fúbíkan masí uran beni masí para van eriyán taréa setimpin dere mai masí para van mino. ³⁰ *Mai fara va ino Deviti sakhanampa vantán bákán Tiyarafenu ano pura ódino siren béin iyáantiyáken ínaimpá en ana akhá pinte mana yékun eni varu varanten mino síkan afová ukhan mino. ³¹ *Máa sikhhan mai ma varará nanin banta ma evaránen aviran banta ma e mantan nain Deviti ínaimpákéna yaná oniyáken béin ída áintin purin nanin banta vá báken mai masípin púta inten mino sikharen mino. ³² Mai veya ma sikhá einíen Tiyarafenu ano mai Yisasin masí pinté orun avían mantá tetí minó kayo ódarákaréi mai veya sian dákó iyá tiféuno. ³³ *Máan tukhan pefá ma Tiyarafenu ano Kantá Aunan amenté uno siren ma iyáantáká ein Yisasin amin mamaren inarufá óden be afóen ayan kurompá un ban mi saréa ma oniyáke ma iniyaona Kantá Aunan banaiyan mino.

* 2:29: 1Ki 2:10 * 2:30: 2Sa 7:12; Íbo 89:3-4; 132:11
Apo 5:30-31 * 2:39: Ais 57:19 * 2:41: Apo 2:47; 4:4

³⁴ Deviti ída Yisasi ma ódeiníen inarufá óden mifo véi máa sikhhan mino, “Bafan mano senti Bafan máa sen tiamikhhan mino,

“Éi sen tiyan kurompá kumantesí

³⁵ ma eni namuro kayo maman bararasí uré en aránaó kaúdéku vá ono.” ’ *Íbo 110:1*

³⁶ *Máan tukhen mifo Isareri nanin banta oe, minó ano vá afová ono. Yisasi ma yaa unkamádantá ma aruan pureona vanta Tiyarafenu ano véin maman Bafaní uren doran banta e sen Tiyarafenu ano ma aní ukhá ein banta ino’.

³⁷ Máa síkan banasi ano Pitani mai veya inin amafon aí iyaimpin Pitan má ena veya varen orin banta kéká bá inaemí, “Tifá tiváeyan noe, setí náisá onté tife rafuno.”

³⁸ Máa síkan Pita evaránen betí ankan tiamemí, “Tiretí ankan mana mana ano ume finté ará baédeya Yisas Karaisin avíká monó non baresin ná Tiyarafenu ano siretí ume ampiantano. Máan ma esin mi Tiyarafenu ano Kantá Aunan aminten mino. ³⁹ *Pefá Bafan tetisi Tiyarafenu ano siretí ankan má tiretí akhafana vá inká nentá ma vain nanin banta vá ma ínaimpá araren Kantá Aunan amin nain mi iyáantákaren mino.”

⁴⁰ Máa siren béi ena veya kayo vá ákonaen tiamiyan tútúpemí, “Tiyarafenun inaesin ná tare ma vain namu nanin banta kayo fintena siretin aya ino.”

⁴¹ *Pitani veya ano mai nanin banta amafon aí iyaimpin maí damú ana kanú manaú tauseni (3,000) nanin banta ano ará baéden monó non péden mai nanin banta ano Yisasintá ma mumunan iyain kayo vá o asotú en maman kokhoníen mino.

Yisasintá Ma Mumunan Iyain Kéká Ano Ma Ará Manafiní Ein Baya Ino

⁴² *Kokhoní uven mai kayo ano veya varen orin banta kayo ma afova amiyain baya ákonaen iniyáken betin má manafin o átaru uven monó ten dunan nen amúken iyaren mino. ⁴³ Máan tiyan Tiyarafenu

* 2:31: Íbo 16:10 * 2:33: Apo 5:32; 7:55-56 * 2:36:
* 2:42: Apo 20:7

ano vaya varen orin banta kayo finté ayan táké uaren kokhon enará ukhein ákona vá aní daná bá barákan banasi ano mai yanasinta oniyáken anú diyán akhokho van en oreraen mino. ⁴⁴ *Máan tiyákan Yisasintá ma mumunan iyain kéká ano ará manafiní uren mana inintá báken minó daná ben amin ben amin iyaren mino. ⁴⁵ Máan tiyáken betíi vara vá kama yanasinta vá sarí uren moní máden manáa yana san ma o afasí iyain kéká aya iyaren mino. ⁴⁶ Máan tiyáken minó damú monó namun dafufin ena ena átaru iyáken maen inká mana mana namumpin o iyuve e iyuve en dunan niyáken betiyan maman bararasí uren amusimpin baren mino. ⁴⁷ *Báken ena ena yamú Tiyarafenu aví daní iyákan banasi ano vetin nan anunu iyan ena ena yamú Bafan mano ará ma vaerein nanin banta avidú íkan mai ma Yisasintá ma mumunan iyá ein nanin bantafin mo asotú en mino.

3

Mana Arantan Namu Ukhá Ein Banta Ma Pita Ayofein Baya Ino

¹ Maná damú Pita nú Yonin nú monó namumpin amúkono siren kanú manaú áauíen inúpasí iyan oren mino. ² Oriyan o onákan monó átaru yafu ona van ma Avorú Ona e siyaintá mana arantan namu ukhein banta minó damú aviren mo khain báken monó dafufin ma ódein nanin banta vaípa moni san inantiyain baré íkan aviren meran baren mino. Mai vanta maen be anóen arápin mi arantan namu ukhan kaen mino. ³ Morákan báken ma mai vanta ano Pita nú Yonin nú onan monó namumpin umperano van ódíkan maen békanaan baípa mai vanta ano moní inan ten mino. ⁴ *Inan tíkan Pita nú Yonin nú ano mai vanta mo furefure oniyáken Pita semí, “Éi verasan tonano.” ⁵ Maa síkan mai vanta ano náinasá timinten nafino sen mumunan iyáken purefure en békanaan onen mino.

⁶ *Oniyain má Pita máa sen tiamemí, “Téi ída moní dékun ban mifo se ma yákeruna yana amenté uno. Nasaretíke Tiyarafenu ano ma aní ukhein banta

Yisasin avíká éi e mantave orono.” ⁷ Maa siyáken ben ayan kuompáke yáman pákaaren orun ayan nóan mantiyain má ana mai vanta ayákon má arantan má kamaen ákonaen mino. ⁸ Ákona iyain má beyantá kútin e manten orian ódaren mairá békanaan bákuren monó namumpin ódiyáken káosi káosi iyan Tiyarafenu aví daníen mino. ⁹ Mai vanta ano káosi káosi iyan Tiyarafenu aví daní iyain minó nanin banta ano oniyáken, ¹⁰ betí ovaren me afová en mai ma monó átaru yafu ona van Avorú Ona e siyaintá ma ena ena yamú báken ma moní inantiyan baré ein banta aurái ma yaná afoká ukhen mino siren takhaiyan kokhon ineine en mino.

Pita Ano Ma Vanasi Vaya Siamein Baya Ino

¹¹ Banasi ano ma mai vaya iniyáken anúden orera iyan mairá tavaen e átaru uven mai vanta onákan Pita nú Yonin nú ayan pákáan ákona uren mai ma Soromonini Yuse se ma siyaintá mantakharen mino. ¹² Pita máan ma iyain oniyáken banasi siamemí, “Tiretí Isareri nanin banta oe, ma yaná ma yáko iyain nan pará anú diyayá békani kama avúavá bá ákona vá anon ma vanta ayain manten oriyan mino sireyá berasan urú toniya rafono. ¹³ *Abaraamu má Aisakin má Yekopun má inká tetin tinafuyan mái Ayarafenu ano vei yoran banta Yisasin kákan bí amira mai vanta e avían namuro ayampin amen nan Pairoti ano véin ampantiya ompo siretí Pairotin avorá ben oyan amire ída vá mai vanta ampiesin ná orino se ono. ¹⁴ Maa sireya Kantasién Puntákein Banta oyan amire, vanta aruan purin banta van aésin teti vaípa erino siya inae ono. ¹⁵ An uanten aun bain aintá ma siviren orin bantan tiretí aruan púden nan maen Tiyarafenu ano masí pintena evaránen avían mantará berasan ontaréi mai van tian dákó iyá uno. ¹⁶ Berasan Yisasintá mumunan iyáké ben avíkái ma vanta ayanóan mantékun ákona mamarai óde afová iya ono. Yisasin

* **2:44:** Apo 4:32-35 * **2:47:** Apo 6:7; 11:21 * **3:4:** Apo 14:9 * **3:6:** Apo 4:10; 16:18 * **3:13:** Eks 3:6, 15; Ruk 23:13-25; Apo 2:23

avíká ma mumunan in manon pura sen ma vanta ayofakhayan oniya rono.

17 **“Tifá tiváeyan noe, séi afová ukhékuya siretin má tiretíi yafisin banta kayo vá ano ída afová ukheyan mai ná avúavá Yisasin amaniná kae rono.* 18 *Máan te ompo fefá Tiyarafenu ano sakhanampa vanta kayo finté uaren mai vanta van mi Tiyarafenu ano ma aní ukhein banta ano uman barante ne sikhá iyan ben amaniná máante rono.* 19 **Máan tukhen mifo siretí ankan ará baéde sirun noe sireya Tiyarafenu vaípa oresin ná tiretíi ume arúantano.* 20 *Máan turantin Bafan pinté kusen ban erintin ná mai ma vanasi evaránen aviranten ne sen pefá aní ukhá ein banta Yisasin tiantantin ná enádá ovaránen erino.* 21 *Erinten mifo véi inarufá pa ave ukhantin ná Tiyarafenu ano ma vei kantasí ukhein sakhanampa vanta kayo finté uaren ma iyáan táká ein maman evaránen auyení urantin ná minó danasinta yákó ino.* 22 *Pefá Mosesi siyáken, ‘Bafan Ayarafenu ano siretíi kéká pinte mana vanta avían kaintin ten an den sakhanampa vantái inten mifo siretí beni minó baya inire vá dakhafono.* 23 *Máan tukhantin mai sakhanampa vantai vaya ma ída inin nain nanin banta ano ída uron mi Tiyarafenui vanasifin banten mino.’* *Diu 18:15, 18-19*

24 *“Sakhanampa vanta Samuerin táké ma arái uren erikhein sakhanampa vanta kayo minó ano mana yana san mi sikháin maí damú inka yákóen mino.* 25 *Sakhanampa vanta kayo ma siyá ein baya kayo vá Tiyarafenu ano ma siretin anafuyan má ma manafin kasen ban baya ma sikhá ein mai vetin anavasin mi sireti varé en nan mi siretin amanináí yákóen mino. Béi Abaramun tiamiyáken, ‘En anavasin pinté uaren mi minó barará nanin banta ano avu varanten ne sikhán mino.’* *Esé 22:18; 26:4*

26 **Máa sikharen mai van mi Tiyarafenu ano vei yoran banta avían mantaren tiretí mana manai namu avúavá pinte avu uranti ará baerano van tiantan tireti vaonafá nare eren mino.”*

4

Yutan Kayoi Ánon Banta Kayo Ano Ma Pita Nú Yonin Nú Aviren Me Vetí Ankan Aufá Mantein Baya Ino

1 Pitan nú Yonin nú ma vanasi vaya siamiyákan mairá monó doran banta kayo vá Sadyusi kéká bá monó namuntá ma yafisiyain kayoi ánon banta vá ano mairá e unen oren mino. 2 Onóben iníkan Yisasin nan e mantakhein púkein kéká ano yere orun mantanten mino sen míkanan mano sian afova amiyare íkan betí ankan o inen mai van kákantá aranan en mino. 3 Aranan uren békánan pákádaran duniyaimpin ena ákurá do kakhantí kó tiantádé puntarano van míkan aviren mo karavusi namumpin kaen mino. 4 **Míkan ma siyain baya iniren ma Yisasintá mumunan ein banta mai yan manápá tauseni ino (5,000).*

Pitan Nú Yonin Nú Ma Kó Tiantein Baya Ino

5 *Máan tukháin ená damú Yutan kayoi yafisin kéká bá monó doran banta kayo vá inká man baya ma afová amin kayo vá ano Yerusaremí e átaru en mino.* 6 *Átaru iyákan monó ánon banta kékái ánon banta Aanasi má Kaiafasi má Yoni má Areksanda má inká ena monó ánon banta kayoi kéká bá dere maifin e varen mino.* 7 *Mai kéká ano Pita nú Yonin nú aviren me vetí ankan avorá kaúden míkanan inaemí, “Intéa ákoná bákayá iyen avíkasá mai yaná bariya rafono.”*

8 *Máa sen ina iyákan maen Kantá Aunan mano Pitan aúpin bíkavin betí ankan tiamemí, “Tiretí Isareríi yafisin má monó doran banta kayo va soe, 9 ma ma aranta namu ukhein banta ma aya ukheruna fáke inté uákesá berasan béin ayofe rafu mai séi ma iniyarun siretí ankan tetin inaúde afová ono van mi iya ono.* 10 **Máan tiya ompo vá minó Isareri nanin banta ano ma vaya vá afová ono. Mai ma Nasaretíke vanta Yisas Karaisin ma yaa unkamádantá aren nan púbin ma Tiyarafenu ano evaránen avían mantein banta avíkái ayofaádékun mai vantán tiretin avorá mantakhen mino. Béi maen*

* 3:17: Ruk 23:34; 1Ti 1:13 * 3:19: Apo 2:38 * 3:26: Apo 13:46 * 4:4: Apo 2:41 * 4:10: Apo 3:6, 13-16

11 “Má uvaran banta kayo ano ma yo mamanan karúdein onámaná ano mamanan má dádaimpin mana ákona onámanasí ukhen mino.’” *Íbo 118:22*

Mai ákona onámaná maen Yisas Karaisi ino.

12 *Máan tukhantin ma varará banta ída ena vanta Tiyarafenu ano amikhá intin banasi evaráne aviranten e sikháintin tetin ída siyainten mifo Yisasi anan tetin barará nanin banta kama uren evaránen tiviranten mino.

13 Mai vaya siyákan dafisin kéká ano Pita nú Yonin nú ódaren míkanaan Yisasi má pefá bakan ontaren mino. Békanan ída mana sikhuru siren afova mantá eintá ída feran ákonaen baya siyákan mai van betí ankan kokhon ineine en oreraen mino. 14 Kokhon ineine iyáken betí ankan onákan mai ma arantan namu ukháin ayofein banta ano vékanan má mantakhan mai van betí ankan ída mana veya evaránen békanan tiamen mino.

15 Máan turen mairá mai Kanisori ano vékanan tiantan mai átaru namunté ekhuvan barufá aravuvíkan betiyan baya sen oreraen mino. 16 Ten orera iyáken temí, “Ma vantá kanan mano moéken enará ukhein ákona ma aní ein mai Yerusaremí ma varé ein nanin banta ano inka afová en orera ein ída umerá tifanté umpo míkan amaniná náisá otifante rafuno. 17 Máan tiyaren mai veya ano minó nanin bantafin orera inafó eritifé békampin ákona é baya siamé tifekun ná ída evárénen mai viká banasi sian amino.”

18 *Betiyan baya siren mairá békan aran mai namumpin ódíkan Yisasin aví tiriya ma vanasi afova amiyain béin aví ma sin má dere míkanaan airo ananí uanten mino. 19 *Máa síkan Pita nú Yonin nú ano vetí ankan evaránen tiamemí, “Tiyarafenu avorá tireti inte é té iniya rafono. Berasan mai Tiyarafenui vayá dakhafonu áa sireni vayá dakhafó tifante rafu maifin daidé vá afová ono. 20 Mai van mi verasan ída kanaíe veya mará me fákanté umpo verasan ma oniyá ma inikhá eruna yaná minói sian dákó onté uno.”

21 Máa síkan banasi ano ma mai yaná ódaren Tiyarafenu aví daní iyain nan mai yafisin kayo ano vetí ankan nan péden míkanaan amaniná ída kanaí en mana aau kairiín pasen ída uman amin nan evaránen ákona veya ana siamidén tiantan oren mino. 22 Para vara seyo, mai ma míkan mano enará ukhein ákonafó ayofan ma arantan kamaein bantai orana mai foti (40) orana esantakhein banta ino.

Mumunan Iyain Kéká Ano Ma Amúkiyain Baya Ino

23 Pita nú Yonin nú tiantádan maen mai yafisin banta kayo me ampiren békani kéká baípa oren o váken mai ma monó ánon banta kayoi ánon banta vá monó doran banta kayo vá ano ma sein baya siamen mino. 24 *Tiamin iniren mairá betí ankan ará manafiní uren Tiyarafenu amúkuan amen temí, “Bafan noe, éi vara vá non má inaru vá maifin ma minó daná baini uvaran benafo ono.” 25 Pefá eni Kantá Aunan mano sétin tináu Devitin mana veya amíkan Deviti máan mi sikhann mino.

“Intéa ana vará minó ena anan nanin banta ano móekentá aranan iyáken ná para é tiren ná mai Isareri nanin banta ano fasavifá namu avúavasí ono van baya sian damuan kaiyan nafino.

26 Minó bara vain bain ma vain kin kayo ano aruvín danasinta utaaren mantakhan

inká dafisin kéká bá ano manafin átaru uven

Bafan Tiyarafenu mamanan bararasí uré

barará nanin banta ma evaránen aviran nan ma sikhá ein banta mamanan bara finí ono van iyan mino. *Íbo 2:1-2*

27 *Pura siren Erotin nú Pontias Pairotin nú ano ena anan kéká bá Isareri nanin banta kayo vá o éken ma varufin e átaru uven ei kantasí ukhein doran banta Yisasi ma fefa éi aní ure nan baré ein mamanan bararasí ono van iyan mino. 28 *Betí ankan ma varein daná mai ei ákonará pefá

* 4:12: Mat 1:21 * 4:15: Mai Kanisori kéká maen Sanedrini e ma siyain kéká ino. * 4:18: Apo 5:28 * 4:19:

Apo 5:29 * 4:24: Eks 20:11; Nee 9:6; Íbo 146:6 * 4:27: Mat 27:1-2; Ruk 23:7-11; Apo 3:13 * 4:28: Apo 2:23

* 4:29: Efe 6:19

tiáden nan baré íkan mi eni anunu vá ineine vá ánaín mi yakhafen mai yaná afoká en mino. ²⁹ *Bafan Tiyarafenu oe, setí eni yoran banta kayo ma sikhokho simin baya kayo ma siyain ná inireya siya esirá ákona ukhé ída feran eni vaya ákonaé banasifin tian dáko ono. ³⁰ E ayan daruádesin orinti vá banasi aí kípaañ tiyáke aní danasinta aní iya vá ara ara yaná ei kantasí ukhein doran banta Yisasin avikasá uvarano.”

³¹ Máan amúkirí uan kípaañ maen mai ma vetí ankan baré ein namun antu antu iyáken Kantá Aunan mano vetí ankampin bíka víkan Tiyarafenui vaya ákonaen tian dáko iyáken ída feren akhokho van en mino.

Yisasintá Ma Mumunan Iyain Kéká Ano Ma Vetin Nina Yanasinta Avarí Iyái Pákena Vaya Ino

³² *Yisasintá ma mumunan ein kéká ano mana ineine vá mana ará bá báken mai kéká pinté ída mana ano ma yaká ein dana san tiyáken ma seya sina ino sen mifo minó dana ma mana mana ano ma yan baré ein danasinta mai minó avaríen oreraen mino. ³³ Máan tiyan kákan ákonafó Aposeri kéká ano Yisasi ma fúaren orun mantakhein baya vanasi siamen orera iyákan Tiyarafenu ano mai nanin banta van anunu iyáken betí ankan moékentá avábá uanten mino. ³⁴ *Máan tíkan betí ankan aúbaná ída mana nanin banta ano ona varafi yunan narafi o afasí ukharen mino. Máan tukhen kokhon bara fi ma safi ma yaká ein minó sarí uriyan moní máden mai moní baren ³⁵ me aposeri kayo amíkan mai moní daíden i ma vain kéká amiyaren mino.

³⁶ Máan tiyákan Saiprasíke mana Rivai ánon banta Yosepin ne ma siyain banta aposeri kayo ano ena ví Banabasi ne siran baren mino. Banabasin bí maen mai veni ana Ará Ákona Uantan Anin ne ma siyain baya vá manaí ukhen mino. ³⁷ Mai vanta ano vei vara sarí uren mai ráke moní baren Aposeri kayo mo amen mino.

5

Ananiasin Nú Safairan Núi Vaya Ino

* 4:32: Apo 2:44 * 4:34: Apo 2:45 * 5:2: Apo 4:34-35 * 5:3: Yon 13:2

¹ Mana Ananiasin ne sin banta vá be aná Safairan ne sin má baren békani manáa vara sarí uran mana vanta ano miyaníen mino. ² *Miyaní uran mai vara ráke moní be aná ano afovai ukhan daíden manáa veyan aúpa kaúden manáa ana varen aposeri kayo mo makáden tiamen mai máa moní i varé uno siren amen mino. ³ *Amíkan Pita máa semí, “Ananiasí oe, fara é tire e aú ona yire nan Ban Anon mano en aúpin bíkaya Kantá Aunan mákádeya mai vara ráke ma vareóna moní manáa aúpa kae fono. ⁴ Ídá afová ukhen nan ná mai vara ma ída sarí ukhen nan en nina varéin ná mai vara miyaní urá moní bare fono. Mai moní eninaí uvi ompo e anunu ánaín bákureya ída amenté uno sinona van Tiyarafenu amenté uno ma sireya náina anó éin mai inin amiyá mai avúavá bare fono. Tetin na máka sisinte va ompo Tiyarafenui máka siante ono.”

⁵ Máa síkan Ananiasí mai vaya iniyáken eraven barará ankamiyan esé ana fúbíkan banasi ano Ananiasin amaniná ma yákó ein baya iniren moéken akhokho van en mino. ⁶ Máan tuvíkan pumara vanta kayo ano mai vanta e maman davaráefin úkuren baren mo masíen mino.

⁷ Masí uran kanú manaú áau orivíkan Ananiasin amaniná ma yákó ein daná be aná ano ída afováin mápin un peren mino. ⁸ Unóbíkan Pita véin inaemí, “Éi sisimeno mai máa monisá tirei vara ráke vare fono,” síkan mai nanin mano siyáken, “Eyo, mai máa moní i varé uno.”

⁹ Máa síkan Pita véin tiamemí, “Pará tiré kanan baya sian damureya Bafani Kantá Aunan máka sentá fono. Onano, en avafun ma masí ein kayo onará édiyain mai kéká ano éin má daiyóen orinten mino.”

¹⁰ Máa siyain má anan Pitan arantampin mai nanin eraven ankamen púbíkan mairá pumara vanta dun onan mai nanin púkeimpin mairá béin daiyó en oren be avafun ma masí ukharé ein áde mo masíen mino. ¹¹ Masí urákan monópin ma vain nanin banta vá ena nanin banta kayo vá ano mai vaya ma iniyáken moéken akhokho van en mino.

Aposeri Kéká Ano Kokhon Nanin Banta Ma Ayofein Baya Ino

¹² *Aposeri kéká ano kokhon enará ukhein ákona vá aní danasinta vá banasi aúban uvariýákan maen Bafantá ma mumunan iyain nanin banta ano ará manafiní uren o éken Soromonini Yuséka átaruen mino. ¹³ Átaru iyan mai kéká ano féden ída vetin má e átaru iyaren mifo mai kékápin ma ída vain nanin banta anon betin aví daní iyaren mino. ¹⁴ Máan tiyákan kokhon nanin banta ano Bafantá mumunan iyan beni kékápin me asotú asotú en maman kokhonien mino. ¹⁵ Máan ma iyain anarái Pitan aman ma oriyain aa akhempá banasi ano aí nanin banta aviren mo yóki uvíden kaiyan inká manáa kúkútafin kaiyaren mino. ¹⁶ Máan tiyákan Yerusaremí baru áde ma vain barufin páké ano yere aposeri kayo e oniyáken aí nanin banta vá inká namu aunan ma fákakhein kéká bá aviren eríkan mai nanin banta ayofen mino.

Namuro Kayo Ano Ma Aposeri Kéká Namu Uantein Baya Ino

¹⁷ Monó ánon banta kékái ánon banta vá bei kéká ma Sadyusifin bain kayo vá ano ma mai avúavá oniyáken aposeri kayo ará namu uanten mino. ¹⁸ Namu uantáden betí ankan e manten aposeri kayo fákaren aviren banasi ma karavusií iyain namun mo karavusiien mino. ¹⁹ *Máan turan mai inuran mana Bafani enisori ano minó ona yiren betí ankan aviren barufá morúden máa semí, ²⁰ “Tiretí ankan monó dafufin o mantave auyen aunani vaya minó tiamesin ná banasi ano inino.”

²¹ Máa síkan aposeri kayo ano mai vaya iniren pe ákurá e manten oren monó namun dafufin o váken araíen mai vaya sian afova amiyaen mino.

Máan tiyákan mairá monó ánon banta kékái ánon banta vá bei kéká bá Isarerii yafisin kayoi ánon banta kéká bá aran e átaru uven mai aposeri kayo aviren betí baintá erino van karavusi namumpin baya yan oren mino. ²² Piripo kayo ma siantan oriyan o onákan mai karavusi namun ída aposeri kayo vaimpin evaránen

oren mo mai ánon banta kayo siamemí, ²³ Teti oriyá o onékun karavusi namunte ona fara ákonaen munkukhan onará ma yafisin banta kayo fara mantakhá ma ona ma yiré maifin ma onékun ída mana vanta maifin baren mino.” ²⁴ Máa síkan kákan monó namuntá ma yafisin kayoi ánon banta vá monó ánon banta kayo vá ano ma mai vaya iniren kokhon ineine en amino iyáken máa semí, “Náina sá afoká inten nafino.”

²⁵ Máa sen iniyákan mana vanta ano enóben betí ankan tiamemí, “Orive onano, mai ma karavusifin kaeona kéká masina kákan monó namun dafufin o váken banasi iyanuan kaúden mai vaya siamin iniyan mino.” ²⁶ Máa síkan kákan monó namuntá ma yafisin kayoi ánon banta vá piripo kayo vá ano oren aposeri kayo o aviren eren mifo vanasi ano onámaná ankamin nain nan péden betí ankan amaniná ída mana yaná avúavasien mino.

Aposeri Kayo Ano Ma Tiyarafenui Vaya Anan Dakhafó Tifanté Uno Sein Baya Ino

²⁷ Dafisin banta kayoi ánon banta kéká ano aposeri kayo ina ino van piripo kayo ano vetin aviren me kaúdakan monó ánon banta kékái ánon banta ano máa sen inaemí, ²⁸ * “Teti ma siretí ankan tiamé ída uron ná mai vanta aviká monó baya vanasi siameno siré airo ananí uanteruna ifo fará tiretí mai vaya vanasi siamiyan nan Yerusaremí ma vain nanin banta ano mai vaya inen orera iyákayá inká tetin nan mai vanta aruan pure ono sireyá tetin tu finté iya fono.”

²⁹ *Máa síkan Pita má ena vaya varen orin banta kayo vá ano evaránen betí ankan tiamemí, “Teti Tiyarafenui vaya anan dakhafo sifanté umpo varará nanin bantai vaya ída yakhafó tifanté uno. ³⁰ Tiretí ankan manon Yisasin daa un-kamádantá aruan púden nan mi setisi sináuyani Ayarafenu ano véin purin pinta evaránen avían mantakhen mino. ³¹ *Béi anon tetinti aa aní uren evaránen tiviran banta vákan Tiyarafenu ano véin aviren inarufá mun bei ayan kurompá kain dan bain kin aniní ukhein tetí Isareri nanin banta siyaintí maé tirá baeré tifékun

* 5:12: Apo 2:43; 14:3 * 5:19: Apo 12:7-10 * 5:28: Mat 27:25 * 5:29: Apo 4:19 * 5:31: Apo 2:33-34; Efe 1:20; Ibu 2:10; 12:2

tetinti ume ampisintanten mino. ³² Teti ankan mai yanasinta ódákéi mai veya sian dákó iyá tifékun inká Tiyarafenu oo ma yaiyein kékái Kantá Aunan amikhan mai aunan mano yere sian dákó iyan mino.

Kanisorí Vanta Kamarieri Ano Ma Aposeri Kayo Van Bempáké Bano Sein Baya Ino

³³ Maa síkan Kanisorí kayo ano mai veya iniren kákantá aran nan iyáken betin aruan purono van en mino. ³⁴ Aruan purono van iyákan mai yafisin banta kayoi ánon banta kéká pinté mana Farasisi vanta véin aví Kamarierin ne sin man baya afová ukhan ma vanasi ano véin kákan bí amiyain mano orun mantaven tiamemí, “Ma kéká tiantan manáa afará barufá orun bano.” ³⁵ Maa sin betin aviren barufá aravuvíkan mairá Kamarieri orun mantaven Kanisorí kayo siamemí, “Israreri vanta kayo oe, mana yaná ma ma vanta kayo amaniná kaono sinte mae ovare me inireya vá mainá betí ankan amaniná kaono. ³⁶ *Afovaí ukharono. Ída ayá damú oriyan mino. Teudasi ano e mantaaren temí, “Téi vafan bákun ten tiví bain banta uno,’ síkan ádé anantá kami kami antareti (400) nanin banta ano véin dakafiyaréin maen kamani ano véin aruan púdan bentá ma mumunan iyá ein kayo me ifá en orera íkan beni yoran mo savifa afe ein mino. ³⁷ Ben oyampáké kamani ano ma vanasi aví baran damú Kariri fáke Yudasín ne sin banta ano e manten banasii ineine maman asuse en kamanin aré tavono van íkan béin má aruan púdan ben ma vákuren noré ein kéká ano me onen karan orera ein mino. ³⁸ Máan tukhein nan mi siretí ankan tiamiyá uno. Ma varará bantai ineinerá ma yoriyaren mai yoran mo asuse inten mifo ída vá mana yaná betin amaniná kaiya ampiantesin ná orino. ³⁹ Tiyarafenu ano ma mai ineine yákó ukhá inti mae máan tiya véin má namuroí inampo ída vá mai yoran are ono.”

⁴⁰ *Maa síkan Kanisorí kayo ano Kamarierini veya iniren baya varen orin banta kayo aran eríkan dafiyó ankáden Yisasini

vaya siamen non nan airó ananí uantáden ampiantan oren mino.

⁴¹ *Beti ma Yisasín avíká uman baren ayave o yosín ma Tiyarafenu ano vetin nan kama nanin banta ino ma sein nan mi veya varen orin banta kéká ano yafisin banta kayoi ánon banta kéká me ampiren oriyáken amusin en mino. ⁴² Amusin uren Yisasi ma vanasi evaránen avíkein mai kama veya ída me ampinton ena ena yamú kákan monó dafu kayofin má mana mana namumpin má orera uven tiamiyaren mino.

6

Dan Manápá Ifo Afápá Kan Un Kádan Monó Doran Ayain Banta Ma Aní Ein Baya Ino

¹ *Maí damú eyo iyampon kayo ma mo kokhoní iyan maen mai aúbanáké Kiriki veya ma siyain Yutan kayo ano Aramaiki veya ma siyain Yutan kéká anan uanten máa semí, “Minó damú turetíi varé nanin kayo anan ayaiya ompo setisi varé nanin kayo ída ayaiya ono.” ² Maa siyaimpin tiyan mikan mifo sirantan kan orun kádan (12) eyo iyampon kayo ano ena eyo iyampon kayo minó iyanuan kaúden máa semí, “Dunan amin naro sire ma Tiyarafenui veya mo siamin doran ma me ampín ída kama ukhen mino. ³ Máan tukhein mifo sífá tiváeyan noe, siretin aúbaná intéa anó banasi avorá kama ví bakan ná Kantá Aunan mano aúpin bíkakkaná kama afova van nafi mai finte vá dan manápá ifo afápá kan un kádan banta aviádesin ná mai yorantá betí ankan dafisino. ⁴ Dafisiyantí maé teti minó damú timúkiyáké Tiyarafenui veya siamiyá banasi aya ó tifanté uno.”

⁵ Banasi ano mai ma aposeri kayo ano ma sein baya van amusin uren mairá ákona mumunan iyan ma Kantá Aunan mano víkakhein banta Stivenin maman kaiyan Firipi má Prokorusin má Níkanorin má Timonin má Pamenasin má Antiokí banta Nikorasín má avían kaen mino. Nikorasi ída Yutan kéká pintena vanta ifo béi ena anan bantan báken Yutan kayoi monó dakhafiyán mino. ⁶ Máan turen mai

* 5:36: Apo 21:38 * 5:40: Apo 4:18 * 5:41: Mat 5:10-12; 1Pi 4:13 * 6:1: Apo 4:35

vanta kéká avían aposeri kayo vaintá me kaúdan mai yorari ino van ayan árontá kaúden avu uanten mino.

⁷ *Máan turan Tiyarafenui vaya ano minó barufá orera íkan Yerusalemiké kokhon nanin banta kayo ano aú baéden Yisasini eyo iyampon kayoi iyákan inká kokhon monó ánon banta kayo vá dere ano Tiyarafenui vaya iniren mumunan en mino.

Isarerii Ánon Banta Kayo Ano Ma Stiveni O Fákein Baya Ino

⁸ Tiyarafenui sarisari vá ákona vá ano Stivenimpin bikavin banasi aúbaná enará ukhein aní danasinta uvariyaen mino.

⁹ Máan tiyákan Yutan kayoi Monó Ano Ma E Anunurasá Bano ma sikhein monópin ma Sairiní baru vá Areksandriá baru vá inká Sirisia bara vá Esiá bara vápinté ma e varéin Yutan kéká ano mai vayará araíen Stivenin má asiven mino. ¹⁰ *Máa siyan maen Kantá Aunan mano Stivenin kama afova amiyán ma siyain baya mai kéká ano ída kanaíen ankaman durafurin nainíen mino.

¹¹ Máan tiyaiimpin mai setí inékun Mosesin má Tiyarafenui vái ankayan tiyan mino sino van mai kéká ano aúpáké ena vanta kayo mo arápiníen mino.

¹² Mai avúavasí o senten banasi vá monó ánon banta kayo vá man baya ma afova amin kayo vá arápiní uren Stivenin o fáken Kanisori kéká baintá mo khaen mino. ¹³ Mo khaúden béin aúfin manáa kampun baya sino van manáa vanta kayo síkan mai kéká ano máa semí, “Minó damú inétifékun ma vanta ano Tiyarafenui kantisí ukhein baru vá beni man baya vá ankayan tiyaren mino. ¹⁴ Máan tiyáken inká Nasaretike vanta Yisasi ano kasaen monó namun ankaman mádaren inká Mosesi ma setin timikhá ein avúavá do maman karúdenten mino siyáká iniyaré tiféuno.”

¹⁵ Máa siyan mai ma Kanisori namun ma varé ein kayo ano Stivenin purefure en oniyan maen ben auná ano enisori auná ma fanu seiníen mino.

7

Stiveni Ma Kanisori Kayo Manáa Vaya Siamein Baya Ino

¹ Máan turan mairá monó ánon banta kékái ánon banta ano Stivenin inaemí, “Ma ma éin nan tiyain baya kayo mai furá tiyan nafino.”

² *Máa síkan Stiveni evaránen temí, “Tifá tiváeyan má tifóeyan ma soe, siretí ankan ná ineno. Teti sinafu Abaraamu ma Mesopotemiá barafá ban ma Araní barufá ída orikhan maen inarufá ma minó ákona vain Tiyarafenui ano Abaraamu vaintá dákó en mino. ³ Dakó uven Tiyarafenui ano véin tiamemí, ‘E antun má ei vara vá ampireya séi ma aní onuna varafasá orono.’ *Esé 12:1*

⁴ * “Máa síkan Abaraamu Saridia vara me ampiren Arani varufá o varéin be afóe ma fúbikan Tiyarafenui ano véin tiantan ma ma saréa vaóna vara e varen mino. ⁵ *Maí damú Abaraamun ída manáa vara amikhan inká ída iyampon kaúkan maen Tiyarafenui ano siyáken, ‘Ma vara inaiimpáké e má en ana akhá bá amenté uno,’ sen iyáantákan mino. ⁶ *Tiyarafenui ano Abaraamun máa sen tiamemí, ‘En ana akhá ano ma ena varafá o soya ma vainí ukhantin kami kamí antareti (400) oranarái vetin uman amiyantin miyan ída van dorarí inten mino. ⁷ *Máan tinten mifo mai ma ída miyan ban dorarí uantiyaré inona kéká téi uman amirékun maen inaiimpáké betí mai vara me ampiren ma varará e váken téintá monó tinten mino.’ *Esé 15:13-14*

⁸ *Máa siren mairá Tiyarafenui ano Abaraamun má ma kasen báken au ma kaí pákena siamidán mairá Abaraamu ano Aisakin afóení uven béin kaúdan ma yan manápá ifo afápá kanú manáa damusí ma iyan maen béin au kharan inaiimpáké Aisaki ano Yekopun kaúdan inka Yekopu ano siyan míkan mifo sirantan kan orun kákan (12) banta setin tináuyan kaen mino.

⁹ * “Kaúdan mai sináuyan mano Yosepin ará namu uantáden avían ena kékápin mo sarí uran béin miyaní uren aviren Isipi

* **6:7:** Apo 2:41; 16:5 * **6:10:** Ruk 21:15 * **7:2:** Esé 11:31; 12:1 * **7:4:** Esé 11:31; 12:5 * **7:5:** Esé 12:7; 15:18; 17:8 * **7:6:** Esé 15:13-14; Eks 12:40 * **7:7:** Eks 3:12 * **7:8:** Esé 17:9-14; 21:4 * **7:9:** 37:11, 28; 39:2, 21-23 * **7:10:** Esé 41:37-44

morun kain baren mifo Tiyarafenu véin má báken ¹⁰ *beni uman kayo aya iyaren mino. Aya iyan Yosepi ma Isipíké Kin Fero má ma vaya siyákan Tiyarafenu véin kama afova amiyan kin mano véin nan moéken anunu uren mai van mi kin mano véin maman kamaniní urákan Isipí dafiaren ben amáká dafisen mino.

¹¹ *“Dafikaréin ínaimpáké Isipi vá Kenani vái varafin kákan anan eríkan kákan uman baren tetin tináuyan mano arafan nan ída kanaíen dunan doseren en mino. ¹² Mai umampin ban maen Yekopu iníkan Isipí dunan ban ne siyain baya iniren tetin tináuyan tiantan ída aravin táké araíen araven mino. ¹³ *Aravukharen ma evaránen kan dádasí en Isipí aravíkan mairái Yosepi veyan maman páman en be afá aváeyan tiamemí, ‘Téi Yosepi uno,’ ma siyain baya ínaimpá kin mano afová en be antun mi varéin mino sen mino. ¹⁴ *Mai oyampáké Yosepi ma siantan be afóe Yekopun má bei kéká minó ma o aviren erein mai seventifaipi (75) nanin banta ino. ¹⁵ *Yekopu ma Isipi orun baren ínaimpáké béi fúbin inká setin tináuyan má dere furen mino. ¹⁶ *Púbíkan ínaimpáké mai kéká daiyó en evaránen Sekemú barufá ma fefá Abaraamu ano manáa monípó Amarin akhafana finte miyaní ukhá ein barafin ma varé ein masípin mo masíen mino.

¹⁷ *Kokhon orana orivin maen Tiyarafenu ano ma fefá Abaraamun tiamen éin avu onté uno ma síkhá ein damú ádesí iyákan Isareri nanin banta ma Isipí baré ein mano mo ampan kauren kokhoníen mino. ¹⁸ Máan tiyákan Yosepin ída afová ukhein banta ano Isipii kiníen mino. ¹⁹ *Mai kin mano setisi kéká bá tináuyan má máká maáká en namu uantáden aase ma kaúdan iyampon arará kayo vá arin purino siren betin duvunin baren mo karúden mino.

²⁰ *Maí damú ana Mosesin ma ve anóe ano kaúden onan Tiyarafenuí avorá avorú iyampon baimpin be anóe afóe ano kanú manaú biyontá mápin aúpa dafisiyaren

mino. ²¹ *Dafisiyaren béin ma avían barufá kaúdan maen kin araun mano véin aviren mo ve akhasí uran baren mino. ²² Báken maen Mosesi ano Isipi kayoi kama afova variyáken e anoníen baya vantaí iyan ákona yorarién mino.

²³ “Máan ten oriyan ma Mosesi e anoníen foti (40) oranaí ma iyáken mairá be afá aváeyan Isareri kéká o onano van en mino. ²⁴ *Ineine uren oriyan o onákan mana Isipi vanta ano Isareri vanta aruren namu uantiyá íkan mai anonafá mai vanta mo ayaen Isipi vanta aruádan puren mino. ²⁵ Mosesi ma inikhá ein Tiyarafenu anon tiantan tetin me siya iyan mino sen bei kéká ano ovaren me ininten mino sen mifo vetí ída afová ukharen mino. ²⁶ Máan turákaren ena ákurá Mosesi oriyan o onákan Isareri vantá kan mano aruviyaréin béi mo yódá iyáken temí, ‘Tire anavasan mompo fará tirékan aruvianta fono.’

²⁷ “Máa síkan mifo mai aruvin ma araí uren ena vanta vá aruviyá ein banta ano Mosesin do ékiyáken máa semí, ‘Iye ano éin nan ánon bantaí ukheya setin daimono sikhaya fono. ²⁸ Éi ma inuran ma mana Isipi vanta ma aruan pureonaí eyá téin tiruan purono vara fono.’ ²⁹ *Máa síkan mairá Mosesi mai vaya iniren me onen karan Midianí barafá o soya vanta an dakhen baren maifá anasi mamáken kankanan afon iyampon kaen mino. ³⁰ *Kaúden baréin foti (40) orana esantari íkan banta i van kámá barafá Sainaí anuyon áde o varé íkan mana enisori ano ira khiyain daa finté uaren Mosesi vaintá dákó en mino. ³¹ Mai ira ma khiyan Mosesi ódaren kokhon ineine iyáken mai ma yákó iyain daná onano van áde oriven iníkan Bafan amen avaya ano máa semí, ³² ‘Téi en afóeyan ma vain Abaraamu Aisaki Yekopuni Ayarafenu uno,’ ma síkan Mosesin akhokhofen avinantan diyaimpin ída mo onen mino. ³³ Máan tiyaimpin Bafan mano véin tiamemí, ‘Mai ma éi mantakhaona vara mai kantasí ukhein bara

* 7:11: Esé 41:54; 42:1-2 * 7:13: Esé 45:1-4, 16 * 7:14: Esé 45:9-11; 46:27 * 7:15: Esé 46:1-7; 49:33
 * 7:16: Esé 23:2-20; 33:19; Yos 24:32 * 7:17: Eks 1:7-8 * 7:19: Eks 1:11-22 * 7:20: Eks 2:2 * 7:21: Eks 2:3-10 * 7:24: Eks 2:11-15 * 7:29: Eks 2:21-22; 18:3-4 * 7:30: Eks 3:1-10

yontá ifo ei arantan anamun ná do ayu-fono. ³⁴ Intéa uman ná tenti vanasi ma Isipí bain amaniná kaiyan nafi inka séi ódaré vetíi ifí inéi mai umanpinte utúantano siréi eré umpo varéa erikhesirá éin tiantéku evaránen Isipísá orono.’

³⁵ *‘Mai ma vetí ankan Mosesi nan tiyáken, ‘Iye anó éi nan tetintasá dafisiyáke vá daimono sirákaya fono’ siren ma veni vaya ída inen do ékein mai Tiyarafenu anon daa ana ma ira khiyain pinté béin nan ore vá betíi yafisiní ukhe mai uman pinte utúde vá avirano siren tiantein mino. ³⁶ *Mosesi ano Isipíke yo iyanen oriyáken maen Isipi varafin má Nare Non má inká foti (40) oranará banta i van kámá barafá báí enará ukhein ákona vá aní danasinta vá uvaren dararen ukharen mino.

³⁷ ‘Mai Mosesi anon Isarerin nanin banta máa sen tiamikharen mino. ‘Tiyarafenu ano sen ma erunaí ukhein mana sakhanampa vanta eni vanasi aúbanáke siantékun orinten mino,’ sen tiamikharen mino. *Diu 18:15*

³⁸ *‘Béi anon banta ída van kámá barafá banasi iyukhein aúbaná tetin tifóeyan má báken Sainaí anuyompin óden enisori vá un bákan Tiyarafenuí aun bain baya siamikharéin taréa setimpin e van mino.

³⁹ ‘Tiamíkan mifo setin tináuyan mano veni vaya átakharé en oyan amiren betin ma iniyá ein pura sen evaránen Isipí orono van mi inikharen mino. ⁴⁰ *Mai kéká ano Eronin tiamemí, ‘Mai ma Isipíke setin tiviren erein Mosesin amaniná ná yanasá dákó ukhen nafi seti ída afová ukhétifé umpo éi ena ayarafenu kayo uvádesin ná tetin tufá oriyan aa aníen tiviren orintísá orono.’ ⁴¹ *Máa siren maí damú anan arará burumakaó aman manon uváden betiyantá ma ayampóké uvarein danáká íkun uan amiyán amusin en maináká monosí uanten mino. ⁴² Máan tiyaimpin Tiyarafenu ano vetí ankan me oyan amiran maen ayontá ma vain danasintará betí araíen monó tianten mino. Máan ma ein manon sakhanampa vanta kéká ano ma vompon uvamádan baré einíen mino.

* **7:35:** Eks 2:14 * **7:36:** Eks 7:3; 14:21; Nam 14:33
32:2-6 * **7:45:** Yos 3:14-17 * **7:46:** 2Sa 7:1-16 * **7:47:** 1Ki 6:1-38

‘Isarerin nanin banta kayo oe, foti (40) oranará ma vanta ída van kámá barafá ma váke íkun uan amiyá eona yanasinta mai séin ná bare me susu sisintiyare rafono.

⁴³ Mai ma yavaráe fóké ma uvaran namun ma kampun ayarafenu Moreki nina ma vare nóke ma inká turetí ayampó ma uvaran kampun ayarafenu Refanini ofun amantá ma monosí uantiyaóna mai van mi séi siretin tiantéku mae Babironí esante enai varafá o soya ma vainí ukhe van nono.’ *Amo 5:25-27*

⁴⁴ ‘Tiyarafenu ano ma Mosesin tiamíden béin aníin onein mai avúaváká ten mi yavaráe fóké Tiyarafenuí má uváden maifin Tiyarafenu ano vetin má manafin ban baya kaúdan mi setin tináuyan mano vanta ída van kámá barafá baren noren mino. ⁴⁵ *Mai ma yavaráe fóké uvaran namun ma setin tifóeyan amin mamaren maen mai vá baren Yosua má enai vara varano siren oríkan Tiyarafenu ano vetin avorá mai kéká aren tain orivin mai namun mo khain mai varafá para van oriyan Devitini yamú mo kanaíen mino. ⁴⁶ *Tiyarafenu ano Devitin kama uantan béi amusin uaren Yekopuni Ayarafenu ma van nain namun uvarano siren béin inaúan inen mino. ⁴⁷ *Máa sen inaen mifo Soromoni anoi véin amá uvaren mino.

⁴⁸ ‘Máan ten mifo vanta fóké ma uvaran namumpin Dan Bain Tiyarafenu ano ída vákan sakhanampa vanta ano sikhen mino.

⁴⁹ ‘Bafan mano siyáken inarufái senti kini kumanin kará bákan bararái se sirantan kain baru van mifo siretí inté ukhein namun ná tentina uvarantó iyákeyá inká intefasá tenti sivíkan baru vanten nafino.

⁵⁰ Téin tiyan mano mai ídá minó danasinta uvante rafuno.’ *Ais 66:1-2*

⁵¹ *‘Tiretí ankan monó baya átakharéin nanin banta ma vainí ukheya ída vaya iniyáke Tiyarafenuí ída ará amiya

* **7:38:** Eks 19:3 * **7:40:** Eks 32:1 * **7:41:** Eks
* **7:51:** Ais 63:10

ono. Tiretí afóeyan ma iyaré einí eya minó damú Kantá Aunan mano ma siamiyain baya átakharé iya ono. ⁵²*Intéa sakhanampa vantá tiretí afóeyan mano fefá betin amaniná ídá uman amikharen nafino. Mai ma Funtákein Avúavá Baran Banta erinten ne sen tian dákó iyaré ein banta kéká inan aruan púkaré íkan mai vanta ma yákói mae saréa siretí anon avían namuro ayampin amen nan béin aruan puren mino. ⁵³ Tireti anan Tiyarafenui man baya enisori kayo finte vareona ifo mai ánain ída yakhafe ono.”

Stivenin Ma Onámaná Ankamein Baya Ino

⁵⁴ Maa síkan mai yafisin banta kayoi ánon banta kéká ano Stivenini vaya ma iniren maen béin nan aranan iyáken avayanan uanten mino. ⁵⁵*Máan uantiyákan Kantá Aunan mano Stivenin aúpin bíkavin inarufá mun onan Tiyarafenui kakhan má Yisasi véin ayan kurompá mantakharen mino. ⁵⁶*Mantakhan béi máa semí, “Inaru ona yiví téi oniyá umpo onano. Vanta Anin mano Tiyarafenui ayan kurompá mantakhen mino.”

⁵⁷ Maa siyain má betí atarentá iyáden avádóden bádiyáken Stiveni vaintá tavaen oren mino. ⁵⁸ Oren béin e yarifen kákan baru akhempá morun kaúden araién onámanápó ankamiyáken mai ma esé araién béin au finté ma iyá ein kéká ano vetí ayá buí dana ayúariyan Sorin ne sin pumara arantampin kaen mino.

⁵⁹ Stivenin ma onámanápó ankamiyan maen béi máa sen amúkemí, “Bafan Yisasi oe, séin taunan barano.” ⁶⁰*Máa siren aron kan daféden oovariyáken temí, “Bafan noe, vetí ankani ume vá ampiantano.” Máa siren aun ma vareinién puren mino.

8

¹ Sorin avorái Stivenin ma arin puriyan óden kana ino sen mino.

Yisasintá Ma Mumunan Iyain Kayo Ma Namu Uantein Baya Ino

Stivenin ma aruan purein táké arái uren mumunan nanin banta namu uanten inká monó ma siyain kayo ma Yerusaremí baré ein máden asuse iyaimpin monó nanin banta kayo me onen karan oreraen Yudiá barafa safi inka Sameriá barafa safi oriyákan aposeri kayo ano Yerusaremí pa varen mino. ² Tiyarafenu oo yaiyin banta kayo ano Stivenin daiyen mo masí uren kákantá kunien mino. ³*Máan ten mifo Sori ano monó nanin banta máden asuse iyáken mápin peren kuven iyan banta vá anasi vá do yarifen karavusifin mo khaen mino.

Firipi Ma Mo Sameriá O Varé Ein Baya Ino

⁴ Máan tiyan ma karan orera ein kéká ano mai ma karan oreípá mo monó baya siamen mino. ⁵ Máan tiyákan Sameriá akhempá mana varurá Firipi mo Tiyarafenu ano ma aní ukhein bantai vaya vanasi siamen mino. ⁶ Tiamiyákan kokhon nanin banta ano Firipin avaya iniyáken inká be ma enará ukhein avúavá ma yákó iyain oniyán maen ádé oriven kamaen inen mino. ⁷ Iniyákan Firipi ano kokhon namu aunan ma varé ein nanin banta aú pinte yo siantiyákan mai namu aunan kayo ano vádiyan orera iyan inká ai ayan ma fúkein kayofi arantan ma namu ukhein kayofi ayofiyákan banasi ano onen mino. ⁸ Máan tiyákan mai van mai varufin kákan amusin en mino.

Uvátakhan Banta Saimonini Vaya Ino

⁹ Máan tiyan Saimonin ne sin mana uvátakhan banta mai varurá bakan Sameriá akhempá ma varé ein nanin banta ano véin nan takha iyan maen béi siyáken, “Téi kákan banta uno,” siyaren mino. ¹⁰ Maa siyan minó ona vain má ída ona vain má ano veni vaya iniren béin amo siyan temí, “Moéken enarasí ukhein ákona e ma siyain ma vantafin ban mino.” ¹¹ Máan tiyan pefái veni uvátakhan nan takhaen eriyaren mai van béin ánain mana yakhafen mino. ¹² Máan tiyaréin ma Firipi ano Tiyarafenui kama yafisin baya vá inka Yisas Karaisin aví bá ma siamin iniyáken mai vayará mumunan uren minó

* 7:52: Mat 23:31 * 7:55: Íbo 110:1 * 7:56: Kor 3:1 * 7:60: Ruk 23:34 * 8:3: Apo 9:1, 13; 22:4; 26:9-11

nanin banta ano non baren mino. ¹³ Máan tiyan Saimoni veyan má mumunan uren monó non péden Firipin dakhafen nóken enará ukhein ákona vá aní daná bá ma uvariyan oniyáken takhaen mino.

¹⁴ Máan tiyákan baya varen orin banta kayo ma Yerusaremí ma varé ein mano iníkan Sameriá barafá ma vain nanin banta ano inka Tiyarafenui veya iniren mumunan iyané siyaimpin Pita nú Yonin nú tiantan maifá oren mino. ¹⁵ Békanan Sameriá ma orivin maen mai kéká ano Kantá Aunan barano van Tiyarafenu vaipá amúken mino. ¹⁶ Para va ino Bafan Yisasin avíká anan monó non péden mana ano ída Kantá Aunan mantaréin mino. ¹⁷ *Máan turen Pita nú Yonin nú ano vetin ánotá ayan kaíkan Kantá Aunan baren mino.

¹⁸⁻¹⁹ Aposeri kan mano ma ayan ánotá kain Kantá Aunan bariyain Saimoni ódaren moní baren betin me amiyan temí, “Téin dere mai ákona simikhesirá tiyan ma ánotá kaonuna nanin banta ano kanaíen Kantá Aunan barano.”

²⁰ Máa síkan Pita ano Saimonin tiamemí, “Ei moní bá en masá purase o aiy-orano. Para vara seyo, Tiyarafenu ano ma vei sarisarifó para amiyan ákona monípó miyaní onté unon te ine ono. ²¹ Tiyarafenui yorampin eni afokhan ída vanten mino. Para vara seyo, ven avorá en ará ída funtáken mino. ²² Máan tukhen mifó ará baéde Bafan Tiyarafenu ámúkesin ná e aúpin ma namu avúavá inin ma ineona ume vá ampiantano. ²³ Téi farava máa siya rauno. Éin ma oniyaruna Tiyarafenui ákona varano van moéke anunu e nan mai ano éin avíáda umei unampin bae ono.”

²⁴ Máa síkan Saimoni evaránen békanan tiamemí, “Bafan baipasá amúkusintésin ná mai ma sen timaniná dákó ino seona yaná ída vá dákó ino.”

²⁵ Pita nú Yonin nú ano ma Bafani veya siamiyáken beni ana veya maman dákó uren Yerusaremí evaránen oriyáken Sameriá akhempá ma vain baru kayo fimpá kama veya e siamen oren mino.

Firipin Má Itiopiá Banta Vái Vaya Ino

²⁶ Mai damú Bafani enisori ano Firipin máa sen tiamemí, “E mante sautí aravúve vá mai ma Yerusaremí kámá barafá aravuaren ma Khasá oriyain aintá o muntave vá aravono.” ²⁷⁻²⁸ Máa síkan Firipi e manten mai aasá araviyaren mana Itiopiá bara fáke kákan banta vá o fóken mino. Béi maen Kandasin ne sin Itiopia kayoi kuinini moníká dafikein doran banta* váken Yerusaremí monóká erikharen bei karisifin kumamen evaránen bei varufá oriyáken mana sakhanampa vanta Aisaiyani vompon dóki finte yankafen oren mino. ²⁹ Mai vompon onen oriyákan Kantá Aunan mano Firipin tiamemí, “Mesan karisi vaintá oriveya mai ádé orono.”

³⁰ Máa síkan Firipi savaen mai karisi ádé oriven iníkan mai vanta ano sakhanampa vanta Aisaiyani vompon dóki finte yankafiyaréin béin máa sen inaemí, “Mai ma yankafiyaona vomponi ana afová ukhe fono.”

³¹ Máa sen ina íkan mai vanta ano semí, “Ída ma mana vanta ano sisimintí intesá erá téi mai vayai ana afová onte rafuno.” Máa siren mai vanta ano Firipin aran mai karisifin ben má un kumanen mino.

³² Mai ma kuinin ayain banta ano ma yankafiyá ein bompon mano máa mi sikhen mino,

“Mana sipisipi arono van aviren oren ma inká ayo yo khaono van aviren oren íkan

ma ída vádeiní en be oo fáken mino.

³³ Béin maman bara ana kanti ana uren ída funtákein kó tiantáden ma vara ráke ven aunan do manteini ana akhá i vain pasen banasi ano ída o araren tinten mino.”

Ais 53:7-8

³⁴ Mai vompon ma yankáden mai vanta ano Firipin inaemí, “Tisimeno, mai sakhanampa vanta ano ma sikhein beyan nará tikhen nafi áa ena vanta vará tikhen nafino.” ³⁵ Máa sen ina íkan mai ma yankafein baya ana Firipi araíen tian dákó iyan inká kama veya ma Yisasin nan tikhein nan tiamen mino.

* **8:17:** Apo 19:6 * **8:27-28:** Mai vanta avankan bíkein banta ino. Para va ino, vetí man baya ano siyáken kuinini yoran bantaí ma inona ano avankan ná do viseno sikhan mino. * **8:36-37:** Apo 10:47

36-37 *Békanan mai vaya e sen oriyan baren manáa non baintá oriven mai vanta ano siyáken, “Onano masi non eraviyan mifo fara vará téi ída monó non perante rafuno.”* 38 Maa siren mai vanta ano síkan mai ma oriyarein karisi ma fákaran Firipi má mai vanta vá nompin aravuvén Firipi ano mai vanta monó non péanten mino. 39 Péantáden békanan non me ampíren aifá édákan Bafani Kantá Aunan mano Firipin do aviren enafá orivin ída véin onen mifo mai vanta ano amusín en bei varufá oren mino. 40 *Firipi maen intesá eipáke safi Asotusí barufin o afoká uven mai ráké araíen Yisasini kama vaya minó baru kayofin e siamen oriyan baren Sisariá e unen mino.

9

Sori Ano Ma Vei Ará Baerein Baya Ino

1 *Maí damú ana Sori ano Bafani eyo iyampon kayo aruan purono van pa sinko sen oriyáken 2 Damaskasí monó átaru namun kayofin mai intéa nanin banta anó Aa Ma Yakhafin Kéká* banafi mai vetin páken Yerusaremí karavusifin mo kaono van Sori ano Damaskasí monó ánon banta kayoi ánon banta mo inaen mino. 3 Ina íkan eyo sin Sori oriyan baren Damaskasí áde oriyain má inaru fáké kakhan mano manádá béin panu sen eúkuáden mino. 4 Máan tiyain má Sori varará eraven ankamen iníkan mana oo va ano máa sen tiamemí, “Sori oe, Sori oe, náí ana vará tein namuroí usintiya fono.”

5 Maa síkan Sori inaemí, “Bafan noe, éi iye fono,” síkan béi evaránen temí, “Maí ma séin namuroí iyaona mai séi Yisasi uno. 6 Máan tiya ompo éi mantave kákan barufin ódesin maen inte yanasá barante fo mai mana vanta anon tiaminten mino.”

7 Maa sin maen Sorin má ma oriyaré ein banta kéká ano vaya ída sinton mairá mantakhen mai vaya inen mifo mana vanta ída onen mino. 8 Maa siran Sori varará bakharen orun mantaaren auu

máben onákan auu sítípa ukhen ída mana yaná onarí iyaimpin ben má ma orikhá ein kéká ano ayan noren Damaskasí barufin óden mino. 9 Moran maen kanú manaú damúi Sorin auu yufúkuvin báken mana yunan nafi non nafi ída niyan mino.

10 Damaskasí barufin maen mana Aniasin ne sin eyo iyampon baré íkan Bafan mano auu véden béin ariyan temí, “Ananiasí oe,” síkan béi evaránen temí, “Boe, Bafan noe,”

11 síkan Bafan mano véin tiamemí, “Sori maen taréa sentá amúkiyan ban mifo vá Puntákein Aasá oriare Yudasín amá orive Tásusíke vanta Sorin nan muno se vá ina ono. 12 Béin auu vaédan Aniasín ne sin banta ano véin ánotá ayan mo kaíkan béin auu evaránen kama iyan onen mino.”

13 Maa síkan Aniasí evaránen Bafan tiamemí, “Bafan noe, Yerusaremí ma ení mumunan nanin banta vain amaniná ma má vanta ano ída funtákein avúavasí ma iyain nan kokhon manon ten orera iyá inikhé uno. 14 Máan tiyáken monó ánon banta vaípákena eyo sin ákona vompon amin mamaren entá ma monó tiyain kéká minó karavusi fákano van mará erikhen mino.”

15 *Maa síkan Bafan mano siamemí, “Ena anan kéká bá betí kin kayo vá inká Isarerí nanin banta vápin tenti monó baya varen orino van béin inka aní ukhé umpo vá orono. 16 *Téin tínain ma vákurin naintá béi intesá ená uman baranten nafi mai véin aní onté uno.”

17 Maa siran Aniasí orein mano mai namumpin ódiven Sorin ánotá mun ayan kaiyan temí, “Tifá tiváe Sori oe, mafá ereno van eriyáe nan ma ayanafá dákói ma oneona vanta, Bafan Yisasi ano éin nan evaránen auu mábé onesin Kantá Aunan mano éimpin bíkano van mi séin tisintá eré uno.” 18 Maa siyain má anan Sorin auufenté ataro ma yo siven eraveiní íkan evaránen auu máben oniyáken e manten monó non peren mino. 19 Péden manáa

* **8:36-37:** Ínaimpáké manáa vompompin ena vaya ves 37 fin asotú ukhen mino: Maa síkan Firipi semí, “Éi ma e aúkáké mumunan iyante fara monó non baran nono,” síkan mai vanta ano evaránen béin tiamemí, “Yisasi Tiyarafenu Anin ma varará nanin banta evaránen aviran bantan bá bentá mumunan iyá uno.” * **8:40:** Apo 21:8

* **9:1:** Apo 8:3 * **9:2:** Aa Ma Yakhafin Kéká maen Yisasín ánanin bákuriyain kayo van tikhen mino. 19:9, 23; 22:4; 24:14, 22 fin ná dere onano. * **9:15:** Apo 26:2, 6; 27:24; Rom 1:5 * **9:16:** 2Ko 11:23-28

yunan naren bei ákona evaránen maren Damaskasí ma varé ein eyo iyampon kayo vá manáa yamú baren mino.

Sori Ma Damaskasí Bá Yerusaremí Bá Ma Varé Ein Baya Ino

²⁰ Ákona mamaren esé ana e manten Yutan kayoi monó átaru namun kayofin oriven Yisasi Tiyarafenu Anin mino sen araíen monó baya siamen mino. ²¹ *Máa síkan beni vava ma inein nanin banta minó ano anúden orera iyan máa sen inaemí, “Mai ma Yerusaremí ma Yisasini eyo iyampon kayo aruan puriyan karavusi fakaádaren ma inká maráke kayo vá dere karavusi fáke monó ánon banta kayoi monó ánon kéká baípa orono van ma erein banta fino.” ²² *Máa siyan Sorini monó baya ano moéken ákona íkan Damaskasí ma varé ein Yutan kayo ano Yisasin nan Tiyarafenu ano ma aní ukhein banta ino sen afová uren akhokho van ída evaránen béin má manáa vava sen mino.

Yutan Kayo Ano Ma Sorin Aruan Purono Van Iyain Baya Iniren Ma Karan Orein Baya Ino

²³ Máa sen kokhon damú oriyan maen manáa Yutan kayo ano Sorin aruan purono van aúpáké baya sian damuáden mino. ²⁴ Máa siren mai Yutan kayo ano Sorin aruan purono van mai varui yafu ona kayo ma vaintá ena ena vayan má inuran má dafían ákona iyain baya Sori inen mino. ²⁵ *Máan tiyákan ben ma vákuren noré ein kayo ano inuran pinté Sorin do aviren mo basketifin dan kumámin mairá anan damuren kafi ain pinté dan aravuaren me onen oren mino.

Sori Ma Yerusaremí O Varé Ein Baya Ino

²⁶ *Oren ma Yerusaremí oriven Yisasini eyo iyampon kayo vá o asotú uvé dorano van íkan betí ankan béin nan ída fura sen eyo iyamponí ukhen mino sen anomé iniyáken béin nan peren mino. ²⁷ *Máan tiyaimpin Banabasi ano Sorin aviren baya varen orin banta kayo vaintá moren Sori inté ená ayanafá oriyaen Bafan onaná béin baya siamidán inká béi inté ená

Damaskasí barufin Yisasin aví ída feranton ná tian dákó ena fi, mai fákena vetin tiamen mino. ²⁸ Tiamídan Sori vetí ankan má báken Yerusaremí ída feranton Bafan aviká kasaen nóken banasi monó baya siamiyaen mino. ²⁹ Tiamen nókan Kiriki vava ma siyain Yutan kayo ano véi má baya fóké asive asive iyáken mai kéká ano véin aruan purin aa van dosiyaen mino. ³⁰ Máa siyain baya ma monópin bain afá aváeyan mano iniyáken béin do aviren Sisariá morúden tiantan Tasusí oren mino. ³¹ Orivin mumunan nanin banta ma Yudia safi Karirifa safi inká Sameriá akhempa safi ma varé ein kéká Kantá Aunan mano mumunan ákona uantan kokhon mano vetimpin o asotú íkan amusin pinté kusen báken Bafan nan péan amiyaen mino.

Ainiasin Nú Dokasin Nú Vava Ino

³² Pita ma minó akhempá doren noren maen Ridá barurá ma mumunan nanin banta vain onano van oren mino. ³³ O varen mai varu finte Ainiasin ne sin banta onákan dan manápa ifo kanú manáú oranará ai ayan púkan kúkútafin mana vakhen baren mino. ³⁴ Baréin Pita véin tiamemí, “Ainiasi oe, Tiyarafenu ano ma aní ukhein banta ano ayofen mifo mantave yuvasí dádá ono.” Máa siyain má ana Ainiasi orun manten mino. ³⁵ Máan tíkan Ridá barurá ma varé ein nanin banta vá Seroní puntákein avafin ma varé ein nanin banta vá ano mai vanta amininá ma yákó ein daná ódaren betí ará baéden Bafan baípa eren mino.

Tabita Ne Sin Nanin Ma Fúkaren E Mantain Baya Ino

³⁶ Máan tiyákan mana mumunan nanin Tabitan ne sin nan ma Kiriki vava finté Dokasi ne siyain nanin mano Yopá barurá báken minó damú béi kama avúavá ana variyáken ona ma i van nanin banta aya iyaren mino. ³⁷ Aya iyaren aí baren púbíkan non péantáden dan bain karafarampin mun asédan baren mino. ³⁸ Ridá baru maen Yopá baru ádé baré íkan eyo iyampon kayo ano inin Pitan nan Ridá barurá ban ne siyaimpin kan banta siantan béi vaípa onóben temí, “Aine setí

ma varuna varufá tare ana orono van muno,” siren tútúpen mino.

³⁹ Maa síkan Pita maí kan má oren onóbin do aviren dan bain karafarampin ódíkan minó baré nanin kayo ano véi vaintá e iyen eúkuven ifídiyáken Dokasi ma vetin má para váken amu uariyan amiyaré ein iyon afuin má ona vá Pitan aníen mino.

⁴⁰ Maa turan Pita ano minó nanin banta siantan barará karafarampin ar-avuvíkan aronkan durafúden amúkuren mai ma fúkein nanin baípá do vaében temí, “Tabita oe, orun mantano,” síkan mai nanin auu máben Pitan me oniyán orun mantaan kumanen mino.

⁴¹ Kumamin Pita ano mai nanin ayan pákaren ayain mantavíkan mairá mumunan nanin banta kayo vá baré nanin kayo vá aran édákan mai ma fúká ein nanin ayun para van aní in onen amen mino.

⁴² Mai ma yákó ein baya ano Yopá barufin orera íkan iniren kokhon nanin banta ano Bafantá mumunan en mino. ⁴³ Maa turen burumakaó aufó ma minó daná uvariyan banta Saimoni má Pita manáa yamú baren mino.

10

Tiyarafenui Enisori Ano Ma Koniriasi Vaintá Afoká Ein Baya Ino

¹ Sisariá barurá mana Koniriasin ne sin banta váken Itaríke aruvin banta kéká ino ma siyain pintena mana antareti (100) aruvin banta kayorá dafisiyaren mino.

² Dafíken báken be má minó be antun má Tiyarafenu aránaó báken bentá mumunan iyan maen Yutan kayofin ma ona i vain nanin banta aya iyáken minó damú Tiyarafenu vaípá amúkiyaren mino.

³ Maa tiyaren mana inúpáké kanaú manaú áauí iyan béi onákan Tiyarafenui enisori ano yákó ma ereiní uaren “Koniriasi oe,” sen me aren mino.

⁴ Arákan Koniriasi akhokho van mo furefure en oniyáken “Bafan noe, náí fino,” sen béin ina íkan enisori ano evaránen tiamemí, “Éi ma amúkiyaóna vá inká ona ma i vain nanin banta ma aya iyaóna avúava san Tiyarafenu ano anunu

iyáken amusin uantiyan mino. ⁵ Maa tukhen mifo saréa ana manáa vanta kayo siantesin Yopá barurá oren Saimonin ne sin banta van ma Pitan ne sen ariyain banta mo yosiren aviren ná erino. ⁶ Mai vanta maen ena Saimonin ne sin banta ven amá un non akhempá bakan burumakaó au fóké ma manáa yaná uvaré iyain mai vanta vái véi van mino.”

⁷ Maa siren mai ma véin tiamein enisori ma orivíkan Koniriasi vei yoran bantá kanan má mana aruvin banta veyan dere Tiyarafenu ma anunu ukhein avúavá ana ma vákuriyain banta vá aren mino. ⁸ Aran eríkan mai ma afoká ein danasinta van tiamíden mai kanú manaú tiantan Yopá barufá oren mino.

Pitan Ma Auu Vaédan Onein Baya Ino

⁹ Oren ayanafá e vakharen ena ákurá Yopá baru adé oríkan mo vayaní iyan maen Pita amúkono van má daró óden mino.* ¹⁰ Pitan arafan puriyákan dunan nano van iyan para yunan taren tasu sasú ein pinté béin auu vaédan maen ¹¹ inaru ona yivin mai finté davaráeren daná minó kamí kamí akhen pákaeren dan barará eren mino. ¹² Maifin ara ara osafáe kayo vá ayon pinte nun kayo vá inká ara ara safúna kayo vá bikakharen mino. ¹³ Maa tukhan Pita iníkan mana vaya ano siyáken, “Pita oe, mantave ma safúnan kayo arure nano,” sen béin tiamen mino.

¹⁴ *Maa síkan Pita evaránen tiamemí, “Éin avorá ída avusese en ída funtákein dunan báká ída nakherúnan bantí Bafan noe, ída séi nanté uno.”

¹⁵ *Maa síkan mai vaya ano evaránen kan dádasí en béin tiamemí, “Téi Ayarafenu ano ma maman avusese uranuna yana san i vá teya fainí ukhen mino seno.”

¹⁶ Mai ma sein baya ana kanú manaú dádasí en tiamíden ainen evaránen mai yavaráe varen inarufá óden mino.

¹⁷ Maa turan mai ma auu vaédan onein danasinta van inté ukhen nafino sire Pita kokhon ineine iyan bakan mai ma Koniriasi siantan Sisariáké erein kanú manaú banta ano Saimonin ama san o inaen eriyán baren dafu onará e manten mino.

* **10:9:** Isareri kayoi má daro avaién ákona ukhan mairá onóbe enóbe é iyan mino. * **10:14:** Riv 11:1-47; Isi 4:14 * **10:15:** Mak 7:15, 19

¹⁸ E mantaven maen oovaraáden inaemí, “Saimonin nan ma Pitan ne siyain banta ma namumpin ná báé iyan nafino.”

¹⁹ Maa sen ina iyákan mai ma auu vaédan ma onein danasinta van Pita fa ineine iyan maen Kantá Aunan mano véin tiamemí, “Saimoni oe, kanú manaú banta ano en nan dosen e van mino. ²⁰ Dosiyan mifo ída vá kokhon ineine iyáke vá téi anon betin tiantékun erikhen mifo ar-avuve vá betin masá orono.”

²¹ Maa síkan Pita aravein mano mai vanta kanú manaú morun tiamemí, “Tiretí ankan ten nan mi yosia ompo fará ere fono.”

²² Maa sen ina íkan mai maa kanú manaú banta ano evaránen temí, “Mana antareti (100) aruvin banta kayorá ma yafíkein Koniriasin ne sin banta maen Tiyarafenu van péden béin avorá puntáken bakan Yutan nanin banta kayo ano véin nan kama vanta ino siyain bakan kantasí ukhein enisori ano éin nan o aviren erinti vá éi ma siaminona vaya vá inino siren béin tiamídan tetin tisintái éin avirano van mi eré tiféuno.” ²³ Maa síkan Pita mai vanta kanú manaú e araádan be ma varé éin namumpin óden mino.

Pita Ma Sisariá Barurá Oren Koniriasin Amá O Varein Baya Ino

Un bakharen ena ákurá Pita mai kayo vá oríkan Yopá baru ráké manáa monópin bain afá aváeyan mano vetin má oren mino.

²⁴ Orein ayanafá e vakharen ená damú Sisariá oriyan maen Koniriasi o varen me afová iyan máan ten betin nan erinten mino siren bei kama arona kayo vá be antun má o iyanuádaeren betin má manafin átaru ukhen ave iyaren mino. ²⁵ Átaru ukharéin Pita ma mápin ódiyain má Koniriasi oniyáken aufá mo aron kan daféden béin monosí uanten mino. ²⁶ *Máan tikan Pita ano véin orun ayanoá diyáken, “Mantano séi éi ma eonái é ma varará banta uno,” sen béin tiamen mino.

²⁷ Máan turen Pita mairá be má e vaya sikhhan mápin ódiyain un onákan kokhon nanin banta e átaru ukharen mino. ²⁸ Átaru ukharéin Pita mai nanin banta siamemí, “Tiretí afová ukhen nan

tetisi man baya ano siyáken Yutan kayo ano ena anan banta vá ída vá manafin báke ída vá betí baintá orono sikhhen mifo Tiyarafenu ano siyáken ída vá mana vanta van ída funtákeona váke ída sesé ukhaona ono se vá tiameno sen téin aní uren tisi-men mino. ²⁹ Mai ana van mi éi ma vanta kayo sianten nan oriká ída áao sin éin oo yaiyé ereruna van mi éin inaiyá umpo náí vará téin tare fono.”

³⁰ Maa sen ina íkan Koniriasi evaránen tiamemí, “Kamí kamí damú oriyan mifo kanú manaú áauíen inúpasí iyáká te simápin timúkiyá baréékun manadá mana vanta ano vei auí daná kaké panu sivin ten tufá e manten mino. ³¹ E mantaven mai vanta ano maa semí, ‘Koniriasi oe, éi ma kama avúavasí eya ona ma i vain nanin banta ma aya iyaona van Tiyarafenu ano amusin uren inka eni amúkin inen mino. ³² Máan tukhen mifo Saimonin nan ma Pita ne sen ariyain banta ano vurumakaó au fóké ma manáa yaná uvariyan Saimonin ne sin banta amá ma un non akhempá baimpin ban mifo manáa vanta siantan ná Yopáké o avirano.’ ³³ Maa sen tisimein nan mi éin ainen o avirano van banta siantékun oríka kama avúavasí eya ere ompo intéa vayá tetin tisimeno van Bafan mano siamí inikharé intefo sare ana minó ano inintó bá tifé umpo Tiyarafenu avorá tisimí inétifano.”

Pita Ma Koniriasin Amápin Yisasini Kama Vaya Siamein Baya Ino

³⁴ *Maa síkan Pita araién betí ankan tiamemí, “Tiyarafenu ano minó ara ara nanin bantafin manaí ukhein avúavasíen aya iyái saréa inka séi fura sé afová é uno. ³⁵ Máan té iyan mifo minó kéká pinté intéa nanin banta anó ben nan péden ben aránaó báken puntákein avúavá ana variyan nafi mai nanin bantan Tiyarafenu ano aviré iyan mino. ³⁶ Máan tukha siretí afová e nan mai kayoi Bafan ma vain Yisasi Tiyarafenu ano ma aní ukhein banta finté uaren kamaen kusen ma van baya Tiyarafenu ano Isareri nanin bantafin dan erakhen mino. ³⁷ *Yoni ano ma monó non péantádan intéa yanasá Karirifá arái uren Yudiá barafá oreraen dákó ukhen nafi mai siretí ankan afová

* **10:26:** Apo 14:13-15; Rev 19:10 * **10:34:** Diu 10:17; Rom 2:11 * **10:37:** Mat 4:12-17 * **10:38:** Mat 3:16; Ruk 4:17-21

ukha ono. ³⁸ *Nasaretí kena vanta Yisasín Tiyarafenu ano intesá ená bei Kantá Aunan má ákona fóké bá aní uran intesá uren ná Ban Anoni ákona ano yaramádan baré ein nanin banta aya uren ayofen noren nafi mai Tiyarafenu véi má túpá ukhan mino.

³⁹ Yutan kayoi varafá bá Yerusaremí barufin má ma variyaré ein maen mai minó danasinta setí ódarékun inká béin daa unkamádan tá arin púkaréin ⁴⁰ kanú manaú bayan orivin Tiyarafenu ano furin pinte orun avían mantarákan banasi avorá orin onen mino. ⁴¹ *Máan ten mifo minó nanin banta ano va véin onen naino. Mai ma Tiyarafenu ano ma fefá aní ukhá ein kéká ma varé e tifékun ma véi fúkaren e mantaaren dunan nen non nen í ontaréi sian páman iyá tiféuno. ⁴² *Tiyarafenu ano véin nan mi fa ma ayun bain má púkein nanin banta vái yaimin banta vá bano siren pefá aní uran baren mino se vá pura veya vanasifin tian amesin ná inino siren tetin ákonaen baya sisi-men mino. ⁴³ *Béintá ma mumunan inain nanin banta van Tiyarafenu ano véin pinté uaren ume kayo ampiantanten mino sen minó sakhanampa vanta kayo ano ven nan pefá o utúben tian amá uran baren mino.”

Ena Anan Nanin Bantafin Ma Kantá Aunan Erein Baya Ino

⁴⁴ *Pita ma Tiyarafenui veya fara siamiyan bakan maifin ma e átaru ukhen mai veya ma iniyá ein nanin banta amaniná Kantá Aunan mano eren mino. ⁴⁵ Pitan má ma mumunan Yutan kayo ma orikhá ein kéká ano onan ena anan nanin bantafin dere Kantá Aunan banaan amiyaimpin betí anúden oreraen mino. ⁴⁶ *Para va ino mai kéká ano ara ara veya fóké Tiyarafenu aví daní iyan betí ankan iniren mino.

Máan tiyaimpin Pita semí, ⁴⁷ “Tetí ankan ma Kantá Aunan baré tiferuna avúaváká ten mi ma kéká ano Kantá Aunan baren mifo iye anó kanaíená ma nanin banta ano ma monó non peran nain aa iyarante fonó.” ⁴⁸ *Máa siren mai nanin banta

van Tiyarafenu ano ma aní ukhein banta Yisasín avíkasá monó non perano siran betí ankan monó non péden mai oyampáké manáa yamú betín má bano van Pitan inaen mino.

11

Pita Vaintá Ma Afoká Ein Danasinta Van Ma Veyantá Puntáden Tian Amá Ein Baya Ino

¹ Ena anan kéká bá ano yere Tiyarafenui veya iniren mumunan iyan mino síkan Yutan barafá ma veya varen orin banta kayo vá monópin ma varé ein afá aváeyan má ano inen mino. ² Mai veya iniren baintá Pita ma Yerusaremí unóbíkan au khavin avúavá ma fara fákaren bain mumunan nanin banta ano véin oyampá baya sen asiyáken ³ *máa semí, “Ída au khavin banta kéká amái o fébe veti má dunan niya ono.”

⁴ Máa síkan béi vaintá ma afoká ein danasinta van puntáden araién tian amá en mino. ⁵ * “Yopá barurá téi simúkiyá baréekun tuu vaédá onékun inaru fáké mana kákan davaráeren daná kamí kamí akhentá pákaaren te vaintá dan eren mino. ⁶ Eriyain má maifin purefure é onékun ayuntáke safúna kayo vá afá tafúna kayo vá ara ara osafáe kayo vá inká ayompin ma noin nun kayo vá baren mino. ⁷ Baré íkan mana veya ano séin tisimemí, ‘Pita oe, orun mantave mai yanasinta arure vá nano.’

⁸ “Máa síká téi evaráné tiamiyáké, ‘Bafan noe, éin avorá ída funtáken ída avusese ukhein daná baká ída nakherunan bantí téi ída nanté uno.’

⁹ “Máa sékun inaru fáké kan dádasí en temí, ‘Ayarafenu ano ma maman avusese uran bain danasinta van ída vá painí ukhen mino seno.’ ¹⁰ Mai ma sein baya kanú manaú dádasí en tisimíden minó danasinta evaránen darifan inarufá óden mino.

¹¹ “Máan turan maí damú ana Sisariá baru ráké mana vanta ano kanú manaú banta siantan téin tivirano van eriyain baren te ma varuna namun eren mino. ¹² Eríkan Kantá Aunan mano séin

* **10:41:** Ruk 24:42-43; Apo 1:8 * **10:42:** Apo 17:31; 1Pi 4:5 * **10:43:** Ais 53:5-6; Yer 31:34; Apo 2:38 * **10:44:** Apo 11:15; 15:8 * **10:46:** Apo 2:4; 19:6 * **10:48:** Apo 19:5 * **11:3:** Apo 10:28; Kar 2:12 * **11:5:** Apo 10:9-48

tisimiyáken, ‘Éi ída vá kokhon ineine iyáke vetí ankan masá orono,’ síkan dan manápá ifo afápá mana un kádan tifá tiváeyan ma monópin bain kéká ano yere se má oríká oriyá baré mai ma siantan erein banta amá ódé uno. ¹³ Ódékun béi inté ená mana enisori onan ná ben amápin dákó uven tiamiyáken, ‘Banta siantesin Saimonin nan ma Pitan ne sen ariyain banta vá Yopá baru ráke o avire ereno.’ ¹⁴ *‘Béi maen manáa vava varen éin me siamintin mai vava finté uaren Tiyarafenu ano éin má e antun má evaránen aviranten mino.’

¹⁵ *‘Máa sirá téi arái uré baya siyáku esé aráiintá ma setimpin Kantá Aunan mano erein avúaváká ten betimpin eraven mino. ¹⁶ *Máan tíkan Bafan mano fefá tiyáken ma Yoní ano nompói vanasi monó non péanten mifo siretí ankan Kantá Aunan pói féantanten mino ma sikhá ein baya ovaré me iné uno. ¹⁷ Pefá ma Tiyarafenu ano ma aní ukhein banta Bafan Yisasintá mumunan ékun ma Tiyarafenu ano Kantá Aunan amusin timikharen mi saréa Tiyarafenu ano manái amusin mana ena anan kéká amikhen mifo séi iyé barerá Tiyarafenui yoran are onte rafuno.’

¹⁸ *Máa sin ma vetí ankan mai vava iniren mairá ída ananin baya sen mifo Tiyarafenu aví ana maman daní iyáken temí, ‘Ena anan banta ano ma ará baeran inan Tiyarafenu ano kanae sein pasen betin má deren para van oriyan ban aunan baranten mino.’

Siriá Barafin Ma Vain Antiokí Monó Nanin Banta Fákena Vaya Ino

¹⁹ *Stivenin ma arin púbin maen Yisasintá ma mumunan ukhá ein kéká namu arirí iyámpin betí ankan me onen Fonisiá akhempa safi Saipurúsí akhempa safi inká Antiokí barura safi karan orera iyáken Yisasini kama vava Yutan nanin bantafin mana e siamen oren mino. ²⁰ Máan tiyákan maen betin aúbaná manáa Saipurúsíke vanta kayo vá inká Sairiní baru ráke kéká bá baren Antiokí barurá oriven Kiriki nanin bantafin dere Bafan

Yisasini kama vava fákena vetin tiamen mino. ²¹ Tiamiyákan Bafani ákona ano vetí ankampin bakan pasen kokhon ena anan nanin banta ano Bafantá mumunan uren ará baeren béi vaípa eren mino.

²² *Máan tiyain baya ma Yerusaremí mumunan nanin banta varé ein kayo ano iniren Banabasin tiantan Antiokí oren mino. ²³ Oren o unaven onákan Tiyarafenu ano ma vetin kama uren tarisari uantiyaré ein ódaren béi amusin iyáken betí aúkáké pura sen Bafan má ana vano van betin ákona uanten mino. ²⁴ Béi kama vanta vákan Kantá Aunan mano véimpin bikakhan maen béi ákona mumunan má baken kokhon nanin banta kayo aya uren Bafan baípa o aviádan eriyaren mino.

²⁵ *Máan turen Banabasi ano Sorin nan doseno van Tasisí barufá oren mino. ²⁶ Oriyan baren béin mo ódaren o aviren Antiokí meran baren mino. Baken mai orana aúpin Banabasin nú Sorin nú ano mumunan nanin banta kayo vá manafin átaru uviyan kokhon nanin banta kayo Tiyarafenui afova vava siamiyaren mino. Máan tiyáken eyo iyampon kayo van Karaisini kéká se sen esé araién Antiokí aví tein mino.

²⁷ Máan tiyain pimpá ana manáa sakhanampa vanta kayo ano Yerusaremí me ampiren Antiokí eren mino. ²⁸ *Eraven mai kayo finté Akhabusin ne sin sakhanampa vanta ano orun mantaaeren Kantá Aunani ákonará máa semí, ‘Kákan anan dákó intin Romi kamanin mano ma yafikein bara kayofin arafan nan puren orera inten mino sikháin ma Sisa Kraudiasi ma kiní uven dafisein damú mai yaná dákó en mino. ²⁹ Máa síkan iniren Yisasini eyo iyampon kayo ano veyan ma ukheí páké en Yutan barafá ma monópin bain afá aváeyan aya ono van baya sian damuáden mino. ³⁰ *Mai ma sian damuádeiníen betí amusin moní Banabasin nú Sori nuká kaúden tiantan baren Yerusaremí monó doran banta kayo mo amen mino.

12

* 11:14: Apo 16:31 * 11:15: Apo 2:4 * 11:16: Apo 1:5 * 11:18: Apo 13:48; 14:27 * 11:19: Apo 8:1-4
 * 11:22: Apo 4:36 * 11:25: Apo 9:30 * 11:28: Apo 21:10 * 11:30: Apo 12:25

Kin Eroti Ma Pitan Páken Karavusifin Mo Khaein Baya Ino

¹ Máan tiyain pimpá ana Kin Eroti ano manáa mumunan nanin banta kayo aruren namu ono van karavusi fáken mino. ² Pákaan kaúden béi ano síkan Yonin aváe Yemisin baenatifó anuran tikan puren mino. ³ Máan turen Eroti onákan Yutan kayo ano mai avúava san amusin iyaimpin Yisi Ída Van Bereti Ma Nan Omá Damú Pitan má dere fáken mino. ⁴ Pakaáðaren Tiyarafenu ano ma Isareri nanin banta Avo Uantan damú ma esantavintí Pitan avían banasi avorá kaúde daimonté uno sen iniren Eroti ano Pitan avían dumukatifin kaúden sikistini (16) aruvín banta kayo ayampiní uran kamí kamí ano yafidú iyaren mino.

⁵ Pitan ma yumukati namumpin kain ban maen béin Tiyarafenu ano ayaino van monó nanin banta ano ákonaen amúkiyaren mino.

Tiyarafenui Enisori Ano Ma Pitan Karavusi Finté Útúantein Baya Ino

⁶ Máan tiyákan Eroti ena ákurá béin daimintéin mai inuran kankanan seni anampó béin damuáðan aruvín bantá kan aúbaná bavíkan ena aruvín banta kayo ano yumukati namun onará dafíkaren mino. ⁷ Máan tukharéin Bafani enisori ano maifin manadá áfoká íkan dumukati namumpin panu siyain má enisori ano Pitan ayorantá ankan ankan iyáken béin avoren temí, “Aine mantano,” siyain má Pitan ayan pinte seni anan útufen eraven mino.

⁸ Máan tiyain má enisori ano véin tiamemí, “Ei ona vá arantan anamun má ono,” síkan Pita uran maen enisori ano siamemí, “Ei ayá iyon afuin ureya séin dakhafono.” ⁹ Máa síkan Pita mai karavusi namun me ampiren enisori yakhafen oriyáken enisori ano ma mai avúava bariyain Pita amino ukhen tuu vaédái oniyá uno sen inikharen mino. ¹⁰ *Máa sen iniyáken esé ma yafiká ein má ínain ma yafiká ein banta vá esanten aravuaren kákan barufin ma oriyain onará oríkan mai ona ano veyantá e yiven oriyain má míkanan mai ona finté e yuvinen oriyain

baren mana aasá o muntaven oriyain manáa ayáká orivin mai enisori ano véin me ampiren ainen oren mino.

¹¹ Orivíkan mairá Pitan auu sapé tiyain má béi semí, “Taréa inka afova suron ékun Erotin ayan pinten téin tiviren inká Yutan kayo ano ma intéa yanasá ten timaniná kaono van iyaren nafi mai uman kayo finten Bafan manon bei enisori siantan téin tiyaen mino.”

¹² Máa siren mai yaná ma afová iyáken Yonin nan ma Maki ne sen ariyain banta anóe Marian amápin kokhon nanin banta kayo ano átaru ukhen amúkiyaré íkan mai namun béi oren mino. ¹³ Onóben baru fáke onará béi mo ankan ankan iyan maen iyé e van nafi siren onano van Rodan ne sin doran arinta ano araven mino. ¹⁴ Araven orun iníkan Pitan amen avaya vaimpin kákan amusin iyáken ída ona yivinton evaránen mun máa semí, “Pita onará e van mino,” sen mai ma iyukhá ein nanin banta siamen mino.

¹⁵ Máa síkan, “Éi óen ná iya vae” sen mai kayo ano véin tiamiyan mifo véi ákonaen tiyáken, “Téi Pitan amen avayan bá inikhere,” siyaimpin betí ankan tiyáken, “Beni enisori anon tino.”

¹⁶ Máa siyákan maen Pita onará pa ankan ankan iyan baimpin betí ankan ma morun ona yiren béin oniyain anúden oreraen mino. ¹⁷ Máan tiyaimpin ída vaya sino van Pita ve ayampó oorá ankan ankan iyáken inté ená Bafan mano karavusi finte útúden béin avían barufá daná eren nafi mai fáke siamidén, “Ma ma yákó ein danasá Yemisi má manáa sifá tiváeyan masá tiameno,” siren betí ankan me ampiren ena varufá oren mino.

¹⁸ *Máan tukharéin ena ákurá aruvín banta kayo ano Pita intefasá orikhen nafi siren akhokho van dosian more mere en mino. ¹⁹ Máan tiyákan Eroti ma mai vaya iniren Pitan dosíkan ída vaimpin mai ma yafiká ein aruvín banta kayo avían kaúden avóbé en inaúden ma kékasá aresin purino sen mino.

Kin Eroti Ma Furin Baya Ino

Máan turen ínaimpáké Eroti Yudiá me ampiren Sisariá manáa orun baren mino.

* 12:10: Apo 5:19 * 12:18: Apo 5:22-24

²⁰ Kin Eroti ano Taiyá baru ráke vá Saidoní baru ráke nanin banta vá anan maran uren betin nan móeken aranan uantiyaren mino. Máan tiyákan mai nanin banta ano véin ma yafíkein bara kayo finte yunan bariyaren pasen kin mano ma kama yoran banta ino siyain banta Barastasi má ará manafinín baya sian damuaren Kin Erotin onano van oren mino.

²¹ Kin Erotin ma onano sikhá ein damú ma yákó íkan béi kin buí daná uren kini karáká kumamin banasi e iyuvín ákona veya siamen mino. ²² Sian míkan mai nanin banta ano oovararen temí, “Ma ma siyain baya ma varará bantaí veya vaino ayarafenui veya ino.” ²³ *Máa síkan Eroti ano ída Tiyarafenu aví maman daní iyaimpin Bafani enisori ano véin manádá do ankamádan eraviyain má bintokhéna kayo ano véin aú bukhafa nákan puren mino.*

²⁴ *Puren mifo Tiyarafenui veya ano mo kákanien minó barufá oreraen mino. ²⁵ *Banabasin nú Sorin nú ano vetíi monó nanin banta ayain doran dóan kíparen maen Yonin nan ma Maki ne sen ariyain banta avíaren Yerusalemí baru me ampíren evaránen Antiokí oren mino.

13

Yerusalemíke Monó Ánon Banta Kéká Ano Ma Banabasi Nú Saimonin Nú Avu Uantáden Tiantan Monó Dorantá Orein Baya Ino

¹ Antiokí monó namumpin manáa sakhanampa veya sin banta kayo vákan ma inká Tiyarafenui veya ma afova amin banta kayo van ma ukharé ein mai vetin aví maen Banabasi má Saimonin nan ma sókon banta e sen ariyain má Sairiní baru rákena vanta Rusiusin má inká Kin Erotin má ma avunté iyá ein banta Manaenin má Sorin má ino. ² *Maná damú monó nanin banta kayo ano yunan auraren amúkiyan Bafantá monó tiyan baréin Kantá Aunan mano vetin máa sen tiamemí, “Tiretí ankan Banabasin nú

Sorin nú aniesin ná mai ma varano van arakheruna yorará ino.” ³ *Máa síkan betí ankan dunan auraren amúkuren maen mai ma siamein bantá kan ánortá ayan kaúden avu uantáden tiantan oren mino.

Banabasi Nú Sorin Nú Ma Saiparasi Musóká O Varé Ein Baya Ino

⁴ Máan turan Kantá Aunan mano míkanan tiantan Serusiá barurá aravuvén mai ráke sipi evaránen Saiparasi musóká oren mino. ⁵ *Oriyaren ma Saramisí barurá o unavin maen betin ayain bantan Yon Maki orikharen mi Yutan kayoi monó átaru namun kayofin Tiyarafenui veya siamen mino.

⁶ Saiparasi musóká békanan o váken ma minó akhempá noren maen Pafosí barurá oriyan o onákan Ba-Yisasin ne sin Yutan kayoi kampun sakhanampa vanta váken béi uvatakhan iyan ara ara aufon iyaren mino. ⁷ Mai vanta ano kamanini ánon banta Sekius Paurusin ne sin banta vá bákan maen kama ineine vá afova vá bain banta váken Tiyarafenui veya ineno van Banabasin nú Sorin nú arákan oren mino. ⁸ Oríkan mifo mai ma aufon iyáken uvatakhan iyá ein banta Ba-Yisasin aví ma Kiriki veya finté Erimasi ne sen ariyain banta ano ma inikharé ein Kamanini ánon banta ano Yisasintá mumunan inain nan békanan namuroí uantiyan beni aa iyarano van en mino. ⁹ Inikhan Sori nan ma Pori ne siyain bantafin maen Kantá Aunan mano víkavíkan Erimasin auufen kakháben temí, ¹⁰ “Éi Ban Anon akháí váke minó puntákein avúavá namuroí iyan nan éimpin ara ara mákasin má namu yaná bá bíkakhayai Bafani funtákein avúavá man kampun bayafin kaiya ompo mai avúavá ídá ífá inte fono. ¹¹ *Tiyarafenui aran naná ano saréa éin auu namu uvin-tiya áau ída onan manáa ayáká banono,” máa siyain má anan titípa ukhein konan ten daná ano Erimasin auurá iyábíkan béi ma ayan noren oriyan aa aníin banta van mo yose me yose en mino. ¹² Máan tiyákan Kamanini ánon banta ano mai

* **12:23:** Dan 5:20 * **12:23:** Ínaimpáké Yosifasin ne sin mana afova vanta ano siyáken Erotin aúpin kákan aí afoká íkan dan manápá damú esantan maen puren mino sen bei vompon dókifin uvantaren mino. * **12:24:** Ais

55:11 * **12:25:** Apo 11:29-30; 15:37 * **13:2:** Apo 9:15 * **13:3:** Apo 6:6 * **13:5:** Apo 12:12; 15:39 * **13:11:** Apo 9:8

yaná ódaren mumunan iyákan Bafan nan ma siyain baya ano véin ará manten mino.

Porin Má Bei Arona Kéká Bá Pisidiá Bara Fin Bain Baru Antiokí Ma Varé Ein Baya Ino

¹³ *Pori má ben ma ayaen doren noré ein kéká bá ano Pafosí baru me ampiren sipi e varen orein mano Pamfiriá barafin bain baru Peká orikan mairá Yon Maki vetin mo afa uren Yerusalemí evaránen oren mino. ¹⁴ Orivíkan betí ankan Peká me ampiren Pisidiá barafin bain baru Antiokí o varen Sabati yamú Yutan kayoi monó átaru namumpin o kumanen mino. ¹⁵ Kumantan monó átaru namuni ánon banta kayo ano man baya vá sakhanampa vanta kayoi vava vá dankáden manáa vanta siantan Pori má bei mana yoran banta kayo vá mo siamemí, “Tifá tiváeyan noe, siretimpin ma vanasi ákona uantan baya ma vantiya sesin inino.”

¹⁶ Maa síkan Pori e mantaven betí ankan ída vava sino van ayan daní uren temí, “Tiretí Isareri nanin banta vá ena anan nanin banta vá ano ma Tiyarafenu aránaópá oriyaona kayo ano vá ineno.

¹⁷ *Isareri kayoi Ayarafenu ano setinti sinafu siráon nan be ina e sen aní ukharen betíi vara ma me ampiren Isipí o vákan maen béi ano vetin maman kokhonasi uran baréin bei kákan ákonará betí ankan Isipíke iyanen eren mino. ¹⁸ *Eriyáken foti (40) oranará ma kámá barafá Tiyarafenui vava átakharé iyan ma véin uman amiyákan maen béi yo yuren betintá kamaen dafisiyaren mino. ¹⁹ *Máan tiyáken Tiyarafenu ano Kenaní barafin ma yan manápá ifo afápá kan un kádan anan nanin banta ma varé ein aren taaren betíi vara o maman bei vanasi inai ino van amen mino. ²⁰ *Mai yanasinta ma yákó iyaré ein mai kamí kamí antareti ifo fifti (450) orana aúpin mino.

Máan turen mai oyampáké Tiyarafenu ano mai nanin bantará ma yafisin banta kéká aní uren amíkan mai kéká ano vetintá dafisen eriyen sakhanampa vanta Samuerini yamú e khanaíen mino.

²¹ *Máan tiyain damú anan banasi ano kin nan muno siren inantiyaimpin mi Tiyarafenu ano Benisamenini anan banta finte Kisin anin Sorin aní uran foti (40) oranará kiní ukhen betintá dafíkaren mino. ²² *Dafíkaréin Tiyarafenu ano Sorin doékaren Devitin maman kiní uren béin nan temí, ‘Te súkákéi sinunué Yesin anin Devitin dosiré aní erunan béi anon ten too yaiyen te ma siamenuna yanasinta varanten mino.’

²³ *“Mai vanta anavasin pintéi vanasi ma evaránen aviran banta Yisasin nan Tiyarafenu ano fefá tian damuádan baréin mai vantán Isareri nanin bantafin tiantan eren mino. ²⁴ *Ínaimpáké Yisasi erintéin Yoni ano minó Isareri nanin banta van ará baéde vá monó non barano siyaren mino. ²⁵ *Yoni ma vei yoran kípan akhempá béi semí, ‘Tiretí ankan ten nan iye inó tiya rafono. Téi mai vanta va uno. Ída ifo véi sen toyampá eriyain téi ída kanaí é beni arantan anamuntáke anan útufonté uno.’

²⁶ “Máan tukhen mifo sífá tiváeyan ma Abaraamun akhafana vaona vá inká tiretí ena anan nanin banta ano ma Ayarafenu van péde ven aránaó baona kéká ba soe, mai ma evarané aviranté uno ma sikhare ein baya mai setimpin mi eren mino. ²⁷ Máan turan maen Yerusalemí nanin banta vá betíi yafisin kéká bá ano Yisasi nan banasi ída evaránen aviran banta ino siren béin ída kamaen oman afová en pasen sakhanampa vanta kayo ano ma ena ena Sabati yamú ma vanasi siamyaré ein baya ánain mi vákuren béin arino sen mino. ²⁸ *Máan tiyáken ben nan purino ma siyaini aau ana yosíkan ída vaimpin Yisasin arintin purino van betí ano Pairotin ákonaen tútúpen inaen mino. ²⁹ *Máan turen mai ma fefá sakhanampa vanta kayo ano ma sikhá ein avúaváká ten minó uman béin amaniná kaúden daa unkamádantáke un mamádan barará eravuvin béin daiyen on aimpin mo masíen mino. ³⁰ Masí en mifo Tiyarafenu ano evaránen purin pinte véin orun avían manten mino. ³¹ *Mantaran mai ma véin

* **13:13:** Apo 15:38 * **13:17:** Eks 1:7; 6:6; 12:51 * **13:18:** Nam 14:34; Diu 1:31-32 * **13:19:** Diu 7:1; Yos 14:1
 * **13:20:** Ano 2:16; 1Sa 3:20 * **13:21:** 1Sa 8:5, 19; 10:20-24 * **13:22:** 1Sa 13:14; 16:12; Íbo 89:20 * **13:23:** 2Sa 7:12-16 * **13:24:** Mat 3:1-2 * **13:25:** Yon 1:20, 27 * **13:28:** Mat 27:22-23 * **13:29:** Mat 27:59-60
 * **13:31:** Apo 1:3, 8

má Kariri fáké Yerusaremí barurá ma onóbe enóbe iyaré ein kayo ano kokhon damú béin oniyaren taréa mai kéká anon tetisi vanasifin béin nan tian dákó uan amiyan mino.

³² “Máan tukháí mai ma Tiyaarafenu ano setin tináuyan ma iyáan táká ein kama vayan tiretin tiamiyá tifeuno. ³³ Taréa ma vetin akhafana ma varunafin mi Tiyaarafenu ano mai ma sian damuádan baré ein baya kanaí ino van purin pintena Yiasin orun avían mantakhan mi kan dádasí ma en uvantein Í Bompon dókifin uvamádan ban mino. Mai vaya ano siyáken,

“ ‘Taréa séi en afóení ékuya éi sen taniní e ono,’ sikhen mino. *Íbo 2:7*

³⁴ Tiyaarafenu ano véin purin pintena orun avían mantein ída fúta inten mino sen mi ma vayan uvamádan baren mino. Tiyaarafenu ano siyáken,

“ ‘Téi ma kantasí ukhein danasinta vá pura sikhein avu vá ma fefá Kin Devitin iyáan tékun baré ein tiretí ankan amenté uno.’ *Ais 55:3*

³⁵ Tiyaarafenui vompon dókifin ena vaya ano máa sikhen mino,

“ ‘Ei Kantasí Ukhein Banta éi ída áesin masípin púta inten mino.’ *Íbo 16:10*

³⁶ “Deviti ma ma varará báken Tiyaarafenui oo yaiyen oriyan baren o fúbíkan be anáuyan má masí uran ben au ano mo fútaen mino. ³⁷ Máan ten mifo mai ma Tiyaarafenu ano furin pinte evaránen avían mantein bantai au ída fútaen mino.

³⁸ “Máan tukhein nan mi sífá tiváeyan noe, siretí ankan afovasá ono. Yiasin pinté uaren ma siretíi ume ampiantákein bayan tiamiyá uno. ³⁹ *Mosesini man baya ano ída kanaíen tiretíi ume arúantáden puntákein nanin banta e sen aranten mifo mai vantará ma mumunan inain nanin banta ven pinté uaren mi minó ume arúantáden puntákein nanin banta e sen aranten mino. ⁴⁰ Máan tukhen mifo mai ma sakhanampa vanta kayo ano ma siádan baré ein danasinta ano siretí ankampin afoká inafó vá dafían ákona ono.

⁴¹ “ ‘Oyampá baya sin kéka soe,

sireti oniyáke anú de orera iya vá púan kípano.

Para vara seyo siretí aúbaná ma séi mana yaná uvaré dararé éku

siretí ída kanaí eya mumunan iyasin manáa kéká ano ma siaminti mai yere ída mumunan inono.’ ” *Aba 1:5*

⁴² Máa siren Porin nú Banabasin nú ma vetíi monó átaru namun me ampiren oriyan maen betí ankan tiyáken ena Sabati yamusá mai ma seóna vaya ovaráne me sesirá inétifano sen békanaan tiamen mino. ⁴³ Máa siren mai namun pinté ma orera iyan maen mai ma ará baéden Yutan kayoi monó avúavá ma vákuriyain kayo vá Yutan kayo vá ano Porin nú Banabasin nú bákuren oriýákan betin má e vaya sen oriyan tútúpen temí, “Ayarafenui sarisari aúpin ákona e vá monó teno,” sen betí ankan tiamen mino.

⁴⁴ Orikharen ena Sabati yamú ádé anantá mai varu fintena minó nanin banta ano Bafani vaya ineno van e átaru en mino. ⁴⁵ Átaru iyaimpin Yutan kayo ano mai ma e átaru ukhein nanin banta ódaren Porin ará namu uantáden béi ma siyain baya van ankayan tiren oyampá baya sen mino.

⁴⁶ *Oyampá baya siyaimpin Porin nú Banabasin nú betin nan ída feran evaránen tian amá uan amen temí, “Tiretin naren araié Tiyaarafenui vaya sian améku ída maman kákan danasí eya fara van oriyan ban aunan baran nona van ifá enái saréa yo vaéaré ena anan nanin bantafin mi sian dákó iyá uno. ⁴⁷ Para vara seyo, Bafan mano ákona vaya máan mi sen tetin tisimikhen mino,

“ ‘Téi anon éin maman ena anan nanin bantai kakhaní urékuya ma varai minó ankina fákena nanin banta aya uresí betin evaráné aviranté uno.’ ” *Ais 49:6*

⁴⁸ Máa síkan ena anan nanin banta kayo ano mai vaya inin betin arápin kama íkan mai kéká ano Bafani vayará amusin uren ben aví maman daní iyákan mai ma fara van oriyan ban aunan barano van ma Tiyaarafenu ano aní ukhein nanin banta ano mumunan en mino.

* **13:39:** Rom 10:4 * **13:46:** Apo 3:26; 18:6

⁴⁹ Máan tiyákan Bafani vaya ano minó akhempá oreraen mino. ⁵⁰ Máan tiyan mifo Yutan kayo ano vetíi monó tin avúavá ma yakhafiyen ma aví bain nanin kayo vá mai varu ráke ánon banta kéká bá arápiní uren minó ano araién Porin nú Banabasin nú aruren mai varu fintena vékanan do sianten mino. ⁵¹ *Máan tiyan mai ma sein baya oyan amiyainpin békanan arantantá ma varé ein kayó do fúpá tiren Antiokí me ampiren Aikoniamú barufá oren mino. ⁵² Oríkan eyo iyampon kayo ano amusin iyákan Kantá Aunan mano vetin aúpin bíken mino.

14

Porin Nú Banabasin Nú Ma Aikoniamú Barufin Kama Vaya Siamein Baya Ino

¹ Porin nú Banabasin nú ano Antiokí monó átaru namun ma variyaré ein avúavá anan Aikoniamú baren mino. Békanan Yutan kayoi monó átaru namumpin ódiven Tiyarafenu kama vaya siamikán kokhon ná Yutan kayo vá ena anan nanin banta kayo vá ano iniren mumunan en mino. ² Máan tiyákan ída ma mumunan ein Yutan kayo ano ena anan nanin banta kayo arápiní íkan mumunan ma iyain nanin banta namuroí uanten mino. ³ *Máan tiyainpin Porin nú Banabasin nú ano Aikoniamú barurá ayáká báken ída feranton Bafani avábá in baya vanasi siamiyákan Bafan mano vékanan ákona amíkan enará ukheín avúavá bá aní danasinta vá banasi aní iyan maman pura yanasí en mino. ⁴ Máan tiyainpin mai varu ráke nanin banta kayo ano kampintan daíden manáa kayo ano Yutan kayoi kékasi íkan manáa ano aposeri kayoi kékasiin en mino. ⁵ *Máan turen ínainpáké Yutan kayo vá ena anan nanin banta kayo vá ano Porin nú Banabasin nú onámaná ankamintin purino van betíi yafisin kayo vá baya sian damuáden mino. ⁶⁻⁷ Maa sen orera iyain baya ma vékanan inen

maen Rikoniá barafin ma vain kákan baru kanan Ristará bá Debé bá kan pin karan oriyáken mai akhempá ma vain nanin bantafin Tiyarafenui kama vaya me asotú en tiamen noren mino.

Porin Nú Banabasin Nú Ma Ristaráke Nanin Banta Tiyarafenui Kama Vaya Siamein Baya Ino

⁸ Ristará barurá mana vanta ve anóe ano ma kaein táké arantampin ída ákona vákan ída onóbe enóbe in kumanten mana varen mino. ⁹ Kumanten báken Pori ma vaya siyain mai vanta ano iniyákan Pori mai vanta furefure en oniyáken ma vanta ano mumunan iyain béi kanaíen kama in ten mino sen inen mino. ¹⁰ Maa sen iniren Pori oovararen temí, “Ei arantantá orun mantano,” síkan mai vanta ano mai vaya inen kútin orun mantaven oren mino.

¹¹ *Máan tíkan kokhon nanin banta kayo ano Pori ma varein daná ódaren Rikoniá baya finté betí ankan oovararen temí, “Ayarafenu kayo ano vantai avúaváká ten tetí ankampin erakhen mino.” ¹² Maa siren betí ankan Banabasin nan Siusin* ne sen inká Pori vaya sin banta vákan béin nan Emesin* ne sen en mino. ¹³ Máan turan maen Siusii monó namun mai varu akhempá baréin mairá ma mai monó ánon banta vá banasi vá ano manáa afon burumakaó bá manáa faravá asína uran má mamaren Banabasin nú Porin nú íkun uan ameno van mai varui yafu onará oren mino.

¹⁴ Máan tiyain baya ma Banabasin nú Porin nú ma inen maen békani ona yákaren mai nanin banta kayo aúbaná tavaen oriyáken oovararen temí, ¹⁵ * “Banta kayo oe, fará ma avúavá barano van iya rafono. Berasan tireti ma einí ukheruna vantán báké mai ma veni ana i vain avúavá ma variyaona finten tiretin avían para van oriyan ban Tiyarafenu ano ma inaru vá bara vá un non má mai aúpin ma minó danasinta vain ma uvantein banta vaipá kaono van mi kama vaya fóké tiretin tiamiyá uno. ¹⁶ *Tiyarafenu ano

* **13:51:** Mat 10:14; Apo 18:6 * **14:3:** Mak 16:20; Ibu 2:4 * **14:5:** Apo 14:19 * **14:11:** Apo 28:6 * **14:12:** Siusi maen Kiriki nanin bantai ayarafenu bakan Romu kamani ano ma yafiká ein bara kayofin bentá mumunan iyaren mino (Romúke nanin banta ano Yupitan ne sen aví ariyaren mino). * **14:12:** Emesi maen Kiriki nanin bantai ayarafenu baken baya varen oriyáken baya sin banta ino sen mumunan iyaren mino. Romú kéká ano Mekiurin nan ayarafenu ban mino sen mumunan iyaren mino. * **14:15:** Íbo 146:6; Apo 10:26 * **14:16:** Apo 17:30

fefá áíkən ara ara vara finte nanin banta ano vetii anunu ano ma orein avúaváká baren oriyaren mino. ¹⁷* Máan tiyan mifo véi ída manáa yaná úaviran bei avábá aníen ayon pintena á dan eriyen inká béi kama áau amíkan dunan ampan kauri niyan nan tiretin aúpin amusin bíkaan tiyan mino.” ¹⁸ Mai veya fóké Banabasin nú Porin nú ano ákonaen are uantiyan mifo vanasi ano míkani veya ída ininton iyaníen míkan íkun uan ameno van iyaren mino.

¹⁹* Máan tiyákan Antiokí baru rákena manáa Yutan kayo vá Aikoniamú baru rákena vá ano Ristará barurá eriven banasi arápiní íkan betí ano Porin ará uman daantáden onámaná ankaman kaúden inka furen mino siren kákan baru finte yo yarifen baru akhempá morun karúden mino. ²⁰ Máan turan mifo Yisasintá ma mumunan iyá ein kéká ano o iyen eúkuvíkan Pori orun mantaaren evaránen kákan barufin o varen ená damú Banabasi má Debé barufá oren mino.

Porin Nú Banabasin Nú Ano Ma Auyen Mumunan Kékái Ará Ákona Uantein Baya Ino

²¹ Debé barufá o varen míkanan mano Tiyarafenui kama veya mai varufin tiamíkan banasi ano Yisasintá mumunan en orera iyákan ínaimpáké békanan evaránen Ristará barufá bá Aikoniamú barufá bá Antiokí barufá bá oren mino. ²²* Oriven míkanan mano Yisasintá ma mumunan iyá ein nanin banta mo ákona uantiyáken temí, “Uman kayofin orivétiféi ínaimpáké Tiyarafenui Yafisin aúpin oró tifanté umpo fura sikhein mumunanta sá mantaan ákona ono,” sen e siamen oren mino. ²³ Máa sen oriyáken Porin nú Banabasin nú ano yunan auraren amúkiyáken Yisasintá ma mumunan iyain nanin bantará ma kanaíen dafiseren ukhein banta kayo aní uren ayan ánontá kauren amúkuanten mino. Máan turen mana mana monó namuntá dafidú uantáden betí ankan Bafan ayampin kaen mino.

* **14:17:** Yer 5:24 * **14:19:** Apo 17:13; 2Ko 11:25

* **14:27:** Apo 15:4, 12

* **15:1:** Kar 5:2

* **15:2:** Kar 2:1

Porin Nú Banabasin Nú Ma Siriá Bara Fin Antiokí Barufá Evaránen Orein Baya Ino

²⁴ Máan turen ínaimpáké Banabasin nú Porin nú ano Pisidiá barafá oriaren Pamfiriá barafin oren mino. ²⁵ Oriven ma Pekhá barurá Tiyarafenui veya siamíden maen ínaimpáké míkanan Atariá barufá araven mino.

²⁶* Orun baren ma míkanan monó doran kípáren maen mai ma monó nanin banta kayo ano ma vékanan tarisari urantin mai yorarí ino van ma Tiyarafenui ayampin kaein baru mai Antiokí varéin maifá sipi varen oren mino. ²⁷* Oriyan baren míkanan mairá o unaven mai ma Tiyarafenu ano vékanan ayan táké uaren ena anan nanin bantai mumunan ona ma yiantein baya monó nanin banta mo átaru uádaren tiamen mino. ²⁸ Tiamíden maen békanan Yisasintá ma mumunan iyain nanin banta kayo vá manáa ayáká baren mino.

15

Yerusaremí Ma Yisasin Bákuriyain Kayoi Ánon Banta Kéká Ano Átaru Ein Baya Ino

¹* Yudiá kena manáa vanta kayo ano Antiokí araven morun monó nanin banta kayo araíen afova amiyan temí, “Tiretí ankan ma Mosesini avúavá ída yakhafe siretí au ma ída kavesin maen Tiyarafenu ano ída kanaíen tiretí ankan evaránen aviranten mino.” ²* Máan ma siyain baya van Pori nú Banabasi nú mai vanta kéká bá asiven mino. Máan tiyan monó nanin banta ano veya sian damuaren Porin nú Banabasin nú bá inká ena mumunan banta kayo vá aní uren Yerusaremí ma vain aposeri kayo vá inká monó doran banta kayo vá mai veya mo funtarano van Yerusaremí tiantan oren mino. ³ Monó nanin banta kayo ano vetí ankan tiantan oriyáken Fonisiá bara vá Sameriá bara vá aúbanapin ma vain kéká afova amiyáken temí, “Tiyarafenu ano ena anan nanin banta kayo ará baéden aviren mino,” síkan maí kan barufin ma mumunan nanin banta vain mano mai veya iniren amusin

* **14:22:** Apo 15:32; 1Te 3:3

* **14:26:** Apo 13:1-2

* **15:4:** Apo 14:27

en mino. ⁴ *Betí ankan Yerusaremí onóbíkan mumunan nanin banta kéká bá baya varen orin banta kayo vá monó doran banta kayo vá ano amusin uren Porin nú Banabasin nú aviren mo khain Tiyarafenu ano ma vékanan ayantá ma varein danasinta vetí ankan tiamen mino.

⁵ Maa síkan Farasisi kéká pintena manáa mumunan banta kayo ano orun mantaven temí, “Ena anan banta kayo ano ma setí ankampin ma e ferano van inti vá betin au kare Mosesini man baya siamesin ná mai ánnain dakhafino.”

⁶ Maa síkan baya varen orin banta kayo vá monó doran banta kayo vá ano mai vaya funtarano van átaru en mino.

⁷ *Átaru uven betí ankan kokhon ná baya sirákan Pita e mantaven betí ankan tiamemí, “Tifá tiváeyan noe, siretí ankan afová ukha ono fefái Tiyarafenu ano siretimpin doran daíden téin aní iyáken ena anan nanin banta kayo ano vá kama vaya sen too fentena iniren ná mumunan ino sikhén mino. ⁸ *Tiyarafenu ano minó nanin banta kayoi ará afová uren kana van mino siyáken Kantá Aunan tetí ankan ma simeinién betí ankan amiyan mino. ⁹ Béi ída setí ankan ena avúavasíen betí ankan ena avúavasíen iyan mino. Betí ankan béintá mumunan íkan mai mumunan manon betin aní íkan mi véin avorá maman avusese iyan mino. ¹⁰ *Máan tukhen mifo fará tinafu siráo fi seti safu mai ída kanaí é bararen uman kayo mamiyá monó nanin banta amempin kuviyáké Tiyarafenu akhenóka uan oniya rafono. ¹¹ *Bafan Yisasín ano ma sarisari ukhein nará mumunan ékun ná mai vanta kayo ma evaránen avireinién ná Tiyarafenu ano setí ankan má evaránen tivirano.”

¹² Pita máa sirákan mai ma átaru ukhen baré ein banta kayo ano ída mana vaya sinton Banabasin nú Porin núi vaya átaren amiren inikhan Tiyarafenu ano ma vékan pinté uaren ma enará ukhein ákona vá aní danasinta vá ma ena anan nanin banta aúbaná ma mantaré ein nan tiamen mino. ¹³ *Békanan baya sian kíparan Yemisi máa semí,

“Tifá tiváeyan noe, senti vaya vá ineno. ¹⁴ Tiyarafenu ano ena anan bantafin oriven betí ankan avían bei kékási ono van iyákan pefái Saimoni ano* setí ankan tisimikhen mino. ¹⁵ Sakhanampa vanta kayo ano ma uvamádan baré ein bompon má dere ano manaí ukhen mino. Mai vompon mano máan mi sikhén mino.

¹⁶ ‘Ínaimpáké téi ovaráne erivé Devitini yavaráe namun ma eravukhá ein maman mantanté uno.

Béin amákompin evaráne uvaman kaúdé pefá ma varé einí uan kaúdekun

¹⁷ manáa vanta ma me á inain kéká anon Bafan nan dosintin inká ena anan kéká pinté ma sen tiví mamaren bain kayo anon mumunan intéin

Bafan mano ma sikhá ein mai yanasintan afókáen mino.’ *Amo 9:11-12*

¹⁸ Pefa suron mi ma yanasinta ma afokáin nain baya sikhén afová ukharen mino.’

¹⁹ “Máan tukhen mifo séi ma iniyarúna setí ankan ída vá ena anan banta kayo ano ma ará baéden Tiyarafenu vaipá oriyain uman ameno. ²⁰ *Erí tetí ankan mana vompon uvamádekun betí ankan baipá orintí betí tiamiyáké ída vá kampun ayarafenu nuntá ma íkun uran dunan barano seno. Mai avúavasí ma uran dunan mano Tiyarafenu avorá painí ukhen mino será inká betí ankan nan ída vá ena nanin banta kayo vá banasiín avúavá barano será inka ída vá banta kayo ano ma amempin anan damuren ariyain tafúna kayo ne vá nare ma fara vain tafúna kayo ída vá nano sé tian amé tifano. ²¹ Para vara seyo, fefá ma eriyán taréa ma eman kanaí iyain minó barufá ma Yutan kayoi monó átaru namun ma vaimpin Mosesini man baya ena ena Sabati yamú tiamiyan inikhen mino.”

Yerusaremíké Ma Mana Vompon Uvaman Ena Anan Nanin Banta Amein Baya Ino

²² Maa siren aposeri kayo vá Yisasini mumunan nanin bantai monó doran banta kayo vá monó nanin banta kayo

* **15:7:** Apo 10:1-43 * **15:8:** Apo 10:44; 11:15 * **15:10:** Mat 11:30; Kar 3:10 * **15:11:** Kar 2:16; Efe 2:5-8

* **15:13:** Kar 2:9 * **15:14:** Saimonini ena ví maen Pita ino. * **15:20:** Eks 34:15-17; Riv 17:10-16

vá ano vaya sian damuaren betin pinke manáa vanta aní uren tiantantin Porin nú Banabasin nú bá Antiokí orino van en mino. Mana vanta mai Yudasí nan ma Basabasi ne siyain má inká ena vanta Sairasi má ino. Békanan maman monó nanin banta kayoi ánon bantaíen mino. ²³ Békanan ayantá betí ankan bompon uvamá diyáken temí,

Tetí aposeri kayo vá monó doran banta kayo vá inká turetini monó afá aváeyan má ma varuna ano ma vompon uvádé máa sé uno:

Tiretí ena anan nanin banta kéká pinté ma Yisasintá mumunan iyaona kayo ma Antiokí baona vá Siriá barafin ma vaona vá Sirisiá barafin ma vaona mai kayofin mái oren mino.

Tifá tiváeyan noe, bayan mino.

²⁴ Tetí inékun maen tetin pinté manáa vanta kéká ano seti ída sianterunará turetí ankampin oriven betíi vaya fóké akhokho amiren turetíi ineine asuse uantiyan mino. ²⁵ Máan tiyain nan mi setí ankan mai yaná ma afoká iyain baya iniréi setí ankan tirá manafiní uré moeké tinunu iyaruna sífá tiváe kan Banabasin nú Porin nú bá kankanan tifá tiváen má aní uré tiantékun orino van teti ankan baya sian damuádé uno.

²⁶ Békanan ma furin nain nan ída feranton kasaen Bafan Yisasi Karaisin aví tian páman inten mino. ²⁷ Máan tukháí setí ankan Yudasín nú Sairasin nú tiantékun turetí ankan baonafá oriven betiyantá mo vaya sian amá inten mino.

²⁸ *Kantá Aunan mano setí ankan má bakái ída siretín kokhon uman amenuna van inikhéi ma vaya sian damuádé umpo vá mai avúavá anáin mana vá dakhafono. ²⁹ Kampun ayarafenun kayo ma íkun uantanton ma aruran nain tafúna siretí ankan ída vá neya inká nare ma fara vain tafúna kayo ída vá neya inká banta kayo ano ma amempin anan damuren arin nain tafúna ída vá neya inká ena nanin banta kayo vá ma vanasiín avúavasá ifá ono. Tiretí ankan ma mai avúava sintará dafisinteya mai kama in nono. Inka ino.

³⁰ Maa siren monó nanin banta ano mai vanta kayo siantan Antiokí araven monó nanin banta kayo morun iyanuan átaru uren mai vompon amen mino. ³¹ Amíkan mai nanin banta ano mai vompon dankáden betí ankan ma ákona uantan kama vaya ma inein nan amusin en mino. ³² Yudasín nú Sairasin nú sakhanampa vantá kan baren békanan mano monó nanin banta kokhon ná kama vaya kayo fóké tiamiyáken mai avúavá póké betíi ará ákona uanten mino. ³³⁻³⁴ Antiokí békanan manáa ayáká baré íkan ínaimpáké monó nanin banta ano susu siantáden ará kusin masá orono siran mai ma siantan erikharé ein banta kayo vaipá evaránen oren mino.* ³⁵ Orivíkan Porin nú Banabasin nú Antiokí barurá para váken manáa kokhon kayo vá békanan Bafani vaya siamiyan afova amen mino.

Porin Nú Banabasin Nú Ma Kákan Asivirí Ein Baya Ino

³⁶ Manáa yamú orivíkan Pori ano Banabasin tiamiyáken, “Bafani vaya ma erasan pefá tiamerúna kayo evarané minó barufá noké oné eúkiyá maé betí ankan kaná ban nafi afová onté tiféuno.” ³⁷ *Maa síkan békanan má Yonin nan ma ena ví Maki ne siyain banta vá Banabasi aviré orono van ten mino. ³⁸ *Máan tíkan Pori siyáken, “Mai vanta ano fefá Pamfiriá barafá erasan má oren doran nain nan ifá ukharé ein erasan má ída orinten mino.” ³⁹ Maa siren mai van békanan kákan asivirí uren békan enádá bá ída manafin doren mino. Banabasi ano Makín avíaren mana sipifin kádusiven Saiparasí musóká oren mino. ⁴⁰ Máan tíkan Pori ano Sairasin avíaren békanan orono van íkan monó nanin banta ano siyáken Bafani avábá ano vá tirékan má bano sen tiamen mino. ⁴¹ Maa sirákan békanan Siriá bara vá Sirisiá barafá bá oriven mai akhempá ma monó nanin banta kayo ma vain ákona uanten mino.

16

Timoti Ma Porin Nú Sairasin Nú Bá Monó Dorarí Ein Baya Ino

* **15:28:** Mat 23:4 * **15:33-34:** Manáa vompompin ena vaya asótúen ena ves 34 fin máa síkhen mino, 34 Sairasi Antiokí bano van en mino. * **15:37:** Apo 12:12, 25 * **15:38:** Apo 13:13; Kor 4:10 * **16:1:** Apo 14:6; 2Ti 1:5

¹ *Pori ano Debé barurá onóben mai ráké Ristará barufin oríkan maifin mana mumunan banta Timotin ne sin be anóe Yutan nanin báken mumunan iyain maen be afóe Kiriki vantan baren mino. ² *Ristaráké bá Aikoniamú baru rákena vá monó afá aváeyan mano véin kákantá amo siyan mino. ³ Porini anunu ano Timotin aviré orono siren béin au khaen mino. Para vara seyo, mai akhempá ma vain Yutan kayo ano afovaí ukhan ben afóe Kiriki vantan bain bakan mino. ⁴ *Máan turen Pori mai kéká bá minó barurá oriven mai ma Yisasini mumunan nanin bantai ánon banta kayo vá aposeri kayo vá ano ma Yerusaremí ma sian ákona ein baya e siamen oriyáken temí, “Ma vaya inire vá dakhafono.” ⁵ Maa sen ákona uantan baya mumunan nanin banta siamiyan mai kéká ano mo ákona iyan maen ena ena mumunan nanin banta e asotú iyan mo kokhonien mino.

Porin Ma Auu Vaerein Baya Ino

⁶ *Kantá Aunan mano vetin nan ida vá Esiá barafá mo monó baya siameno siren airo ananí uantiyaimpin Pori má bei kéká bá ano Kaesiá bara vá Firikhiá baravái minó akhempá orera uven monó baya siamen mino. ⁷ Oriyaren Misiá bara akhempá ma onóben Bitiniá barafá orono van íkan maen Yisasini Aunan mano ida vá orono sen mino. ⁸ Maa siyaimpin Misiá bara esanten Troasí barafá araven mino. ⁹ Mai inuran Porin auu vaédan Masedoniá bara fáké mana vanta ano mantakhen Porin ákonaen ariyan temí, “Ma ufá ekháde Masedoniá erive vá tiya ono.” ¹⁰ Porin ma auu vaédan ma ódará maé mai varafá mo vanasi siamino van mi setin tariyan mino siré Masedoniá barafá orono van útaé tiféuno.

Firipaí Baru Fin Ma Ridia Ará Baerein Baya Ino

¹¹ Maa siré Troasíké mana sipifin kumamé un nompin Samotresí barafá puntádé onóbé ená damú Neaporisí barurá o uné tiféuno. ¹² Mai varu me ampíré maé pefá ma Romu ano Masedoniai varafin kákan baru vaimpin

ma mo varuí ma ukhá ein Firipaí barurá manáa yamú o varé tiféuno.

¹³ O varé Sabati yamú mai kákan baru me ampé aravuaré mana non akhempá timúkó tifano van oriyá onékun anasi kéká átaru ukháí mai nanin kayo vá o khumamé monó baya siamé tiféuno. ¹⁴ Mai nanin kayo fintena mana Taiatairá baru rákena nanin Ridian ne sin báken béi nararé davaráe kayo kain bakan miyaní iyain ban maen béi Tiyarafenurá monó tiyain baréin Bafan mano ven aú ona yiran Pori ma kama vaya sein mai vaya máa inen mino. ¹⁵ Iniren Ridian má bei kéká bá ma monó non péden maen temí, “Ten nan ma Bafantá mumunan iyan mino ma se siretí ankan iniyante mae ereya sen timápin o vano,” sen tetin ínānen taren mino.

Porin Nú Sairasin Nú Ma Firipaí Karivusifin Pákaan Kaein Baya Ino

¹⁶ Maná damú amúkin barurá orono van oriyaré é tifékun mana miyan ida van doran arinta namu aunan mano véin pákakan inaimpá ma erin nain danáká sakhanampa vaya siran maen beni yafisin kayo ano kákan miyan bariyain baré íká béin má o fóké uno. ¹⁷ *Pori ma setin má oriyan maen mai arinta ano sínain dakhafen eriyáken oovararen temí, “Ma vanta kayo maen Dan Bain Tiyarafenui yoran banta kékái váken para van aunan baran aa ma orikhein bayan tiamiyan mino.” ¹⁸ Mai arinta ano ena ena máa sen oriyan baré íkan maná damú Pori iníkan aí pefe iyaimpin béi yo vaéaren mai aunan tianten temí, “Yisasi Karaisin avíká éi mai arinta me ampíre orono,” síkan esé ana mai aunan mano mai arinta me ampíren oren mino.

¹⁹ Orivin mai arintai yafisin kayo ano onákan betí ankan ma moní bariyaré ein ida aái iyaimpin mai kayo ano Porin nú Sairasin nú pákaren do yarifen átaru varurá ayafa vanta kayo avorá mo khaen mino. ²⁰ *Békanan darifen baya ma yaimin banta kéká avorá mo khaúden máa sen tiamemí, “Ma Yutan bantá kan mi váken ma varufin uman maman dákó en

* 16:2: Fir 2:19-22 * 16:4: Apo 15:23-29 * 16:6: Apo 18:23 * 16:17: Mak 1:24 * 16:20: Mak 13:9

asuse iyan mino. ²¹ Békanan manoi Romui varafá ma are ukhein avúavá maman dákó uren banasi afova amiyan mino.”

²² *Máa síkan banasi o átaru uven Porin nú Sairasin nú ákonæn asen aúfin baya siyaimpin baya yaimin banta kayo ano síkan békani aúí daná do vararó uan karúdaren dafiyó ankamen mino.

²³ Békanan ma yafiyó namu ankamirí uren maen aviren mo karavusifin karúdaren karavusi namuntá ma yafisin banta van ákona e vá békantá dafiseno sen tiamen mino. ²⁴ Máa síkan mai vaya iniren mai namuntá ma yafisin banta ano vékan aviren mai namumpin ma aúbaná bain karafarampin mun kaúden daa khaéadan békán arantantá kaúden damen mino.

²⁵ Máan turan báken inuran aúbaná Porin nú Sairasi nú ano Tiyarafenu amúkiyáken í diyan ena karavusi kéká ano iniyaren mino. ²⁶ Iniyaré íkan anú deiníen kákantá bara kaya iyain má mai mái namádan kayo kaya iyain má manadá ona yiven orera íkan minó karavusi ayan arantantákena seni anan útufen oreraen mino. ²⁷ *Máan tiyain má mai namuntá ma yafiká ein piripo vanta ano orun mantaven onákan ona yiven orera ukhan inka karavusi kéká karan oren mino siren bei vaenati orun danú aren beyantá beyan arono van en mino. ²⁸ Arono van íkan Pori avádóden oovararen temí, “Minó ano ída kharan orera ukhé tifé umpo ída vá eyantá arono.”

²⁹ Máa síkan mai firipo vanta ano oon ure ereno sen oovariyan tavaen Porin nú Sairasin nú ma vain karafarampin ódiven akhokho ano avinantan diyaimpin békán baintá un baren aron kanan daféden matimen mino. ³⁰ *Máan turen békanaan aviren barufá morun kaúden inaemí, “Kákan bantá kan noe, inte avúavasá urékun ná Tiyarafenu ano evaránen tiviranten nafino.”

³¹ Máa síkan békán mano véin evaránen tiamemí, “Bafan Yisasintá ma mumunan esin maen mi éi má ei kéká bá evaránen aviranten mino.” ³² Máa siren Bafani vaya mai vanta vá be amápin ma varé ein kéká bá tiamen mino. ³³ Mai inuran mai áaurá anan mai firipo vanta ano Porin nú Sairasin nú aviren namon mo sesé

uantádan béin má bei kéká bá monó non péanten mino. ³⁴ Máan turan mai firipo vanta ano Porin nú Sairasin nú aviren be amápin mo khaúden kákan dunan táden amin niyákan béi má minó bei kéká bá ma Tiyarafenu mumunan ein nan béin aúpin amusin bíken mino.

³⁵ Máan turen bákan kakhen ákurasí iyain má baya yaimin banta kayo ano vetíi firipo kéká tiantan mai ma karavusi namuntá ma yafiká ein banta mo siamemí, “Maí kan banta karavusi finte útúantesin orino.” ³⁶ Máa síkan mai firipo vanta ano Porin tiamemí, “Baya ma yaimin kéká ano siré kanan karavusi fintena vá utúantano sen mifo vá tirékan ará kusin masá orono.”

³⁷ Máa síkan Pori mai firipo kéká máa sen tiamemí, “Berasan Romúke vantán bákun ída kamaen kó tiren ana afováin banasi avorá dafiyó tinkáden karavusifin kaí baréekun aúpáké ma sisintano van iyain mai ída kama ukhen mifo mo sesin mai vanta kayo eriven e sivían kaintisá aravono.”

³⁸ Máa sen tiamíkan mai firipo kéká ano Porini vaya varen mo vaya yaimin banta kéká tiamíkan iníden Porin nú Sairasin nú Romú bantá kan baré íkan mai van akhokho van en mino. ³⁹ Akhokho van uren baya yaimin banta kayo ano karavusi namumpin oriven mo sirun noe siren Porin nú Sairasin nú do aviren barufá morun kaúden mai varu me ampíren orino van míkanan tianten mino. ⁴⁰ Karavusi namun ma me ampíren Ridian amápin oren mo monó afá aváeyan ákona uantan baya siamíden békán mai varu me ampíren oren mino.

17

Porin Nú Sairasin Nú Ma Tesaroniká Barufá Baré Ein Baya Ino

¹ Porin nú Sairasin nú ma Amfiporisí baru vá Aporoniá baru vápin ma onóben maen Tesaroniká barurá oríkan mai varurá mana Yutan kayoi monó átaru namun baren mino. ² Bákan Pori ve avúavá baren monó átaru namumpin ódiven kanú manaú Sabati yamú Tiyarafenu vompon dóki fintena vaya vanasi vá tiren iniyaren mino. ³ Máan tiyáken maen Tiyarafenu

* 16:22: 2Ko 11:25; 1Te 2:2

* 16:27: Apo 12:18-19

* 16:30: Apo 2:37

ano ma aní ukhein banta ma uman baren púaren ma furin pinté orun mantanten ne ma vompon dóki ano sikhá ein mai Yisasi ino. Béin mi Tiyaarafenu ano aní ukhein bantan báká beni vayan tian dákó iyá uno sen beni ana vava siamen mino. ⁴ Maa síkan iniren manáa Yutan kéká bá kokhon ná Kiriki kéká ma Tiyaarafenu van periyain kayo vá inká manáa ánon nanin kayo vá ano Pori ma siamein baya van mumunan iyáken békán ánain dakhafen mino.

⁵ Máan tiyaimpin manáa Yutan kayo ano ará uman daantáden Porin nú Sairasin nú arintin purino van átaru varurá ma aau vanta kéká ma vain má kokhon nanin banta vá iyanuádaren mai kayo arapinién mino. Máan tikan Yasonin ne sin banta amá ona mo varákuren Porin nú Sairasin nú o aviré banasi vaintá merano van mo yosen mino. ⁶ Dosíkan míkanan ída vaimpin bádiyáken Yasonin má manáa mumunan afá aváeyan má do yarifen baru ánon banta kayo avorá mo khaúden oovaren temí, “Ma vanta kayo anon minó akhempá nóken aau maman dákó iyain bákan taréa ma varufin e van mino. ⁷ *Máan tiyan mi Yasoni anon betin avían be amápin kain báken mai kéká ano Sisani vava yurafúden ena Yisasin ne sin banta van kin ban mino sen banasi siamiyaren mino.” ⁸ Maa síkan mai varu fintena nanin banta vá ánon banta kayo vá ano ma mai vava iniren amino iyáken kokhon ineine en mino. ⁹ Mai vava iníden ánon banta kayo ano síkan Yasonin má mai ma fáken erein kéká bá ano kó miyaní uran betin ampiantan oren mino.

Porin Nú Banabasin Nú Ma Beriá Barufá Baré Ein Baya Ino

¹⁰ O vákan ma inuraní iyain má monó afá aváeyan mano Porin nú Sairasin nú tiantan Beriá barufá onóben Yutan kayoi monó átaru namun ma vaípá oren mino. ¹¹ Beriá barurá ma vain Yutan kayo ano Tesaronaiká barurá ma vain Yutan kayoi avúavá esantakhen pasen Porin nú Sairasin nú ano ma siamein baya kayo iníden amusin iyáken Tiyaarafenui vompon dóki fintena ena ena yamú dankáden maen daíden mai ma siyain baya furá

tiyan nafino van oniyaren mino. ¹² Ódaren Yutan kéká pintena kokhon ná nanin banta vá manáa aví ma vain Kiriki nanin kayo vá kokhon Kiriki vanta vá ano mumunan en mino.

¹³ Mumunan iyákan Pori ano Tiyaarafenui vava ma Beriá barurá banasi siamiyain baya Tesaronaiká baru ráke Yutan kayo ano iníden oren mai varurá o vanasi iyanuádaren arápiní íkan betin máden intanen asuse en mino. ¹⁴ Máan tiyaimpin monó afá aváeyan mano Porin tiantan un non akhempá aravuvíkan Sairasin nú Timotin nú Beriá barurá para varen mino. ¹⁵ Manáa mumunan banta kayo ano Porin aviren morun Atení barurá afa uren orun baránen édiyákan Sairasin nú Timotin nusá tiamesin ainen téi varunará erino sen Pori mai vanta kayo siamen mino.

Porin Nú Banabasin Nú Ma Atensí Barurá Baré Ein Baya Ino

¹⁶ Pori ma Atensí barurá Sairasin nú Timotin nú ave ukhen ma onákan maen kampun ayarafenu kayoi aman manon minó akhempá bákan ódaren ará namuen mino. ¹⁷ *Máan tukhan Pori ano Yutan kékái monó átaru namumpin oriven Yutan kayo vá ena anan nanin banta vá ano ma Tiyaarafenu van péden bentá monó tiyain kéká bá mai vava sian puntariyan inká ena ena yamú átaru varurá oriven mairá ma o átaru ein nanin banta vá baya siyan iyaren mino. ¹⁸ Máan tiyákan manáa Epikuriani vá Sitoiki vái ineine ma yakhafiyain afova vanta kayo ano Porin má ákonaen baya fóké asive asive iyákan manáa ano semí, “Ma ma vava uvaren noin banta ano náí yaná bayá teno vara fino.” Maa sen ina íkan manáa ano siyáken, “Ena varu fáke ayarafenu kayoi vayan tiyantén mino.” Para va ino Pori ano Yisasi kama vava vá púkaren ma evaránen orun mantakheí pákena vava kayon tian dákó uan amiyan mino. ¹⁹ Maa siren béin do aviren kó inin kayo van ma Ariopakhusi e siyain kéká baintá mo khaúden inaemí, “Éi ma auyen baya ma vanasifin tian dákó uan amiyaona kaná beni ana sian amá esirá inétifante rafuno.

* 17:7: Ruk 23:2; Yon 19:12 * 17:17: Apo 18:19

²⁰ Éi ma siyaona vaya ma inétifékun maen auyen avúavákái siyan ná mai van mi éi mai vaya ana sian amá esí inétifano van muno.” ²¹ Atensí nanin banta vá ena fáke kéká ma mai varufin e vain kayo vá ano ída mana yorarí inton ena ena yamú auyen baya vá ineine vá ma yákó iyain mai vaya kayo ana siren daídiyan iniyaren mino. ²² Máan tiyan maen Areopakusí kéká aúbaná Pori orun mantaven máa semí, “Atensí banta kayo oe, séi onékuya siretí ankan ákona e ara ara avúavá póké monosí iya ono. ²³ Para vara seyo, séi ma eúkiyá tireti ma monosí uantiyaona yanasinta ma avóbé é oniyaré maé mana íkun uan amin onámaná ma kará nará urantá ma onékun maen *Ída Afová Ukhé Tiferuna Ayarafenu* ina ino seya vompon uvantaré enái mai ma ída afová ukhe ma monosí uantiyá eona mai saréa siretin tian amá uan amenté uno.

²⁴ * “Ma vara vá mai aúpin ma vain danasinta ma uvantein Tiyarafenu mai inaru vá bara vái Bafan mi váken ída varará banta ano ma uvantein monó namun kayofin báé iyan mino. ²⁵ * Máan tukhen béi ída mana yana san o afasí ukhantí teti varará banta ano véin ayaó tifantéuno. Para vara seyo, veyantái minó danasinta vá aunan má banasi amé iyan mino. ²⁶ Ma varafin banasi víkakhen bano van béi mana vanta finté uaren ara ara nanin banta yákó uádaren betin ma avían kain nain damú bá baru vá puntáden aní urú en mino. ²⁷ * Tiyarafenu ma mai avúavasí ein mai vanaši ano véin nan dosen oriyan o oman dákó ino siren máanten mifo véi ída setin me ampiren nentá ban mino. ²⁸ Para vara seyo, véin mái manafin báké baré aruvé iyá tifékun mai van mi siretí ankaní afova vanta kayo ano sikhare ikái vetin anavasin mi setí ankan bá tiféuno. ²⁹ * Máan tukháí Tiyarafenu anavasin ma vá tiferuna ano ída vá Tiyarafenu van kori siriva onámaná an dakhén ne será barará banta ano ma ayan póké uvaman kain danáká inin onan kaó tifano. ³⁰ Pefá banasi ano mai avúava sinta ída afová ukhen bariyan

maen Tiyarafenu ano ifá uantiyaren mifo saréa minó akhempá ma vain nanin banta ano ará baerano van béi ákonaen baya siamiyan mino. ³¹ * Para vara seyo, véi ma maná damú puntákein avuávápó bara yaimino van ma aní uran baré ein banta mai minó nanin banta ano ódaren pura ino sino van mai vanta ano ma fúkaréin purin pinte véin orun avían mantakhen mino.”

³² Máa siran purin nanin banta ma orun mantan baya ma sian dákó iyain nan manáa kéká ano inian kaumpan uren kakhirun ariyan mifo manáa ano semí, “Éi mai vaya evaráne sesí inétifano van muno.” ³³ Máa siran kó inin banta kéká Pori me ampiren oren mino. ³⁴ Pori ma siamein bayará manáa nanin banta ano véin dakhafen mumunan en mino. Mai ma mumunan ein kékápin mana Ar-iopakhusi fintena vanta Dionisiasin má inká ena Damarisin ne sin nanin má manáa nanin banta vái varen mino.

18

Pori Ma Koriní Barufá O Varé Ein Baya Ino

¹ Máan turen mai oyampáké Pori Atensí baru me ampiren Koriní barufá oren mino. ² * Koriní barurá oriven mai rákena mana Yutan banta Ákuiran ne sin má ofóken mino. Béi maen Pontasí bara fákena vanta váken ída ayá damú orikhan be aná Prisiran ne sin nanin má Itarí bara me ampiren erikharen mino. Para va ino, Yutan kéká ma Romú barufin baré ein Sisa Kraudiasi ano minó do siantan orera iyákan mai finté erikhá íkan Pori vékan onano van oren mino. ³ * Oren o onákan kao au fóké davaráe namun uvaran ábasu vákan Pori yere mai yoran afová ukharen be ábasu vá o váken mai yanasinta uvari-yaren mino. ⁴ Máan tiyáken ena ena Sabati yamú Yutan kayoi monó átaru namun oriven maen Yisasini kama vaya iniren mumunan ino van Yutan kayo vá Kiriki kayo vá ákonaen tútúpiyaren mino.

⁵ * Máan tiyaré íkan Sairasin nú Timotin nú ma Masedoniá bara fáké eravíkan

* **17:24:** 1Ki 8:27; Apo 7:48 * **17:25:** Íbo 50:12 * **17:27:** Íbo 145:18; Yer 23:23 * **17:29:** Ais 40:18-20; 44:10-17; Apo 19:26 * **17:31:** Íbo 96:13 * **18:2:** Rom 16:3 * **18:3:** Apo 20:34 * **18:5:** Apo 17:14-15

maen Pori fura sen monó bayafin o aní uven Tiyarafenu ano ma aní ukhein banta Yisasin ban mino sen Yutan kéká tiamen mino. ⁶ *Máa sen tian miyákan maen Yutan kéká ano véin namuroí iyaimpin mai avúava san Pori vetí ankan anien bei auí daná kákena kayó do fupá tian karúdiyáken temí, “Tare ráké ena anan bantá kayofin mi monó baya mo siamenté umpo siretí ankan ma o aiyoranonai mai siretin nina yana ifo mai uman ída séi varanté uno.”

⁷ Máa siren mai monó átaru namun me ampiren ena anan banta ano ma Tiyarafenurá mumunan iyain banta Titius Yastusin amá adé baré íkan mai namun oren mino. ⁸ O vákan monó átaru namuntá ma ánoní ukhein Karispusin ne sin banta vá bei kéká bá ano Bafantá mumunan íkan Koriní baru ráké kokhon nanin banta vá ano mai veya iniden mumunan uren monó non peren mino.

⁹ Máan tiyákan mana inuran Bafan mano Porin auu vaéden tiamemí, “Ída vá perano. Mai ma siyaona veya ída vá pákiyákeya kasae vá banasi siameno. ¹⁰ *Para vara seyo, ma varufin tenti vanasi kokhon bain pasé téi en má túpá ukhékun éin ída uman aminten mino.” ¹¹ Máa sirákan Pori mai varurá eitini viyontá báken Tiyarafenui veya siamiyan afova amiyaren mino.

¹² Máan tiyá íkan Karion ne sin banta ma Akaiá barafá kamanini uvin maen manáa Yutan kéká ano manafin o átaru uven Porin namuroí uantáden do aviren kópin mo khaen mino. ¹³ Mo khauren máa semí, “Ma vanta ano setisi man baya ma yurafurin avúavái vanasi aní iyáken afova amiyan mi enará ukhein avúavápó Tiyarafenurá monosí iyan mino.”

¹⁴ Máa síkan Pori vei veya seno van iyain má Kario ano máa sen Yutan kayo siamemí, “Yutan kayo oe, sireti ma onesin ma sító aau fi kákan aau fi ma mantaré inain banta ma avire khópin me kaesi maéi siretíi veya inenté uno. ¹⁵ Máan tukhen mifo siretíi veya ma inéku mae siretíi man baya vá aví bá baya va san mi inaeona séi mai yanasinta ída yaimonté

umpo sireti yantasá mai veya funtarano.” ¹⁶ Máa siren betí ankan kó baru fintena yo sianten mino. ¹⁷ Máan turákan banasi ano Yutan kayoi monó átaru namuntá ma anoní ukhein banta Sostenesin kó baru rákena fákaren ankamiyákan maen Kario oman kaumpen en mino.

Prisiran Nú Akuiran Nú Bá Inká Aporosin Máí Vaya Ino

¹⁸ *Máan turan Pori manáa yamú Koriní barurá baren mairá monó afá aváeyan me susu siantáden Siriá barafá orono van aravíkan Ákuira ná Pirisiran ná ábasu ano véin bákuren oriyaren Senkriá barurá orun báken inaimpá sipi varen orinten pefá Tiyarafenu vá tian damuádáká einien ánon do khaen mino. ¹⁹ Máan turen mai ráke sipi varen Efesasi barurá oriven Prisiran nú Akuiran nú ábasu mairá me afa uren Yutan kayoi monó átaru namun oriven betí ankan má bayaién mino. ²⁰ Bayaí urákan betin má manáa ayáká bano van inain Pori ifá en mino. ²¹ Ifá uren orinton iyáken betí ankan máa sen tiamemí, “Tiyarafenu ma anunu inti ovaráne erenté uno,” siren sipifin kumamen Efesasi me ampiren oren mino. ²² Mai sipi ano ma Sisariá barurá mo khuádan maen mai ráké Pori Yerusalemí barufá ódiven mun mumunan nanin banta oniyáken bayan mino siren mai oyampáké Antiokí barufá evaránen araven mino.

²³ Mánáa yamú ma Antiokí barurá orun baren maen mai ráké mai varu me ampiren Karesiá bara vá Frikhiá bara vápin eúkiyan Yisasintá ma mumunan iyain nanin banta aya iyan ákona uanten mino.

Aporosi Ne Sin Banta Ano Ma Efesasi Barufá Ma Yisasini Kama Vaya Sein Baya Ino

²⁴ Máan tiyákan Areksandriá baru fáké Aporosin ne sin mana Yutan banta ano Tiyarafenui vompon pintena veya moéken afova mantein bákan Efesasi barurá eren mino. ²⁵ Eren mifo Aporosi maen Bafani aa afová ukhen pasen moéken amusin iyáken Yisasin pákena vanasi siamiyáken Yonini monó non peran manan afová ukharen mino. ²⁶ Máan tukhen monó

* 18:6: Apo 13:46, 51; 20:26 * 18:10: Yos 1:9; Ais 41:10 * 18:18: Nam 6:18; Apo 21:24

átaru namun oriven ída feranton ákonaen baya siyaré íkan Prisiran nú Akuiran nú ábasu ano veni veya iniren béin do aviren békan amá moren Tiya rafenui aa fákena manáa aya íkan moékentá afová en mino.

²⁷ Máan turen Efesasi baru me ampiren Akaiá barafá orono van muno sen Aporosi siyaimpin monó afá aváeyan mano véin ákona uantáden Akaiá barafá ma vain eyo iyampon kayo ano véin kama ino siren mana vompon uvamádan mamaren oren mino. O váken maen Tiya rafenui avábápó ma Yisasintá mumunan iyain kéká kama ayairí iyaren mino. ²⁸ *Máan tiyáken maen Yutan kéká bá ákonaen bayafó asive asive iyáken banasi aúbaná monó dóki fintena vayafó tian amá iyáken Tiya rafenu ano ma aní ukhein bantan Yisasi van ne sen mino.

19

Pori Ma Efesasi Barufá Baré Ein Baya Ino

¹ *Aporosi ma Koriní barurá o vákan maen Pori anuyompin bain baru kayo fimpá eúkiyan banasi onen oren Efesasi barurá oriven mai ráke manáa eyo iyampon kayo o yosen mino. ² *Yosiren mai kéká máa sen inaemí, “Mumunan ma eona yamú Kantá Aunan bare rafono,” síkan mai kéká ano evaránen temí, “Ída ino. Kantá Aunan ban mino sé ída afová ukhá tiféuno.” ³ Máa síkan Pori evaránen inaemí, “Mai intéa monó non ná tireti varera fono,” síkan betí evaránen temí, “Yoni ma aní ukhein monó non ma feran mino.” ⁴ *Máa síkan Pori semí, “Pefá ma Yoni monó non péantiyá ein maen mai vanasi ano ma ará baédan mi féantiyaren mino. Máan tiyáken ínaimpá ma sen toyampá erin nain bantarasá mumunan ono ma síkhá ein mai Yisasin nan mi síkharen mino. ⁵ Máa sen tiamin iniren mai kéká ano Bafan Yisasin aviká monó non peren mino. ⁶ *Monó non pédákan Pori ano vetin ánontá ayan kaíkan Kantá Aunan mano vetimpin e víkavíkan ara ara veya vá sakhanampa veya vá ten oreraen mino. ⁷ Máan ma ein mai siyan míkan mifo

sirantan kan orun kádan (12) banta kayo ino.

⁸ Máan turen Pori kanú manaú biyontá mairá báken maen Yutan kayoi monó átaru namumpin ódiven Tiya rafenui Yafisin aú pintena veya ákonaen tiamiyaren mino. ⁹ Máa sen tian miyákan manáa kéká ano mai vayará ída mumunan inton banasi aúbaná mai ma Yisasintá mumunan in Aa Ma Yakhafin Kéká ankayan tiyaimpin Pori me ifá uren eyo iyampon kayo iyan uaren Tairanusini afova amin namun o váken ena ena yamú mai kéká bá bayaí iyaren mino. ¹⁰ Kan orana aúpin máa sen oriyan bákan Yutan kéká bá Kiriki kéká bá ma Esiá barafin ma vá ein mai minó kayo ano Bafani veya inen mino.

Skivan Anin Kayo Ano Ma Namu Aunan Kayo Yo Siantano Van Ein Baya Ino

¹¹ *Máan tiyákan Porin ayan táké uaren Tiya rafenu ano manáa enará ukhein danasinta afoká iyaren mino. ¹² *Máan tiyan maen asínun arumin davaráe ano fi inká aurá ma yampan davaráe ano fi ma Porin au aruvúdein baren mo aí nanin banta aurá tosain maen mai kéká aí kípiyan inká namu aunan ma varé ein mano me ampiren oriya ren mino.

¹³ Máan tiyákan manáa Yutan banta kayo ano eúkiyan Yisasin aviká namu aunan ma vanasifin bain ma yo siantano van maen máa siyaren mino, “Mai ma Pori ano ma vanasifin tian dákó iyain banta Yisasin aviká mai kéká me ampeno.”

¹⁴ Yutan kayoi monó ánon banta ma Skiva ne sen aví tiyain banta anin kéká ma yan manápá ifo afápá kan un kádan kayo ma vain mano namu aunan do siantiyaren mino. ¹⁵ Máan ten oriyá íkan maná damú mai namu aunan mano vetíi veya iníden evaránen temí, “Mai ma siyaona Yisasin má Porin má onté umpo siretí intéa kékasa fono.” ¹⁶ Máa siren mai ma namu aunan aúpin bain banta ano mai kéká ankáden ká aruren aú daná dákaran nare ana kéká ano avápá me onen má me ampiren karan oren mino.

* 18:28: Apo 9:22 * 19:1: 1Ko 3:6 * 19:2: Apo 8:16 * 19:4: Mat 3:11 * 19:6: Apo 8:17; 10:44, 46
* 19:11: Apo 14:3 * 19:12: Apo 5:15 * 19:17: Apo 5:11

17 *Máan turákan Efesasí barufin ma Yutan nanin banta vá Kiriki nanin banta vá ma vain kayo ano mai vava iniden kákantá akhokho van iyáken Bafan Yisasin aví daníen mino. 18 Mai vava iniden ma mumunan ein kéká ano vanasi avorá e unen eriven betíi ume sian dákó en mino. 19 Máan tiyákan manáa kéká ano ma ara ara uvátakhan baya ma uvantá ein bompon kayo varen me khaúden banasi avorá ira saman kauren mino. Mai vompon kayoi miyan ma yankafein mai fifti tauseni (50,000) drakma* e sin moní ma sirivafó uvantein mino. 20 Máan tíkan mai aa fáké Bafani vava ano ákona vá mo kákaníen minó akhempá oreraen mino.

21 *Mai yanasinta ma yákó uvíkan maen Pori Yerusaremí orono van iyáken temí, “Masedoniá bara vá Akaiá bara vápin ori-aré ma Yerusaremí onóbé maé mai ráké Romú barufá deren oronté uno.” 22 Maa siren béin ayaen doran bantá kan Timotin nú Erastasin nú tiantan ben an uanten Masedoniá barafá oriyákan béi Esiá barafá manáa ayáká baren mino.

Efasasí Barurá Ma Kákan Aruve Asive In Afoká Ein Baya Ino

23 *Maí damú ana Aa Ma Yakhafin Kéka san Efesasí barufin kákan uman dákó en mino. 24 Esé arái in uman maen mana Demitriasin ne sin banta váken béi ano kokhon doran banta avían kain anasi ayarafenu Atemisini sitó namun sirivafó uvádan kákan monípó miyaní iyaren mino. 25 Máan tiyain bakan mai vanta ano vanasi vá bei yoran banta kayo vá inká ena mai yanasinta ma uvariyan kéká bá iyanuan kaúden máa semí, “Banta kayo oe, afovasá ono mai yorantái setí kákan moní bariyá tiféuno. 26 Máan tiyá tiferuna ifo inká tireti iniyáke onen nan Pori ano Efesasí baru rákena nanin banta vá Esiá bara fin ma vain nanin banta vá ákona vayafó aviren tavi aasái oren mino. Béi siyáken ayampó ma uvaran mai ída ayarafenu ino siyan mino. 27 Máan ma siyain baya ano setí ma uvádé moní bariyá tiferuna yanái aa iyariyákan banasi ano Atemisintá ma monosí iyá ein má bení

monó namun mái maman paen danasí inten mino. Máan tiyáken Esiá barafin má minó akhempá ma ven aví daní iyá ein maman paen danasí intin beni kákan bí asuse inten mino.”

28 Maa síkan mai vava iniden mai nanin banta ano aranan uaren avádóden oovaren temí, “Efesasí nanin bantai kákan ayarafenu Atemisi ino.” 29 *Maa síkan Efesasí barurá ma vain nanin banta ano aran má bádiyan o átaru uven Khaiusin nú Aristakusin nú do yarifen átaru varurá oren mino. Mai ma yarifen orein bantá kan mai Masedoniákéi váken Pori má monó dorarien noren mino. 30 Máan tíkan banasi avorá Pori orivé baya seno van íkan eyo iyampon kayo ano ída vá orono siren ayópá en mino. 31 Máan tiyákan Esiá barafá ma Kamanin dorampin ma Porini arona kayo varé ein mano yere véin nan ída vá banasi avorá átaru varurá orino siren baya yan baren eren mino.

32 Mai ma átaru varurá o iyein nanin bantai ineine asuse ukhan, minó ano ara ara vava esen orera iyáken náí anavará e átaru ukhé tiferafuno siren kokhon mano amino en mino. 33 Máan tiyákan Yutan kayo ano Areksandan avéken mun banasi avorá kaúdan manáa kéká ano venan mai ma afoká iyain baya sian dákó ino síkan béi ayan daní uren baya fákano siren beyan nan tian amá ono van en mino. 34 Máan tíkan banasi ano afová en onákan béi Yutan banta vaimpin minó ano oo manafiní uren kankan áau aúpin ovaren oriyan temí, “Efesasí nanin bantai Atemisi anan kákaní ukhen mino.”

35 Maa siyákan Efesasí barui vompon uvaran banta ano vanasi van baya fákano síkan mai ma oovariyá ein mo fákaran béi máa semí, “Minó akhempá ma vain nanin banta ano ídá afová ukhan ná kákan Atemisin aman ma inaru fáké un kararen eravin ná Efesasí baru ano mai yanáká bá beni monó namuntá dafíken nafino. 36 Máan tukhantin ída mana vanta ano sen mai yaná ída onté uno sinten mifo ída uron ná ámun uare mana yanasí ono. 37 Ma vantá kanan mano ída mana yaná monó namun pintena umoyan

* 19:19: Drakma e ma siyain mai mana aintain moní an dakhein bakan mai moní ano mana vayan ma yorari uren miyan bariyá ein má manái ukhen mino. * 19:21: Apo 23:11; Rom 1:13 * 19:23: 2Ko 1:8 * 19:29: Apo 20:4; 27:2; Kor 4:10; Frm 24

baren inká ída setisi anasi siyarafenu Atemisin ankayan tikheintá pasavin avire ere ono. ³⁸ Demitriasi má bei yoran banta kayo vápin ma uman baya ma vantí mae mái vava kópin maman kaúdesin ná kó inin banta kéká ano vá mái vava yaíden ná puntarano. ³⁹ Máan tukhen mifo siretimpin ma manáa ena vava vá ma vantí mae mái vava vare mo átaru varurá tiresin banasi ano vá mái vava yaimino. ⁴⁰ Máan tiyanti afovasá ono. Tare ma variyá tiferuna avúaváká kasaen kó tisintaren ukhen mino. Ída mana ana vaintá paran e átaru iyá tiferuna ída kanai é tian amá ótiféuno.” ⁴¹ Maa siren mái nanin banta siantan oreraen mino.

20

Pori Ma Masedoniá Barafá Bá Kiriki Varafá Bá Ma Orein Baya Ino

¹ Mái ma ákonará asiviyá ein baya kayo ma mo kípavin maen Pori ano eyo iyampon kayo aran e átaru uvíkan betin ákona uantan baya siamidén mái oyampáké betí ankan me susu siantáden Masedoniá barafá oren mino. ² Masedoniá barafin oriyan monó nanin banta ará ákona uantan baya e siamen oriyaen Kiriki varafin o unaven ³ mairá kanú manáú biyontá o varen mái ráké Siriá barafá sipi varé orono van ein mifo ifá uren evaránen Masedoniá barafá oren mino. Máí fara va ino. Yutan banta kayo ano véin aruan purono van aúpá baya sian damuádiyain baya iníden mái van mi erikhá ein aintá evaránen oren mino. ⁴ Oríkan ma véin má orein kéká maen Beriá banta Pirusin anin Sopaten má Tesaronáí káke vantá kan Aristakusin nú Sékundusin nú bá Debí baru ráke vantá kan Khaiusin má Timotin má inká Esiá bara fákena vantá kan Tikikasin nú Trofimusin nú bá ino. ⁵ Máí vanta kayo ano aníen oren Troasí barurá o sive ukharen mino. ⁶ O sive ukhá Firipai barurá bákun Yisi Ída Van Bereti Ma Nan Omá Damú esantaví máí ráké sipifin e varé oriyá kun dan manápá damú oriví mairá Troasí barurá betí ankan baintá orivé máí varurá mana uikirá baré uno. ⁷ Baré esé aráí in damú bereti kisi kisi é

nano van monó nanin banta vá mana namun o átaru ukhékun Pori vava sen oriyan evaránen inuran aúbanasí en mino. Máí fara va ino. Ena ákuráí véi orinten pasin máan ten mino. ⁸ Tari stori namumpin minó ano iyukhé tifékun maifin kokhon oon uruádan kiyaren mino. ⁹ Kiyákan máí namuni unduará Yutikusin ne sin pumara ano kumanten aun tókó iyan bákun Pori vava sen oriyan baré in aunká baaren eraven barará ankamin banasi ano orun aviá daran maen máí fumara ano fúkaren mino. ¹⁰ Máan tukhan Pori araven máí fumara orun dafayoriyan máa semí, “Ída fúken ayun para van mifo i vá akhokho van ono.” ¹¹ Maa siren evaránen máí namumpin ódiven bereti un máden kisiren naren ayáká baya sen oriyan mo kakhen ákurasí íkan me onen oren mino. ¹² Orivíkan mumunan nanin banta ano máí fumara ayun para van ará kusin má amusin iyan aviren mo mápin kaen mino.

Pori Ma Efesasíke Monó Doran Banta Kayo Ará Ákona Uantein Baya Ino

¹³ Pori ano Asosí baru ráke nan sipi e varanté uno siren barará oriyaimpin tetí ankan béin an uanté sipi varé Asosí barurá béin o ave é tiféuno. ¹⁴ O ave ukhá ékun Pori onóbí ben má do aviré sipifin Mitiriní barufá oré tiféuno. ¹⁵ Ená damú Mitiriní baru ráke sipi varé Kiosí musó akhempá onóbé ená damú Samosí barurá onobé inká ená damú Miretusí barurá o uné tiféuno. ¹⁶ O unavékun Pori Esiá barafin manáa ayáká ída vano van Efesasí baru esantano van en mino. Para va ino. Aaí ma intí maé Kantá Aunan ma erein damú ída erikhantí ainé Yerusaremí barufá orono van en mino.

¹⁷ *Maa siren Miretusí barurá báken Efesasí baru rákena Yisasini mumunan nanin bantai ánon banta kayo ano e onano van Pori vava siádan oren mino. ¹⁸ *E siádan orin máí kéká ano eriyain má béi máa sen betin tiamemí, “Esé aráí é ma Esiá barafin ereruna ráké tiren má anan bá oriya bákuya senti sivútivá pefái afová ukha rono. ¹⁹ Máan tukhein nan téi ifí pinté teyan maman bararasí uré Bafani yorará iyá kun maen manáa Yutan kéká ano séin

* 20:17: Apo 18:21 * 20:18: Apo 18:19–19:10

tiruan purono siren moéken uman timi-yaren mino. ²⁰ Tiretí ankan afová ukhe rono, siretin ayaen ma ará ákona uantan monó baya kayo ída mana áé umpo minó nanin banta avorá mai afova amiyá maé inká tiretin amápin e feré kuvé iyá mai yorari é uno. ²¹ Máan tiyá maé Yutan kayo vá Kiriki kayo vá tiamiyáké ará baéde Tiyarafenu vaipá orive vá tetisi Bafan Yisasintá mumunan ono sé tiamikhé uno.

²² “Máan tukhein nan mi saréa Kantá Aunaní anunu vákuré Yerusaremí barufá oriyá umpo intéa yanasá ten timaniná afoká inten nafi mai séi ída afová ukhé uno. ²³ *Máan tukhen mifo minó barurá ma orerunafin mai Kantá Aunan mano sisimiyáken kákan uman má karavusi vá ano anan éin ave ukhen mino. ²⁴ *Máa siyan mifo ída se suu van iniyáké Bafan Yisasi ano ma simikhein doran dóan kípáno van mi inikhé uno. Mai yoran mi Tiyarafenu ano ma vei sarisarifó ma evaránen tetin tivíkein mai kama vayan tian dáko onté uno.

²⁵ “Máan tukhein nan mi séi afová iyákéi mai ma varu vaintá eúkiyá ma Tiyarafenui Yafisin aú pintena vaya kayo ma siamiyá eruna nanin banta finté mana ano ída evaráne séin tonan nono. ²⁶ Máan tukhein nan mi siretin pinté ma mana ano o afeyoresí maé téi ída kanaí é mai uman barantéi saréa siretin avorá tian amá e uno. ²⁷ Para vara seyo, Tiyarafenu ano ma siretin nan tiamesin ná afová en inino ma sikhá ein baya máa fefái minó tiamikhé uno. ²⁸ *Máan tukhé umpo siretíyan kama e yafiare vá inká tiretin nan ma yafisino siren ma Kantá Aunan mano ma amikhein nanin banta kayo rasá kama e yafiseno. Tiyarafenu ano ma ve anini narefó ma miyaní uan beinaí ukhein mumunan nanin bantarasá sipisipirá ma yafisiyain kéká an de vá dafiseno. ²⁹ *Téi ma orivékun maen manáa nanin banta ano afá iyan ma sirempin ereiní uven sipisipi kayo ma máden asuse ono van einí intéi téi afová ukhé uno. ³⁰ Máan tiyantín tiretí aúbanáké manáa ano e mantaven pura yaná do vaéden kampun bayafó

Yisasin bákurin nanin bantai inin máden asuse uren iyanen orinten mino. ³¹ *Máan tinten mifo vá dafian ákona iyáke vá ovare me ineno. Kanú manaú orana aúpin mi ída sivíkan te sínu finté inúpa ákurá man o amé eriyaré uno.

³² Mai van mi saréa siretí ankan avián Tiyarafenui yafisimpin má béi ma sarisari ukhein baya aúpin má ma kaeruna mai ano vá tiretí ankani ará ákona uantiyá inti vá bení kantasí ukhein nanin banta ano ma o varan nain avábasá barano. ³³ *Téi ma siretin má báké maé ída mana nanin bantai siriva fi kori fi inka kama aú danasa rafi sinunu iyá uno. ³⁴ *Máan tiyá umpo sireti afovasá ono, te siyampói minó danasinta uvádé teyan tiya iyá inká tesi mana yoran kéká ayaé iyá uno. ³⁵ Ákona yorari uren ma ona i van kéká ma ayain inka siretin aní é uno. Bafan Yisasi ano ve oo fenté máan mi sikharen mino, ‘Ena vanta ma amin kékápin mi moéken avábá ban mifo ena finte ma varan kékápin ída avábá ban mino’ ma sikhare ein baya vá ovare me ineno.”

³⁶ Mai vaya kayo sian kípáren Pori aron durafúden mai nanin banta kayo vá amúken mino. ³⁷ Máan turan mai kayo ano Porin o yafayóden ifí diyáken amónen mino. ³⁸ Mai ma vetí ankan ma moéken arunaná barein maen mai ma Pori sen téin tiyafen ída evaráne sonan nono ma sein baya van mino. Máan turen béin aviren sipifin mo afaen mino.

21

Pori Má Bei Mana Yoran Kéká Bá Ano Ma Yerusaremí Orein Baya Ino

¹ Efesasí baru ráke monó doran banta kayo ída me amperen iyá maé ayan amantiyá tusu siantádé sipifin un kumamé puntádé Kosí musóká oré uno. O varé ená damú Rodesí musóká onóbé mai ráké Patará barurá oré tiféuno. ² Patará barurá o varé iné tifékun mana sipi ano Fonisiá barafá orinton iyane siyaimpin mai sipifin kumamé oré tiféuno. ³ Oriyá baré Saiparasí musó áde ayan ópá oriaré Siriá barafin Taiyá barurá o unavé tifékun mai

* 20:23: Apo 9:16; 21:11 * 20:24: Apo 21:13; 2Ti 4:7 * 20:28: 1Ti 4:16; 1Pi 5:2-4 * 20:29: Mat 7:15; Yon 10:12 * 20:31: 1Te 2:11 * 20:33: 1Ko 9:11-12 * 20:34: Apo 18:3; 1Te 2:9 * 21:4: Apo 20:23

varu rákena yanasinta ma varen oriyá ein mo khaen mino. ⁴ *Máan tiyaimpin tetí ankan Taiyá barurá eravuvé mumunan nanin banta van e yosé oriyá o odaré betin má dan manápá ifo afápá kan un kádan damú bákun Kantá Aunan pintena mumunan nanin banta ano manáa inin maren Porin ayópá en ída vá Yerusaremí barufá orono sen mino. ⁵ Máa sirá bákun tetisi orin damusí iyain má mai varu me ampiré oré tiféuno. Minó mai varuráké ma Yisasin bákuriyain banta kayo vá betí aná akhafana vá ano Taiyá baru me ampiren tetin tiviren un non akhempá morúdá eyu ampantá tiron durafúde timúké tiféuno. ⁶ Timúkuré ínaimpáké tiyan timantin maran uré tetiyan sipifin odékun maen betí evaránen barufá oren mino.

Akhabusi Ne Sin Mana Sakhanampa Vanta Ano Ma Porin Amaan Baya Siamein Baya Ino

⁷ Máan turé Taiyá baru me ampiré sipi varé oriyá baré Toremaisí barurá o unavé tifé mai rákena mumunan nanin banta o ódaré, bayan mino siré tifé betí ankan má mana vayan baré tiféuno. ⁸ *Baré ena ákurá Toremaisí baru me ampiré oriyá baré Sisariá barurá o unavé maé monó baya ma sian banasi amin banta Firipin amá o varé tiféuno. Mai ma vaya varen orin kéká ma yunan ayaino van dan manápá ifo afápá kan un kádan banta kéká ma aní uran baimpin ben mái van mino. ⁹ Béi kamí kamí arinta kéká dan báken banta ída varanton para van maen sakhanampa vaya kayo siyaren mino.

¹⁰ *Máan tiyáká mai varurá manáa yamú ovátifékun Yutan bara fáké mana sakhanampa vanta Akhavirusin ne sin mano eren mino. ¹¹ *Mai vanta ano seti varunará eriven Porini amú anan e máden be ayan arantantá damuren máa semí, “Kantá Aunan mano sisimiyáken, Yerusaremí ma vain Yutan kayo ano ma avúavá anan baremi ma amú anan afóen ayan arantantá damuren ena anan banta kayo ayampin kainten mino.

¹² Máa siká mai vaya ma iniré tifé mai varu ráke nanin banta vá Porin nan ída Yerusaremí barufá odino van ayópá é tiféuno. ¹³ *Ayopá é tifékun béi evaránen temí, “Pará tiretí ankan ifiso vaso iyayá ten tikuna simiya rafono. Bafan Yisasin aviká ma sen tiyan tirantantá ma yamin nan mana va útakhe raumpo Yerusaremí ma sen tiruan purin masan deren útakhé uno.” ¹⁴ Máa siká ínané ayópá é tifékun Pori yo yurú en oronté uno siyaimpin mairá mo ifá uré máa sé tiféuno, “Bafani anunu áesin ná dákó ino.”

¹⁵ Máa siré mai oyampáké tetisina yanasinta utaaré Yerusaremí barufá odé tiféuno. ¹⁶ Ódékun Sisariá baru ráké manáa eyo iyampon kayo ano siviren ódein mano mana feyan eyo iyampon Saiparasike vanta Nasonin amápin mun kaí baré tiféuno.

Pori Má Bei Mana Yoran Kéká Bá Ma Yerusaremí Ódein Baya Ino

¹⁷ Yerusaremí barurá ma e uné odé tifékun maen monó tifá tiváeyan mano amusin iyáken tiviren mino. ¹⁸ Máan turá baré ená damú Yemisin onano siré oré tifékun Pori setin má oríkan minó monó doran banta kayo vá e átaru en mino. ¹⁹ *E átaru uvíkan Pori mai kéká ará kusin baya siren mairá Tiyarafenu ano ma veni monó doran pinté uaren ma ena anan nanin bantafin ma ara ara yorarí ukhá ein baya siamen mino.

Pori Ma Yerusaremí Kákan Monó Namumpin Ma Tiyarafenu Avorá Avusesein Avúavasí Ein Baya Ino

²⁰ *Siamíkan mai ánon banta kayo ano Porini vaya inídaren Tiyarafenu aví daní iyáken temí, “Tifá tiváe oe, éi afovasá ono. Kokhon tauseni Yutan kayo ano inka Yisasintá mumunan iyáken, mai kayo ano Mosesini man baya ánain ákonaen dakhafiyain mino. ²¹ Máan tiyan mifo manáa kayo ano eni yoran baya mai nanin banta me siamiyáken maen éin nan ena anan nanin banta aúban ma vain Yutan kéká san ída vá Mosesini man baya yakhafiyáke inká tiretí ankan akhafana

* **21:8:** Apo 6:5; 8:40 * **21:10:** Apo 11:28 * **21:11:** Apo 20:23; 21:33 * **21:13:** Apo 20:24 * **21:19:** Apo 15:12 * **21:20:** Apo 15:1, 5

ída vá au khaiya ída vá peyante avúavá bákurono siyan ne sen tiamikhen mino. ²² Éin nan pura sen e vane sen ininten mifo intesá ó tifante rafuno. ²³ *Máan tukhein nan mi seti ma siamenuna aa vá dakhafono. Tetin pinté kamí kamí banta kayo ano Tiyarafenu vá ákona vaya sian damukhen mino. ²⁴ Mai van mi éi mai kéká bá o asotú uve vá mai vanta kéká avíareya Tiyarafenu avorá ma avusese in avúavasí iya vá éi ano íkun uan amin danasinta miyaní uresin ná mai kayo ano ánon do minó barukhano. Máan tesin ná minó nanin banta ano oniyáken ná mai ma éin au finté iyain baya vará ída fura vaya ino sen iniyáken ná en nan man baya ánain dakhafiyan mino sen inino. ²⁵ *Máan tukháí ena anan nanin banta finté ma mumunan iyain kéká pefái vompon uvaman amiyáké máa sé tiféuno. Ída vá kampun ayarafenun ma íkun uan amiran nain danasinta neya vá, nare fa yiyain tafúna ída neya vá amempin ma anan kuren arukhan nain tafúna ída neya vá inká ída vá ena ana safi ena avafun nafi inká aasá non nanin arinta va safi vá banasíí ono sikhé tiféuno.

²⁶ *Máa sirákan ena ákurá Pori ano mai ma seinien mai vanta kayo avíaren Ayarafenu avorá ma avusesein avúavasí uren maen kákan monó namumpin ódiven mai avúavá ma kípan nain damú ma mana mana vanta ano íkun uan amin nain baya vanasi siameno van óden mino.

Esiá Bara Fáke Yutan Kayo Ano Ma Porin Aruan Puro no Van Pákein Baya Ino

²⁷ Dan manápá ifo afápá kan un kádan damú ma avusese in avúavá ma variyá ein mai ádé anantá mo akhen diyákan maen Esiá bara fáké ma erikhá ein Yutan kéká ano kákan monó namun pinte Porin ódaren banasi arápiní íkan aranan uaren Porin páken mino. ²⁸ Páken oriyáken máa sen oovaren mí, “Isareri vanta kayo oe, erive setin tiya ono. Ma vanta ano minó akhempá nóken Mosesini man baya vá tetinti vanasi vá inká ma kákan monó namun má ankayan tiyaren mino. Máa siyaren inká Kiriki vanta kéká aviren ma

kákan monó namumpin dun peran maen mai avúavá ano kantasí ukhá ein baru maman painien mino. ²⁹ *Para va máa sen na ino. Pefá Pori ano Efesasí baru rákena vanta Tarofimusin má Yerusaremí nókan Yutan kayo ano ontaren pasin mi mai vantán aviren kákan monó namun dafufin óden mino sen iniren mi máan ten mino.

Romú Piripo Kayo Ano Ma Porin Ayaein Baya Ino

³⁰ Porin ma fákan baya Yerusaremí nanin banta ano iniren o éke e éke en kákan monó namuni varurá ana e iyuaeren béin do yarifen barufá araviyain má ainen monó dafu ona kayo munken oreraen mino. ³¹ Munkuren béin aruan puro no siráken minó Yerusaremí nanin banta ano aran má o éken átaru iyain baya Romú bara fákena aruvin banta kayorá ma yafikein banta ano inen mino. ³² Iniren mai yafisin banta ano esé ana manáa aruvin banta kayoi yafisin banta vá aruvin banta kéká bá avíaren mai ma sisuvo siyain barurá araviyain má mai nanin banta ano vetin onen Porin ma ankamiyá ein mo ifá en mino.

³³ Máan tiyain má mai yafisin banta ano Porin o fákaren aruvin banta kéká tíkan kankan seni anampó béin damuran mairá Yutan kayorá inaemí, “Ma iyen bantá báken náí auisá ukha fono.” ³⁴ Máa sen ina íkan manáa kéká ano oovarariyan ena vaya e sen orin maen inká ena kéká ano ena vaya e sen orin tisuvofin ída kanaíen betíi vaya inen mai ma afoká iyain afová oren iyaimpin mai yafisin banta ano aruvin banta kayo síkan Porin aviren aruvin banta kayo amápin óden mino. ³⁵ Porin ma aviren oriaren ma yetará ódiyain má mai nanin banta ano véin aruan puro no siren aran má aasá iyariyaimpin aruvin banta kéká ano véin avían daní uren daiyó en óden mino. ³⁶ *Oriyákan minó nanin banta ano yakhafen oyampá oriyáken, “Béin aruan puro no,” sen oovaren mino.

Pori Ma Aramaiki Vaya Finté Banasi Vaya Siamein Baya Ino

* 21:23: Nam 6:1-20; Apo 18:18 * 21:25: Apo 15:29 * 21:26: 1Ko 9:20 * 21:29: Apo 20:4 * 21:36: Ruk 23:18

³⁷ Maa siyákan mai aruvin banta kayo ano Porin aviren mápin ódono van áde oriyain má béi máa sen dafisin banta inaemí, “Kaná áesi manáa vava éin tiamente rafuno,” síkan. Mai yafisin banta ano Porin inaen temí, “Éi Kiriki vava afová ukhe fono. ³⁸ *Éi nan Isipike vanta mairá ma kamanin namuroí uantáden ma manáa yamú orivin kamí kamí tauseni (4000) aruvin banta kayo yo iyanen kámá barafá ovaré ein banta inon té iniyá uno.

³⁹ Maa sen ina íkan Pori evaránen temí, “Ída ifo séi maé Sirisiá barafá Tasusí ma aví bain baru ráke Yutan mumpo áesi banasi vava siameno.”

⁴⁰ Maa síkan dafisin banta ano kana ino síkan má ona ódintá un mantaven ayan daní íkan banasi ma sisuvo siyá ein mo fúkehavin Aramaiki vava finté máa sen tiamen mino.

22

¹ Pori semí, “Tifá tiváeyan má tifóeyan ma soe, inimesirá téin ma kó tisintiyaona fákena sian amá ono.” ² Maa siren Yutan kayoi vava Aramaiki finté ma síkan maen banasi mai vava iníden tisuvo ma siyá ein mo fúkehavin Pori máa sen mino,

³ * “Téi maé mana Yutan bantan bákun te sinóe ano Sirisiá barafin ma vain baru Tasusíi séin kaen mifo ma kákan barurái e inoré uno. E inoriyá maé Kamarierin aránaó bákun teti sináuyani minó man bava sisimidá pasé mai ma siretin ma Tiyarafenun aví ma yaní iyaonaí anan éi Tiyarafenun aví dani iyá uno. ⁴ *Máan tiyá mai Aa Ma Yakhafin Kéká uman amé aruan puriyáké manáa kéká anasi vá banta vá páké mo karavusifin kaiyá uno. ⁵ Mai avúavá ma variyá eruna mai monó ánon banta kayoi ánon banta vá Kanisori kayo vá ano afová ukhen mino. Betí ankan mana vompon uvamáda betíi kéká ma Damaskasí barurá bain morun amiré mai ma Yisasintá ma mumunan iyá ein kéká karavusi orun páké Yerusaremí mun kaúde uman ameno van aravé uno.

⁶ Araviyarékun bayan aúbaná Damaskasí baru áde ma orékun maen inaru fáké manáda kákan panu sin mano séin

iyááden mino. ⁷ Máan tiká barará ma eravé tinkamiyá mana vava inékun téin tisimemí, ‘Sori oe, Sori oe, fará tein uman timé oriyá ba fono.’

⁸ “Maa síká mairá béin inaéú, ‘Bafan noe, éi iye fono,’ sékun béi máa semí, ‘Téi Nasaretike vanta Yisasin bákuya éi uman time oriya va ono.’ ⁹ Mai ma sen má orikhá ein kéká ano inaru fákena kakhan manan onen mifo mai ma séin bava sisimiyain banta avava ída inen mino.

¹⁰ “Maa síká mairá béin inaéú, ‘Bafan noe, séi náinasisá onte rafuno,’ sékun Bafan mano máa semí, ‘Mantaveya Damaskasí barufin ódesin maen mairái éi ma yoranona minó bava siaminten mino.’ ¹¹ Maa sirá mai ma fanu sein mano suu yufúkuáda ída onanunaí ékun mai ma se má orikhá ein kayo ano siyanoren Damaskasí barufin óden mino.

¹² “Mai varurá Ananiasin ne sin banta maen Tiyarafenui man bava ánain dakhafiyáken ben aránaó bakan Yutan kayo ano véin amo siyain banta varen e sonano van eren mino. ¹³ Eren beí ano senti áde e mantaven temí, ‘Te sífá tiváe Sori oe, auu mábe onano,’ síkan esé anan tuu kama iká tuu mábé béin mun oné uno.

¹⁴ “Onékun béi máa semí, ‘Setinti sinaúyani Ayarafenu ano vei anunu afová ure yakhafiya inká Puntákein Banta oniyáke veni vava ineno van mi éin aní uren aviren mino. ¹⁵ Éi anon mai ma oniyáke veni vava ineona vanasifin tian pura yanasí iyákeya véin pákena sian dákó inono. ¹⁶ Máan tukhen mifo náinasará ave ukhé ba fono. Mantaveya Yisasin avíká mumunan ureya monó non pédesin eni ume sesé ino.’

Ena Anan Nanin Bantafin Kama Vava Mo Siamino Van Ma Yisasi Ano Porin Tiantein Baya Ino

¹⁷ “Maa sirá Yerusaremí ovarané e vá maé kákan monó namun un báké timúkiyá ékun tuu vaéda ¹⁸ *Bafan onékun téin tisimen temí, ‘Aineya Yerusaremí baru me ampire sare ana orono. Para vara seyo, séin pákena vava ma sesin banasi ano ída uron mi ininten mino.’

* 21:38: Apo 5:36-37 * 22:3: Apo 5:34 * 22:4: Apo 8:3 * 22:18: Apo 9:29-30 * 22:19: Apo 8:3; 26:9-11

19 **“Máa síká evaráné béin tiaméú, ‘Bafan noe, mai nanin banta ano afová ukhá monó átaru namun pimpá oriviyá éintá ma mumunan iyá ein kéká pákaré aruriyá karavusifin kaiyá uno. 20 *Máan tiyáké éintá ma mumunan ukhá ein banta Stivenin ma arein damú téi anon mai ma ariyá ein kayoi ayá aui danáká dafíké, kana ino siyá kun mi véin aruan purein mino.*

21 **“Máa sirékun Bafan mano semí, ‘Orono, éin tian tékuya nenta suron ena anan nanin bantafin orin nono.”*

Pori Ma Romú Bara Fákena Vantá Uno Sein Baya Ino

22 Banasi ano vempáké púkekha khen inikhan Pori mai vaya ma sian kípáren maen mairá banasi ano bádiyáken oovararen temí, “Ída áesin máan banta kéká ma varará pa vanten mifo véin aresin purino.

23-24 Banasi ano ma máa sen o variyáken danténa iyon afuin daváden dan beravé iyáken kayó páken karúdarú iyan, maen Porin aviren mápin ódino van aruvin banta kayoi ayafa ano sianten mino. Máa síkan aruvin kéká ano aviren odiyan máa sen tiamemí, “Yafiyosí ureya Porin ankádeya ina ono. Paraé tiren ná banasi ano aran má oovararen ma avúavá bariyan nafino se veni ana ina ono.

25 *Máa síkan Porin dafiyó ankamono van béin barará maman aseriyákan mairá mana antareti (100) aruvin banta kayoi yafisin banta ano mantakháin mai vantará Pori inaen temí, “Kanaisá eyá Romú bara fákena vanta maen ída veni aui ana afová inton dafiyó ankaminte fono.

26 Máa síkan mana antareti (100) aruvin banta kayoi yafisin banta ano Pori ma sein baya iníden oren bei ayafa vanta mo siamemí, “Ma Romú bara fákena vantán ban mifo intesá inte fono,” sen inaen mino.

27 Ayafa vanta ano mai vaya iníden oren mo Porin inaemí, “Éi fura seyá Romú bara fákena vanta fono,” síkan Pori eyo sen evaránen béin tiamen mino.

28 Máa síkan mai ayafa vanta ano semí, “Romú bara fákena vantaí onovan kákan monípói miyaní ukhé uno,” síkan Pori semí, “Máan te ompo se sinóe sífóe maen Romú bara fákena nanin bantan baren téin kai bá uno.”

29 *Máa síkan mai vaya inídaren mai ma véin dafiyó ankáden inaono siyá ein kéká ano me ifáen orera iyákan ayafa vanta ano Porin ma Romú bara fáke vanta vakan ma seni anampó ayan arantantá damukhá ein nan ovaren me inen akhokho van en mino.

Kanisori Kayo Avorá Porin Aviren Mo Khaein Baya Ino

30 Máan turen ená damú ayafa vanta ano fará Yutan kéká ano Porin namuroí uantiyan nafino van afová ono siren seni anan utúantáden tikan monó ánon banta kayoi ánon kéká bá Kanisori kayo vá e átaru uvin betí ankan avorá Porin aviren mo khaen mino.

23

1 Porin aviren mo Kanisori kayo avorá mo kaúdan béi mai kayo aaufen mo oniyáken temí, “Tifá tiváeyan noe, Tiyarafenu ano ma simein doran inka séi yóan kípárekun téimpin ída mana uman bá tirá kusin mái vá uno. 2 *Máa siyain má monó ánon banta kékái ánon banta Ananiasí ano Porin ádé ma mantakhá ein kayo van béin oo ankamino van tiamen mino. 3 *Máa síkan Pori evaránen béin tiamemí, “Tiyarafenu ano éin mi ankaminten mino. Para vara seyo, éin aúpin mana namu yafu ma fúta ukhan banasi ano kama ukhen mino siren onano van efanten kava ma yan me fereneiníi ukha ono. Man baya fóké téin kó tisintano sireya eyantá mai man baya yurafuriyáke séin tinkamino van tian miya ono.

4 Máa síkan mai ma Porin ádé mantakhá ein kayo ano máa sen béin tiamemí, “Éi ídá perantó Tiyarafenui ánon banta kékái ánon banta ankayan baya siré ayave amiya fono.”

5 Máa síkan Pori evaránen temí, “Tifá tiváeyan noe, Tiyarafenui vompompin man baya ano siyáken, ‘Ída vá banasirá

* 22:20: Apo 8:1 * 22:21: Apo 9:15 * 22:25: Apo 16:37 * 22:29: Apo 16:38 * 23:2: Yon 18:22-23
* 23:3: Mat 23:27

ma yafikein banta oyampá baya seno,' ”
Eks 22:28
 sikhen mifo véin nan ída monó anon banta kékái ánon banta ino se afováin mi ma vaya sé uno.

⁶ *Máa siren Pori ma afová íkan maifin manáa Farasisi kayo vá manáa Sadyusi kayo vá bakan maen mai Kanisori kayo auufen kakháben oovararen temí, “Tifá tivaéyan noe, mai séi mana Farasisi vanta anin mi váké téi yere Farasisi vantán bá uno. Tareá ma séi kó avorá e mantakheruna mai fúkaren orun mantantá ma mumunan iyaruna anará ino.” ⁷ Máa síkan Farasisi kayo vá Sadyusi kayo vá ano vayafó aruve asive iyain má mai átarufin ma o iyukhá ein nanin banta ano veraran aúban daimen mino. ⁸ *Sadyusi kayo ano mai fúkaren ma evaránen orun mantan má enisori kayo vá ara ara aunan kayo va san ída mumunan in maen inká Farasisi kayo ano mai máa yana san mumunan in iyain mi van mino.

⁹ Máa siren kákantá baya sen tisuvo siyaimpin manáa Farasisi kayo finté ma man baya afová ukhá ein kéká ano orun mantaven ákonará baya siyáken temí, “Mana aunan mano fi inká mana enisori ano fi véin má bayaí ukhan ten mifo setí onékun ída mana uman ma vantafin ban mino.” ¹⁰ Máa siyákan aruvin banta kayoi ayafa vanta ano onan kákantá asive asive en Porin darifen more mere iyaimpin, máan tiyaren Porini ayan arantan davisen orinae siaren bei aruvin banta kayo van aine vetí ankan ayan pintena orun avire aruvin banta kékái mápin mun kaoro sen tiamen mino. ¹¹ *Máa síkan aviren múdan baré in ena inuran Bafan mano ven ádé e mantaven máa sen tiamemí, “Yerusaremí barurá ma senti vaya sian dákó eonaí eya Romú barufin dere mai vaya mo sian dákó inompo mantaan ákona vá ono.

Yutan Kéká Ano Ma Porin Aruan Purono Van Baya Sian Damuádein Baya Ino

¹² Máan turan ena ákurá manáa Yutan kéká ano o átaru uven baya sian damuádiyan temí, “Ída mana yunan má non má nakhé Porin ma aruan púdei yunan ná tifanté uno,” siren baya sian

damuáden mino. ¹³ Mai vaya ma sian damuádein mai foti (40) vanta esantakhein kayo ano ino. ¹⁴ Máan turen mai kayo ano monó ánon banta kayoi ánon banta kéká bá monó doran banta kayo vá baípa oriven mo máa semí, “Tetí ída mana yunan nakhé tifé ma Porin aruan púde maé mai anan dunan nanté uno sé baya sian damuáde tiféuno. ¹⁵ *Máa sé tifé umpo sireti má Kanisori kayo vá ano oreya vá aruvin banta kayoi ayafa mo mákaseya máa ná teno, ‘Porin avireya setin tivorá mo khaesin ná béi ma manáa vaya sikhein ana sian amá inti sá iné tifano sesin ma mará aviren ereno van ma eriyantisá aayana fákena vá arékun purino.”

¹⁶ Máan ma siyain baya ma Porini nointa ano iniren maen aruvin banta kayo ma vain namun oriven Porin mai vaya mun tiamen mino.

¹⁷ Pori mai vaya iniren mana antareti aruvin banta kayoi yafisin banta aran erikan máa sen tiamemí, “Ma fumara avire mo ayafa vanta aní ono véimpin manáa vaya vain ayafa siaminten mino. ¹⁸ Máa síkan mai ayafa vanta ano mai fumara aviren mo ayafa vanta avorá kaúden temí, “Karavusi vanta Pori ano séin tará onóbékun tiyáken ma fumara vá avire ayafa vaintá orono. Béimpin manáa vaya vain éin nan tiaminten mino siren tisintá aviré eré uno.”

¹⁹ Máa síkan ayafa vanta ano mai fumara ayan noren akhempá mo khaúden inaemí, “Nái vayá bákayá tisimeno van ere fono.”

²⁰ Máa sen ina íkan mai fumara ano máa semí, “Manáa Yutan kéká ano siyáken inuran ákurá éintá inaé tifékun Porin aviren mo Kanisori kayo avorá kaintin béi ma síkhá ein baya evaránen tian amá inten ne siyan mino. ²¹ Máa sinten mifo ída vá betí ankan avaya ineno. Para vara seyo, foti (40) vanta esantakhein kayo anon aúmantaren Porin ma avire oresin maen aruan purono van ákona vaya sian damuádan bakan dunan má non má auraren báken minó dana utaan kauren éi ma eyo sinona van ave ukhen mino.

* 23:6: Apo 26:5 * 23:8: Mat 22:23 * 23:11: Apo 27:24; 28:16, 23 * 23:15: Apo 25:3

²² Maa sirákan mai ayafa vanta ano mai fumura siantan oriyákan máa sen tiamemí, “Ída uron ná ma ma sisimeóna vaya ena vanta mo siameno.”

Romui Aruvin Banta Kéká Ano Ma Porin Aviren Sisariá Barafá Orein Baya Ino

²³ Máan turen kankanan bei aruvin banta kayoi ánon banta aran erikan máa sen tiamemí, “Oreya kan antareti (200) aruvin banta kayo vá osintá ma kumamen aruviyain seventi (70) vanta kayo vá inká uve isanafó ma aruviyain banta kayo kan antareti (200) vá o avídeya utaare vá tare inuran dan manápá ifo afápá kamí kamí áau rasá Sisariá barufá orono.” ²⁴ Máan tiya vá manáa osin amanina sá kumanin avové uresin ná Pori mairá kumaminti vá dafian ákona uve avire mo kákan kamani Feriksin ayampin ka ono.

²⁵ Maa siren ayafa vanta ano máa sen bompon uvaren mí,

²⁶ “Séi Kraudias Risiasi ano kákan kamanin Feriksin mi ma vompon uvan man amé uno. Bayan mino.

²⁷ *Ma vanta maen Yutan nanin banta ano fákaren aruan purono van iyái téi inékun béi Romú bara fákena vanta vaimpin tesi aruvin banta kayo aviaré betin me intanuré aviré tiféuno. ²⁸ *Nái vará Yutan kéká ano ven arono van iyan nafino van afová ono siré béin aviré morun betí ankani Kanisori átarufin kaé uno. ²⁹ Aviré morun kaúde inékun, Yutan kéká ano vetíi man bayará anan esiaren mo vaya siyá inékun maen béi ída mana furin aau fi inká karavusií oren aau fi mantaren mino. ³⁰ *Máan turé inékun aúpáké béin aruan purono van baya yamuan kaiyá í iniré mai van mi ainé mai vanta siantékun e vaonafá aviren orinten mino. Orivintíi mai ma véin kó tiantan kayo van baya utaaren véi vaípasá oresin turetí ankani khó inino sé tiamé uno.

³¹ Mai vompon uvaman amin mamaren maen ayafa vanta ano ma seinien mai aruvin banta kayo ano mai inuran manan Porin do aviren Antipatirisí barurá oren mino. ³² Moren ena ákurá osintá ma kumamen aruvin banta kayo ana

áíkan Porin do aviren Sisariá barufá orikan mai ma varará orin aruvin banta kayo ano ovaránen Yerusaremí eren mino. ³³ Erivíkan osintá ma kumamen aruvin banta kayo ano Sisariá barurá o unaven bompon baren mo kamanin banta amiyáken Porin má dere mai vanta ayampin kaen mino. ³⁴ Máan turan kamanin banta ano mai vompon dankáden mairá Porin inaen mí, “Éi inte vara fákesá fono,” síkan téi Sirisiá bara fáké uno sen tiamen mino. ³⁵ Maa síkan iníðaren kamanin banta ano semí, “Éin ma kó tiantan kayo ma erintí maéi eni khó inenté uno,” siren bei yoran banta kayo siantan Porin aviren mo Kin Erotin amá karavusiien mino.

24

Feriksi Ma Porini Kó Inein Baya Ino

¹ Dan manápá damú orivíkan monó ánon banta kékái ánon banta Ananiasin má manáa monó doran banta kayo vá mana kamanini man baya ma afová ukhein banta Teturusin ne siyain má avíaren Sisariá barurá dorun nóben Porin ma kó tiantano siyain baya seno van kamani vaintá oren mino. ² Kamanini kó barufin o khumamin mairá Porin aviren me khaúðan Teturusi ano Feriksin máa sen tiamemí, “Feriksi oe, éi ma kamanini eona ráké ma eriyá tiferuna afokhampin ída mana aruvin nafi asivin nafi yáká eni kama ineinerá bá tifékun ída varé ein danasintan dákó iyan mino. ³ Kákan banta Feriksi oe, mai yana san éin moékentá timusin uantiyáké éin kákan bí amiyá tiféuno. ⁴ Mai van mi éin ayáká pákaré ban nampó kaná ará timeya ma ma setí ankan tenuna vaya vá inisintante fono.

⁵ *Tetí ankan onékun ma vanta maen aau yákó in bantan báken minó barafá nóken Yutan kéká arápiní íkan aruve asive iyan mino. Máan tiyáken béi maen ena auyen monó ma Nasarini kayo e ma siyain kékái ayafa vantán ban mino. ⁶⁻⁸ *Máan tiyáken béi setinti kákan monó namun ankayan tiren máden painí ono van iyá tiféi mai ánarái véin páké tiféuno. Tetisi man baya ánain mi yakhafé béin kó

* **23:27:** Apo 21:30-33; 22:25-27 * **23:28:** Apo 22:30

* **23:30:** Apo 23:16-23; 24:1-9 * **24:5:** Apo 17:6

* **24:6-8:** Apo 21:28-30

tiantanté uno. Aruvin banta kékái ayafa vanta Risiasi ano setin tiyan pintena véin e aviren oren mino. Béin ma ina ureyai ven ma kó tiantiyaruna ana eyantá afová inono.”

⁹ Maa siyain má Yutan kéká ano yere asotú uven ákonaen tiyáken mai fura vayan tiyan mino.

Pori Ma Feriksin Avorá Kó Tein Baya Ino

¹⁰ Maa sirákan kamani ano Porin mo oniyáken auufó éi seno síkan mairá máa semí, “Kákan banta Feriksi oe, ayá oranarái ma nanin banta aúban bákeya veya yaimin bantái ukhen ná afová ukhé mai anarái simusin iyá teyantá tesi veya siamenté uno. ¹¹ Éi aine afová inono mai ída kokhon damú orikhen mifo tiyan mikan mifo sirantan kan orun kádan (12) damú máan orikhen mino. Téi ma Yerusaremí kákan monó namun kayofin monó teno van óderuna ¹² ma ma sen kó tisin tiyain kéká maen ída mana ano soná mana vanta vá kákan monó namumpin tisiviyáké inká monó átaru namumpin má Yerusaremí barurá bá ída aau yákó ino siré mana vanta arápiní ukhé uno. ¹³ Maa tukhan mi ída kanaíen ma kéká ano mai ma séin kó tisintiyá ein baya kayoi ana maman amá inten mino. ¹⁴ Pura yaná ma vain mai máan mi ukhen mino. Mai ma auyen monó ino ma veti siyain Aa Ma Yakhafin Kéká ma yakhafiyaruna mai sinafu siráo ma yakhafiyá ein Tiyarafenui yakhafiyáké Mosesini man baya vá Sakhanampa vanta kayo ma vompompin uvantein máa vái minói yakhafiyá uno. ¹⁵ *Mumunan kéká bá ída mumunan kayo vá ma fe fúkaré ein ma Tiyarafenu ano avorantin orun mantan nain nan ma veti ave ukhein máan manan é mumunan iyá ave ukhé uno. ¹⁶ Maa tukhein nan mi Tiyarafenu avora safi inká banasi avora safi mana uman téimpin banae siré tirá ákona é iyá uno.

¹⁷ “Manáa oranará ena akhempá noré maé ovarané Yerusaremí ma sesi kéká ona ída van ma vain mai kayo amusin amiyáké inká Tiyarafenu tusu siantan danasinta vá baré eré uno. ¹⁸ *Téi sinafu siraóni avúavá baréi avusese uvé monó dafufin

o vákun mi sonen mifo maifin ída vanasi váken tisuvo siyan mino. ¹⁹ Maa tukhen mifo Esiá bara fáké ma erikhein Yutan banta kayo ma varé inten maen mai kéká ano kasaen en avorá e mantaven téin ma kó tisintano ma siyain baya kayo tian amá inten mino. ²⁰ Maa tukhantin Kanisori kéká avorá ma un manteruna mai senti aau ma ma kayo ano afová ukhan ten mai veya sian amá ino. ²¹ *Mana veya máai Kanisori kayo avorá oovararé té uno mai veya maen purin nanin banta furin pinté orun mantanten mino ma serunarái saréa en avorá kó tisintiyain mino.”

²² *Pori ma mai veya siran maen Feriksi Aa Ma Yakhafin Kéká afová ukhen pasen mairá kó mo fákaren kó nanin banta siantan orera iyákan máa semí, “Ayafa vanta Risiasi ma erantíi siretíi kó daimonté uno.” ²³ Maa siran orera iyákan mana antareti (100) aruvin banta kayoi ayafa vanta máa sen tiamemí, “Porintá dafike vá áesin beyan kasaen nontin ná bei kéká ano me aya iyan be ma sin nain danasinta amino.

²⁴ Maa siren baréin manáa yamú orivíkan Feriksin má be aná Durusira mai Yutan nanin bain bakan eriven békanaan Porin avire ereno síkan aviren meran Tiyarafenu ano ma aní ukhein banta Yisasintá ma mumunan iyain baya siamen mino. ²⁵ Tiyarafenui funtákein avúavá baya vá inká banta ano ma ve avúaváká dafisin má inká Tiyarafenu ano ma ínaimpá kó tiantan nain baya vá Pori siyákan Feriksi iníden akhokho van iyáken temí, “Inka ifo orikháesi ená damú afokhan ma vantí ovarané araanté uno.” ²⁶ Maa siren tiantan oriyákan maen Feriksi ano mana yana san ave ukharen mino. Feriksi ma inikhá ein mai Porin nan moní miyaní urantíi siantékun orinten mino siren kokhon damú araren ben má bayaí iyaren mino.

²⁷ Maa ten oriyan bakan kankáan orana esantavin Posius Festusi ano Feriksiní varu varen kamaniníen mino. Kamaniní ukhan mifo Feriksi ano Yutan kayo amusin ameno van Porin karavusifin áin baren mino.

* 24:15: Yon 5:28-29 * 24:18: Apo 21:17-28 * 24:21: Apo 23:6 * 24:22: Apo 23:26

25

Festasi Ma Kó Inein Baya Ino

¹ Festasi ma kamanini ánon bantaí uvin kanú manaú damú orivin maen Sisariá baru me ampiren Yudiá barafin oriven Yerusaremí óden mino. ² *Ódíkan monó ánon banta kayoi ánon banta kéká bá Yutan kayoi kákan banta kayo vá ano véi vaintá oriven Porin ma kó tiantan baya funtaren mino. ³ *Betí ankan manáa vanta kayo siamintin aasá aúmantaren Porin arintin purino van ákonaen béin tiamen temí, “Ei setí ankan tiyaeyavá mai vanta siantesin Yerusaremí erino.” ⁴ Maa síkan Festasi betí ankan evaránen tiamiyáken, “Porin Sisariái karavusií ukhein tanáa yamúi váké evarané Sisariá oronté uno,” sen tiamen mino. ⁵ “Oronté umpo aésin tirití ankan pinté manáa ánon banta kayo ano séi má aravuken mai vanta ano ma aau mantantiya kó tiantano.”

⁶ Maa siren Festasi ma yan manápá ifo afápá kanú manaú un kádan damu safi áa tiyan míkan damu safi vetí ankan má baren Sisariá araven orun baren ená damú daimin namumpin béi o kumamen Porin aviren béi vaintá erino van baya yan oren mino. ⁷ *Oríkan maen Porin do aviren merákan Yerusaremí ma me ampiren aravein Yutan kayo ano véin áde e mantaven kokhon ná kó baya kayo fóké béin kó tianten mifo veni ana ída maman dáko en mino.

⁸ Maañ tiyaimpin Pori evaránen betíi vayará maa sen tiamemí, “Téi ída mana Yutan kayoi man baya fi kákan monó namun ma safi inká Sisan ma safi ída mana namu avúava uantáké uno.”

⁹ Maa síkan Yutan kayo amusin ameno van Festasi ano Porin inaen temí, “Téin nan ma uman kayo Yerusaremí mo yaimino vará anunu iya fono.”

¹⁰ Maa síkan Pori evaránen temí, “Ma ma saréa séi mantakherúna namun mai Sisani yaimin namun mi vain ma namun manan téin daiminten mino. Yutan kayoi mana aauí téi ída ukhekuya éi fefái afová ukha ono. ¹¹ Mana aau ano furino ma sikharé intí kasaé puronté umpo mai ma

Yutan kayo ano séin daimiyain bayai ana ma ída fura vantin mana vanta ano ída kanaíen betí ankan ayampin téin kainten mifo Sisan mano senti kó daimino van muno.”

¹² Maa síkan Festasin ma inin amiyain banta kayo vá bayai uaren inaimpáké Porin tiamemí, “Sisa ano éin daimino van anunu iya ompo véi vaípasá orono.”

Festasi Má Kin Akhripa Má Ma Manafin Baya Sein Baya Ino

¹³ Manáa yamú orivin Kin Akhripa má be ayofi Benisi má ano Festasin onano van Sisariá araven mino. ¹⁴ *Békanan kokon damú Sisariá baimpin Festasi ano Porini vaya kin tiamemí, “Pefá ma Feriksi ano yumukatifin pákaádein bantan taréa yere fara van mino. ¹⁵ Yerusaremí ma séi un bákun monó ánon banta kayoi ánon banta kéká bá monó doran banta kayo vá ano véin ákonaen kó tian tiyáken aruan purono van inaen mino.

¹⁶ “Maa síká téi evarané betí ankan tiamiyáké tetí Romúke kéká ano ída fara vanta aré iyá umpo aau ma vain banta afokhan amékun béi ma kó tiantiyain banta kayo avorá be ma varein danasinta sian amá é iyan mino. ¹⁷ Téi ma Sisariá ovarané ererúna yamú mai vanta kayo vá dere ano séin má eriká ída áékun betí ankan ave en mifo ená damú anan daimin namumpin kumamé mai vanta aviren erino van baya yékun oren mino. ¹⁸ Mai ma véin kó tian tiyain banta kayo ano ma mantaven Porin kó tian tiyá maé mana kákan aau mantan nain nan iné umpo ída ino. ¹⁹ Ída ifo vetí ankani ará uman ma sian dáko ein mai Yutan kayoi monó tin avúavá baya vá inká Yisasin ne sin banta ma fúkein nan ma Pori fa van ne ma siyá ein nan mino. ²⁰ Mai vayai ana yoseno van ékun mifo senti ineine ano ída kanaí iyaimpin Yerusaremí orintí bení kó daimono van béin inaé uno. ²¹ Inaékun Pori siyáken, ‘Dumukatifin baréékun inaimpáké Sisa ano séin daiminten mino,’ síká téi siyáké, ‘Dumukatifin baré intirá béini aa yosiré tiantékun Sisa vaípa orino,’ sé uno.”

²² Maa síkan Akhripa mai vaya iniren Festasin tiamemí, “Teyantá mai vantai

* 25:2: Apo 24:1 * 25:3: Apo 23:15 * 25:7: Apo 24:5-6 * 25:14: Apo 24:27

vaya ineno van muno,” síkan Festasi semí, “Inuran mi inin nono.”

Kin Akhripan Avorá Ma Pori O Mantein Baya Ino

²³ Maa sikharéin ená damú Akhripan nú Benisin nú ano kini kama ona uren békanaan orikan aruvin banta kayoi ánon banta kayo vá mai varurákéna kákan banta kayo vá ano átaruin namumpin ódivin Festasi ano síkan Porin aviren eren mino. ²⁴ Merákan Festasi semí, “Kin Akhripan má tirití minó banta kayo vá ano ma setin má baona ano ma vanta vá onano. Minó Yutan anan nanin banta kayo ma Yerusaremí bain kéká bá mará ma vain kéká bá ano ma vanta kó tiantiyáken betí ákonæen oovararen béi ída vanten mifo aresin purino sen mino. ²⁵ Maa síká téi inékun béi ma kanaíen purin nain aau ída mantaré iká Sisa ano véin daimino van anunu iyaimpin béin tiantékun Romú orino van tian damuádékun ban mino. ²⁶ Maaan tukhen mifo setisi kin baipá ma veni aau fákena ma uvamádekun orin nain baya ída vaimpin mi veni aau ana veya inian puntádesí bompompin uvarano van mi Kin Akhripan má minó nanin banta vá avorá aviré eré uno. ²⁷ Téi ma mana karavusi vanta ma siantékun orintí ma véin ma kó tian tiyarunai ana ma ída siamenté mai séi ma iniyaruna mai avúavá ano ída kama inten mino.”

26

¹ Maa siran Kin Akhripan ano Porin tiamemí, “Ei veya seno van afokhan amé uno,” síkan Pori ve ayan daní uren bei veya araíen temí, ² “Kin Akhripan oe, mai ma ei veya seno van muno ma seona van timusin iyá Yutan kayo ano ara veya kayo ma sen nan tiyai pákena saréa en avorá mantakheruna sian amáéku vá ineno. ³ Yutan kayoi minó avúavá bá aruven asivein má éi afova suron ukheona vantan baná mai éi ineno van tiamenté umpo vempáké bake vá tenti veya kama e ineno.

⁴ “Téi ma sirará iyampon táké ma sesi vara anará baré ma Yerusaremí barurá o váké intéa sivútivá basá ee sinoní erafu mai minó Yutan kayo ano afova suron ukhen mino. ⁵ *Téi Farasisi vanta ma váké

betíi ákona man baya kayo aránaó eriyaré umpo Yutan kayoi monó avúavá bá ída manaí ukhein pasen tenti sivútivá ma siameno sinten maen kasaen tiaminten mino. ⁶ *Mai ma fefá tetinti sináuyan ma Tiyarafenu ano iyáantan baré ein mai yaná maman dákó intí onano van mi mumunan iyákon mai van mi saréa séin kó tisintiyan mino. ⁷ Mai ma setinti kéká tiyan mikan mifo sirantan kan orun kádan (12) anan banta kéká ma Tiyarafenu ano iyáantan báken mai yaná dákó intí onano van inuran má bayan má Tiyarafenu monó tiantiyaré ein mai mumunan mi iyá uno. Kin noe, mai van mi Yutan kayo ano séin kó tisintiyan mino. ⁸ Paraé tiré Tiyarafenu ano ma fefá puká ein nanin banta kayo evaránen avían purin pinte mantiyain nan tiritin pinté ída mumunan iya rafono.

⁹ *“Pefá téi má dere Nasaretíke vanta Yisasin aviká ma yoriyain doran mádé namu ono van iniré kasaé ara ara avúavá bariyaré eruna ino. ¹⁰ Maaan tiyáké monó ánon banta kayoi ánon banta kéká ano ma ákona simikhá maé Tiyarafenui vanasi fáké mo yumúkatifin dékun baréi maé ten má dere siyan befió urékun mai kéká arin puriyaren mino. Mai avúavái Yerusaremí barurá bariyaré uno. ¹¹ Maaan tiyáké betin pákaré aau ameno van ena ena yamú betíi monó átaru namun e feré kuvé iyá Tiyarafenu asiren oyan amino van ákonaé títúpiyaré uno. Maaan tiyáké betin pákaré aruré uman ameno van kasaé nentá ma kákan baru kayo vain pimpá dere oriyaré uno.”

¹² “Mai avúavá ma varé noruna fimpá maná damú monó ánon banta kéká ano veya séin tisimíden tisintá Damaskasí barufá ma oriyain aayana oré uno. ¹³ Kin noe, mai aayana oriyaré ékun bayan aúbaná inaru fáké áaui fanu esantakhein panu ano séin má ten má ma oriyaré ein kéká bá ekuádá oné uno. ¹⁴ Maaan tiyain má minó ano varará eravé tinkamiyá inékun Aramaiki veya finté téin tisimemí, ‘Sori oe, Sori oe, fará téin dakháan karudé tiriya fono. Éi ma séin namuroí iyaona

* 26:5: Fir 3:5-6 * 26:6: Apo 23:6; 28:20 * 26:9: Apo 8:3

mai anon eyan uman baran nono.'

¹⁵ "Máa síká, 'Bafan noe, éi iye fono,' sé béin inaékun, 'Téi Yisasin bákuya séin mi yakháan karúde siriya ono sen téin evaránen tisimen mino. ¹⁶ Taréa ana éi orun mantano. Téi éin aní uréku senti yoran bantaí uveya séi ma éin aní onuna yoran má mai ma éi séin toneona vaya vá banasi siameno van mi éi vaonará dákóé uno. ¹⁷ Ei vanasi finte vá ena anan nanin banta finte vá aya urékun éin ída aren asen inti mae vetí baípa tiantéku orono van muno. ¹⁸ *Orive mae yúdufun daná pinte vetin auu yo vaéan kakhantá kaúde inká Ban Anoni ákona ano ma fákarán bain pinte avían Tiyarafenu amiresin betíi ume kayo van tirun noe sintin betíi ume ampíantádantin ná mai ma sentá mumunan uvíkan Tiyarafenu ano sesina ino ma siren aní uran bain nanin bantafin aví bantin ná bano.'

¹⁹ "Máan tukháí Kin Akhripa oe, mai ma suu vaédan ma inaru finté dákó iká ma oneruna mai yaná téi ída soyan amenté uno. ²⁰ Téi maen Damaskasí barurá ma vain nanin bantafin arái uré Yerusaremí barurá onóbé inká Yudiá barafin eúkuaré ena anan nanin bantafin oriyáké ará baéde vá Tiyarafenu vaípa erive vá mai ma fura se ará baékanona mai siretíi avúavá posá aní ono siré tiamé uno. ²¹ Máan ma seruna vaya van mi Yutan kayo ano monó dafu fintena séin pákaren tirono van iyan mino. ²² Máan tiyan mifo Tiyarafenu ano séin tiya iyáká eriyaré taréa e mantakhé aví i vain má aví bain nanin bantafin má pefá ma sakhanampa vanta kayo vá Mosesin má tiádan baré ein danasinta van dákó inten mino sé betin tiamiyá umpo mai amaniná ída mo ena vaya kayo vá tiyá uno. ²³ *Mai ma Tiyarafenu ano ma aní ukhein banta ano vá uman o varen púben ná purin kayoi aníen orun mantan banta vá báken bei vanasifin má ena anan nanin bantafin má Tiyarafenui kakhán ná bano sen tiádan baren mino.

²⁴ Pori ma siamiyain baya van Festusi vaé tiyáken oovaren temí, "Pori oe, Éi ma moéke afova mante siyaona vaya kayo ano éin tavifá do óen uáda oriya ono."

²⁵ Máa síkan Pori evaránen béin tiamemí, "Festusi oe, séi ída óen iyá umpo fura sen beni ana vain baya kayon tiamiyá uno." ²⁶ Téi ma éin tiamiyaruna vaya kayo ída feranton Kin Akhripan avora safi atarenta safi ída mana vaya fa savifá esanten mifo minó baya kayo inikhái siamé uno. Para vara seyo, ída mana vaya aúpasíé uno. ²⁷ Máa siren Pori maen do vaéaren Kin Akhripan inaemí, "Kin Akhripa oe, éi sakhanampa vanta kayoi vaya van mumunan iya fono. Téi afová ukhé uno éi mumunan iya ono.

²⁸ Máa síkan Kin Akhripa ano Porin inaemí, "Tare ana éi ano séin maman mumunan bantaí onté unó té iniya fono."

²⁹ Máa síkan Pori véin evaránen tiamemí, "Taréa fi ináimpáke safi séi ma Tiyarafenu vaípa timúkiyaruna eya ana vaompo mai ma séi ma siamiyaruna vaya ma iniyain kéká bá ída áinti seni anan kayo fóké damuádanti van nompo Tiyarafenu ano siretin maman téi ma varunaí inten mino."

³⁰ Máa síkan Kin Akhripa má kamanini ánon banta vá Benisi má maifin ma o kumantá ein kéká bá orun manten mino.

³¹ Orun manten mai namun me ampíren ma varufá morun bayaíen orera iyáken temí, "Ma vanta maen ída mana furin auu fi karavusiín auu fi manten mino."

³² Máa sen orera iyákan Kin Akhripa ano Festusin tiamemí, "Ma vanta ano Sisan nan tenti kó inino van muno ída sen baré inti éi kana véin karavusi útuantesin orin nainten mino."

27

Pori Ano Ma Mana Sipifin Romú Barufá Orein Baya Ino

¹ Tetí ankan nan sipi varé Itarí barafá orino siren baya sian damuá daren mana antareti (100) aruvin banta kayoi ánon banta ayampin Porin má ena karavusi kayo vá kaen mino. Mai vanta Sisani aruvin banta kéká pintena Yuriasin ne sin banta ino. ² *Tetí ankan mana Adaramitiamú kena sipi ano Esia kayoi non akhempá ma vain baru kayo fimpá orono van iyáká mai sipifin un kumamékun

* 26:18: Ais 42:16; Efe 2:2; Kor 1:13 * 26:23: Ruk 24:44-47; 1Ko 15:20 * 27:2: Apo 19:29

Masedoniai varafá ma vain baru Tesaronikáke vanta Aristarkusi ano setin má manafin un kumamen oren mino.

³ Oriaré ená damú Saidoní barurá o unavé tifékun Yuriási ano Porin kama avúavá uanten tiantan be arona kayo o oniyáken beti vaípákena aya varen mino.

⁴ Mamaren ma Pori ovaránen sipifin eriví maé teti Saidoní me ampiré oriyá tifékun uva ano ákonaen sipi e avéken eriyaimpin Saiparasí musó akhempá ana oren mino.

⁵ Mai ráké Sirisiá bá Pamfiriá bá un non aúbaná oriaré maé Risiái varafá Mairá barurá oré tiféuno. ⁶ Aruvin banta kayoi ánon banta ano mai varurá oren o onan Areksandariá baru rákena sipi ano Itarí orono van iyaré íkan tetí ankan e siviren mai sipifin mo khaen mino. ⁷ Kaúdá mai sipifin oré tifékun ákona uva iyáken sipi e avékiyaimpin tasoren oriyákan sipifin ma yoran banta kayo ano ákonaen doren oriyan baréi manáa yamú o uné tiféuno. Nidasí baru ádé oré tifékun uva ano ákonaen e sivékiyaimpin do vaéaré Kirití musó oriaré Saramoné bara ádé onóbé mai musó oyampá oré tiféuno. ⁸ Oriyá tifékun botifin ma yoran banta kayo ano ákonaen dorákan Kiriti musó kayoi non akhen mana yakhafé oriaré Raseá baru ádé non un mantan ma sipi kayo ano ma Kamaen Avíkiyainta se ma siyaintá o uné tiféuno.

⁹ Kokhon damú un nompin bempáké oriyákan Yutan kayoi yunan auran damú ma esantavin maen mai oyampáké kákani suron en non karantó íkan mai van Pori emantaaren betí ankan dafisin baya siamemí, ¹⁰ “Minó banta kayo ano vá ineno. Tetí ankan ma oré tifékun maen kákan uman afoká intin kokhon daná o aiyorantéi afová ukhé uno. Ona vá sipi vá ana va aiyoranten naino, seti mái furó tifanté uno.” ¹¹ Maa síkan aruvin banta kayoi ánon banta ano ída Porini vaya ininton sipi ma varen noin banta vá sipi afóen mái ineine ánain mana vákuren mino.

¹² Kákan uva ma inaintá ma sipi varen mai non akhempá ma mo khain ída kama ukhein mino siren sipifin ma vain banta kayo ano vaya siaren mai varu me ampiren Finiksí oren o vantin uva kípano van inikharen mino. Kirití musópin ma Finiksi e ma siyaintá mana non un mantan tefá

tefá akhen kanan mano áau aravípa auuí ukhan mino.

Kákan Uva Ma Afoká Uaren Békon Unen Ereín Baya Ino

¹³ Saoti fáké uvaen mifo ída ákona íkan beti ma inein mano kama intíi savaé ainé mai ma serúna nompin oronté uno siren anka orun darifaaan kaúden Kirití Musó non akhempá oren mino. ¹⁴ Ída ayáká oriyain má mana kákan uva, Noti fáke Uva e ma siyain araién afoká uaren békon unen eren mino. Kirití musó pintéi mai uva ano eren mino. ¹⁵ Eriaren sipi me ákonaen avékiyain má sipifin ma yoran banta kayo ano sipi evaránen e vaéko uan mai ma ereípasí uren orono van íkan ída kanaí eimpin ifáin uva ano sipi e avéken oren mino. ¹⁶ E avéken orí tifé saoti fákena mana Kauda se sin tító musó ópá orin ma uva sitosí iyain má tetí ankan ainé tító dinki ma sipi oyampá damuran baré ein ída kanaíen o yarifaren iyá ákonaé darifiyá darifaaan ádesí é uno. ¹⁷ Máan turé tifékun sipifin ma yoran banta kayo ano yinki orun darifaaan sipifin kaúden damuan ákona uren anan karúdan sipi aránaópá aravuvín sipirá eúkuren damuan ákonaen mino. Afarika kayoi un nompin Sirtisi e siyaintá manáa eyu yon kayo varé intin mairá sipi o khumanin nae siren sipifin ma yoran banta kayo ano akhokho van uren anka karúdan nompin araven mino. ¹⁸ Uva uaren non kákantá karantóen tetin tivékiyaimpin ená damú sipifin ma yoran banta kayo ano araién manáa ona maman nompin karúden mino. ¹⁹ Kanú manaú damusí íkan sipifin ma yoran banta kayo ano sipi fintena yanasinta vetiyantá mamariyan nompin karúden mino. ²⁰ Kokhon damú tetí ankan áau vá ofu kayo vá ída onékun kákan uva ano ana setin tivékiyákan mai van teti ma ineruna ano ída kamaé banté tifé umpo minó anon afeyoranté uno siré ineine é tiféuno.

²¹ Minó banta ano ayá damú ída yunan nan eriyaimpin Pori vetin aúban mantaven máa semí, “Tiretí ma vanta kayo ano senti vaya inire mai ánain dakhafeya Kirití musó ída me ampireya ere varé esí ída ma uman e yosékun ída minó daná

ída o afeyoran nainten mino. ²² Máan inainten mifo saréa siretí ankan tiamé uno. Mantaan ná ákona ono. Para vara seyo, sipi anan afeyoranten mifo siretin pinté ída mana vanta afeyoranten mino. ²³ Téi Tiyarafenui vantan báké bentái monó tiyarunan ban mi sare inuran beni enisori ano senti ádé emantaven máa sen mino, ²⁴ **“Pori oe, éi ída vá akhokho van eya vá éi Sisan aufasá o mantano, Tiyarafenu ano eni amúkin inen mino. Éin má minó banta ma sipifin baona vá ano ída afeyoran nono. ²⁵ Enisori ano máa sikhen mifo ma vanta kayo oe, mantaan ná ákona ono. Téi mumunan iyaruna Tiyarafenu ano ma séin tisimein daná máan búi afoká inten mino. ²⁶ *Máan tinten mifo sipi ifá é tifékun orintin ná uva ano sipi e avéken eyu rasá mo kaintin kuman ino.”*

Un Non Mano Ma Sipii Oyampákena Ankaman Barakein Baya Ino

²⁷ Fotini (14) inuran kákan Meditereniání un nompin non daró sipi e iyanká oriyá baré é tifékun inuran aúbaná sipifin doran banta kayo ano avádúan onen temí, *“Mana vara ádé eriyá tiféuno.”* ²⁸ Máa siren non ma avamaran danka kain aravin avamáden onan 40 mita vákan manáa sipi e afánen oríkan mairá evaránen avamaran danka kain aravin avamáan onan 30 mitaíen mino. ²⁹ Sipi ma onámaná baintá ma orinten mo varakinten mino siren betí ankan akhokho van uren kamí kamí anka sipi ayompá karúdan aravuyin ainen do kakhano van amúken mino. ³⁰ Sipifin doran banta kayo ano sipi me ampiré aupáké karan orono van dinki anan utúden kain eravíkan kampun ten sipi aunasí ma ukheípá anka khaono van muno sen mino. ³¹ Máa síkan aruvin banta kayoi ánon banta vá aruvin banta kayo vá Pori siamemí, *“Ma vanta kéká ma ída sipifin ma vantí maeya siretí ankan afeyoranono.”* ³² Máa siyain má aruvin banta kayo ano mai ma dinkirá ma kukhá ein anan tikaran non mano evaren oren mino.

³³ Do yákan áau iniseno van iyákan minó banta ano yunan nano siren Pori máa semí, *“Tiretin ará ano ída kamaen kumaniyákaya fotini (14) damú ída yunan*

nanton arafan mi vare ono. ³⁴ Baré enái séi ákonaé tiretin tiamé umpo vá manáa yunan tireti nesin ná mai ano ákona amino. Tiretin ánon do fintena mana ída afeyoranten mino.” ³⁵ Maa siren mairá búi vereti máden betin avorá Tiyarafenu susu siantáden kisiren araíen nen mino. ³⁶ Niyáken Pori ano vetin ákona uantádan betí ankan dunan nen mino. ³⁷ Kan antareti ifo seventi sikhisi (276) vanta ano mai sipifin baré uno. ³⁸ Minó ano yunan kanaíen naren sipi ída uman dano vare siren uviti yunan kayo nompin karúden mino.

³⁹ Áau e uníkan sipifin ma yoran banta kayo ano mai ma seti ovaruna non akhempá ída afová ukharen betí ankan onákan mana kama eyu vákan kanaí ma intin sipi maifasí urantin mai eyu yaró tavaen ódino van en mino. ⁴⁰ Máa sen iniren minó bakharaini anan ma sipii ankará kukharé ein tiken orera uren ifáin un nompin bakan sipi ma stiaí iyá ein kákan danká kanan tákena vakharaini anan útufen mino. Útúdan uva ano e avékantin non akhempá orino van minó seri antúkaádan ódivin akhempá orono van oren mino. ⁴¹ Orin mifo non aúbaná eyu yon baréin mai sipi ano mai yaró o kumamin non mano sipii oyampákena ankaman baráken mino.

⁴² Máan tiyain má aruvin banta kayo ano karavusi kéká karan orin nae siren minó aruan purono van en mino. ⁴³ Máan tíkan aruvin banta kayoi ánon banta ano Porin aya ono van iniren aruvin banta kayo van ída vá karavusi kayo aruan purono siren airo ananí uanten mino. Máan turen ayan nakhosá ma afová ukheona vanta kayo nare vá un nompin káusiveya nakhosáde akhempá orono. ⁴⁴ Orivinti maeya vá ena kéká ano vá sipi rákena ma varákuádan daa vá mádeya mai yaró nakhosáde akhempá orono síkan aruvin banta kayoi ánon banta ano ma seiníen ída mana afeyoran minó ano non akhempá oré tiféuno.

28

Pori Má Maratá Musóká O Varé Ein

* 27:24: Apo 23:11 * 27:26: Apo 28:1

Baya Ino

1 Tetí minó ano kamaé eyurá orivé inékun mai muso san Maratá ino sen mino. 2 *Mairá áden iyon iyákan mai varu ráke nanin banta ano setin kama avúava suron usinten ira sáden tetin e sivían ira akhempá kaiká tu múmúé tiféuno. 3 Máan tiyá tifékun Pori ira aíden me sariyaréin mai irafin banta arin osafáe varéin ira akhiyaimpin e unen eraaren Porin ayan untaren mino. 4 Máan tikan mai varu ráke nanin banta ano onákan mai osafáe ano Porin ayan afáaren iroriró nakhan betiyan máa sen oreraemí, “Onano ma vanta aruan purin bantan baren ída un nompin púkaréin mi namu avúaváká anona ayarafenu ano ve nan ída ayun bano van mi máan tiyan mino.” 5 *Máa siyain má Pori mai osafáe yo yampátian karúdan irafin eravuvíkan ída mana uman baren mino. 6 *Máan tiyain má banasi ano Porin nan ainen au faminten nafi áa vararasá eraven ankamen purinten nafi siren ayáká ban onan mana uman ída ven aurá afoká iyaimpin banasi ano evaránen ena inin baren temí, “Mai véi mana ayarafenu van mino sen inen mino.”

7 Mai musóká ma ánoní ukhein banta aví Pubiriasini vara mai varu ádé baré íkan mai vanta ano setí ankan e siviren be amápin mo kaiká kanú manaú damú bákun kama yafisirí iyaren mino. 8 Máan tiyá íkan Pabiriasin afóen ara oriaren aufá ira kharo iyan bakhen baré íkan Pori véi vaintá oriven ben aurá mo ayan kaúden amúkiyain má evaránen e asefaen mino. 9 Máan turan mai musóká ma aí nanin banta ma varé ein mano minó eríkan mai kayo vá Pori ayofan asefaen mino. 10 Máan turákan betí ankan mai setin kama avúava suron usintiyáken inaimpá ma sipifin oriyáké ma varanuna yanasinta van ma sinunu iyá eruna yaná máa simen mino.

Pori Ma Romú Barufá O Varé Ein Baya Ino

11 Máan turá kanú manaú biyontá Maratá musóká baréékun mana Areksandariá baru rákena sipi asíká karina ayarafenu Kaston nú Poruksin nú aman

manon uvaman kain bain sipi ano kákan uva van péden baré iká maifin un kumamé mai musó me ampíré oré tiféuno. 12 Oriaré Sirakyusí barurá o unavé kanú manaú damú mairá o varé tiféuno. 13 O varé mai ráké oriaré Rekhiumú barurá oré tiféuno. Ovaré ékun ená damú saoti fáké uva iká Rekhiumú me ampíré oriyaré ená damú Puteorí barurá o uné tiféuno. 14 O unavé mai rákena manáa monó tifá tiváen onékun tetin tiyopá iká mai varurá dan manápá ifo afápá kan un kádan damú baré mai varu me ampíré barará Romú barufá oré tiféuno. 15 Oriyáken tetin nan eriyain mino sin baya Romúke monó tifá tiváeyan mano iniren o aayana fáke setin e sivirano van eren mino. Apiusini Makheti varurá ma Miyaní Uren Baran Namun ma Kanú Manaú Bainta se ma sikheintá o fókun maran ékun mai van Pori ano Tiyarafenu tusu siantan ben ará ano ákona varen mino. 16 Máan turá teti Romú o vákun kamani ano Porin mana má amiren eyakasá bano síkan Pori mai namumpin ban maen mana aruvin banta ano ventá dafisiyaren mino.

Pori Ma Romú Barufin Tiyarafenui Vaya Siamein Baya Ino

17 Máan tiyákan kanu manaú damú esantavin Pori Yutan ánon banta kayo aran e átaru uvin máa sen betin tiamemí, “Tifá tiváeyan noe, séi ída se sífá tiváen oyampá baya sé inká teti si sinafu siráoni avúavá doeké é ukhékun Yerusalemíke séin karavusi fákaren Romú kayo ayampin kaen mino. 18 *Kauran Romú kayo ano ma senti vaya yaíden iníkan maen tenti aau ída vákan ten nan ída kanaíen purinten mino siren tisintano van en mino. 19 *Máan tikan maen Yutan kayo ano mai vaya átakharé íkan tenti aa ída ena vaimpin mi Sisa vá tenti vaya yaimino sé umpo mai sesi kékápin ída mana aau vantí betin ída kanaíé daimonté uno. 20 *Tiyarafenu ano ma aní ukhein banta onano van ma Isareri nanin banta ano ave ukhá ein banta fefá erikhái mai vantará ma séi mumunan iyaruna mai anarái sen timempin ma seni anan kukhein nan

* 28:2: 2Ko 11:27 * 28:5: Mak 16:18 * 28:6: Apo 14:11 * 28:18: Apo 26:31 * 28:19: Apo 25:11

* 28:20: Apo 26:6-7

téi siretin oniyá baya siameno van mi arékuya ere ono.”

²¹ Maa síkan betí ankan evaránen béin tiamemí, “Yudiáké mana vanta ano ída éin nan bompon uvaman timin maen inká mai fáké ma erein Yutan banta kéká pinté mana ano ída éin nan me namu veya sikhén mino. ²² *Ída mana veya sikhén mifo éi eyanta ei ineine setin tisimesí ineno van mi setí ankan iniyá uno. Mai fara vara seyo, Yutan kékápin ma auyen monó ma afoká iyan ma minó páke nanin banta ano ma mai kéká oyampá baya siyain baya ana seti afová ukhé tiféuno.”

²³ Maa siren ovaránen ma e átaru in-ain damú aní urákaren Pori ma vain namumpin kokhon nanin banta ano e iyuvíkan Tiyarafenui yafisin pintena veya vá Mosesini man baya vá sakhanampa vanta kayoi vompon pintena veya vá tiamen mino. Tiamiyáken betin nan ará baéden Yisasintá mumunan ino van ákurákaké arái uren e siamen oriyán evaren inúpasíen mino. ²⁴ Inupasí íkan manáa ano mai ma Pori siamein bayará mumunan en mifo ena kéká ano mai varyará ída mumunan en mino. ²⁵ Máan tiyan betiyan asive asive uaren oreraen mino. Ínaimpá orera intéin Pori kípan baya máa sen betin tiamemí, “Teti sinafu siráon nan Kantá Aunan mano fura uron mi sen sakhanampa vanta Aisaiyan ooráké uaren máa sikharen mino,

²⁶ “ ‘Mai nanin bantafin oriveya máa se vetin tiameno,

“Tiretí ankan ena ena veya inin nompo ída kanaíeya veni ana afová inono.

Tiretí ankan ena ena onan nompo ída kanaíeya mana yaná oman afová inono.

²⁷ Para vara seyo, mai nanin bantai ineine ona munkukhan baya inin nan betin átaren mano afon kiyan inká aaurá iyádan ban mino.

Beti mana yaná ódaren inká baya iniren beni ana afová uren ará baéden te varunafá ovaránen erintí téi vetin

evaráne kama uré ayofanuna van mino.’

²⁸⁻²⁹ “Mai ana van mi Tiyarafenu ano ma kama yorarí uren ma vei vanasi aya ein inká e siantáan ena anan nanin bantafin kaintin mi mai yaná afová uren dakhafintéi sireti ineno van mi séi siamé uno.”*

³⁰ Máan turen Pori kan oranará mana vanta amá máden báken mai má afóen miyaní iyan maen banasi ano ma véin o onano van ma orin maen amusin iyan e araan kaúden baya siamiyaren mino.

³¹ Máan tiyáken béi ída feranton ákonaen Tiyarafenui yafisin pintena veya siamiyan maen inká Tiyarafenu ano ma aní ukhein banta Bafan Yisasin nan banasi afova amiyan maen mana ano ída véin airo ananí uanten mino.

* **28:22:** Apo 24:14 * **28:28-29:** Tiyarafenui manáa vompon dókifin ena asotúin baya ves 29 fin máa sikhén mino, 29 Mai veya máa siren maen Yutan kayo véin ampíren oreimpin betiyan ákonaen asiven mino.

**PORI MA ROMÚ KEKÁ
UVAMAN AMEIN
BOMPON MINO
(Romu)
Romui Vompon Ma
Uvanteí Pákenai Afova
Vaya Ino**

*Ma vompon ma uvantein banta ino.
Baya varen orin banta Pori ino.*

*Uvarein orana ino.
AD fifti-seveni (57) fin nafi áa fifti-eiti
(58) fin nafin uvanten mino. Mai
maen Pori ma kanú manaú dádasí en
ma monó dorarién eúkiyaren ma mo
kípiyan mi ma vompon uvanten mino.*

*Ma vompon ma uvantein baru ino.
Korini barurá ino. Mai maen kanú
manaú biyontá ma Kiriki varafin ma
Pori nóein pimpá ino.*

*Ma vompon ma uvaman amikhein kéká
ino.
Yisasintá monó tiyáken ma mumunan
in avúavá ano Romú barafin pefá o
vákan mai kayo esé araién o onano
van Pori inikhen mai van mi mai kéká
uvaman amikhen mino.*

*Nái ana vará ma vompon uvanten
nafino.*

*Mai vompon mano setisi ume avúavá
ma ena ena vain mi sian aní ukhen
mino. Tiyarafenu ano vanasi aya
urantiñ ume ída vain kéká ino sino
van mi anunu iyáken be Anin ma
e fúaren e mantakheini narefó umei
karavusi fintena miyaní uren mi
Kantá Aunani ákonafó banasi maman
kantasí ukhen mino. Monó dorarí
in má inká ma varará ma aronái in
avúavá bá deren kákaní ukhan mai
van mi sikhen mino.*

**Mai vompompin ma kákan ineine ma
sian amá ukhein baya ino.**

*Mumunantá ma miyaní uren aviran
baya: Yisasintá ma mumunan é tifer-
una anon umei karavusi fintena setin*

*miyaní uren mi fura sen ume vá
aau vá ída van nanin banta e sen
aní ukhen mino. Karaisi ma furen
bei nare vanaein manon tetin tesé
uran mi Tiyarafenu ano setin nan
puntákein nanin banta e sen tariyain
Tiyarafenu ano ma vanasii avúavá
daimin nain damú tetin tiya inten
mino (Romu 5:9 fin ná onano).*

*Tesé uran ma avusese ukhein baya:
Mana yaná ano ída o yampakhan
pura sen avusese uaren maman kan-
tasí ukhen ne sen mai vompon mano
sian amá ukhen mino.*

*Pori Ma Araí En Banasi Ákona Uantein
Baya Ino*

¹ *Téi Pori Yisas Karaisini yoran banta
uno. Tiyarafenu ano vei kama vaya varen
banasi mo siamino van tividen tisinten
mino. ² *Mai kama vaya Tiyarafenu ano
vei sakanampa vanta kayo oorá tiádan
kantá bompon dókifin uvamádan baren
mino. ³ Tiyarafenu Anin Yisasi ma varará
banta an daven Kin Devitini anampin
afoká ukharé eini kama vaya ino. ⁴ Tetinti
Bafan Yisas Karaisin ma masí pintena Ti-
yarafenu ano ma vei ákonará avían man-
taran maen mai véi Tiyarafenu Anin mi
varéin Kantá Aunan mano setin anien
mino.

⁵ *Tiyarafenu ano setin nan beni vaya
varen ena anan nanin banta ma minó
akhempá ma vaimpin mo siamintin bentá
mumunan uren ben ánain bákuriyáken
ben aví maman daní ino van mi Yisas
Karaisin pinté uaren mai amusin má
ákona vá tetin timikhen mino. ⁶ Máan
tukhan mi mai ma Yisas Karaisini kékasí
ino van ma arakhein nanin bantafin
tiretin má baono.

⁷ *Romu kéká soe, Tiyarafenu ano
siretin avábá uren mi veni kékasí ono
van aren mino. Tetin Tifóe Tiyarafenu
vá Bafan Yisas Karaisin má ano vá tiretin
tarisari uantanti vá kuse vano.

*Romú Ma Monó Nanin Banta Vain Ma
Pori Onano Van Iniyaré Ein Baya Ino*

⁸ Ma varará minó akhempá ma vain
nanin banta ano ma siretíi ákona mu-
munan nan ma siren iniyain nan mi

* 1:1: Apo 9:15 * 1:2: Rom 16:25-26 * 1:5: Apo 26:16-18; Kar 2:7-9 * 1:7: Nam 6:25-26

Yisas Karaisin avíká araíe Tiyarafenu susu sianté uno. ⁹⁻¹⁰ *Mai ma séi moéké tukáké mumunan iyaruna Tiyarafenu Anini kama vaya ma vanasi siamiyaruna mai sireti ma o afasí iyaona yana san náí máa yádasá béin timúkimpó ena ena siamiya rafu mai véi afová ukhen mino. Mai Tiyarafenu ano kanaíen aaí intí tiretin o onano van mi ena ena simúkiyá uno.

¹¹ Mai fara vara seyo, siretin ma ayain monó avúavá ma ákona uantan mai siretin má daidékuya Bafampin ákona e vano van mi iyá uno. ¹² Mai senti ineine máan mi ukhen mino. Tiretí ankaní mumunan mano sen tiya intin maen inká anona senti mumunan mano siretin aya intin ma inten mai avúavá anon minó tetinti mumunan ákona usintanten mino. ¹³ *Mumunan tiyofi sífá tiváeyan noe, sireti vaípa téi orono van kokhon damú ineine iyaré umpo saréa siretí ankan afovasá ono. Tenti yorantá ma ena anan kéká ano mumunan nanin bantaí uan unein máa mana siretin má ono van mi séi iyákun mifo kokhon daná ano ena ena afoká iyan tenti aa iyariyaren mino.

¹⁴ Para vara seyo, Kiriki kéká maen afova vain nanin bantan bakan inká ena kéká maen ída afova vain nanin banta vakan mi maí kampin dorano van mi Tiyarafenu ano séin ma yoran timikhen mino. ¹⁵ Máan tukháí sireti Romú nanin banta ma kama vaya siamin nan ten tirá ano mantiyán mino.

¹⁶ *Máan tukháí kama vaya ma siami nan téi ída siyave éiyá uno. Mai fara vara seyo, Tiyarafenui ákona mai kama vayafin báken mumunan ma ein nanin banta evaránen aviriyán mino. Teti Yutan kéká nare ma siviáren ena kéká bá deren aviranten mino. ¹⁷ *Tiyarafenu ano mai kama vaya rákéi vei avúavá aní uren mi setin nan puntákein nanin banta e sen taré iyan mino. Teti ankan pura sé mumunan iyákun ná tetin nará puntákein nanin banta e sino. Mumunan aa sáké anan Tiyarafenu avorá puntákein nanin bantaí inono. Mai fara vara seyo, Tiyarafenui

vompon dókifin máa sikhen mino. “Mumunan ma inain nanin banta van mi Tiyarafenu ano funtákein nanin banta e sen ararantin ída furin ayun para van aunan baranten mino.” *Aba 2:4*

Ume Avúava San Ma Tiyarafenu Ano Aran Nan Uantein Baya Ino

¹⁸ Máan tukhan maen mai ma namu avúava san mana uren pura sikhein avúavá ma oyan amé iyain kékápin Tiyarafenu ano inaru fáké bei aran daná anié iyan mino. ¹⁹ *Para vara seyo, Tiyarafenu ano mai nanin banta vei avúavá aní íkan afová uran betí inimpin pe van mino. ²⁰ *Mai ma vain danasinta maen Tiyarafenu ano ma esé araíen inaru vá bara vá uváden inká minó danasinta ma uvantein táké ma erikhein mai vanasi ano véin ída onten mifo veni aúpá ma vain ákona vá béi ma uvantein danasinta vá anan afová en onten mino. Máan tukhantin mi ída mana nanin banta ano kanaíen Tiyarafenu van ída afová ukhé uno sen tinten mino.

²¹ *Betí ankan Tiyarafenu afová ukhen mifo veti ída ven aví daní iyan ben tusu sian tiyan é iyan mino. Máan tiyákan mi vetí ineine ano asuse uvíkan ineine vá afova vá ma ída vain kéká an dakhán maí anon aúpin titípa ukhan aminofin ban mino. ²² *Báken tetimpin afova van mino sé iyan mifo vetí ineine asuse ukhein kayo ino. ²³ *Máan tukhen mi aunan má kakhán má ma vain Tiyarafenu betí ankan oyan amiren ída ena vá bentá monó té iyan mino. Betí ankan banta aman manon nafi nun aman manon nafi safúna aman manon nafi inká osafáe aman manon nafi uvariyan uren Tiyarafenu ma monó teren me ifá en mai yanasintará anan monó té iyan mino.

Barará Ma Vain Nanin Banta Ano Ma Ara Ara Umeí É Iyain Baya Ino

²⁴ Máan tiyákan Tiyarafenu ano vetin ampiádan mi uméin anunu ano vetin e yarifaádan ída funtákein avúavasí iyáken beraran namu avúava suron baré iyan

* **1:9-10:** Apo 19:21; Rom 15:23 * **1:13:** Apo 19:21 * **1:16:** Mak 8:38; Apo 13:46; 1Ko 1:18-24 * **1:17:** Rom 3:21-22 * **1:19:** Apo 14:15-17; 17:24-28 * **1:20:** Yop 12:7-9; Íbo 19:1 * **1:21:** Efe 4:17-18 * **1:22:** Yer 10:14; 1Ko 1:20 * **1:23:** Diu 4:15-19; Íbo 106:20

mino. ²⁵ Máan nanin banta ano Tiyarafenui fura sikhein baya ampiren kampun bayan bariyan mino. Máan tiyáken minó daná ma uvantein Tiyarafenu me oyan amiyáken béi ma uvantein danasintará monó tiyan mai yanasinta aránaópá oriyan mifo seti vá Tiyarafenu avisá ena ena yaní ó tifano. Pura ino.

²⁶ Betí ankan Tiyarafenu me oyan amin mi mai Tiyarafenu ano vetin ampiádan mi vetíi fain avúavápin ban mino. Bákan mi anasi kéká ano ábasui funtákein avúavá me ampiren beraran ída funtákein namu avúavá ánain bákuré iyan mino. ²⁷ *Banta kayo vá deren ábasui funtákein avúavá bá me ampiren betin aúpin ira ariyákan e manten ena vanta kéká bá namu avúavasí é iyan mino. Banta kéká ano ma ayave avúavá ma variyain mai ayái anona evaránen betíi namu miyan baré iyan mino.

²⁸ Betí ankan ída Tiyarafenu aránaó ban ineine íkan mi vetin áikan namu ineine ánain bákuriyáken minó ída funtákein avúava sinta varé iyan mino. ²⁹ Ara ara namu avúava sinta ma veti varé iyain mai ída funtákein avúavá bá ena ina yaná ódare namu ineine uantan má ena namuroí uantan avúavá bá ena ina yana san aran iyáken inká banta aruan puriyáken aruve asive iyan ena vanta kampun tian tiyan ena vanta namu uanté iyan mino. Máan tiyáken inká ena oyampá baya siyan maen ³⁰ oorá ará baya e sian more mere iyáken Tiyarafenu namuroí uantiyan baya átakharé uren au khákan iyáken beyan nan amo siren namu avúava sinta varano van mana iniyáken be anóe afóeni veya átakharé iyan mino. ³¹ Betí ankampin ída ovaren me iníden baran avúavá bakan betí ma siádakaré ein baya ánain ída yakhafiyain mino. Máan tiyáken betíi ádékena van ída iniyan ena vanta van ída arunan uantiyan mino. Mai namu avúava sinta ano vetimpin bíkakhen ban mino. ³² Tiyarafenui man baya ano máan avúava sinta ma varan nain mano vá purino sikhán maen betí ankan afová ukhen mifo mai veya átakharé iyáken ara

ara namu avúavá betí bariyan ena kéká san moéke mai avúavasá barano siyákan bariyan mino.

2

Tiyarafenu Ano Ma Ume Yaimiyain Baya Ino

¹ *Máan tukhanti éi ída setisi kéká san mai namu avúavá bariyan mino sinono. Para vara seyo, ei avúavá ano ída funtákan mae mai ena ano ma variyain avúavá máan éi má bariya ono. ² Máan tukhan mae setí ankan afovéé tifékun mai Tiyarafenu anon puntákein avúavápoi mai ma namu avúavá bariyá ein kéká daiminten mino. ³ Máan tukhanti éi ma iniyaona ena kéká anan Tiyarafenu ano yaíden uman amirantí maé mai uman ída varanté unó té iniya fono. ⁴ *Tiyarafenu ano ma éin ída ainen namu miyan amin ma kama avúavasíen ayáká ma ave ukhen bain mai van éi ídá iniyáké oman aniana iya fono. Éi mai avúavá pinté ará baerano van mi vei kama avúavá aníen ída ainen uman amiyan mino.

⁵ Máan tiya ompo éi e ará ákona ureya ída ará baere ono. Máan ma iya vaona avúavá anoi ei namu miyan átaru iya vaonai Tiyarafenui funtákein kó ma erin nain damúi veni aranan ná ano yákó intiya éi mai namu miyan baran nono.

⁶ *“Mana mana nanin banta ano ma variyain avúavákái Tiyarafenu ano yaiminten mino.” *Íbo 62:12; Pro 24:12*

⁷ Máan tinten mifo inte kéká anó mantaan ákona ukhen kama yorarí iyaré inten nafi mai Tiyarafenu ano ínaimpáké betin amo siren kákan bí bá ayun ma fara van oriyan ban aunan ma aminten mino. ⁸ *Aminten mifo mai ma vetiyan ban nain nan mana ma iniren pura veya me oyan amiren ída funtákein avúavá ánain mana vákuriyá inain kékái mai Tiyarafenu ano ve aran nan ná betin amaniná bana inten mino. ⁹ Mai ma namu avúavá ma variyain kayofin mi aau vá uman má afoká inten mino. Mai uman mano Yutan kayofin nare afoká

* **1:27:** Riv 18:22; 20:13; 1Ko 6:9 * **2:1:** Mat 7:1-2; Yon 8:7 * **2:4:** Efe 1:7; 2Pi 3:15 * **2:6:** Mat 16:27; 2Ko 5:10 * **2:8:** 2Te 1:8

uaren ena anan nanin bantafin orera inten mino. ¹⁰ Máan tinten mifo kama avúavá ma variyaráin nain nanin bantan Tiya rafenu ano inarurá kama kumanin má kákan bí bá ará kusin má aminten mino. Yutan kayofin nare amiaren ena anan nanin banta vá deren aminten mino. ¹¹ Para vara seyo, ída aronáin avúavá bantin Tiya rafenu ano mana avúaváká anan daiminten mino.

¹² Man baya ma ída afová ukhen ma umeí iyaréin nain kékái Tiya rafenu ano yaíden uman aminten mino. Man baya ma afová ukhen ma umeí iyáin kékái Tiya rafenu ano mai man bayafó betíi avúavá daíden uman aminten mino. ¹³ Para vara seyo, man baya van mino sen ma fara oniyain kéká sa Tiya rafenu avorá puntáken naino. Ída ino. Mai ma man baya ánain bákuriyain kéká san mi Tiya rafenu ano funtákein kéká se siyan mino. ¹⁴ *Ena anampin ída Tiya rafenui man baya váé iyan mifo vetíi inin pintéi fura sen ma man baya afová ukhen dakhaféiníi iyan mino. Para vara seyo, vetíi aukákéi funtákein avúavá ánain dakhafíyan namu avúavá oyan amiyan mino. ¹⁵ Mai ma variyain avúavá anon betin aníen Tiya rafenui man baya ano setin túpin báí funtákein avúavá bariyáké namu avúavá ída variyá uno sen inikhen mino. ¹⁶ Inikhen mifo vanasi ma yaimin nain damú ma fura sen afoká intin maen Tiya rafenu ano Yisas Karaisin ákona amintin minó nanin banta ma aúpá bariyáin nain avúavá daiminten mino. Máan mi sé tesi vaya minópin tian amá uno.

Man Baya Anon Kanaíen Tiya Inten Ne Ma Yutan Kayo Ano Siyan Baya Ino

¹⁷ Téi Yutan bantan báké Tiya rafenui man baya fákakhé maé beni kékái varuna véi siya inten mino sireya e amo sé iya ono. ¹⁸ Tiya rafenu ma anunu iyain éi afová ukha ono. Para vara seyo, man baya fintena kama avúavá bá namu avúavá bá inka éi inireya afová ukha ono. ¹⁹ Éi seya inka séi afová ukheruna kanaíe auu yufúkukhein aa aní uanté

inká anukheimpin ma vain kéká oon kakhaanté onté uno se iné iya ono. ²⁰ *Éi ma iniyaona ano Tiya rafenui man baya fintena fura vaya vá afova vá minó manteruna mai kasaé ída ma afova vain kayo vá inka iyampon arinta an ma yakhein kéká bá afova amiyá onté uno se iné iya ono.

²¹ *Máan téiya ompo ena nanin banta ma afova amiyáke mai eyan ída afova variya ono. Ena kéká san ída vá umoyan barano sire mae éi umoyan baré iya ono. ²² Ena ana safí avafun nafi ma yarifan mai namu ukhen ne sé iya ompo éi mai avúavá baré iya ono. Kampun ayarafenurá ída vá monó teno séiya ompo monó ma ída inin afokhampin ma vain nanin bantai monó namun pintena éi manáa yaná umoyan baré iya ono. ²³ Éi ma iniyaona ano Tiya rafenui man baya afová ukhé uno sireya e amo sé iya ompo éi Tiya rafenu me oyan amireyá beni man baya yurafuré iya ono. ²⁴ Mai avúava san mi Tiya rafenui vompon dóki ano máa sikhen mino. “Tiretí ankani anarái ena anan kéká ano Tiya rafenu oyampá baya siren béin oyan amé iyan mino.” *Ais 52:5; Isi 36:22*

Au Khavin Avúavá Pákena Vaya Ino

²⁵ Tiya rafenui man baya ánain ma vákurinteya mai au ma khavin avúavá kama inten mifo ída ma minó man baya ánain bákurinteya mai éi ída ma au khakhein banta an mi yakha ono. ²⁶ *Máan tukha ompo ena anan nanin banta kayo ano ma Tiya rafenui man baya ánain ma yakhafintin maen mai ídá Tiya rafenu ano vetin avían bei kékási inten nafino. ²⁷ Ena anan nanin banta ano ída au khavin Tiya rafenui man baya ánain dakhafíyan mifo sireti Yutan kéká ano veni man baya afová ureya au khaviya ompo man baya ánain ída yakhafíyaona enan anan kéká ano inaipáké tiretin daí dantin uman aminten mino.

²⁸ Mai fara vara seyo, éi ída kanaíe yan bukhafa máara safi inká au khavin avúaváká safi Yutan banta uroní inono. ²⁹ *Ída ino. Tiya rafenu avorá ma funtákein

* 2:14: Apo 10:35 * 2:20: 2Ti 3:5 * 2:21: Mat 23:3-4 * 2:26: Kar 5:6 * 2:29: Diu 30:6; Kor 2:11

manoi fura sen Yutan banta uron ban mino. Inká pura sen au khavin avúavá ma vain mai yan bukhafa máa ma au khavin naino. Tiyarafenui Kantá Aunan manoi aúpin afoká uádé iyan mino. Intéa kéká anó mai avúavá baré iyan nafi mai varará nanin banta ano va amusin uanté iyan naino. Ída ino. Tiyarafenu anon amusin uanté iyan mino.

3

Tiyarafenu Ano Ma Siren Mai Ánain Pura Sen Dakhafiyain Baya Ino

¹ Au ma khavin avúavá ma au ina yaná ana ma vantin maen Yutan kéká ano intesá ená ena anan banta kéká esantanten nafino. Au khavin avúavá ano kama yanasá afoká uádé iyan nafino. ² Pura uron mino. Tiyarafenu ano Yutan kayo ara ara kama yanasinta amikhen mino. Esé araién minó bei vava amikharen mino. ³ Pura ino, manáa ano vetí ma siadákare ein baya yurafuren mai ánain ída yakhafé iyan mifo máan ma inain nan Tiyarafenu ano veyan ma siadákare ein baya yurafurinten nafino. ⁴ Ída uron mino. Minó barará banta ano kampun té iyan mifo Tiyarafenui vompon dóki ano ma sikheinien Tiyarafenu veyáká anan pura sé iyan mino.

“Tiyarafenu oe, éi funtákein avúavá máa fosá téin kó tisintano.

Beti ma éin kó tiantano van inti maeya éi vetíi kó darádeya funtákein kó anan tin nono.” *Íbo 51:4*

⁵ Tetisi namu avúavá ano ma Tiyarafenui funtákein avúavá ma maman dákosí urantí maé mai seti inte esá tente rafuno. Tiyarafenu ano ma setinti ume ayá ma anona simin nain nan mai véi namu avúavái iyan minó tétifante rafuno. (Manáa nanin banta ano máan ineinen é iyan mino.) ⁶ Ída uron mino. Tiyarafenu ano ma ída kama avúavá ánain ma ena ena vákurinten maen intesá uren ná béi minó barará nanin bantai avúavá daiminten nafino. ⁷ Manáa ano máa sen iné iyan mino: “Tenti kampun baya ano ma Tiyarafenui fura vava ma maman dáko intin mai ano veni kákan bí moékantin

ma kákani suron iyantin maen mai véi náí anarasá téin nan ume vanta ino siren ná namu miyan timinten nafino.” ⁸ Erí namu avúavá bariyá tifékun mai ráké moéken kama avúavá afoká ino ma siyanteya mai asuse vayan té iya ono. Manáa vanta ano sen tufin kuráden téi ma siyaruna vava van asuse vava vá manái ukhein bayan tiyan mino sé iyan mino. Mai ineine máden ma mai avúavá ánain dakhafiyá inain kékái Tiyarafenu ano yaíden mai ayá namu miyan aminten mino.

Ma Varará Ma Mana Ída Funtákein Nanin Banta Vain Baya Ino

⁹ *Máan tiya ompo mai seti Yutan kéká anó ena anan kayo esantakhé tife rafuno. Ída ino! Minó Yutan kéká bá Kiriki kéká bá ano manái é umefin bá tíféuno. ¹⁰ Mai van Tiyarafenui vompon dóki ano máa sikhen mino.

“Ída mana vanta ano funtákein avúavá baré iyan mino.

Ída uron mino. ¹¹ Ída mana ano kama afova manten mino.

Ída mana ano Tiyarafenu van dosikhen mino.

¹² Minó ano ínka Tiyarafenu oyan amen mino.

Minó ano mo namu uron en mino.

Ída mana ano kama avúavá bariyan mino.

Ída uron mino.” *Íbo 14:1-3; 53:1-3; Ekr 7:20*

¹³ “Betíi vava ano vanta masí ma yuvakhen namu aunka é iyainíi ukhen mino.

Betí ankan kampun baya anan té iyan mino. *Íbo 5:9*

Betin oofen namu osafáei aufon ma víkakhen avanen eraveiníi iyan mino. *Íbo 140:3*

¹⁴ Betí ankan ena vanta ma namu uren aran amiyan uman amin baya anan té iyan mino.” *Íbo 10:7*

¹⁵ Beti ainen ena vanta aruan purono van manan é iyan mino.

¹⁶ Betí ankan ma oriyaintá ena nanin banta namu uanten uman amen en nó é iyan mino.

¹⁷ Ena nanin banta vá ma ará manafiní uren ban avúavá betí ankan ída afová ukhen mino.” *Ais 59:7-8*

* **3:9:** Rom 1:18; 2:24; 3:23

18 “Tiyarafenu ano ma vetí ankan uman amin nan ída feré iyan mino.”

Íbo 36:1

19 Máan tukhein nan mi man baya ma amikhein nanin banta ano mai man baya ano ma sikhán nain aránaopa sá bano. Para vara seyo, ínaimpáké ma Tiyarafenu ano ma varará nanin banta ma yaimin nain damú ída mana ano kanaíen tiyáken téi man baya ída afová ukharé uno sinten mino. 20 *Man baya ánain ma vákurin avúavá ano Tiyarafenu avorá ída funtáken banten mino. Para vara seyo, man baya ma afova suron ma inten mai seti ume nanin bantan bá uno sen afová inten mino.

Yisas Karaisintá Ma Mumunan Iyain Kayon Tiyarafenu Ano Ume Arúantáden Puntákein Nanin Banta E Sen Aré Iyan Mino

21 Man baya ánain ma yakhafintasa Tiyarafenu ano setin nan puntákein nanin banta e sinten naino. Ída ino. Pefá ma Tiyarafenui vompon dókifin ma sikaré einíen ena aa sákéi setin nan puntákein nanin banta e sinten mino. 22 *Ume arútintano van muno siren ma Yisas Karaisintá ma mumunan inain nanin bantan Tiyarafenu ano ume arúantáden puntákein nanin banta e sinten mino. Yutan nanin banta fi ena anan nanin banta fi mai aa sáké anan Tiyarafenu ano minó aviranten mino.

23 Mai fara vara seyo, minó nanin banta ano umeí ukhéi Tiyarafenui kakhakhein avúavápin o afasí ukhé tiféuno. 24 *Yisasi ma setin ume arútintákein mairái Tiyarafenu ano setin tarisari uren puntákein nanin bantae siyan mino. 25 Tiyarafenu ano ma Yisasin tiantan erein mai véi furintin beni nare ma vanain nain mano minó bei vanasii ume arúantano van mino. Mai avúavá ma Tiyarafenu varein manon tetin nan puntákein nanin bantae siyan mino. Pefá Tiyarafenu ano funtákein avúavasíi ena umeí ma ein nanin banta ída ainen uman amikharen mino. 26 Máan mana ena mi saréa ma ume nanin banta ano Yisasintá ma mumunan

in maen Tiyarafenu ano funtákein nanin bantae siyan mino.

27 Máan tukhen mifo mana vanta ano kanaisá ena ná téi kama avúavá bariyákon Tiyarafenu ano amusin iyan mino siren ná be amo sinten nafino. Ída ino. Man baya ánain ma vákuriyá tiferuna rasaino. Ída ino. Tetisi mumunantái funtákein nanin banta e sinten mino. 28 Para vara seyo, mumunan ma iyá tiferuna anon Tiyarafenu avorá puntaké tifé umpo man baya ánain ma vákurin avúavá ano vaino. Ída ino.

29 *Tiyarafenu maen mai Yutan kayoi Ayarafenu aná ban nafino. Béi ída ena anan nanin bantai Ayarafenu van nafino. Ída ino. Béi ída Yutan kékái Ayarafenu ana van mifo ena anan nanin bantai Ayarafenu vái van mino. 30 *Máan tukhan maen mai mana Tiyarafenu anan báken pura sen ma mumunan in aa sáké anan Yutan kéká safi inká ena anan nanin banta fi e avían puntákein kéká se sinten mino. 31 *Máa sinten mifo mai seti nan man baya me ifá uren mumunan in ain mana yakhafino vara fino. Ída uran mino. Pura sen mumunan in avúavá anoi man baya maman ákona iya ono.

4

Abaraamuni Mumunantá Ma Funtákein Banta E Sein Baya Ino

1 Abaraamu maen tetin an dakhein bantan báken tetin tináu ifo véin nan ma Tiyarafenu ano funtákein banta e ma sikhá ein nan ma afová iyáké tetí ankan náí esá té tifante rafuno. 2 Abaraamu ma kama yorará iyá ein nan puntákein banta uno siren be amo sinten mifo Tiyarafenu avorá ída ino. 3 *Para vara seyo, Tiyarafenui vompon dóki ano setin tisimiyáken Abaraamu ma Tiyarafenu rá mumunan ein nan mi véin nan puntákein banta e sikhén mino. *Esé 15:6*

4 Banasi ano yoriyá eintái miyan baré iyan mifo ída fara amusin ne siren miyan amé iyan mino. 5 Máan tukhan maen banasii mumunantái Tiyarafenu

* 3:20: Íbo 143:2; Rom 7:7; Kar 2:16 * 3:22: Kar 2:16 6:4; Kar 3:20 * 3:31: Mat 5:17 * 4:3: Kar 3:6

* 3:24: Rom 5:1 * 3:29: Rom 10:12 * 3:30: Diu

ano funtákein nanin banta e siyan mifo vetí yoranta saino.

⁶ Man baya ma yakhafiyareona rasa Tiyarafenu ano funtákein banta e sikhen naifo amusin ná ono sen Kin Deviti mai avúava san mi sikhen mino.

⁷ “Baya átakharé uren umeí iyá intin ma ume ampíantáden daramantákan nain kéká ano vá amusin ino.

⁸ Tiyarafenu ano ume ampíantáden ma fura sen ma áuntan nain kéká ano vá amusin ino.” *Íbo 32:1-2*

⁹ Tetí ankan ma iniyaruna ano Abaraamuni mumunan nan mi Tiyarafenu ano funtákein banta e sikhen mifo mai avábá ma vain mai Yutan kéká ina ana fi aa ena anan nanin banta vasa fino. ¹⁰ Maa sikhen mifo mai inté ma uran ná béin nan puntákein banta e sen nafino. Au ma kharan ná puntákein banta e sikharen nafi áa au ma ída khakhan ná puntákein banta e sikharen nafino. Au ma ída khakhan maen pefái Tiyarafenu ano véin nan puntákein banta e sikharen mino.

¹¹ *Au khavin avúavá ída afoká ukhan inká Abaraamu yere ída au khakhan maen pefái Tiyarafenu ano veni mumunantá puntákein banta e siren béin avíkaréin mai avúavái aníen mi au ma khavin dákoen mino. Maa tukhein nan mi mai ma au ída khavin mumunan ukhein kékái anafun Abaraamu van mino. Betí ankaní mumunantái Tiyarafenu avorá puntákein kékasi ukhen mino. ¹² Abaraamu mai fefá ída au khakhen mumunan ukharen mifo au ma khakhein kéká ano ma Abaraamun an den mumunan ma intin maen mai Abaraamu vetin anafu vá deren ban mino.

Tiyarafenu Ano Ma Iyáantákein Mai Minó Mumunan Nanin Banta Anon Baranten Mino

¹³ *Pefá Tiyarafenu ano ma Abaraamu má be anavasin má ayampin minó baramenté uno siren ma iyáantákarein mai véi ma man baya ánain bákuriyá einta saino. Ída ino. Béi ma Tiyarafenui vayará ma mumunan eintái véin nan puntákein bantae siren iyáantákaren mino. ¹⁴ *Maa tukhan mi man baya ánain ma vákurin

kéká anan Tiyarafenu ma iyáantákaré ein daná baranten mino ma sinteya mai mumunan ánain ma vákurin avúavá ano faen daná an dantin mi mai ma Tiyarafenu ano iyáantan nain daná ano yere fara savifá o afeyoranten mino. ¹⁵ *Mai fara vara seyo, man baya ánain ma vákuroño van ein kéká man baya anon uman amé iyan mifo man baya ma ída vantin maen man baya yurafurin avúavá ída vanten mino.

¹⁶ *Maa tukhan mi Tiyarafenu ano ma iyátintákaré ein mai yaná mumunan aa sáké anan para vará tifanté uno. Yutan kayoi avúavá ánain ma ída yakhafin ma Abaraamu ma mumunan iyá ein an ma yátifanté mai Tiyarafenu ano ma Abaraamun iyáantákaré ein daná bará tifanté uno. Maa mana en mi Abaraamu mai minó mumunan ma inain nanin banta anafuí inten mino. ¹⁷ Tiyarafenu ano ma véin tiamikharé ein mai vompon dókifin maa sikhen mino. “Téi anon éin maman kokhon nanin banta anafuní é uno.” *Esé 17:5*

Purin banta ma evaránen aunan amen ma ída varé ein daná ma vayafó tikan afoká ein Tiyarafenui ma mumunan ein nan mi Abaraamu maman barará nanin banta anafuní uanten mino. ¹⁸ Tiyarafenu ano maa sikharen mino, “Éi kanaíé minó ofu yankafinte fono. Ída ifo en ana akhafana ano maa uron mi en mo kokhoní inten mino.” *Esé 15:5*

Mai ma iyáantein danasinta ano ída kanaíen afoká irí ukhan mifo Tiyarafenui vayará ana Abaraamu fura sen mumunan ukharen mino. ¹⁹ *Abaraamuni orana mana antareti (100) vákan ben au varimú ukhan Sara ída kanaíen iyampon kairí ukhan maen béi afová ukhen mifo veni mumunan mano ída ánuní in moéken ákona ukharen mino.

²⁰ Tiyarafenu ano ma Abaraamu minó daná iyáantákein nan iniren béi ída kokhon ineine ina vei mumunan ákona uren Tiyarafenu aví daní iyaren mino. ²¹ Para vaino, Tiyarafenu ano ma iyáantákein daná kanaíen afoká inten mino béi afová ukhen pasen mino.

* **4:11:** Esé 17:10-11 * **4:13:** Esé 17:4-6; 22:17-18; Kar 3:29 * **4:14:** Kar 3:18 * **4:15:** Rom 3:20; 5:13

* **4:16:** Kar 3:7 * **4:19:** Esé 17:17

22 Béini mumunan nan mi Tiya rafenu ano funtákein banta e sen mino.” *Esé 15:6*

23 Tiya rafenui vompon dókifin ma funtákein banta e sen ma arakhein mai Abaramun beyákasara sikhen naifo 24 mai setin ma san deren tikhen mino. Tetisi Bafan Yisasin ma Tiya rafenu ano masí pintena avían mantakheintá ma seti mumunan ma iyaruna mai van mi Tiya rafenu ano iniren teti nan puntákein nanin banta e sen tariyan mino. 25 *Tetisi ume arútintano vare siren Tiya rafenu ano namuro kéká ayampin Yisasin ampiádan aruan puren mino. Púbíkan tetin nan puntákein nanin banta e sen tarano van mi Tiya rafenu ano véin masí pintena orun avían manten mino.

5

Mumuman Mano Ma Amusin Afokáin Nain Baya Ino

1 Máan tukháí setí ankan inka mumunan ukhé tifékun mi Tiya rafenu ano seti nan puntákein nanin banta e sikhen mino. Tetisi Bafan Yisas Karaisi ma varein avúavá anon Tiya rafenu vá maman teti sirá manafiní usinten mino. 2 Yisasi anon tetisi mumunantá aa uvítintádái Tiya rafenui sarisari aúpin bá tifeuno. Tiya rafenui ákona vá kakhan má dere varano van mi mantaan ákona ukhé tifeuno.

3 *Máan ma ukhékun ma minó uman tetimpin afoká iyain mai vasará timusin ó tifano. Mai fara vara seyo, mai anon tetisi mumunan ákona usinten oriyan banten mino. 4 Tetisi mumunan ma ákonaen bantin maen mai anon tetin ákona usintantí minó akhenóka yo ékaré Tiya rafenu ma sivirano van tikhein nan ave ó tifanté uno. 5 Tiya rafenu ano ma setin tivirano van tikhein mai ída fasavi ave ukhé bá tifanté uno. Mai fara vara seyo, Tiya rafenu ano setin nan anunu uren mi Kantá Aunan timikhan mai ano setin túpin bíkakhen mino.

6 Teti yantá ída kanaí é mantaan ákona irí ékun mi Tiya rafenu ano ma aní ukhá ein damú afokáin ume nanin banta evaránen avirano van mi Yisas

Karaisi yorun puren mino. 7 Ída kanaíen mana vanta ano kama vanta aya ono van beni varu varen purinten mifo kama avúava suron ma variyain bantai varu varen kasaen purono van inten mino. 8 *Teti ume avúavúpin para vá tifékun mi Tiya rafenu ano ve ákona arunanái aníen mi Yisas Karaisi furino van tiantan eren mino.

9 *Karaisi ma furen bei nare vanaein manon tetin tesé uran mi Tiya rafenu ano setin nan puntákein nanin banta e sen tariyain béi ma vanasii avúavá daimin nain damú setin tiya inten mino. 10 Teti ankan ma Tiya rafenu vá namuroí ukharé ékun ma Tiya rafenu Anin ma furein manon namuro avúavá kipa sintáden Tiya rafenu vá maman tirá manafiní usinten mino. Máan tukhan béi evaránen e mantakhein mai ma fara van oriyan ban uman pintena fura siren tiya inten mino. 11 Mai ma Bafan Yisas Karaisi ano ma varein avúavá anon tetin maman Tiya rafenu vá ma sirá manafiní ukhein mai vará timusin ó tifano.

Adamun Pinté Purin Afoká Uvin Ma Karaisin Pinté Aunan Baran Afoká Ukhein Baya Ino

12 *Adamu ano ma umeí ein mai anon purin dáko uran ma varará oreraen mino. Mai fara va ino, minó nanin banta ano umeí ukhan mino. 13 *Man baya ída afoká ukhan ume nare ma varará baren mifo man baya ma ída afoká ukhan maen namu avúavá ma variyá ein kayoi ume Tiya rafenu ano ída yankafiyain mino. 14 Adamun táké ma arái uren eren Mosesintá ma e kanaí ukhá eintá purini ákona yafikhan minó ano furiyaren mino. Mai kéká ano ída Adamu ma mana ákona are varákeinien mifo vetí ankan paran puriyaren mino. Ínaimpáké Yisasi ma ena avúavá baran nain mi Adamu faran aní ukhan mino.

15 Máan tukhen mifo Adamuni ume vá Tiya rafenui sarisari vá ída manaí ukhen mino. Mai fara vara seyo, mana vantai umerái minó nanin banta ano furiyaréin mi Tiya rafenui sarisarii ákona anon Yisas

* 4:25: Ais 53:4-5 * 5:3: Yem 1:2-3; 1Pi 1:5-7 * 5:8: Yon 3:16; 1Yn 4:10 * 5:9: Rom 1:18; 2:5; Efe 2:3-5
* 5:12: Esé 3:6; Rom 6:23 * 5:13: Rom 4:15

Karaisin pinté uaren banasii ume arúden evaránen avíken mino. ¹⁶ Tiyarafenui sarisari ano Adamuni ume vá ída manái ukhein mi setimpin afoká é iyan mino. Adamu ano umeí ureintái Tiyarafenu ano minó nanin banta van umeí ukha ono sikhá maé tetí ankan moéké ume avúavá bariyá tifékun maen Tiyarafenu ano mai van ída inin tetin tarisari uren puntákein nanin banta e sen taré iyan mino. ¹⁷ Adamu veyáká umeí ureintái furin mano minó nanin bantafin afoká ukharen mifo Tiyarafenui moékakhein tarisarirá ma funtákein avúavá baran nain kéká anon Yisas Karaisin pinté uaren ume vá purin má esantanten mino.

¹⁸ *Máan tukhan mi mana vanta anon man baya yurafúdein anarái Tiyarafenu ano seti minó nanin banta mai umerái kó tisintákaren mino. Máan manan en mi mana vanta ano funtákein avúavá uren tetin e sivían Tiyarafenui kékasi uren mi véi ayun ma fara van aunan tetin timen mino. ¹⁹ *Para vara seyo, mana vanta ano ma vaya átakharé ureintái minó nanin banta ano veni avúavá baren umeín nanin bantaí ukharen mino. Máan manan en mi mana vanta ano ma Tiyarafenu oo yayiúká eintái kokhon nanin banta ano véin avorá puntákein nanin bantaí inten mino.

²⁰ Minó nanin banta ano vetíi ume afová ino van Tiyarafenui man baya amirákan beti mai man baya moéken durafuriyan mino. Durafuriyáken kokhon umeí ma iyan maen Tiyarafenui sarisari ano moéken kákaní iyaren mino. ²¹ *Máan tukhan mi ume avúavá ano vetíi yafisiní ukhen mi mai ume anon purin afoká uanten mino. Máan tukhen mifo setisi Bafan Yisas Karaisini yorantái Tiyarafenui sarisari ano yafisiní ukhan mi véi setin tarisari uren teti nan puntákein nanin banta e sen tarará ayun para van oriyan ban aunan manté tiféuno.

6

Umei Ákona Ma Kípakhein Baya Ino

* **5:18:** 1Ko 15:22 * **5:19:** Ais 53:11 * **5:21:** Rom 6:23 * **6:3:** Kar 3:27 * **6:4:** Kor 2:12 * **6:6:** Kar 5:24 * **6:11:** 2Ko 5:15; Kar 2:19 * **6:12:** Esé 4:7 * **6:13:** Rom 12:1

¹ Taréa inte esá teti sé tifante rafuno. Umeí aná teti é oriyá bá tifékun ná Tiyarafenu ano sarisari en oriyan banten nafino. ² Ída uron mino. Teti inka ume avúavá kípapé purein an dakhé umpo mai intesá uré evarané ume avúavá baranté tife rafuno. ³ *Tetí ankan ma Yisas Karaisin má ma manafin túpá uvé monó non baré inká manafin túpá uvé puré ma ukhá é tiferuna mai sireti áunte rafono. ⁴ *Monó non ma feré tiferuna anoi Karaisini furin má teti súpá uvékun mi Tiyarafenu ano Karaisin má manafin masí ukhen mino. Be Afóe ano ma Karaisin masí pintena ma vei kákan ákonafó avían manteiníi é teti ankan auyen aunan maré bá tifanté uno.

Yisas Karaisin Má Ma Mumunan Nanin Banta Ano Orun Mantakhein Baya Ino

⁵ Teti ankan Karaisini furin má manafiní ukhé tiferuna véi ma e manteiní é tetin má dere e mantá tifanté uno. ⁶ *Tetí ankan ma umeí yoran bantaí ma ukharé é tiferuna mai inka Karaisin ma yaa un-kamadantá aruan purein mano setin túpin ma yoriyaré ein umeí ákona kípakhen mino. Máan tukái seti ída umeí yoran bantan bá tiféuno. ⁷ Para vara seyo, seti ankan ma Karaisin má pureruna anoi umeí ákona fintena ampiadá bá tiféuno.

⁸ Inká teti ankan ma Karaisin má manafin puró tifanté béini auyen aunan bará tifantéi afová ukhé tiféuno. ⁹ Para vara seyo, Karaisi inka masí pinté e mantakhein béi ída enadá purintéi teti ankan afová ukhé uno. Mai furini ákona ída vain ída kanaíen béin maman bararasí inten mino. ¹⁰ Béi ma manadá ana ma furein avúavá anon umeí ákona kipaáden mino. Máan turen mi véi Tiyarafenu aví daní ono van para van mino.

¹¹ *Máan manaeya siretí ankan má dere umeí ákona aránaópá ída va ompo Yisas Karaisin pinté uare vá Tiyarafenu aví daní ono vará para vano. ¹² *Tiretí ankan ída vá áesiná ume ano siretíi avúaváká dafisino. Mai fara vara seyo, ume ano e yarifaádantiya namu avúavá ánain bákurin nono. ¹³ *Tiretí ankan ída

vá mana vukhafa áesin ná umei yoran danasí ukhen ná ena nanin banta namu uantiyan bano. Ída vá máan tiyáke vá Tiyarafenu ma auyen aunan amikhein nará tiretí ankan pura sire vá minó bukhafa véin ná ameno. Tiretí ankan e au áesin ná Tiyarafenui yoran danasí uven ná beni funtákein avúavá dorarí ino. ¹⁴ *Taréa ume ano ída siretí ankantá dafiken mino. Mai fara vara seyo, siretí ankan taréa ída man bayai aránaópá ba ompo Tiyarafenui sarisari aránaópái va ono.

Puntákein Avúavúí Yoran Bantaí Ma In Baya Ino

¹⁵ Máan tukháí setí ankan ída man baya aránaópá taréa vátifé umpo mai in-tesá ótifante rafuno. Tiyarafenui sarisari aránaópá bá tifé umpo mai umeisá é oriyá bá tifante rafuno. Mai ída uron mino. ¹⁶ *Tiretí ankan ma mana yana san ma moéke ininteya mai veni miyan ída van doran bantaí ma inona ídá afová ukhe fono. Tiretí ankan umei miyan ma ída van doran bantaí ukheyá pur-
inte fo áa Tiyarafenui vava ánain ná bákureyá puntákein nanin bantaí inte fono. ¹⁷ Tiretí ankan pefá umei yoran bantaí ukharé en nan ma Tiyarafenu ano siretin ma vei auyen afova vava siamira ma yakhafiyaona vará Tiyarafenu susu siantano. ¹⁸ Tiretí ankan umei yoran bantaí ukharé en nan mai finte Tiyarafenu ano ovaránen avíden maman puntákein avúavái miyan ída varan doran bantaí uraya va ono.

¹⁹ Ayafa vanta kéká bá ída miyan baran doran banta kayo váká o siaré ma siamiyaruna mai siretí ankan kasae ineno van muno. Pefá tiretí ankan e au áenan pain avúavá bá baya átakharéin avúavá báí miyan ída varan doran bantaí ukhareya ompo saréa siretí au áesin ná puntákein avúavái ída miyan baran doran bantaí uvinti vá Tiyarafenu avorá kantasí ukhe vano.

²⁰ Pefá ume avúavái ída miyan baran doran bantaí ma ukhá eona yamú kayofin puntákein avúavasí ma inan tiretí ankan ída iniyare ono. ²¹ Mai avúavá

ano intéa kama yanasintá maman afoká uáden nafino. Ída ifo mai ano e aú iyampon ma aruan purin manan maman afoká ukhayai siretí ankan ma fefá bariyá eona avúava san taréa ayave iya ono. ²² Ayave van iyaré enan Tiyarafenu ano umei ákona fintena siretin evaránen avíden bei ída miyan baran doran bantaí ura va ono. Máan ma eona anon puntákein avúava afoká intiya fara van oriyán ban aunan baran nono. ²³ *Para vara seyo, umei miyan purin mana ifo setisi Bafan Yisas Karaisin pinté uaren Tiyarafenu ano vei amusin mí ayun ma fara van oriyán ban aunan tetin timikhen mino.

7

Taréa Seti Ída Man Baya Aránaópá Bá Tiféuno

¹ Mumunan ukhe ma man baya afová ukheona kéká soe, mai ma ída furin para vain kéká ano vá man baya ánain dakhafino ma sikhein mai siretí ídá afová ukhe fono. ² Mana ábasui avúavákái siádanté uno. Anasí ano ma vanta mantantín ma ve avafu ída furin para vantín maen mai man baya ano ve avafu má damuádan ban mifo ve avafu ma furintín man baya ano ída enádá bá be avafun má damuádanten mino. ³ Máan tukhen mifo vanta ma ída furin para vantín ma ve aná ano ena vanta e mantén o varanten maen mai nanín mano famúku avúavasíi inten mino. Máan tinten mifo ve avafu ma fúbintín maen mai man baya ano ída véin damukhein ena vanta ma varanten mai ída famúku avúavasíi inten mino.

⁴ *Máan tukhanti mumunan tifá tiváeyan noe, ma vá afová ono. Tiretí ankan man bayai ákona finté Yisas Karaisin má daa unkamádantá púken nan mí Mosesini man baya ano ída fákaáda va ompo mai ma furin pinté e mantakhein banta vái kase vaono. Máan tukhaona kasae Tiyarafenu avorá kama yorarí iyáke kama aran imádan nono. ⁵ Tetí ankan ma feyante sinunu ánain ma fara yakhafiyá bá tiferuna anon tetin túpin umeíin ineine édaviyan mino. Máan tiyain mano man baya mamádan umeíin inin

* 6:14: 1Yn 3:6 * 6:16: Yon 8:34; 2Pi 2:19 * 6:23: Rom 5:12, 15 * 7:4: Rom 6:2, 11 * 7:6: Rom 8:2; 6:4

erí ma umeí urékun mi furin afoká iyaren mino. ⁶ *Máan tiyaré ma setí ankan Yisas Karaisi má pureruna anon man bayai ákona fintena utútintádan ída mai ano setí ankan damukhen mino. Máan tukhantí ída setí ankan peyante man baya ano ma uvantein bompon ánain dakhafó tifanté umpo Kantá Aunani auyen avúavá kái fure sé Tiyarafenu ánain dakhafó tifanté uno.

Tiyarafenui Man Baya Ano Ma Setisi Ume Maman Afoká Ein Baya Ino

⁷ Tiyarafenui man baya ma iniyaruna anó umeí iyá tife rafuno. Ídá ino. Man baya ano ída umeí iyan mifo setisi umen aní usinté iyan mino. Para vara seyo, man baya ano ma sen “ída vá ena ina yana san aran nano.”

Eks 20:17; Diu 5:21

Man baya ano ma ída sisimikhantí mai séi ída kanaí é afová onté uno. ⁸ Máan tonté erunaren mifo man baya finté uaren mi ara ara sinunu mamádan tetin túpin édavé iyan mino. Man baya ída varé intin umeí ákona ída van nainten mino.

⁹ Téi man baya ma ída afová ukhé maé mai séi kana vá uno siyaré umpo man baya ma ineruna anon téi ume vantan baruna furonté uno sé afová é uno.

¹⁰ Man baya ano kamaen ayun ma fara van oriyan ban aunan ma simeren mifo furin miyan manan timen mino.

¹¹ *Man baya ano séin mákádá umeí urékun mairái man baya ano umeí e ono siren purin miyan timen mino. ¹² *Máan ten mifo man baya ano veyan ádun ban puntáden kantasien kama ukhen mino.

¹³ Kama ukhen mifo mai kama avúavá anó téin tiruan ná puriyan nafino. Ída uron mino. Mai ume ano kama yaná pókéi séin purin miyan timen mino. Kama man baya anon téi ma variyaruna yanasinta van mai namu avúavái variyáke umeí iya ono siren aní iyan mino. Tiyarafenui man baya fókéi ume ano namu yanasinta afoká iyantí mai setí ankan umeí namu yanasinta fura sé oná tifanté uno.

Tetimpin Ma Namu Avúavá Bá Kama Avúavá Bá Aruviyain Baya Ino

* 7:11: Esé 3:13 * 7:12: 1Ti 1:8 * 7:15: Kar 5:17

¹⁴ Man baya ano funtáka afová ukhé tife umpo séimpin ma aau vain manon ten maman umeí ída miyan baran doran bantaí uren ná bá uno. ¹⁵ *Téi ma variyaruna avúavá ída afová ukhé uno. Mai fara vara seyo, funtákein avúavá barano ma seruna ída varéiyá umpo ída ma sinunu ukhein avúava sintan téi variyá uno. ¹⁶ Bariyá umpo séi ma variyaruna avúava sinta van ma ída sinunu ékun maen mai anon man baya van kama yaná ino sen aní inten mino. ¹⁷ Aní inten mifo mai ída seyantá namu avúava sinta variyá uno. Ída ino. Ume ma sen túpin bain manon namu ineine simí bariyá uno. ¹⁸ Dan bukhafei anunu ánain bákuré moékantá namu avúavasí ékun mai ano sen túpin ída mana kama avúavá báká afová ukhé uno. Mai fara vara seyo, kama avúavá ana varano van iyá umpo ída kanaí é baré iyá uno. ¹⁹ Téi kama avúavá ma varano seruna mai ída varé iyá uno. Inká namu avúavá ma ída varano seruna mai séi varé iyá uno. ²⁰ Baré iyá umpo séin ma ída sinunu ukhein avúavá ma varé iyaruna mai ída seyantá baré iyá uno sé iniyá umpo sen túpin ma vain ume anon baré iyan mino.

²¹ Máan tukháí séi onékun mai avúavá ano sentá dafikái séi kama avúavá ma varano van ékun maen namu ineine ano senti aa iyariyan ban mino. ²² Máan tiyákái séi Tiyarafenui man baya van pura sé te súkáké tinunu ukhé uno. ²³ *Máan tukhen mifo séi onékun umeí ákona ano sen túpin báken mai ano senti ineine vá aruvé iyan mino. Mai umeí ákona ma séin túpin para vain manoi maman bararasí uren miyan ma ída varan doran bantaí urá bá uno. ²⁴ Mai ume anon téin maman kákan umampin kaen mifo iye anó mai fintena séin tiya uren tiviranten nafino. ²⁵ *Tetisi Bafan Yisas Karaisin pinté ma uaren tiyaein nan mi Tiyarafenun tusu sianté uno.

Máan tukhein nan mi sesi ineine finté Tiyarafenui yoran bantaí ono van inikhé umpo yan bukhafei anunurái umeí miyan ída varan doran bantaí ukhé uno.

* 7:23: Kar 5:17; 1Pi 2:11 * 7:25: 1Ko 15:57

8

Kantá Aunan Táké Ma Aunan Bariyain Baya Ino

¹ Máan tukháí Yisas Karaisin má ma manafin túpá ukheruna nanin banta mai man baya ano ída kanaíen kó tisintanten mino. ² Mai fara vara seyo, Yisas Karaisin pinté uaren mi aunan ma amé iyan mai Kantá Aunani ákona anon ume ú purin núí ákona finte setin útúfen mino. ³ Man baya ano ume fintena ída kanaíen tetin tiya oren eimpin Tiyarafenu ano setin tiyaono van ena aa uvisen be Anin tiantan barará banta an daven eren mifo véi ída ume vain banta ino. Tiyarafenu ano mai aa sákéi setisi ume van be Anin tiantan daa unkamádantá e fúaren umei ákona ano ma setintá dafikaré ein mai aruan puren mino. ⁴ *Man baya ano ma fefá tikharé ein mai setimpin mo kanaí ino van mi mai avúavá baren mino. Máan tukháí saréa setí ída ume avúavá ánain dakhafiyá umpo Kantá Aunani avúavákái yakhafiyá tiféuno.

⁵ Bara ráke avúavá ánain ma yakhafiyain kékái ineine ano vara ráke avúava san mi iné iyan mifo Kantá Aunani avúavá ánain ma yakhafé iyain kékái ineine ano Kantá Aunan mano ma anunu ukhein mai ánain mi yakhafiyain mino. ⁶ Bara ráke avúavái anunu ánain ma yakhafin nain kéká ano furinten mifo Kantá Aunani anunu ánain ma yakhafin nain mai kéká ano ayun ma fara van aunan mamaren ará kusen banten mino. ⁷ Mai fara vara seyo, vara ráke avúava san ma anunuin manon Tiyarafenu namuroí uantiyáken ída veni man baya ánain dakhafé iyan mino. Máan tiyain ínaimpáké ída kanaíen beni man baya ánain dakhafinten mino. ⁸ Máan tukhantín mi vara ráke avúavái anunufin ma noin kéká ano Tiyarafenu ma amusín ukhein avúavá ída kanaíen baranten mino.

⁹ *Baranten mifo siretí ankan ída enádá bá bara ráke avúavápin no ono. Ída ino. Tiyarafenui Aunan ma siretí ankampin ma vantín mae mai sireti saréa Kantá Aunani avúavápin mi no ono. No ompo

Karaisini Aunan ma ída mantein kéká mai ída Karaisini kéká ifo afova sá ono. ¹⁰ *Ume avúavá ano siretin au aruan purinten mifo Karaisi ma fúaren e mantein manon Tiyarafenu avorá funtákein kékási ukha ono. Máan tukhen nan Yisas Karaisi ma siretimpin bain manon tiretin aú iyampon ayun para van mino. ¹¹ Tiyarafenui Aunan mano Yisas Karaisin masí pintena avían manten mino. Mai Aunan ma siretí ankampin ma vantí mai ma furin bukhaafin Aunani yorantá Tiyarafenu ano ayun ban aunan aminten mino.

Kantá Aunani Ákonafó Ma Mumunan Iyain Kayo Mai Tiyarafenu Akhafana Ino

¹² Mumunan tiyofi tifá tiváeyan noe, setí ankan auyen avúaváká ana vá nó tifano. Teti feyante arái avúaváká nono vara siya rauno. Ída ino. ¹³ *Tiretí ankan ma feyante arái avúavápin ma nonteya mai furin nompo Kantá Aunani ákonará ma minó aui namu avúavá ma aruan purinteya mai siretí ankan ayun ban aunan baran nono. ¹⁴ Minó nanin banta ano ma áin ma Tiyarafenui Aunan mano ma aviren oriyain mai Tiyarafenu akhafanan ban mino. ¹⁵ * *Mai Aunan ma Tiyarafenu ano amikhein mano ída siretin maman para yoran bantaí urantiya sireti evaráne akhokho van inono. Ída ino. Tiyarafenui Aunan mano siretin maman Tiyarafenu akhafanaíi iyan mino. Kantá Aunani ákonarái seti máa sé Tiyarafenu van aréiyá tiféuno. “Tifóe oe, Tifóe oe.” ¹⁶ *Mai veni Kantá Aunan mano setinti sú iyampon tisimí tiféi seti Tiyarafenu akháí vá uno sé iyá tiféuno. ¹⁷ Teti Tiyarafenu akhafanan bákun mai ma véi simeno van tisintákein daná ma setin tifá tiváe Karaisin ma amikhein mai kama yaná baranté tiféuno. Béi ma uman barein máan té ma saréa seti uman mantaré ínaimpá teti kákan bí mamaré ben má kama kumanirí onté tiféuno.

Ínaimpá Ma Kákan Bí Baran Nain Baya Ino

¹⁸ Ínaimpá ma Tiyarafenu ano setin kákan bí timin nain mano saréa ma

* **8:4:** Kar 5:16, 25 * **8:9:** 1Ko 3:16; 12:3 * **8:10:** Kar 2:20 * **8:13:** Kar 6:8; Kor 3:5 * **8:15:** Mak 14:36; 2Ti 1:7 * **8:15:** Kar 4:5-7; Rev 21:7 * **8:16:** 2Ko 1:22

seti variyaruna uman má ída manái inten mino. ¹⁹ Mai fara vara seyo, Tiyarafenu akhafanaí ma ukháin nain kéká ma maman afoká inain damu san mi véi ma uvantein danasinta ano ave ukhen mino. ²⁰ *Minó daná ma saréa ma váken ma namu ukhein maí yanasinta ída vei anunurá afoká ukhen mino. Ídaino. Tiyarafenu anon betin afoká uráken betin kama avúavá uantano van iyákan ave ukhen mino. ²¹ Ave ukhen ma fúaren pútaono van ma iyaréin nain uman pinta ma utúantantin Tiyarafenu akhafana vá ma kákan bí baran nain mai van mi ave ukhen mino.

²² Para vara seyo, Tiyarafenu ano ma uvantein danasinta ano mai ma anasi ano iyampon kaono van inamun nan ma aureiníen eriyán bá tetí ankan afová ukhé tiféuno. ²³ *Ída mai yanasinta ano ana aí bariyan berai siyan mifo setí arái in amusin ma Kantá Aunan timikhein kayo ano yeren mai uman pinta utútintano van mi verai siyá tiféuno. Máan turen Tiyarafenu ano ma setin auyen bukhafa simiren inká maman be akhafanaí suron ono van ma siádan bain damu san mi ave ukhé tiféuno. ²⁴ Tiyarafenu ano setin evaránen tivídái véi ma kama avúavasí usintano van ma sikhein nan mi setí ankan mumunan ukhé bérin ave iyá tiféuno. Mai fara vara seyo, fefá ma mantanuna yana san ída ave iyá bá tifanté uno. ²⁵ Máan tó tifanté umpo mai ma ída mantanuna yanasinta ma varano sé tifanté mai setí ankan tirá kusin má bákesá ave ó tifano.

²⁶ Máan ma ukhé tifékun mi Kantá Aunan mano setin uman pinta siya inten mino. Mai fara vara seyo, setí ankan ma simúkonuna yanasinta ma ída afová ukhekun maen mai Kantá Aunan mano setin tiyaen berai siyan Tiyarafenu amúkuan aminten mino. ²⁷ *Mai ma setin túpin afová ukhein Tiyarafenu anon Kantá Aunani inin afová ukhen mino. Mai fara vara seyo, Tiyarafenuí ineine ánain mi yakhafen Kantá Aunan manon tetí mumunan kéká ákonaen amúkusinté iyan mino.

²⁸ *Tiyarafenu ano ven nan ma anunu ukhein kéká ayaino van mi minó danápin

doriyái setí ankan afová ukhé tiféuno. Tiyarafenuí manáa ákona ineine vain nan mi mai kéká arakhen mino. ²⁹ *Para vara seyo, Tiyarafenu ano vei vanasí ma inain kéká ma maman be Anin an darantin ma mai nanin banta aváeni ma ve Anin mano inain mai véi fefái afová ukharen mino. ³⁰ Béi ma fefá aní ukharé ein kékái arakhen mino. Mai ma véi arakhein kéká san puntákein kéká ino sen araren mai kéká kákan bí aminten mino.

Mana Yaná Ano Ma Ída Kanaí En Tiyarafenuí Avábá Pinte Yo Siviran Nain Baya Ino

³¹ *Tiyarafenu ano ma kama avúavasí ukhein nan mai inte esá teti sé tifante rafuno. Tiyarafenu ano ma setin tiya ukhantín maen mai iye anó kanaíen tetin namuroí usintanten nafino. ³² Tiyarafenu ano ída ve Anin pákan tetin tiyaino van bérin tiantan eren mino. Be Anin ma setin timikhanten maen mai ídá ena yanasinta vá dere fara siminten nafino.

³³ *Tiyarafenu ano ma setin maman bei náí ma urantí bá tifékun maen mai iye anó tetin kó tisintanten nafino. Ída ino. Tiyarafenu ano veyantái setin nan puntákein nanin banta e sen tarakhen mino. ³⁴ Iye anó teti nan ume ayá namu miyan barano sinten nafino. Ída ino. Yisas Karaisi fúaren e mantavin Tiyarafenu ano véin kákan bí amiran ben ayan kuompá báken tetin tiyaino van Tiyarafenu síamiyan mino.

³⁵ Karaisini avábá pinte náí yaná anó tetin do sivranten nafino. Aau anó tetimpin afoká inten nafi uman nafi vanta kayo anó tetin namu usintanten nafi sirafan nará ótifante rafu ída ma suí daná ban nain mano fi áa namu yaná anó tetin namu inten nafi áa furin nan ma akhokho van in mano fi mai minó máa yanasinta ano kaná Karaisini avábá pinta yo sivranten nafino. ³⁶ Mai yanasinta ma setimpin ma afoká é iyain mai Tiyarafenuí vompon dóki ano máa sikhán mino.

“Tetí ankan eni vanasin bákun ena ena yamú tetin tiruan puriyan mino.

Sipisipi an den tetin timen tíkano van manan iyan mino.” *Íbo 44:22*

* 8:20: Esé 3:17-19 * 8:23: 2Ko 5:2-4 * 8:27: Íbo 139:1 * 8:28: Efe 1:11 * 8:29: Kor 1:18; Ibu 1:6
* 8:31: Íbo 118:6 * 8:33: Ais 50:8-9

³⁷ Máan tukhé tifé umpo mai yanasinta afoká inten mifo mai ma Karaisi ano setin nan avábá iyain mai véi anon tiyaintí mai yanasinta esantanté uno. ³⁸ Ída mana yaná ano kaníen beni avábá pintena setin do sivranten mino. Purin má ayun ma fara van mano fi áa enisori kayo vá namu aunan má ano fi áa saréa ma afoká ukhein danasinta vá ínainpá ma afoká inain danasinta vá ano fi áa minó ákona vain ara ara yanasinta vá ano fi mai yanasinta ano ída kanaíen Tiyarafenui avábá pintena setin do sivranten mino. ³⁹ Tetí ankan dan uron ná un bá tifante rafu áa un nompin námen ná orun bá tifante rafu mai Tiyarafenu ano ma uvamádan bain mai yanasinta ano ída kanaíen tetisi Bafan Yisas Karaisin táké ma Tiyarafenu ano aní ukhein avábá pintena seti yo sivranten mino.

9

Tiyarafenu Ano Ma Isareri Kéká Aní Ukhein Baya Ino

¹ Téi Karaisini yoran bantan bákun Kantá Aunan mano se súpin báken ineine simiyái ída kampun tin téi fura vaya anan tiyá uno. ² Ena ena yamú te súpin kákan tirunan ná édaviyáká kokhon ineine anan iyá báé iyá uno. ³ *Isareri kéká ma se siyofi sifá tiváeyan ma vain mai Tiyarafenu ano evaránen avirano van mi iniyá uno. Téi ma Karaisin pinte yo sisintan nain mano ma vetin ayairí ma ukhantin mai kasaen téin tisintano van mino. ⁴ *Betí ankan Isareri nanin bantan bákun mi Tiyarafenu ano vetin nan be akhafana e sikhen mino. Tiyarafenu ano vei kakhan má ákona vá betin aní uren betí ankan má ará manafin kasen ban avúavái aníen bei man baya amen mino. Amiren monó tin avúavá betin aní uantáden kama yaná iyáantan ban mino. ⁵ Pefá betí anafu aráo ano Tiyarafenui yorampin aví bain nanin bantan baré íkan mi Karaisi ano vetí kékápin mi vantaíen mino. Karaisi véi Tiyarafenui bákun minó danáká dafíken mifo ena ena yamusá ben aví daní ó tifano. Mai fura ino.

Tiyarafenu Ma Iyáantan Daná Ma Varé Iyain Mai Vei Anunurái Amé Iyan Mino

⁶ Tiyarafenu ano ma Abaraamun iyáantákaré ein baya ano ída fa savifá afe en mino. Ída ino. Para vara seyo, Yekopun ana akhá pinté ma e afoká iyain kéká ano seti Isareri kéká uno siyan mifo ída fura sen Tiyarafenui mumunan ukhein mino. ⁷ Abaraamun pinté ma ayuman ukhein nan mi véin ana akhafanan bá uno siyan mifo vetí ankan ída fura sen ben ana akhafanan ban mino. Para vara seyo, Tiyarafenu ano fefá Abaraamun máa sen tiamikharemí, “Kokhon iyampon kaesin banten mifo Aisakin pinté ma ayuman inain nanin banta mai senti kékái vanten mino.” *Esé 21:12*

⁸ *Mai vayai ana máan mi ukhein mino. Abaraamuni nare ráké ma afoká ukhein mai iyampon kéká pinté manáa anon Tiyarafenu akhafanaí ukhein mifo Tiyarafenu ano ma iyáantantá ma mumunan in avúavá káké ma afoká ukhein mai kéká san mi Abaraamuni kéká se siyan mino. ⁹ Mai van mi Tiyarafenu ano máa sen iyáan temí, “Mai ma sikará onuna yamú ma séi ovaráné erékun maen Sara ain iyampon kainten mino.” *Esé 18:10, 14*

¹⁰ Mai ma sikharé ein iyampon teti sinafu Aisakin mi kain baren e anoní uaren Revekan mamáken ain iyampon kanan karina kaen mino. ¹¹⁻¹² Reveka karina iyampon kanan kauran maen Tiyarafenu ano míkani kama avúavá bá namu avúavá bákasa ódaren aníen naino. Ída ino. Tiyarafenu ano vei anunurái mana aníen mino. Béi fe o útúben Revekan tiamikharen mino. “Esé ma ká inain iyampon mano inain ma afoká inain iyamponi yoran bantaíi inten mino.” *Esé 25:23*

Mai ma siamikhareín ma afoká ein avúavá ano Tiyarafenui ineine ánain mi vákuren mifo seti ma kama yoran má namu yoran má ma varyiarunara saino. Ída ino. ¹³ Tiyarafenui vompon dóki ano máa sikhen mino. “Téi Yekopun nan mi sinunu iyá umpo Iso nan ída sinunu iyá uno.” *Mar 1:2-3*

* 9:3: Eks 32:32

* 9:4: Eks 4:22; Riv 1–10; Íbo 147:19; Rom 15:8; Ibu 9:5

* 9:8: Kar 4:23

14 Mai van Tiyarafenu ano ída funtákein avúavasí iyan minó té tifante rafuno. Ída ino. 15 Mai fara vara seyo, Tiyarafenu ano Mosesin pefá tiamikharen mino, “Téi mana vanta ma sirunan uantano van tesi sinunurái máan té iyá uno.

Inká téi mana vanta ma avábá uantano van tesi sinunurái máan té iyá uno.” *Eks 33:19*

16 *Máan tukhan mi Tiyarafenu ano ma iyáantan daná ma varé iyain mai ída vanasii anunura safi yoranta safi varé iyan mino. Ída ino. Tiyarafenu ano vei anunurái amé iyan mino. 17 Para vara seyo, vompon dókifin Tiyarafenu ano ena vaya máa sen Kin Feron tiamikharen mino. “Éin ma maman kiní uréku vaona mai sesi kákan ákona éintá aní urékun ten tiví ano ma varará orera ino van muno.” *Eks 9:16*

18 Máan tukhanti seti afoya sá ó tifano. Tiyarafenu ano manáa kéká ma arunan uantano van mai vetin arunan uanté iyan mino. Inká béi ma manáa kékái ineinerá ma yasirádantin baya ída inino van ma é iyain mai vei anunu fóké máan té iyan mino.

19 Tiretí ankan pinté manáa ano máa sin nono. “Tiyarafenu ano veyantá ma yuvun intin banasi ano namu avúavá bariyan nain nan mai fará tenti vaya ída iniyá uno sen béi sinten nafino.”

20 Ída vá máan baya seno. Éi varará banta ano iyé bakeyá Tiyarafenu ano ma vara nain avúava san asinte fono. Kave ano kanaisá en ná ben ma uvarein banta van ten ná, “Éi fará téin máan uvararí e fono” *Ais 29:16; 45:9*

21 *Kave uvaran banta ano ma kankanen kave uváden maen mana kaverá kamaen bompon uren mai kave kama yorarí in kaen inká ena kave fara ena yorarí in uvaman kaen é iyan mino. Mai avúavá ano ídá puntáken nafino.

22 Tiyarafenu ano véimpin ákona vantin pasen banasi yaiminten mino. Máan tinten mifo inká beimpin ákona vantin kasaen mai ma veni vaya átakharé inain kéká ave ukharen ínaimpákéi yaíden uman aminten mino. 23 Mai fara va ino véimpin ákona van bei arunanápin ma

aviádantin bano ma sikhein nanin banta vá deren bei kakhan aní intin onanten mino. 24 Tiyarafenu ano ma sen Yutan kéká bá ena anan nanin banta kayo vái arakhé uno ma siyain mai setin nan mi siyan mino.

25 Sakhanampa vanta Oseani vompon dókifin Tiyarafenu ano ena anan nanin banta kayo van máa sikhen mino.

“Mai ma fefá ída senti vanasi varé ein mai ínaimpáké tesi vanasi oe sé aranté uno.

Inká mai ma ída sinunu iyaréeruna kéká ínaimpáké móeké tinunu ukheruna kéká ino senté uno.” *Ose 2:23*

26 Inká ena anafin máa sikhen mino.

“Ída senti vanasi ono’ ma sikharé inain kéká san ínaimpáké ‘taunan bain Tiyarafenu sikhafana ono’ sinten mino.” *Ose 1:10*

27 Isareri kéká san Aisaiya iniyáken ovaraaren temí,

“Isareri nanin banta ano kokhonien non akhempá ma vain eyu an ma yesin maen

Bafan mano manáa nanin banta anan aviranten mino.

28 Para vara seyo, Bafan mano varará nanin banta ainen mi kó tiantáden uman aminten mino.” *Ais 10:22-23*

29 Inká ena anafin Aisaiya máa sikhen mino.

“Minó ákona ma vain Bafan mano setin tinafu siráon manáa ída áen baren

mai Sodomu vá Komora vá ma einien minó tiruan kipanté ein mino.” *Ais 1:9*

Isareri Kéká Ma Ída Mumunan Ein Baya Ino

30 Mai avúava san tetí ankan inte esá tente rafuno. Máan ná té tifano. Ena anan nanin banta ano Tiyarafenu van ída yosiyen mifo vetii mumunantá Tiyarafenu avorá puntákein nanin bantan ban mino.

31 Ban mifo Yutan kéká ano man baya ánain dakhádé puntákein nanin bantaí ono van en mifo ída kanaíen mai avúavá baran nainien mino. 32 Mai fara fino. Mumunan ma uren Tiyarafenu avorá puntákein nanin bantaí oren mi man baya

* 9:16: Efe 2:8 * 9:21: Yer 18:6

ánain dakhafiyá kama avúavá baranté uno sen inikharen mino. Máa sen inikhan betimpin ída mumunan bakan mai ano kákan onámaná ma aasá bainí ukharéin eyúpóen ankamen mino. ³³ *Tiyarafenui vompon dóki ano mai van mi afova amikharen mino.

“Ineno. Banasi ano ma eyúpó en ma eraven ankamin nain onámaná Yerusaremí kaonté uno. *Ais 8:14*

Mai onámanáká ma mumunan inain nanin banta ano ída ayave van inten mino.” *Ais 28:16*

10

Isareri Kéká Ano Ma Tiyarafenui Avúavá Ída Afová Ukhein Baya Ino

¹ Mumunan tiyofi sífá tiváeyan noe, Tiyarafenu ano Isareri kayo aya uren evaránen avirano van mi sen tú ano vetin nan moéken anunu iyákái Tiyarafenu vaípá timúkuan amé iyá uno. ² Téi afová ukhékun Tiyarafenu ma anunu ukhein avúavá ánain dakhafiyá uno siyan mifo véin ánain ma yakhafin mai avúavá betí ída afová ukhen mino. ³ Mai fara vara seyo, Tiyarafenu ano ma vetin maman puntákein nanin bantaí ma in aa ída afová ukhen mino. Man baya ánain ma yakhafin avúavúpókéi Tiyarafenu avorá puntákein nanin bantaí onté uno siyan mifo Tiyarafenui funtákein ine inerá ída oriyan mino. ⁴ Mosesini man baya inka Karaisi me kanaí ukhein minó nanin banta ano ma mumunan inteýa mai Tiyarafenu avorá puntákein nanin bantaí inono.

Mumunan Nanin Bantan Ma Tiyarafenu Evaránen Aviran Nain Baya Ino

⁵ “Minó man baya ánain ma yakhafin nain nanin banta anon Tiyarafenu avorá puntákein nanin bantaí inten mino” sen Mosesi vompompin uvantaren mino. *Riv 18:5*

⁶ Máa sikhen mifo Tiyarafenu avorá ma funtákein nanin bantaí inain nan máa sikhemí, Yisas Karaisi aya ino van “ída kanaí e inaru fáke un avire eran nono.” *Diu 30:12*

⁷ Inká máa sikhemí, “Yisas Karaisin evaráne avían mantano van ída kanaí e furin nanin bantai varufin aravin nono.”

Diu 30:13

⁸ Yisas Karaisintá ma mumunan esin Tiyarafenu ano siretin evaránen aviran nain nan bompon dóki ano máa sikhen mi, “Mai vaya ano yákó bákayai kasae vanasi siamiyan nan tiretin aúpin ban mino.” *Diu 30:14*

Mai vaya anan teti siamiyá uno. ⁹ Mai fara vara seyo, siretin pinté mana ano ma Yisasi nan Bafan mino sireya ma Tiyarafenu ano masí pintena véin avían mantakhen mino seya aúkáké mumunan inteýa mai Tiyarafenu ano éin evaránen aviranten mino. ¹⁰ Mai fara vara seyo, setí túkáké ma mumunan iyarunarái Tiyarafenu ano setin nan puntákein nanin banta e sé iyan mino. Máa sé iyan mifo inká too fóké ma setisi mumunan tian amá iyarunarái Tiyarafenu ano setin evaránen tiviranten mino. ¹¹ Tiyarafenui vompon dóki ano mai van máa sikhen mino. “Béintá ma mumunan inain kéká ano ída ayave van inten mino.” *Ais 28:16*

¹² *Yutan kayo vá Kiriki kayo vá mai manaí anan ukhan betíi Bafan mana anan bakan mi vetí ankan ma inantein danasinta manaí uren amé iyan mino ¹³ Mai fara vara seyo, “Bafan aví ma aran nain nanin banta mai véi aya uren betín evaránen aviranten mino.” *Yoe 2:32*

¹⁴ Aviranten mifo vetí ankan ma ída véin nan mumunan iyáken intesá urená ayain nan be vaípá inantinten nafino. Beti ankan ída ma veni vaya inikhen mai intesá uren ná bentá mumunan inten nafino. Mana ano ma vetin ída vaya siamintin maen mai veti intesá uren ná beni vaya ininten nafino. ¹⁵ Baya siamino van ma ída vanta siantantin mai inté uren ná baya siaminten nafino. Tiyarafenui vompon dóki ano máa sikhen mino. “Kama vaya ma varen eriyain kéká ano setin mi simusin timiádiyan mino.” *Ais 52:7*

Isareri Nanin Banta Ano Tiyarafenui Kama Vaya Kayo Iniyan Mifo Mairá Ída Mumunan Éiyan Mino

* **9:33:** 1Pi 2:6 * **10:12:** Apo 15:9

16 Timiyan mifo ída minó nanin banta ano mai kama vaya inikhen mino. Mai fara vara seyo, Aisaiya máa sikharen mino. “Bafan noe, setí ankan ma vetin tiamiyaruna vayará iye anó mumunan ukhen nafino.” *Ais 53:1*

17 Karaisini kama vaya ma inin avúavá anon mumunan afoká é iyan mino.

18 Máan tukhen mifo Yutan kayo ano fura sen ná mai vaya inikhen nafino. Eyo inka inikhen mino.

“Tiyarafenu ano ma minó danasinta uvan-tein baya ano

inka minó nanin bantafin oriaren mai vaya ano minó barafá orera ukhen mino.” *Íbo 19:4*

19 Orera ukhen mifo mai fura sen ná Isareri nanin banta ano minó bayai ana afova suren ukhen nafino. Eyo mai fura sen betí ankan afova suren ukhen mino. Para vara seyo, Mosesini yamú dere Tiyarafenu ano máa sikharen mino.

“Ena vara fákena ída aví bain nanin banta séi avábá uantanuna van tiretin ará uman daantan nono.

Inká ena anan nanin banta ma ída afova vain kayo ma avábá uantanuna van tiretí ankan betin aranan uantan nono.” *Diu 32:21*

20 Máa siran ínaimpáké Aisaiya ano Tiyarafenu van máa semí,

“Téin nan ma ída yosiyaré ein kéká avorá inka yákó é uno.

Téin nan ma ída iniyá ein kékápin inka seyan aní é uno.” *Ais 65:1*

21 Máa sikharen mi Isareri nanin banta van iniren Tiyarafenu ano semí,

“Minó damú betin ariyá kun mifo senti vaya átakharé uren ten toofá do yuriyan mino.” *Ais 65:2*

11

Tiyarafenu Ma Isareri Nanin Banta Arunan Uantein Baya Ino

1 *Tiyarafenu ano Isareri kayo me oyan amikhará téi siya rafuno. Ída uron mino. Téi Abaramun pinté ma ayuman ukhein Bensamenin anan bantan báke Yutan bantai vá umpo afova sá ono.

2 Máan tukhékun Tiyarafenu ano fefá arái in táké ma veinaí ukhein nanin banta ída me ampikhein mino. Mai van ma vompon dóki ano sikhein tireti ídá afová ukhe fono. Sakhanampa vanta Iraiya ano Isareri nanin banta ayaino van Tiyarafenu vaipá ákonæen máa sikharen mino.

3 “Bafan noe, eni sakhanampa vanta kéká minó aruan púden éin ma íkun uan amin kará kayo vá dere varakuariyan karúdará teya anan ukhékun téin má tirono van dakhafiyá uno.” *1Ki 19:10, 14*

4 Máa síkan Tiyarafenu ano ma evaránen béin tiamein mai vaya afová ukhe fono. Tiyarafenu ano semí, “Éi ída eyaká ana vaono. Dan manápá ifo afápá kan un kádan tauseni (7,000) ano ma kampun ayarafenu rá ída monó tiyain kayo vá deren para van mino.” *1Ki 19:18*

5 Máan tukhan taréa minó Yutan kayo vá dere Tiyarafenu me ampikhen naino. Mai ma Tiyarafenu ano sarisari uren avíkaré ein nan manáa ano fara van mino.

6 *Máan tukhan betíi yorantasá avíken naino. Tiyarafenu ano vei sarisari rái avíken mino. Betíi dorantá ma avíkan tin maen Tiyarafenui sarisari ano ída fura yanasíi inten mino. 7 Máan tukhen mifo mai seti inte esá té tifante rafuno. Isareri kéká ano mai yaná barano van ákona yorari uvákon den mifo ída varan nainien mino. Betíi kéká pintena mai ma Tiyarafenu aní uran ben ninaí ukharé ein máa anon baren mifo minó kayoi ineinerá dasirákaren mino. 8 Tiyarafenui vompon dóki ano máa sikharein mino.

“Tiyarafenu ano vetin maman purin banta an daran aunká bakhen

eriyaren taréa vetin aurá iyádan ída onariin

átaren dasíkan ída vaya iniyan mino.” *Diu 29:4; Ais 29:10*

9 Devitin má dere máa sikharen mino.

“Áesin ná beti ma omasí inain mano man betíi oyivan an davintin ná anuran ariyan nain nan kana vá uno vá tino.

Áesin ná mai amusin mano sin nainien uman barano.

* **11:1:** 1Sa 12:22; Íbo 94:14; Fir 3:5 * **11:6:** Kar 3:18

10 Áesin ná betin auu yufúkuvintin ída vá onano.

Áesin ná uman mano amininá ódiven ayorun davénarantin ná mátinten bano.” *Íbo 69:22-23*

Ena Anan Nanin Banta Ano Afá Orifi Yaa An Dakhá In Ma Tiyarafenu Ano O Iyaaren Ayun Táke Orifi Yaará Ma Asótu Ein An Dakhein Baya Ino

11 *Máa síkhen mifo mai fura sen ná Isareri nanin banta ano eraven ankanten ídá evaránen e mantanten nafino. Ída uron mino. Betí ankan ma Tiyarafenu oyan amiyain nan mi Tiyarafenu ano ena anan kéká evaránen avídantin Isareri kayo ano ódaren tetin mana sivirano van munó siren aranan ino van mino. 12 Isareri kéká ano ma Tiyarafenu oyan amiran mai van mi ena anan nanin bantafin Tiyarafenu ano avábá amikhen mifo ínaimpáké Isareri kéká ano ma Tiyarafenu vaípá ovaránen erintin maen minó nanin bantafin beni avábá ano mo kákani suron inten mino.

13 Mai van mi siretíena anan nanin banta ma vaona van mi séi siyá uno. Ena anan nanin bantafin baya varen orino van ma Tiyarafenu ano séin aní ukhein mai kákan doran uron mino. 14 Mai fara vara seyo, Tiyarafenu ano ma sireti ena anan nanin banta kama avúavá uantán nain mano Isareri kayo auu yavo sintin Tiyarafenu ano senti yorantá betin pinte manáa ovaránen avirano van munó.

15 Mai fara va ino. Tiyarafenu ano Isareri nanin banta oyan amiren mai van mi sireti ena anan nanin banta avíden avábá uanten mino. Máan ten mifo Yutan kayo ano ma Tiyarafenu vaípá ovaránen erinten maen mai fúkaren ma e manteiníi intin Tiyarafenu ano vetin moéken avábá inten mino. 16 Abaraamu má Isareri kayo ma ayuman in banta kéká bá ano ma kantasí ukhantin maen mai vetin ana akhafana vá ano yeren kantasí inten mino. Inká daa arú kayo ano ma kama ukhantin maen mai yaa ayan kayo vá ano yeren mo kama inten mino.

17 *Máan tukhan maen Isareri kéká ano mai ayuntáke orifi yaa ana an mi yakhá en nan mi Tiyarafenu ano manáa ayan iyaren do varen mino. Do máden inká

tireti ena anan nanin banta ano mai afá orifi yaa an mi yakhá en nan Tiyarafenu ano o iyaaren ayuntáke orifi yará ma asótu einien mino. Máan turai saréa siretí ankan ayuntáke orifi ayan ma einí uveyan mai yaa fintena anu variyákeya ana variya vaono. 18 Máan tukha ompo ída vá mai ma iyaan karúdakhein ayan kayo van esantakhé uno se ineno. Tireti ma máan ineine ma iyanteya mai sireti afova sá ono. Ída yaa ayan mano arúpin anu aminten mifo yaa arú anoi yaa ayampin anu aminten mino.

19 Amé iyan mifo siretí ankan ída vá teya “Tiyarafenu ano mai ayan kayo síkaran bain téin maifin asotú inten mino” sire avan avan ono. 20 Mai fura máan tin nompo Yutan kayo ano ma ída mumunan ein nan mi Tiyarafenu ano yo síkaan karúdakhen mino. Tiretí ankan ma mumunan eona van mi maifin man asotú ura va ompo ída vá avan avan iyákeya siretin ma Tiyarafenu ano yo síkaan karúdan nain mai vará perano. 21 Para vara seyo, Tiyarafenu ano fefá ma varé ein daa ayan ma yo síkakhanti mae mai siretí ankan má dere yo síkanten mino.

22 *Máan tinten mifo Tiyarafenu ano kamaen avábá iyáken inká ákonæen baya siyan é iyan mifo afova sá ono. Mai ma Tiyarafenu oyan amé iyain kéká béi auufen kakháben ákona vaya sé iyan mifo véin nan ma anunu ein kéká béi avové uren kama uanté iyan mino. Tireti ma véin purase oyan amesin maen béin má deren tiretin oyan aminten mino. 23 Mai ma fefá daa ayan kayo ma sikakharé ein mai Yutan kéká san mi sikhein mai veti ma mumunan intin maen Tiyarafenufin ákona vantin kasaen evaránen maman mai ma síkakhareéimpin asotú inten mino. 24 Tiretí ankan afová ukha ono. Tireti fefá afá orifi yaa ayan an mi yakharé en nan Tiyarafenu ano síkaren ayuntáke orifi yaa anará mo asotú ura vaompo mai ída éi mai finte yaa ayan uron mono. Máan tukhantin pasen Tiyarafenu ano kasaen mai ma yo síkan karúdakharé ein ayan evaránen maman asotú inten mino.

* 11:11: Apo 13:46 * 11:17: Efe 2:11-19 * 11:22: Yon 15:2, 4

Tiyarafenui Arunaná Mai Minó Nanin Banta Ina Ino

²⁵ Ena anan nanin banta ma mumunan iyaona kéka soe, aúpa baya sireti afová ono van muno. Ída vá teya Tiyarafenu ano Isareri nanin banta inka me oyan amiren teti nan mana iniyá uno sire au khákan ono. Manáa Isareri kékái ará bá ineine vá ano ákona ukhen bantin ma ena anan nanin banta kayo ano mumunan en maifin mun asótú uvintin mi máan tinten mino. ²⁶ *Mai aa sákéi minó Isareri kayo evaránen avirantéin mi Tiyarafenui vompon dóki ano máa sikhén mino.

“Isareri kéká ma aya ino van ave ukharé ein banta ano Yerusaremíké eman-ten eren me ayaintin

Isareri kéká ano ma Tiyarafenu oofá átakharé iyá ein avúavá me an pin-ten mino. *Ais*
59:20-21

²⁷ Ampirantí maí damúí séi vetíi ume arúantádé tirá manafiní é kasé banté uno.” *Yer*
31:33-34

²⁸ Isareri kayo ano Yisasini kama vaya oyan amiran mai anon Tiyarafenu vá namuroíen mino. Namuroí ein nan mi Tiyarafenu ano vei avábá po ena anan nanin banta ayaen mino. Ayaen mifo fefá ma Abaraamun ana akhápin ma iyáan takharé ein nan mi Tiyarafenu ano veinaí ukhein bákan taréa vetin nan para anunu ukhen mino. ²⁹ Mai fara vara seyo, Tiyarafenu ano ma veinaí ono siren aren ma inká bei amusin amen ma uran nain daná ída evaránen do varanten mino. ³⁰ Pefá tiretí ankan Tiyarafenui vaya átakharé iyare ompo saréa Isareri kéká ano ma vaya átakharé iyain mai anarái Tiyarafenu ano siretin tarisari uanten mino. ³¹ Mai ma fefá baya átakharé iyá eonaíen mi saréa Isareri kéká ano Tiyarafenui vaya átakharé íkan mai van mi siretin tarisari uanten mifo maná damusí ma intin maen betin má deren Tiyarafenui sarisari varanten mino. ³² Minó nanin banta ano vaya átakharé uran mi Tiyarafenu ano vei sarisari aní ono van mi vetíi ume avúava san karavusíi uádan baren mino.

* **11:26:** Ais 27:9 * **11:33:** Ais 55:8-9 * **11:34:** 1Ko 2:16 * **11:36:** 1Ko 8:6 * **12:1:** Rom 6:11, 13; 1Pi 2:5
* **12:3:** 1Ko 12:11; Efe 4:7; Fir 2:3

Pori Ma Tiyarafenu Aví Daní Ein Baya

Ino

³³ *Ódoo. Onano, ven nina yanasinta vá afova vá ineine vá ma moékakhein Tiyarafenu ma vain nee.

Onano, véi ma ineine uren bariyain avúavá
mai seti ída kanaíé afová ó tifanté uno.

³⁴ *“Iye anó Tiyarafenu ma ineine iyain afová inte fono.

Inká iye anó kanaíeya véin ineine am-
inte fono.” *Ais*
40:13

³⁵ “Iye naré Tiyarafenu mana yaná amiresin ná anona éin ovaránen aminten nafino.” *Yop* *41:11*

³⁶ *Para vara seyo, Tiyarafenu anon minó daná uvamá daran beni ákonará báken mai yanasinta ano véin kákan bí amiyán mino. Béin avisá ena ena yaní ono. Mai fura ino.

12

Minó E Au Ma Tiyarafenui Íkun Uan Amin Baya Ino

¹ *Máan tukhein nan ma sireti mumunan nanin banta ano ma Tiyarafenui arunana san ma ovare me iniyaona kayo oe, minó bukhafa vá Tiyarafenui ma íkun uan amiyain an deya vá ameno. Máan ma inteyan beni vanasíi esin Tiyarafenu ano moéken amusin inten mino. Tiretí ankan ma máan tinteya mai fura seyan Tiyarafenui monó tin nono. ² Tiretí ankan ída vá ma vara ráke avúavá ánain dakhafiyákeya áesin ná Tiyarafenu ano siretíi ineine maman auyení uranti vá puntákein avúavá basá nono. Máan ma urantiyan inte yanasá Tiyarafenu avorá kama ukhan ná ben ma amusin amin avúavá ban ná puntákanti varano van béi inikhen nafi mai afová inono.

Tiyarafenu Ano Ma Setin Ara Ara Yorarí In Amusin Timikhein Baya Ino

³ *Tiyarafenu ano vei sarisari fóí séin aní uren bei yorarí ino sikhái siretin tiamiyá uno. Tiretí ankan ída vá teya setisi sivútivá ano ena kéká esantakhen

mino seno. Tiretí ineine yaídeya afová ure vá tiretí mumunantá ma Tiyarafenu ano amikhein doran ná puntáde yorano. ⁴ *Tetisi minó bukhafa ano ída mana yorarí ana é iyan mifo mana mana vukhafa ano veyan ara ara yorarí i é iyan mino. ⁵ Máan manan é tetí minó ano Karaisini mana mana vukhafa an mi yakhé tiféi ara ara yorarí ó tifanté uno. Karaisin má mana vukhafaí ma ukhantesá ben aya ven aya é dorá tifano.

⁶ *Tiyarafenu ano setin ara ara yorarín amusin paran timikhen mino. Máan tukhanti ma sakhanampa vaya sin afova éin amikhantiya mai ei mumunantasá Tiyarafenu ano ma siamin nain baya seno. ⁷ Inká banasi ayain afova ma éin Tiyarafenu ano amikhantiya mai kama ure vá banasi aya ono. Inká arú dorarín afova ma éin Tiyarafenu ano amikhantiya mai kama ure vá afova ameno. ⁸ Inká ará bá ineine vá ákona uantan afova ma amikhantiya mai yorarisá ono. Inká ona avaríin doran ma amikhantiya mai aúkake sá avarí ono. Inká Tiyarafenu ano ma yafisin doran ma amikhantiya mai fura yorarisá ono. Inká éin ma ena sarisari in doran ma amikhantiya mai amusin iya vá dorano.

Ena Ma Avábá Uantan Baya Ino

⁹ Ena nanin banta ma avábá ono van pura se aúkake sá avábá ono. Namu avúavá oyan amireya funtákein avúava sá pákaan ákona ono. ¹⁰ *Tireti ankan Tiyarafenui vanasi vá ara amireya e afá aváeyan ma avábá iyaonai sá ono. Tiretí ankan eyan maman bararasí ure vá ena aví ana vá daní ono. ¹¹ Tiretí ankan ída vá avesara yorarí iyákeya avúavá basá Bafani yorarí ono. ¹² *Mai ma Tiyarafenu ano ma kama uantano van ma iyain nará amusin iya ave ukhe vá bano. Uman ma siretimpin afoká iyantiya mantaan ákona ukhe vá amúkiya vano. ¹³ *Tiyarafenui vanasi ano ma mana yana san ma o afasí intiya mai vetin ná aya ono. Ena varu fáke

nanin banta ano ma sireti vaonará ma erintiya mai vetin ná kama ure yafiseno.

¹⁴ *Mumunan inona van ma vanasi ano ma siretin namu uantantiya ída vá aranan uantiyákeya Tiyarafenu vaipá amúkesin ná betin avábá ino. ¹⁵ Amusin ma inain nanin banta vasá manafin amusin ono. Inká arunaná ma varan nain nanin banta vasá tireti manafin arunan ono. ¹⁶ *Tiretí ankan banasi vá manafin ná amun amun iya vano. Tiretí ankan ída vá téimpin mana afova vá uno sire kákan banta an diyákeya fara nanin banta vasá manafin bano.

¹⁷ *Tiretí ankan ma namu avúavá uantantiya mai ída vá anona evaráne vetin namu uantano. Ída ino. Minó nanin banta ano ma siretin kama ineine uantaren avúavasá ena ena yamú barano. ¹⁸ Minó nanin banta vá ma ará manafiní uren ma kusen ban aa vará ákona e yoseno. ¹⁹ *Te sirona kayo oe, siretin ma namu uantantiya anona ída vá evaráne vetin namu uantano van iyákeya Tiyarafenui ayampin ná ampiádano. Mai fara vara seyo, Bafan mano vei vompon dókifin máa sikhen mino.

“Namu uantan ayá ma amin mai senti yoran mino.

Namu ma uantein ayá téi vetin afova amenté uno.” *Diu 32:35*

²⁰ *Máan tonté umpo mai ma vompon dóki ano sikheinisá ono.

“Namuro kéká ano ma arafan nan intiya yunan ná betin ameno.

Inká non nan ma intiya non ná dán ameno.

Tireti ma máan tesin maen betí ma namu avúavá bariyá ein nan ayave inten mino.” *Pro 25:21-22*

²¹ Ída vá ásin namu avúavá ano siretin maman bararasí ino. Kama avúavá posá namu avúavá maman bararasí ono.

13

Kamanini Ará Naópá Ma Van Baya Ino

¹ *Minó nanin banta ano vá kamanini aránaopa sá bano. Para vara seyo, Tiyarafenu anon kamanin doran kain bakan béi anan minó kamanin ákona amikhan doriyan mino. ² Máan tukhanti kamanini

* **12:4:** 1Ko 12:12, 27 * **12:6:** 1Ko 12:4-11; 1Pi 4:10-11 * **12:10:** 1Pi 1:22 * **12:12:** 1Te 5:16-18 * **12:13:** Ibu 13:2 * **12:14:** Mat 5:44; 1Ko 4:12 * **12:16:** Pro 3:7 * **12:17:** 1Te 5:15 * **12:19:** Mat 5:39 * **12:20:** Mat 5:44 * **13:1:** Pro 8:15; Tai 3:1 * **13:3:** 1Pi 2:13-14

man baya ma ída inin nain kéká ano mai Tiyarafenui vayan átakharé iyain ínaimpáké uman baranten mino. ³ *Para vara seyo, kama avúavá ma variyain kékasa kamani ano akhokho amen novara ino. Mai ma namu avúavá ma variyain kékái akhokho ameno van mino. Máan tinten mifo kamanin mano ma inikhein avúavá ana ma yakhafinteya mai kama iya ono siren amo sinten mino. ⁴ Tiretí ankan ayaintiya kama e vano van mi Tiyarafenu ano kamanin kain ban mifo sireti ma namu avúavá bariyá inte veni miyan baran nampo vá perano. Namu avúavá ma uran nain ma yaíden evaránen miyan amin nain mai anarái Tiyarafenu ano kamanin ákona amiren kain ban mino. ⁵ Máan tukhanti vá kamanini aránaópá báke vá namu avúavá bá kama avúavá bá oman afová iyákeya aau ma varan nará perano.

⁶ *Kamanin ma siretí ankan takisi amesin maen beni yoran kéká ano miyan bariyáken mi Tiyarafenu ano ma amikhein dorantá ákonaen dafisinten mino. ⁷ Tiretí ankan nan ma yorano sikhian nain doran purase vá dorano. Tireti ma ye nan bain danasinta vá inká enafáke ma ovariyaona yanasintará bá ma kamani ano ma sakisi van inantintiya mai kasae vá ameno. Inká tiretí ankan kamanini aránaópá báke vá kama avúavasá aní ono.

Ena Van Ma Anunu In Avúavá Ano Ma Tiyarafenui Man Baya Mo Kanaí Inain Baya Ino

⁸ *Ena ina yanasinta ma mantare anona evaráne amin nampo ena ma avábá in avúavá ano fara vá ban oriyan bano. Para vara seyo, ena ma avábá iyain avúavá anon Tiyarafenui man bayan kanaí iyan mino. ⁹ *Tiyarafenui man baya ano máan mi sikhian mino.

“Ída vá pamúkuí eya”

inká “ída vá ena aruan pureya” inká

“ída vá ena ina yanasinta umoyan bareya” inká

* **13:6:** Mat 22:21 * **13:8:** Mat 22:39-40; Yem 2:8 * **13:9:** Diu 5:17-19, 21 * **13:10:** 1Ko 13:4-7 * **13:11:** Efe 5:14; 1Te 5:6-7 * **13:12:** 1Yn 2:8 * **13:13:** Ruk 21:34; Efe 5:18 * **13:14:** Efe 5:11 * **14:1:** Rom 15:7
* **14:2:** Esé 9:3-4 * **14:3:** Kor 2:16 * **14:4:** Mat 7:1; Yem 4:11-12

“ída vá ena ina yana san aran nano.” *Eks 20:13-15, 17*

Mai man baya kayo vá ena man baya kayo vá anoi ma mana man bayafin manan ban mino. “Eyan nan ma anunu iyaonaíe vá ena van anunu ono.” *Riv 19:18*

¹⁰ *Ena nanin banta van ma avábá iyaona ano mai vetin ída namu uantiyan nan mai avábá anon Tiyarafenui man baya mo kanaí iyan mino.

Bafan Yisas Karaisini Avúavá Ano Ma Siretíi Auí Daná An Ma Yan Baya Ino

¹¹ *Taréa ma vaona yamú mai avúavá barano van mi siamiyá umpo afovasá ono. Mai ma setin e sivranten mino sire ma aráintá mumunan iyá eona maí damú inka ádé en mifo aunan ma vakhá eona vá orun mantave auu safe seno. ¹² *Mai ma yuntaré ein inka yo kakhan ádé iyan mifo ída vá dunin avúavápin báke kakhakhein avúavá po sá maman aruvin auí daná ma yampeini sá ono. ¹³ *Máan ture vá kakhakheintá ma noin nanin banta an de vá puntáde nono. Tetí ankan ída vá óen non nare sá óen é nóké pamúku avúavá iyáké inká ena nanin banta ina yana san ída vá tirá namu uré tiruve sisive é nó tifano. ¹⁴ *Áesin ná Bafan Yisas Karaisini avúavá ano siretíi auí daná an dakhanti ída vá dan bukhafei anunu ánain dakhafo.

14

Ena Mumunan Nanin Banta Van Ma Oyampá Baya Sin Baya Ino

¹ *Mumunan ma ída ákona ukhein kékasá aya iyáke ída vá betí ankan ma variyain avúavá daimono. ² *Para vara seyo, manáa ano ma mumunan iyain mai kasae minó dunan nanté uno siren niyan mifo manáa ano auraren maen manáa yunan máan né iyan mino. ³ *Máan té iyan mifo mai ma minó dunan ma niyain kéká ano ída vá mai ma manáa yunan aurakhein kéká oyampá bayo se siná inká manáa yunan ma aurakhein kéká ano

ída vá minó dunan ma niyain kéká dai-
mono. Mai fara vara seyo, Tiyarafenu ano
minói aviranten mino. ⁴ *Éi iyé bákeyá
enai yoran bantai avúavá daiminte fono.
Daimin nompo veni avúavá ano mo kama
inten nafi áa namu inten nafi mai Bafan
mano anan betin daíden ayaintin man-
taan ákona inten mino.

⁵ *Máan mana en mi manáa ano ma
inin nain mano maná damú anan moéken
kantasí ukhen ne sintin inká manáa ano
ma inin nain mano minó damú ano
manaí anan ukhen ne sinten mino. Máan
tukhanti inte inin manó ei inimpin kama
ukhanten nafi mai ánain ná dakhafono.
⁶ Mai ma maná damu san inian kákan
damusí uren monó tiyain kéká ano mai
Bafan nan mi iniren máan tiyan mino.
Inká mai ma minó dunan niyain kéká
ano Bafan nan iniren Tiyarafenu naren
tusu siantáden né iyan mino. Inká mai
ma manáa yunan ma aurakhein kéká
ano Bafan amusin uantano van mi Ti-
yarafenu naren tusu siantáden né iyan
mino. ⁷ Mai van mi ayun ma fara van
má purin má maen mai ída seti sinunurá
banté tifé umpo Tiyarafenui na yaná ino.
⁸ *Bafan amusin uantano van mi ayun
para vátifé umpo ínaimpáké ma furonuna
ano yere mai venina anan banté uno.
Máan tukhantí seti ayun para vante rafu
áa furonte rafu mai Bafan nina yaná ana
ino.

⁹ Mai ma fara ayun bain kayo vá
mai ma fúkein kayo vái Bafan ninaí ono
van mi Karaisi ano fúaren e mantakhen
mino. ¹⁰ *Máan tukhen mifo mai fará
ena mumunan kékái avúavá daídeya vetin
maman bararasí iya fono. Tiyarafe-
nunu avorái mana mana ano mantavékun
mi setin daiminten mifo afovasá ono.
¹¹ *Tiyarafenui vompon dóki ano máa
sikhen mino.

“Téi ena ena varuna Bafan mano fura
uron té uno.

Minó ma varará nanin banta ano séi
varunará eriven me aron du-
rafúden
te nan Tiyarafenu uron mino sinten
mino.’ ”

Ais 45:23

¹² Máan tukhein nan mi setí afová ukhé
tiféuno. Minó teti ma variyaruna sivútivá
Tiyarafenu siamékun ná béi ana vá
daimino.

*Ena Mumunan Nanin Bantai Avúavá Ma
Ída Yaimin Baya Ino*

¹³ Máan ná tin nompo ída vá mumunan
nanin bantai avúavá daimin maran ono.
Máan ma ótifanuna anoi vetíi aa iyará
tifanté uno. ¹⁴ *Bafan Yisasi ano senti
inin amá usintá pura sé afová ukhékun
mana yunan ma nan mano ída veyantá Ti-
yarafenu avorá painí ukhen mifo vantafó
ma Tiyarafenu avorá namu ukhen ne
siren ma mumunan inté inti mai vanta
avorá mai yunan pura sen namu ukhen
mino. ¹⁵ *Máan tukhantin ma inká éi
niyanona van ma ena afá aváe ano ará
namu uantantiya mae ma éi ída véi ará
amiya ompo ída vá mai yunan nano. Para
vara seyo, Yisas Karaisi véi ma san mi
fúken mifo ída áesin éini yunan nan mano
véin mamádantin umefin eraven ankan
mino. ¹⁶ Máan tukhantiya ída vá áesin ena
mumunan nanin banta ano éi ma kama
ukhe ne se inin nona yana san namu yaná
ino vá tino.

¹⁷ Para vara seyo, yunan má non má ma
niyain mai ano va Tiyarafenui yafisimpin
kákan danasí ukhen naino. Mai ma
funtákein avúavá bá ará kusin má amusin
in avúavá bá ma Kantá Aunan mano
setimpin afoká é iyain mai anoi kákan
danasí ukhen mino. ¹⁸ Tiretí ankan ma
Karaisini yorarí iyákeya máan avúavá ma
varesin maen mai Tiyarafenu mi amusin
amesin banasi ano yere siretin nan kama
yorarí iyan mino sinten mino.

¹⁹ *Máan tukhen mifo setisá ena nanin
banta vá manafin tirá kusé bákesá mu-
munan avúavápin ben aya ven aya ó
tifano. ²⁰ *Tiretí ankan ma niyaona
mai yunan naro sire ída vá Tiyarafenui
yoran máde asuse ono. Minó dunan
kama ukhen mifo mumunan kéká ma
mamádantin umefin eraven ankamoren
dunan ma nan nain manon mai namu
inten mino. ²¹ Mumunan kéká ano ará
uman daantáden ma eraven ankamoren
mai safúna fi uvaini non nafi ída vá niyáke

* **14:5:** Kar 4:10-11 * **14:8:** Kar 2:20 * **14:10:** 2Ko 5:10 * **14:11:** Fir 2:10-11 * **14:14:** Apo 10:15; Tai
1:15 * **14:15:** 1Ko 8:11-13 * **14:19:** Rom 12:18; 15:2 * **14:20:** 1Ko 8:13

inká namu yaná ino ma sen afová ukhan nain daná ída vá barano.

²² Mai ma siretí ankan ída uman ban mino sireya mumunan iya ma variyaona yanasinta áin ná Tiyarafenu vá tirékan nampin mana vá bano. Inká mai ma funtákein daná ino siren mumunan iyan ma variyain kéká ano vá amusin ino.

²³ Máan tukhen mifo mana vanta ano ma ída mumunan in kan inin má ma váken dunan nanten maen mai van béi umeíi inten mino. Béi ma ída funtákein danasinta ino sen mumunan ukhein danasinta ma varanten mai véi umeíi inten mino.

15

Ena Nanin Banta Aya Ono Van Ma Iyan Ban Baya Ino

¹ Tetisi mumunan ma ákona ukhá baruna kéká ano vá mai ma vetii mumunan ída ákona ukhan ma umampin bain kékasá aya ótifan numpo ída vá tetiyan nan mana ma simusin timin avúavá ana variyá bá tifano. ² *Tetí ankan ná ena mumunan nanin banta ayaé tifékun ná betíi mumunan mano moéken ákona ino.

³ Para vara seyo, Karaisi má deren ída veyan amusin barano van doriyá in mai van mi Tiyarafenui vompon dóki ano máa sikhen mino. “Mai ma siretin oyampá baya siyain kayo ano mai sen timaniná kainten mino.” *Íbo 69:9*

⁴ *Para vara seyo, mai vaya kayo ano setin afova simiyantí mantaan ákona ukhé Tiyarafenuin ave ukhé tifékun tetin evaránen tivirano van mi fefá bompon dókifin uvantaren mino.

⁵ Yisas Karaisin ánain ma yakhafiyante mai áesin ná mai ma kama ineine amiren ákona uantiyain Tiyarafenu ano vá bei Kantá Aunan póké tiretihan ma manafin ban avúavá amino. ⁶ Amirantii ará manafiní ure ma varanona yaná anon tetisi Bafan Yisas Karaisin afóe Tiyarafenuin avíi maman daní in nono.

⁷ *Yisas Karaisi ma siretin nan anunu uren avireiníe ma ena nanin banta anunu ure avirante mae mai anoi Tiyarafenuin kákan bí amin nono. ⁸ *Tetí ankan afovasá ó tifano. Yisas Karaisi ma Yutan kayoi yoran bantaí ma ein mai anoi mai

ma vetin anafu aráompin ma iyáantákaré ein baya ano kanaí intin mai Tiyarafenu ano furan tikharen mino sino van mino. ⁹ *Inká ena anan nanin banta avábá uantáadantin betin má dere Tiyarafenu aví daní ino van mi Karaisi eren mino. Mai van mi vompon dóki ano máa sikhen mino.

“Ena anan nanin banta finté uaré ein aví daní onté uno.

Éin aví daní in í kayo yanté uno. *2Sa 22:50; Íbo 18:49*

¹⁰ Tiyarafenui vompon dókifin enádá máa sikhen mino.

“Ena anan nanin banta kayo oe, Tiyarafenui vanasi vasá manafin amusin ono.” *Diu 32:43*

¹¹ Inká evaránen máa sikhen mino.

“Tireti ena anan nanin banta oe, Bafan avisá daní ono.

Minó barará nanin banta oe, véin avisá daní ono.” *Íbo 117:1*

¹² *Inká sakhanampa vanta Aisaiya máa sikhen mino.

“Yesin anan pinté ma afoká in nain banta ano minó barará difibintin maen béi anan tiya uren evaránen tiviranten mino siren ena anan nanin banta ano ventá mumunan inten mino.” *Ais 11:10*

¹³ Mai ma ameno siren iyáantáka ave iyaona Tiyarafenu vaípa timúkékun ayainti mumunan esin amusin má ará kusin má bíkaantanten mino. Mai ma varano sire ave iyaona inimpin Kantá Aunan mano moéken ákona amintin mantaan ákona in nono.

Pori Ma Vompon Uvarein Bayai Ana Ino

¹⁴ Mumunan tifá tiváeyan noe, Tiyarafenui kama avúavá inka sireti afová uren nan mai yanasinta ano siretimpin bíká téi fura siré afová eruna kasae ena nanin banta mai vaya afova amin nono. ¹⁵ Tiyarafenu ano sein tarisari uren doran timikhá ein nan mi manáa ákona vaya siretin uvaman ameruna mai ano kasaen tiretin ineine aminten mino.

¹⁶ *Tiyarafenu anon ena anan nanin bantafin Yisas Karaisini kama vaya mo siamino van mi séin aní uren monó ánon

* **15:2:** 1Ko 10:24, 33 * **15:4:** 2Ti 3:16 * **15:7:** Rom 14:1 * **15:8:** Mat 15:24 * **15:9:** Apo 3:25 * **15:12:** Rev 5:5 * **15:16:** Rom 1:5; 11:13

banta ano ma yoriyain avúaváká ten nan dorano van mai yoran timen mino. Kama vava mo siamékun Kantá Aunan mano vetin ayaintin Tiyarafenu ano ma ará manafiní é iyain íkun uan amin an dantin pura sen betin maman bei vanasíí ino van muno.

¹⁷ Máan tukháí Yisas Karaisi ma seimpin báká ma Tiyarafenui yorari iyaruna van mi simusin iyá uno. ¹⁸ Téi ída ena yanasinta van baya seno van mumpo mai ma Yisas Karaisin pákena van ma siyá bariyá iyarunará ma ena anan nanin banta e mamádan Tiyarafenui oo yaiiyain mai vava anan tenté uno. ¹⁹ Ara ara enará ukhein daná ma afokáin ákona Tiyarafenui Aunan mano séin timikhá Karaisini kama vava Yerusaremí ké arai uré avové é banasi e siamé oriyá Iririkumí barafin mo kanaí é uno.*

²⁰ *Tenti ákona inin ma vain mai Karaisini kama vava ma fefá inikhein akhempá ifá uré mai ma ída inikhein nanin bantafin ma mo siamin nan mi sinunu iyá uno. Ena vanta ano ma namádan daféadantá ma uvareiní ída ono van muno. ²¹ Tiyarafenui vompon dókifin máa sikhen mino.

“Mai ma Tiyarafenui vava ída siamikháin nain kéká ano onantin inká mai ma veni vava ída inikharéin nain kéká ano afová inten mino.”
Ais 52:15

²² *Mai ma Tiyarafenui vava ída inikharéin barufimpái siamé noké tiretin ída ainé o oné uno.

Pori Ma Romú Orono Van Ineine Ein Baya Ino

²³ Ída ainé oné umpo mai varafimpá ma yoré noré eruna inka saréa me kípé uno. Tiretin nan kokhon oranarái o ineine é eriyá baréi saréa siretin o onano van iyá uno. ²⁴ Spenii varafá ma oronté maé tiretin naren e odé oronté uno. Tiretin má ma manafin o varéeku mae sretii aai usintesí oronté uno. ²⁵ *Oronté umpo monó nanin banta ma Yerusaremí bain naren mo amusin moní amiré ináimpákéi

oronté uno. ²⁶ *Mai fara vara seyo, Masedoniaú Akaiaúi varafá ma Tiyarafenui vanasi vain mano Yerusaremí ma Tiyarafenui vanasi váken manáa yana san ma o útufiyain kékápin dantin ma orin nain danasinta van betiyan baya sian damuré moní átaru ono van iniyan mino.

²⁷ *Betí ankan amusin mái mai avúavá bariyaren mino. Mai fara vara seyo, Tiyarafenui kama vava ma Yutan kéká pintena varein mai ayái anona moní átaru uren evaránen aminten mino. ²⁸ Mai moní ma áturú urantí baré mo amirékun ma mamarantí maé ináimpáké Spení ma orono van tiretin naren e oné oronté uno. ²⁹ *Téi fura sé afová iyá umpo séi ma sireti vaonafá ma oronuna mai Karaisini kákan avábá báí oronté uno.

³⁰ *Mumunan kéká soe, setisi Bafan Yisas Karaisin avíkái siretin ákonaé tiamiyá uno. Mai ma Kantá Aunani yorantá avábá in maran iyá tiferuna van mi Tiyarafenu vaipá amúkusintésin téin tiya ino van muno. ³¹ Amúkesin ná Tiyarafenu ano séintá dafikantisá Yudiá barafin ma vain kéká ano ma veni vava átakharé iyaimpin mai ma átaru uádan moní baré orékun ná mumunan kéká ano amusin iyan barano. ³² Mamarantin ma Tiyarafenu ano anunu intí maé túpin timusin bantíi siretin má e váké mumunan ákona uantan maran ó tifanté uno. ³³ Ará ma kusiantan Tiyarafenu ano siretin masá bano. Mai fura ino.

16

Pori Ma Amusin Baya Vei Arona Kayo Van Tein Baya Ino

¹ Teti mumunan tiyofi Fibi maen Sinkriá barurá minó dorari iyain bakan tiretin onano van orinten mino. ² Orinti mae mai ma Bafani yoran banta kama e aya iyaonaí e véin aya ono van muno. Manáa yoran aya ono van ma sinti véin ná aya ono. Mai fara vara seyo, kokhon nanin banta aya uaren ten má deren tiya ukhen mino.

³ *Prisira nú Ákuira nú ten má tiyaen Yisas Karaisini yorariin ábasu ifo vá

* **15:19:** Iririkumí mana Ítarí adé ma vain bara ino. * **15:20:** 2Ko 10:15-16 * **15:22:** Rom 1:13 * **15:25:** 1Ko 16:1-4 * **15:26:** Apo 24:17; 1Ko 16:1; 2Ko 8:1; 9:2, 12 * **15:27:** 1Ko 9:11 * **15:29:** Rom 1:11 * **15:30:** 2Ko 1:11; Kor 4:3; 2Te 3:1 * **16:3:** Apo 18:2

- amusin uantano. ⁴ Míkan nan mano séin naro siren purin aví dóká ída seya ana vékan tusu siantiyá umpo ena anan pinte monó nanin banta ano yeren tusu siantiyain mino.
- ⁵ Mai ma vékan amápin átaru iyain monó kékasá tenti simusin baya siameno.
- Tiamiyáke mai ma Esiá bara finté esé araién ará baéden Yisas Karaisin ánain ma yakhafein banta mai sesi kama sirona Epenetusi ifo vá tenti simusin baya vá dere véin ná tiameno.
- ⁶ Mai ma siretin aya ono van ákona yorará iyain nanin Marian dere vá tenti simusin baya siameno.
- ⁷ Inká Antronikusin nú Yuniasin nú mai senti ádéken nan báken ten má karavusí ukharen mifo senti simusin baya vá míkan dere siameno. Téi ma ída Karaisini yoran bantaí ukhékun maen békan manon pefá ayáká dókein bantá kan bákan ena aposeri kéká ano vékan nan peyan doran bantan báken Karaisini kama yorará ukharen ne siyaren mino.
- ⁸ Bafan aviká ma séi sinunu iyaruna vanta Ampriatusin ná tenti simusin baya siameno.
- ⁹ Tetisi mana yoran banta ma Karaisini yorará iyain Urubanusí má inká tesi kama sirona Stakisi nusá tenti simusin baya siameno.
- ¹⁰ Mai ma ara ara uman eriyain Karaisin aviká mantaan ákona ukharé ein banta Aperesin má inká Aristoburusini mápin ma vain mumunan kéká dere vasá tenti simusin baya siameno.
- ¹¹ Tenti ádékena vanta Erodionin má inká Narsisusin amápin ma vain mumunan kéká basá tenti simusin baya siameno.
- ¹² Mai ma Bafani ákona yorará in nanin kan Tri finan nú Tirfosa nú bá inká ena sen tirona nanin ma Bafani ákona yorará iyá ma sinunu ukheruna Pesisí masá tenti simusin baya siameno.
- ¹³ *Inká mai ma Bafan mano aní ukhá

ein banta Rufusin má be anóe masá tenti simusin baya siameno. Rufusin anóe anon te sinóen an dakharen mino.

- ¹⁴ Asinkritusin má Frekonin má Ermesin má Patrobasin má Ermasin má inká betin má ma vain mumunan kéká basá tenti simusin baya siameno.
- ¹⁵ Firorokusin má Yuriasin má inká Nereusín má be ayofi má inká Orimpasi má betin má ma vain mumunan kéká basá tenti simusin baya siameno.
- ¹⁶ *Tiyarafenurá ma monó tiyain nanin banta ano ma avábá iyain avúavá kasá ben avábá in maran ná ono.*
Minó Karaisini vanasi ma vain mano siretimpin betíi amusin baya yan oren mino.

Monó Tin Kéká Aúban Ma Yaimen Noin Kékan Ma Feran Baya Ino

¹⁷ *Mumunan tiyofi sifá tiváeyan noe, ma ákona vayan tiamenté uno. Mai ma nóken eraran aúban daimin baya ma sen noin kéka sará dafiseno. Beti ma sin nain baya ano mai ma fefá afová ukheona vaya vá ída manaí ukhantin mi savifái aviren orinten mifo ída vá betin áde orono. ¹⁸ *Mai fara vara seyo, mai kéká ano setisi Bafan Karaisini avúavá ánain ída yakhafiyan mifo vetíi ineinerái yakhafiyan mino. Betíi kampun baya kayo fóké banasi ase amiádaren betíi kama mumunan máden asuse iyan mino. ¹⁹ *Máan tiyan mifo sireti ma Bafani vaya ánain dakhafiyaona mai minó nanin banta ano afová ukhen mino. Mai van mi séi simusin iyá umpo siretí ankan puntákein avúavá óde afová ure vá betin má namu avúavá barana vá teno.

²⁰ *Máan ma iyasín maen ída ayáká báken mi ará kusin ma amiyain Bafan mano siretin arantan aránaópá Ban Anon kaúden dasaminten mino.

Tetisi Bafan Yisas Karaisini sarisari ano siretin masá bano.

²¹ *Tesi mana yoran banta Timotin má inká tenti ádékena kéká ma Rusiusin má Yesonin má Sosipaterin má ano amusin baya yan tireti vaonafá oren mino.

* **16:13:** Mak 15:21 * **16:16:** 1Ko 16:20; 1Pi 5:14 * **16:16:** Kiriki vaya fintéi Tiyarafenurá ma monó tiyain nanin banta ano ma kantasí ukhein amónan maran iyain nan tikhen mino. * **16:17:** Mat 7:15; Tai 3:10 * **16:18:** Fir 3:19; 2Pi 2:3 * **16:19:** Rom 1:8; 1Ko 14:20 * **16:20:** Esé 3:15 * **16:21:** Apo 16:1-2; 19:22; 20:4

²² Téi Porini vaya ma uvariyaruna vanta Tertiusi anon Bafan aviká tesi simusin baya yékun tireti vaonafá oren mino.

²³⁻²⁴ *Monó nanin banta vá ma Kaiusin amápin ma átaru iyákun ma setintá kamaen dafisiyá ein mai véin má deren amusin baya sireti vaonafá dan oren mino.

Mai ma kákan barufin kamanini moníká ma yafisiyain banta Erastusin má inká mumunan tifá tiváe Kuartusin má dere anon amusin baya yan tireti vaonafá oren mino.* ²⁵ *Yisas Karaisi ano ma siretin ena anan nanin banta ayain nan ma fefá bompon dókifin tiádan aúpa baré ein mai saréa Tiyarafenu ano siretin aya inti mantaan ákona in nono. ²⁶ Mai ma fefá sakanampa vanta kayo ano siádan baré einíen mi fara van oriyan ban Tiyarafenu ano ma ákonæen tiádan baré ein mi minó barará nanin bantafin inka sian amá é tiferuna mai kasaen Karaisintá mumunan uren ben ánaïn dakhafinten mino. ²⁷ Yisas Karaisini kama avúava sará mai ma afova víkakhein Tiyarafenun aví ena ena yaní ó tifano. Mai fura ino.

* **16:23-24:** Apo 19:22; 1Ko 1:14 * **16:23-24:** Tiyarafenui manáa vompon dókifin ves 24 fin ena vaya asotúin máa sikhen mino. 24 Tetisi Bafan Yisas Karaisini sarisari ano siretin masá bano. Pura. * **16:25:** Rom 1:5; Efe 1:9; 3:5, 9; Kor 1:26

**PORI MA ESÉ ARAÍEN
KORINÍ NANIN BANTA
UVAMAN AMEIN
BOMPON MINO
(1 Korini)**

**Korinii Esé Bompon Ma
Uvanteí Pákenai Afova
Vaya Ino**

Ma vompon ma uvantein banta ino.
Baya varen orin banta Pori ino.

Uvarein orana ino.
AD fifti-siksi (56) fin nafi áa fifti-seveni (57) fin nafin uvanten mino. Mai maen Pori ma kanú manaú dádasí en ma monó dorarién eúkiyain pimpá ino.

Ma vompon ma uvantein baru ino.
Taréa ma Téki e siyain barafin ma áau orun perápá bain baru Efesasíi kanú manaú oranará o váken ma vompon uvanten mino.

Ma vompon ma uvaman amikhein kéká ino.

Pori ma kan dádasí en ma monó dorarién eúkiyaren ma Ákaiá barai ánon baru váken ma inká bisinisí impin o aní ukhein baru Koriní ma ena anan nanin banta ano ma monó tin avúavápin ma mo kokhoní iyain kékái uvaman amikhein mino. (Aposeri 18:11 fin ná onano.) Béi mana orana ifo afápá mana un kádan biyontái váken uvanten mino.

Nái ana vará ma vompon uvanten nafino.

Koriní baru ráké ma eriyain bompon má inká mai fáké ma erein arona kéká báí veya Pori afová en iníkan monó nanin bantafin kampun afová amin banta kéká ano oriven uman maman dáko uran monó tin avúavá mo ampiren peyan ineine rá oriyan ne seimpin mino. Ma ma esé uvantein bom-pompin ída fura sen mai uman afová inton paran manáarái kampun afová

amin banta kayo van tikhen mino. (Kan dádasí ma en uvanteimpin mi fura sen tian amá ukhen mino). Inká kiafosí in avúava safi man baya fi Bafani ká dunan nan nafi fúaren orun mantan nafi inká Koriní nanin bantai ábasuí in má dunan nan ma safi Kantá Aunan mano ma amusin amiyain má monó tin avúavá ba safi ano ma Koriní nanin banta uman amiyain man bararasí ino van Pori ída o úku e úku inton puntáden tian amá ukhen mino. Sapta 13 fin ma avábá í pákena ma sikhein ma san deren tian ákona ukhen mino.

Pori Ma Amusin Bompon Uvaman Koriní Nanin Banta Amein Baya Ino

¹ Yisas Karaisini kama veya varen mo vanasi siamino van ma Tiyarafenu ano vei anunurá tivíká ein banta séi Porin má mumunan tifá tiváe Sostenesin má anon ma vompon uvaré uno.

² Tiyarafenu ano vei vanasií uveya kantasí ukhe vano van ma avíkein kéká ma Koriní barurá banan ma inká Yisas Karaisini yorantá ma avíden maman kantasí ura ma minó akhempá baona nanin banta ano ma Yisas Karaisin nan ma setisi Bafan má betíi Bafan má ino ma siyaona mai kékái ma vompon berasan mano uvaman amé uno.

³ Teti Sifóe Tiyarafenu vá tetisi Bafan Yisas Karaisin má pinte sarisari vá ará kusin má ano kanaíen tiretin má banten mino.

Pori Ma Susu Siantein Baya Ino

⁴ Tiyarafenu ano ma vei sarisari siretin amira ma saréa Yisas Karaisin ninaí ukheona van mi séj ena ena véin tusu sianté iyá uno. ⁵⁻⁶ Para vara seyo,

mai ma ara ara afova váka ma ákona e veya siyaona mai Tiyarafenu anon Yisas Karaisin pinté uaren mai afova amikhái Yisas Karaisin nan ma siamiyá erun mai inka siretí ankan pinté afoká en mino.

⁷ Máan tukhanti setisi Bafan Yisas Karaisi ma ovaránen erin nain nan ma ave ukhe ma Kantá Aunaní ara ara amusin barano van ma iyaré eona mai inka saréa vare ono. ⁸* Inká béi ano mai amusin kayo fóké tiretin maman ákona uantádanti oriyare setisi Bafan Yisas Karaisi ma ovaránen

* 1:8: 1Te 3:13; 5:23 * 1:9: 1Te 5:24; 1Yn 1:3

erin nain damú ída mana aau vantí ven avorá o mantan nono. ⁹ *Tiyarafenu ano veyan ma sirein daná bariyain mi vákan be Anin ma setisi Bafan Yisas Karaisi vain má manafin bano van mi siretin arakhen mino.

Monó Nanin Bantafin Ma Yaimin Avúavá Bain Baya Ino

¹⁰ *Mumunan tiyofi sifá tiváeyan noe, ída vá aruve asive iyáke setisi Bafan Yisas Karaisin avíká kama e manafin báke vá eraran ma aúban daimin avúavá ída vantí vá manafin ma vaya sire ma varanona yaná ano vá mai kama ino. ¹¹ Mumunan kéka soe, siretí ankan ma aruve asive iyaona vaya mai Karoen amápin ma vain kéka anon me sisimí iniréi ma vaya siyá uno. ¹² *Tiretí ankan máa mi siya ono. Manáa kéka ano Porin mi yakhafiyá uno siyáka inká manáa ano Aporosin mi yakhafiyá uno síka manáa ano Pitan mi yakhafiyá uno síka manáa ano Karaisin mi yakhafiyá uno siya ono.

¹³ Kanaí eyá Yisas Karaisin maman aúban daiminte fono. Téi Pori anó tiretin nan pukékuyá inká ten tivikasá monó non mante fono. ¹⁴ *Téi ma Krispusin má Kaiusin má monó non péantádé ma siretin ída féantákeruna van mi Tiyarafenu tusu siantiyá uno. ¹⁵ Máan tukhé umpo ída vá mana ano sen nan ben avíkái monó non péké uno vá teno. ¹⁶ *(Stefanasini kéka bá deren monó non péan tákékun ban mifo mai oyampáké ena kéka bá péke rafu ída afová ukhé uno.) ¹⁷ Yisas Karaisi ano monó non péantano vara séin tisinten naino. Tiyarafenui kama vaya siamino van mi sisinten mino. Mai fara va ino vara ráke afova ma mantein banta kayo ano ma siyain avúaváká baya siyaré Yisas Karaisini yaa unkamádan maman paen danasí onuna van mino.

Yisas Karaisi Mai Tiyarafenui Kama Afova Vá Ákona Vá Ino

¹⁸ *Mai fara vara seyo, Yisas Karaisini yaa unkamádan nan ma siyain baya ano varará ma o afeyoriyain kéka avorá paen

danasíi ukhá afová ukhé umpo mai ma inarufá orono van ma útakhé tiferuna kéka ano ma oniyá tiferuna mai Tiyarafenu ano ma setin tiviriyain ákonan ban mino. ¹⁹ Mai fara vara seyo, vanasi ano ma vetiyantá betiyan ayain nain nan Tiyarafenui vompon dóki ano máa sikhen mino.

“Bantai afova mádé asuse uré betíi ineine finte kama afova yo varanté uno.” *Ais 29:14*

²⁰ *Máa sikhen mifo mai ma kama ineine vain kéka bá kama afova variyain kéka bá inká be afova van ma fura fura sin kéka bá mai intesá ukhen nafino. Tiyarafenu ano máan ineine vá ma vain kékaí afova maman paen danasí ukhen mino. ²¹ *Mai fara va ino, vantai ineine ano Tiyarafenui ineine vá ída manaí ukhan ída kanaíen beni vaya ineren ukhan mi setí ankan ma asuse aa fáké monó baya siamiyaruna anon banasi aya iyákan Tiyarafenu ano amusin iyan mai kéka aviriyain mino. ²² Yutan kayo ano enará ukhein avúavá aní intí ódaré mumunan ono van iyákan inká ena anan nanin banta kayo ano vetí ankan ma afová ukhein avúaváká ma siamintin iniren mumunan in nain nan mi yosiyain mino. ²³ *Máan tiyan mifo Yisasi ma yaa unkamádan purein nan ma setí ankan tiamiyákan Yutan kayo ano mai vaya inian paen danasí iyan maen inká ena anan nanin banta kayo ano iniren asuse vaya ino siyan mino. ²⁴ *Máa siyan mifo mai ma Tiyarafenu ano Yutan kayo vá ena anan nanin banta kayo vá ma evaránen avíkein mai Yisas Karaisi maen Tiyarafenui ákonan báken beni kama inen ban mino. ²⁵ *Mai fara vara seyo, varará banta ano Tiyarafenui ineine van asuse ukhen mino siyan mifo vetíi kama ineine esantakhen mino. Inká Tiyarafenui avúava san ída ákona van ne siyan mifo vantai ákona esantakhen mino.

²⁶ *Mumunan kéka soe, afova sá ono. Manáa kéka ano ída afova váka ída aví bain nanin banta akhafanan báke ída ona vain kayon baré en nan mi Tiyarafenu ano

* **1:10:** Fir 2:2 * **1:12:** Apo 18:24-28; 1Ko 3:4 * **1:14:** Apo 18:8; Rom 16:23 * **1:16:** 1Ko 16:15 * **1:18:** Rom 1:16 * **1:20:** Yop 12:17; Ais 19:12; 33:18; 44:25 * **1:21:** Mat 11:25 * **1:23:** Rom 9:32; 1Ko 2:14 * **1:24:** Kor 2:3 * **1:25:** 2Ko 13:4 * **1:26:** Mat 11:25; Yem 2:5

siretin arakhen mifo ovare vá me ineno. ²⁷ Mai ma kama ineine vákái vá uno ma siyain kéká ayave ameno van mi mai ma asuse ineine vain kéká Tiyarafenu ano aní uren doran amen mino. Inká mai ma ákona vain kéká ayave ameno van mi mai ma ída ákona vain kéká aní uren doran amen mino. ²⁸ Kama ineine ma vain kékái afova máde asuse ono van mi ma ma vanasi ano namuen púta ukhen mino siyá ein kéká Tiyarafenu ano aní uren doran amen mino. ²⁹ *Máan turantin Tiyarafenu avorá ída mana ano séi mai yaná manté uno sen be amo sino van mino.

³⁰ *Yisas Karaisin pinté uaren tetin tiya ono van mi Tiyarafenu ano veyantá mai aa maman asamana uran ban mino. Mai fara va ino, Tiyarafenu ano setin evaránen tivirano van mi Yisas Karaisimpó tetin afova simiren maman puntákein kékási uren inarufá orino van tetin kantasí urá bá tiféuno. ³¹ Máan tukhein nan mi Tiyarafenui vompon dókifin tikhen mino. “Mana nanin banta ano ma amo seno van Bafan mana vá amo sino.” *Yer 9:24*

2

Pori Ma Tiyarafenui Kama Afova Vaya Vanasi Siamein Baya Ino

¹ Mumunan tiyofi sífá tiváeyan noe, Tiyarafenui vaya ma aúpá baré ein ma séi esé araié tiretin tiameruna mai ma varará banta ano ma kákan afova mantén ma siyain avúavákasa siame rauno. Ída ino. ² Para vara seyo, Yisas Karaisin má inká daa unkamádantá ma véi fureí pákena vá anan tiameno van ukhá uno. ³ *Téi ma esé arai é tiretí ankan baonafá ore-runa mai ída ákona vákái sikhokhofiyá oré uno. ⁴ *Téi ma Tiyarafenui vaya siamiyaré eruna mai kama uréi siamiyáké ída ase vayafó iyaní uré tiretin aviké umpo Kantá Aunan manon tiretin aúbaná ákona yorarí ukhen mino. ⁵ Máan turéku mae varará bantai ineinerá ifá ureya Tiyarafenui ákonará mumunan ono van mi siamiyaré uno.

Kama Afova Ma Kantá Aunan Pinté Erein Baya Ino

⁶ Tiyarafenui vaya ma inikhein kékápin mi véi ma simikhein ineinerá baya siyaré umpo varará bantai ineinera safi inká ma varará ma o aiyoran nain dafisin kékái ineinera safi va siyare rauno. Ída ino. ⁷ Tiyarafenui ano ma setin tiya uré tivirano van pefá bara ída uvanten aúpá ma aúmádan baré ein mai ineine vayan tiamiyá uno. ⁸ Tiamiyá umpo varará ma yafisin kéká ano mai yaná ída afová ukharen mino. Betí ankan afová en baren tetisi Bafan ma kakhán má bain ída yaa unkamádantá arintin purin nainten mino. ⁹ Mai van mi Tiyarafenui vompon dóki ano máa sikhén mino.

“Tiyarafenui ma avábá in nain kéká ina ma útaádan bain
mai ída mana ano onan
ída mana ano inin
ída mana vantai inimpin bá ukhen mino.”

Ais 64:4

¹⁰ Máan tikhen mifo Tiyarafenui ano vei Aunan pókéi mai yanasinta maman dákó uren minó daná dosiren Tiyarafenui aúpá bain daná ina aní urá mai afová ukhé tiféuno. ¹¹ Mana ano ída kanaíen ena ano ma iniyain ineine afová inten mifo veyákái afová inten mino. Inká ída kanaíen mana ano Tiyarafenui ineine afová inten mifo vei Aunan mano anan afová inten mino. ¹² Tiyarafenui ma kama yanasinta fara setin timikhein afová ino van mi vei Aunan tetin timikhen mifo ma vara ráke aunan naifo afova sá ó tifano. ¹³ Tetí ankan ma ma vaya kayo siamiyaruna mai ma vara ráke afova fosa siamiya rauno. Ída ino. Aunan mano ma setin timikhein mai Aunan vayan pura sé monó tiantan avúavá tian amá uan amiyá tiféuno. ¹⁴ Amiyá tifé umpo ída ma monó avúavá afová ukhein kéká anon Tiyarafenui Aunan mano ma monó tiantan avúava san ma siamin nain ída kanaíen afová inten mino. Mai anon asuse ineine vetimpin ban mifo Aunan ma vain kéká anon náí yana sará Aunan mano siamiyan nafi mai kasaen afová inten mino. ¹⁵ Mai ma Aunan bain kéká anon minó daná daíden afová inten mifo ída ma Aunan bain kéká anon ída kanaíen mai kékái avúavúa daíden afová inten mino. ¹⁶ Mai

* 1:29: Efe 2:9 * 1:30: Yer 23:5-6 * 2:3: Apo 18:9; 2Ko 10:1 * 2:4: 1Te 1:5

van mi Tiyarafenui vompon dóki ano ina ukhen mino.

“Para vara seyo, iye anó Bafani ineine afová ukheyá

béin inin aminte fono.” *Ais 40:13*
Máa sikhá afová ukhé tifé umpo setimpin Karaisini ineine van mino.

3

Monópin Ma Aruve Asivein Baya Ino

¹ Mumunan tiyofi sífá tiváeyan noe, fefá téi ma siretí ankan má báké monó baya inikhein nanin bantafin ma vaya siamiyainisa iyare rauno. Ída ino. Yisas Karaisini avúavápin arará iyampon kayo an mi yakhenái vara rákena avúavá ánain ma vákuriyain kékápin ma vaya siamiyainíi iyaré uno. ²*Pefá tiretí ankan ída ákona yunan narí ukhareya saréa yere máan manan ukhen náí arará iyampon ma nan anu máa ameiníi iyá uno. ³*Mai fara vara seyo, ume avúavá ánain para vákuriya vákeya afá aváen má anan maran eya aruve asive iya nan mai anon tiretíi avúavá aní iyan mino. Máan ma iyaona anon ída Bafani vanasi ano ma einíi iya ono. ⁴*Pará ída ma monó inin kéká ano ma variyain avúavá bariyayá mana ano se séi Porin ánain mi vákuriyá uno siyá inká ena ano se séi Aporosin ánain mi vákuriyá uno siyá ba rafono.

⁵*Aporosi iyé bará inká téi Pori iyé bákuyá berasantá aruve asive iya rafono. Berasan pinté uareya mumunan ono van mi Bafan mano mai yoran berasan timikhá doriyá uno. ⁶Téi ma yanayun pafasirékun Aporosi non amiran maen Tiyarafenu anon e ampamadé iyan mino. ⁷Máan tukhan mi yanayun ma fafasé iyain má non ma amé iyain máí aví ída van mifo Tiyarafenu ma e ampamadé iyan mai veyáká avíi van mino. ⁸*Danayun ma fafasin banta vá non ma amin banta vá ano maman manafiní ukhen mana anarái yoriyain pasen mikan ma yoriyá inaintái miyan mádú mádú inten mino. ⁹Mai fara vara seyo, setí ankan

manafin mi Tiyarafenui yorararí iyá tiféku siretí ankan beni yunan bara vá má báí va ompo seti sina vaono.

Monó Doran Banta Kayo Van Ma O Sian Má Uvaran Bantaré Dan Bain Baya Ino

¹⁰Tiyarafenui sarisarirái afova van ma má uvariyan banta an davé namádan dafédékun mi ena kayo ano mairá má uvariyan mino. Uvariyan mifo mai namádantá ma má uvaran nain kéká ano vá kamaen dafíben ná uvarano. ¹¹*Mai fara vara seyo, Tiyarafenu ano Yisas Karaisin maman namádaní uren pe yafédan bain mana ano ída kanaíen ena namádan daferanten mino. ¹²Máan tukhein mai namádantá ma má uvaran nain mano kasaen kori fi siriva fi kama onámaná kayo fi yaa fo safi namí po safi inká uviti ayan po safi uvaranten mino. ¹³*Uvaranten mifo Tiyarafenu ano ma vanasii avúavá daíden kó tiantan nain damúi má uvaran banta kayoi yoran amáká afoká inten mino. Máí damú anan minó nanin bantai yoran irafin ma iyó einíi urantin iyé kama yorarí iná inká iyé namu yorarí iyan nafi yákó inten mino. ¹⁴Iye anó mai namádantá má uvantá intin ná ída ira khanten nafi mai vanta anon bei miyan baranten mino. ¹⁵Máan tinten mifo iyen amasá ira kanten nafi mai yoran bantai yoran tavifái o afeyoranten mino. Máan tintin mai ma ira anamuná pinté ma e yúden karan ereiníi en mi má uvaran banta kayo ano anan para vanten mino.

Monó Namun Ma Vain Mai Vanasi Ino

¹⁶*Tiretí ankan Tiyarafenui kákan monó namun mi van nan ma vení Kantá Aunan mano ma siretimpin bain mai ídá afová ukhe rafono. ¹⁷Tiyarafenui kákan monó namun ma namu inain bantan Tiyarafenu ano véin namu inten mino. Mai fara vara seyo, Tiyarafenui kákan monó namun kantasí ukhayai sireti vanasi ano mai veni kákan monó namun mi va ono.

Ída Ma Vanasii Aví Daní In Baya Ino

* **3:2:** Ibu 5:12-13; 1Pi 2:2 * **3:3:** 1Ko 1:10-11 * **3:4:** 1Ko 1:12 * **3:5:** Apo 18:4, 11, 27-28 * **3:8:** Mat 16:27; Efe 2:20-22 * **3:11:** Ais 28:16; 1Pi 2:4-6 * **3:13:** 1Ko 4:5 * **3:16:** 1Ko 6:19; 2Ko 6:16

¹⁸ Tiretí ankan ída vá tiretíyan kampun tiantiya vá baro. Ma vara ráke yanasintará ma afova vantiya siretíyan maman asuse vanta kayo an dakhare vá ínaimpáké Tiyarafenu avorasá kama afova ma vain banta kayoí ono. ¹⁹ Mai fara vara seyo, ma vara ráke afova ano Tiyarafenu avorá asuse ukhan mi veni vompon dókifin máa sikhen mino.

“Manáa kéká ano ma vara ráke afova fóké ma minó danasinta variyain nan ma kana variyá uno ma siyain mai Tiyarafenu ano maman betíi oyivan ma munteiníi uádé iyan mino.” *Yop 5:13*

²⁰ Evaránen Tiyarafenui vompon dókifin máa sikhen mino.

“Manáa nanin banta ano setimpin afova van mino sen ininten mifo Bafan mano mai ineine afová ukhantin paen danasíi inten mino.”

Íbo 94:11

²¹ Máan tukhein nan mi minó daná mai siretin ninan ban mifo vanta aví ma yaní in avúavá ifasá oro. ²² Porin má Aporosin má Pitan má mai siretin ayain kéká ino. Inká ma vara vá ayun ma fara van má purin má taréa vá inká inuran má minó daná bá mai siretí ina yanái vákaya ²³ inká tiretí Yisas Karaisin ninan banan béi Tiyarafenu inan ban mino.

4

Yisas Karasini Kama Vaya Ma Varen Orin Banta Kékái Vaya Ino

¹ Máan tukhen mifo Aporosi rasan nará Yisas Karaisin yoran bantá kanan mi váken beni aúpá bayan kamaen dafíben tisimíyan mino seya vanasi ano vá afová ono. ² *Ena ina yanáká dafíantano van ma mana vanta aviádantin báken maen ben nina yanákasá dafían ákona uantano. ³ Téi kama e sá doriya rafu áa namue sá doriya rafu mai seyantá ída afová ukhé umpo sireti safo áa ena kéká ano fi ma sen tivútivá daíde afová inteya mai sitó daná ino. ⁴ Teyan nan kama anan é doriyá uno siyá umpo Bafan beyaká anan tentí yoran daíden afová uren mai kama yoraríi e ono

sen inká mai namu yoraríi e ono sen tisimínten mino. ⁵ *Máan tukhen mifo vanasii avúavá ma yaíden afováin damú ma ída erikhanti ma yoriyaruna sivútivá ída vá daimiyáke áesin ná baré intin Bafan mano vá me yaimino. Bafan ma eriven maen tetisi súpin ma aúpáké bariyá onuna yaná maman dákó kakhakheintá kaúdantin tetí ma yoriyaruna sivútiváká ten Tiyarafenu ano miyan timídú inten ino.

Korini Nanin Banta Ano Vetíyan Amo Siyan Ma Amaan Baya Sein Mino

⁶ *Mumunan tiyofi sífá tiváeyan noe, Aporosi rasan mano siretíi ayainí uvé ayaéku ma ma siamiyaruna yanasinta one afová ono van mi siamiyá uno. Tiyarafenui vompon dóki ano ma sikhein baya amaniná ída vá ena vaya kayo maman asotú ono. Máan ma inte mae ída mana ano ma yoriyain avúava san maman daní ureya ena ano ma yoriyain nan maman bararasí inono. ⁷ *Intéa yaná ma variyaona anó tiretin maman enará ukhen nafino. Intéa kama yanasá Tiyarafenu ano siretin ída amikhentí ma kama yoraríi iyanteya ída vá tesi ákonarái yoriyá uno se vá e amo seno.

⁸ Tiretí ankan ma ineona ano minó dana san ma iyaré eruna inka vareruna mai kin an davé tetisi ákonará bátifanté uno sireya setin me ampín nompo mai kana ino. Tiretí ankan ma kin an dante mae mai setin má deren kiní uvé tiretin má banté uno. ⁹ Mai fara vara seyo, kó tiantáden ma furino van kana ino sikhein banta kéká an mi yen Tiyarafenu ano seti aposeri kayo maman dákosí urá bátifékun enisori kayo vá banasi vá ano setin toman paen danasí iyan mino. ¹⁰ Tetí ankan Yisas Karaisiní asuse yoran banta an dakhéku mae siretí ankan ma iniyaona ano Yisas Karaisin má túpá ukhé minó daná afová ukhé uno siya ono. Tiretí ankan Tiyarafenui ákona váká bá tiféuno sireya setin nan ída ákona vákan ban mino siya ono. Tiretí ankan banasi ano setin mi simo siren betin nan intiyan mino siya ono. ¹¹ *Taréa ma vá tiferuna yamú mai sirafan nan iyáké maé non nan

* 4:2: Ruk 12:42 * 4:5: 1Ko 3:8 * 4:6: Rom 12:3

* 4:7: Rom 12:6 * 4:11: 2Ko 11:23-27

tii iyáká tuí dana san iyákun banasi ano siruren tisiren iyákan ída setin timá ban mino. ¹² *Tetí ankan ma vanuna van mai ákonaé tiyan póké dódékun mai ano setin tiya iyan mino. Tetí ankan ma aufon us-intein kéká kamaé avábá uantiyáké tetin ma sirono van iyáká maé bempákéi vá tiféuno. ¹³ Banasi ano ma namu veya sen tisiká betí ankampin puntákein baya anan tiamiyá uno. Taréa ma vá tiferuna yamú mai vanasi ano setin maman kanti ma karúdiyaimpin ma karúdeiníi iyá bá tiféuno.

Pori Ma Monó Afóen An Mi Yakhé Uno Ma Sein Baya Ino

¹⁴ Ma ma uvariyaruna vompon mai siretin ayave ameno vara uvariya raumpo se sikhafana an mi yakhen náí siretin afova veya siameno van muno. ¹⁵ *Tiyan mikan tauseni (10,000) vanta ano ma Yisas Karaisini veya ma siamiyain kéká pinté mana anon tiretin afóen an dé iyan mino. Para vara seyo, séi ma Tiyarafenui kama veya siretin tiamiyaruna mai Yisas Karaisimpin tiretin afóen an mi yakhé tiretin naren tiamé uno. ¹⁶ *Máan tukháí sen tan deya se ma variyaruna avúavá ánain bákurono van mi siretin tiamiyá uno. ¹⁷ *Mai van mi siretin ayainti séi ma variyaruna avúavá barano van mi Timotin tiantékun tireti vaonafá oriyan mino. Para vara seyo, véi anon te sikhá an dakhen Bafantá kamaen monó tiantiyái véin nan tinunu ukhé uno. Inte avúavá kasá Yisas Karaisini veya minó akhempá ma vain nanin bantafin afova amiya rafu mai vayan béi siaminten mino.

¹⁸ Téi afová ukhékun manáa kéká ano séin nan ída ovaránen e sonantéi uno siren betí ankan ma variyain avúava san betiyan amo siyan mino. ¹⁹ Amo siyan mifo Bafan mano séin nan orino van ma anunu intí téi ma oréku mae mai ma vetíi avúaváká ma ve amo siyáken kákan baya siyain kayo ano mai fura sen ná Tiyarafenui ákona ano vetimpin baná ban nafi mai o onanté uno. ²⁰ *Mai

fara vara seyo, Tiyarafenui Yafisin pinta veya ana ma siyain mano ída kanaí inten mifo Tiyarafenui ákona vasá báken dorano. ²¹ Tiretí ankan náí yanasá ino vará iya fono. Téin nan tiretin mo uman amiyáken asino va rafono, áa vempáké kamaen avábá uantano vará iniya rafono.

5

Namu Avúavá Ma Variyain Banta Ma Monó Pinte Yo Siantan Baya Ino

¹ *Ída monó inin kéká ano ída variyain pamúku avúavá ma siretí ankampin afoká iyain nan téin me sisimí uman dé iné uno. Tiretí ankani monó pinté mana vanta ano ve afóen aná bá aau variyan mino sen tisimikhen mino. ² Mai fará tiretí ankan au khákan mana iyákeyá ída arunaná mádeyá ayave van iya rafono. Tiretí monó pinta mai vanta fará ída yo siantiya rafono.

³ *Téi siretí ankani yan bukhafafin ída vá umpo siretí aunampin mi vá uno. Máan tukhéi séi ena ena siretin má báí mai vanta ano ma varein avúavá inka fefá dainté uno. ⁴ Tetisi Bafan Yisasin aviká ma siretí ankan átaru esí maé tesi inimpin tiretin má báken inká tetisi Bafan Yisasini ákona ano ma siretin má ena ena vaintasá ⁵ *mai vanta monó pinta yo avian Ban Anon ayampin amesin ná beni ume vukhafa namu uvintin baré intin ná Bafan ma erin nain damusá Tiyarafenu ano véini aunan evaránen avirano.

⁶ *Tiretí aví anan daní iya vákeya mai ma namu avúavasí iyain ifá en nan para oriyan ban mino. Mai avúavá ma áesin ma mana ano varen oriyan baré intin maen mai ano minópin orera inten mifo siretí ídá afová ukhe rafono. ⁷ *Mai ma namu avúavasí iyain banta yo siantáde vá kama e vano. Mai fara vara seyo, Yisas Karaisi anon avo uantan dunan ma nan sipisipi arará an daven tetintá ákonte ukhen mino. ⁸ *Máan tukhein nará erí tetí ankan ída vá pefá ma omáká niyá ein bereti an dé namu avúavasí iyáké ída yisi vain bereti ma niyá ein an desá kamaen ma funtákein avúavá

* **4:12:** Mat 5:44; 2Te 3:8 * **4:15:** Kar 4:19 * **4:16:** Fir 3:17 * **4:17:** Apo 19:22 * **4:20:** 1Ko 2:4 * **5:1:** Riv 18:7-8; Diu 22:30 * **5:3:** Kor 2:5 * **5:5:** 1Ti 1:20 * **5:6:** Kar 5:9 * **5:7:** Ais 53:7; 1Pi 1:19 * **5:8:** Diu 16:3

ana vá bará tifano. ⁹ Pamúku avúavasí ma iyain nanin banta vá tiretí ankan ída vá manafin banon tiré téi fefá bompon uvaman amikharé uno. ¹⁰ Barará nanin banta ano ma famúku avúavá bariyan ma ena ina yana san aran naren umoyan bariyan ma inká kampun ayarafenurá monó tiyan ma iyain mai kéká ampeno vara siamiya rauno. Ída ino. Máan nanin banta ma me ampeno vará mai fura se ma vara vasá me ampeno. ¹¹ *Taréa ma séi vompon uvaman tiretí ankan ma amiyaruna mai mana vanta ano ma siretin má monópin bá uno siren ma famúku avúavá baren ma ena ina yana san aran nen ma kampun ayarafenurá monó ten ma ena oyampá baya sen ma inká ákona non naren óen en ma kampun avúavá póké ena vanta ina yaná umoyan baren ma iyain mai vanta vá manafin ída vákeya yunan nano van muno.

¹² Ída ma monópin bain kéká ma yaimin mai senti yoran naino. Ída ino. Monópin ma vain kéká ma yaimin mai setisi yoran mino. ¹³ *Monó ma ída inin afokhampin ma vain nanin bantan Tiyarafenu ano yaimintéin maen mai van Tiyarafenui vompon dóki ano máa sikhen mino. “Namu vanta ma siretin aúbaná bain ná do siantaro.” *Diu 17:7; 19:19; 21:21; 22:21, 24; 24:7*

6

Monópin Bain Kéká Ma Avían Kópin Kain Baya Ino

¹ Monópin bain kéká bá ma aruve asive uareya mai uman monópin ma vain kayorá desin puntaran nain nan pará kópin puntarano van betin avire oré iya fono. ² *Manáa yamú dákó intí ma setí monópin baruna kéká ano ma ma vara ráke nanin bantai avúavá ma yaidé afová ó tifanuna siretí ankan ídá afová ukhe fono. Inaimpáké barará nanin bantai avúavá daimin nompo saréa ma sító uman kayo ma vain kanaí eyá eyantá mai uman kayo ará amin aa fáké daiman onante fono. ³ Enisori kayo ano ma yoriyá ein avúavá ma inaimpáké tetí monópin ma varuna

nanin banta ano ma yaidé afová ótifanuna mai siretí ídá afová ukhe fono. Afová ma ukhanteya ma varará ma sító uman kayo vain mai kasae vá eyantá daiman onano. ⁴ Máan tukhanti monópin ma vaona kayo aúbaná ma uman bantiya mai fará tiretiyantá mai uman ída funtarononá iyá baru kópin baré oré iya rafono. ⁵ Tiretí mumunan ma iyaona kayo aúbanápin ídá kama ineine vá bain kéká báken ná mai uman kayo funtaran nainí iya rafono. Tiretí ankan ma kópin bare oriyaona avúava san mi ayave ono van ma vaya siamiyá uno. ⁶ Monópin ma vain banta ma avireya afokhampin ma vain kéká avorá ma mo kó tiantiya ona van mi sakha iyá uno.

⁷ Monópin ma van nain kéká bá ma aruve asive urante mai inka ayave manta ompo ída vá mai uman bare kópin oriyákeya siretí ará ana vá ameno. ⁸ Ída ma máan tinten mae mai siretiyan mi namu avúavasí eya monópin ma vain kéká kampun tire avire kópin oriya ono.

Ída Ma Famúku Avúavá Ma Variyain Baya Ino

⁹ *Namu avúavá ma variyá ein kéká ano Tiyarafenui Yafisimpin ída ódinten mifo mai ídá afová ukhe rafono. Pamúku avúavasí ma en noin kéka safi varará danáká ma monó tiantan nafi ena ana safi ena avafun nafi ma varen non má inká banta kéka safo ain iyampon kéka safo ma nókeya ena vanta ano famúkuí uantano vará iya rafo inká banta ano vanta vá ábasuí iya rafo ¹⁰ aa ena ina yanasinta umoyaní in kéka safo inká kokhon ona vantí bano van anunu in kéka safo aa óen non nan kéka safo aa ena namu vaya sen asin kéka safo aa kampun tiriya ena ina yaná baré no rafo mai kayo ano ída kanaíeya Tiyarafenui Yafisimpin ódin nono. ¹¹ *Tiyarafenurá ma ída mumunan ukheya fefá manáa ano mai avúava sinta varyiare ompo saréa Tiyarafenu ano mai ume kayo sesé uantáden maman beinaí uraya va ono. Mai ma Bafan Yisas Karaisi

* **5:11:** 2Te 3:6; Tai 3:10 * **5:13:** Diu 13:5; 17:7 * **6:2:** Rev 20:4 * **6:9:** Kar 5:19-21; Efe 5:5; Rev 22:15

* **6:11:** Tai 3:3-7

ano ma varein avúava san má inká Ti-yarafenui Kantá Aunan mano setin túpin ákona yorarí iyaintá báí Ti-yarafenu ano siretin nan puntákein nanin banta e sen ariyan mino.

Bantai Au Vukhafa Mai Kantá Aunan Amá Ino

¹² *Tiretí ankan kasaé minó danasinta varanté uno sin nompo mai yanasinta finte manáa yaná ano ída ayainten mino. Minó danasinta séi kasaé baranté umpo ída vá mai yanasinta ano sentá dafisino.

¹³ *Dunan ma vain mai sirápin mi nékun aravé iyan maen tirá ma vain mai yunan báin mi van minon manáa ano séiya mifo ínaimpáké Ti-yarafenu ano mai ma anunu in avúavá do varanten mino. Máan tintéin mi famúku avúavasí ino vara setin tu vukhafa uvamádan ban naino. Ída ino. Bafani yorarí ino van mi su vukhafa uvamádan ban mi Bafan mano setin turá dafisiyan mino. ¹⁴ *Ti-yarafenu ano ma setisi Bafan púkáin ma masí pinte orun avían manteiníi en mi vei ákona fóké tetin tu vukhafa masí pinte evaránen tivían mantanten mino. ¹⁵ *Tiretí ankani au vukhafa ano ma Yisas Karaisini mana mana vukhafa vain mai ídá afová ukhe rafono. Mana vantai au vukhafa ano Yisas Karaisin nina ma vantin maen béi kasaen ná mai vukhafa fóké pamúku avúavasí inten nafino. Ída uron mino. ¹⁶ *Mana vanta ano ma mana nanin pamúkuí uantanten mai mikan nan mano mana vukhafaíi inten mino ma sikhein ídá afová ukhe rafono. Mai fara vara seyo, Ti-yarafenui vompon dóki ano sikhen mino. “Míkanan mano maman mana vukhafaíi é iyan mino.”

Esé 2:24

¹⁷ *Máan tiyan mifo Bafantá ma súpá ukhein kayo ano aunampin béin má man-man manafiní ukhen mino.

¹⁸ Pamúkuí ma in ume finté me ampire vá karan orono. Ena ume kayo ano ída aú bukhafa ano ma umeí einí iyan mino. Para vara seyo, famúku ume ano aú pintéi yákó iyan mino. ¹⁹ Tiretí ankan aú ma vain mai Kantá Aunani kákan monó namun mi vákan Ti-yarafenu anon Kantá Aunan

tiretin amikhan maifin ban mifo ídá afová ukhe rafono. Tiretí ankan ída siretí inan ba ompo Ti-yarafenu ina ono. ²⁰ *Para vara seyo, Ti-yarafenu anon esantakhein miyan pókéi siretin miyaní uádaya va ompo siretíi au vukhafa fókesá beni yorarí iyákeya véin aví ana vá daní ono.

7

Ábasuí Ma Ini Afova Vaya Ino

¹ Tiretí ankan ma vompompin ina ukharé eona mai vaya anan taréa siamenté uno. Banta ano ma ída anasi varano sinte mae mai kaman inono. ² Máan tin nompo famúku avúavá ano mo kákaní iyái mai van banta ano anasi varantin ná inká anasi ano vanta varantin ná ino van mi siyá uno. ³ Banta au ma vain mai anasi inan ban mifo ída vá pákaan ákona intin inká anasi ano máan mana en be au ma vain mai vanta inan ban mifo ída vá pákaan ákona ino. ⁴ Be aná ano ve au ampian be avafun amintin ná inká be avafun má dere máan mana vá ino. ⁵ Banta vá anasi vá ma manafin bákeya vanasíi iyare ma manáa afará pa váké timúkintó uno sire ará manafiní ure ma varé inte vá aine vá evaráne vanasíin avúavá maman kaono. Para vara seyo, ábasuí ma ukhein kéká ano ma aui anunurá ída yafisintin maen Ban Anon mano akhenóka inten mino. ⁶ Tesi ineinefin ma vain bayan tiamiyá umpo vanasí in avúavasá are uantiya rauno. Ída ino. ⁷ Minó banta ano sen tan den ída anasi varan para vano sé inikhé umpo minó ano ída manaí ukhé tiféuno. Ti-yarafenu ano ábasuí ma in amusin manáa kéká amiyan inká ena kéká ída ábasuí in para ma van amusin amiyan ukhen mino.

⁸ Máan tukháí ída anasi varan ma inká banta ída varan ma ukhein kéká bá kentosí ma ukhein kéká ba san mi siyá uno. Téin tan den ma ída ábasuíen para ma van mai kama ukhen mino. ⁹ *Máan tukhen mifo manáa ano ma vanasíi in anunurá ma ída kanaíen dafisirí intin maen kasaen betí ankan ábasuí inten mino. Para vara seyo, vanta varantin ma inká anasi

* **6:12:** 1Ko 10:23 * **6:13:** 1Te 4:3-5 * **6:14:** Rom 8:11; 1Ko 15:20; 2Ko 4:14 * **6:15:** Efe 5:30 * **6:16:** Mat 19:5 * **6:17:** Yon 17:21-23; Rom 8:9-11 * **6:20:** 1Ko 7:23; 1Pi 1:18-19 * **7:9:** 1Ti 5:14

varantin ma inain avúavá anon pamúku avúava san ída ará mantanten mino.

¹⁰ *Máan tukháí mai ma ábasuí ukheona kéka san mi Bafan mano ákona vava sikhái mai vayan tiamiyá umpo sesi vava vaino. Ída ino. Banta aná ano ída vá be aná me ifá ino. ¹¹ Máan tinten mifo anasi ano ma ve avafun me ifá inten maen mai ena vanta ída vá o varyáken ná evaránen be avafu vaípa orintin ná be avafu ano ída vá be aná ifá ino.

¹² Taréa manáa kayofin mi siádanté uno. Mana monópin ma van nain banta ano ma ída monópin bain nanin ma mantaré intin ma ven má bano van inikhantin maen ída vá mai nanin ifá uantano. Bafan mano va ma man baya sian naifo seyantái siyá uno.

¹³ Inká monópin ma van nain nanin mano ma ída monópin bain banta ma mantaré intin ma ven má bano van inikhantin maen ída vá mai vanta ifá uantano. ¹⁴ Mai fara vara seyo, ída ma mumunan iyain banta ano ve anái mumunantái kantasí ukhan inká ída ma mumunan iyain nanin mano ve avafuni mumunantái kantasín iyan mino. Ída ma máan tesin maen tiretí ankan akhafana ano ída kantasien pain má banten mifo mai avúavá ma varesin mi Tiyarafenu avorá kantasí inten mino.

¹⁵ *(Máan tinten mifo ída ma monópin ban nain nanin banta ano ma ve avafun nafi inká be ana safi ma ifá uantanti mae mai áesin ná orino. Ída mumunan in nanin banta ano mumunan nanin banta vá manafin ída vanten mino. Mai fara vara seyo, ará kusin má bano van mi Tiyarafenu ano ve akhafana arakhen mino.)

¹⁶ *Anasi kayo oe, afovasá ono. Tireti ma mumunan ukhesin ma vanta kayo ano onanten maen mai ano kasaen ayaintin ará baeranten mino. Inká banta kayo oe, afovasá ono. Tireti ma mumunan ukhesin ma anasi kayo ano onanten maen mai ano kasaen ayaintin ará baeranten mino.

Intéa Avúavá Kasá Banan Ná Tiyarafenu Arákaya Mumunan Ukharé Intefo Mai Avúavákasá Bano

¹⁷ Tiyarafenu ano ma araádaren intéa varurasá kainten nafi mai van eyo sire vá mai ma esé ákona uan mantanona rasá

ba oriya vano. Minó akhempá mai man baya anan monó nanin bantafin tiamiyá uno. ¹⁸ Pefá ma ída mumunan ukhen au khakharein banta ano ída kanaíen ída ma au khakhein banta an danten mino. Inká ída ma au khakhen mumunan uvin nain banta ano ída vá au kha ino. ¹⁹ *Mai fara vara seyo, au khain avúava safi inká ída ma au khain avúava safi mai sító daná ifo Tiyarafenu man baya ánain ma vákurin manon kákan danasí ukhen mino.

²⁰ Intéa avúavá kasá banan ná Tiyarafenu ano arákayá mumunan ukharé intefo mai avúavákasá béin má kase vano.

²¹ Éi ma miyan ída varan doran banta váesin ma mai finte arakhá intiya mae ída vá áesin mai ano éin kokhon ineine amiyán bantiya vá kusin bare vá bano. ²² *Éi ma umei ída miyan ban

doran banta varé esin ma mai fintena Bafan mano arakhanti mae mai véi anon umei ákona finte utúanten mifo vá afovasá ono. Miyan baran doran banta váesin ma Bafan mano arakhantiya mai saréa veni miyan ída varan doran bantaí e ono. ²³ Tiyarafenu ano esantakhein

miyan pókéi siretin miyaní uádaya va ompo ída vá barará avúavái miyan ída van doran bantaí ono. ²⁴ Máan tukhein nan mi mumunan tifá tiváeyan noe, intéa avúavákasá banan ná Tiyarafenu ano arákayá mumunan ukharé inte fo mai avúavákasá béin má kase vano.

Ída Ma Ábasuí Ukhein Kékái Vaya Ino

²⁵ Máan tukhantí ída ma ábusuí in kayoi afova vayan tiamenté uno. Bafan mano ída mana ákona vava sisimikharé intí tiamenté umpo véi ma sen afová ukhá beni arunaná áupin ma fura sé baruna vanta anon man baya siamiyá uno. ²⁶ Taréa ma ara ara uman afoká iyain mai van mi mai ma vaona avúaváká para vano van tiamiyá uno. ²⁷ Taréa ma ábasuí

ukhanteya ída vá durafurono van ono. Ábasuí ma ída ukhanteya mai ída vá ábasuí ono van en nono. ²⁸ Máan tin nampo ábasuí ma ukhanteya maifin ída umei ukha ono. Ínka arinta ano ma vanta varanten mai ída umei inten mino. Ábasuí

* **7:10:** Mat 5:32; 19:9; Mak 10:11; Ruk 16:18 * **7:15:** Rom 14:19 * **7:16:** 1Pi 3:1 * **7:19:** Rom 2:25; Kar 5:6; 6:15 * **7:22:** Frm 16; 1Pi 2:16

* **7:15:** Rom 14:19 * **7:16:** 1Pi 3:1 * **7:19:** Rom 2:25; Kar

ma uvintin kokhon uman afoká intéi aurá dafiseno van mi ma vaya siyá uno.

²⁹ Mumunan tiyofi sífá tiváeyan noe, yamú inka asíka ukhái séi ma vaya siamenté uno. Tare rákesá anasi ma mantan nain banta kéká ano ída vá áintin ábasuí in avúavá ano vetíi vampin kákan danasí ino.

³⁰ Amusin mano fi arunaná ano fi ona vará o afasí inten nafi mai ano ída vá áintin Tiyarafenui yorantá aa iyarano. ³¹ *Mai ma ma vara ráke yanasinta ma varen aruven iyain kéká ano ída vá mai yanáká ákona inin kaiyáken kama aasákesá baren aruven ino. Para vara seyo, minó ma varafin ma vain danasinta ano mo kípanten mino.

³² Minó avúavá ma variyanteya mai ineine ampesin eravino van muno. Anasi ma ída mantan nain banta ano inté uresá Bafan amusin amente rafu siren beni yorarí ana ono van é iyan mino. ³³ Mai avúavá anasi avafu ano ída kama uren baré iyan mifo mai ma ve aná amusin ameno van ma iyain ineine anon ³⁴ beni kama ineine máden daimiyan mino.

Máan mana en mi kentó nanin kayo vá inká arinta kayo vá ano fura sen be aú bá aman má Bafan amiren beni yorarí ono van é iyan mino. Máan tiyákan banta ma mantein nanin mano ma vara ráke yanáká inin kaúden mai intesá uré te sivafun amusin uantante rafu siren kokhon ineine é iyan mino. ³⁵ Máan tukhái ma vaya ma siamiyaruna mai siretí ankan kama e vano van mi siyá umpo siretin na mai yanáká are uantiya rauno. Ída ino. Kama e vákeya intesá esin ná ayainti Bafani yorarí inte fo mai avúaváká dafíbeya yorano van mi siyá uno.

³⁶ Mana vanta ma arinta amikhantin mai vanta ano ma ayáká báken ída ákonæen be aurá dafisirí ukhantin maen kasaen ná mai ma amikhá ein arinta varano. Maifin ída ume vanten mino. ³⁷ Máan tinten mifo mana vanta ma ena ano ída siamintin ma vei anunu ánain dakhafen mai ma amikhá ein arinta van ída varan kasaé banté uno siren ma ve aurá dafían ákona inten maen mai yere kama ukhen mino. ³⁸ Máan tukhantin ábasuí ma ukhen ban mano kama ukhen

mifo inká ída ma ábasuí in mai anon moéken kama ukhen mino.

³⁹ *Mana nanin ma ve avafu ída furin para vantin maen ída ena vanta varanten mifo ve avafu ma fúbintin ena vanta ma varano van inten mai Bafantá ma mumunan ukhan nain banta vá barano. ⁴⁰ Máan tukhen mifo se ma inikheruna mai nanin mano ma ída ena vanta varan para ma van mi kama ukhen mino. Téi ma iniyaruna ma vaya kayo Kantá Aunani ineinerái siyá uno.

8

Namu Yanasintará Ma Ákontein Baya Ino

¹ *Namu yaná baimpin ne siré ma yunan pon unádé ákonté iyaruna fákena vaya ino. Kákan afova ma manté tiferuna van mi su khákan iyá tifé umpo ena ma ará amin avúavá anon monópin ma vain nanin banta ará ákona uanté iyan mino.

² *Mana vanta ano ma siyáken minó danái ana afová ukhé uno ma siyain mai ída fura sen afova ukhen mino. ³ Máan tukhen mifo Tiyarafenu van ma anunu é iyain nanin bantan Tiyarafenu ano afová ukhen mi vetintá dafisé iyan mino.

⁴ *Máan tukhen mifo namu yanáká ma ákonte uran dunan pontá mai náiesá tétifante rafuno. Mai fura ino setí ankan afová ukhékun ída ena ayarafenu vákan mana Tiyarafenu máan báé iyan mino. ⁵ Mai fara vara seyo, manáa ano ma iniyain mano ma varará kokhon ayarafenu vákan inká inarufá deren kokhon ayarafenu van ne sé iyan mino.

⁶ *Máa sé iyan mifo setí ankan ma inikheruna mai seti Sifóe mana Tiyarafenu anan báken béi anon minó daná afoká uráken béin dafiká bá uno sé iniyá tiféuno. Máan tukhan mana Bafan ma Yisas Karaisi vain mai véin pintéi ara ara yaná afoká ukhan béi anon tetin taunan timikhá bá tiféuno.

⁷ Máan tukhékun maen minó monópin ma vain nanin banta ano ana va mai yaná afová ukhen naino. Ída ino. Manáa ano fura ayarafenurái monó tiyá uno siren mai ma ákonté uran dunan pon niyaré

* **7:31:** 1Yn 2:17 * **7:39:** Rom 7:2-3 * **8:1:** Apo 15:29 * **8:2:** Kar 6:3 * **8:4:** Diu 4:39; 6:4; Kar 4:8

* **8:6:** Efe 4:5, 6

íkan mai avúavá anon betí ineine mo asuse ukhen mino. ⁸ Máan tukhen mifo ara ara yunan ma nan avúavá ano ída sivían Tiyarafenun ádé mo khainten mino. Dunan ma suraré bá tifanuna van ída mana yaná o afeyorantin inká dunan ma nanuna finté ída mana kama yaná o vará tifanté uno.

⁹ *Máan tonté tifé umpo siretí ankan ma nan daná ino sire kasae nan nona ano monópin ma ída ákona van bain kékái ineine máde asuse uresin eraven ankamin nafo yafían ná ákona ono.

¹⁰ Mai fara vara seyo, ída ákona van ma monópin báken aurakhá ein nanin banta anon oniyantiya kampun ayarafenui monó namumpin nan nono. Máan ma inona anon betin ará mantaantesin mai ma kampun ayarafenurá aurakhá ein dunan pon naren eraven ankaminten mino. ¹¹ *Máan ma inona avúavá anon mai ma ída monópin ákona ukhein kéká aya ono van ma Yisas Karaisi e fúkein mai kékái ei afova fóké máden asuse inono. ¹² Máan tesin ma monópin ída ákona ukhein kéká ano ma eni namu avúaváká ma umeí intiya mai Yisas Karaisin má deren umeí uantan nono. ¹³ *Mai van mi séi ma nanuna yunan pon mano ma monópin ma ída ákona ukhein kéká mamádantin eraven ankamoren ma ukhantí maé mai séi ída evarané mai yunan nanté uno. Mai fara seyo mai ma monópin ída ákona ukhein kéká ída mamádékun eraven ankamino van muno.

9

Aposeri Kayo Ano Vetí Yorantá Ma Miyán Baran Baya Ino

¹ *Téi mai manáa kéká an dé monópin kama erá ba rafuno. Téi ídá Yisas Karaisini vava varen orin bantá* ba rafuno. Te suu fóké ídá tetisi Bafan Yisasin onte rafuno. Téi ma ákona yorarí iyaruna rasá tiretí ankan Bafantá mumunan iya rafono. ² *Ena kéká ano séin nan ída aposeri e siyan mifo siretí ankan afová en ná téi aposerin bá uno. Para vara seyo, sireti

ma fura mumunan má ma vanteya mai séi nan Bafani aposerin ban mino sin nono.

³ Téimpin ma aposeri yorarí in ákona váká ma yoriyaruna van ma yaimiyain kékái evarané tiamiyá uno. ⁴ *Kasaerá tiretí ankan amápin bariyá tiretin má manafin dunan ná non má nan tifante rafuno. ⁵ Ena aposeri kayo vá Bafan Yisasin afá kéká bá inká Pitan má an derá kasae monópin ma vain nanin aviaré monó dorarí é nonte rafuno. ⁶ Áa Banabasi rasan mano aná moní baran dorarí urerá mai yoran aya onte rafuno.

⁷ Arugin banta ano kasaen ná beyan dunan dosiren nariyan ná para yoranten nafino. Inká dunan ma yoran banta ano yunan mana yoriyan báken mai finte ídá manáa unáden nanten nafino. Inká sipisipirá ma yafisin banta ano fara aná dafisiyan báken ídá nan anu kháden nanten nafino. ⁸ Tiyarafenui man baya ano ídá mai van tikhará bantai ineine finté tiya rafuno. ⁹ *Mai fara vara seyo, Mosesini man baya ano máa siyáken, “Kao ano ma uviti aítan do siviyáken ma yunan niyanti ída vá así ono,” sikhén mino. *Diu 25:4* Tiretí ankan ma iniyaona Tiyarafenu ano kao van maná tiyan nafino. ¹⁰ *Mai ma siyain mai seti Tiyarafenui yoran nanin banta kayo va san má deré tiyan nafino. Eyo. Mai setin ma san nan mi siyan mino. Dunan ma yoran banta ano yunan ma yuyasiyáké mai fintena manáa naanté unon té iyan mino. Máan manae vá monó dorarí ma iyain kéká ano ma mo aya iyanti vá anona vetin ná aya ono. ¹¹ *Tiretí ankampin monó baya fókéi yanayun ma fafaseiní urékun ban mifo yunan má tuí daná ba san ma inantiyá tiferuna mai siretimpin ídá kanaí ukhayá anona ída inan tiya iya rafono. ¹² *Ena kéká ano ma monó baya siretin me siamiyain nan ma vetin aya iyaona mai setin má dere ídá moéke siya inte fono.

Máan tiyaré Yisas Karaisini kama vava ma oriyain aa iyananuna van mi sireti

* **8:9:** Rom 14:13-15; Kar 5:13 * **8:11:** Rom 14:15, 20 * **8:13:** Rom 14:21 * **9:1:** Apo 22:17-18; 26:16; 1Ko 15:8-9 * **9:1:** Yisas Karaisini vava varen orin banta e ma siyain mai aposeri van mino. * **9:2:** 2Ko 3:2-3 * **9:4:** Ruk 10:8 * **9:9:** 1Ti 5:18 * **9:10:** 2Ti 2:6 * **9:11:** Rom 15:27 * **9:12:** Apo 20:34; 2Ko 11:9 * **9:13:** Diu 18:1-3

vaonafá tiya ono van ída ina iyá tiféuno. ¹³ *Kákan monó namumpin ma yafikein kéká ano maifin ma varen eriyain dunan ma né iyain ídá afová ukhe rafono. Íkun uan amin dunan antan ma maifin doriyain kéká ano ma varen mo né iyain mai vá deré ídá afová ukhe rafono. ¹⁴ *Máan mana en mi mai ma kama vava varen mo siamiyain kéká ano mai aa sákéi aya variyan mifo mai ma mo siamin nain kéká ano vá anona vetin aya ono sen Bafan mano ákona vava sikhen mino.

¹⁵ Máan tukhen mifo séin tiya ino van ída uron mi ina iyaré umpo saréa séin araíe siya ono vara siamiya rauno. Ída ino. Téi ma simusin pinté monó baya vanasi sian amiyarunará miyan timeno vara ma vompon uvariya rauno. Ída ino. Te ma yoré oriyaruna yorantá ma miyan inantiré baranté maé mai sesi yoran aa iyaranté paséi mai aésirá téi furono. ¹⁶ *Mai fara vara seyo, Yisasini kama vava ma siamintá ída su khakan onté uno. Tiyarafenu ano séin tútúpein nan mi siyá umpo ída ma siamenté mai séi uman mi varanté uno. ¹⁷ Tesi sinunu finté ma mai avúavá bariyá maé mairá beni miyan baranté umpo mai ída sesi sinunurái variyá uno. Tiyarafenu anon téin aní uren airo ananí urá báké beni yoran bariyá uno. ¹⁸ Téi náí miyan ná bariya rafuno. Monó baya ma sian amiyarunará ma miyan bararen mifo mai vanasi ma kama vava sian amiyaruna van mi simusin manan iyá uno.

Pori Mai Minó Nanin Bantai Yoran Banta Ino

¹⁹ Téin ída mana nanin banta ano miyan timiyantí pasé betíi vava ída inenté umpo minó nanin bantai yoran banta vakesá mai aa sáké banasi o aviadékun ná Yisas Karaisintá mumunan ino. ²⁰ *Yutan kayo vá ma vákesá betíi ankan ma variyain avúavá pókesá o aviadékun ná Yisas Karaisintá mumunan ino. Yutan kayoi man baya ma yakhafiyain kéká bá ma vakesá mai séi ída mai man bayai aránaópá bá umpo veti ma variyain

avúavá pókesá o aviadékun ná Yisas Karaisintá mumunan ino. ²¹ Yutan kayoi man baya ma ída afová ukhein kéká bá ma váké mai vetin an dakhéi mai aa sáké betíi ankan o aviadékun Yisas Karaisintá mumunan iyan mino. Máan ma iyaruna anon Tiyarafenui man baya ída yo variyá umpo Yisas Karaisi ma me yóan kanaí ein man baya aránaói vá uno. ²² *Mumunan ma ída ákona ukhein kéká bá ma váké betíi an dakhéi mai aa sákéi vetin o aviadékun Yisas Karaisintá mumunan iyan mino. Minó kéká ano ma kasaen mumunan oren aa sákéi o aviadékun Yisas Karaisintá mumunan iyan mino. ²³ Yisas Karaisini kama vava ano orera ino van mi yoriyá kun mi maifin beni avábá ano simusin timiyá doriyá uno.

Íú Tiren Ma Uviní In Baya Ino

²⁴ Kokhon mano ma sava iyaré ein pinté mana anoi minó esantaren miyan baré iyan mifo afovasá ono. Tiretí ankan má dere mai avúaváká teya sava iyare vá esantare miyan barano. ²⁵ *Ara ara íú ma siyain kéká ano yafíben baren mi íú tiren minó ma esantarein mano ainen mo kípan miyan mi varé iyan mifo ída kípan miyan nan mi seti yoriyá tiféuno. ²⁶ Mai van mi savifá mo yáan dana siréi mesan ma mo kípan akhen ma vain mi kakhá áké tava iyá uno. Mai ma ayan dámaná ma aru-viyain banta ano ma ayan tavifá karúdein nisa iya rauno. Ída ino. ²⁷ *Ena nanin banta ana monó baya siamé oriyaré ida miyan baranae siré teyan dafíbéi ákona maman one one iyá uno.

10

Kampun Ayarafenuhá Ma Monó Tiyain Baya Ino

¹ *Mumunan tiyofi sífá tiváeyan noe, siretí ankan ída mo áunono van muno. Pefá kámá barafá Tiyarafenu ano konan dákan tetin tináuyan an uanten oriyákan inká non aúbaná pe uantáden mairá betin avían ena ufá kádakharen mino. ² Mosesin

* 9:14: Mat 10:10; Kar 6:6 * 9:16: Yer 20:9 * 9:20: Apo 21:20-26 * 9:22: 2Ko 11:29 * 9:25: Fir 3:14; 2Ti 2:4-5; 4:7-8 * 9:27: Rom 8:13; 13:14 * 10:1: Eks 13:21-22; 14:22-29 * 10:3: Eks 16:35

ma yakhafen orein kéká minó ano konan má un nompin má monó non péken mino. ³ *Inká minó ano enará ukhein avúavápó ma afoká uádan dunan nen mino. ⁴ *Inká minó ano enará ukhein avúavápó ma afoká uádan non nen mino. Mai fara vara seyo, enará ukhein onámaná anon betin má oriyákan mai finten non nein baréin mai onámaná Yisas Karaisi ino. ⁵ *Tiyarafenu ano ma aviren oriyáken maen betí ankan pinté ma kokhon mano variyain avúava san ída amusin uren pasen kámá barafá aruren asuse en mino.

⁶ *Betí ankan ma variyaré einí ukhein avúavá baranuna van mi Tiyarafenu ano fe o útúben mi setin aní ukhen mino. ⁷ Tíretí ankan ída vá manáa kéká an deya kampun ayarafenurá monó tiantano. Para vara seyo, Tiyarafenui vompon dóki ano máa sikhen mino. “Banasi ano omá dunan má non má niyáken pamúku avúavasíen iyaren mino.” *Eks 32:6*

⁸ *Manáa kéká an deya ída vá pamúku avúavasí ono. Máan tiyaren tuenti-tri tausení (23,000) ano maná damú ana furein mino. ⁹ *Inká mai kéká ano ma Bafan akhenóka uan oniyaré in ma osafáe ano untádan purein mifo vá betí ankan an ída vá dano. ¹⁰ *Manáa kéká ano ma aveantumpin baya siyaré ein an ída vá dano. Para vara seyo, mai avúava san mi vetin aren asuse ino van Tiyarafenu ano vanta ma aruan purin enisori siantan erein mino. ¹¹ Mai avúava sinta ma vetin amaniná ma afoká ukhein manon tetin aní ukhen mino. Ma vara ma mo kipan akhempá ma vá tiferuna nanin banta ano afova varano van mi Tiyarafenui vompon dókifin uvamádan baréin mai inka afoká ukhen mino. ¹² Tíretí ankan mantaan ákona ukhé uno sireya aniana iyare mai avúavápin tiretin má dere erave ankamin nampo yafian ná ákona ono.

¹³ Mai avúavá tiretin amaniná dákó inten mifo fefá ma varé ein kéká ano mai ma variyaona akhenókafin orikhen mifo afovasá ono. Mai akhenóka kayo ano siretin maman bararasí uranti ída

mantaan ákona inae siren Tiyarafenu ano vei yorarién ída áin mai akhenóka ano moéken kákaní iyan mino. Tíretimpin ma akhenóka erintin maen béi aa yosirantiya sireti akhen uvesin mai akhenóka ano siretin ída maman bararasí inten mino.

Kampun Ayarafenu Ma Íkun Uan Amin Má Bafani Yunan Nan Avúavá Bá Baya Ino

¹⁴ Máan tukhen mifo séi ma sinunu ukheruna sirona kéká soe, kampun ayarafenurá ma monó tiantan avúava sará péde nentasá bano. ¹⁵ Tíretí ankan kama inin má bain nanin banta ompo vá téi ma sian amiyaruna vava mai furá tiya rafu sireti yantasá daideya afová ono. ¹⁶ *Bafani yunan kain takhoká ma kápi fintena uvaini non niyá tiferuna anon Yisas Karaisini nare vái manafin kasé bá tiféuno. Inká bereti ma kisiré niyá tiferuna anon Yisas Karaisini au vái manafin kasé bá tiféuno. ¹⁷ *Máan tukhein nan mi mana vereti finte ma kisiré niyá tiferuna anon mai setí ankan mana vukhafañ bá tifékun mai anon aní iyan mino. ¹⁸ *Isareri kéká ano ma íkun uan amiyáken ma mai fintena varen mo niyaré ein avúavá anon Tiyarafenu vá manafiní iyaren mifo ovare vá me ineno.

¹⁹ *Nái yana sará téi siamiya rafuno. Mai ma kampun ayarafenu kayorá ma monó ten noin kéká ano ma fura ayarafenu kayon bá uno siren ma íkun uan amiyain mai kákan danasá bará tiya rafuno. ²⁰ *Ída uron mino. Tiyarafenu rasa íkun uan amiyain naifo mai namu aunantái íkun uan amiyái sireti ankan má mai namu aunantá ma monó tiantan avúavá ída varano van mi siamiyá uno. ²¹ *Tíretí ankan ída kanaíeya Bafani kápi finte vá namu aunani kápi finte vá non niyáke inká ída kanaíeya Bafani yunan kain takhókáke vá namu aunani yunan kain takhókáke vá dunan nan nono. ²² *Nái avúavasá bariya rafono. Bafan mano ma Isareri kékái namu avúava san ma uman ameiní ino vará tíretí ankan béin aran amiya rafono.

* **10:4:** Eks 17:6; Nam 20:11 * **10:5:** Nam 14:29-30 * **10:6:** Nam 11:4, 34; 1Ko 10:11 * **10:8:** Nam 25:1-9
 * **10:9:** Nam 21:5-6 * **10:10:** Nam 16:41-49 * **10:16:** Mat 26:26-28 * **10:17:** Rom 12:5 * **10:18:** Riv 7:6
 * **10:19:** 1Ko 8:4 * **10:20:** Diu 32:17; Rev 9:20 * **10:21:** 2Ko 6:15-16 * **10:22:** Diu 32:21

Tetisi ákona ano veni ákona esantakhen minó té iniya rafono.

Tiyarafenu Aví Ma Yaní In Ma Moéken Kákaní Ukhein Baya Ino

²³ *Tiretí ankan mai minó danasinta kasaé baranté uno siya ompo minó danasinta ano va ayainten naino. Ída ino. Minó danasinta kasaé baranté uno siya ompo minó danasinta ano va şiretíi mumunan ákona uantanten naino. Ída ino. ²⁴ *Tiretí ankan ma vanona van ída vá iniyákeya ena kéká ma aya inona vará ineno.

²⁵ Nái safúna kayó sarí urantiya miyani inte fo mai van ída vá nan nafi áa ídá nan nafi seya kokhon ineine iyákeya mai fara vá bare mo nano. ²⁶ Mai fara vara seyo, minó ma varará ma vain danasinta mai Tiyarafenu nina ino. *Íbo 24:1*

²⁷ Ída ma monó tiyain banta ano ma ve amápin ma yunan nano van aviren orintiya mai kasae vá orono. Oresin ma yunan amintiya mai ída vá kokhon ineine iyákeya fara vá máde nano. ²⁸ *Nan nampo manáa kéká ano ma siamiyáken ma yunan kayo mai kampun ayarafenu rá ákonte ukhein dunan pon mino ma sintiya mai vetin ará namu uantan nampo ída vá máde nano. ²⁹ Tiretí ankan ma nanteya maifin ída uman ban mifo mai ma siamin nain kéká ano ma ódaren ará uman daantan nain nan mi siamiyá uno.

Mai anarái séi ma ída variyaruna avúavá ma ena ano varano sintí mai ída kanaí é barante rafuno. ³⁰ *Tiyarafenu ma susu siantádé timusin iyá nanuna yunan nan mai fará uman barante rafuno.

³¹ *Dunan má non masá nante fo áa manáa yanasá barante fo mai Tiyarafenu aví ma maman daní in avúavá kasá barano. ³² *Tireti ma varanona yanáká ída vá áesin Yutan kayo fi áa ena anan nanin banta fi áa monó nanin banta fi vá eraven ankan mino. ³³ *Téi má deren mai aa yakhafiyákéi minó nanin banta ma amusin amenuna yanasinta anan bariyá uno. Intéa yanasá tempin kama ukhen nafi mai ída sesi sinunurá bariyá umpo ena nanin banta ma ayaintin

Tiyarafenu ano vetin evaránen aviraren ukhein danasinta anan bariyá uno.

11

¹ *Yisas Karaisi ma aní ukhein ánain ma séi vákuriyarunaí e vá tiretí ankan téi ma aní iyaruna sínain bákurono.

Banasifin Ma Funtákein Avúavaká Monó Tin Baya Ino

² Tiretí ankan ma séin nan para ineine iyákeya ma inká téin tisimein baya ma siretin tiamékuya ma fákakheona van mi amo siyá uno. ³ *Timusin iyá umpo mana yaná tiretí ankan afová ono van muno. Minó bantai ánon mi Yisas Karaisi van mi inká anasii ánon mi ve avafun ban mi inká Yisas Karaisin ánon mi Tiyarafenu van mino. ⁴ Ánontá ma yóki yádáken amúken ma inká sakhanampa vaya sé iyain banta kéká ano mai vei ánon Yisas Karaisin nan ída iniyan mino. ⁵ Ánontá ma ída yóki yádáken amúken ma inká sakhanampa vaya sé iyain nanin kayo mai ve avafun nan ída iniya inká be ánon do ma minó do varukheiníi iyan mino. ⁶ Anasi ano ma ve ánontá ma ída yafinten ná be ánon do asíkarasá kavino. Anasi ano ma ánon do asíkará kaven do varukhen in nan ma ayave van inten ná be ánontasá dóki yafino. ⁷ *Banta ano ma ída ánontá dóki yafin nain mai véi Tiyarafenui aman manon mi váken beni kakhan mái van mifo anasi ma vain mai vantaí kakhan mái van mino. ⁸ *Mai fara vara seyo, vanta ano ída anasi finté afoká ukhen mifo vanta fintéi anasi ano afoká ukhen mino. ⁹ Banta ano anasi aya ino vara uvanten naifo anasi ano vanta aya ino van mi uvanten mino. ¹⁰ Máan tukhantin anasii ánontá ma van nain dóki ano vá béimpin ma vain ákonai aní danasí ino. Mai fara vara seyo enisori kayo ano yafiken mino.

¹¹ Bafani vanasi uno ma sikhein ábasufin ída kanaíen anasi ano ádun bantin inká banta ano ádun bantin inten mino. ¹² Para vara seyo fefá Tiyarafenu ano vanta aufói anasi uvantaréin mi saréa anasi ará pinté banta afoká iyan mifo minó daná Tiyarafenu fintéi erikhen

* **10:23:** 1Ko 6:12 * **10:24:** Rom 15:1-2 * **10:28:** 1Ko 8:7 * **10:30:** 1Ti 4:4 * **10:31:** Kor 3:17 * **10:32:** Rom 14:13 * **10:33:** 1Ko 9:20-22 * **11:1:** 1Ko 4:16 * **11:3:** Esé 3:16; Efe 5:23 * **11:7:** Esé 1:26-27 * **11:8:** Esé 2:18-23

mino. ¹³ Tireti yantasá ma vaya yaimono. Anasi ano ma árontá ída yo yafinton Tiyarafenurá ma amúkin nain mai kama avúavasá inten nafino. ¹⁴ Banta ano ma ánon do ifáin ayasí iyain mai seti vanasi ano ma variyaruna avúavái siretin aní iyan mifo mai vanta ano ídá ayave iyan nafino. ¹⁵ Mai fara vara seyo, anasi kayoi auí danasí ukhen betin árontá dáken amusin amino van mi Tiyarafenu ano ayá ánon do amikhen mino. ¹⁶ Máan tukhen mifo manáa ano ma senti vaya kayo van ma kokhon baya sinten maen Tiyarafenui ena monó kayofin ída ena avúavá bain mai ánain ída vákurinten mino.

Bafani Au Vá Nare Vá Ma Nan Baya Ino

¹⁷ Taréa ma séi siamenuna vaya mai siretí ankan ma amo sin baya va sente rauno. Ída ino. Mai fara vara seyo, siretí ankan ma átaru iyaonafin kama yaná manáai afoká é iyan mifo namu yaná anan esantakhé iyan mino. ¹⁸ *Ma vaya seno van iyáké téi ma inéku mae siretí ankan ma monó átaru iyá eona fin asivúare eraran aúban daintenan mai vaya me sisimíká mai van puran tino sé iniyá uno. ¹⁹ Máan tiyái mai ma aúban dainteona finté mai intéa kéká anó pura sen Tiyarafenui anunu ánain bákuriyan nafi mai siretiyantái afová inono.

²⁰ Bafani yunan nantá ma manafin e átaru uve mai yunan ma neinisa iya vaono. Ída ino. ²¹ Mai fara vara seyo, séin ma sisimí ineruna siretin pinté manáa ano ída ave into siretii yunan afasí iyáke kokhon uvaini nare óen en nan inká manáa kéká ano arafan nan é iyan mino. ²² Tiretí ankani yunan má non má ma nan namun ídá ba rafono. Tiretí ankan Tiyarafenui mono san paen danasí ureya monó nanin banta vá ída ma yunan bain kéká bá ayavé amiya rafono. Téi náiesá té tiretin tiamente rafuno. Mai avúava san tiretin amo sente rafuno. Ída uron mino.

Yisasi Ma Vereti Vá Uvaini Vá Bei Eyo Iyampon Kayo Amein Baya Ino

(Matiu 26:26-29; Maki 14:22-25; Ruku 22:14-23)

²³ Mai fara vara seyo, séi ma Bafan pin-tena vareruna vayan tiretimpin tiádékun oriyan mino. Namuro ayampin ma véin amin nain inuran manan Bafan Yisasi ano vereti orun mamaren ²⁴ Tiyarafenu susu siantáden kisiren temí, “Ma se sui siretin ayaino van amé uno. Máan tiyáke vá tiretí ankan ten nan inisinte vá baro.” ²⁵ *Bereti ma amin naran maen mai ma einí ana en uvaini kápi orun mamaren temí, “Ma kápi mai Tiyarafenu vá ma auyen avúaváká kasen ban mi sesi naren banaé umpo máan mana e niyáke vá ten nan inisinte vá baro.” ²⁶ Mai fara vara seyo, siretí ankan mai vereti vá mai kápi finte vá ma niyasin maen mai anon Bafani furin baya sian dáko iya vasin mi véi ovaránen erinten mino.

Tetisi Sivútivá Daíden Ma Bafani Au An Dakhein Dunan Nan Baya Ino

²⁷ *Máan tukhein nan mi mana vanta ano ma mai vereti vá Bafani kápifin má ma niyáken ma ída funtákein avúavasí ma inain mai véi Bafani au vá nare vái fainí uren ume avúavái varen mino. ²⁸ Máan tukhein nan mi mai vereti vá kápifin má ma nano sinte vá ei ineine vá aú bá daíde inire vá nano. ²⁹ Mai fara vara seyo, mana vanta ano ma Bafani au van ída kamaen inin nan ma mai vereti vá kápifin má ma nanten mai ano veyantái Bafan mano ma yaíden amin nain uman o maman be amaniná kainten mino. ³⁰ Mai anarái siretí ankan pinté kokhon ná ano ída ákona van aí bariyan maen manáa ano inka fúken mino. ³¹ Máan tukhen mifo setisi ineine vá tú bá ma yaíde ma nékun maen Tiyarafenu ano setin ída yaiminten mino. ³² *Máan tonté tifé umpo Bafan mano ma setinti sivútivá daíden ma uman timé iyain mai anon tetin puntariyain mai varará nanin banta vá ída uman bará tifanté uno. ³³ Máan tukhen mifo vá mumunan tiyofi sífá tiváeyan noe, Bafani yunan nanovan ma átaru inte vá ben avein maran ná ono. ³⁴ Arafan uron ma furinti e amá nare ma yunan nare e átaru inona mai anon e amaniná ída uman e mamádan nono.

* 11:18: 1Ko 1:10-12 * 11:25: Eks 24:6-8; Ibu 8:8-13

* 11:27: Ibu 10:29 * 11:32: Ibu 12:5-6

Ínainpá ma séi oronté maé ena vá mo inin amenté uno.

12

Kantá Aunan Ma Amusin Amiyain Baya Ino

¹ Mumunan tiyofi sífá tiváeyan noe, Kantá Aunan mano ma siretin mana mana amiyain amusin nan taréa vompon uva-man amenté uno. Mai fara vara seyo, Kantá Aunan mano ma amiyain amusin ída afová ukhen ná mai kamaé tiameno van muno. ² *Tiretí ankan ma ara ara yanáká ma monó tiyan nan maen mai yanasinta ano siretí ineine yo yarifaádaya ída veya siyain ayarafenu kayorá monó tiantiyare ono. ³ *Máan tiukhein nan mi siretin tiamiyá uno. Tiyarafenui Kantá Aunan má ma veya siyain kéká ano ída kanaíen Yisasin amaniná aau amino van Tiyarafenun tiaminten mino. Inká ída ma Kantá Aunan ban nain kéká ano ída kanaíen Yisasin nan Bafan mino sinten mino.

⁴ *Ara ara monó dorarí in amusin ma amé iyain mai mana Kantá Aunan manon mai amusin kayo amé iyan mino. ⁵ Banasi ano monópin ara ara yorarí é iyan mifo mai mana Bafani yorarí anan é iyan mino. ⁶ Tiyarafenu ano ara ara aa sákéi setin túpin doriyan mifo mai mana Tiyarafenu anan báken mi minó pin doriyan mino.

⁷ Minó nanin banta aya ono van mi Kantá Aunan mano monó dorarí in amusin mana mana simikhen mino. ⁸ Kantá Aunan mano manáa kéká kama ineine ma amin afova vá banasi ma monó baya sian amin má amiyáken inká ena kéká mai Tiyarafenui veya ma ovaren me yaíden afová in amusin amen ukhen mino. ⁹ Kantá Aunan mano manáa kéká mai ákonæn ma mumunan in amusin amiyáken inká ena kékái aí banta ma ayofan ákona amen ukhen mino. ¹⁰ Manáa kéká mai enará ukhein aní danasí ma in ákona amiyáken inká ena kékái sakhanampái ma in afova amen ukhen mino. Inká manáa kéká mai ena aunantasá baya siyan nafi áa Tiyarafenui Kantá Aunan tasá baya siyan nafi siren ma afová in ákona amikhen mino. Máan

tiyáken inká manáa kéká mai ara ara veya finté ma veya sin amusin amiyáken inká mai veya ma vaéan amin afova ena kéká amen ukhen mino. ¹¹ *Mana Kantá Aunan manon beyantá mana mana ano ma kanaíen doraren avúaváká ten ákona vá afova vá amídú ukhen mino.

Mana Augin Ma Kokhon Bukhafa Vain Baya Ino

¹² *Banta augin mai ara ara yanái van mifo mai mana vukhafa fintéi yákó ukhen mino. Yisas Karaisini monó nanin bantafin máan manan ukhen mino. ¹³ *Tetí manáa ano Yutan kéká bá tifékun manáa ano ena anan kéká bakan manáa ano ída miyan ban doran kéká bakan inká manáa ano kusen ban kéká ban ukhen mino. Máan tukhan maen mana Kantá Aunan manon Yisas Karaisimpin monó non pétintadá mai Kantá Aunan manan minó ano manté tiféuno.

¹⁴ Máan tukhan mana vukhafa fintéi ara ara yaná ban mifo ída mana yaná ana van mino. ¹⁵ Arantan mano sen téi ída ayan bákéi ída au vukhafafin bá uno sinten mifo mai véi aui mana vukhafan ban mino. ¹⁶ Inká átaren mano sen téi átaren mi váké ída aau varuna séi ída au vukhafafin bá uno sinten mifo véi aui mana vukhafan ban mino. ¹⁷ Minó bukhafa ano aau ana ma vantin mai inté uren ná baya ininten nafino. Inká minó bukhafa ano ma mana átaren mana ma váken mai inté uren ná manáa yaná auna inten nafino. ¹⁸ Tiyarafenu ano veyan ma anunu ein barurái mana mana vukhafa uvaman kaudú uran ban mino. ¹⁹ Au vukhafafin mana yaná ana varé intin mai intesá in nainten nafino. ²⁰ Mai ída kanaí in nainten mifo mana vukhafafin mi ara ara yaná ban mino.

²¹ Auu ano ída kanaíen ayan nan ída éin nan iyá uno sintin inká ánon mano ída kanaíen arantan nan ída éin nan iyá uno sintin inten mino. ²² Manáa ída ákona vain bukhafa mai vanta augin ída vano sen baré intin au vukhafa ano ída kamaen ban nainten mino. ²³ Manáa vukhafa ída kama ukhen mino ma sétiferunan tuí uaké kama iyá uno. Inká manáa siyave vukhafa ma vain mi mai ena ano onana siré aúpasíi iyá tiféuno. ²⁴ Manáa vukhafa mai veni

* 12:2: Aba 2:18-19 * 12:3: 1Yn 4:2-3 * 12:4: Rom 12:6 * 12:11: 1Ko 7:7 * 12:12: 1Ko 10:17 * 12:13: Kar 3:28

yoran ída van mino siyá tife umpo Ti-yarafenu ano minó bukhafa ovare evare uan manafin kaúden ída aví bain bukhafa ino ma siyaona mai kama e yafiseno van mi kain ban mino. ²⁵ Máan tukhein nan mi veraran ída aúban daiminten mifo ventá dafisin maran mi inten mino. ²⁶ Mana vukhafa ano ma aí o yosin maen minó bukhafa anon ai san éiyán mino. Inká mana vukhafa ma maman daní in maen mai minó bukhafa anon amusin éiyán mino.

²⁷ *Minó ano Yisas Karaisini au vukhafan bákeya mana mana ano veni mana vukhafan barú ukha ono. ²⁸ *Tiyarafenu ano ma Yisas Karaisini au vukhafafin asotú uran bain kéká maen masi van mino. Esé ma vain mai vava varen orin banta kéká bakan mairá sakhanampa kéká bakan ukhen mino. Inká kanú manausí ma ukhein kéká mai afova amin kayo vá enará ukhein aní daná ma uvaran kayo vá bakan inká aí ma ayofan amusin ma mantein kayo vá ena nanin banta ma kasaen aya orin kéká bakan ukhen mino. Inká mai ma yoran danasintará ma yafíken doran amin kéká bakan inká ara ara vava finté ma vava sin kéká bá bakan ukhen mino. ²⁹ Minó ano aná baya varen orin kéká ban nafino. Ída ino. Inká minó anó sakhanampa kéká ban nafino. Ída ino. Inká minó anó afova ma amin kéká ban ná inká enará ukhein aní danasí ma in ákona mai minópin ná ban nafino. Ída ino. ³⁰ Inká minó ano aná ayofan amusin mantan ná inká ara ara vava ma sin amusin mai minosá timikhan ná inká mai vava kayo ma o vaéan amin amusin minó anó manté tife rafuno. Ída uron mino. ³¹ *Máan tukhen mifo ena nanin banta ayain amusin ma varan nará moéke anunu ono.

Ena Van Ma Anunu In Avúavá Ano Moékakhen Mino

Máan tin nampo mai yanasinta ma esantakhein avúavá mai siaméku inin nono.

13

¹ Barará nanin bantai ara ara vava vá inká enisori kayoi vava vá pó ma siyákun

* **12:27:** Rom 12:5 * **12:28:** Efe 4:11-12 * **12:31:** 1Ko 14:1 * **13:2:** Mat 17:20 * **13:6:** Rom 12:9
* **13:7:** 1Pi 4:8

ma ena avábá uren ará amin avúavá ma sempin ída vantin maen mai senti vava ano yavena ma ankamiyan avaya yakhaní iyan inká bano ano ma aseinií iyákun pasen mi veni ana ída vanten mino.

² *Máan tinten mifo sakhanampa vava sin amusin baré ma inká Ti-yarafenui aúpa baya afováin baré ma inká minó afova varé ma inká anuyon kayo siantantin ma e afánen orin mumunan ma sempin bantin ma ena ará amin avúavá ma ída vantí maé mai senti yoran mano mo faen danasii inten mino. ³ Ona ída van nanin banta ma se sina yanasinta varé mo amiyá ma inká ira khiyaimpin te su ampian kaiyá ma ena nanin banta ma ída avábá onté maé mai senti yoran paen danasii inté uno.

⁴ Avábá in avúavá maen mai ída ma ainen aran édavin avúavá bakan inká ena ma ará amin avúavá ban ukhen mino. Avábá in ma vain mai ena ina yana san inian namu uanten ma inká be amo siyan be aví daní in naino. Ída ino. ⁵ Avábá in avúavá ma vain mai koen ma veyan nan mana iniyan ma ainen aran nan uaren ena inian namu uantan avúava saino. Ída ino. ⁶ *Avábá in avúavá mai ume yanápin amusin in naino. Pura yanápin ma amusin in avúavá ino. ⁷ *Avábá in avúavá maen ída ainen o kípan maen inká ena ena Ti-yarafenurá inin kaen inká ena ena yamú kama yana san ave en maen inká ara ara uman eriyantin ákonaen dafíken báken ma ena kéká bá manafin ban avúavá ino.

⁸ Avábá in avúavá maen para van oriyan banten mifo sakhanampa vava sin nafi ara ara vava finté ma sin nafi inká kákan afova ma mantein mai avúava sinta kípan ten mino. ⁹ Mai fara vara seyo, saréa sító máarái afova manté tífekun inká sakhanampa vanta kayoi vava vá dere ano sító máarái sian amá iyan mino. ¹⁰ Máan tukhen mifo mai yanasinta ma fura sen minó afoká inain damú ma ma sanáa afová ukhé bariyá tiferuna yanasinta ída vanten mino.

¹¹ Arará iyampon ma váké maé iyampon mano ma vava seiní é arará ineine é inká iyamponi avúaváká noré umpo e inoré bantai ma iyáké maí damú anan iyampon

kayoi avúavá me ampé uno. ¹² Taréa mai Tiya rafenui auná onano van iniyá tifé umpo ven auná maen namu ukhein kamufin ma oneiní iyáken béi anan tetin toniyan mifo ínaimpái veni ádé orivé ben ayafen ódé pura sé afová ó tifanté uno.

¹³ *Máan tukhantin kanú manaú avúavái fara vanten mino. Mai máa maen mumunan in má kama yana san ma avein má ena ma avábá uantan má ifo avábá in manon moéken kákaní ukhen mino.

14

Ara Ara Vaya Vá Sakhanampa Vaya Ma Sin Mái Amusin Baya Ino

¹ *Ena nanin banta ma avábá in avúavasá pákaresin bantiya Kantá Aunan mano ma ara ara amusin amiyain bariyáke vá Tiya rafenui vayará ma sakhanampa vaya sin avúava sará moékentá anunu iyáke vá barano. ² Mai fara vara seyo, mana vanta ano ma ara ara vaya finté ma ara ara sin nain baya mai vanasi ano ída afová inten mifo Tiya rafenu ano anan afová inten mino. Kantá Aunaní ákonarái mai ma aúpá baré ein baya siyan mino. ³ Máan tiyan mifo sakhanampa vaya ma siyain manon ena nanin banta ákona amiren ará kusiantiyan maen betíi monó tin avúavá aya íkan ákona é iyan mino. ⁴ Ída afová ukhein baya finté ma vaya siyain banta ano veyan manan aya iyan mifo sakhanampa vaya ma siyain banta ano monó nanin bantan aya é iyan mino. ⁵ Monópin báke ma mumunan iyaona kéká ano ara ara vaya finté baya seno van inikhe ompo sakhanampa vaya seno van mi moéken tinunu iyá uno. Mai fara vara seyo, sakhanampa vaya ma siyain avúavá anon ara ara vaya finté ma veni ana ída sian amá in ma siyain esantakhen mino. Mana vanta ano ma mai ma siyaona vaya ma kanaíen baéan monó nanin banta ma amintin manan mai finten betin ma ayain baya afová inten mino.

⁶ Mumunan tiyofi sifá tiváeyan noe, siretí ankan ma ída afová ukhanona vaya finté ma siamenuna ano mai inté en ná tiretin ayainten nafino. Ída ayainten

mifo mai ma Tiya rafenu ano aúpá baya sisimein má inká sakhanampa vaya vá inká afova amin baya vá ma sian amenuna anon tiretin kanaíen aya inten mino. ⁷ Okhakhan nafi vano fi ma ída aunan bain danasinta ano ma asiyainí en kamaen puntáden baya siamiyan mino. Mai fara vara seyo, mai yanasinta fóké ma ída kamaen asintin mai ída kanaíen mana ano afová inten mino. ⁸ Inká ufen ma ída kama asirí ma intin mai aruvin banta kayo ano inté uren ná aruvin damú ino sen afová uren ná utá inten nafino. ⁹ Tireti ankan má dere máan manan inono. Ída ma e avaya finté baya sin ma ena vaya finté ma siyain mai intesa uren ná mai vaya ena kéká ano afová inten nafino. Mai ma sinona vaya ano fasavi afokhampin ma oreiníi inten mino.

¹⁰ Ara ara vayan minó akhempá bakan mai vaya kayo ma inikhein kéká ano anan mai vaya kayoi ana vaya kamaen afová é iyan mino. ¹¹ Máan tukhen mifo mana vanta ano ma ena vaya finté baya siyantí ma mai vayai ana ída afová ékun maen mai verasan enafá banta ma vainí ukhé beni vaya ana ída afová ékun inká tenti vaya ana yeren ída afová inten mino. ¹² Máan mana eya Kantá Aunaní amusin barano sire anunu iya ompo Tiya rafenurá amúkesin ná monópin ma vain kéká ayaen amusin amintin ná monó tin avúavá ákona ino.

¹³ Máan turanti mae mai ída afová ukhein ena vaya finté ma vanasi siamin amusin ma mantanona ano amúkesin ná mai ma seona vaya ana ma sian amá in ákona Tiya rafenu ano amino. ¹⁴ Mai fara vara seyo, séi ma ída afová ukheruna vaya finté ma simúkiyakun ten tú iyampon manon amúkiyan mifo sesi ineinefin ída veni ana afová é iyá uno.

¹⁵ Máan tukhantí maé mai séi intesá onte rafuno. Téin tú iyampon ma amúkiyantí mai sesi ineinefó basá timúkono. Inká tú iyampon ma í diyantí mai sesi ineinefó báí í danté uno. ¹⁶ Mai fara vara seyo, en aú iyampon mano ma Bafan aví daní iyan amúkuan amiyan ma susu sian tiyantín ma mai vayai ana ma ída afová ukhá in nain mano intesá uren

* **13:13:** 1Te 1:3 * **14:1:** 1Ko 12:31; 14:39

ná mai vava ma siyaona afová en ná pura ino sinten nafino. ¹⁷ Éi ma susu siantan nona mai kama uron mi inompo mai ma ádé báken inin nain kéká ída uron mi aya inten mino.

¹⁸ Téi ma siretin esantaré ma ara vava kayo fóké banasi sian amiyaruna van mi Tiyarafenun tusu sian tiyá uno. ¹⁹ Máan tiyá umpo Tiyarafenui monó nanin bantafin kasaen ma ineren ukhein dan manápá baya máa vá ten umpo ena vava finté ma siyan míkan tauseni (10,000) vava ma sékun maen kokhon nanin banta ano ída kanaíen ininten mino.

²⁰ *Mumunan tiyofi sífá tiváeyan noe, mai ma sian amiyaruna yanasinta van ída vá arará iyamponi ineine variya vano. Namu avúavápin ma o fékeya arará iyampon an diya van nompo siretii inimpin ná karakhein nanin banta an ná dano. ²¹ Tiyarafenui vompompin Bafan mano máa sikhen mino.

“Ída ontanona vanta kayo finte safi inká ída afová ukheona vava siyain kéká oo ráke safi uaré mai nanin bantafin baya siamenté umpo vetí ankan ída senti vava ininten mino.” *Ais 28:11-12*

²² Ara ara vava finté ma vava siyain avúavá mai mumunan nanin banta ayain baya vaifo mai ma ída ma mumunan iyain kéká ina ino. Sakhanampa vava ma siyain mai mumunan ma iyain kayo ayain baya ifo ída ma mumunan iyain kéká ina vaino. Ída ino. ²³ *Máan tukhein nan mi manáa ída ma mumunan in kéká bá inká mai vava ída afová ukhein kayo vá ano eriyen ma e onantin mumunan nanin banta ano ma ara ara vava fóké ma monó baya siyantín mai van amino uren mai kéká ano óén mi iyan ne sin ten mino.

²⁴ *Máan tukhen mifo sakhanampa vava siyá esin ma manáa kéká ano eriyen ma e inintín ma mai vava siyasin maen mai vava ano vetíi ume maman dáko urantín ará baeranten mino. ²⁵ Máan tintin maen mai kayo aúpin ma ara ara ineine aúpa baré in nain e unen dákó intín aron durafúden Tiyarafenurá monó tiyáken mai

Tiyarafenu ano sireti má pura sen ban mino sinten mino.

Puntákein Avúavá Póké Ma Monó Tin Baya Ino

²⁶ *Máan tukhein mifo mumunan tiyofi sífá tiváeyan noe, mai ma sian ameruna vayai ana sian amékuya inin nono. Monó nanin banta ma átaru uvinte vá manáa kéká ano í desin ena kéká ano afova vava sinti vá inká mai ma Tiyarafenu ano aúpa baya siamikhá in nain kéká ano vá tian dákó ono. Ínká manáa kéká ano ída ma afová ukhan nain baya finté tiresin ena kéká ano vá mai vayai ana sian amá ino. Máan ma inona ano vá Tiyafenurá ma monó tiantan avúavápin ná ákona uantano. ²⁷ Máan tiyantín kan mano fi kanú manáa ano fi ma ena vava finté ma vava seno van ma intín maen ná mai áintín mana ano sirú tirú iyantín ena ano vá mai vayai ana vaéan banasi amino. ²⁸ Aminten mifo ma mai vava ana ma vaéan amin banta ma mai átarufin ída vantín mai ma ída afová ukhein baya finté ma siyain banta ano ana vei ineine finté sá Tiyarafenu vá aúpa baya sino.

²⁹ *Áésin ná kan mano fi kanú manáa ano fi vá sakhanampa vava siyantín minó ano mai ma siyain baya vá daíden afová ino. ³⁰ Afová inten mifo manáa kéká ano ma sakhanampa vava siyantín ma mai aúbanáké mana vanta ano Bafani vava ma varantín mai ma vava siyá in nain banta ano vá bei vava fákano. ³¹ Mai aa sákéi mai ma sakhanampa vava siyaré inona kéká ano kasae eyan tirú tirú iyasín minó nanin banta ano mai vayai ana afová intín betíi mumunan ákona uantantén mino. ³² Mai ma sakhanampa vava siyain kéká ano ve aunantái yafidú ukhen mi vava sé iyan mifo afovasá ono. ³³ Mai fara vara seyo, minó akhempá ma monó nanin banta vaimpin mai ída asusein Tiyarafenu ban mifo ará kusin mana ma amin Tiyarafenu ban mino.

³⁴ *Yutan kayoi man baya ano ma sikheiníen ída vá anasi arinta ano monó átarufin o aníen baya siyáken betíyan ná maman bararasí ino. ³⁵ Anasi ano

* **14:20:** Efe 4:14 * **14:23:** Apo 2:13 * **14:24:** Yon 16:8 * **14:26:** 1Ko 12:8-10 * **14:29:** 1Te 5:21

* **14:34:** 1Ko 11:3; 1Ti 2:12

ma mana inain bantin maen be amápin oriven ná be avafun tasá ina ino. Mai fara vara seyo, anasi ano ma monó átarufin baya sin maen mai ída funtáken mino.

³⁶ Tiretí Koriní nanin banta ano ma iniyaona ano mai Tiyarafenui afova vava ano setimpin mi arái uren mo kípakhen minó tiya rafono. Ída uron mino. ³⁷*Mana vanta ano séi sakhanampa vantán báké monó bantan bá uno se vareya mai sen nan Bafani ákona vayan uvaman timiyan mino sireya afová inonaren mino. ³⁸Máan tinonaren mifo ma vava ma inian kaumpan esin maen mai Tiyarafenu ano éi má deren inian kaumpan inten mino.

³⁹ Mai vará mumunan tiyofi sifá tiváeyan noe, amusin pintesá sakhanampa vava siyákeya inká ara ara vava finté ma siyaintá ída vá are ono. ⁴⁰Máan tin nompo funtákein avúavá pókesá minó daná arakhóku ure varesin ná mo kama ino.

15

Yisas Karaisi Ma Evaránen E Mantein Baya Ino

¹ Mumunan tiyofi sifá tiváeyan noe, pefá ma Yisas Karaisini kama vava siaméku ma inire mantaan ákona ukhaona van tian ákona uantano van mi ma vava senté uno. Mai fara vara seyo, mai vava ma ineonarái mantaan ákona ukha ono. ²Mai ma siame-nuna kama vayará ma ákona mumunan esin maen mairái Tiyarafenu ano aviranten mifo ena yanáká ma mumunan esin mai ída aviranten mino.

³*Mai fara vara seyo, inte vayá mantare rafu mai vava máan tiretimpin tiamé uno. Tiyarafenui vompon dókifin ma sikhá eníen Yisas Karaisi ano setinti umerái e fúken mino. ⁴*Tiyarafenui vompon dóki ano ma sikhare einíen béin masí uran ma kanú manaú damú orivíkan masí pinté e manten mino. ⁵*Masí pinté e mantakharé íkan Pita nare ódaran ínaimpáké eni eyo iyampon kayo ano onen mino. ⁶ Ódaran maí damú anan dan manápá antareti (500) nanin bantafin afoká íkan

onen mino. Afoká íkan ma ontaré ein kéká pinté manáa ano furiyan maen kokhon mano fara van mino. ⁷*Mai oyampáké Yemisi ano véin ódaran ínaimpáké ena baya varen orin kéká onen mino. ⁸*Minó ano ontaréí ínaimpáké iyampon ma kain damú ma esantavin ma fasavi yamú ma mo afoká einí en ten tivorá afokái oné uno.

⁹*Mai fara vara seyo, séi ma fefá Tiyarafenui vanasi aruan puriyaré eruna van téin nan ída aposeri oe sen tarantí eyo iyampon kayoi aránaó bano van muno. ¹⁰*Máa siyá umpo sesi yoran tasa Tiyarafenu ano séin tarisari usintadá máan tukhe rauno. Ída ino. Mai fara vara seyo, ena aposeri kéká esantaré téi yóké umpo mai seyantasa yóke rauno. Ída ino. Tiyarafenu ano vei sarisari fókéi séin pinté uaren doren mino. ¹¹Máan tukhanti séi ma sian amiyaruna mai vava ano fi ena eyo iyampon kayo ano ma siamin nain baya ano fi mai ída enará ukhantiya onan nono. Yisasi ma fúaren e mantakhein baya ma seti siaméku mairá ma mumunan iyaona anon kákan danasí ukhen mino.

Púká Inain Kéká Ma E Mantan Nain Baya Ino

¹² Máan tukhen mifo Yisasi ma fúaren e mantakhein baya ma siamékuya inikha ompo mai faraé tireyá tiréti ankan pinté manáa ano mai ma fúkein nanin banta van ída orun mantanten mino siya rafono. ¹³ Mai fara vara seyo, fúkein nanin banta van ma ída orun mantanten ne sinte mai Yisas Karaisin nan ída evaránen e mantakhen nen tin nono. ¹⁴ Yisas Karaisi ma ída evaránen avían mantakhanti mae mai ma veni furin baya ma sian ameruna vá Tiyarafenui ma ákona inin kaiyaona vá ano mo faen danasí anan inten mino. ¹⁵ Púkein kayo ano ída evaránen orun mantanten ne ma sé tifanté mai seti aposeri kéká ano Tiyarafenui kampun tiantá tifanté uno. Mai fara vara seyo, Tiyarafenui anon Yisas Karaisin masí pinta orun avían mantakhein bantí teti ma siyaruna vava mai kampun mi siyanté uno. ¹⁶ Mai fara vara seyo, fúkein nanin

* 14:37: 1Yn 4:6 * 15:3: Ais 53:5-12 * 15:4: Mat 12:40; Apo 2:24-32 * 15:5: Mat 28:16-17; Ruk 24:34

* 15:7: Apo 1:3-4 * 15:8: Apo 9:3-6 * 15:9: Efe 3:8; 1Ti 1:15 * 15:10: 2Ko 11:23

banta ma ída e mantanté intin mai Yisas Karaisin má deren masí pinté ída e mantakhen mino. ¹⁷ Inká Yisas Karaisin ma ída masí pintena orun avián mantakhe ne ma sinteya mai siretíi mumunan mano mo faen danasí intiya siretí ankan umefin para van nono. ¹⁸ Máan tukhantin mi Karaisintá ma mumunan uven púkan nain kayo ano o afeyoranten mino. ¹⁹ Inká taréa ana Yisas Karaisin nan tiya ino van muno siré ma iniyaruna mai fura sé ma varará ma ída funtákein nanin banta ma vain esantaréi namu uron ukhé bá tifékun mi ena nanin banta ano setin nan arunan usintanten mino.

²⁰ Máan tukhen mifo Yisas Karaisi ma fúbin masí pintena Tiyarafenu ano orun avián mantakhein mai fura yaná ino. Mai ma fúká intin evaránen orun avián mantan nain kékái véi ano anien ifan dunan pinte ma aráien duyasein an mi yakhen mino. ²¹ *Mai fara vara seyo, Adamun pinté uaren purin afoká ukháin mi inká Yisas Karaisin pintéi orun mantan afoká en mino. ²² Máan tukhein nan mi Adamuni kékasi ma in nain mano mai furiyan manan banten mifo Yisas Karaisini kékasi ma in nain kayoi fara van oriyan ban aunan aminten mino. ²³ *Aminten mifo evaránen ma e mantani aa mai máan mi ukhen mino. Yisas Karaisin naren púbin mi ifan dunan ma yuyaseinien béin orun avián mantakhein pasen béi ma ovaránen erin nain damú beni vanasi ma fúkaren masí pinté orun mantanten mino. ²⁴ Orun mantavintin maen namu aunan kayoi ara ara ákona vá inká namuro ano* ma yafisiyá ein má maman bararasí uren dafisin ákona maman Tifóe Tiyarafenun kaúdantin mi ínaimpáké bara ma kípan damú afoká inten mino.

²⁵ *Mai fara vara seyo, Yisas Karaisi ma kin karáká kumantantin maen béi anon beni namuro kayo maman bararasí urantin mi véi yafisinten mino. ²⁶ *Purin ma vain mai sipá kípan namuron bain mai maman bararasí uren beni ákona yo maman karúdanten mino. ²⁷ Mai fara vara seyo, Tiyarafenui vompon dóki ano sikhen mino. “Tiyarafenu ano minó danáká ma

yafisin ákona véin amikhen mino.” *Íbo 8:6* (Amikhen mifo Tiyarafenu vasa mai ma yen amikhein ákona aránaó ban naino. Ída ino.) ²⁸ Máan turen béi ma minó daná ákona maman barasí uren be Afóen avorá orintin maen mai ma esé arái en be Anin minó ákona amikhá ein Tiyarafenu ano minó danáká o ánoní inten mino.

²⁹ Púká ein kayo ano ma ída e mantantin maen betin aya ono van ma monó non péantáká ein kéká ano náiesá tinten nafino. Inká púká ein kayo ano ma ída orun mantanté intin mai náí ana vará purin nanin banta aya intó uno siren monó non maman tiyaren nafino. ³⁰ *Inká náí vará ena nanin banta aya ono van ena ena yamú tetiyantá uman bariyá bá tife rafuno. ³¹ Monó nanin banta oe, fura siré ma vaya siamiyá uno. Ena ena yamú maen purin mano sen má áde suron ban mifo Yisas Karaisi ma siretin má túpá ukhen ma siretimpin doriyain nan mi simusin iyá uno. ³² Nai yanasá barano vará Efesasí ma vain banta kayo vá ma siruviyaruna ano afá tafúna kayo vá ma aruvein an diyá tife rafuno. Ída ma fúkein nanin banta ma orun mantiyain ma vantí maé mai setí ankan ída kanaí é kama yanáká inin kaúdé ave ukhé bá tifanté uno. Mai fara vara seyo, sakhanampa vanta Aisaiya máa sikhen mino.

“Inuran puró tifanté umpo erí tifé omasí iyáké

óen non naré óen ó tifano.” *Ais 22:13*

³³ Ída vá áesin ná mai ma furin pinté ída e mantanten ne ma siyain kéká ano ein máka sino. Mai fara vara seyo, “namu avúavá ma variyain kéká ano kama avúavá aruan puré iyan mino.”

³⁴ Ída vá umeí iya váke ovare vá me ineno. Mai fara va máa siya rauno, manáa ano ma ída Tiyarafenun afová ukhanteya mai siretin ayave vá bano.

Evaránen Ma E Mantan Nain Bukhafai Vaya Ino

³⁵ Banten mifo manáa vanta ano ina iyan ma “Intesá uren ná púkein nanin banta ano orun mantaven inté ukhein

* **15:21:** Rom 5:12 * **15:23:** 1Te 4:16; Rev 20:5 * **15:24:** Namuro maen mai namu aunan kayo vá Ban Anon má bei namu enisori kayo vá ino. * **15:25:** Mat 22:44 * **15:26:** Rev 20:14 * **15:30:** Rom 8:36 * **15:36:** Yon 12:24

bukhafá mamaren ná erintéi vae” ma siyain, ³⁶ *mai farae tiré óen banta ano ma inaeiní iya rafono. Danayun ma varafin pafasiren nan maen ída esé ana orun pótíyan mifo fúaren mi ínaimpá orun póté iyan mino. ³⁷ Inká danayun ma varafin dóden nan baren ma e ampamé iyain mai esesa máan tukhein na yaruan mo yoré iya vaono. Ída ino. Titó asakhakhein ayun mi varafin pafasiren nan baren orun póté iyan mino. ³⁸ Póté iyan mifo Tiyarafenu ano vei anunurái mai yanasinta auí uanté iyan mino. Ara ara ayun ma vain mai vei avúavákái sen orun ampamé iyan mino. ³⁹ Mai ma ara ara yanayun kayo vá káta kayo vá ano ma e ampamiyain má minó danái au ano ída manái ukhen mino. Banta au vá uraran au vá nun au vá inká noyana au kayo vá ano enarasí ukhé iyan mino.

⁴⁰ Máan manan en mi ayompin ma vain danasinta vá barará ma vain danasinta vá ban mino. Ayompin ma auí ukhein danasinta vá barará ma auí ukhein danasinta vá ano ída manái ukhen mino. ⁴¹ Áau ano veyan enará ukhein daná bakan mi inká biyon má ofu kayo vá ano enará ukhen mino. Máan tukhan ofu kayo mai veyan mana mana ano ena avúaváká panu sirú é iyan mino.

⁴² Evaránen e mantan nain bukhufa ano máan manan ukhen mino. Mai ma masí ukhá ein bukhafa ano fútaen namu ukhá intin maen evaránen ma orun mantan nain bukhafa ano ída fútaen namu intin mino. ⁴³ *Tetisi furin bukhafa ma onékun maen tivesara iyan mifo fúká intin ma ínaimpáké orun avían manten orera uvintin maen kama vukhafa vái vanten mino. Inká taréa ída ákona vákan ban mifo ínaimpáké ma evaránen orun avían mantarantin maen kákan ákona vái vanten mino. ⁴⁴ Betí ankan mai yan bukhafa vái saréa van mifo fúkaré intin ma ínaimpáké orun avían mantaren maen Kantá Aunan mano ma aunan amin nain bukhafa vái vanten mino. Mai fara vara seyo, ma varará ma ainen purin bukhafa ano ma vainíen inarurá deren mai ma Kantá Aunan mano aunan amin nain bukhafa vái van mino.

* 15:43: Fir 3:20-21 * 15:51: Mat 24:31; 1Te 4:15-17

⁴⁵ Máan tukhan Tiyarafenu vompon dóki ano máa sikhén mino. “Esé araiintá Adamu ne ma siyain banta ano aun mantaren mino.” *Esé 2:7*

Mantein mifo ínaimpá ma Adamun an dakhein banta Yisas Karaisi ma erein manon ayun para van oriyan ban Aunan amin bantaíen mino. ⁴⁶ Barará bukhafa naren erivin maen ínaimpái Kantá Aunan mano ma aunan amin bukhafa eren mino. ⁴⁷ Esé ma erin banta Adamu maen bara ráke kayó pákaren uvantáin mi ínaimpá ma erin banta Yisas Karaisi mai inarufákéi erikhen mino. ⁴⁸ Minó barará nanin banta ano Adamun an den barará bukhafa vái van mifo inaru vukhafa ma vará tífanuna ano mai Yisas Karaisin au vukhafa an mi yanten mino. ⁴⁹ Adamu ma ma varará banta vain an mi yakhé tiferuna maná damusí ma intí maé inaru fáke vanta Yisas Karaisin an dá tífanté uno.

⁵⁰ Mumunan tiyofi sífá tiváeyan noe, séi máan mi siyá uno. Dan bukhafa vá nare vá ano ída kanaíen Tiyarafenui yafisin aúpin orinten mino. Ma ma setinti ainen pútáin bukhafa ano ída kanaíen ayáká para oriyan banten mino.

⁵¹ *Máan tukhen mifo inikhesirá taréa Tiyarafenui aúpa baya ma setí ankampin afoká ukhein tiaméku vá ineno. Ída minó ano fura sé puró tífanté umpo maman ena vukhafaíi ó tífanté uno. ⁵² Tipá kípan ufen ma asinti mai ma auu makhí diyaona an den mi mai avúavá afoká inten mino. Mai fara vara seyo, ufen ma asintin mai ma mumunan uven púká in nain kéká ano auyen bukhafa vái orun mantanten mino. Inká mai ma ída fúká ótífanuna nanin banta ano maman auyení é ída furin para oriyá bá tífanté uno. ⁵³ *Mai fara vara seyo, ma varará ma ainen puren púta iyain bukhafa ano maman inaru rákena ída ma furin para van oriyan ban bukhafaisá ino.

⁵⁴ Mai ma ma varará ainen puren púta iyain bukhafa ma maman ída ainen pútáin inaru vukhafaí urantin maen mai ma Tiyarafenui vompon dóki ano sikhá ein mi mo kanaí inten mino. Mai máan mi sikhén mino.

“Aunan mano furin inka aruan kípen mino. *Ais 25:8*

* 15:53: 2Ko 5:4

⁵⁵ Purin noe, intesí eni ákona van nafino.
Purin noe, inté ureyá tirinte fonó.”

Ose 13:14

⁵⁶ *Mai fara vara seyo, ume anon aruan puriyákan inká ume ano man baya fin-ten ákona variyan mino. ⁵⁷ Máan tiyan mifo Tiyarafenu ano ma setisi Bafan Yisas Karaisin pinté uaren tiyaí ma furin má ume vá ma esantakhé tiferuna vará béin moékantá aví daní iyá tusu siantano.

⁵⁸ Máan tukhein nan mi séi ma moéke tinunu iyaruna mumunan tiyofi sifá tiváeyan noe, Tiyarafenui yorantá mantaan ákona uveya vá moékan dorarí ono. Mai fara vara seyo, siretí ankan ma Bafani yorarí iyaona mai ída fa savifá o afeyorantéi afová ukha rono.

16

Yerusalemí Ma Vain Monó Nanin Banta Ayain Moní Ma Átaruin Baya Ino (Romu 15:25-29; 2 Korin 8-9; Karesia 2:10)

¹ *Yerusalemí ma monó nanin banta aya ono van átaru uáden nan bain moni san mi siamenté uno. Mai ma siaméku Karesiá nanin banta ayaeonaí eya vá betin aya ono. ² Ena ena Santesí ma intiya siretiyan ma yoriyaona aa fáké ma moní dosiyaona vá daídeya susu siantan monisá ákonafin kaono. Téin nan me sintí moní átaru ono van muno sire ída vá tive iya vano. ³ Téi ma oronté maé mai ma Yerusalemí nanin banta aya ino van ma amusin baren orin kéká aní uresin baré in nain kayoi mo máan ná ono siré bompon uvaman amenté uno. ⁴ Inká téi ma inékun kama ukhan nain nan mi siretin má manápá oró tifanté uno.

Pori Ma Mónó Doran Kéká Ayaino Van Ina Ein Baya Ino

⁵ *Masedoniá barafá orono van iyaruna ma onobé maé inaimpáké tiretin e onanté uno. ⁶ *Téi ma inikheruna iyonin damú ma siretin má manáa o vákun iyonin ma kípavintí ma orono van éku mae sireti anon tivire mo sifa in nono. ⁷ Taréa ma sireti vaonafá ma oronté maé ída

ainé tiretin me ampiré orono van mumpo Bafan mano ma kana ino sin nain nan mi siretin má manáa ayáká o vanté uno.

⁸ Máan tonté umpo saréa Efesasi barurá bákun maen Pentíkosi yamú afoká uvintíi vetin me ampenté uno. ⁹ *Mai fara vara seyo, mará kákan doran baká dorano van iyákan kokhon nanin banta ano ineno van iyan mifo manáa kéká ano séin namuroí usintiyán mino.

¹⁰ *Timoti ma sireti vaonafá orintiya vá téi ma erunaíen Bafani yorarí iyain banta ifo véin kama uresin ná bano. ¹¹ *Ída vá áesin manáa kéká ano véin oman aniana ino. Timusin iyáké béin má manáa mumunan kéká bá onano van iyá umpo véi ma avire me afa iyákeya ará kusin masá tiantan erino.

¹² *Mumunan tifá tiváeyan mano ma siretin oman oniyain kéká bá teti sifá tiváe Aporosi ma san tiretin mo onano van ena ena sūtúpiyákan mifo véi ída oriyan mino. Máan tiyain béi ma orono van inin nain damú siretin o onanten mino.

¹³ Tiretiyan dafian ákona ukheya vá puntákein mumunantá mantaan ákona ukheya ída feran daná bantiya vá ákona ukhe vano. ¹⁴ Minó danasinta ma varanteya avábá in avúavá póké ana vá barano.

¹⁵ *Akaiá* barafá onen nan maen Stefanasin má bei kéká bá naren monó baya iniren mumunan iyáken betiyantá ena mumunan kéká ayain dorarí ein mi vakái mumunan tiyofi sifá tiváeyan noe, siretin ákona é tiamiyá uno. ¹⁶ Máan avúaváká teya ma ma aví teruna kéká bá inká pura sen ma monó dorarí iyain kayo vá kama e yafiseno van mi siamiyá uno. ¹⁷ Tiretin má ída mará ere ompo Stefanasin má Fotunatusin má inká Akaiakusin má ma sireti vaona fákena ma ayain danasinta varen erein nan mi kákan timusin iyákéi oné uno. ¹⁸ Mai ma siretíi mumunan ákona uantiyá einien mi senti mumunan me ákona usinten mino. Máan ma en kama yorarí iyain kékasá amusin uantano.

Pori Ma Sipá Amusin Baya Sein Mino

* **15:56:** Rom 7:13 * **16:1:** Rom 15:25-26; 2Ko 8:1-9 * **16:5:** Apo 19:21 * **16:6:** Rom 15:24 * **16:9:** Apo 19:8-10; 2Ko 2:12 * **16:10:** 1Ko 4:17 * **16:11:** 1Ti 4:12 * **16:12:** 1Ko 3:6 * **16:15:** 1Ko 1:16 * **16:15:** Akaiá bara maen Kiriki akhempái van mino.

¹⁹ *Esiá barafá ma vain mumunan kéká bá Akuiran má Prisiran má inká mai ma monó dorari inton ma vetí amápín átaru uven baya siyain kéká bá anon betí aú kákéi Bafan avíká tireti vaonafá amusin baya yákan oren mino. ²⁰ Mará ma vain monó nanin banta ano sireti vaonafá monó amusin baya yan oren mifo vá tiretiyan monó avúavá posá betin avábá in maran ná ono.*

²¹ Téi Pori anon teyantá timusin baya uvaman amé uno.

²² *Bafan ma ída avábá in nain nanin banta ano vá uman barano. Tetisi Bafan noe, ereno.

²³ Bafan Yisasini sarisari ano siretin masá bano. ²⁴ Yisas Karaisin avikasá tenti avábá ano sireti vaonafá orino.*

* **16:19:** Apo 18:2, 18, 26 * **16:20:** Kiriki vaya fintéi Tiyarafenurá ma monó tiyain nanin banta ano ma kantasi ukhein amónan maran iyain nan tikhen mino. * **16:22:** Kar 1:8-9; Rev 22:20 * **16:24:** Ínaimpá ma uvarein bompompin ena vaya mo asotú ukhen mino. Mai veya *Mai fura ino* sikhen mino.

**PORI MA KAN DÁDASÍEN
KORINÍ NANIN BANTA
UVAMAN AMEIN
BOMPON MINO
(2 Korini)**

**Kan Dádasí En Ma Korini
Uvanteí Pákena Afova
Vaya Ino**

Ma vompon ma uvantein banta ino.
Baya varen orin banta Pori ino.

Uvarein orana ino.
AD fifti-sevenifin mino. Esé bompon
uvádan manáa viyon orivin mai oy-
ampákéi ma vompon uvanten mino.

Ma vompon ma uvantein baru ino.
Kiriki varafin bain baru Masedoniá ino.
Taitasi ma Korini me ampiren ma
evaránen ovan mi uvaren mino.

*Ma vompon ma uvaman amikhein kéká
ino.*
Korini barurá ma monó tiyan mumu-
nan iyain nanin bantafin mino.

*Nái ana vará ma vompon uvanten
nafno.*

Korini baru ráké kampun afova amin
banta kayo ano Porini veya varen orin
doran má pura sikhein kama veya
ma sian dákó iyain ma san ma uman
amiyain nan mino. Pori vei yoran
má Yisasini kama veya ma siamiyain
ma san mi esé arái in ai (sapta) kay-
ofin ákonaen tian amá ukhen mino.
Yerusaremí ma monó tiyain nanin
banta ma ayain moní ma karú darú in
má inká Taitasi ma Koriniké ovaránen
erin nain damu san ma sikheí páken
nan sapta eiti vá naini vápin tikhen
mino. Monó nanin banta vá ma ará
manafiní in avúavákái Pori orikhen
mino. Sapta teni (10) fin amen avaya
ano manáa mo enará ukhen mino.
Sapta teni (10) ráké tetini (13) fin ma
orikhein mai manáa nanin banta ano

ma ída ará baeran báken Porin uman
amiyan ará namu uantiyan baya ino.

Porini Amusin Baya Ino

¹ Yisas Karaisini kama veya varen mo
vanasi siamino van ma Tiyarafenu ano vei
anunurá tiviká ein banta séi Porin má inká
tetisi kama sifá tiváe Timotin má anon ma
vompon uvaré uno.

Mai ma Korini barurá baona monó
nanin banta kayo vá inká Ákaiá
barafin má ma mumunan kéká baonafái
uvamádékun oren mino.

² Teti Sifóe Tiyarafenu vá inká Bafan
Yisas Karaisini sarisari vá ará kusin má
ano siretin má banten mino.

*Tiyarafenu Ano Ma Minó Nanin Banta
Ará Kusiantein Baya Ino*

³ *Tetisi Bafan Yisas Karaisin Afóe
Ayarafenun avisá daní ó tifano. Mai véi
anon tetin nan arunan uren kusin timé
iyan mino. ⁴ Teti ma umampin oré tifékun
ma véi setin kama uren kusin timé iyainí
esá ena nanin banta ma umampin orintí
maé kamaé aya ékun ná kusin barano.

⁵ *Mai fara vara seyo, Yisasi ma vareiní
ukhein uman ma seti variyaruna van mi
Tiyarafenu ano Yisinin pinté uaren tetin
moékan arunan é iyan mino. ⁶ Máan
tiyantí tetí ma uman baranuna anon
tiretin ará kusiantantin Tiyarafenu ano
siretin kanaíen aya uren evaránen aviran-
ten mino. Mai fara vara seyo, Tiyarafenu
ano ma setin tirá kuisintan nain manon
tiretin ará ákona uantanten mino. Máan
ma urantiyan bempáké báke mai ma setí
ankan bariyarunaí ukhein uman baran
nono. ⁷ Teti ankan ma ákonaé iniyaruna
mai ma seti variyarunaí ukhein uman
ma siretí ankan má dere varesin maen
Tiyarafenu ano siretin mái ará kusin am-
inten mino.

⁸ *Mumunan tiyofi sifá tiváeyan noe,
Esiá barafin ma setin timaniná afoká ukhá
ein uman afová ono van muno. Kákan
umán uróí afoká uven tetisi ákona maman
bararasí uraká tetí ankan puronté uno
sé inikhá uno. ⁹ Pura ino. Tetí ankan
purimpin tisintákaren mifo mai yaná ma
yákó ein nan ída setisi ákonará ino sé iné

* 1:3: Rom 15:5 * 1:5: Íbo 34:19 * 1:8: Apo 19:23; 1Ko 15:32 * 1:10: 2Ti 4:18

tifanté umpo fúká ein ma evaránen avían manté iyain mai Tiyarafenui ákonará ino sé uno. ¹⁰ *Tiyarafenu ano furin pintena setin tiya uren tivíkein béi ano anan ena ena setin tiya uriyan tiviranten ne sé iniyá ave ukheruna mai yaná afoká inten mino. ¹¹ Tiretí ankan ma setin tiyae amúkeona vá inká kokhon nanin banta ano ma amúkein mái Tiyarafenu ano iniren mi setin tarisari uren tiya ukhein kokhon nanin banta ano setin too varen béin tusu siantanten mino.

Pori Ma Orono Sikhá Ein Nan Ma Sirun Noe Sein Baya Ino

¹² Máan tukhein nan mi setiyan timo siyá uno. Teti ma siretin má báké ma siretimpin má inká ena nanin bantafin má ma yoriyá eruna mai fura sen puntákein inin má avúavá bá ma Tiyarafenu ano simikheintái yoriyaré uno. Ena nanin banta vá tiretí ankampin má ma yoriyaré eruna mai ída setisi ákonará ifo Tiyarafenui sarisarirá ino. ¹³ Tiretí ankan ma kasae yankáde afová oren bompon mi séi uvaman amiyaruna manáa yamú ma oriyantiyan teti ma siamiyaruna veya oman afova suron inono. ¹⁴ *Taréa setinti veya ana manáan afová iyaona ínaimpáké minó afova ureya Bafan Yisasi ma ovaránen erin nain damúí siretin ma amo siyarunaí eya setin timo sin nono.

¹⁵ Mai fara vara seyo, siretí ankan nare o ódékuya kan dádasí e avu varano van mi sirá mantiyá inikhé uno. ¹⁶ *Téi ma inikheruna mai Masedoniá barafá ma oronté tiretin e oné orikharé ma ovaráné erenté maé tiretin má e vákuya mai ráké aaí usintesí Yudiá barafá oronté uno.

¹⁷ Ma veya ma sian damuáderuna van tiretí ankan ten nan ineine uren ifá inten minó té iniya rafono. Ída ino. Mai ma vara ráke nanin banta ano ma veya sian damiyan ma varanté uno sen inká ída varanté uno sen uren ma mai yaná kasaen bariyainisá iya rafuno. Ída ino.

¹⁸ Tiyarafenu ano minó bei veya ánain mi yakhafé iyain bantí pasé máan manan onté uno. Téi fura siré tiretin tiamiyá

uno. Téi ma siyaruna veya kayo mai séi ma varanuna yana san mi fura sé tiyá uno. ¹⁹ *Mai fara vara seyo, Tiyarafenu Anin Yisas Karaisini veya fefái sen má Sairasin má inká Timotin má ano siamiyáké béimpin eyo sin manan ban mifo mai ma arakhéké iyan ída ino ma sin má eyo ma sin má béimpin ída vane séku inikha ono. ²⁰ *Mai fara vara seyo, Tiyarafenu ano ma iyáantan baya kokhon uron mi varé íkan Yisasi ano mai veya kayo me kanaí ukhen mino. Máan tukhein nan mi setí ankan mai véin pinté uaré pura ino siyáké maé Tiyarafenu aví daní é iyá tiféuno. ²¹ Mai van mi Tiyarafenu ano setin má inká tiretí ankan má aní uren mi setin ákona simiká Yisinin má manafin báké mantaan ákona ukhé tiféuno. ²² *Máan tukhékun pasen kokhon daná ma setin timeno van ma kaúdákein pintena Kantá Aunan pói araíen aní daná tetin túpin kain eravíkan tetin maman bei vanasií ukhen mino.

Pori Ma Ída Ainen Evaránen Korini Barufá Orein Baya Ino

²³ Tiyarafenu ano séin afová ukháí furan tiyá uno. Tiretin uman amenaen tiré Korini barufá ída ainé evarané oré uno. ²⁴ *Tiretin amusin ameno van mi siretin má doriyá umpo ída siretíi mumunantá dafisintó uno. Para vara seyo, mumunampin pefái mantaan ákona ukha rono.

2

¹ *Mai van mi séi ovaré me iniré ída vá betin ena vá mo uman amékun aú arun barano sé iniréi ifá é uno. ² Mai fara vara seyo, séi ma siretin uman amirékun ma arunanápin basin maen mai ena intéa kékasá bain ná téin timusin timinten nafino. Ída ino. Tireti anan ba ono. ³ Mai van mi fefá ma yékun orein bompompin máa sé uvantaré uno. Téi ma orékun maen mai ma séin moékantá amusin timiyain kéká ano ída vá tirun naná timino sikhare umpo séi ma inikheruna mai sempin ma vain timusin tiretí ankan má dere varano van muno. ⁴ *Tiretin nan kákan tirunaná bariyáké ifí pintéi mai vompon uvaré uno.

* **1:14:** 2Ko 5:12; Fir 2:16 * **1:16:** 1Ko 16:5-6 * **1:19:** Apo 18:5 * **1:20:** Rev 3:14 * **1:22:** 2Ko 5:5; Efe 1:13-14 * **1:24:** 1Pi 5:3 * **2:1:** 1Ko 4:21 * **2:4:** Apo 20:31

Tiretí ankan arunaná amen novara ma vompon uvare raumpo séi ma siretin nan moékantá tinunu iyaruna mai afová ono van muno.

Ena Nanin Bantai Ume Ma Ampiantan Baya Ino

⁵ Mana vanta ano ma e manten tiretí ankan uman amintiya ma arunanápin basí mai uman téi ída varanté umpo monó nanin banta ma amikhein uman mai manáa sesosikhái séi ída kanaí é kokhon baya senté uno. ⁶ Máan turaya ma kokhon mano mai uman daíde ma mai vanta ame-ona uman mai kanaí ukhen mino. ⁷ Máan tukhein nará mai vanta enádá ída uman ame vá beni ume ampiantádeya kama e ayaesin ná ída arunanápin báken amusin ná ino. ⁸ Máan ture véin aní eya en nan para sinunu iyá uno vá tenovan mi éin duvuniyá uno. ⁹ Éi intesá é tenti vava iniré bákurinte fono van mi mai vompon uvaman amé uno. ¹⁰ Éi ma mana vanta ume ampiantesí maé inte uman ná béi mantaren nafi mai séi yere veni ume ampiantanté uno. Tiretin naren tiré Yisas Karaisin avorá máan tonté uno. ¹¹ *Máan tékun Ban Anon mano ída kanaíen tetin akhenóka inti eravé tinkamó tifano van muno. Para vara seyo, veni namu avúavá pefái seti afová ukhé tiféuno.

Auyen Kasen Ban Avúavái Yoran Banta Kékái Vaya Ino

¹² *Troasí barurá ma Karaisini kama vava seno van ma oriyá bá o onékun maen Bafan mano fefái senti aa uviádan baren mino. ¹³ *Máan tukhan mifo mairá ma kusen ban nan ída sinunu ukharé uno. Mai fara vara seyo, se sífá tiváe Taitasin ída onté pasé betin nan me sirun noe siré béin nan dosintó Masédoniá oré uno.

¹⁴ Máan tukhantí teti ankan Tiyarafenu vará tusu sian tátifano. Mai fara vara seyo, Tiyarafenu anon Yisas Karaisin pinté uaren tetin tiyaí minó danápin esanté iyá uno. Tiyarafenu anon tiyaí Yisas Karaisin pákena afova vava minó akhempá tiyá kun kama uveri aunka ma orera einí iyan mino. ¹⁵ Mai fara vara seyo, inarufá orin aintá manta ma inká

aron i van masípin orin aintá manta ma ukhein kayofin teti ankan aunka uveri an mi yakhé tifékun Yisas Karaisi ano setin máden íkun uan Tiyarafenu amiyano mino. ¹⁶ *Mai ma inarufá orin aintá ma mantakhein kayo ma aunan amin uveri ano ma kama aunka einí ukhé tifé umpo mai ma verai siyan ban barufin ma orin aintá ma mantakhein kayofin namu aunka ma iyain uveri an mi yakhé tiféuno. Iye anó mai avúavápin kanaí inten nafino. Ída ino. ¹⁷ Máan tukhéi seti ankan ona ma mamáken miyaní ino van me khoe khoe en noin kayo an ída yakhé tiféuno. Moní barano siren ma monó ten noin kayo kokhon mi van mino. Teti ankan Yisas Karaisi yafíká ben avorá pura sen puntákein avúavákái Tiyarafenui vava sé nó tiféuno.

3

Aposeri Kéká Mai Auyen Kasen Ban Avúavái Yoran Banta Kayo Ino

¹ *Araíera téi kamaé puntáké doriyá unó terá evarané te simo siya rafuno. Ída ino. Teti ankan manáa kéká an derá teti síví daní ono van ena vanta kayo ano uvamádein bompon ná amiya rafu áa siretí ankan mano máan ukhein bompon uvamádesin tetin tiyaino vará iya rafuno. Ída uron mino. ² *Tiretí ankan manan tetisi vompon bákeya súká uvanten nan minó nanin banta ano mai vompon mi yankáden afová é iyan mino. ³ *Teti ankan ma yoriyaruna yoran manon aníen Karaisin pinté erikhein bompon mino siyan mino. Mai vompon maen ída vompon dankafó uvanten mifo fara van oriyan ban Tiyarafenui Kantá Aunan pói uvanten mino. Onámaná daro sa uvanten naifo vanasi aúkái uvanten mino. ⁴ Yisas Karaisin pinté uaren mi Tiyarafenu ano setin tiyaí mai yorarí iyái ventá anan ákona inin kaúké tiféuno. ⁵ Ída setisi ákonarái mai yoran doriyá tiféuno siré teti síví daní otifanté umpo Tiyarafenu finté anan mai ákona eré iyan mino. ⁶ *Máan tukhan Tiyarafenu anon tivíadá auyen

* 2:11: Ruk 22:31 * 2:12: Apo 14:27; 1Ko 16:9 * 2:13: Apo 20:1 * 2:16: Ruk 2:34; 2Ko 3:5-6 * 3:1: Apo 18:27; 2Ko 5:12 * 3:2: 1Ko 9:2 * 3:3: Eks 24:12; Yer 31:33; Isi 36:26-27 * 3:6: Yer 31:31; Yon 6:63; 1Ko 11:25

avúavápin ma kasen ban doran bantái ukhé tiféuno. Peyante man baya ano ída kanaíen ayun ma fara van oriyán ban aunan timinten mifo mai ma auyen kasen ban avúavákái Kantá Aunan mano ayun ma fara van oriyán ban aunan timikhen mino.

Auyen Kasen Bani Kakhan Ákona Ino

⁷ *Mosesini Man Baya ma onámanáká uvantaré ein mai kama aa sákéi amikharen mifo mai ano furin manan dáko iyaren mino. Mai man baya ano Tiyarafenui kakhan mái eríkan Mosesin auná pinté panu uron tiyákan Isareri nanin banta ano ída kanaíen ben auná onen mifo mai kakhan mano ainen mo kípen mino. ⁸ Máan tukhen mifo saréa ma Kantá Aunan mano yoriyain khakhan mano ídá moéken esantakhen nafino. ⁹ *Banta ma aruan purin daná ano ma kakhan baren erikharé intin ma inká auyen avúavápin kasen ban mano ma setin nan puntákein nanin banta ino ma sikhein panu anon moékakhen mino. ¹⁰ Máan tukhein nan mi auyen kakhan manon pura sen peyante kakhan esantakhen mino. ¹¹ Para vara seyo, feyante avúavá ano ainen kípan kakhan mái erikharen mifo auyen avúavá anon moékan kakhan má para van oriyán banten mino.

¹² Máan tukhein nan mi setisi ákona inin mairá kaúdákéi ída feran kasaé baya siyá uno. ¹³ *Máan tukhantí tetí ankan ída Mosesin an dé mai ma ve aunápin panu siyan ma Isareri kayo ano onan nae siaren ma yavaráe fóké iyareiní ó tifanté uno. ¹⁴ Máan tukhan taréa yere feyante Man Baya yankafiyan mifo mai ma fefá iyákaré ein davaráe ano vetí ankani inintá para iyákan ída kanaíen beni ana afová iyan mino. Yisas Karaisintá ma mumunan intin manan mai ma iyákein davaráe yo varanten mino. ¹⁵ Máan tukhan taréa yere Mosesini Man Baya ma yankafiyan maen mai ma iyákaré ein davaráe ano vetí inintá para iyákan pasen beni ana ída kanaíen afová iyan mino.

¹⁶ *Máan té iyan mifo Bafantá ma ará baéden mumunan inain kékái ineinerá ma iyákaré inain davaráe Tiyarafenu ano yo varanten mino. ¹⁷ *Máan tinten mifo Bafan maen Aunan mi váken pasen interasá Beni Aunan ban nafi mairái kusin amé iyan mino. ¹⁸ Máan tiyain nan mi mai yavaráe ano ída setin tunáká iyákein Bafani kakhan mano setimpin eria-aren kamu finté ma mo fanu seinien ena nanin banta fanu siantanten mino. Bafani Aunan mano setimpin bempáké erirú iyan tetin maman béin an darantin beni kakhan mano setimpin bíkaaren ena nanin banta mo fanu siantanten mino.

4

Bara Khavefin Ma Kama Yanasinta Vain Baya Ino

¹ Máan tukhein nan mi Tiyarafenu ano vei arunaná pinté uaren ma yoran timikhái ída sivesara iyá tiféuno. ² *Máan tukháí setí ankan betin ayave amin avúavá ída variyá inká ída auuráké iyá tiféuno. Tetí ankan ída ena nanin banta máká maáká iyáké inká Tiyarafenui vaya ída ovaédé tiyá tiféuno. Tetí ankan Tiyarafenu avorá puntákein baya anan tiyá tifékun mi kama ineine ma vain kéká anon pura sen afová iyan mino.

³ Máan tukhen mifo seti ma kama vaya siyaruna ano inte kayo avorasá davaráe ano ma iyareiní iyan nafi mai o afeyoran nain kékái váká tetí afová ukhé tiféuno. ⁴ *Ma vara ráke Ban Anon mano vetí ankani inintá dasirádan pasen Kama Vayai ákona kakhan ída oniyán mino. Yisas Karaisi ma Tiyarafenui aman manon báká ma veni ákona kakhan nan ma siyaruna van ída iniyan mino. ⁵ Mai fara vara seyo, setisi sivútivá pákena va siamé nó tífe raumpo Yisas Karaisi ma setisi Bafan bain mai véin páken nan tiamiyá tiféuno. Inká béi ma setin tiya ukhein nan mi siretin ayain kékái vá tiféuno. ⁶ *Mai fara vara seyo, fefá ma ma varafin títipa ukháin ma kakhan afoká ino síkan ma afoká ein Tiyarafenu

* **3:7:** Eks 34:29 * **3:9:** Diu 27:26; Rom 1:17 * **3:13:** Eks 34:33 * **3:16:** Eks 34:34 * **3:17:** Yon 8:36;
Rom 8:2 * **4:2:** 2Ko 2:17; 1Te 2:5 * **4:4:** Efe 2:2; Kor 1:15; Ibu 1:3 * **4:6:** Esé 1:3; Ais 9:2; 2Ko 3:18

anon tetin túpin kakhasintái nó tiféuno. Mai khakhan manon tetinti inin amá usintái Yisas Karaisin pinté uaré Tiyarafenui ákona kakhan oniyá tiféuno.

⁷* Máan tukhen mifo mai ma ainen dúvé iyain bara khave kayo an mi setí ankan dakhé tifékun mi Tiyarafenui kakhan mano ma setimpin bain manon kama yanasinta ma vara khave kayofin bainí ukhen mino. Máan tukhan mi setin pinté uaren aní ino van mi Tiyarafenui finté mai kakhan ákona ano erikhen mifo ída setin pinté erikhen mino. ⁸* Máan tukhan minó akhen pákéi ara ara uman mano setin timaniná afoká iyan mifo mai ano setin ída maman bararasí iyan mino. Máan tiyan mai ano setinti inin máden asuse iyan mifo ída ifá iyá tiféuno. ⁹ Namuro kayo ano setin timaniná ara ara uman kaé é iyan mifo Tiyarafenui ano ída setin oyan timé iyan mino. Tetin tiruren namu urá maé e mantaaré para yoré oriyá tiféuno. ¹⁰* Yisas Karaisi ma vareiní ukhein aí bá uman má ma variyá tiferuna anon béi ma evaránen e mantakhein ákona aníin oniyain mino. ¹¹* Mai fara vara seyo, seti ma ayun para vá tiferuna nanin banta ano ma Yisasin ánain bákuriyaruna van mi furin uman tetin timaniná kaiyan mino. Máan ma inain manoi setinti yan bukhafa fintena Yisasini avúavá onanten mino. ¹² Máan tukhein nan mi seti ma furin uman bariyá tiferuna anoi siretimpin ayun ma fara van aunan afoká uantiyan mino.

¹³ Máan tiyan mai van mi Í Bompompin pefá máa sikharen mino. “Tiyarafenui rái mumunan iyáké tiyá uno.” *Íbo 116:10* Máan ma sikhá einí é tetí ankan deren mai manaí mumunan mái vá mai vaya kasaé tiyá uno. ¹⁴* Mai fara vara seyo, Yisasi ma fukaréin avían mantein Tiyarafenui anon béin má tetin tivían mantarantíi siretí ankan má manafin ben avorá o mantanté afová ukhé tiféuno. ¹⁵ Mai yanasinta ma setin turá afoká iyain mai siretí ankan aya ino van mino. Tiyarafenui sarisari ano kokhon nanin banta avíádantin Karaisi vaipá eriven béin aví moékantá daní intin

khakhan ákona ano véimpin bíkaaren avan inten mino.

Ákona Yorarí In Baya Ino

¹⁶* Mai van mi setí ankan ída ifá onté tiféuno. Setinti yan bukhafa finte ákona kípé iyan mifo minó damú Kantá Aunan manon túpin evaránen auyen ákona simé iyan mino. ¹⁷* Mai fara vara seyo, saréa seso sikhein uman mi variyá tife umpo ínaimpáké para van oriyan ban kakhan mi siminten mino. ¹⁸* Máan tintéi saréa ma uman bariyá tiferuna van ída iniyá uno. Para vara seyo, seti ma oniyá tiferuna mai ída ayáká ban uman mifo mai ma fara van oriyan ban danasinta ma ída onté tiferuna ano ma simusin timin nain nan mi saréa inikhé tiféuno.

5

Tiyarafenui Ano Ma Fara Van Oriyan Ban Bukhafa Simin Nain Baya Ino

¹* Mai fara vara seyo, ma varará ma yavaráe namun uvantáin ma varákiyain an mi setin tu ano yakhá afová ukhé tiferuna furé maé ma vararái ma vukhafa me ampé tifanté uno. Máan tuvintin maen para van oriyan ban bukhafa ma Tiyarafenui ano veyantá uvantein timídantíi inarufá o vá tifanté uno. ²* Máan tukhein nan mi inaruráke vukhafafó auí daná ma usinteiní ino van mi ma vara ráke vukhafafó berai siyá tiféuno. ³ Mai fara vara seyo, inaru ráke vukhafa ma usintádantí maé ída sivápa vátifékun onanten mino. ⁴ Para vara seyo ma vara ráke vukhafafin ma váké berai siyá umpo ma vukhafa ída vantí bano vara siya rauno. Ída ino. Inaru ráke auyen bukhafa mamarékun mai ano ona an davintin mai vukhafa ano ída furinton para vano van mi siyá uno. ⁵ Tiyarafenui ano mai anarái setin uváden mi mai ma kama yanasinta ma iyátintákein ma ínaimpáké timin nain mi aníen Kantá Aunan timikhen mino. ⁶* Mai vukhafafin ma vá tiferuna anon Bafani varufin ben má ída vátifé umpo mai ma iyátintákein danasinta anon ena ena setin tirá ákona usintiyá mai seti afová

* **4:7:** 2Ko 5:1 * **4:8:** 2Ko 1:8; 7:5 * **4:10:** 1Ko 15:31 * **4:11:** Rom 8:36 * **4:14:** 1Ko 6:14 * **4:16:** Efe 3:16 * **4:17:** Rom 8:17-18 * **4:18:** Kor 1:16 * **5:1:** 2Ko 4:7 * **5:2:** Rom 8:23 * **5:6:** Ibu 11:13-16

ukhé tiféuno. ⁷ Máan tiyain nan mi setí ankan mumunantái vátifé umpo suufó ma onan tasa ino. Ída ino. ⁸ *Máan tukhá ma vukhafa me ampíré Bafani varufin ben má o vá tifano van moéké tinunu ukhéi mai van ákonaé iniyá tiféuno. ⁹ *Mai van mi ma vukhafafin má inká ena vukafafin má ma vanté maé mai véin ma amusín amin inin onan masá bá tifano. ¹⁰ *Mai fara vara seyo, minó anon Yisasini yaimin karáká oré tifékun maen teti ma mai vukhafa vá báké ma kama yana safi namu yana safi ma variyá ótífanuna avúavákái miyan timídú inten mino.

Tetí Ankan Tiyarafenui Ará Manafíní In Baya Ma Vanasi Siamin Baya Ino

¹¹ Máan tukhein nan mi setí ankan Tiyarafenu van pédé ben aránaópá bákéi véintá mumunan ino van banasi ákonaé tiamiyá uno. Mai yorari ma iyaruna mai Tiyarafenu ano fefá afová ukhái mai siretin má dere afová ono van mi ákonaé iniyá uno. ¹² Maa senuna van tetin nan puntákein banta kéká ino sireya simo seno vara ma vompon uvaman amiya rauno. Ída ino. Tetisi sivútiva san amusín ureya mai ma yan bukhafará ana oniyá ma súkáké Tiyarafenui funtákein avúavá ma variyaruna kéka san ma soy-ampá baya siyain kayorá dafían ákona ono van mi siyamiyá uno. ¹³ Onesí ma óen áen ma iyáku mae mai Tiyarafenu ano kákan bí barano van mumpo inká onesí ma funtákein inin ma variyáku mae mai siretin nan mi iniré máan tiyá uno. ¹⁴ Mai fara vara seyo, Karaisini avábá anon tetin tirá mantarái siretin nan inire mumunan ono van mi siamiyá uno. Mai ma Yisasi ma minó nanin bantai ume van púkein nan mi setí ankan dere fúaré e mantakhé uno sé mumunan iyá tiféuno. ¹⁵ *Minó nanin banta van mi véi fúken mifo aun ma vantin ban nain kayo ano veyan nan ída vá inin naifo mai ma vetin nan e fúaren ma e mantakhein banta van mana vá inino.

¹⁶ Máan tukhein nan mi ma vara ráké avúavápó banasii avúavá taréa ída yaimiyá tiféuno. Pura ino. Pefá

maé barará avúavápó Karaisíni avúavá daimiyá tifé umpo saréa ída ino. ¹⁷ *Máan tukhein nan mi mana ano ma Yisasín má o súpá inten maen béi auyeníi inten mino. Beni feyante avúavá ano e kípavintin auyen avúavá báí vanten mino. ¹⁸ *Karaisi ma varein avúavá kái Tiyarafenu ano setin evaránen tivíden mi auyen avúava sinta simiren inká ena nanin banta ma o avían dantin ma véin má ará manafíní in doran tetin timikhen mino. ¹⁹ *Mai fara vara seyo, Tiyarafenu ano Karaisimpin báken mi minó nanin banta vá ma manafín kusen ban aa uví dáken pasen taréa ída vanasii ume yankáden uman amiyan mino. Máan tukhein nan mi vanasi ma o avían béin amin doran mi setin timikhen mino. ²⁰ Tetí ankan Karaisini oo vanta kékái vákun Tiyarafenu ano setin pintéi uaren tiretin baya siamiyan mino. Tiyarafenu vá manafín kuse vano van mi Karaisín oo varé tiretin tútúpé ariyá uno. ²¹ *Karaisi maen ída ume van banta ifo setin tiya ino siren mi Tiyarafenu ano setinti namu avúavá maman Karaisín amaniná kaúdan mi íkun uan Tiyarafenu amikhein pasé béin pinté uaréi Tiyarafenui funtákein nanin bantái ó tifanté uno.

6

¹ Tetí ankan Tiyarafenu vá manafín doriyákéi véi ma sarisari ukhein nan béin pákaan ákona ono van mi ínané tiamiyá uno. ² Para vara seyo, véi máa sikhen mino.

“Teyantá ma siretin avidé kama onuna yamú ma aní ukharé eruna yamú afoká íká tiretíi ifí iniré aya é uno.” *Ais 49:8*
Tiyarafenu ano ma siretin aya uren ma evaránen aviriyain damúi saréa vaono.

Pori Ma Uman Kayo Yosiá Ein Bayo Ino

³ Banasi ano setisi yoran nan namu yorarién mino sin nain nan pasé mana nanin bantai inarufá orin aasá ída mana yaná maman iyariyá uno. ⁴ Tetí ankan Tiyarafenui yoran banta kékái váké pasé kama avúavá anan ena nanin banta aní

* **5:8:** Fir 1:23 * **5:9:** Kor 1:10; 1Te 4:1 * **5:10:** Afo 12:14 * **5:15:** Rom 14:7-8 * **5:17:** Rom 8:1; Kar 6:15 * **5:18:** Rom 5:10 * **5:19:** Rom 3:23-25 * **5:21:** Ibu 4:15

é iyá uno. Máan tiyáké maé tetin timaniná ma aau fi uman nafi ma afoká iyá maé mantaan mi ákona ukhé bá tiféuno. ⁵ *Banasí ano siruren karavusifin pákaan kaiyan inká namuro kayo ano sisiren tinkayan tiyá maé tetí ankan kákan uman uron bariyá maé ída kamaé tuun bariyá inká tirafan báé iyá uno. ⁶ *Kantá Aunani ákona fókéi sirá kusin avúavá bá ena avábá in má inká kama ineine uren ma funtákein avúavá baran mái fákaráké doriyá uno. ⁷ Tiyarafenui ákona ano setimpin bakái fura sikhein baya anan tiamiyá uno. Puntákein avúavá pói setisi siruvin danasí é inká tankoí é ukhé tiféuno. ⁸ Manáa nanin banta ano sinkayan máden toyampá baya siren kampun doraríi iyan mino siyan maen inká manáa ano setin timo siren kama yoraríi iyan ne siren tetin tiví daní iyan mifo setí ankan Tiyarafenui yoran para yoré oriya banté uno. ⁹ *Banasí ano ma ída afová ukhein banta an dakhé tifé umpo minó anon tetin afová ukhen mino. Purin mano setin pákiyan mifo ída furiyá tiféuno. Inká tetin tinkáden purin tirirí iyan mifo ída furiyá tiféuno. ¹⁰ Tetisi sirun nanápin bá umpo ena ena yamú Tiyarafenui ano simusin manan timé iyan mino. Minó daná ída vá bá umpo ena nanin banta ayaékun inaru fáke kama yanasinta variyan mino. Inká ída mana yaná dékun ban mifo minó danái kanaí ukhé tiféuno.

¹¹ Koriní ma vaona nanin banta oe, fura vayan tiretin tiamiyá pasé tükákéi siretin tirá amé tiféuno. ¹² Tiretin nan moéké tinunu iyái siretin ída sirá namu uantiyá umpo mai setin ará namu usintiya náí sirá ída manafiní ukhé tiféuno. ¹³ *Tiretin ma sirá amerunaí eya vá tetin ará timeno van mi ve afóe ano ma ve akhafana siameiní éi siretin tiamiyá uno.

Ída Ma Mumunan Iyain Nanin Banta Vá Ma Ída Manafin Doran Baya Ino

¹⁴ *Ída ma monó tiyain kéká bá ída vá o súpá uveya yorarí ono. Mai fara vara seyo, funtákein avúavá bá namu avúavá bá ano

ída manafin dorarí inten mino. Inká kakhan má títípa vá ano ída manafin túpá inten mino. ¹⁵ Yisasin má Ban Anon má ano ída ará manafiní ukhein pasinti monó ma siyaona nanin banta ano ída kanaíeya ída ma monó tiyain nanin banta vá o súpá uveya yoran nono. ¹⁶ *Ayarafenui monó namun má kasaesá maman túpá ótifante rafuno. Ída ino. Mai fara vara seyo, aun ma fara van oriyan ban Tiyarafenui monó namun mi setí ankan báken pasen béi máa sikhen mino.

“Téi ano vetin má báké betin aúbaná nó maé Betíi Ayarafenui váken inká tenti vanasin banten mino.” *Riv 26:12*

¹⁷ * “Máan tukhein nan mi Bafan mano siyáken mai kéká me ampire nentá oriveya vetíi fain danasinta ída aruvesirá tiretin avirano sen mantino.” *Ais 52:11*

¹⁸ * “Minó ákona ma vain Bafan mano máan mi sen mantino. Tiretin Afóení éku mae inká ten tikhafanaí inono.” *2Sa 7:14*

7

¹ Téi ma sinunu ukheruna sirona kéká soe, Tiyarafenui ano ma amenté uno siren ma iyáantan baré ein danasinta inka varé tifé umpo erisá dante vukhafa vá tú iyampon má ma fainíin avúavá do sesé uan karúdaré avusese uve sá ben nan mana feriyáké kantasí ukhein avuavá ana vá bará tifano.

Koriní Nanin Banta Ano Ma Ará Baerein Nan Ma Pori Amusin Ein Baya Ino

² Tetí ankan ída mana vanta namu uanté, aré asé inká ena vanta kampun tiré namu yanápin avían kaúké tifé umpo ara sá timeno. ³ Ma ma siyaruna mai siretin au finí in baya va siya rauno. Ída ino. Pefái siretin tiamiyái setí purasé tükákéi siretin nan tinunu iyá uno séku inikha ono. Mai van mi furonte rafu áa fá bante rafu mai avúavá anan bariyá banten mino. ⁴ Ara ara uman ma setin timaniná erí ma siretin nan ovaré me inékun maen mai anon tirá

* **6:5:** 2Ko 11:23-27 * **6:6:** 1Ti 4:12 * **6:9:** 2Ko 4:10 * **6:13:** 1Ko 4:14 * **6:14:** Efe 5:11 * **6:16:** 1Ko 3:16; Yer 32:38; Isi 37:27 * **6:17:** Isi 20:34, 41; Rev 18:4 * **6:18:** 2Sa 7:8; Yer 31:9

kusin timé iyan mino. Máan tiyain nan mi siretí ankan nan kákan timusin uantiyáké ma veya siamiyá uno.

⁵*Mai fara vara seyo, Masedoniá barafá ma onóbékun maen ara ara vayafó tetin uman timíkan mai anon tikhokho fan tufá tivesaraen mino. ⁶Máan tiyákan mifo mai ma uman baren ará namuin ma ará kusin amé iyain Ayarafenu ano ma Taitasin tiantan orein manon tirá kusin mo simen mino. ⁷Taitasini erin mano ana va sirá kusin timen naino. Tiretí ma véin má dere ará kusin amireya inká ten timaniná ma afoká ukhein dana san ma arunan usintáde ma siretí avábá ma aní eona van ma véi me sisimein nan mi kákan timusin é uno.

⁸*Tenti vompon mano siretí ankan ará namu uantáken mifo mai van ída sirá amé uno. Mai fara vara seyo, fefá tirun noe siyá umpo saréa afová é ma vompon mano manáarái siretin ará namu uanten mino sé iniyá uno. ⁹Mai vompon ma uvaman amirékun ma ará namu eona rasa saréa simusin iya raumpo Tiyarafenu anon mai ará uman maman dákó en mino. Mai anon tiretí ineine maman amá urayan ará baere ompo setinti veya ano ída uman amen mino. ¹⁰*Tiyarafenu anon ará uman maman dákó uran mi mai ano setisi inin maman amá uren tiya íkai sirá baédékun evaránen tiviré iyan mino. Máan té iyan mifo mai ma ída aúkáké tirunoe sin aú baerari ma ein nanin banta anon purin maman dákó é iyan mino. ¹¹Tiyarafenu ano ma mai arunaná maman dákó ein manon kama avúava sinta maman tiretin aúbaná dákóen mino. Mai avúava sinta maen ákona inin má doreya inká tiretiyan maman aní eya ída ume vane seya inká tiretí ankan ume van aranan iyáke akhokho van eya inká téin tonano van eya inká kama e yafíbe yoreya inká ena ma funtáde yaimin avúavá ma vareona ino. Mai avúavá ma eona anon aní eya siretimpin ída mana aau van minon te ono. ¹²Aau vanta fi áa aau uantan banta fi funtarano vara séi mai vompon uvare rauno. Ída ino. Tiretí avúavá e unen dákó édavintiya Tiyarafenu avorá teti nan purase anunu ono van mi mai

vompon uvaman amé uno. ¹³Tiretin ma setin nan anunu iyaona avúavá anon tetin tirá ákona usinté iyan mino.

Inká mai ma Taitasini ará uman ma maman kusiantádeya ma véin amusin ameona avúavá bá ano yeren tetin kákan timusin timen mino. ¹⁴Tiretí kama avúava san amo sé pefái Taitasin tiamikharé ékuyan mai ma séi siamikáeruna avúavasí uren náí séi ída siyave van é uno. Mai fara vara seyo, Taitasi ano yeren tenti veya van puran tikha ono sen mino. ¹⁵Taitasi ma sireti vaonafá oríka ma avinantan má béin e avire mo kauráke ma ven oo yaiiyá eona van béi moékantái arunan uantiyan mino. ¹⁶Máan tiyain nan mi siretí ankan nan moéke kama avúavasí inono se mumunan iyáké timusin uantiyá uno.

8

Tiretí Ankan Aúkakesá Avarí Ono

¹*Mumunan tiyofi sífá tiváeyan noe, Tiyarafenu ano ma Masédoniáke monó kéká ma sarisari uren aya ukhá ein onano van muno. ²Betí ankan amaniná kákan uman uron afoká íkan minó dana san o afasí iyáken mifo mai van betí ankan ída inina mai ma ona ída van ma o afasí iyain kéká ameno siren amusin má kokhon moní átaru en mino. ³Mai ma átaru ein moní betí anunu finte náí máa yákaren nafi mai máa me khaúdú en mifo mai esantaren moéken karúden mino. ⁴Máan tiyáken inká setin nan áesi Yerusalemí ma vain mumunan kéká bá dere aya ono siren ákonaen tútúpiyaren mino. ⁵Máan tiyaren mifo esé daná betiyan Bafan amiren inká betí ará tetin timiren mi mai ma Bafan mano vetin amein inin ánain bákuren tétin timiyan mino. Betí ankan ída kanaíen baranten mino siré inikháeruna avúavá esantaren moékan avúavái variyan mino. ⁶Pefá Taitasi ano ena nanin banta ma ayae kama yaná amin dorarí ono van tiretin ará ákona uantaya yókareya afová ukhe náí véi evaránen o váké dóan kípano van mi ákonaé tiyá uno. ⁷*Tiretí ankan ara ara yoran ma variyaonafin kama iya ono. Tiretí ankan Tiyarafenurá mumunan

* **7:5:** 2Ko 2:13 * **7:8:** 2Ko 2:4 * **7:10:** Mat 27:3-5; Ibu 12:16-17 * **8:1:** Rom 15:26; 2Ko 9:1-2 * **8:7:** 1Ko 16:1-2

iyákeya ída feran kasae mai ma mumunan iyaona avúavá tian amá iya ono. Inká tiretí ankampin kokhon afova vakaya Tiyarafenui yorari ono van moéke anunu iyákeya setin nan iniya ono. Máan mana e vá ena ma amin avúavápin ná tiretí ankan moékantasá dorano.

⁸ Téin too yaiye mai yorari ono vara yuvuniya rauno. Ída ino. Ena nanin banta ano ma mai yorari ono siráken ma iniyain nan mi siretí ankan ma ena avábá uantán avúavá purase aní ono van muno. ⁹*Mai fara vara seyo, siretí ankan pefái setisi Bafan Yisas Karaisini sarisari in avúavá onta ono. Béi ma inarufá báken maen minó danái yan baren mifo siretin naron tiren ona ída van banta an den mino. Mai ma inarufá bain danasinta varano van mi máan ten mino.

¹⁰ Tiretí ankan ma moní átaruin dorari ukhá eona fákena sesi inin máan mi ukhen mino. Maman ma esantein oranafin tiretí ankan mai yoran arái urákeya mai yorari ono van anunu iya ono. ¹¹ Máan tiya ompo mai yoran ná e yore mo kípáno. Pefá tiretin ará ano mai yorari ono siren mantakhen mifo sireti ma yákanona avúaváká tiya vá ameno. ¹²*Para vara seyo, Tiyarafenu ano inte yanasá tiretí ankan dákefo mai aúkáké ma amin nan mi amusin ukhen mifo ída ma vain dana san ída inikhen mino.

¹³ Tiretí ankan mana mai uman baresin ena nanin banta ano avábaká bano vara ma vaya siya rauno. Ída ino. Minó ano manaí ukhein uman barano van mi siyá uno. ¹⁴ Taréa siretí ankan kokhon daná kaen nan báí kasa eya vetin aya ukhá esin ná inká anona sireti ma o afasí inona yamú anona aya ino. Máan ma inte mae minó ano manaí ukhe van nono. ¹⁵ Mai van ma Tiyarafenui vompon dókifin máa sikhen mino.

“Kokhon dunan ma átaru uan kaé iyain kéká ano ída esantaren kai é iyan mino. Inká manáa yunan ma átaru é iyain kéká ano ída o afasí é iyan mino.”

Eks 16:18

¹⁶ Téi ma siretin nan iniyarunaí en ma Tiyarafenu ano Taitasin inin iniyain nan mi Tiyarafenu tusu sian tiyá uno. ¹⁷ Tiretí ankan baonafá orino siré tetí tiantékun eyo sikharen mifo véi yere orivé mai yorari ono siren moékantá anunu iyaren pasen mi vei anunu finté tiretí baonafá orinten mino. ¹⁸ Tetí ankan ena sifá tiváen má deren Taitasin má tiantékun orinten mino. Tiyarafenui kama vaya ma véi siamiyain nan mi monó nanin banta ano véin amo sé iyan mino. ¹⁹ Mai avúavá máa rasa ino. Monó kéká ano ven ma sá moní ma átaru uádan baren Yerusamí orino sikhén mino. Tetí ankan mai yorarié Tiyarafenu aví moékantá daní iyáké inká tetí ankan mai yorari ono van inikhé uno vá té banasi aní ono. ²⁰ Mai ma átaru uran moní baré Yerusaremí oronunafin ída mo asuse urékun mana ano namu ineine ino van mi mai sifátiváen má aviré uno. ²¹ Para vara seyo, seti ankan puntákein avúavasí ó tifanté umpo ída vá Tiyarafenu avorá ana kama avúavasi ono van iyáké banasi avorá basá máan ó tifano.

²² Máan tukhá ena sifátiváen má békantái muntaré tiantékun oren mino. Kokhon damú ara ara yorampin béin akhen ókha ékun ákona yorarií oné uno. Béi fura sen tiretin nan kama avúavasi anan inono sen afová ukhen pasen béi mai yorari ono siren kákantá anunu ukharen mino. ²³ Máan tukhen mifo manáa ano ma Taitasin nan ma ina intiya mae siamiyákeya senti mana yoran bantan báken tiretin ayaé iyan mino vá teno. Ena sifá tiváe kan maen ena akhen pákena vantá kan mi o varen monó dorari iyáken Karaisin kákan bí amiyain mino vá te siameno. ²⁴*Máan tukhein nará tiretimpin ma kama avúavá bain ná míkan banta rasá aní ono. Máan tesin ná tiretimpin ma ará amin avúavá bain minó nanin banta ano afová uren ná pura ino sen onano.

9

Taitasin Ma Siantan Korini Orein Baya Ino

Yerusaremí Ma Vain Monó Nanin Banta Ano Ma Moní Átaru Ein Baya Ino

* **8:9:** Mat 8:20; Fir 2:6-7 * **8:12:** Mak 12:43-44 * **8:24:** 2Ko 7:13-14 * **9:1:** 2Ko 8:1-7

1 *Téi ída kanaíe Tiyarafenui vanasi ma aya iyaona fákena van tenté uno. 2 Mai fara vara seyo, siretí ankan ma amusin má ma ena nanin banta aya iyaona avúavá téi afova ukhé pasé Masédoniá kayo avorá tiretin amo sé iyá uno. Tiretí Akaiá barafin ma vaona kayo van pe o útúben maman oranafin mi mai yorari ono siren útakhen mino sé tiamé uno. Tiretí ankan ma ará bá ena amin avúavasí eona ano vetí ankan ará manten nan pasen betí deren mai yorari ono van en mino. 3 Máan tiyan mifo siretí ankan amo sin baya ma siyá eruna van banasi ano iniren ída ani-ana ino van muno. Mai ma siameruna yanasinta útakhe fono van mi maí kanan banta ano onano van tiantékun oren mino. 4 Mai fara vara seyo, Masédoniáké ma manáa kéká ano sen má oriyaren o onanti ma ída útakharé esí maé mai setí ankan tiyave van éku mae siretí moéke ayave van inono. 5 Mai van mi iniré pe o útúbé tifá tiváeyan tiantékun oren mo aya inti mai ma monó kéká amusin ameno van ma iyáanten nan baré ein danasinta útan kaono van muno. Téi ará bá ma amin amusin nan mi inikhé umpo enai yuvuntá ma amin amusin nan ída siyá uno.

Danayun Pafasintá Ma Sian Baeran Baya Ino

6 *Tiretí ankan afovasá ono. Tanáa yanayun ma fafa sikhareya sanáa yunan mi yuyasin nompo kokhon danayun ma fafa sikhareya kokhon dunan mi yuyasin nono. 7 Máan tukhantiya mana mana vanta ma ona ameno van inteya ovare me inídeya vá ameno. Ída vá enai yuvuntá ameno. Mai fara vara seyo, ará bá ma amin nanin banta van mi Tiyarafenu ano anunu é iyan mino. 8 Máan ma esin Tiyarafenu ano éi ma iniyaona yanasinta víkaantádantiya fase onesin kokhon danasinta vantí kasae ena nanin banta avarí inono. 9 Mai van Tiyarafenui vompon dóki ano máa sikhen mino.

“Bé ve ina yanasintafó ona ída vain nanin bantafin amusin dan orera en mino. Beni funtákein avúavúa ano fara van oriyán banten mino.” *Íbo 112:9*

10 *Máan tukhan Tiyarafenu anon danayun amiren inká béi anan ara ara yunan amé iyan mino. Máan manan en minó danasinta amintiya maifó ena nanin banta aya iyasín pasen mana vanta ano ma kokhon danayun pafa siráken ma kokhon dunan duyasiyainí eya funtákein avúavá kayo varan nono. 11 *Máan tesin Tiyarafenu ano kokhon danasinta amintiya mae maifó máan mana eya ena nanin banta aya inono. Máan tukhantiya mai yanasinta mamare mae ona van ma o afasí iyain kéká amesin mi vetí ankan mai avúava san moékantá Tiyarafenu tusu siantanten mino.

12 Máan tinten mifo siretí ankan ma varanona yoran manon Tiyarafenui kéká ayaintin maen ída mana yana san o afasí iyáken Tiyarafenu moékantá tusu siantanten mino. 13 Máan te ma ena amin avúavá anoi Tiyarafenu aví daní inono. Para vara seyo, éini moéken amin avúavá anon mi anien Yisas Karaisini Kama Vaya yakhafiya ne sinten mino. 14 Máan tesin maen mai nanin banta ano Tiyarafenui sarisari ma vetí ankampin bíkakhein nan tiretin moéken anunu uren Tiyarafenu ano siretin kama ino van amúkuantanten mino. 15 Máan tukhantí Tiyarafenu ma moékan kama ukhein amusin daná ma simikhein nará tusu sé tifano.

10

Pori Ma Monó Dorari Iyáken Mai Yoran Ma Ákona Ein Baya Ino

1 *Tiretí banasi ano séi nan tiyáke Pori ma setin má báken maen periyán baren ma enafá o van mi ákona vayafó bompon uvaman timiya ne siya ompo Karaisi ma einí éi seyan bararasí uré bempáké bákéi siretin tiamiyá uno. 2 *Te ma iniyaruna ída mai ano kanaí inten mifo intéa kéka sará bara ráke avúavá bariyan ne siyan nafi mai kékápin ída ákona é baya seno van muno. 3 Pura ino. Tetí ankan ma varará bá umpo ma vara ráke nanin banta ano ma siruveini sa iyá tife rauno. Ída ino. 4 *Ída ma vara ráke aruvin

* 9:6: Pro 11:24-25 * 9:10: Ais 55:10 * 9:11: 2Ko 1:11; 4:15 * 10:1: 1Ko 2:3 * 10:2: 1Ko 4:21 * 10:4: Efe 6:13-17

danasinta ifo inaru fáke Tiyarafenui ákona aruvin danasinta fói Ban Anoni ákona yafu ankaman mádariyá tiféuno. ⁵ Mai aruvin danasinta fói Tiyarafenui kama avúavá ma vanasi ano afová ono sein ma iyákaré ein aruan mádariyá tiféuno. Inká mai aruvin danasintafó anan betíi átakharéin ineine ma vá ein do maman karúdaréi Karaisin oo yaiyino van afova amiyá tiféuno. ⁶ Máan tukhantin intéa kéká anó iniren dakhafiyantin ná inká intéa kéká anó mai ánain ída yakhafinten nafi mai kékái uman amenté uno.

⁷ Tíretí ankan afoká ma vain danasintarái ineine kaiya ono. Mana ano ma Yisas Karaisini vantan bá uno ma sinten ná mai setin má deren Yisas Karaisini vantan bá tifé umpo véi ovaren ná me inino. ⁸ *Para vara seyo, sítetíi mumunan ákona uantano van mi Bafan mano mai yoran timikhantí pasé ída sítetíi mumunan máde asuse onté uno. Máan tukhanti mai yorantá ma seti siví daní onté ída siyave van ó tifanté uno. ⁹ Máan tukhantíi sesi vompon póké títetin ída akhokho amiran muno. ¹⁰ Para vara seyo, manáa ano siyáken Porini vompon mano setin ákonará duvun iyan mifo seti varunará mai vempáké tiyan mino. Máan tukhan maen beni vaya mai ída ákona ukhen mino. ¹¹ Máan baya ma siyain kéká ano vá ovaren me afová ino. Mai ma enafá báké ma vompompín uvaman amikharé eruna mai sítetin má ma e váké mai avúavú anan baranté uno.

¹² Máan tukhantí manáa kéká ano ma ve amo siren be aví daní é iyainí ída onté uno. Inká tetisi sivútivá bá betin avúavábá manái ukhen ne ída senté uno. Ída ino. Mai kéká maen betiyantái enai avúavá óden betíi avúavá daimen non mifo mai kékápin ída fura afova van mino. ¹³ *Máan tukhantí tetisi sivútivá ída maman daní uré tetimpín ákona van mino sé tifantéuno. Tiyarafenu ano ma setin timikhein doran máarái seti simo siré mai máa anan doriyáké béi ma mai avúavakasá daimono ma sikhein máará anan daimonté umpo Tiyarafenu ano ma iniádan baré einíi eya sítetin mái mai yorampín baono. ¹⁴ Máan tukhein nan

mi ída moéké teti simo siyá umpo mai ma Tiyarafenu ano simikhein kanarái sé teti simo siyá uno. Mai fara vara seyo, setí ankan naren araié Yisas Karasini Kama Vaya sítetimpín baré orikharé uno. ¹⁵ Máan tukhá ena ano ma yókeintá ída seti siví maman daní iyá uno. Tiyarafenu ano ma simikhein doran puntádé dorékun mai ano sítetíi ankani mumunan ákona uantantin tetisi yoran mano sítetimpín mo kokhoní ino van muno. ¹⁶ Máan intí maé títetin oyampá ban ma ída yoriyain baru kayo fimpá bá orivé dorano van muno. Para vara seyo, ena ano ma fefá dókein baru kayofín dódé te simo sira rauno. Ída ino. ¹⁷ *Mai van Bompon dóki ano máa sikhen mino. “Banta ano ma mana vanta amo seno vará Bafan mano ma yókein nará amusin uren ben mana vá amo sino.”

Yer 9:24

¹⁸ *Para vara seyo, vanta ano ma amusin iyáken beyan amo sé iyain kéká maen Bafan avorá mai kayo ída kákaní ukhen mifo véi ano ma mana vanta kákan bí amé iyain banta anon kákan bí baré iyan mino.

11

Porin Má Kampun Aposeri Kayo Vái Vaya Ino

¹ Téi ma fara aniana vaya siyá báké ma se simo siyákuya mai ída vá me ifá ono. Tirun mompo mai ma aniana vaya ma siyaruna vá ineno. ² *Mai fara vara séi sítetíi ankan nan kokhon ineine iya rauno. Tiyarafenu ano yeren kokhon ineine iyái mai van mi vanta amikhein arinta ano ma ákona en bainí ukheya Karaisin má bano van mi siamiyá uno. ³ *Máan tukhen mifo fefá ma osafáe ano Ivin ma mákasikharé einíen Ban Anon mano sítetíi inin máden asuse intiya mai ma funtáde Karaisin ánain dakhafiyá inona me ifá ure kampun avúavápó béin dakhafinona van mi iniyá uno. ⁴ *Para vara seyo, sítetíi ankan ma onékuya enará ukhein Yisasin má Kantá Aunan má monó baya vá pákena van ma ena kéká ano me siyákaya mae sítetíi ankan kasae mumunan iya ono. ⁵ *Máan

* 10:8: 2Ko 13:10 * 10:13: Rom 12:3 * 10:17: 1Ko 1:31 * 10:18: 1Ko 4:4 * 11:2: Efe 5:26-27 * 11:3: Esé 3:4, 13 * 11:4: Kar 1:8-9 * 11:5: 1Ko 15:10; 2Ko 12:11

tiya ompo setí ankan kama uron mi iyá uno ma siyain aposeri kayoi aránaópá téi ída vá uno. ⁶*Máan tukhéi vanasifin ma sánaen monó baya sin afova ída manté umpo fura sé betin esantaréi afová ukhé uno. Mai afova fefái ara ara aa sáké tiretí ankan aní ékuya fura se afovaí ukha ono.

⁷*Máan tukha ompo séi ma seyan bararasí uré tiretí vaípáke ma ída miyan inantinton Tiya rafenui Kama Vaya ma siamiyaruna mai umesá iya rafuno. Ída ino. ⁸*Tiretí ankan ma fara aya ono siré ena monó kéká ano ma karúdarú uádan pintena moní ma variyaruna anoi umoy-aní ma einí iyá uno. ⁹ Máan tukhantíi siretí ankan baonafá ma o varé maé mana yana san ma o afasí ma é ída sireti vaonafá inan té iyá uno. Mai fara vara seyo, Masédoniáké ma erein tifá tiváeyan mano mai ma o afasí iyá eruna yanasinta simikhantí pasé téi ída kanaíé tireti siya ono van mana yana san inan tenté uno. Ída uron mi máan tonté uno. ¹⁰ Téi fura sé afová ukhékun Karaisini fura yaná ano sempin bantí pasé mai ma ída miyan bariyaruna van Akaiá barafin ma minó akhempá nóké mai van kasaé te simo senté uno. ¹¹ Mai séi fará tireti vaonafá mana yana san ída inantiya rafuno. Téi ídá tiretin nan tinunu é iya rafuno. Tiya rafenu ano afová ukhái séi fura siré tireti nan moeké tinunu iyá uno. ¹² Máan tiyái mai ma setin má manaí dorarí iyá uno siren ma vetiyan amo siyain kékái aa yasíkano van pasé para máan tiyá banté uno. ¹³ Mai kéká maen kampun doran banta kayo ino. Betíi avúavá ano siretin auuráké uren Yisas Karaisini kama yoran banta ma einí é iyan mifo ída ino. ¹⁴ Máan tiyan mifo séi ída sinú diyá uno. Para vara seyo, Ban Anon mano yere kasaen kakhan enisori ma einí iyan mino. ¹⁵ Máan tukhantiya Van Anoni yoran kéká ano ma ara ara avúavá póké ma vanasi mákáden ma vetiyan nan puntákein kéká uno ma sin nain nan tiretí ankan ída vá anú duman duman iya vá baro. Ínaimpáké betí ankan ma variyá inain avúavákái miyan baran-

ten mino.

Porin Amaniná Ma Eriyain Uman Kayo Van Ma Sein Baya Ino

¹⁶ Mai ma fefá tiamikharé eruna mai vaya anan taréa evarané tiamiyá uno. Mana vanta ano sen nan ída vá óen iya ne sin nompo séi ma manáa aniana vaya ma siyákeya mai kampun banta kayoi vaya ma iniyaonaí eya senti vaya inesí maé manáará te simo seno van muno. ¹⁷ Au khakan in avúava san Bafan mano ída anunu ukhen mifo séi maen óen banta an mi yiyá uno. ¹⁸ Máan tukhein nan mi kokhon nanin banta ano ma vara ráke avúavápin au khakan inté intí maé mai sen mái máan tonté uno. ¹⁹ Máan tukhein nan mi intéa kéká anó mai van afová ukhé uno siyafo mai kéká ano óen kayo an mi yiya ono. ²⁰ Máan tukhein nan mi mana vanta ano ma veni yorarí ono van duvun en nafi áa siretin nina yanasinta varen nafi áa siretin máká maáká en nafi inká tiretin maman bararasí uren beyan nan mana inian kákaní iyáken inká tiretin auná ma ankamen ma intiya mai siretí ankan ída mana avúavasí ukha ompo ifá en nan mi máan tiyan mino. ²¹*Máan tukhá téi siyave van ída kanaí é tiyáké tetimpin ída ákona vain mai yanasí ontere senté umpo vetí ankampin ákona van mi máan tiyan ne senté uno.

Betiyan ma inte yanápin nafi ma ve amo sintí maé mai seyan dere se simo senté umpo mai evarané óen banta an mi yanté uno. ²² Máan tukhantin betí ankan Iburu kéká unó tinten nafi mai sen má Iburu vanta uno. Inká betí ankan Isareri kéká unó tinten nafi mai sen má Isareri vanta uno. Inká betí ankan Abraamun anavasin munó tinten nafi mai sen má ben anavasin muno. ²³*Mai kéká ano Karaisini yoran banta uno sé iyan mifo séi mana óen banta an ma yiyaruna anoi vetí ankan esantaré moékantá Karaisini yorarí iyá uno. Téin karavusifin pákaan moren ída yankaforen dádá dafiyó tinkáden tiruan purirí é iyan mifo séi moékantá ákona yorarí é iyá uno. ²⁴*Yutan kéká ano yan manápá damúpin teti naini (39)

* **11:6:** 1Ko 2:1, 13 * **11:7:** 1Ko 9:18 * **11:8:** 2Ko 12:13; Fir 4:15-16 * **11:21:** Fir 3:5 * **11:23:** Apo 16:23
* **11:24:** Diu 25:3 * **11:25:** Apo 16:22; 14:19

yádái ákona yafiyópó tinkádú ukhen mino. ²⁵ *Kanú manaú dadasí en Romu kéká ano kunan dafiyópó tinkamen mino. Maná damú Yutan kéká ano onámanápó tinkamen mino. Inká kanú manaú dádá téi ma oreruna sipi namuein mino. Máan tuví mana inuran má bayan má un non daró noré uno. ²⁶ *Máan tukhá kokhon dádá minópimpá ma nóké anon nonpim e iyankarí iyákun inká umoyan banta kayo ano siruren ten tina yanasinta yafiyaren mino. Inká ena anan nanin banta vá tesi kéká bá ano yere sirono van iyaren mino. Kákan baru kayofin nafi kámá barafa safi uman baré ída kama iyaré uno. Un nompin afeyorarí é iyákun inká kampun ten monó kéká uno ma siyain kayo ano uman timiyan mino. ²⁷ Máan tukháí séi kokhon damú ákona yorarí iyá paséi ída kamaé tuun baré iyá uno. Kokhon damú ída non má dunan má nanton tirafanan para e manté oré iyá uno. Ída ona váká pasé iyon nan takhin takhin é iyá uno. ²⁸ Máan tiyá maé monó nanin banta ano intesá ena ena uman kayo varanten nafi siré anomé iné iyá uno. ²⁹ Manáa monó kékái mumunampin ma mo iyon in maen ten tufá ída múmú é iyan mino. Manáa kéká ma umefin mamádan eraven ankamí maé tiran nan uantiyá uno.

³⁰ Máan tukhantí te simo ma seno vará inte yanasinta anó tenti sivesara aní iyan nafi mai vará moékantá te simo seno van muno. ³¹ Mai ma ena ena aví daní iyain Tetisi Bafan Yisas Karaisin Afóe Tiyarafenu ano afová ukháí ma fura vayan tiamiyá uno. ³² *Téi ma Damaskasí bákun maen Aretasin ne sin Kin ni kamanin banta kayo ano séi nan pákano siren aruvin banta kayo kaíkan kákan baru ona kayorá dafisen orikharen mino. ³³ Máan tukharen mifo kákan barui kafi aimpinté uaren téin unampin uféden kaí aravuaré me oné karan oré uno.

12

Pori Ma Ayankuní Ukhein Daná Aní In Onein Baya Ino

¹ Te sivi ma yaní in pintena ída mana yaná baranté umpo ída ena aa vain pasé mai avúavá para varé oriyá banté uno. Máan tiyá banté umpo áesi Bafan mano ma séin tuu vaéden ma aní ein danasinta vá inká aú páke yanasinta vá tiaméku vá ineno. ²⁻³ Téi Yisas Karaisini yoran bantan baré ékun Tiyarafenu ano e siviren dan uron inarufá múdá bákun fotini (14) oranan orikhen mino. Mai sen tu minó bukhafo anó o van nafi áa saunan máa anó o van nafi mai séi ída afová ukhé umpo Tiyarafenu ano anan afová ukhen mino. ⁴ Téin ma siviren inaru varufin ma moráká maé téi sinú duré mai ma enará ukhein baya ma ineruna van ída kanaí é baya seren é uno. ⁵ Mai vaya ma inikherunará te simo senté umpo mai van ifá iyá umpo mai ma sesi ákona ma ída vain nan manan te sivi daní onté uno. ⁶ Te sivi ma yaní onté maé mai fura vaya anan tenté umpo ída óen banta an danté uno. Máan tonunaren mifo ifá é uno. Mai fara vara seyo, vanasi ano senti vayará ten tiví daní uren tenti ineine ánain dakhafin nain nan paséi se ma variyaruna avúavá bá inká te ma siyaruna vaya vá inen onen ma uren maen ten nan puran tiyan mino sen inino van muno.

⁷ *Tiyarafenu ano kama yanasinta séin aní uren maen inká téin nan mai yanasinta van ovaren me iniren be aví daní inae siaren mana ayankun an dakhein daná áikan ten tufin dafékakhen mino. Mai yaná maen mai Ban Anoni vaya varen orin bantan tiañtan e váken mi séin nan be aví daní inae siren iyariyan ban mino. ⁸ Máan tiyáká mai yaná do maman karúdasintano van kanu manaú dádái simúkimpói Bafan baipá ínané inantiyaré uno. ⁹ *Máan tékun maen béi evaránen tisimemí, “Éin an den ma ákona ída vain nanin bantafin mi senti sarisari ano kama yorarí iyáken mai sarisari ano éimpin kanaí ukhen mino,” sen tisimikhá paséi senti ákona ma ída vain nan mi se sivi daní iyákun maen Yisas Karaisini ákona ano sen pinté uaren doriyan mino. ¹⁰ Máan tukhein nan mi Yisas Karaisini yorarí impin ma ída senti ákona vantin ma vanasi ano siruren tisiren toyampá baya siyá ma kákan uman

* 11:26: Apo 9:23; 14:5 * 11:32: Apo 9:23-25 * 12:7: Yop 2:6 * 12:9: Fir 4:11-13

bariyaruna van mi simusin iyá uno. Para vara seyo, sémpin ma ída ákona van maen mai Yisas Karaisini sarisari anon téin evaránen ákona simé iyan mino.

Pori Ma Korini Nanin Banta Van Kokhon Ineine Ein Baya Ino

¹¹*Tiretí ankan manon téin tirá maman mantarenái óen banta an davé te simo siyá uno. Tiretí ano ma séinti sivútivá baya uvádeya ma séin timo seren mifo siretí ankan ída máan tená paséi seyantá tian dákó é umpo mai ma aví bain aposeri kayo aránaópá ída séi vá umpo séi faen danái vá uno. ¹²*Téi ma siretin aúbaná ma o váké maé ten nan purase aposeri ino seno van kokhon danái variyaré uno. Para vara seyo, séi nan Tiyarafenui yoraríi iyan mino seya afová ono van paséi mantaan ákona uvé minó uman bariyáké maé inká enará ukhein danasinta vá aní danasinta vá maman dákó ukharé uno. ¹³*Ena monó namun kayofin ma monó tiyain nanin banta ma maman tiyaruna avúavá anan tiretin manan té umpo mana uman máan ída amé uno. Téin dunan timin uman ma ída ameruna ano ma namu ukhéku maeya mai ume vá ampisintano.

¹⁴Kanú manaú dádasí é tiretí ankan baonafá orono van útakhé umpo mai ma oronunafin ída siretin uman amenté uno. Tiretí afová ukharono. Iyampon kayo ano ída yunan dosen be anoifon mo amé iyan mifo vetin anoifo anon dunan dosen be akhafana mo amé iyan mino. Máan tukhein nan mi siretíi minó daná barano vara oronte raumpo siretin nan mi oronté uno. ¹⁵Minó te sina yanasinta vá te su vá tiretí ankan ameno van moéké tinunú iyá umpo siretí ankan téin nan ída anunu iya ono.

¹⁶Tiretin pinté manáa ano sen nan ída uman timiyan ne siren maen máa siyan mino. “Teti sina yanasinta ída afoká umoyan iyan mifo ara ara vava kayofó tetin mákáden maen aupáké baré iyan mino.” ¹⁷Mai intesá ukhen nafino. Mai ma siantékun orein banta kayo ayan táké uaresá tiretin nina yaná umoyan bare rafuno. ¹⁸*Tiretí ankan baípa ma Taitasin

tiantékun oriyá maé ena sivá tiváen tékun ben má muntaven oren mifo Taitasi ano siretin nina yaná mákáden ná umoyan baren nafino. Ída ino. Para vara seyo, verasampin mana Aunan mi vaká mana aasái oriyá manaí doraríi iyá uno.

¹⁹Tetiyan aúpasí ono vara ma vompon uvaman ame rauno. Ída ino. Teti ankan Karaisini yoran banta kékái váké Tiyarafenuun avorá pura vayan tiyá umpo séi ma sinunu ukheruna sirona kéká soe, siretíi mumunan maman ákona uantano van mi ma vava siyá uno. ²⁰Para vara seyo, séi ma oriyá o onéku maeya séi ma inikheruna avúaváká ma ída vare ma inká tiretí ma inikheona avúaváká ída séin tonanona van mi feriyá uno. Téi ma o onékun ma aruve asive in nafi ena ará namu uantan nafi ena aranan uantan nafi eyan nan mana inin avúava safi oyampá baya sin nafi e sian more mere in nafi au khákan in avúava safi asuse avúava safi ma van nan mi feriyá uno. ²¹*Para vara seyo, fefá ma umeí iyá éona van ída ará baédeya sirun noe sen nan ma famúku avúava safi inká ena aranan avúava safi ma siretimpin para vain ma mo onékun ma Tiyarafenu ano siyave simin nain nan mi feri yá uno.

13

Pori Ma Sipá Ákona Uanten Amaan Baya Sein Mino

¹*Kanú manaú dádasíi é tiretí ankan baonafá oronté umpo Tiyarafenui vompon dóki ano máa sikhén mino. “Kan nafi kanú manaú banta ano fi ma onantin ma mana vanta ano aauí ukhá inti mae kasae mai vava kópin puntaran nono.” *Diu 19:15*

²Pefá ma kan dádasí é ma siretin má báké maé mai ma umeí ukhá ein kayo fefái afova vava siamikharé uno. Máan tukharéi saréa ma vompon ma uva-man amerunafin dere evarané mai ma umeí ukhá ein kayo vá ena kéká bá afova vava siameruna fasintí téi ma oronté mai ma umeí iyáin nain kéká ída avo uantanté uno. ³Máan ma ékuyan tiretí afová eya Karaisi anon

* **12:11:** 2Ko 11:5 * **12:12:** Rom 15:19 * **12:13:** 2Ko 11:9 * **12:18:** 2Ko 8:6, 16-18 * **12:21:** 2Ko 13:2
* **13:1:** Mat 18:16; 1Ti 5:19

ben pinté uaren baya sisimiyan mino sinono. Tiretíi avúavá ma maman puntarampin béin ída afonkakhein pasen bei kákan ákona fói siretimpin doranten mino.

⁴ *Para vara seyo, fefá béimpin pura sen ída ákona van maen daa unkamádantá arukharen mifo saréa Tiyarafenui kákan ákonarái van mino. Máan tukhan tetin má deren ída ákona van mifo véin má ma súpá ukheruna van mi Tiyarafenui ákona ano setimpin báken mi mai ákona ano siretimpin doriyan mino.

⁵ *Ena ena yamú ákonáé mumunan iya rafuno sire vá e avúavá bá ineine vá daíde vá onano. Eyan avádúan onesin ma Karaisi ma ída siretimpin banti maeya mai fura se ída mumunan ukha ono. ⁶ Máan tiyákeyan teti ma Karaisini yorari iyaruna oman afová inono sé inikhé uno. ⁷ Tiyarafenu ano siretin ayaintiya ída namu avúavá barano van mi setí ankan timúkiyá umpo setin nan Karaisini yoran banta kéká ino sen banasifin tino varauno. Ída ino. Para vara seyo, seti nan kampun banta kéká ino siya ompo setinti kákan inin ma vain mai funtákein avúavá ana varano van muno. ⁸ Para vara seyo, setí ankan ída kanaí é pura yaná namuroí ó tifanté umpo mai yanákái mantakhé pasé mai yanái ayaiyá tiféuno. ⁹ Tetimpin ma ída ákona van ma siretimpin ákona vain nan mi simusin iyáké Tiyarafenu ano siretin ayaintiya ákona mumunan má bano van timúkiyá uno. ¹⁰ *Bafan mano vei yorantá dafisino van mi séin aní uren ákona simikhá doriyákéi siretin má ma ída varuna afokhampin ma vompon uvamádékun oren mino. Mai fara vara seyo, séi ma oronté maé ída ákona vayafó tiretin má baya seno van muno. Tiretin máden asuse ino vara Bafan mano mai ákona simikhen naifo siretin ayaintiya mumunan ono van mi simikhen mino.

Pori Ma Amusin Ein Baya Ino

¹¹ Mumunan tiyofi sifá tiváeyan noe, sesi vava mará me akhení iyá tusu sé umpo senti kipan baya vá inero. Tiretíi namu avúavá ampireya vá ben ákona uantan

maran iya vá amusin iyáke inká manafin báke vá ará kusin avúavá baresin ná avábá uren ma ará kusiantan Tiyarafenu ano siretin má bano.

¹² Tiyarafenurá ma monó tiyain nanin banta ano ma avábá iyain avúavá kasá ben avábá in maran ná ono.*

¹³ Tiyarafenui kantasí ukhein nanin banta ano amusin baya ne siádan oren mino.

¹⁴ Bafan Yisas Karaisini sarisari vá Tiyarafenui avábá bá Kantá Aunani manafin ban avúavá bá ano vá tiretin má bano.

* **13:4:** Fir 2:7-8 * **13:5:** 1Ko 11:28 * **13:10:** 2Ko 10:8 * **13:12:** Kiriki vava fintéi Tiyarafenurá ma monó tiyain nanin banta ano ma kantasí ukhein amónan maran iyain nan mi sikhen mino.

PORI MA KARESIÁ NANIN BANTA UVAMAN AMEIN BOMPON MINO (Karesia)

Karesia Vompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Pori ano ma ma vompon uvantein nan kan ineinen iyan mino.

- (1) Karesiá barafin ma Pisidiá distrikifin ma sautí bain baru kayo Antiokí bá Aikoniamí bá Ristará bá inká Debé bápín ma esé araién monó dorarí uren ma avían mantakhá eimpin minon ten iniyan maen inká
- (2) Karesiá barafin ma notí bain baru kayofin ma kan dádasí en monó dorarí ukhá ein ne sen iniyan mino. Taréa ma Teki e siyain barafin mi Karesiá bara varen mino.

Uvarein orana ino.

- (1) Karesiá barafin ma sautí bain kéká ma uvaman amikhanten maen mai AD foti-eiti (48) fin nafi áa fotinaini (49) fin nafin uvanten mino. Mai maen kanisori kayo ano ída Yerusaremí átaru ukhan mino.
- (2) Inká Karesiá barafin ma notí bain kéká ma uvaman amikhanten maen mai AD fifti-siksi (56) fin nafi áa fifti-seveni (57) fin nafin uvanten mino. Mai maen Romú nanin banta ída vompon uvaman amikhen mino.

Ma vompon ma uvantein baru ino.

Kanisori átarufá Yerusaremí oriyáken nafi áa Masedonia safi áa Koriní barurá ma kanú manáú dádasí en ma monó doraríen noren ma e váken nafin ten iniyan mino.

Ma vompon ma uvaman amikhein kéká ino.

Pori ma Karesiá barafin esé araién monó dorarí iyákan ma mumunan ukhá ein kékápin nafi áa kan dádasí

ma en monó dorarí íkan ma mumunan ein kékápin nafi non ten iniyan mino.

Nái ana vará ma vompon uvanten nafino.

Monó nanin banta ma Pori afova amiyán ma Yisas Karaisintá ma mumunan esin maen mai avúavá anon auu ída manten ne sinten mino ma sikhá ein me ampíren man baya ánain bákuriyáimpin mino. Kampun banta kayo ano kampun afova amíren enará ukhein bayafó banasi aviren tavi aasá oriyan mifo Pori ano vei vaya varen orin doran nan pura sen ákona vain doran ne sen maman amá ukhen mino. Karesiá nanin banta ano ma Yutan kékái avúavá ánain ma yakha fono van ma auu khavin daná ma maman kainten maen mai vetimpin manan minó afova van mino. Mai man bayai karavusii sá inten nafi áa Yisasin pinté uaren ná auu ivan kékási inten nafi mai vetíi anunu ino. Máan tukhen mifo mai ma monó nanin bantái ukhen ma amusin dosiyá ein mai ída vetíi anunu ánain bákurinten mifo Tiyarafenu anunu ánain dakhafen ena nanin bantái yoraríen ná aya ino.

Porini Amusin Baya Ino

¹ Téi vaya ma varen orin banta Pori uno. Baya ma varen orin dorarí ino van ma vara ráke vanta kayo ano fi áa mana vanta ano fi ída séin aní uren ákona simikhen mifo Yisas Karaisin má inká bein ma furin pintena avían mantakhein Afóe Tiyarafenu vá anon mai ákona simikhen mino.

² Minó mumunan ayofi afá aváeyan manon ten má manafiní uven mi ma vompon uvaman Karesiá ma vain monó kayofin ma vaona nanin bantan amen mino.

³ Tifóe Tiyarafenu vá Bafan Yisas Karaisini sarisari vá ará kusin má ano vá tiretin má bano. ⁴ *Yisas Karaisi anon teti Sifóe Tiyarafenui anunu ánain dakhafen mi saréa ma vain namu avúavá pintena setin tiya ono van e fúkaren mino. ⁵ Máan

* 1:4: Kar 2:20

tukhein nará Tiyarafenu avisá ena ena yaní ó tifano. Pura ino.

Kama Vaya Mana Anan Ban Mino

⁶ Yisas Karaisini yoran táké uaren ma Tiyarafenu ano siretin kamaen tarisari uren arákaya ma veni vanasií ukharé eona kéká ano ma aine véin me oyan amire ma enará ukhein monó baya ánain ma yakhafiya ona van mi séi sinúdiyá uno.

⁷ *Ída ena kama vava van mifo manáa kéká anon tiretin maman kufa uádaren mi Yisas Karaisini kama vayan do vaéadiyan mino.

⁸ *Máan tiyan mifo fefá ma siamékuya inikhá inona kama vava vá ma ída manaí ukhan nain monó baya ma setí ankan pinte safu áa inaru fáke enisori ano fi ma me siamin nain mano vá ira khiyan ma uman baren berai siyan purin barufin ná típá o afeyorano. ⁹ Tetí ankan pefái siamikharéi saréa evarané ákona iyá uno. Pefá ma inire afová ukhá inona monó baya vá ma ída manaí ukhan nain baya ma me siamin nain banta ano vá ira khiyan uman baren ma verai siyan purin barufin ná típá o afeyorano.

¹⁰ *Banasi amusin uantano vara ma vava siya raumpo Tiyarafenu mi amusin uantiyá uno. Banasi amusin uantano van ma iyanté maé mai séi ída Yisas Karaisini yoran banta uno.

Yisas Karaisin Pinté Erikhein Bayan Pori Siyan Mino

¹¹ *Mumunan tiyofi sífá tiváeyan noe, afovasá ono. Mai ma aya uren ma evaránen aviran baya ma siretin tiamikheruna mai ída mana vanta finté erikhen mino. ¹² Mai vava ída mana vanta finte varékun inká mana vanta ano ída afova simen ukhen mifo Yisas Karaisi anon aú páke vava simikhen mino.

¹³ *Pefá ma Yutan kayoi avúavá ánain ma ákonaé dakhafiyáké maé Tiyarafenui vanasi vá monó bá namuroí uré minó aruan kípano van iyákuya afová ukhare ono. ¹⁴ *Téi Yutan kayoi avúavá ánain ákonaé dakhafiyá paséi sinafu siráoni

avúavá ánain ma yakhafimpin te sivun kéká esantakharé uno.

¹⁵ *Máan tukhé umpo sinóen amúpim ma vákun mi mai ma Tiyarafenu ano ma aní ein damúí vei sarisarifó téin tararen aní urá baréi e vantaí é uno. ¹⁶ Bantaí uvékun ena anan nanin bantafin be Anini kama vava siamino van béin ten anien mino. Aní ma urá maé mai vayai ana sisimino van ída manáa kayorá mo inaé uno. ¹⁷ Inká téi ída vákun ma vava varen orin bantaí ukharé ein banta kayo onano siré ída aine Yerusaremí ódé umpo Arebiá barafái o varé maé mai ráké evarané Damaskasí oré uno.

¹⁸ *O vákun kanú manaú orana oriviká Pitan onano van Yerusaremí ódé ben má un bákun fiftini (15) yamú oren mino. ¹⁹ Yerusaremí ma o váké maé baya ma varen orin banta kéká pintena ída mana oné umpo Bafan afá Yemisin manan oné uno. ²⁰ Máan tukheruna van mi saréa ma uvaman amiyaruna vava mai Tiyarafenu avorá ída kampun tiyá uno. ²¹ *Máan turé mai oyampáké Siriá bá Sirisiá barafá bá oré uno. ²² Oré umpo Yisasini vanasi ma Yudiá barafin ma vain kayo ano ída sen toman afová ukharen mino. ²³ Máan tukharen mifo vanasi ano ma máa siyain baya anan inikharen mino. “Mai ma setin tiriyáken ma inká tetí ma mumunan iyaruna yaná ma máden namu ono van iyaré ein banta ano saréa mairá mumunan iyáken mai ma fefá namu ono van iyaré ein mumunan nan mi sian banasi amiyán mino” sin baya ma iniren maen ²⁴ mai van Tiyarafenu aví daní iyan mino.

2

Ena Aposeri Kayo Ano Ma Porin Má Ará Mana finí Ein Baya Ino

¹ *Fotini (14) orana orivikái Banabasin nú Taitasin nú bá Yerusaremí evarané ódé uno. ² Tiyarafenu anon téin aní uren maifá orino síkái Yerusaremí ma oré o váké maé ena nanin bantafin ma yoriyá eruna vava kayo mai monó ánon banta kéká anan tiamiyaré uno. Taréa ma yoriyaruna yoran má peyante yoran má ano

* 1:7: Apo 15:1, 24 * 1:8: 1Ko 16:22 * 1:10: 1Te 2:4 * 1:11: Mat 16:17 * 1:13: Apo 8:3 * 1:14: Apo 22:3 * 1:15: Ais 49:1; Kar 2:7 * 1:18: Apo 9:26-27 * 1:21: Apo 9:30 * 2:1: Apo 15:2

fara savifá o afeyoran nain nan mi veti ankan iniren ará manafiní ino van mi máan té uno. ³ Inká Taitasi maen Kiriki anan bantan báken téin má bakan mifo véin au khavino van betí ankan ída sen mino.

⁴ *Ída máa sen mifo Yisas Karaisi ano ma man bayai karavusi fintena ma setin tivíkein avúavá ma aní ukhein baya ma átaru uvé tiyá tiferunafin manáa kampun mumunan bain banta kéká ano e féken tifuriyaren mi mai karavusifin tetin evaránen tivían kaono van mino. ⁵ Máan tono van en mifo mai fara va vetin tító máa ída afokhan ame rauno. Kama vayai fura yaná ano siretin má para vano van muno.

⁶ Kokhon nanin banta ano Yerusaremí monó ánon bantaí ma ukhein kéká san kákan bí manten nen ten inikhen mifo séi ma inikheruna mai ída kákan daná ino. Mai fara vara seyo, aví bain má ída aví bain má ano Tiyarafenu avorá manaí anan ukhen mino. Mai van mi monó ánon banta kéká ano senti vayará ída manáa mo asotúen mino. ⁷ *Ída manáa vaya mo asotú ukhen mifo Tiyarafenu ano ma Yutan kayofin kama vaya siamin doran ma Pitan ameiní en ena anan nanin bantafin ma kama vaya siamin doran téin timikhen mino sen afová ukhen mino. ⁸ Mai fara vara seyo, Tiyarafenu ano ma Pitan má bakan ma Yutan kayofin doriyá einí anan en mi sen má báká ena anan nanin bantafin doriyá uno. ⁹ Yemisi, Pita, Yoni néne van ma vanasi ano monó ákona uantan banta kéká ino ma siyain kéká anon mai ma Tiyarafenu ano séin tarisari uren ma ma yoran timikhein ódaren mi Banabasi rasan nan kana ino siren e sivían betimpin kaen mino. Máan turen mi verasan ákonaen tisimiyáken tirékan ena anampin doresirá inká teti Yutan kayofin dorano sen tisimen mino. ¹⁰ *Máa siren mana vaya ma sisimein mai ona ma ída van nanin banta aya ino van mi sen mifo séi mai yoraríi fe iyákéi ákonaé doranté uno siré timusin é uno.

Pori Ma Pitani Namu Avúavá Maman Dákó Ein Baya Ino

* **2:4:** Kar 1:7; 5:1, 13 * **2:7:** Apo 22:21 * **2:10:** Apo 11:29-30 * **2:12:** Apo 11:3 * **2:16:** Apo 15:10-11; Rom 3:20-28; Kar 3:11

¹¹ Pita ma Antiokí erí maéi véi ma namu avúavá bariyain nan ben avorá asé uno. ¹² *Béi ma esé o unaven maen ena anan nanin banta ano ma monópin bain má kama avúavá en manafin kumamen dunan niyaren mino. Máan tiyaren mifo ínaimpáké Yemisini kéká ma oríkan maen au khavin avúavá ánain ma yakhafiyain kayo van péden betin má ída manafin kumamen dunan nen mino. ¹³ Máan tíkan inká Yisasintá ma mumunan iyain manáa Yutan kayo vá ano yere mai kampun avúavá barákan mai avúavá ano Banabasin má dere e avíádan maifin oren mino.

¹⁴ Máan tiyáken betí ankan ída kama vaya ánain puntáden dakhafiyái téi ódaréi ena kéká avorá Pitan tiamé uno. “Éi Yutan anan banta anon ena anan banta ano ma Yutan kayoi avúavá ánain dakhafiníi iyákeya ena anan banta ma vainíi ukha ompo fará ena anan kayo van Yutan kayoi avúavá ánain dakhafino van duvun iya fono.”

Yisasintá Ma Mumunan Iyain Nanin Banta Van Ma Funtákein Kéká Ino Sein Baya Ino

¹⁵ Máa siré tiamé uno. “Erasan Yutan anampin mi afoká ukhé umpo ume van ne ma siyain anampin ída afoká ukhé tiféuno. ¹⁶ *Mosesini man baya ánain ma yakhafintá Tiyarafenu avorá ída funtákeruna nanin bantaíi ó tifanté umpo Yisas Karaisintá ma mumunan inain nanin banta ano anan Tiyarafenu avorá puntáken banten mino. Yisas Karaisintá ma mumunan iyá tiferuna mai aa sáké anan Tiyarafenu ano setin nan puntákein nanin banta e sinten mino. Mai fara vara seyo, mana nanin banta ano ída kanaíen minó man baya ánain ma yakhafin naintá Tiyarafenu ano funtákein nanin banta ino sinten mino.

¹⁷ “Yisas Karaisintá ma mumunan ó tifanuna mai ano anan Tiyarafenu avorá puntákeruna nanin banta vanté tifé umpo seti Yutan kayo vá deren ena anan nanin banta an dé umeí iyá tiféuno. Yisas Karaisi anó ayaen ume ákona uanté iyan

nafino. Ída uron mino. ¹⁸ Mai ma séi ankaman barákukhá onunan man baya ma evarané uvaranté maé mai séi man baya yurafurein bantan bá uno senté uno. ¹⁹ Mai fara vara seyo, man baya ánain ma vákurékun mai ano furino sin nain nan pasé mai ánain ída vákuronté umpo Tiyarafenu vái súpá ukhé banté uno. ²⁰ *Máan tukhen nan mi Karaisi má téi fe fúkéi séi seyan na va raumpo Yisas Karaisi anon tempin ban mino. Tiyarafenu Anin mano ma séi nan moéken anupu uaren ma sen nan e fúkein mumunantái vá uno. ²¹ Tiyarafenui sarisari ída maman paen danasí uré do ékano van muno. Mai fara vara seyo, Mosesini man baya ano ma Tiyarafenu avorá tetin maman puntákein nanin bantaí ma intin maen mai Yisas Karaisi fasavin puren mino.”

3

Man Baya Ma Yakhafin Avúavá Bá Mumunan In Avúavá Bá Baya Ino

¹ Karesiá nanin banta ano ma óen iya vaona oe, Yisas Karaisin ma yaa unkamádantá arukhá ein tiamékuya siretiyantá mai fefái siretin ma oneiní ukha ompo saréa iye anó turetí ineine asuse uantiyan nafino. ² Téi siretimpin mana vaya máan ina onté uno. Tiretí ankan ma Kantá Aunan bareona mai man baya ánain ma yakhafintasá bare rafono. Áa kama vaya ma iniren mairá ma mumunan in tasá bare rafono. ³ Kantá Aunaní ákonarái araie mumunan ukhare ompo fará óen uareyá turetíi ákonará mantákheyá Tiyarafenu ano kama vanta e sinten mino siya rafono. ⁴ Mai ma ara ara uman kayo ma siretimpin afoká iya ma verai siyáke ma variyá eona mai náiná anarasá mantareyá taréa fasavifá mai mumunan karúdanto rafono. ⁵ Tiyarafenu ano ma siretin Kantá Aunan amíden ma enará ukhein avúavá ma siretimpin aní iyain mai Mosesini man baya ánain ma yakhafiyaona rasafino. Ída ino. Karaisini vaya ma inire mumunan iyaonará ino.

⁶ *Abaraamun ná onano. Beni mumunantái Tiyarafenu ano funtákein banta e sikhhan mino. *Esé 15:6*

⁷ Máan tukhein nan mi Tiyarafenu ma mumunan iyain kayo van Abaraamun akhafana ino se afová ono van muno.

⁸ *Ena anan nanin banta ano kama varará mumunan intin betin nan puntákein nanin banta e sen aranten pasen mi Tiyarafenu ano afová ukhen kama vayafó pefái Abaraamun iyáanten bei Vompon dókifin máa sikharen mino. “Éin pintéi uaré ma varafin ma vain nanin banta minó avábá uantanté uno.” *Esé 12:3*

⁹ Máa sikhein pasen mi ventá ma mumunan inain kéká ano yeren mai ma Abaraamu mumunan uren barein avábá baranten mino.

¹⁰ Máan tinten mifo man baya ánain ma setí ankan bákuronuna anon Tiyarafenu avorá puntákein nanin bantaí onté uno ma sen inin nain kayo amaninái Tiyarafenui aran naná banten mino. Mai fara vara seyo, Tiyarafenui vompon dóki ano máa sikhhen mino. “Tiyarafenui vompon dókifin ma minó man baya vain ánain ma ída vákurin nain nanin banta amaninái veni aran naná banten mino.” *Diu 27:26*

¹¹ *Máan tukhein nan mi man baya ánain ma yakhafin nain nanin banta ano Tiyarafenu avorá ída funtákein kayon banten mino sé afokái afová ó tifanté uno. Mai fara vara seyo, Tiyarafenui vompon dóki ano máa sikhhen mino. “Mumunan ma inain nanin banta van mi Tiyarafenu ano funtákein nanin banta e sirantin ayun para vanten mino.” *Aba 2:4*

¹² *Man baya ánain ma yakhafin maen mai mumunan má ída manaí ukhen mino. Mai van mi Tiyarafenui vompon dókifin máa sikhhen mino. “Ayun ma fara van oriyan ban aunan ma varano van inain mano vá minó man baya ánain ná bákurino.” *Riv 18:5*

¹³ Máan tinten mifo man baya ano setin uman timiyaréin mi Yisas Karaisi ano setin evaránen tivirano van daa unkamádantá e fúkan mi mai van Tiyarafenui vompon dóki ano máa sikhhen mino. “Daa unkamádantá ma furin nain

* **2:20:** Kar 1:4 * **3:6:** Rom 4:3, 16; Yem 2:23 *

* **3:12:** Rom 8:3

* **3:8:** Rom 4:3, 16; Esé 18:18; 22:18 * **3:11:** Kar 2:16

nanin banta amaninái Tiyarafenui aran naná banten mino.”

Diu 21:23

¹⁴ Tiyarafenu ano ma Abaraamun iyáantákaré ein mai avu ena anan nanin banta ano Yisas Karaisin pintéi uaren evaránen aviranten mino. Máan tukhein nan mi mumunantá anan mai ma iyátintan baré ein Kantá Aunan baranté tiféuno.

Man Baya Vá Tiyarafenui Iyáantan Baya Fáke Vá Ino

¹⁵ Mumunan tiyofi sífá tiváeyan noe, seti ma ma varará bá tiferuna fákena vaya siamékuya inin nono. Mana vanta ano ma ve ina yanasinta yaíden ma ve akhafana iyáantádú uren ma vompon uvamántin baré inain mai ída ena vanta ano yo varen nafi inká asótúen nafi inten mino.

¹⁶ *Tiyarafenu ano Abaraamun má be anin mái iyáantákaren mino. Mai van mi Tiyarafenui vompon dókifin ída kokhon iyampon nan “e akhafanafin” ne sikharen mifo “e akhápin” ne ma sikaré ein mai Yisas Karaisin nan mi sikharen mino.

¹⁷ *Ma ma siyaruna vayai ana máan mi ukhen mino. Tiyarafenu ano Abaraamun má ma kasen manafin ban baya siran ma fo antareti ifo teti (430) orana orivin maen ínaimpákéi man baya afoká ukhein pasen mai man baya ano mai ma ará manafinien ma inká iyáanten ukharé ein baya ída yo avékaan akhempá kaúken mino.

¹⁸ *Mai fara vara seyo, Tiyarafenu ano vei sarisari fói Abaraamun iyáantákaren mino. Máan tukhein nan mi man baya finté ma uaré minó daná bariyákun maen mai ma iyáanteini aran ída afoká inten mino.

¹⁹ *Máan tinten mifo mai fará man baya amen nafino. Tiyarafenu ano fefái iyáantáken mi ume aní ino van man baya amikharéin mai ma Tiyarafenu ano iyáantan baré ein iyampon ma afokáin mairái me kanaíen mino. Tiyarafenu ano man baya enisori kayorá dakan inká enisori kayo ano aúban banta Mosesin amíkan mi setin timikharen mino. ²⁰ Kankanán banta ano ma

ará manafiní ono van maen aúbaná bantan dosiren ará manafiní é iyan mifo Tiyarafenu veyáká anan báken beya anon Abaraamun iyáantákaren mino.

Man Baya Maen Mai Setisi Yafisin Tifóe Ino

²¹ *Máan tukharen mifo mai ma Tiyarafenu ano fefá iyáantan baré ein masá man baya ano namuroí ukhen nafino. Ída uron mino. Man baya ano ma auyen aunan ma simiyantí tiferá mai ánain ná dakhafiyá Tiyarafenu avorá puntáké bá tifano. ²² Máan tó tifanté umpo Tiyarafenui vompon dóki ano máa sikhén mino. Ume anon minó nanin banta karavusií uádá bá tifé umpo mai ma Tiyarafenu ano ma iyáantan ma vain danasinta ma vará tifanuna aa ma vain mai Yisas Karaisintá ma mumunan in mano ino.

²³ *Mumunan in ma ída yákó ukhan maen man baya ano setin karavusií uádá eriyaré ékun mi Karaisintá ma mumunan intin ma man bayai karafusi finte ma útútintan aa Tiyarafenu ano maman dákó en mino. ²⁴ *Man baya ano yafisin tifóení ukhen tetin afova simiyan tiviren eriyaren Yisas Karaisin tái me khaen mino. Máan tukhein nan mi Karaisintá ma mumunan é tifékun maen Tiyarafenu ano setin nan puntákein nanin banta e sinten mino. ²⁵ Máan tukhein nan mi mumunan inka yákó ukhein teti ída evarané mai yafisin tifóeni aránaópá banté tiféuno.

Yisas Karaisin Pintéi Tiyarafenu Akhafanaí Ukhé Tiféuno

Yisas Karaisin Pintéi Tiyarafenu Akhafanaí Ukhé Tiféuno

²⁶ *Máan tukhein nan mi Yisas Karaisintá ma mumunan eona anon Tiyarafenu akhafanaí ukha ono. ²⁷ *Para vara seyo, monó non ma vareona anon Yisas Karaisin má túpá uveya véin maman ayá au anamun ma einíi ukha ono. ²⁸ *Taréa ída Yutan banta van ena anan banta van ída miyan ban doran banta van para van banta van inká ída afon ban anasi van ukhen mifo minó ano Yisas Karaisimpin o asotú uveya manan ba ono. ²⁹ *Yisas Karaisini kéká ma vanteya

* **3:16:** Esé 12:7 * **3:17:** Eks 12:40 * **3:18:** Rom 4:14 * **3:19:** Apo 7:38; Rom 5:20 * **3:21:** Rom 8:2-4

* **3:23:** Kar 4:3 * **3:24:** Rom 10:4 * **3:26:** Yon 1:12 * **3:27:** Rom 6:3 * **3:28:** Rom 10:12 * **3:29:**

Rom 4:13

mai siretí ankan Abaraamun akhafanan baona minó daná ma Tiyarafenu ano ma véin iyáantákaré ein mai siretin ninaíi inten mino.

4

Mumunan Nanin Banta Ano Ma Tiyarafenu Ina Yanasinta Varan Nain Baya Ino

¹ Tenti veya máan mi ukhen mino. Iyampon kéká ma arará bantin ma vetí afóe ano ma ve ina yanasinta me amiren púká intin maen mai iyampon kéká ano miyan ída van doran banta kayo ída esantanten mifo vetin má manaí ukharen ma e anoní uven mi minó betí afóen nina yansinta varanten mino. ² Betí ankan betíi yafisin banta kéká oo yaiyen oriyantin ma vetí afóe ano ma siran nain orana máa ma orivintin mi vetiyantá dafisinten mino.

³ *Yisas Karaisi ma ída erikhá maé tetin má dere máan manan é ma vara ráke man baya kayoi miyan ída van doran nanin bantan baré tiféuno. ⁴ *Máan tukharé é tifékun mi veni yamú puntáden afoká iyain má Tiyarafenu ano ve Anin tiantan anasi arápin eravíkan béin kaúádan maen mai man baya aránaópá baren mino. ⁵ Báken mai man bayai miyan ída van doran bantaí ma ukháé tiferuna evaránen tividen maman Tiyarafenu akhafanaíen mino. ⁶ *Tiretí ankan inka Tiyarafenu akhafanaí uven nan mai van mi ve Anini Aunan tiantan tiretimpin eriven mai Aunan manon “Abba,* Tifóe oe,” sen ariyan mino. ⁷ Máan tukhein nan mi siretí ankan ída evaráne miyan ída van doran nanin bantaí in nompo inka Tiyarafenu akhafanaíi ukha ona ve ma iyáantan bain danasinta varan nono.

Pori Ma Karesiá Nanin Banta Van Ma Inikhein Baya Ino

⁸ Pefá ma siretí ankan Tiyarafenu ma ída afová ukhe mae kampun ayarafenu kayoi miyan ída van doran banta kékái vare ono. ⁹ Máan tukhare ompo saréa inka Tiyarafenu afová e onó tente rafu áa Tiyarafenu ano siretin pefái afová ukhen né tente rafuno. Máan ma ukhaya mai fará

evaráne ma varará ma ída ákona vain man baya kayoi miyan ída van doran nanin bantaí iya rafono. ¹⁰ *Tiretí ankan mai ma kákan damú ma afoká é iyain nafi biyon nafi aú damu safi inká orana fi vákuriya mae Tiyarafenu ano siretin nan anunu ino van avébe yafisé iya ono. ¹¹ Máan tiya ompo senti yoran ma savifá o afeyoran nain nan mi siretíi avúava san tikhokho fiyan mino.

¹² Mumunan tiyofi sifá tiváeyan noe, séin má manaí ono van mi ákonaé tiretin tiamiyá uno. Mai fara vara seyo, séi seyantá man baya ampíré tiretin má manaí uvékuya séin ída namu usinte ono. ¹³ Tiretí ankan ná ovare me ineno. Téi sí mantéi Yisas Karaisini kama veya esé arái é tiameruna ino. ¹⁴ Téin tu ano ída ákona ukhen mai anon tiretí ankan uman amiya ompo séin ída afonkarí ureya oyan timinton Yisas Karaisin nafi áa Tiyarafenui enisori fi ma avíde kama yafisirí eonaí séin e ono. ¹⁵ Tetimpin ma simusin baré ein taréa mai intefasá ban nafino. Mai yamú kayofin tiretí amusin iyákeya minó daná time ompo kanaíen bainti siretíi auu vá inan bían timinonaren mino. ¹⁶ Ma fura veya ma siretí ankan tiamiyaruna anó téin maman tiretíi namuroí iyan nafino.

¹⁷ Mai kampun banta kayo ano siretin o avíadantiya vetin ánain bákurano van mi ákona yorarí iyan mifo siretin aya ono vara ino. Ída ino. Tenti aa iyádantiya vetin ayain ineine ana ono van mino. ¹⁸ Ena nanin banta ma kama ure o avíadesin ma siretin ánain bákurin doran tasá ákona inin kaono. Téi ma ída váku yere vá mai ma variyaonaí ana vá ono. ¹⁹ Te sikhafana oe, anasi ano ma inamunan iniyan ma aureiníi iyá uno. Mai fara vara seyo, Yisas Karaisi ano siretin aúpin dákó ino van muno. ²⁰ Taréa séi ída siretí ankan má bá umpo siretin má bano van mi inikhé uno. Tiretin má baré kama veya anan tiamen nunaren mino. Tiretin inté uresá aya onte rafunon tiré taréa amino ukhé uno.

Akhan Nú Saran Núká Ma O Siaren Tikhein Baya Ino

* **4:3:** Kor 2:20 * **4:4:** Yon 1:14; Rom 1:3 * **4:6:** Rom 8:15-17 * **4:6:** Aramaiki veya finté Abba e ma siyain mai Tifóe oen tiyan mino. * **4:10:** Rom 14:5; Kor 2:16

21 Man baya aránaópá ma vano van iyaona nanin banta ano sisimeno. Beni vava ana ano náí yanasará tikhen nafino.

22 *Tiyarafenui vompon dóki ano máa sikhen mino. Abaraamun anin mai kankanan mi varen mino. Miyan ída van doran nanin mano mana khain maen inká aví nanin mano mana khain ukharen mino. 23 *Mai ma miyan ída van doran nanin mano ma khaein iyampon maen mai vanasii avúavá kái khaen mifo aví nanin mano ma khaein mai Tiyarafenu ano ma iyáantákaré ein mino.

24 Tiyarafenu ano ma kan dádá ará man-afiní eini aman manon mi maí kan nanin ban mino. Akhan maen Saináí anuí aman manon mi aní ukhan mai anurái vanasi ano esé aráien man bayai miyan ída van doran nanin bantaí ukhan mino. 25 Máan tukhá ein nan mi Arabiá barafá ma Saináí anuyon bain má Yerusaremí bá manái ukhan Akhan mai an mi yakhen pasen ben má be akhafana vá anon miyan ída van doran nanin bantaí ukhen mi maifin ban mino. 26 *Máan tukhen mifo inarufá ma fara vain Yerusaremí maen mai aví nanin Saran an mi yakhan béi setin tinóe ino. 27 Para vara seyo Tiyarafenui vompon dókifin máa sikhen mino.

“Aaí ma ukheya iyampon ída khaiyaona nanin mano vá amusin ono.

Éi iyampon ma ída khaen nan au ída aí ukhein nanin arasá kama ino.

Oovarare amusin iya vá í dano.

Para vara seyo, aa nanin ma varé ein mano

iyampon ma kokhon ná kain baré ein nanin kayo esantaren

béi kokhon iyampon kainten mino.”

Ais 54:1

28 *Mumunan tiyofi sifá tiváeyan noe, siretí ankan Aisakin an deya iyáantan iyamporinta ono. 29 *Iyáantantá ma afoká ukharé ein iyampon Aisakin ma miyan ída van doran nanin akhá Ismaeri ano ma máká maáká einí en Kantá Aunantá ma afoká ukheruna kéká man baya ánain ma yakhafino van iyain kayo ano uman timinten mino.

30 Máan tinten mifo Tiyarafenui vompon dóki ano náiesá tikhen nafino. Mai máan mi sikhen mino. “Miyan ída van doran nanin má be akhá bá tiantan orino. Miyan ída van doran nanin akhá ano ída vá aví nanin akháí ona yaíden barano.”

Esé 21:9-10

31 Máan tukhein nan mi mumunan tiyofi sifá tiváeyan noe, setí ankan miyan ída van doran nanin akhá ída vá tifé umpo aví nanin akhafanan bá tiféuno.

5

Yisas Karaisi Anon Tetin Kama Uren Kusin Timirá Bá Tifé Uno

1 Yisas Karaisi ano inká man bayai karavusi finte útúden tetin maman kusintá kái bá tifé umpo mantaan ákona uveya vá ará kuse vano. Ída vá evaráneya man bayai miyan ída van doran nanin bantaí uvesin ná damuádantiya vano.

2 Ineno. Téi Pori anon ma vava siretí ankan tiamiyá uno. Au khavin avúavá ma fara fákare vante mae mai Yisas Karaisini yoran mano ída uron mi siretin ayainten mino. 3 E au ma ifáe nan ma khaviyain kayon evarané tiamenté uno. Máa ma iyante mae mai minó man baya ánain ná avové ure yakhafono. 4 Mai fara vara seyo, man baya ánain ma yakhafin mano ma Tiyarafenu avorá puntákein nanin bantaí ma inteya mai Karaisin pintena siretin do síkarantiya Tiyarafenui sarisarifin ída van nono.

5 Máan tin nompo setí ankan puntákein bí barano van ma inikheruna kéká ano Kantá Aunani ákonará mumunan ukhé mai van mi ave ukhé bá tiféuno. 6 *Mai fara vara seyo, Yisas Karaisintá ma mumunan iyá tiferuna mai anon au ma khavin má ída ma au khavin má maman paen danasí ukhen mifo Tiyarafenuí ma mumunan uren ma ena nanin banta ma ará amin manon pura yanásí ukhen mino.

7 Tiretí ankan kama e oriyare ompo iye anó tiretíi aa iyádayá pura yaná ma yakhafiyá eona me ifáe rafono. 8 Mai ma saréa yakhafiyaona ineine mai ída Tiyarafenu finté erikhein mino. 9 *Máan

* 4:22: Esé 16:15; 21:2 * 4:23: Rom 9:7-9 * 4:26: Ibu 12:22; Rev 21:2, 10 * 4:28: Esé 15:4-5; Rom 9:7

* 4:29: Yon 8:35 * 5:6: 1Ko 7:19; Kar 6:15 * 5:9: 1Ko 5:6 * 5:10: 2Ko 11:15; Kar 1:7

tukhen mifo siretin aúbaná mana namu vanta váken mi sitó máa yisi ano ma ainen beretifin orera einíi iyan mino. ¹⁰ *Bafan mano siretin evaránen avíadantiya séi ma mumunan iyararuna yanasintará mumunan onono sé inikhé uno. Mai ma siretíi ineine máden asuse uren ma uman amiyain banta kéká Tiyarafenu ano yaíden uman aminten mino.

¹¹ Mumunan tiyofi sífá tiváeyan noe, banta ano vá au khavino ma siyákun mai fará betí ankan téin tirirí iyan ban nafino. Téin ma sirirí iyan bain manon aní iyáken mi Yisas Karaisini ma yaa unkamádantá purein mano ma vanasi evaránen avíkein baya siamiyan bano van mino. Mai avúavá anon betí ankan aran naná amé iyan mino. ¹² Au khavin avúava san ma siretin uman amiyain mai kayo ano vetí au vasá kavino.*

¹³ *Mumunan tiyofi sífá tiváeyan noe, Tiyarafenu anon tiretin maman kama uren mi kuse vano van anunu ukhen mifo ída vá evaráne ume avúavápin oriyaya avábá posá ben moéken ayain maran ná iya vano. ¹⁴ *Mai fara vara seyo, minó man baya ano mana man bayafin manan bakan mai ano máan mi sikhen mino. “Eyan nan ma anunu iyaonaíe vá ena van anunu ono.”

Riv 19:18

¹⁵ Máan tin nompo ída ma ará amin maran into ma aruve asive ana ma inteya mai sireti yantái namuin maran inompo yafían ná ákona ono.

Kantá Aunani Ákonará Ma Van Baya Ino

¹⁶ Máan tukhein nan mi Kantá Aunani ákonarasá auyen aunan mamare vá ume avúavái anunu ánain ída yakhafono van mi inin amiyá uno. ¹⁷ *Para vara seyo, ume avúavá bá Kantá Aunan má ano ven maman bararasí in maran iyáken maen aruve asive iyain pase mai ma varano sinona yaná ída kanaíe varan nono. ¹⁸ Máan tin nompo Kantá Aunan mano ma aviren orintí mae mai ída evaráne man bayai aránaópá ban nono.

¹⁹ *Tiretin ará ma mantanti ma ume avúavá ánain ma yakhafesin maen tiretíi

vampin ma yanasintan afoká intin ena nanin banta ano mai avúavá kasaen onanten mino. Pamúku avúavá bá pain avúavá bá namu avúavasí ono van ma ará manta avúavá bá ²⁰ inká kampun ayarafenurá ma monó tin avúavá bá uvátakhan avúavá bá namuroí in avúavá bá arankantin ma asivin avúavá bá ará namu uantan avúavá bá ena ina yana san anunuin avúavá bá eyan nan mana inin avúavá bá bayafó aruvúden aúban daimin avúavá bá ²¹ kamaen bain banta kayo ma ará namu uantan avúavá bá ákona non naren ma óen uaren báden non avúavá bá ino. Máan avúava sinta vá ma varé in nain nanin banta ano ída uron mi Tiyarafenui yafisin pintena yanasinta varantéii mai ma fefá tiamiyá erunaíi é tiamé uno.

²² Máan tukhen mifo Kantá Aunan mano ma setinti saunantá ma yafíben maen mayan aran mi imádanten mino. Ena van anunuin má amusin en kusen ban má bempáké báken ena avábá in má kamaen puntáden non avúavá bá ²³ kayone en ban má inká ei avúaváká dafisin má ino. Ída ena man baya ano mai kama avúava sinta ánain ma vákuriyain aasá iyaranten mino.

²⁴ *Yisas Karaisini kékasí ma ukhein kayo ano fefái vetíi ume avúavá daa unkamádantá aruan púken mino. ²⁵ Taréa ma Kantá Aunan mano ma setimpin ma vantirá mai minó tetin tufin ma Kantá Aunan mano ma yoriyain ánain mana vá dahafó tifano. ²⁶ *Tetí ankan ída vá te sív í daní erá aruvin afoká ino van ena ará antarerá inká ena ará namu ó tifano.

6

Intéa Ayun Ná Doká Inte Fo Mai Yanái Yuyasin Nono

¹ *Mumuman tiyofi sífá tiváeyan noe, siretí ankan pinté ma mana ano ma umefin eraven ankamitiya mae vá ákona e ma monó tiyaona kéká ano vá bempáké oriveya ayaesin ná bei avúavá puntarano. Siretin má dere mai akhenókafin erave ankamin nampo yafían ná ákona ono.

² *Tiretí ankan afá aváen ayain maran ma inteya mai Yisas Karaisini man bayan

* **5:12:** Betí avankan masá do vían karúdanu. Béi aran nan uaren tikhein baya ino. * **5:13:** 1Pi 2:16 * **5:14:** Rom 13:9 * **5:17:** Rom 7:15-23 * **5:19:** 1Ko 6:9-10 * **5:24:** Rom 6:6; Kor 3:5 * **5:26:** Fir 2:3 * **6:1:** Mat 18:15 * **6:2:** Rom 15:1

mo kanaí inono. ³ Ena ano ma umampin bantiya ma eyan inian kákan bantaí ure ma ída ayainteya mai eyan mi mákasiya ono.

⁴ Tiretí ankan intéa avúavasá barano vará inte fo mai yaíde afová ure vá barano. Mai fara vara seyo, éi ma ei yoran ma ída yaiminteya mai éi amusin manan inompo enai avúavá ída yaíde afová inono. ⁵ *Mai fara vara seyo, mana mana anon bei uman mádú inten mino.

⁶ *Tiyarafenui vaya ma afova amintin bariyan nain mai arú kékasá anona ayaen ná miyan amino.

⁷ *Tiretí ankan ída vá Tiyarafenun máká maáká ono. Tireti ma máan inin baranteya mai siretiyan mi kampun tiantan nono. Éi ma fafasikharé inona yanayun tákena mai yaná dunan manan unafin nono.

⁸ Mana ano ma ume avúavá póké ma ve augin danayun ma fafaseiní ma iyaren maen purin manan una finten mifo Aunan ma amusin uantiyaré inain manon Aunan pintena ayun ma fara van aunan mi o una finten mino. ⁹ Máan tukhen mifo kama avúavá ma in nan ída vá tivesara ó tifano. Mai fara vara seyo, veni yamusí ma intí kama amusin mi unafó tifanté uno. ¹⁰ Máan tukhein nan mi vanasi ma kama avúavá uantan afokhan ma vantí maé minó nanin banta vá kama iyáké mumunan nanin banta moéké kama ó tifano.

Porini Kípan Baya Ino

¹¹ Onano ma kákan bompon kayon te siyampóké uvaman tiretin amé uno. ¹² Banasi ano vetin kákan bí amino van mi siretí ankan au khavono van augin kuráden baya siyan ban mino. Tetí ankan nan Yisas Karaisini yaa unkamádantái mumunan iyan mino siren betin arin nain nan mi feriyon mino. ¹³ Au khavino van ma yuvun iyain kéká ano ída fura sen minó man baya ánain dakhafiyon mifo siretí ankan duvun intiya au kharesin mairá betí kákan bí barano van mino.

¹⁴ Téi ída ena yaná aví daní onté umpo Bafan Yisas Karaisi ma yaa unkamádantái

púkein mai ven aví anan daní onté uno. Tenti sinunu ma ma varafin bakan ma inká ma varai anunu ma sempin baré ein mai fefái Yisas Karaisini yaa unkamádantái arukhen mino. ¹⁵ *Tetí ankan tu khakhe rafu áa ídá kakhe rafu mai ída kákan daná ino. Tiyarafenu ano ma setin maman auyení urá bá tiferuna mai anan pura yaná ban mino. ¹⁶ Ma ineine ma fákaren ban nain nanin banta vá Tiyarafenu ano arunan uren ná ará kusiantantin ná beni auyen nanin bantaí ino.*

¹⁷ *Tare ráké ma oronuna mai ída vá á ékun ná ma yanasintará ena ano uman timiyan bano. Mai fara vara seyo, sen turá ma namon tifun kayo ma vain manon anien Yisasin nina inon ten mi sen nan tikhen mino.

¹⁸ Mumunan tiyofi sífá tiváeyan noe, setisi Bafan Yisas Karaisini sarisari ano vá tiretin má bano. Pura ino.

* **6:5:** Rom 14:12 * **6:6:** 1Ko 9:11, 14 * **6:7:** Rom 8:13 * **6:15:** Kar 5:6; 2Ko 5:17 * **6:16:** Kiriki vaya
finté mai Tiyarafenui Auyen Isareri kéká san mi sikhen mino. * **6:17:** 2Ko 4:10

**PORI MA EFESASÍ NANIN
BANTA UVAMAN AMEIN
BOMPON MINO
(Efesasi)
Efesasi Vompon Ma
Uvanteí Pákenai Afova
Vaya Ino**

*Ma vompon ma uvantein banta ino.
Baya varen orin banta Pori ino.*

*Uvarein orana ino.
AD sikisti-tu (62) fin mi Korosí nanin
bantai vompon má Firimonini vompon
má manafin kauran baren orein
mino.*

*Ma vompon ma uvantein baru ino.
Romú kákan barurá karavusií uran
báken karavusi namun pintéi uvanten
mino.*

*Ma vompon ma uvaman amikhein kéká
ino.
Efesasi ma monó nanin banta varé
eimpin mifo mai vompon mano anan
Esiá barafin ma varé ein monó namun
kayofimpá deren eúkukhen mino.*

*Nái ana vará ma vompon uvanten
nafino.*

*Ena anan nanin banta finté ma monó
tiyain nana ma Esiá barafin bain
Yutan kayo ano ma oyan amen
nan mino. Yutan kayo vá ena
anan kéká bápin ma ákona kafi varé
ein ma Tiyarafenu ano Karaisin
tiantan ma yoruman barákuren ma
míkampin mana mumunan kaen
ma inká Karaisimpin ma maman
mana kékasien ma ukhein nan mi
ma ma minópá uvaman amikhein
bompompin tian amá ukhen mino.
Ma vomponi kankan saptafin mi
monó tin avúavá pákena ineine amen
mi inká Tiyarafenui arugin dana san
tikhan ma minó ano anunu iyain vesi
va san tian amá ukhen mino. (Sapta
6:10-18 fin ná onano.)*

Porini Susu Vaya Ino

¹ *Yisas Karaisini kama vaya varen orin bantaí ino van ma Tiyarafenu ano vei anunurá ma aní ukhein banta séi Pori anon ma vompon uvaré uno. Efesasi ma Tiyarafenui kantá nanin banta váken Yisas Karaisintá ma mumunan ukheona kayon uvaman amé uno.

² Teti Sifóe Tiyarafenu vá inká tetisi Bafan Yisas Karaisin má anon tiritin tarisari uren ará kusin aminten mino.

*Yisas Karaisin Táké Ma Kantasí Ukhein
Avu Varan Baya Ino*

³ *Tetisi Bafan Yisas Karaisin Afóen Tiyarafenu avisá daní ó tifano. Béi anoi setin tivábá uren mi inaru fákena kama yanasinta setin timikhan mai anoi setin tú iyampon tiya iyan mino. ⁴ *Mai fara vara seyo, Tiyarafenu ano ma vara ída uvanten pefái setin aní uren Yisasin má maman túpá ukharen mino. Para va ino. Béi setin nan anunu uren mi mai avúavá mádan baren ben avorá kantasí ukhein nanin banta ano setin nan ída aau manten mino sinten mino. ⁵ *Tiyarafenu ano Yisasin pinté uaren tetí ankan e sivían be akhasí ono van inikhen mi véin kákan amusin uanten mino. ⁶ Tiyarafenu ano ma setin tarisari urá ma ve Anin má túpá ukhé tiferuna vará ben aví daní ó tifano. ⁷ *Tiyarafenu ano Yisas Karaisin pinté uaren mi setin moéken tarisari uren beni narefó ume finté setin evaránen tivíken mino. ⁸ Tiyarafenu ano vei kama ineine vá tarisari vá tetimpin banaen mino. ⁹ *Pefá ma Tiyarafenu ano ma Yisas Karaisintái ma yaná baranté uno siren ma inian kain ma aúpá bá ein mai saréan bariyáken mi setimpin tian amá iyan mino. ¹⁰ *Mai veni ineine máan mi ukhen mino. Be ma aní ukhein damú ma afoká intin maen minó ma vara ráke yanasinta vá inaruráke yanasinta vá o éke e éke uan manafin átaru urantin maen Yisas Karaisini yafisin aránaópá anan banten mino.

¹¹ *Yisas Karaisin má ma súpá ukhé tiferuna van mi Tiyarafenu ano setin nan bei vanasi ino sen aní ukhen mino. Máan tukhantí Tiyarafenu ano ma fefá

* 1:1: Apo 18:19-21; 19:1 * 1:3: Efe 2:6 * 1:4: Yon 15:16 * 1:5: Yon 1:12 * 1:7: Efe 2:7; Kor 1:14
* 1:9: Rom 16:25 * 1:10: Kor 1:16, 20 * 1:11: Rom 8:28-29

iyátintákaré ein danasinta vará tifanté uno. ¹² Tiyarafenu ano ma máan tein mai seti Yutan nanin banta ano ma Yisas Karaisimpin naren ma ákona inin ma ave ukhé tiferuna kéká ano Tiyarafenu aví daní iyan kákan bí amino van mino. ¹³ Tireti ena anan nanin banta ano Yisasini fura vaya vá kama vaya vá inire mumunan e ono. Máan ma eona anon tiretin aya uran mi Tiyarafenu ano seti Yutan kayo ma einien tiretin avían Yisasin má túpá en mino. Máan turen mi vei vanasi ma ameno van iyáantan baré ein Kantá Aunan ma siretin amein manon beni vanasi ino sen aní ukhen mino. ¹⁴ *Tetí ankan ma Tiyarafenu ano iyátintan bain danasinta ma ináimpá baranunai fura sen Kantá Aunampó tetimpin aní ukhen mino. Mai vará tetí ankan kakhakein Tiyarafenu aví daní ó tifano.

Efesasi Nanin Banta Ayaino Van Ma Pori Amúkein Baya Ino

¹⁵ Bafan Yisasintá ma ákona e mumunan iyáke monó nanin banta ma minó pimpá ma vain ma avábá iyaona vaya vá iné uno. ¹⁶ Mai van mi séi Tiyarafenu vaipá ena ena susu siantiyáké ákona é timúkuantiyá uno. ¹⁷ *Máan tiyá inká tetisi Bafan Yisas Karaisin Afóe ma moéken kakhakhein Tiyarafenu vaipá tiretíi mumunampin kama afova amintin Tiyarafenurá ma mumunan in avúavá kama e afová ono van timúkuantiyá uno. ¹⁸ Máan tiyá inká tiretíi inin ona yiantantiya kama yanasinta ma ameno van dan bain afová ureya mai yanasinta varanté uno sire mairá ákona kaono van mai van deren timúkiyá uno. Mai fara vara seyo, kokhon danasinta ma vei vanasi iyáantan baréin ma amikhein afová ono van muno. ¹⁹⁻²⁰ * *Máan tukháí mai ma minó daná esantaren dan uron bain ákona vaintá ma mumunan iyá tiferuna kéká ano afová ó tifano van mi simúkiyá uno. Mai ákona maen mai ma Yisas Karaisi ma furin pintena evaránen avían mantaren kákan bí amiren ma ve ayan kurompá ma yan inarufá bain má manaí ukhein ákona ino. ²¹ *Máan tukhein

nan mi Yisas Karaisi anon namu aunan kayo ma moékan ákona vain kayorá dafiken mino. Máan tukhan mi ven aví bá ákona vá anon ánon banta kayo aví bá ákona vá esantakhen mino. Máan tukhein béi ída saréa ana yafisinten mifo ináimpá deren dafisinten mino. ²² *Tiyarafenu ano minó danáká ma yafisin ákona Yisas Karaisin amikhen mino. Mai monó nanin banta ano mai fintena ayain barano van mi mai ákona amikhen mino. ²³ *Monó nanin banta ma vain mai Yisasin aun ban mino. Máan tukhan mi minó akhempá ma vain danasintafin béi kanai suron ukhen mino.

2

Tiyarafenu Ano Ma Furin Pintena Yisas Karaisi Má Ma Evaránen Tivían Mantein Baya Ino

¹ *Yisas Karaisintá ma fefá ída mumunan ukheya mae Tiyarafenu oo átakharé ureya namu avúavá bariyáke fasen purin nanin banta an mi yakhare ono. ² *Máan ma iyaona anon afokhampin ma namu aunani ánon banta kayo ano ma Ban Anoni oo yaiyeníi iya va ono. Tiyarafenu oo ma átakharé iyain nanin banta aúpin mai namu aunan manon dafíken doriyan mino. ³ *Máan tiyan mifo Yisas Karaisintá ma fefá ída mumunan ukhé tifé maé teti minó ano yeren mai avúavá bariyaré tiféuno. Tetí ankan dere ume avúavá pinté e afoká ukhá é tifékun Tiyarafenui aran naná ano ma minó ena anan nanin bantafin ma erikhá ein mano setimpin má deren erikharen mino.

⁴ *Máan tinten mifo mai ma arunaná bikakhein Tiyarafenu ano setin nan moékantá anunu uren ⁵ tetí ankan ma véin oo átakharé eruna anoi furin nanin banta an dakhá é tifékun mi Yisas Karaisin ma avían mantein manon tetin auyen aunan timen mino. Mai Tiyarafenu anon bei sarisarifó tetin tiya uren evaránen tivíken mino. ⁶ *Tiyarafenu ma furin pintena Yisas Karaisin má orun tivían mantaren maen inarufá ma vain danasintará dafisin nono sen iyátintáken mino. ⁷ Yisas

* **1:14:** 2Ko 1:22 * **1:17:** Kor 1:9 * **1:19-20:** Kor 1:11; Íbo 110:1; 2Ko 13:4; Kor 2:12 * **1:19-20:** Íbo 110:1; 2Ko 13:4; Kor 2:12 * **1:21:** Kor 1:16; 2:10 * **1:22:** Íbo 8:6 * **1:23:** Rom 12:5; Efe 4:10, 15; Kor 1:18 * **2:1:** Kor 1:21; 2:13 * **2:2:** Kor 3:7; Tai 3:3 * **2:3:** Kor 3:6 * **2:4:** Rom 6:11-13 * **2:6:** Kor 2:12

Karaisin pintéi uaren Tiyarafenu ano setin tarisari ukhein taréa fi ínaimpa safi mai minó nanin banta anon mai ma minó daná esantakhein danasinta ma aní ukhein onanten mino.

⁸ Mai fara vara seyo, Yisasintá ma munan eona anarái Tiyarafenu ano vei sarisari fóké tiretin aya uren evaránen avíken mino. Mai sireti ma kama avúavá bariyaona vara máan ten naifo Tiyarafenu ano vei anunurái faran aya uren evaránen avíken mino. ⁹ *Tiretí ankan ma kama avúavá manteona vara Tiyarafenu ano aya uren evaránen avíken naifo mana ano ída vá be amo sino. ¹⁰ *Mai fara vara seyo, Tiyarafenu ano Yisas Karaisin pinté uaren mi setin kama uren uvamáda bá tifeuno. Mai vará tėti nan ma kama avúavá barano van ma fefá iniádan baré ein ná bará tifano.

Yisas Karaisin Má Ma Mana Vukhafai In Baya Ino

¹¹ Tiretí ankan ída Yutan kayo ompo ena anan bantafin mi afoká ukha ompo afovasá ono. Máan tukhein nan mi Yutan kayo ano siretin nan ída au kakhein kayo ino siren betí ma yan bukhafa máará kakhein nan mi au khákan iyan mifo aúpin ída funtáken mino. ¹² *Máan tukhen mifo maí damú tiretí ankan ída Yisasini ádé bare ompo ovare vá me ineno. Isareri nanin banta van ma Tiyarafenu ano vei vanasi e sen avíkeimpin tiretin má maifin ída váke Tiyarafenu ano ma vetin iyáantákeimpin ída siretin nina van mino. Mai fara va ino. Tiretí ankan ma ma varafin báke ompo Tiyarafenu ída afová eya inká beni kama yanasinta van ída ákona e ave ukhare ono. ¹³ *Máan tukha ompo Yisasi ma siretin nan e furen ma vei nare vanaein manon tiretin e avían beni ádé kaen mino.

¹⁴ *Mai fara vara seyo Yisas Karaisi anon tetí Yutan kayo vá inká tireti ena anan kéká bá ma ará kusen manafin ban avúavá timen mino. Mai ma erasampin ma ven ará namu uantan maran iyákun ma mai ano erasan aúbaná ma kákan

on kakhá ein mi yo máden mai on evaránen antíkaren erasan maman manafinien mino. ¹⁵ *Yutan kayoi man bayafin kokhon bayan baré íkan mi Yisasini furin manon mai vaya kayo yo maman karúdaren Yutan kayo vá ena anan kéká bá e avían beyantá túpá uren mi maman mana auyen ananien mino. Míkanan ma ará kusen manafin ban avúavá ameno van mi véi máan ten mino. ¹⁶ *Béi ma yaa unkamádantá purein manon míkanan anan maman manafiní uran mi vékanan Tiyarafenu vá aronaien mino. Mai van mi míkan mano ída evaránen ben ará namu uantan maran inten mino. ¹⁷ *Yisas Karaisi ano ma ma varafin eriven tireti ena anan kéká ma Tiyarafenui ádé ída váke nentá ma vaona vá inká tetí Yutan kayo ma Tiyarafenu ádé bá tiferuna vá ano ma kusen bani kama vayan tisimen mino. ¹⁸ Mai fara vara seyo, Yisasin pintéi uaré teti Yutan kayo vá tireti ena anan kéká bá ano kasaé Tiyarafenu avorá ódó tifantékun mai ma varé tiferuna Kantá Aunan manon mai aa aní inten mino.

Tiyarafenui Kantá Namuni Vaya Ino

¹⁹ *Máan tukhayan tiretí ena anan kayo ano saréa ída soya nanin banta ma vaonái ukha ompo siretin má deren Tiyarafenui vanasi vákeya veni kékasí ukha ono. ²⁰ *Máan tukháí setí ankan Yisasin amái vákun mi inká beni kama vaya ma varen orin banta kayo vá sakhanampa vanta kéká bá anon namádaní ukhan inká Yisas Karaisi anon beyantá mai namuni Bafaní ukhen mino. ²¹ *Mai setí ankan ma munan iyá tiferuna anoi maman manafiní uvéi Bafaní kantasí ukhein monó namun ma uvariya tifeuno. ²² *Máan tukhayan tireti ena anan kéká bá ano yere Yisasimpin o asótú uven nan mi siretin ma maman Tiyarafenui Kantá Aunan ma van namuní iya ono.

3

Pori Ena Anan Kayofin Monó Tiamin Banta Ino

* **2:9:** 1Ko 1:29-31; 2Ti 1:9 * **2:10:** Tai 2:14 * **2:12:** Rom 9:4; Kor 1:21 * **2:13:** Kor 1:20 * **2:14:** 1Ko 12:13 * **2:15:** Kor 2:14 * **2:16:** Sek 9:10; Kor 1:20, 22 * **2:17:** Ais 57:19 * **2:19:** Efe 3:6 * **2:20:** 1Ko 3:11 * **2:21:** 1Ko 3:16 * **2:22:** 1Pi 2:5 * **3:1:** Fir 1:7, 13 * **3:2:** Kor 1:25

1 *Tiretí ena anan nanin banta aya ono van mi séi Pori ano Yisas Karaisini karavusifin bá uno. 2 *Bákun mi siretí ankan ena anan nanin banta ma siamidén tarisari ino van ma Tiyarafenu ano ma simikhein doran inka afová ukha rono. 3 *Mai sarisari ma aúpá baréin ma Tiyarafenu ano séin aníí ódaré maé ma fefá afova vompon tiretin uvaman amikharé erunan taréa afoká en mino. 4 Máan tukhein mi mai ma uvaman amikharé eruna vompon ma yankafinteyan Yisasi ma yoriyaré éi pákena ma afová ukheruna mai afová inono. 5 Pefá Tiyarafenu ano mai aúpá ineine ída vanasifin aníin ontaren mifo saréan Kantá Aunan tákéi sakhanampa vanta kayo vá inká baya ma varen orin banta kéká bápín mi afokáin onen mino.

6 *Máan tukhan Tiyarafenui aúpá ineine máan mi ukhen mino. Tireti ena anan nanin banta ano ma mumunan iyaona kéká bá inká Yutan kayo ano ma mumunan ukhein kayo vá ano maman manaí uveyan Yisasín má túpá eonai véin pinté uarei Yutan kayo ma iyáantan baré ein danasinta yaídeya varan nono. 7 *Tiyarafenu ano séin tarisari uren kama usintáden ákona simikhái veni yoran bantaí ukhé beni kama vaya ma siamin dorarí iyá uno.

8 *Tiyarafenui kama nanin banta an téi ída yakhékun mi Tiyarafenu ano séin tarisari uren mi Yisasín ída kanaíen dosiren kama yanasinta setin timikheí pákena van ma ena anan nanin banta siamin doran téin timikhen mino. 9 Máan tukhan mi minó daná ma uvantein Tiyarafenu ano séin nan bei aúpá ineine ma esé aráí in tá baré ein maman dákó ino van mi séin aní uren tivíken mino. 10 Máan tukhan mi véi ma ena anan má Yutan kayo vá ma maman manafíní inain manon bei kama ineine vá afova vá ma ayompín bakan ma ákona ví bá ma vain aunan kayofin afoká inten mino. 11 Pefá ma vara ma ída uvanten maen béi Bafan Yisas Karaisín pinté uaren mai yaná barano van mi iniádákaren baren mino.

12 *Tetí ankan ma véintá mumunan é

tiferuna anon béimpin o asótú uvé tifékun mi mai anon Tiyarafenu vaípá ma orin ona yirá tiféi véin avorá ída feranton oriyá tiféuno. 13 Máan tukháí séi ma kama vaya siamiyarunará ma uman timiyain nan tiretí ena anan nanin banta ano ída anomé iniyáke amusín mana ono van mi ákona é tiamiyá uno.

Pori Ma Efesasi Kéká Ákona Uantano Van Amúkein Baya Ino

14 Mai anarái séi siron kanan durafúde tiretin nan te Sifóe vaípá timúkiyá uno. 15 Mai fara vara seyo, ma vara ráke yanasinta vá inká inaruráke yanasintará ma ánoní ukhein benafo veyáká anan ban mino. 16 Máan tukhan béimpin moéken avábá bakái veni Kantá Aunan mano siretin ákona amino van mi séi simúkiyá uno. 17 *Inká Yisas Karaisintá ma mumunan esin maen tiretimpin béi vanten mino. Máan tuvinti Tiyarafenui kama varafin ma amun dan aravuvín mantan ákona einí ono van mi simúkiyá uno. 18 Tiretí ankan má minó Tiyarafenui mumunan nanin banta vá ano Yisas Karaisini ída kípan avábá ma kákaní in inká ayasí in dan ódin ma námen aravin ukhein ma afová in ákona varano van mi simúkiyá uno. 19 Yisas Karaisini avábá maen moéken kákan mi vantiya ída kanaíeya minó afová inompo mai finté manáa kokhon afová ono van muno. Máan tesin maen Tiyarafenui aunan má ákona vá ano siretimpin bíkakhen bano van mi simúkiyá uno.

20 Tiyarafenui ákona ano ma setimpin doriyá ma setí ankan ina ono van ma iniyá tiferuna yanasintai ákona ano moéken esantakhen mino. 21 Máan tukhein nará minó mumunan nanin banta ano Yisas Karaisín táké uaren ná ena ena yamú Tiyarafenuin kákan bí amen oriyan ná bano. Pura ino.

4

Yisas Karaisi Má Ma Mana Vukhafái in Baya Ino

1 *Tiyarafenu anon tiretin arakhen mifo mai van inian kákaní ono van mi Bafani

* 3:3: Efe 1:9-10; Kor 1:26 * 3:6: Efe 2:13, 16-19 * 3:7: Kor 1:25 * 3:8: 1Ko 15:9-10 * 3:12: Yon 14:6; Rom 5:2 * 3:17: Yon 14:23; Kor 1:23; 2:7 * 4:1: Kor 1:10

yorarí ma iyarunará ma fákaan karavusií ukhein banta anon tiretin duvun iyá uno.

²*Ena ena yamú kuse váke vá bempákesá nono. Tiretíi avábá posá beni uman ayain maran ná ono. ³*Tiretíi ákona ure vá Kantá Aunan má o súpá uveya ará kusen ban avúaváposá tiretíyan damono. ⁴Para vara seyo, mana vukhafa vá mana Aunan mái vakan inká ínaimpáke yanáká ma ákona inin kauren ma avein mai manan bakan mi siretin arakhen mino. ⁵⁻⁶*Mana Bafan má mana mumunan má mana non baran má inká tetin Tifóe mana Tiyarafenu vá anan ban mi minó tetimpin doriyáken minó esantakhen mino.

⁷*Máan tukhen pasen mi Yisas Karaisin pinté uaren minó nanin banta avábá uren mana mana amusin daná amirú amirú ukhen mino. ⁸Máan tukhein nan mi Tiyarafenui vompon dóki ano máa sikhen mino.

“Béi ma inarufá ódiyáken maen
bei vanasi ma karavusií ukhá ein iyan
nen ben oyampá oriyan
maen mana yaná amusin amirú en
mino. *Íbo 68:18*

⁹*Mai ma véi yan ódé uno ma sein bayai ana máan mi ukhen mino. Ma ma seti varuna varafin béi veyan maman bararasí uren erakharen mi evaránen ódikhen mino. ¹⁰Mai ma veyan maman bararasí uren erakhá ein mano anan minó danápin béini yafisin mano víkano van ayompin ma vain danasinta esantaren dan uron ódikhen mino. ¹¹*Béi anon monó nanin banta amusin amen mi manáa avían aposeriíen inká manáa avían sakhanampa vantaíen inká manáa avían monó nanin bantará dafisiníen mi inká manáa avían monó baya ma siamin bantaíen mi inká manáa avían monó afova ma amin bantaí urú en mi ukhen mino. ¹²Máan tukhan mi vetíi yoran ma vain mai Tiyarafenui vanasi ayaintin beni yoran doriyáken monó nanin banta ano ma Karaisin au vukhafaí ma ukhein mai ákonáen báken kamaen bano van mino. ¹³*Máan té oriyá tifé ma setisi mumunan má afova vá ma o éke e éke uan Tiyarafenu

Anintá kauré ma sirá manafiní uré tifé ma Bafan oman tapé tiyá inká monó tin avúavápin ma mantaan ákona uvé maé Yisas Karaisi ma kama avúava sinta ma variyá einí ó tifanté uno.

¹⁴Máan tuvé maé ída evaráne arará iyampon kayo an davé kampun banta kékái vava van puran tiyan mantino siré e mumunan uan more mere ó tifanté uno. Mai fara vara seyo, manáa kéká ano kampun baya fóké dákói fura vava ma seiní iyáken tetin máka siyan mino. ¹⁵*Máka sinten mifo seti monó nanin banta ano vá tetisi ánon ma Yisas Karaisi váká ma ven au an ma yakhé tiferuna kéká ano vá beni avúavá moéke bariyákesá pura vava vá avábá basá pákaan ákona ó tifano. ¹⁶Máan tukhé tifékun mi véi anon minó bukhafa maman manará asótú uran kamaen báken bei yorarí urú iyáken mi ena vukhafa aya íkan inoriyan mairái minó bukhafa ano kama ukhen avábápin inoriyan mino.

Kakhan Avúaváká Ma Vain Iyamporinta An Ma Yakhen Ban Baya Ino

¹⁷*Máan tukhein nan mi Bafani ákonará tiretin ma vava siamiyá uno. Monó ma ída inin nanin bantai avúaváká ída vá nono. Mai fara vara seyo, vetíi inin asuse uron mi ukhen mino. ¹⁸Betíi inin maen títipa an mi yakhan pasen Tiyarafenui avúavápin nenta suron mi van mino. Mai fara va ino. Betíi inin mano nenta suron bakan aú ano ákona ukhen mino. ¹⁹Máan tukhan pasen betíi ineine finte kama inin orivin maen moéken namu avúavápin oferan namu ineine kayo anan bíkakan pasen kasaen ara ara avúavasí é iyan mino.

²⁰Máan té iyan mifo siretí ankan mai aa sákesa Yisas Karaisin afová ukhe va ono. Ída ino. ²¹Yisasin pinten mai fura vava inirei véin afová eono. ²²*Pefá tiretí ankan má deren mai ma kampun tin avúavá bá inká ará mantan ma namu avúavá barampin má bare ompo saréa mai avúavasá oyan ameno. Mai fara vara seyo, mai avúavá anon kampun

* **4:2:** Kor 3:12-13 * **4:3:** Kor 3:14-15 * **4:5-6:** 1Ko 12:6 * **4:7:** Rom 12:3, 6 * **4:9:** Yon 3:13 * **4:11:** 1Ko 12:28 * **4:13:** Kor 1:28 * **4:15:** Kor 1:18; 2:19 * **4:17:** Rom 1:21; 1Pi 1:14 * **4:22:** Rom 8:13; Kor 3:9 * **4:23:** Rom 12:2 * **4:24:** Esé 1:26; Kor 3:10

tireya vanasii ineine máde asuse uantiyare ono. ²³ *Máan ma iyá eona vará monó avúavápin tiretíi ineine vasá man auyení ono. ²⁴ *Tiretí ankan auyen nanin bantaí ukha ompo auyen avúava sá aní ono. Mai fara vara seyo, Tiyarafenu ano maman beyan an mi yara vaompo funtákein nanin bantaí ukheya kantasí ukhe fura yaná ana vá barano.

²⁵ *Mai vará kampun tin avúavá ifa ureya vá pura sikhein baya ana vá ben tiamin maran ono. Mai fara vara seyo, setí mana vukhafa finte nan bá tiféuno. ²⁶ *Tiretí ankan umeí inampo ída vá áesin arankan avúavá ano siretintá dafisino. *Íbo 4:4* Ída vá aran nan iya vasin ná áau eraven orun perano. ²⁷ Mai fara vara seyo, aran nan ma in avúavá anon Ban Anoni ona yiantan nono.

²⁸ Umoyan ma iyá inona kéká ano mai avúavá ifá ure vá tiretí ayampó pura se kama yorari ureya kokhon daná máde vá o ma afasí ukhein nanin banta siretí aúkake sá aya ono. ²⁹ *Tiretí ankan oorá dafíke ída vá namu vaya kayo seno. Ena nanin banta ma aya oren baya kayo ana siyasin ná mai vaya ma inin nain kayo aya ino.

³⁰ *Tiyarafenu ano siretin evaránen miyaní uren maen bei Kantá Aunampó tiretin aníen be ina e sikhen mifo ída vá tiretíi avúavá ano Kantá Aunan arunaná amino.

³¹ *Máan tinona van mi ena asiren ma ará namu uantan avúavá bá aranan in má baé naé tin má oyampá baya sin má inká namu avúava sinta vá ampeno van tiyá uno. ³² *Ampire vá tiretí ankan ben kama uren ará amin maran iyákeya vá Tiyarafenu ano ma Yisas Karaisin pinté uaren ma siretíi ume ampianteiní eya vá enai ume ampiantano.

5

Kakhakheintá Ma Van Baya Ino

* **4:25:** Sek 8:16; Kor 3:8-9 * **4:26:** Yem 1:19-20 * **4:29:** Kor 4:6 * **4:30:** Ais 63:10; Efe 1:13-14; 1Te 5:19
 * **4:31:** Kor 3:8 * **4:32:** Mat 6:14; 18:22-35; Kor 3:12-13 * **5:1:** Mat 5:48 * **5:2:** Eks 29:18; Ibu 10:10
 * **5:5:** 1Ko 6:9-10; Kor 3:5 * **5:6:** Rom 1:18; Kor 2:4, 8 * **5:8:** Yon 12:36; Efe 2:13; Kor 1:13; 1Pi 2:9 * **5:13:** Yon 3:20-21

¹ *Tiretí ankan ma minó danasí inte mae mai Tiyarafenui avúavá ánain ná bákurono. Mai fara vara seyo, siretíi bín akhafanan ban nan tireti nan anunu ukhen mino. ² *Yisas Karaisi ma siretin nan anunu uren ma vei aufó ákonte uran Tiyarafenu avorá aunka uveri an dakan ma amusin uaren tiretíi ume ampianteiní e vá ena ma anunuin avúavá áesin ná tiretimpin bíkakhanti vá bano.

³ Máan tukhanti ída vá pamúku avúava safi ena ina yaná ma aranan nafi ena namu avúava sinta fi vá barano. Mai fara vara seyo, Tiyarafenui vanasifin máan avúavá ma variyain kayoi afokhan ída van mino. ⁴ Tiretí ankan Tiyarafenu vá tusu siantan nompo ída vá namu vaya fi aniana vaya fi inká namu vaya fo safi vá taró teno. ⁵ *Para vara seyo, siretí ankan afovasá ono. Pamúku avúava safi inká ída funtákein avúava sinta fi ena ina yaná ma aran nan nafi ma variyain mai kampun ayarafenu kayoi monó tiantiyain pasen máan nanin banta ano ída kanaíen Yisas Karaisin má Tiyarafenu vái yafisimpin orinten mino. ⁶ *Kampun banta kayoi vaya inire vákurin nampo yafían ná ákona oro. Mai fara vara seyo, namu avúavá ma variyá inain nanin banta amanináí Tiyarafenui aran naná afoká inten mino. ⁷ Máan tukhanti mai ma vanasi ano ma namu avúavá baran naimpin ída vá o fébe varano.

⁸ *Mai fara vara seyo, fefá títipafin baré en nan mi saréa Bafan mano avían kakhantá kaúken mifo kakhán avúavá kasá bano. ⁹ Mai fara vara seyo, mai khakhan ma siretimpin bain manon kama avúavá bá puntákein avúavá bá inká pura sin avúavá báí maman dákó é iyan mino.

¹⁰ Máan tukhein nará Bafan mano ma amusin oren ukhein avúavasá dosireya afová oro. ¹¹ Namu avúavá ma variyain nanin banta vá ída vá avunté ono. Mai avúava sinta ano ída kama aran imádé iyan mino. Máan tukhein nará mai avúava sinta vará antan nono. ¹² Mai fara vara seyo, ume nanin banta ano ma aúpaké bariyain avúavá ma yákó tian

amáin nan tiyave inten mino. ¹³ *Máan tiyan mifo oon mano ma vetimpin panu sin maen namu avúava sinta maman afoká é iyan mino. ¹⁴ *Para vara seyo oon mano ma kamaen panu sin maen minó daná maman dákó é iyan mino. Mai van mi máa sikhen mino.

“Aun ma vakheona kéka soe, mantano.

Púkanona finté orun mantesin ná Yisas Karaisi ano kakhaantano.”

Kantá Aunani Ákonará Ma Van Baya Ino

¹⁵ *Máan turanti siretí ma vanonafin dafían ná ákona ukhe vano. Kama ineine ma vákan bain nanin banta an ná dakheya ída vá aniana ma ukhein nanin banta an dano. ¹⁶ Taréa namu yamúi va ompo yafían ákona ukheya ena ena kama avúavá ana vá barano. ¹⁷ Mai van ída vá aniana iya váke Bafan mano intéa yanasá barano van anunu ukhen nafi mai yanasá afová ono. ¹⁸ *Mai namu avuává ano siretíi van máden asuse inten mifo ída vá óen non nare óen iya vano. Áesin ná Kantá Aunan mano vá tiretimpin bíkakhanti vá bano. ¹⁹ *Banti vá Í Bompon pintena í bá ena í kayo vá inká Kantá Aunan mano ma inimpin báuantan nain í kayo vá ben tiamin maran iya vá tiretíi aúkáké Bafantá í dano. ²⁰ *Máan tiya mae minó danasinta vará tetisi Bafan Yisas Karaisin avikasá ena ena yamú tiretin Afóe Tiyarafenun ná tusu siantano.

Ábasu Ano Ma Kamaen Ban Avúavá Baya Ino

²¹ *Tiretí ankan Karaisin aránaópá báke vá ena nanin banta vá oo yaiyin maran ná ono. ²² *Bafani aránaópá ma vaonaí eya siretí anasi kayo ano siretí avafuná aránaópasá bano. ²³ *Mai fara vara seyo, Yisas Karaisi ma monó nanin banta ánon báken ma ve au fóké aya uren ma evaránen avíkeinien mi vanta anon be anái ánon ban mino. ²⁴ Monó nanin banta ano ma Yisas Karaisini aránaópá bainí eya vá tiretí anasi kayo ano vá avafunái aránaópasá bano.

²⁵ *Inká avafuná ano vá Yisas Karaisi ma monó nanin banta van ma anunu uren aya ono van ma vei aunan ampikheinie vá tiretí anáona vará anunu ono. ²⁶ *Banasi maman kantasí ono van mi Yisas Karaisi anon non má Tiyarafenui vayafó báí vei vanasi sesé uran mi ven avorá kamaen kantasí ukhen mino. ²⁷ *Béi ma máan tein mai ve avorá maman avusese en kama urantin pain nafi sonton nafi ída vantin bei vanasi ano ída aau vantin kantasí ana ukhen bano van mino. ²⁸ Máan mana en ná avafuná ano ma vetíi au van ma anunu iyainien ná betí anáona vará anunu ino. Mai fara vara seyo, avafu ano ma ve ana san ma anunu inten mai fura sen beyan nan mi anunu iyan mino. ²⁹ Yisas Karaisi ma ve au an dakhan ma monó nanin banta van anunu iyainien mana vanta ano ída vei au van oman kaumpan é iyan mifo kama uren mi yafisé iyan mino. ³⁰ Máan tukháí setí ankan Yisas Karaisini au vukhafan bá tiféuno.

³¹ *Tiyarafenui vompon dóki ano máa sikhen mino. “Mai van mi vanta ano ve anóe afóen me ampiren be aná bá o súpá en mana vukhafái é iyan mino.” *Esé 2:24*

³² *Mai vaya anon moéken kákani suron ukhen mifo Yisas Karaisi ma monó nanin banta vá maman mana vukhafái ukheí pákena vayan tiádan ban mino. ³³ Máan tukhein nan mi siretin evarané tiamé uno. Mana mana vanta ano ma eyan nan ma anunu iyaonaí eya vá e aná anunu ono. Inká anasi ano vá be avafuni aránaópá báke ná ben oo yaiyino.

6

Anóe Afóen Má Iyamporinta Vái Vaya Ino

¹ *Iyamporinta oe, Bafan mái súpá ukha ompo anóe afóni oo vá daiyono. Mai fara vara seyo, máan ma inteya mai kamaen puntákein avúavá baran nono. ² Tiyarafenui siyan mikan man baya kayo finte ma esé iyáantan ma vain man baya ano máan mi sikhen mino. “Tiretí anóe afóeni aránaópasá bákeya vetin oo vá daiyono.” ³ Mai ma iyáantan baya ano

* 5:14: Ais 26:19; Rom 13:11 * 5:15: Kor 4:5 * 5:18: Ruk 21:34 * 5:19: Kor 3:16 * 5:20: Kor 3:17
 * 5:21: 1Pi 5:5 * 5:22: Kor 3:18; 1Pi 3:1 * 5:23: 1Ko 11:3; Efe 1:22 * 5:25: Kor 3:19; 1Pi 3:7 * 5:26: Tai 3:5
 * 5:27: 2Ko 11:2; Kor 1:22 * 5:31: Mat 19:5 * 5:32: Rev 19:7 * 6:1: Kor 3:20

máan mi sikhen mino. “Tiretí anóe afóen aránaópá báke ma vetin oo yaiyinte mai kama e ma varará ayáká ban nono.” *Diu 5:16*

⁴ *Inká tiretí afóe yan noe, ída vá iyampon kayo ma aran amin avúavá bariyákeya vetin kama uantádeya vá Bafani kama avúava sinta vá afova ameno.

Miyan Ída Van Doran Banta Kayo Vá Ayafa Kéká Bái Vaya Ino

⁵ *Miyan ída van doran nanin banta oe, Yisas Karaisini oo yaiyono van ma iyaonái eyá tiretí ayafa aránaópá bákeya vetin ma sin nain dorarisá ono. ⁶ Tiretí ayafa kayo ano ma siretin áde ban nain damú ana ída vá betin amusin ameno van ákona yorará ono. Ída ino. Yisas Karaisini miyan ída van doran nanin banta ma vanteya aúkáke sá Tiyarafenui anunu vákuro. ⁷ Bafan mano amusin ino van muno sire vá amusin iyákeya aúkáke sá minó doran dorano. ⁸ *Máan tukhein nan mi miyan ída van doran nanin banta fu inká miyan ban doran banta fu mai ovaresa me iné tifano. Tetí ma kama yorará ukhá onunarái siyan Bafan mano miyan timirú inten mino.

⁹ *Inká tiretí ayafa vanta kayo oe, siretí miyan ída van doran nanin banta kayo ída vá akhokho amiyákeya vetin kama uresin ná bano. Ovaresa vá me ineno. Betí má tirétí mái Kákan mai inarufái váken béi ída mana van mana anunu é iyan mino.

Tiyarafenui Aruvin Danasinta Fákena Vaya Ino

¹⁰ Tesi kípan baya ino. Bafani kákan ákona vasá mantaan ákona ono. ¹¹ *Tiyarafenui minó aruvin buí daná ma ureyan kasae mantaan ákona uve mae Ban Anoni máka simpin esantan nono. ¹² *Mai fara vara seyo, varará nanin banta vá ída siruviyá tifé umpo namu aunani ánon banta kayo vá ma varará ma yafíkein namu aunan kayo vá inká títípa avúavá

bá ayompin ma namu avúavá bariyain aunan kayo vá siruviyá tiféuno.

¹³ Máan tukhein nan Tiyarafenui minó aruvin buí daná urákareya namu yamú ma erintiya kasae mantakhare vá inká aruvin ma kípvinti yere mantaan ákona ukhe vano. ¹⁴ *Mantaan ma ákona ono ma sinteya fura vaya ana ma simpo sá amú ananí eya vá Tiyarafenui funtákein avúavápó kápa ona ma uan ákorá iyarein- isá ono. ¹⁵ *Inká Tiyarafenui kama vaya finté ma eriyain kusin baya fosá arantan anamun an dareya fura se útare vá bano.

¹⁶ Mai aruvin danasinta ma variyákeya inká mumunan ná pákaan ákona uresin ná mai ano sanko an davintin ná Ban Anoni ira khiyain uve kayo ano e khútino.

¹⁷ *Máan tiyantiya vá inká Tiyarafenu ma siretin evaránen avíkein inin mano vá kápa kamamó ma einí uvintiya vá inká Tiyarafenui vaya fosá maman Kantá Aunani vaenatí ure vá pákaan ákona ono.

¹⁸ *Kantá Aunani ákona rasá ena ena yamú amúkiyáke vá ákona e Tiyarafenu tiamesin ná tiretin aya ino. Ena ena yamusá minó akhempá ma vain monó nanin banta van iniya vá amúkuantano.

¹⁹ *Máan tiyákeya Tiyarafenui kama vaya ma vain mai ena anan nanin banta ina vá dere ifo vá amúkusintiya sirá beni aúpá ineine ída feran kamaesá tian amá uan ameno. ²⁰ *Mai fara vara seyo, séi Tiyarafenui oo vantan bákéi mai vaya ma siyaruna anarái siyan tirantantá seni anan kukhen mifo amúkusintiya sirá ída feranton kasaé beni vaya sian amá ono.

Pori Ma Kípiyan Amusin Baya Sein Mino.

²¹ *Tikikasi maen téin tinunu ukhein tifá tiváen báken tiyaen Bafani ákona yorará iyain bantin téi ma variyaruna fáké baya sian amá intiya inin nono. ²² Mai van mi siretin ákona uantan baya siamiyáken inká teti ma varuna fáke yere siamino van mi véin tiantékun tiretí vaonafá orinten mino.

* **6:4:** Íbo 78:4; Pro 22:6; Kor 3:21 * **6:5:** Kor 3:22-23; Tai 2:9-10; 1Pi 2:18 * **6:8:** 2Ko 5:10; Kor 3:24-25 * **6:9:** Rom 2:11; Kor 4:1 * **6:11:** Rom 13:12; 2Ko 10:4 * **6:12:** 1Pi 5:8-9 * **6:14:** Ais 11:5; 59:17; 1Te 5:8 * **6:15:** Rom 10:15 * **6:17:** Ibu 4:12 * **6:18:** Ruk 18:1; Kor 4:2; 1Te 5:17 * **6:19:** Kor 4:3-4; 2Te 3:1 * **6:20:** 2Ko 5:20; Frm 9 * **6:21:** Apo 20:4; Kor 4:7-8; 2Ti 4:12

²³ Mumunan tiyofi sifá tiváeyan noe, seti Sifóe Tiya rafenu vá Bafan Yisas Karaisin má anon tiritin nan anunu uren ará kusiantáden mumunan ákora uantanten mino. ²⁴ Mai ma setisi Bafan Yisas Karaisin nan ma aúkáké anunu iyain kayofin ná Tiya rafenui sarisari ano vano.

PORI MA FIRIPAÍ NANIN BANTA UVAMAN AMEIN BOMPON MINO (Firipai)

Firipai Vompon Ma Uvanteí Pákenai Afova Vaya Ino

Ma vompon ma uvantein banta ino.
Baya varen orin banta Pori ino.

Uvarein orana ino.

AD sikisti-uvani (61) ráké sikisti-tari (63) fin mi ma vompon uvanten minon ten kokhon afova vanta kayo ano inikhen mino. Mai maen Korosí nanin bantai vompon má Firimonini vompon masá uvanten nafi áa ída fi sen iniyan mino.

Ma vompon ma uvantein baru ino.
Romú barurá karavusíí uran báken karavusi namun pintéi uvanten mino.

Ma vompon ma uvaman amikhein kéká ino.

Pori ma kan dádasí en ma monó dorarién eúkiyain pimpá ma Firipai nanin banta o avían monópin kauká ein kékái amikhen mino. (Aposeri 16:12-40 fin ná onano.)

Nái ana vará ma vompon uvanten nafino.

Firipai nanin banta maen baya inin kéká báken inká ena kéká ará amin kayo vákan pasen Pori vetin nan moéken anunu iyáken betin má túpá uven Yisasini kama veya siamein tusu siantano van mi uvanten mino (2 Korin 8:1-5 fin má Firipai 1:5 fin masá onano). Maifin ma varé ein kéká maen mai nararé davaráe ma saríiyá ein nanin Ridian má Firipaíke karavusi namuntá ma yafíkein banta vá be aná akhá bá ino. Maifin Ruku masá baren nafi sen iniyan mino. Pori veyan ma karavusifin bain nan ída inen mifo vei amusin má anunu vá inká Karaisini yoran ma moékentá doriyain má bei veya ana vái ma

vompompin tian amá ukhen mino. Firipai nanin banta ano ve ma afova amikhá ein baya me ampiren tavi yaná eyakhafin nain nan mi ma vompon uvaren mino. Mai van mi véin tusu siantiyá uno.

Porini Amusin Baya Ino

¹ *Minó Tiyarafenui vanasi vá ánoní ma ukhein kéká bá inká monó doran banta kayo vá ma Firipai barurá báken Yisas Karaisintá monó tiyain kéká baípái ma vompon uvamadékun oren mino. Yisas Karasini yoran bantá kanan téi Porin má Timotin má anon ma vompon uvaré uno.

² Teti Sifóe Tiyarafenu vá inká Bafan Yisas Karaisin má ano vá tarisari vá kusin má tiretin amino.

Firipai Ma Monó Nanin Banta Vain Nan Ma Pori Susu Amúkirí Ein Baya Ino

³ Tiretin nan ma ineine eruna yamú tetisi Tiyarafenu vaípa tusu sé iyá uno.

⁴ Téi ma simúkeruna yamú mai simusin mái siretin aya ino van timúkuanté iyá uno. ⁵ Mai fara vara uno. Esé ma ineron táké ma se má túpá ukhen ná ma Yisasini kama veya siamé eruna avúavá ma saréa fara fákaan ákona ukhaona van muno.

⁶ *Máan tukhein nan mi Tiyarafenu ano siretin afová ukhen mi siretimpin bei kama yoran arái ukhein doren oriyaré intin ma Yisas Karaisi ma ovaránen erin nain damúi mo kípanten mino.

⁷ Tiretí ankan nan te súkákéi kama inin manan tiyá uno. Mai fara vara seyo, séi ma karavusifin nafi varufa safi ma vákuya siretin má deren Tiyarafenui sarisari variyáke véi ma simikhein doran tiyae yoriyare ono. Máan tiya inká beni fura sikhein kama veya ma namuroí uantiya mae yo yureya mai vayará ákona uantiyare ono. ⁸ Yisas Karaisini arunaná pókéi siretin nan moéké tinunu iyá uno. Tiretin oman onano van kákantái ineine iyá kun Tiyarafenu ano afová ukhen mino.

⁹ Téi ma simúkiyaruna mai siretíí avábá in maran mano moéken bíkaaren avaniyan-tiya funtákein avúavá afová iyasin kama ineine ano e inoren mo kákaní ino van

* 1:1: Apo 16:12-40 * 1:6: 1Ko 1:8 * 1:10: 1Te 5:23

muno. ¹⁰ *Mai fara vara seyo, sireti ankan kakan daná óde afová ureya ída mana ume vantiya avusese e funtáke oriyasin Yisas Karaisi ma ovaránen erin nain damú o afoká ino van mi inikhé uno. ¹¹ Yisas Karaisi anon minó damú puntákein avúavá tiretin aúpin ákona uantiyantin mai avúavá ano siretí kama avúavái nan aran irantin maen mai ano Tiyarafenu kakan bí aminten mino.

Porin Ma Fákaan Karavusií In Avúavá Anon Kama Vaya Ma Siamin Aa Uvisen Mino

¹² Mumunan tiyofi sifá tiváeyan noe, sireti ankan afovasá ono. Mará ma sen timaniná afoká iyain mai yanasinta anon tiya iyan Tiyarafenu kama vaya ano minópá orera iyan mino. ¹³ *Mai fara vara seyo, Yisas Karaisini yorari ma iyaruna van mi karavusií ukhekun ma varuráke nanin banta vá kin amápin ma yafisin kéká bá ano afová ukhen mino. ¹⁴ Téi ma karavusifin baruna anon mumunan nanin banta ákona uantan ída feranton Tiyarafenui vaya kasaen banasi siamiyan mino.

¹⁵ Pura sen manáa kéká ano séi ma yoriyaré eruna yoran maman daní ono van iyan mifo ena kayo ano funtáden kama ineinefói Yisas Karaisini vaya máan banasi siamiyan mino. ¹⁶ Betí ankan téin nan anunu iyáken mi kama vaya siamiyan mino. Mai fara vara seyo, Tiyarafenu anon téin nan aní uran báken mi kama vayará ákonæn dafiken mino sen afová ukhen mino. ¹⁷ Manáa kéká ano ída funtákein inin onan mái Yisas Karaisini vaya vanasi siamiyan mino. Betí ankan ída ena van iniyáken ma vetiyan kakan bí bariyain mai avúavá anon téi ma karavusifin baruna mai moéken uman timiyan mino. ¹⁸ Betí ankan ída funtákein ineine fosá Yisas Karaisini vaya vanasi siamiyan nafi áa funtákein ineine fosá tiamiyan nafi mai van timusin iyaruna mai fara simusin manan é oriyá banté uno. ¹⁹ *Mai fara vara seyo, sireti ankan ma sen nan amúkusintiyaona van mi Yisas Karaisini Kantá Aunan mano siya iyan mi

mai anon tenti uman mo seso sisintanten mino.

Pori Ma Yisas Karaisini Vayará Mantakharé Ein Baya Ino

²⁰ Mai fara vara seyo, séi ma inikheruna ída siyave van onté umpo fefá ma iyá erunaí é Yisas Karaisini vaya kasaé tiamé oriyá banté uno. Téi ma mumunan ukheruna mai furonte rafu áa fará bante rafu mai anon Yisas Karaisin kakan bí aminten mino. ²¹ *Mai fara vara seyo, séi ma fara saunan bantí maé Yisas Karaisin ninan baréi furékun maen mai moéken kama uron inten mino. ²² Máan tinten mifo séi ma fara váken maen Yisas Karaisini vayará ma mumunan inain manon aran imáden inká anon buáden mifo maí kanan pintena intéa anó esantakhen nafi mai séi ída afová ukhé uno. ²³ *Tesi inin mano kampintaní iyan mifo maíkan daná ma me ampiren Yisas Karaisi má ma o van mi kama uron ukhen mino. ²⁴ Máan tukhen mifo séi ma ída furin para váké ma siretin ayain mi kama ukhen mino. ²⁵ Tenti ákona inin ma vain mai séin ma ída furin para váké maé tiretí ankani mumunampin amusin amiyáku mai afová uresin tiretí mumunan mano mo ákona ino van muno. ²⁶ Ákona ukhá esí ma séi ovarané tireti vaonafá eréku mae mai ma séin pinté uaren ma Yisas Karaisi ano variyain avúava san kasae sireti ankan amusin iyáke véin aví maman daní inono.

Tiyarafenui Vanasií Ma Ukhen Ban Baya Ino

²⁷ *Máan tin nompo séin timaniná ma afoká inain dana san ída vá iniyákeya siretí fura ineine vá Yisas Karaisini kama vayará ana vá kaúde inaruráke nanin banta an ná dakhe vano. Máan tukharé esí ma séi eré e onante rafu áa fará inente rafu mai manafin mi inin onan kaúde mantaan ákona ukheyen Kama Vayará mumunan ino van mi vanasi siamiyaren mino sé afová onté uno. ²⁸ Tiretí namuro ano inte aafákesá tiretí amaniná uman kaono van inten nafi mai van ída vá perano. Mai avúavá anon betin aní intin mi afová iyáken Tiyarafenu ano setin tiren asuse inten mino siyantín beyantá tiretin aya inten mino. ²⁹ *Mai fara vara seyo,

* 1:13: Apo 28:30 * 1:19: 2Ko 1:11 * 1:21: Kar 2:20 * 1:23: 2Ko 5:8 * 1:27: Efe 4:1; 1Te 2:12 * 1:29: Apo 16:19-40

Yisas Karaisintá ma mumunan in afova ana va amikhen naino. Ída ino. Ben aviká ma uman baran má amikhen mino. ³⁰Teti minó anon manaí ukhen uman bariyá tiféuno. Pefá ma séi variyaré eruna uman tiretí ontareya saréa mai uman aúbaná para vákuya afová iya ono.

2

Yisas Karaisin An Den Ma Ará Bararasí Uren Ban Baya Ino

¹ Yisas Karaisin nina yaná pinte ída mana ákona mantare fono. Inká beni avábá pinte ída ará kusin mantare fono. Inká Kantá Aunan má ída ará manafiní ukhare rafono. Inká aúkake sá ena nanin banta kama ure yafisiyare fono. ² Máan ma iyaré inte mae ará manafin ure vá ben anunuin maran iyáke inká inin onan manafin kaúde veya sian damuare vá téin timusin in dorarisá ono.

³ *Ída vá eyan nan inireya ena oman kaumpan ono. Ará barará desin era-fuvinti vá ena nanin banta vará moéke ineno. ⁴ *Tiretí ina yanasinta ma yafisisona van mana ída vá iyákeya ena ina yanasinta vá dere vá dafiantano.

Yisas Karaisi Ma Veyan Maman Bararasí Ukhein Baya Ino

⁵ Yisas Karaisi ma variyaré ein mai avúavá ana vá tiretimpin bano.

⁶ *Pefá béi Tiyarafenu vá manaí ukharen mifo ma varafin ma erein damúi mai ma manaí ukaré ein me ampen mino.

⁷ *Beyan maman bararasí uren ída miyan ban doran banta an daven inká barará banta ma noin avúavákái sen noren mino.

⁸ *Inká Tiyarafenui veya iniren bei au maman bararasí uren umoyan banta ano ma yaa un-kamádantá ma furein an den mino.

⁹ *Mai van mi Tiyarafenu ano véin maman dan uron bain barurá kaúden minó ena aví kayo esantakhein bí amikhen mino.

¹⁰ *Amikhein mai inarufá ma vain kayo vá inká barará ma vain kayo vá ma vara aránaópá ma vain kayo vasá Yisasin bí ká ana vá aron durafúden monó tiantano.

¹¹ *Máan tintin minó ano Yisas Karaisin nan ma Bafan mino sinain manon Tifóe Tiyarafenu avíi yaní inten mino.

Tiyarafenui Vanasi Ano Ma Ofu An Den Moéken Kakhaantan Baya Ino

¹² Téi ma sinunu ukheruna sirona kéka soe, séi ma siretin má báku mae séi ma seruna veya ánain ena ena yamú kama e yakhafiyaré en ná saréa siretin má ída vá umpo ákona e vá mai ma siamiyaré eruna veya ánain ná dakhafono. Tiyarafenu ano ma siretin evaránen avíkein nará purase veni aránaópá bákeya ven nan periya vá beni yoran posá banasi aní ono.

¹³ Mai fara vara seyo, Tiyarafenu anon tiretimpin doriyáken beyan ma amusin amé iyain mai ákona vá anunu vái siretin amiyan mino.

¹⁴ Minó dorarí ma inonafin ída vá ena oyampá baya seya inká asive asive iya vano. ¹⁵ *Máan tesin ná ída vá tiretin oyampá baya sen kakhirun arino. Puntákein nanin banta váke vá ma varará ma kampun avúavá ana ma varen oriyan bain kékápin ná Tiyarafenu akhafana an dakhe vá betin aúbaná ofu kayo ano ma kiyain bainisá ono. ¹⁶ Aun bain baya ma fákaan ákona ukharé esí maé Yisas Karaisi ma ovaránen erin nain damúi séi ma yoriyaré eruna yoran ída fa savifá o afeyoren mino siré timusin onté uno. ¹⁷ Timusin onté umpo se saunan mano Tiyarafenui ma íkun uan amin non ma vanaein an ma yanten maen tireti ma yoriyaona mai moéken ákona uantanten mino. Tiretin naro siré ma fúkaré maé tiretin má manafin timusin ono van muno. ¹⁸ *Máan tukhanti siretin má dere vá mai van amusin esi sá ten má timusin ono.

Firipaí Nanin Banta Ayaino Van Ma Pori Ano Timotin Tiantan Nain Baya Ino

¹⁹ Bafan Yisas Karaisi ma anunu inain nan mi ainé Timotin tiantékun tireti ma monó dorarí iyaona o ódaren intesá é

* **2:3:** Kar 5:26 * **2:4:** 1Ko 10:24 * **2:6:** Yon 1:1-2; 17:5 * **2:7:** Yon 1:14; 2Ko 8:9 * **2:8:** Ibu 5:8; 12:2
* **2:9:** Apo 2:33; Efe 1:20-21; Ibu 1:3-4 * **2:10:** Rom 14:11 * **2:11:** Rom 10:9 * **2:15:** Dan 12:3; Fir 1:10;
1Te 2:19 * **2:18:** Fir 3:1; 4:4

doriya fo mai me sisimintí timusin onté uno. ²⁰ Timoti ma einí ukhein banta ída ena sen má báken tiretin ayaen dorano van inikhen mino. ²¹ *Para vara seyo, ena kéká ano vetiyan ma ayain doran nan manan iniren Yisas Karaisi ma amikhein doran nan ída iniyan mino. ²² Máan tiyan mifo Timoti ma ákonaen doriyain doran tireti afová ukhen nan mi ve anin mano ma ve afóe má túpá uven doriyainien mi séin tiyaen Tiyaarafenui kama vaya vanasi siamiyan mino. ²³ Mará ma séin timaniná intéa yanasá afoká inten nafi mai ma afová uré maé ída ayáká báké béin tiantékun tireti vaonafá orinten mino. ²⁴ Máan tukháí séi ma Bafantá inin kaiyaruna véi ma aái intí ída ayáká báké teyantái siretin o onanté uno.

Pori Ma Epafroditusin Tiantantin Firipaí Nanin Banta Vaipá Orino Van Ein Baya Ino

²⁵ *Máan tukhá umpo saréa Epafroditusin tiantékun tiretí baonafá orino van mi séi inikhé uno. Béi funtákein tifá tiváen báken mi séi ma o afasí eruna yaná tiya é iyan mino. Inká béi siretíi vaya varen orin bantan báken monó baya simpin ma séi uman barékun maen ída feranton tiya é iyan mino. ²⁶ Béin nan aí iyan ban mino se ma sireti ineona van mi véi anomé iniyáken tiretin o onano van iyáká mai van mi véin tiantano van iyá uno. ²⁷ Béi aí mamaren pura sen purinté ein mifo Tiyaarafenu ano verasan nan arunan uren mi séin nan moékan arun naná baranae siren mi véin ayain asefaen mino.

²⁸ Mai van mi véin tiantékun tireti vaonafá orino van mi séi moéké tinunu ukhé uno. Mai fara vara seyo, séi ma afová ukheruna sireti ma véin oniyáke kákan amusin esí maé téi siretin nan ída sirunan uré kokhon ineine onté uno. ²⁹ Béi ma orinti mae amusin iyáke vá monó avúavá posá kama ureya e avían kaúde mae máan banta kama uresin ná bano. ³⁰ Mai fara vara seyo, siretí nentá báké ída kanaie siya oren ukhen nan mi véi ída ve au van ininton téin tiyaen Yisas Karaisini yorari iyaren mi furin avídoren mino.

3

Yisas Karaisin Ma Afová Uren Moékan Miyan Baran Baya Ino

¹ Mumunan tiyofi sifá tiváeyan noe, náí avúavasá afoká inten nafi Bafan mano vá amusin amino. Tiretíi mumunan ákona uantano van mi ída sivesara inan ena ena siamiyá bá uno.

² Mai ma afá iyan kayo an daven ma namu avúavá baren nóken au ma khavina kéká anon para van oriyan ban aunan baran nono ma siyain kéká sará dafían ákona ono. ³ *Mai fara vara seyo, Tiyaarafenui ma Kantá Aunampin monó tiyá tiferuna kéká anon pura sé tu khakhé tíféuno. Mai ma Yisas Karaisi ma setin nan púaren e mantakheintái setisi ákona inin kaúké umpo varará nanin bantai avúaváka saino. Ída ino.

⁴ *Dan bukhafará ma variyaruna yanasinta ano sétin tiyaen baré intí mai ma yan bukhafará dákó iyan ma amusin iyain kéká esantaré kama ukhéi vanunaren mino. ⁵ *Mai fara vara seyo, séi Bensamenini anan pinté dákóí ukhé Isareri anan banta uron mi vá uno. Téin ma se sinóe ano kauran ma yan manápá ifo afápá kanú manaú damú orivíkan maen tu khakharen mino. Máan tukháí Farasisi kékái man baya afova suron ukhéi mai ánain dakhafé iyá uno. ⁶ *Pefá Yisasintá ma mumunan iyain kéká ariyáké uman amiyaré umpo mai ma séi yoriyaruna sivútivá ma vanasi ano yaíden afová inten maen mai séi ída mana man baya yurafuriyá uno.

⁷ *Mai ma yan bukhafará bariyá eruna yanasinta van kákan daná ino siyaré umpo Yisas Karaisi ma fúaren e mantakhein ma oniyáké mai ma variyaré eruna yanasinta van ída veni ana vain daná inon té iniyá uno. ⁸ Tesi Bafan Yisas Karaisi ma mantaré ein avúavá ma afová ékun kákan danasí íkan inká tetí ma variyaréeruna yanasinta anon mo faen danasí en mino. Mai fara vara seyo, mai ma mantaré ein daná anon tiya iyain bara ráke vantai avúava maman pasavi yanasí

* 2:21: 2Ti 4:10 * 2:25: Fir 4:18 * 3:3: Rom 2:29

* 3:6: Apo 8:3 * 3:7: Mat 13:44-46 * 3:9: Rom 3:21-22

* 3:4: Apo 22:3 * 3:5: Ruk 1:59; Apo 23:6; 2Ko 11:22

uré maé Yisas Karaisin mái súpá onté uno. ⁹ *Máan turé ma ven má manafin túpá uvé maé béintá mumunan uvé puntákein bantan banté umpo seyantá ma man baya yakhafin mano va funtákein banta vante rauno. Ída ino. Mai fara vara seyo, Karaisintá ma mumunan é tifékun mi Tiyarafenu ano funtákein nanin banta e sinten mino. ¹⁰ *Yisas Karaisi ma fúkaréin orun avían mantakhein ákona ma afová uré béi ma variyá ein uman kayo variyaré maé béi ma fureiní ono van muno. ¹¹ Mai fara vara seyo, mai ma véi fúkaren e manteiní ana ono van muno.

Ákona En Tava Uren Ma Esantaren O Miyan Baran Baya Ino

¹² *Téi fefasa ven avúavá mamaré puntákera siya raumpo mai ma Yisas Karaisi ano ma iyátintákein pákaan ákona ono van mi ma yorarí iyá uno. ¹³ Mumunan tiyofi sífá tiváeyan noe, mai ma siamiyaruna yanasinta ída mantéi mai van mi feyante avúavá me soyan amiré nái yanasá ínaimpá barante rafu mai yana san mi kakháké doriyá uno. ¹⁴ *Inaru fáke miyan barano van ma Tiyarafenu ano Yisas Karaisin pinté uaren ma setin tariyain nan mi má miyan o varano van ákonáé tava iyá uno.

¹⁵ *Monópin ma vá tiferuna nanin banta ano mai yanasinta van mi kakhábó tifanté umpo manáa yana san ma ída sirá manafiní é tifékun maen Tiyarafenu ano aní usintanten mino. ¹⁶ Máan tukhen mifo mai ma fefá ma fákakhá é tiferuna avúavasá pákaan ákona ó tifano.

¹⁷ *Mumunan tiyofi sífá tiváeyan noe, mai ma séin tínain bákuriyain kékái avúavasá afová ureya senti sivútivá basá maman manái oro. ¹⁸ Mai fara vara seyo, mai van mi fefá kokhon dádá tiaméku iniyá en ná taréa yere kokhon kékái avúavá anon Yisas Karaisini yaa unkamádan nan namuroí uantiyái sínu finté tiritin tiamiyá uno. ¹⁹ *Ma vara ráke anunu ma vain mai vetíi ayarafenui vákan mai yanasinta van mana iniyain ída ayave

inton kasaen namu avúavá bariyain mai kéká ano ínaimpáké umampin oferanten mino. ²⁰ *Máan tinten mifo Bafan Yisas Karaisi ma vain baru mai inarufái váká tetin má dere inaru fáke nanin bantan báké béi ma setin e siviran nain nan mi ave ukhé tiféuno. ²¹ *Mai ma minó daná esantan nain ákona fóké anan tetin turá ma váken uman timiyain bukhafa yo vaéan bei kakhakhein bukhafa an danten mino.

4

¹ *Máan tukhein nará mumunan tiyofi sífá tiváeyan noe, Bafantasá túpá uan ákona uron ono. Mai fara seyo séi ma siretimpin doriyá erunai nan aran mi vanái siretin onano van moéké tinunu iyá uno.

Porini Kípan Afova Vaya Ino

² Tinunu iyá umpo Yuodia má Sintiki masá ineno. Tiré kanan Bafan ninan baompo ída vá anan uantan maran iyáke manafin ná bano. ³ *Ten má ma manafin doriyaona ano má kan nanin aya ono van mi siamiyá uno. Mai fara vara seyo, vékan má anon tiyaen Tiyarafenui Kama Vaya siamiyáken Kareménin má mai ma siyaen doriyain kéká bá túpá uven ákona yorarí iyan mino. Máan tiyákan betin aví ano Aunan Baran Bompon Dókifin ban mino.

⁴ Minó damú Bafampin amusin iya vano van mi evaránáé tiamiyá umpo amusin ono. ⁵ *Minó avúavá ma variyaona ásin ná banasi ano oniyáken kusen ban avúavái variyan mino sen afová ino. Bafan inka ádé anantá erinten mifo afovasá ono.

⁶ *Minó dana san ída vá kokhon ineine iyáke Tiyarafenu ma mantein danasará tusu siyáke sireti ma o afasí inona yanasará béi vaipá amúkipó inan teno. ⁷ *Máan ma inte mae setisi ineine ano ma ída kanaíen afová oren daná má Tiyarafenui kusin manon Yisas Karaisimpin tetisi sú bá inin má maman túpá urantí bá tifanté uno.

* **3:10:** Rom 6:3-5; 8:17 * **3:12:** 1Ti 6:12, 19 * **3:14:** 1Ko 9:24 * **3:15:** 1Ko 2:6 * **3:17:** 1Ko 4:16
 * **3:19:** Rom 16:18 * **3:20:** Efe 2:6, 19 * **3:21:** 1Ko 15:28, 42-53 * **4:1:** 1Te 2:19-20 * **4:3:** Ruk 10:20
 * **4:5:** Ibu 10:25; Yem 5:8-9 * **4:6:** Mat 6:25-34; Kor 4:2 * **4:7:** Ais 26:3; Yon 14:27; Kor 3:15

⁸ Mumunan tiyofi sifá tiváeyan noe, sipá kípan baya siameno van muno. Mai ma fura sikhein avúavá bá inká ena ma avábá in má puntákein avúavá bá inká avusese ukhein avúavá bá kama uron ma ukhein avúavá bá inká ena ma esesí in má ma vain mairasá minó ei inin onan kaono. Kamaen ma funtákan nain danasinta vará maman kákan danasí ureya mai yanasará ineine ono. ⁹ *Mai ma siretí ankan téin tonen ná bariyáké inká inen ná tiameruna yanasinta ma afova vareona vá maman avúavápin ná kaúan one one vá ono. Máan ma esin maen ará ma kusiantan Tiya rafenu ano siretin má banten mino.

Firipai Nanin Bantai Amusin Danasinta Van Ma Pori Susu Siantein Baya Ino

¹⁰ Téi afová ukhéku siretí ankan evaráne séin tiya ono van iyan ná Bafan nan kákan timusin uantiyá umpo séin ma siya ono van iyaona afokhan ída vákayai ída siya iya ono. ¹¹ Manáa yana san o afasí ukhesa ma vaya siya rauno. Ída ino. Ten timaniná ma afoká é iyain daná afova ukhéi simusin má bariyaréi siyá uno. ¹² Ona van damu safi áa ona ída vantin para van damusá afoká é iyan nafi inká dunan manó simúkuntantirá bante rafu áa sirafan ná bante rafu mai máan damú kayo ma afoká é iyain afova suron ukhéi simusin má anan bá é iyá uno. ¹³ *Mai fara vara seyo, Yisas Karaisi ma simé iyain ákona fói mai yanasinta kanaí é baré iyá uno.

¹⁴ Máan té iyá umpo siretí ankan ma séin tiyaen ná ma mai umampin ma ofere-runu mai kama uron mi e ono. ¹⁵ *Téi ma ará é Tiya rafenui Kama Vaya siretin tiamidé ma Masedoniá bara me ampiré oréku mae siretí afová ukhen nan ída ena nanin banta ano siyaen mifo sireti Firipai nanin banta anon anan monípó tiyaena ino. ¹⁶ Inká kákan baru Tesaroniká dere ma váku mae kokhon dádá tiya ono van kokhon danasinta khaenan oriyaen mino. ¹⁷ Téi siretin pintena mana yaná barano vara siya raumpo sireti ma kama avúavá bariyaonará Tiya rafenu ano miyan amino van mi siamiyá uno. ¹⁸ Mai ma sen pinte mantaré eona yanasinta

esantare kokhon amusin mi Epafroditus-intá kaen nan baren erí oné uno. Mai avúavá anon íkun uan amin ma kama aunka ódikan Tiya rafenu ano amusin einí en mino. ¹⁹ Mai ma séin kamaen dafisiyain Tiya rafenu anon Yisas Karaisin pinte uaren mi sireti ma o afasí inona yanasinta mai ma vei kakhampin bíkakhein pinte aminten mino.

²⁰ Teti Sifóe Tiya rafenu avisá ena ena yamú maman daní ó tifano. Mai fura ino.

Pori Ma Vaya Kípiyan Amusin Baya Sein Mino

²¹ Yisas Karaisintá ma mumunan nanin banta ma maifá baonafin mi sesi susu vaya kaékun oren mino. Inká ten má ma mumunan tifá tiváeyan ma vain mano vetí amusin baya kain tireti vaonafá oren mino. ²² Yisasintá ma mumunan iyain nanin banta ano vetí amusin bayan kain oriyan inká Romú kamanimpin ma yoriyain monó kéká bá anon moéken betí amusin baya kain tireti vaonafá oren mino.

²³ Bafan Yisas Karaisini sarisari ano vá tiretí aunan má bano. Mai fura ino.

* 4:9: Rom 16:20 * 4:13: 2Ko 12:10 * 4:15: 2Ko 11:9

**PORI MA KOROSÍ NANIN
BANTA UVAMAN AMEIN
BOMPON MINO
(Korosi)
Korosi Vompon Ma
Uvanteí Pákenai Afova
Vaya Ino**

Ma vompon ma uvantein banta ino.
Baya varen orin banta Pori ino.

Uvarein orana ino.
AD sikisti-tu (62) fin mi Efesasí nanin banta vái vompon má Firimonini vompon má uváden mi manafin dan baren oren mino.

Ma vompon ma uvantein baru ino.
Romú barurá karavusií uran báken karavusi namun pintéi uvanten mino.

Ma vompon ma uvaman amikhein kéká ino.

Esiá barafin bain baru Korosaé ma vain monó nanin banta ma Efesasíke monó doran banta kéká ano ma o avían mantakhein kayofin nen ten iníyan mino. Korosaé barurá Pori ída oman monó dorarí ukhen ne sen onten mino.

Nái ana vará ma vompon uvanten nafino.

Korosí barurá Pori ída orikharen pasen avábá bá aronái in má bompon mi uvamádan orikhen mino. Kampun sакhanampa vanta kéká ano ma Yutan kayoi feyante avúavá bá inká Kiriki kékái avúavá bá ma maman manafiní iyain kéká amaan baya siamiyáken inká Tiyarafenu ano intesá uren ná ma vara uvaren ná inká Tiyarafenun má ará manafiní e váke vá inká ákono e vá amúkono ma siyain mano Karaisini ovaránen erin maman titosí iyain nan mi sian amá ukhen mino. Máan ma ein manon Yisasi iyé ban nafi mai ven nan tian amá iyáken inká ena anampin ma fura kama veya

varen orin banta uno sen Pori veyan nan tian amá ukhen mino.

Porini Susu Vaya Ino

¹ Yisas Karaisini veya varen orin bantaí ino siren ma Tiyarafenu ano vei anunurá ma aní ukhein banta séi Porin má inká teti sífá tiváe Timotin má anon ma vompon uvaman, ² Korosí barurá ma vákeya ma Tiyarafenurá monó tiyaona nanin bantan ameruna seti Sífóe Tiyarafenui sarisari vá ará kusin má ano siretin má banten mino.

Porini Amúkin Má Inká Tiyarafenun Ma Susu Siantan Má Baya Ino

³ *Ena ena yamú ma siretin nan timúkiyá maé tetisi Bafan Yisas Karaisin Afóe Tiyarafenui susu sianté iyá uno. ⁴ Mai fara vara seyo, Yisas Karaisintá ma mumunan iyákeya ma Tiyarafenui vanasi ma avábá uantiyaona van mi setí ankan iniré uno. ⁵ *Mai fara va máan tiya vaono. Tiyarafenu ano ma kama yaná inarufá iyáantádan ma vain mai fura vayan iniyákeya mairái Yisas Karaisintá mumunan iyai veni vanasi ará amiya ono. ⁶ Tiretí ankan ma ineona mai kama veya ano inka minó akhempá orera iyan maen inká mai ma siretin ará baéda ma Tiyarafenui fura yaná bá ume nanin banta ma sarisari in má ma afová eonaí en mi minó akhen páke nanin banta ará baédan mi mumunan iyan mino.

⁷ *Teti ma sinunu iyaruna sífá tiváe Epafrasi ano ma ma kama veya siamein mai véi maen Karaisintá mumunan iyain doran bantan báken tetin má manafin doriyain mi van tetin too varen mai yorarién mino. ⁸ Ena nanin banta van ma anunuin avúavá ma Kantá Aunan mano siretin amikha ma mai avúavá ma ena kéká aní iyaona van mi véi setin tisimen mino.

⁹ *Máan tukhein nan mi siretí ankani veya ma ineruna yamú kákéi siretí ankan aya urantiya moékentá béin afová iyasin Kantá Aunan mano kama ineine vá afova vá amino van Tiyarafenun timúkuan amiyá tiféuno. ¹⁰ Máan tiyá tiféku mae siretí ankan mano Bafani vanasi ano ma funtákein aasá ma oriyaíní esin mai

* 1:3: Efe 1:15-16 * 1:5: Efe 1:13; 1Pi 1:4 * 1:7: Kor 4:12; Frm 23 * 1:9: Efe 1:16-17

van tiretin moéken anunu ino van muno. Máan intin tiretini ara ara yorani nan aran kamaen afoká inten mino. Máan esin Tiyarafenui afova ano mo kákaní inten mino.

11 *Máan tiyantín Tiyarafenu ano vei moékan ákonafó tiretí ankan ákona amintiya mantaan ákona uve ara ara uman bare oriya mae mai uman kayo ma kípan nain damu san bempáké báké ave in nono. Máan tukhare maeya amusin mái

12 *Afóen tusu siantan nono. Mai ma Tiyarafenui kakhantá báken ma kantasí ukhein nanin banta ma ameno van Tiyarafenu ano ma iyáantan bain danasinta van mai širetin mái varan nono sikhen mino. 13 *Mai fara vara seyo, fefá kákan títipa aránaói varé é tifékun mi véi mai finte o siviren meren mi mai ma véi moéken anunu ukhein iyamponi yafisin aúpin kaí bá tiféuno. 14 *Máan turen Tiyarafenu ano veni narefóí ume fintena setin miyaní uren evaránen tivíden ume ampisintáken mino.

Yisas Karaisini Kákan Bí Pákena Ma Pori Sikhein Baya Ino

15 *Teti ankan ída kanaí é Tiyarafenu oná tifanté umpo ven Anin Yisasi ano anan ben má manaí ukhen maen beni esé iyampon báken béi anan Tiyarafenu ano ma uvantein danasintará o ánoní ukhen mino. 16 Mai fara vara seyo, Tiyarafenu ano Karaisin pintéi uaren mi inarufá ma vain danasinta vá inká ma varará ma vain danasinta vá uvanten mino. Mai ma yákó bain danasinta vá aúpa ma vain danasinta vá ara ara ákona vain enisori kayo vá inká ákona Aunan kayo vá ákona yaná kayo vá ma ma varará bain mai ven ninaen tiren uvádákan mi véi yafíken mino. 17 *Minó daná ída afoká ukhan maen béi fefá baréin pasen mai yanasinta ano véintái o súpá ukhen mino.

18 *Máan tukhein nan mi véin mumunan nanin bantai ánon bákan mai nanin banta ano ventá o súpá uven mana vukhafái ukhen mino. Béi anon purin pinté an uanten orun mantaven minó danáká o

ánoní uven mai yanasintará dafíken mino.

19 *Mai fara vara seyo, Tiyarafenu ano Yisasimpin bano van amusin uaren mi véimpin e víkakhen mino. 20 *Bikavin inarufá ma vain danasinta vá barará ma vain má ano Yisasin má manafin kasen bano van mi véin tiantan daa unkamádantá dorun puren mino. Púbin beni nare ma vanaein manon ben ma namuroí uantiyá é tiferuna kéká bá manafin kasen ban avúavá maman dákó en mino.

21 *Pefá Tiyarafenu ádé ída vákei siretíi ineinefin béin namuroí uantiyákeya namu ineine iyaya namu avúavasí iyare ono.

22 *Máan tiyare ompo Yisas Karaisi ma yaa unkamádantá e furein manon mai ma Tiyarafenu vá ma namuroí iyá eona maman manafin kasen ban avúavá dákó en mino. Béi ma máan tein manon tiretí ankan maman kantasí uren mi aviren Tiyarafenu avorá morantiya o mantan nono. 23 Máan tukhein nará mantaan ákona uve vá pura yanákasá mumunan iya vano. Máan tiyaré esin mana yaná ano e yarifaádantiya mai ma inire ma mumunan iyá eona kama vava me ampinona van muno. Minó akhempá ena kéká ano kama vava siamiyákan mai yorari ino van Tiyarafenu anon téi Porin aní ukhen mino.

Pori Ma Monó Nanin Bantai Yorari Iyain Baya Ino

24 Tiretí ankan ma aya iyáké uman bariyaruna van timusin mi iyá uno. Para vara seyo, Yisas Karaisin aui monó nanin banta vákan mi vetin naro siren ma Yisasi uman baren mo áin ma fara vain uman aya uan kípantó uno. 25 *Tiyarafenu anon téin aní uren tivían kaí monó nanin bantai yoran banta váké aya iyá uno. Máan turen mi sireti ena anan nanin bantafin minó beni vava máa sian dákó ino siren mai yoran timikhen mino. 26 *Tiyarafenu ano fefái ma vava aúpa kain ban eriyen baren mifo saréan kantasí ukhein nanin banta avorái véi sian dákó en mino. 27 Para vara seyo, Tiyarafenu ano vei anunurái mai ma aúpa kain baré ein bayan bei vanasi avorá tian dákó uran mi mai vava

* 1:11: Efe 1:19; 3:16 * 1:12: Efe 1:11, 18 * 1:13: Ruk 22:53; Efe 2:2 * 1:14: Efe 1:7 * 1:15: Yon 1:18; 2Ko 4:4 * 1:17: Yon 1:1; 8:58 * 1:18: Apo 26:23; Efe 1:22-23; Rev 1:5 * 1:19: Kor 2:9 * 1:20: Efe 1:10 * 1:21: Rom 5:10; Efe 2:12 * 1:22: Rom 5:10; Efe 5:27 * 1:25: Efe 3:2, 7-8 * 1:26: Rom 16:25-26; Efe 3:5, 9

ano ena anan nanin banta ma mumunan iyain kayo aya iyan mino. Mai aúpá baya maen Yisasi ano siretimpin bantiya ventá mumunan iyá esin e aviren morantiya vei kakhampin o vasin kama yanasinta amintiya varan nono.

²⁸ Máan tukhein nan mi seti ma oreruna akhempá Karaisini kama vayan minó nanin bantan tiamiyá uno. Tiyarafenu ano ma simein ineine vá afova vá ánain dakhaféi ákona vayafó tiamiyá uno. Mai fara vauno funtákein nanin banta máa ana aviré Tiyarafenu mo ameno van muno. ²⁹ *Máan tukhein nan mi Yisas Karaisi ano ma simiyain ákona fói kákan dorarí iyá uno.

2

Yisas Karaisin Pin Ma Minó Kama Yanasinta Vá Kama Afova Vá Bain Baya Ino

¹ Siretin má Raodisiá barurá bá ma mumunan nanin banta vain má inká téin ma ída sontein kéká bá ma aya ono van ma ákona yorarí iyaruna van afová ono van mi séi inikhé uno. ² Téi ma mai yorarí iyaruna ana maen mai siretí ankan ará ákona uantékuya Tiyarafenui vanasi ará amire manafin kase vano van muno. Máan téku kama ineine varesin mai ano siretí ankani mumunan ákona uantantiya Tiyarafenui aúpá baya afová ono van muno. Mai aúpá bayai ana Yisas Karaisi ino. ³ *Moní kain namun ma moní bíkakhen bain an mi yen ara ara afova vá aúpá ineine vá ano Yisas Karaisimpin bíkakhen ban mino.

⁴ *Manáa vanta ano ase vayafó tiretí ankan mákáden aviran nan mi ma vaya siamiyá uno. ⁵ *Para vara seyo, séi ída siretí ankan má bá umpo se sú bá ineine vá ano siretin má ban mino. Tireti ma funtáke váke ma Yisas Karaisintá ákonæe mumunan iyaona vaya ma iniré timusin é uno.

Yisasin Má Tupá Uven Ma Kusin Má Para Van Oriyan Ban Aunan Má Baran Baya Ino

⁶ Yisas Karaisin inka maman ei Bafaní ukha ompo ventá o súpá uve vá béin oo

yaiya vano. ⁷ *Daa ana ano ma varafin arú dan aravuvin ma mantaan ákona uven anu orun darifaren ma ampameiní eya va Yisasintá o súpá uan ákona uve vá mai ma siamé tiferuna vaya kayorá ákona e mumunan iyáke vá Tiyarafenu moéke susu siantano.

⁸ Manáa vanta kéká ano eriven maen kampun baya vá beni ana ída vain baya vápó me mákádantiya vetin dakhafin nompo yafían ná ákona ono. Máan banta kayo ano vetí anafu aráoni ineine vá namu aunan kayo ma ayompin báken ma ma vara yafíkein kéká báí ineine ánain manan dakhafiyán mifo Karaisini ineine ánain ída yakhafiyán mino.

⁹ *Mai fara vara seyo, Yisas Karaisi ma varará bukhafa mamaren ma setin tan davin maen Tiyarafenui Aunan mano véimpin e víken mino. ¹⁰ *E víkavin namu aunan kayoi ákona yanasintará béi o ánoní ukhein pase véimpin ma o asótú uvesin maen Tiyarafenui Aunan mano véin pinté uaren tiretimpin e víkanten mino.

¹¹ *Tiretí ankan ma ventá o súpá eona anon puraseya au ma khaveiní ukha ono. Mai maen dante vukhafarasa ifo aú bukhafará ino. Yisas Karaisi ano ve avúavápói ume vukhafa yo síkaan karúdera va ompo varará banta ano va máan tura va vaono. Ída ino. ¹² *Mai ma monó non pereona anon Yisas Karaisin má ma masí einí ukhareyan inká mai ma Tiyarafenu ano ma Yisasin Karaisin orun avían mantein ákonará ma mumunan eona anon Karaisin má evaráne orun mantakha ono.

¹³ *Namu avúavápin pefá bákeyai feyante anunu ánain bákuriyan nan mai avúavá ano siretin aruan púkaren mifo Tiyarafenu anon tiretin avían Yisas Karaisintá túpá uren mi furin pintena evaránen avían manten mino. Máan turen mi setisi ume yo arútinten mino. ¹⁴ *Man baya ano setin kótisintáden maen tetinti ume maman dákó urái man baya aránaópá baré é tifékun mi Tiyarafenu ano mai ma kó tisintiyá ein baya minó

* **1:29:** Efe 3:7, 20; Fir 4:13 * **2:3:** 1Ko 1:24, 30 * **2:4:** Rom 16:18 * **2:5:** 1Ko 5:3 * **2:7:** Efe 3:17
* **2:9:** Yon 1:14, 16 * **2:10:** Efe 1:21-22 * **2:11:** Rom 2:29 * **2:12:** Rom 6:4 * **2:13:** Efe 2:1, 4-5 * **2:14:** Efe 2:14-16; 1Pi 2:24

do maman karúdaren man bayai ákona máden asuse uren Yisas Karaisini yaa unkamádantá mo khauren aríkan kípakhen mino. ¹⁵ Máan ma ein manon namu aunan kayoi ákona maman bararasí uren kípaanten mino. Yisas Karaisini yaa unkamádantá ma Tiyaarafenu ano vei ákona aní ein manon betin maman bara finí uren mi vanasi avorá ayave amikhen mino.

Tireti Ma Yisas Karaisin Má Púkeona Vaya Ino

¹⁶ *Máan tukhein nan mi siretí ankan ída vá áesin ná tinafu siráoni man bayafin ma yunan má non má ma nan na fi áa avíkan damú kayo ma ída yafisin nara fi áa auyen biyon ma me khain damú ma amusin in nara fi áa Sabati yamusara fi ma are ukhan nain póké mana vanta ano siretin daimino. ¹⁷ *Para vara seyo, mai man baya kayo ano ináimpá ma yáko inain daná amamanon mi varé íkan Yisas Karaisi anon pura sen mai yaná ban mino. ¹⁸ Barará bantai ineine ánain ma yakhafiyain banta kéká ída vá áesin ná tiretí ineine máden asuse uren ná kama miyan baran aa yasirano. Inká tetí ankan kain onté umpo enisori kayo rasá monó tiyaya mumunan ono ma sin nain banta kéká ída vá áesin ná tiretí ineine máden asuse ino. Máan banta kayo ano vetiyan manan minó afova manté uno siren be aví daní é iyan mino. ¹⁹ *Máan té iyan mifo setisi ánon Yisas Karaisi ma vain má ída o asótú ukhen mino. Para vara seyo, setí ankan béimpin mi o asotú uvé tifékun mi vei minó bukhafafin béi yunan amiran maen ákona varé iyan mino. Tiyaarafenu fintena anan ákona mamaréi mumunampin inoré iyá tiféuno.

²⁰ *Tiretí ankan pefái Yisas Karaisin má púare orun mantaven nan mi véi ano siretin maman auyení ukhen mifo fara é tiré ma vara ráke vantai man baya ano ma máa sikhein ánain bákuriyá ba rafono. ²¹ “Ída vá maifó dorarí ono, ída vá nano, ída vá aruvono ma sikhein man baya kayo van mi siyá uno.” ²² *Máan man baya kayo

ma vain mai varará bantai ineinen báken mai vayafó ma yorarí ure nan maen ainen o kípé iyan mino. ²³ Mai man baya kayo ano ará mantarantiya ákona e monó tiyáke kama ineine vá afova vái monópin bare sire maeya e amo sire yunan auriya moéke monó tiyáke mumunan inono. Máan tin nompo mai man baya ánain ma yakhafin mano ída umefin ma orin aasá iyaranten mino.

3

Kantasí Ma Ukhen Ban Man Baya Ino

¹ *Tiyaarafenu ano Yisas Karaisin má inka orun avían mantara va ompo inaru fáke yanasintará ana vá kakhábe orono. Para vara seyo, mai varurái Yisasi ano vei kin karáká Tiyaarafenui ayan kurompá kumanten mino. ² *Inaru fáke yana san mana vá ineine iyáke ída vá ma vara ráke yanasintará inin kaono. ³ Mai fara vara seyo, Yisasin mái siretí ankan púben nan ben mái siretí aunan mano Tiyaarafenufin aúpá ban mino. ⁴ Yisasi maen tiretí ankani aunan mi vain Tiyaarafenui ákona kakhan má ma e unen dákó inain damúi siretin má dere yáko inono.

Tiretí Aúpin Ma Vain Namu Avúavasá Aruan Purono

⁵ *Máan tukhein nará ma vara ráke avúavá ma siretí ankan aúpin bain ná aruan purono. Kampun ayarafenu rá ma monó té iyaona mai famúku avúavá safi fain avúavá safi ará manta avúavá safi namu avúavá safi inká ena ina yana san ma aranan avúavá safin ban mino. ⁶ Mai fara vara seyo, Tiyaarafenui aran naná ano mai avúavá ma variyain nanin banta amaninái erinten mino. ⁷ Pefá tiretin má deren mai ma namu avúavá bariyain kéká bá avunté uveya mai avúavá bariyare ono. ⁸ *Máan tiya ompo mai ma aranan uren ma ena ará namu uantáden ma oyampá baya sin avúavá bá inká namu vaya ma sin avúavá bá ina vá taréa ifasá tifano. ⁹ *Tiretí ankan ída vá kampun bayafó monó nanin banta van e sian more mere

* 2:16: Rom 14:1-13 * 2:17: Ibu 8:5 * 2:19: Efe 2:21; 4:16 * 2:20: Kar 4:3, 9; 1Ti 4:3 * 2:22: Mat 15:9
 * 3:1: Mak 12:36; 16:19; Efe 1:20 * 3:2: Mat 6:33 * 3:5: Rom 6:6, 11; Efe 4:19; 5:3-6 * 3:8: Efe 4:25-29;
 5:4 * 3:9: Efe 4:22, 25 * 3:10: Efe 4:24

ono. Mai fara vara seyo, fefái mai avúava sinta me ampikha rono. ¹⁰ *Peyante avúavá inka me ampireya auyení ukha rono. Tiyarafenu ano siretí ankan maman auyení uren ena ena yamú kama afova kayon amiyákayai véin má manaí ukha rono. ¹¹ *Máan tukháí auyení ma ukhé tiferuna nanin banta ano manaí ukhé tiféuno. Maifin ída Kriki vanta fi Yutan banta fi au khakhein nafi ída au khakhein nafi áa ena vaya siyain nafi áa ena vara fáke vanta fi áa miyan ída van doran banta fi inká para van banta fi van mino. Mai fara vara seyo, Yisasi veyáká anan báken minó nanin bantafin ban mino.

Ena Ma Avábá In Baya Ino

¹² *Tiyarafenu ano sireti maman kantasi uren tesina e siren anunu ukhen mino. Máan tukhein nará ma avúava sinta vá bararo. Ena nanin banta van arunan uantáde kama iyáke vá inká ará bararasí ureya vempáké kama e kuse vá bano. ¹³ *Bempáké manafin bákeya vá ben ma ará namu uantan maran ma ukhá inona vasá tirun noe sin maran iyáke vá inká tiretin ma namu uantákáin naini ume vá ampiantano. Bafan mano ma siretíi ume ampiantákeini éya vá ena nanin bantai ume ampiantano. ¹⁴ *Máan tiyáke mae ena nanin banta vá avábá ono. Para vara seyo, ena ma avábá in manon ara ara avúavá esantakhen mai anon minó nanin banta o fáke e fáke uádan manafin ban mino. ¹⁵ *Yisasin pinté ma eriyain ará kusin ná áesin tiretin auká dafisino. Tiyarafenu ano ma siretin araren ma ará kusin amira ma mana vukhafái ukhaona vará ena ena yamusá tusu siantano.

¹⁶ *Yisas Karaisini vaya vá áesin tiretí ankampin moéken báken ná mai ano siretin kama ineine amintiya vá ben ayain maran iyáke afova amin maran ná ono. Máan tiyákeya siretí ankan aukáke sá Tiyarafenu tusu siantiya vá í bompon pinta í bá monó í bá inká Aunan mano ma amiyain í basá dano. ¹⁷ *Máan tiyáke ara

ara yorariín po safi áa vayafó safi ma varanona mai Bafan Yisasin avikasá barano. Máan tiyaya ven avikasá Tiyarafenu tusu siantano.

Monópin Ma Vain Nanin Bantai Man Baya Ino

¹⁸ *Anasi kéka soe, siretí avafuná aránaópasá baro. Mai avúavái Bafan avorá puntáken mino. ¹⁹ *Inká banta kéka soe, siretí aná ona vara anunu iyákeya ída vá betí ankan ará namu uantano.

²⁰ *Iyamporinta oe, anóe afóe ma sin nain baya ánain ná dakhaforo. Para vara seyo, mai avúavá anon Bafan amusin amé iyan mino.

²¹ *Tireti afóeyan noe, ída vá iyamporinta arápiní esin ná anan maran ino. Máan tesin maen kaumpan uren kama avúavá ampinten mino.

²² *Tireti miyan ída van doran banta kayo oe, funtáde vá ei ayafa ano ma sin nain baya ánain mana vá dakhafono. Ída vá tino sino van muno sireya véin avorá ana kama yorari iyákeya Bafan nan periya vá dorarií ono. ²³ Intéa yoran ná dorante fo mai Bafani yoran mi yoriyá umpo ída varará bantai yoran doriyá uno seya ovare me iniyáke amusin masá dorano. ²⁴ Tiretí ankan afovasá ono. Bafan mano fefái siretíi miyan útaren iyáantan ban mino. Mai ma yoriyaona yoran kayoi ayafa maen mai Bafan Yisasi ino. ²⁵ *Máan tukhein nan mi mana vanta ano ma aauí uranten maen mai miyan beyan mi varanten mifo aronará ma áuantiyain avúavá ída Bafampin ban mino.

4

¹ *Tireti ayafa kéka soe, siretíi miyan ída van doran banta kayo rasá kama yafisirí ono. Para vara seyo, siretí ankan afová ukhe nan tiretíi Kákan inarufái van mino.

Amúkí Pákena Van Ma Sikhein Baya Ino

² *Tiretí ankan ma amúkono van inten mae yafian ákona ukhe vá tusu siyáke vá amúkono. ³ *Amú ma khiyáke setin nan

* **3:11:** Kar 3:28 * **3:12:** 1Pi 2:9 * **3:13:** Efe 4:2, 32 * **3:14:** Rom 13:8-10 * **3:15:** 1Ko 12:27; Efe 4:4; Fir 4:7 * **3:16:** Efe 5:19 * **3:17:** 1Ko 10:31; Efe 5:20 * **3:18:** Efe 5:22 * **3:19:** Efe 5:25 * **3:20:** Efe 6:1 * **3:21:** Efe 6:4 * **3:22:** Efe 6:5-8 * **3:25:** Rom 2:11 * **4:1:** Efe 6:9 * **4:2:** Efe 6:18; Fir 4:6 * **4:3:** Rom 15:30; Efe 6:19

ída vá áun nono. Amúkuan Tiyarafenu amesin ná aaí usintantirá mai ma kama vava ma aúpá baini ana sian dákó ono. Mai ma aúpá bain baya mai Yisas Karaisin báká mai vava ma sian dákó eruna van mi karavusií urá bá uno. ⁴ Téi nan puntáden kama vava sian dákó ino van muno sireya vá Tiyarafenu amúkuan ameno. ⁵ *Ída ma monópin bain nanin banta aúban ma nókeya kama inin má ana vá noya vetin ayaesin ná Yisasintá mumunan ino. ⁶ *Ena ena yamú ma vava sinonafin ase vain kama vava ana siyá esin ma ena kéká ano ma éin má bayaí inti mae anona funtákein baya siamin nono.

Pori Ma Kípan Baya Sein Mino

⁷ *Téi ma yoriyaruna fákena vava Tikikasi anon tiaminten mino. Béi maen tetin tifá tiváen báken Bafanin ákona yoran bantan ban mi setin má manafin doriyan mino. ⁸ *Máan tiyain mi vái siretin ará ákona uantiyan inká teti intesá é barafu mai vava kayo vá dere siamino van mi véin tiantékun oren mino. ⁹ *Tiretin pinte vanta Onesimasi maen mumunan tifá tiváen bain Tikikusin má tiantékun oren maen intéa yanasá dákó iyan nafi mai vava mo siamintiya afová inono.

¹⁰ *Aristakusi ma sen má karavusiífin bain banta ano vei amusin baya yákan inká Banabasin afóna Maki yere amusin baya siáden mino. Makin ma sireti vaonafá orintin ma kama ure aviran nona vava fefái siretin tiamikhé uno. ¹¹ Yisasin nan ma Yastasin ne siyain banta ano yere amusin baya sen mino. Yutan kayo finté mai kéká ano anan ten má báken doriyá timusin iyá Tiyarafenui yafisin nan tian dákó iyá tiféuno.

¹² *Tiretíi varu ráke vanta Epafarasi maen Yisas Karaisini yoran bantan báken béi yeren amusin baya yan oren mino. Tiyarafenu ano siretin aya intiya mantaan ákona uveya veni anunu afová ure maifin karakhe vano van mi véi ena ena yamú amúkuantiyan ban mino. ¹³ Beni yoran

afová ukhé paséi ma vava sian dákó iyá uno. Tiretin má Raodisiá baru ráke kéká bá inká Ieraporisi varu ráke kéká bá aya ono van mi ákona yorarií iyan mino.

¹⁴ Ayofan banta ma minó ano simusin iyá tiferuna vanta Rukun má inká Demasin má ano yere amusin baya yan oren mino. ¹⁵ Tenti simusin baya vá Raodisiá baru rákena mumunan tiyofi sifá tiváeyan má inká Nimfan má ben amá ma o átaru uven monó tiyain mumunan kéká basá tiameno.

¹⁶ Tiretíi ankan ma ma vompon dankádeya ma inirante mae Raodisiáke nanin banta amesin ná betíyan dere yankáden iniyanti vá inká betin ma amenuna vompon ná tireti yere yankáde ineno.

¹⁷ *Máan tiyáke vá inká Akipusin tiamesin ná Bafan mano ma amikhein doran ná dafian ákona uven ná dóan kípano.

¹⁸ *Téi Pori ano seyantái ma vompon uvaman tiretíi ankan amé uno. Téi karavusiífin pa vákéi ma vompon uvaré umpo vá téin nará inisintaro.

Tiyarafenui sarisari ano siretin má banten mino.

* **4:5:** Efe 5:15-16 * **4:6:** Efe 4:29; 1Pi 3:15 * **4:7:** Efe 6:21 * **4:8:** Efe 6:22 * **4:9:** Frm 10-12 * **4:10:** Apo 12:12; 13:13; 15:37-39; 2Ti 4:11 * **4:12:** Kor 1:7; Frm 23-24 * **4:17:** Frm 2 * **4:18:** 1Ko 16:21

**PORI MA ESÉ ARAÍEN
TESARONIKÁ NANIN
BANTA MA UVAMAN
AMEIN BOMPON MINO
(1 Tesaronika)**

**Tesaronikai Esé Bompon
Ma Uvanteí Pákenai
Afova Vaya Ino**

*Ma vompon ma uvantein banta ino.
Baya varen orin banta Pori ino.*

*Uvarein orana ino.
AD fifti-uvani (51) fin nafi áa fifti-tu (52)
fin nafin uvanten mino. Mai maen
Pori ma kan dádasí en ma monó do-
raríen eúkein pimpá ino.*

*Ma vompon ma uvantein baru ino.
Koriní barurá ma mana orana ifo afápá
mana un kádan biyontá ma váken
mino. (Aposeri 18:11 fin ná onano).*

*Ma vompon ma uvaman amikhein kéká
ino.
Kan dádasí en ma Pori monó doraríen
eúkiyáken Tesaroniká orin ma Kiriki
nanin banta ano ará baéden ma monó
tiyá ein kékái uvaman amikhen mino.
(Aposeri 17:1-9).*

*Nái ana vará ma vompon uvanten
nafino.*

Pori iníkan Tesaroniká nanin banta
ano Yisasini kama vaya mo oyan
amiyaimpin betin ayaen ákona uan-
tano siren Timotin tiantan orikharen
ma Masedoniá bara fáké ma ovaránen
Koriní eriven ma amusin baya me
siamin ma iniren mai van mi esé bom-
pon uvaren mino. Inká 1 Tesaron-
aika vá 2 Tesaronika va san máan
mi sen iniyán mino. Ma vara kípán
akhempá ma yákó inain danasinta vá
inká Yisasin ma ovaránen erin nain
ma san ma Kiriki kayoi vompon mano
ma sikhá ein mi sian amá ukhen
mino.

*Pori Ma Tesaroniká Nanin Banta
Amusin Uantein Baya Ino*

¹ *Téi Porin má Sairasin nú Timotin nú
bái ma vompon uvaman Tesaroniká kákan
barurá ma monó nanin banta váke ma
Sifóe Tiyarafenu vá Bafan Yisas Karaisini
mái kékasí ma ukhaonan uvaman amé
uno.

Tiyarafenui sarisari vá ará kusin má
ano siretin masá bano.

*Tesaroniká Nanin Bantai Yoran Nan Ma
Pori Amusin Uantein Baya Ino*

² Ena ena yamú tiretí ankan nan
ovaré me iniyáke Tiyarafenu susu sianté
timúkuan amiyá tiféuno. ³ *Máan tiyáké
tiretí ankan ma Yisasintá mumunan
iyáke ma yoriyaona vá ena nanin banta
ará amire ma ayae yoriyáke ma inká
tetisi Bafan Yisas Karaisin nan ovaránen
erinten mino siren ma ákona inin kauráke
ma kama yorará iyaona van mi ovaré me
iniré teti Sifóe Tiyarafenun timúkimpó
tiamiyá tiféuno.

⁴ Mumunan tiyofi sifá tiváeyan noe, Ti-
yarafenu ano siretin nan anunu uren be
ina e sen aní ukhá tetí ankan afová ukhé
uno. ⁵ *Mai fara vara seyo, Yisasini Kama
Vaya ma varé eré tiferuna mai vayafó ana
va siamé tife raumpo Kantá Aunani ákona
fóké bá ino. Mai vaya van tetí ankan
puran tinon té afová ukhé uno. Inká teti
ma siretí ankan má bákuya setin tivútivá
inka sonten nan mai ano yere maman
puraí ukhen mino. ⁶ *Mai ma Tiyarafenui
kama vaya ma vareona mai kokhon uman
mái vare ompo Kantá Aunan manon ákona
amíkaya veni amusin mái vare ono. Mai
anon tetin tivútivá bá Bafani avúavá bá
maman manaí eono. ⁷ Máan ma eona
anon Masedoniá barafa safi inká Akaiá
barafa safi ma váken Yisas Karaisintá mu-
munan iyain nanin bantan aní uante ono.
⁸ Mai siretí ankan ma Bafani vaya sian
dákó eona anon ída Masedoniá bá Akaiá
bara vápin mana ufen ma aseín an den
oren mifo minó akhempái oreraen mino.
Mai fara vara seyo, inte akhempasá oriya
rafu mai sireti ma Tiyarafenurá mumu-
nan iyaona vaya anan tiyá iniyá tiferuna
ída evaráné betin tiamiyá bá tifanté uno.

* 1:1: Apo 17:1-9 * 1:3: 1Ko 13:13; Kor 1:4-6 * 1:5: 1Ko 2:4-5 * 1:6: Apo 17:5-9

⁹ Mai fara vara seyo, vetí ankan baípa ma oréku ma séin kama ureya sivireona avúava san betiyantá tian dákó iyáken mai ma varará ayarafenu kayo ma me ampire ará baéde fura sen para van oriyan ban Tiyarafenurá ma mumunan iyaona vaya vá dere siyá iné uno. ¹⁰ Tiyarafenu ano ma ve Anin Yisasin ma furin pintena orun avían mantakhein ma inaru fáké ovaránen erin nain nan ma ave ukhaona van deren tiyá iné uno. Tiyarafenu ano ma ma vara kípan nain damú ma vei aran naná ma vanasi amaniná kain nain pintena Yisasi ano siya é iyan mino.

2

Pori Ma Tesaroniká Barafá Monó Dorarí Ein Baya Ino

¹ Mumunan tiyofi sifá tiváeyan noe, seti ma siretí ankan má o váké doriyá eruna yoran ída fara savifá o afeyóka siretiyantá afová ukha ono. ² *Tireti vaonafá ínaimpáké oronté maé Firipaí barurá orékun ma mai ráke nanin banta ano ma setin tiren tisen iyaré ein baya siretí ankan afová ukha ono. Tiretí ankan Tiyarafenui Kama Vaya siamiyákun ara ara aa fáké uman eriyaren mifo Tiyarafenu ano ákona simiyáká ída feranton kasaé beni veya siamiyaré uno. ³ Máan tukhanti afovasá ono. Namu ineinefó tiretin ída mákádé kampun baya kayo siamiyá uno.

⁴ *Mai fara vara seyo, Tiyarafenu anon tetin nan bei Kama Vaya fura sen banasi siaminten ne siren mai yoran timikhái yoriyá tiféuno. Béin tetisi ineine yaimiyain mi vái véin amusin ameno van doriyá umpo ma varará nanin banta va amusin ameno vara yoriyá tife rauno. Ída ino. ⁵ Tiretí ankan afová ukhená Tiyarafenu avorá pura vayan tiamiyá uno. Tiretin kampun tirékuya setisi vayará anunu uareya manáa yaná timeno vara siretin kampun tiantiya rauno. Ída ino. ⁶ Tiretí ankan nafa áa ena kéká ano fi ída kákan bí timeno van mai yoran doriyá tiféuno. ⁷ Yisas Karaisini aposeri*

kékái váké tireti vaonafá manáa yanasinta varano van kasaé inanten nunaren mifo anóe ano ma arará iyampon nan kuvein an déi siretí ankantá kamaé dafisé uno. ⁸ Tiretí ankan nan moeké tinunu uré paséi Tiyarafenui Kama Vaya ana va siame raumpo setisi minó danasinta vái amé tiféuno.

⁹ *Mumunan tiyofi sifá tiváeyan noe, setí ankan ma manáa yana san ékun ma siyain uman ída varano van mi inuran má bayan má miyan baran dorarí iyá uno. Máan tiyái Tiyarafenui Kama Vaya ma siretin tiamé iyaruna van ídá ovaré me iné iya rafono. ¹⁰ Tiretí ankan má Tiyarafenu vá ano afová ukhen ná pura sen puntáken ma kantasí ukhein avúavápoi mumunan ma iyaona nanin banta avorá doré iyá tiféuno.

¹¹ *Para vara seyo, siretí ankan purase afová ukhen ná afóe ano ma ve akhafanará kama yafisirí iyainí éi sireti mana manará kamaé dafisé iyá tiféuno. ¹² Kama veya fókéi siretin ará ákona uantádéi Tiyarafenu avorasá kama e vasin onano siré tiamé iyá tiféuno. Beni khakhan ákona mamareya vei yafisin aúpin ben má ba oriya vano van ariyan mino.

Pori Ma Tesaroniká Nanin Bantai Mumunan Nan Ma Susu Siantein Baya Ino

¹³ *Inká beni veya ma siretin tiaméku mae ma vara ráke vantai veya va siyan naifo Tiyarafenui Vaya inon tireyan kama e iniyanái ena ena véin tusu sian tiyá tiféuno. Mai veya ma kama e inireya mumunan eona kékápin mi ákonaen doriyan mino.

¹⁴ *Máan tiyan mifo mumunan tiyofi sifá tiváeyan noe, Yudiá barafá ma Tiyarafenui vanasi ano Yisas Karaisintá mumunan ein nan ma Yutan kéká ano uman amiyaré einí ukhein uman manan tiretí kéká ano amikhen mino.

¹⁵ *Manáa Yutan kéká anoi vetíi sakhanampa vanta kayo vá Bafan Yisasin má aruan púkaren mi saréa setin má dere sirono van mi yakhafiyain mino. Máan tiyáken minó nanin bantan namuroí uantiyákan Tiyarafenu ano ída amusin

* **2:2:** Apo 16:19-24; 17:1-9 * **2:4:** Kar 1:10 * **2:7:** Aposeri maen Tiyarafenui veya varen orin banta ino.

* **2:9:** Apo 20:34 * **2:11:** Apo 20:31 * **2:13:** 2Te 2:13 * **2:14:** Apo 17:5 * **2:15:** Apo 9:23, 29; 13:45, 50; 14:2, 5, 19

iyán mino. ¹⁶ Mai fara va ino. Tiyarafenu ano ena anan nanin banta evaránen aviran nain nan péden beni Kama Vaya ma siamiyaruna aa iyariyan mino. Máan ma iyain avúavá anon betii ume maman mími doní iyáin mi Tiyarafenui aran naná ano vetin amaniná inaimpáké dákó en mino.

Timoti Ma Tesaroniká Doriyain Nan Ma Pori O Onano Van Ein Baya Ino

¹⁷ Máan tukhen mifo mumunan tiyofi sífá tiváeyan noe, siretimpin ma vain Yutan kayo finté manáa ano setin tirono van íká mai anarái sító máará tiretin me ampirákéi ovaráné e onano van túkáké kákan ineine iyáké aa van dosiyá tiféuno. ¹⁸ Mai fara vara seyo, seti ankan tiretin o onano siré teyantá ara ara aa van dosiyákun mifo Ban Anon mano setisi aa iyaré iyan mino. ¹⁹ *Máan té iyan mifo Bafan Yisasi ma erin nain damú náinasá baré intí béin mo aní é tifékun ná tetisi yoran nan amusin uren miyan timinten nafino. Ída ifo siretíi vaona Bafan Yisasi ma ovaránen erin nain damú ma ven avorá o mantakhesí ma siretin oniyáké anan kákan timusin onté uno. ²⁰ Tiretí ankan nan kama kéká inon iyákayan kákan timusin timiya ono.

3

Pori Ma Tesaroniká Orino Van Timotin Tiantein Baya Ino

¹ *Máan tukháí siretin nan ma ída oniyaruna van ma ineine é oriyaruna ano inin tiriyaimpin mi Atensí barurá bano van iné uno. ² *Máan tukhéi setin tifá tiváe Timoti ma Tiyarafenui yoran banta váken ma Karaisini Kama Vaya siamiyain banta anan tianteruna mai setisi varu varen tiretin o oniyáken ayainti mumunampin ákona ukhe van nono. ³ *Béi anon ayainti mai ma afoká in nain uman kayofin mantaan ákona in nono. Máan uman kayo anon monó nanin banta simaniná afoká inté iya afová ukha rono. ⁴ Tiretí ankan má ma o váké maé mai uman mano setin timaniná dákó inten ne sé tiamikharé ékun mi mai uman mano fura sen dákó ikaya siretí ankan afováe ono.

⁵ Mai fara vara seyo, mai van inékun tufá ída kama iyaimpin mi siretí ankan inté eyá mumunan ukhe fono siré afová ono van Timotin tiantékun oren mino. Mákasin banta ano akhenóka intiya siretíi mumunan me ampesin tetisi yoran mano fa savifá o afeyoran nain nan mi sikhokho van iyá uno.

Timoti Ma Seti Nan Amusin Baya Sein Baya Ino

⁶ *Orikharen taréa uron mi Timoti ovaránen me sisimen tiretíi mumunan nan para ákona ukhan ena ma avábá in avúavá moéken bariyan mino síká iné uno. Tetí ankan ma fefá tiretin o ontaréeruna van ma ovare me iniyákeya setin nan moéke amusin pinté tonano van iya ono. Máan tiyan náí setin má dere simusin pinté tiretin o onano van ineine iyá uno. ⁷ *Máan tukháí mumunan tiyofi sífá tiváeyan noe, siretí ankan ma ákona mumunan iyaona vaya ma iné tiferuna anon kákan uman ma varyaré eruna maman mumunan ákona usinten mino. ⁸ Tiretí ankan ma Bafantá ákona mumunan para ukheona vaya ma inékun mai anon tetin evaránen ákona usinten mino.

⁹ Tiretí ankan ma mumunan iyaona van mi Tiyarafenu avorá kákan timusin iyá umpo mai inté uresá tiretin nan béin tusu siantante rafuno. ¹⁰ Tiyarafenu ano aái usintantí tiretí ankan baonafá orivé manáa yaná ma mumunan iyáke me áuntanona aya ono siré ena ena inuran má bayan má timúkiyá tiféuno.

Pori Ma Tesaroniká Orin Aa Van Dosein Baya Ino

¹¹ *Máan tiyá tifé umpo setin Tifóe Tiyarafenu vá Bafan Yisasin má ano vá aái usintantí tiretí ankan baonafá ainé orono. ¹² Tetí ankan ma siretin avábá iyarunaíen Bafan mano siretin avu inti vá ben moéken avábá in maran iyáke ena nanin banta yere avábá ono. ¹³ Máan tesin ná Karaisi ano siretí ankan ará ákona uantantiya ída fain má aau vá baré inti funtákein nanin bantaí ukhare Bafan Yisasi ma vei kantasí ukhein kéká bá erin

* **2:19:** Fir 2:15-16; 4:1; 2Te 1:4 * **3:1:** Apo 17:15 * **3:2:** Apo 16:1-3 * **3:3:** 2Ti 3:12 * **3:6:** Apo 18:5
* **3:7:** 2Te 1:4 * **3:11:** 2Te 2:16-17

nain damusá teti Sifóe Tiyarafenun avorasá o mantano.

4

Tiyarafenu Ma Amusin Ukhein Avúavaká Ma Van Baya Ino

¹ Mumunan tiyofi sifá tiváeyan noe, Tiyarafenu ma amusin in nain avúavaká bano van mi Bafan Yisasin aviká tiretí ankan aní ukhé uno. Máan tukhare saréa mai avúavá bariyan ná moéke varano van mi ákonaé tiamiyá tiféuno. ² Mai fara vara seyo, Bafan Yisasini ákonará pefái vaya siaméku afová ukha rono.

³ *Tiyarafenu ano siretin nan kantasí ukhe vano van mi inikhen mifo famúkuí ma in avúava sinta vará perano. ⁴ *Inká kantasí ukhein avúavá póké ma siretíi aurá dafian ákona ureya vasin maen ena nanin banta ano amo siyanti van nono. ⁵ Mai ma monó ída inin nanin banta ano ma asuse avúavapin báken Tiyarafenu vá beni avúavá bá ída afová ukhen ma vain an ída yakheya vano van mino.

⁶ Máan avúavá póké ída vá mákade monó afá aváeyan aná ona vare nono. Para vara seyo, máan avúavá ume ma variyain kékái Tiyarafenu ano uman aminten ne sé pefái ákonaé tiamé tiféku afová ukha rono. ⁷ *Para vara seyo, Tiyarafenu ano setin nan namu avúavápin bano vara sarakhen naifo mai kantasí ukhen bano van mino. ⁸ *Máan tukhan maen mai vaya ma yurafuriyain kéká ano varará bantai man baya ída yurafuriyan mifo Kantá Aunan ma amikhein Tiyarafenui oyan amiyan mino.

Pori Ano Ma Tesaroniká Nanin Bantai Ará Ákona Ein Baya Ino

⁹ *Máan tiyan mifo ena ma avábá in avúavá páke Tiyarafenui vanasi aní ono vara ma vompon uvaman amiya rauno. Ída ino. Para vara seyo, Tiyarafenu ano fefái ven avábá in maran ma in avúavá aní íkaya afová ukhen ná uno. ¹⁰ Máan tukheyai sireti ano Masedoniá barafá ma vain mumunan nanin banta kama ure avábá iya ompo mai avúavá moéke varano

van mi ákonaé tiamiyá tiféuno. ¹¹ *Máan tiyáke kama khumanin ma o yosin nará pefá ma siamikhá erunaí eya siretí ina yanasintará inin kaúdákeya au ma ayain doran ná ákona e yorano. ¹² Máan tesin maen afokhampin ma vain nanin banta ano sireti ma vaona avúava san amo siyanti váke mae ída moni san o afasí iyá uno sire ena vaípá inantin nono.

Bafan Ma Ovaránen Erináí Pákena Vaya Ino

¹³ Mumunan tiyofi sifá tiváeyan noe, mumunan uven ma fúká ein kéká ano inaimpáké intesá inten nafi mai sireti afová ukha ono. Máan tukheya mai ma afokhampin báken ma Yisasini ovaránen erin nan ma ída avé ukhen bain kéká an deya moékan arunanápin ída vano van muno. ¹⁴ *Mai fara vara seyo, Yisasi ma fúkaren masí pinté orun mantakheintái setí ankan mumunan ukhé tiféuno. Máan tukhéi véi ma ovaránen erin nain damú mai ma mumunan uven púká ein kéká Tiyarafenu ano evaránen avían mantarantin Yisasin má erinten minon té mumunan iyá tiféuno.

¹⁵ *Bafan pintéi ma vaya fura sen erikhá tiamiyá uno. Bafan ma erin nain damú ma ma ayun para vá tiferuna kéká ano mai ma mumunan uven púká ein kéká ída me ampiré teti nare oró tifanté uno. ¹⁶ Mai fara vara seyo, Bafan mano veyantá inaru fáké eriyain ákonará baya sintin maen ánon enisori ano kákaníen ovarantin Tiyarafenui ufen mano asinten mino. Máan tintin mumunan uven ma fúkáin nain kayo nare anon masí pinté orun mantanten mino. ¹⁷ Mantavintí mai ma ayun para vá ó tifanuna kéká bá ano maman manafiní uvé ayompin Bafan o oniyáké ben má típá o vá tifanté uno. ¹⁸ Máan tukhein nará ma vaya kayo fóké mumunan ákona uantan maran ná ono.

5

Yisasi Ma Ovaránen Erin Nain Nan Ma Útain Baya

* **4:3:** 1Te 5:23; 1Pi 1:16 * **4:4:** 1Ko 6:13 * **4:7:** Ibu 12:14; 1Pi 1:15-16 * **4:8:** Ruk 10:16; 2Ko 1:22 * **4:9:** Yon 13:34 * **4:11:** Efe 4:28 * **4:14:** Rom 14:9; 1Ko 15:3-4, 12 * **4:15:** 1Ko 15:51-52

¹ Mumunan tiyofi sifá tiváeyan noe, mai yanasinta ma afoká in nain damú bá áau vá pákena ída kanaí é ma vompompin uvaman amenté uno. ² *Mai fara vara seyo, Bafan ma erin nain damú mai ída ma afová íkan umoyan banta ano ma inuran erein an mi yanté iya siretí ankan afova suron ukha rono. ³ *Banasi ano ma siyáken inka kama yamú afoká ein kamaé bátifanté uno ma siyain má anan anasi ano ma inamun nan iniyáken ai san auriyain an dakhein uman betin aminten mino. Máan ma intin maen betí ankani karan orin aa ída vanten mino.

⁴ Máan tinten mifo mumunan tiyofi sifá tiváeyan noe, siretí ankan ída anukheimpin ma vainí ukháesin ma umoyan banta an den Bafan ma erintiya ída anúdin nono. ⁵ *Mai fara vara seyo, siretí ankan panu vá kakhan avúavá bá ma non kéká ono. Tetí ankan duntein avúavápin na váké anukheimpin na nó tife rauno. Ída ino. ⁶ Máan tukhé tife umpo ída vá manáa kéká an davé tuun bariyá báké tuu sapé tikherá dafiké bá tifano. ⁷ Mai fara vara seyo, auun ma varano van ein kéká ano inuran mi varé iyan mino. Inká óen non ma nan kéká ano inuran mi naren óen é iyan mino. ⁸ *Máan tiyain mifo kakhan aúpin ma vá tiferuna nanin banta ano setisi sivútivá dafíbesá mumunan avúavá bá ena kéká ma ará amin avúavá bá maman tanko an ná dá tifano. Tiyarafenu ano ma sivirano van ma sikhein nará ákona inin kaúde maman kápa kamamó an daré uré tífekun ná bano. ⁹ Mai fara vara seyo, Tiyarafenu ano vei aran daná tetin timaniná kaono vara anunu ukhen naino. Ída ino. Tetisi Bafan Yisas Karaisin pinté uaré tetin tiya uré tivirano van mi inikhen mino. ¹⁰ *Tetí ankan púkaré tife rafu áa ayun para varé tife rafu mai véi ma erin nain damú ben má o vano van mi setin nan e fúken mino. ¹¹ Máan tukhein nará mai ma variyaona avúavasí eya Tiyarafenurá ma mumunan in avúavá ben ákona uantan maran ná ono.

Pori Ma Sipá Ákona Uantan Baya Sein Mino

¹² Mumunan tiyofi sifá tiváeyan noe, mai ma Bafani yorarí iyáken ma siretintá dafíkein kéká aránaópasá bano. Betí ankan manon tiretin aúbaná ákona yorarí iyáken ída namu avúavá barano van ákonaen baya siamiyan mino. ¹³ Máan tiyan mifo vetin aránaópasá báke veti ma yoriyain nará aúkáké moéke avábá ono. Máan tiyáke vetin masá manafin ará kuse vano.

¹⁴ *Mumunan tiyofi sifá tiváeyan noe, mai ma vetí yoran mo ampiren avesara iyain kéká ákona e vaya siamesin ída avesara ino van mi siamiyá uno. Akhokho van ma iyain kékái mumunan ákona uantiya inká ma vara ráke avúavá ano ma ineine máden asuse iyain kékáká kama e vá dafiseno. Máan tiyáke minó nanin banta vá ará manafiní ureya vempáké bano van mi siamiyá uno.

¹⁵ *Máan tiya mae namu avúavá ma uantan nain kéká anona ída vá namu avúavá uantiyáke vetin má inká ena kéká bá kama avúavasí in maran mana vá ono.

¹⁶ *Máan tiyáke minó damú amusin mana vá iya vano. ¹⁷ Inká amúkin avúavá ída vá me ampeno. ¹⁸ *Uman nafi kama yana safi ma siretin amaniná afoká inti mae vá minó damú tusu ana vá teno. Mai fara vara seyo, siretí ankan Yisas Karaisini kékasíi ukhen nan mi Tiyarafenu ano mai yanasinta varano van anunu ukhen mino.

¹⁹ *Kantá Aunan ma yoriyain aa ída vá iyarano. ²⁰ Kantá Aunan manon inin amiyan mi sakhanampa veya siyan mifo ída vá inian paen danasí ono. ²¹ *Mai ma siamin nain baya kama e yaíde afová ure vá puntákein baya máa vá pákano. ²² Minó namu avúava sinta vará perano.

Pori Ma Sipá Amusin Uantan Baya Sein Mino

²³ *Ará ma kusiantan Tiyarafenu ano vá minó avúavasí ma inonafin ná maman kantasí uantano. Inká tiretíi aunan má aú iyampon má minó bukhafa vá ano

* **5:2:** Mat 24:42-43; 2Pi 3:10; Rev 3:3 * **5:3:** Mat 24:39; Ruk 21:34-35 * **5:5:** Rom 13:12 * **5:8:** Ais 59:17; Efe 6:14, 17 * **5:10:** Rom 14:8-9; 1Te 4:14 * **5:14:** 2Te 3:6, 11 * **5:15:** Rom 12:17; 1Pi 3:9 * **5:16:** Fir 4:4
* **5:18:** Efe 5:20 * **5:19:** Efe 4:30 * **5:21:** 1Yn 4:1 * **5:23:** 2Te 3:3

avusese ukhanti oriya vare vá tetisi Bafan Yisas Karaisi ma ovaránen erin nain damu sá o afoká ono. ²⁴ Mai ma siretin arakhein Tiya rafenu ano véi ma sirein baya ánain pura sen bákuriyain bantin pasen mai ma sirein daná baranten mino.

²⁵ *Mumunan tiyofi sífá tiváeyan noe, setin nará amú kusintano. ²⁶ Tiya rafenurá ma monó tiyain nanin banta ano ma avábá iyain avúavá kasá ben avábá in maran ono.*

²⁷ Minó mumunan tiyofi sífá tiváeyampin ma vompon dankafesin inino van mi Bafan aviká ákonáé tiamiyá uno.

²⁸ Máan tukhantin tetisi Bafan Yisas Karaisini sarisari ano vá tiretin má bano.

* **5:25:** Kor 4:3; 2Te 3:1 * **5:26:** Kiriki veya fintéi Tiya rafenurá ma monó tiyain nanin banta ano ma kantasí ukhein amónan maran iyain nan tikhen mino.

**PORI MA KAN DÁDASIÉN
TESARONIKÁ NANIN
BANTA UVAMAN AMEIN
BOMPON MINO
(2 Tesaronika)**

**Kan Dádasí En Ma
Tesaronikai Vompon Ma
Uvanteí Pákenai Afova
Vaya Ino**

*Ma vompon ma uvantein banta ino.
Baya varen orin banta Pori ino.*

*Uvarein orana ino.
AD fifti-tu (52) fin mi uvaren mino. Esé
ma uvarein bompon dan orivin maen
manáa viyontá báken mi uvaren
mino.*

*Ma vompon ma uvantein baru ino.
Koriní barurá ma mana orana ifo afápá
mana un kádan biyontá ma váken
mino (Aposeri 18:11 fin ná onano).*

*Ma vompon ma uvaman amikhein kéká
ino.
Tesaroniká barurá ma monó tiyain
nanin banta ino.*

*Nái ana vará ma vompon uvanten
nafino.*

*Esé arái in bompon ma uváden maen
maí oyampáké Pori iníkan Yisasini
ma ovaránen erin nain baya ano
vanasii ineine máden asuse iyaimpin
mi evaránen ma vompon uváden mi
maí damú ma yákó inain baya sian
amá ukhen mino.*

¹ Téi Pori má Sairasin nú Timotin nú
bá anon Tesaroniká kákan barurá ma mu-
munan nanin banta váke setin Tifóe Ti-
yarafenu vá Bafan Yisas Karaisini kékási
ma ukhaonafin mi ma vompon uvaman
amé uno. ² *Tifóe Tiyarafenun má Bafan
Yisas Karaisin má pinté ma eriyain taris-
ari vá ará kusin má ano vá tiretin má
bano.

*Porini Susu Siantan Má Amúkin Má
Baya Ino*

³ Mumunan tiyofi sifá tiváeyan noe,
funtákein avúavá baréi siretin nan Ti-
yarafenu susu sianté iyá uno. Maí fara
vara seyo, siretí ankaní mumunan mano
mo ákonaen kákani iyákayan ben moéken
ará amin maran iya ono. ⁴ *Ara ara
uman bariyáke ma maí uman kayo van
ída ininto ma ákona e mumunan iya ma
yorarí iyaona van mi minó akhempá ma
Tiyarafenurá mumunan iyain kékápin ma
orivé maé tiretí ankan nan amo sé iyá uno.

*Bafan Yisasi Ma Erin Nain Damú Ma
Banasii Avúavá Daimin Nain Baya Ino*

⁵ Máan tiyá umpo maí ma variyaona
uman manon anien mi Tiyarafenu ano
funtáden daimiyan pasen mi siretin
e avían bei yafisimpin kainten mino.
⁶ *Tiretin ma uman amiyain anonafá
Tiyarafenu ano vetin daíden uman am-
intén mino. ⁷ *Máan tinten mifo setisi
Bafan Yisasi ma vei ákona enisori kayo
vá ma inaru fáké ira anamuná bá ma
erin nain damúí maí ma uman bariyá
ótifanuna kéká tivíkan timinten mino.
⁸ *Maí ma erin nain damúí Tiyarafenun
ma ída afová en ma inká Bafan Yisasini
kama vaya ma oyan amiyáin nain kéká
uman aminten mino. ⁹ *Baya ma ída
iniyáin nain nanin banta ano ída kípan
namu uron ukhein uman mamaren Bafan
má beni kakhakhein ákona vái adé ída
vanten mino. ¹⁰ *Bei ma ovaránen erin
nain damúí maí yanasinta afoká inten
mino. Máan ma intin maen kantasí ukháin
nain nanin banta ano véin amo siyan aví
daní iyantiya siretin má deren maífin ban
nono. Maí fara vara seyo, seti ma ontaré
ma siameruna vayarái mumunan ukhare
ono.

Pori Ma Amúkein Baya Ino

¹¹ *Máan tukhein nan mi siretí ankan
Tiyarafenu ano sesi funtákein nanin banta
e siren béi ma araren avíká einien bei
ákonafó tiretí ankaní kama ineine vá
kama avúavá bá ma mumunan mano
afoká uádiyain kanaí ino van mi ena ena
simúkuan béin amiyá uno. ¹² Minó nanin

* **1:2:** Rom 1:7 * **1:4:** 2Ko 7:4; 1Te 2:19 * **1:6:** Rom 12:19 * **1:7:** 1Te 3:13 * **1:8:** Ais 66:15 * **1:9:**
Ais 2:10 * **1:10:** Kor 3:4 * **1:11:** Kor 1:9; 1Te 1:2-3

banta ano siretí kama avúava san Bafan aví daní intin maen inká béi ano siretín aví daní ino van mi simúkiyá uno. Tetisi Tiyarafenu vá Bafan Yisas Karaisin mái sarisari ano siretín má báken mai yanasinta maman dákó inten mino.

2

Bafani Erin Ádé Iyantín Ma Aní Daná Dakó Inain Baya Ino

¹ Mumunan tiyofi sifá tiváeyan noe, setisi Bafan Yisas Karaisi ma erintí ma ven má manafin bá tífanuna veya siaméku inin nono. ² Manáa vanta ano ma oriven Bafani yamú inka erikhen mino ma sin nain baya van ída vá anú duman duman ono. Maa siren ma setí ankan nan mai vompon uvamádan erikhen mino sen ma inká sakhanampa veya sen ma intiya mai veya ída vá ineno. ³ *Máan ma sin nain baya kayo ano ída vá tìretin kufa uádano. Mai fara vara seyo, Yisasi ma ída erikhantín maen kokhon nanin banta ano Tiyarafenu vá aruviyantín maen mai ma man baya ma átakharé iyáin nain banta maman dákó inten mino. Mai vantán Tiyarafenu ano kákan uman aminten mino. ⁴ *Mai vanta ano ve aví daní uren maen Tiyarafenu ma araren monó tiyáin oyampá baya siren beni kákan monó namumpin un kumamen téi Tiyarafenu umpo sen tiví daní ono sinten mino.

⁵ Téi ma siretí ankan má báké maé mai veya fefa suron mi siamikhá umpo ída ovare me iniya rafono. ⁶ Intéa yaná anó béin pákaran ná baren nafi mai saréa inka afová iya ono. Mai fara vara seyo, veni yamú ma erintín mi yákó inten mino.

⁷ Man baya ma átakharéin ákona ano aúpá báken pefái yoriyái fura sé tiamiyá uno. Máan tukhen mifo mai ma iyáká inain banta ma yo avían kaúdantín mi mai yaná dákó inten mino. ⁸ *Mai ma man baya átakharé iyá inain banta ano ma e unen afoká édavuvintín mi ínaimpáké ma Bafan Yisasi erinten mino. Eriven maen bei ákona vayafó mai vanta man barasí uren khakhan ákona fókéi mai vantái ákona yo varanten mino. ⁹ *Man

baya ma átakharéin banta ma erin nain mai Ban Anoni ákona fói yoriyan mino. Máan tiyan pasen enará ukhein avúavá bá inká aní daná bá maman afoká inten mifo mai kampun danasinta ino. ¹⁰ Tiyarafenui aran nanápin ma vain nanin banta kayo mai vanta ano ara ara mákasimpó betin máden kufa uádante mino. Mai fara vara seyo, fura veya ano vetin ayaintín mumunan ino van iyan mifo mai van beti ída anunu ukhen mino. ¹¹ Máan tukhantín pasen Tiyarafenu ano ákona mákasin tiantantín mai kéká mákadantín mai kampun bayará pura ino sinten mino. ¹² Máan tintín maen mai ma Tiyarafenui fura yanáká ma ída mumunan inton ma namu avúava san ma anunu ukharéin nain kékái Tiyarafenu ano ínaimpá daíden uman aminten mino.

Mumunan Nanin Banta Ano Ma Mantaan Ákona In Baya Ino

¹³ *Máan tukhein nan mi mumunan tiyofi sifá tiváeyan noe, Bafan mano ma anunu uren avábá uantiyáin monó nanin banta van mi ena ena yamú Tiyarafenu vaipá tusu siantiyá tiféuno. Mai fara vara seyo, setin ma evaránen tivíkein daná afová ino siren mi esé araíntá Tiyarafenu ano siretín aní ukharé in mi Kantá Annani funtákein doran mano siretí man avusese en mino. Máan turen mi mai ma fura yanáká mumunan iyaonarái evaránen aviren mino. ¹⁴ Mai kama veya ma siamé tiferunarái setisi Bafan Yisas Karaisini kakhan aúpin bano van béi siretín arakhen mino.

¹⁵ Máan tukhein nará mumunan tiyofi sifá tiváeyan noe, mai ma vompon po safi áa soo fo safi ma siamiyáké afova ameruna veya vá pákaan ákona uveya mairasá mantano.

¹⁶ Tetisi Bafan Yisas Karaisin má Tifóe Tiyarafenu vá ano setin tivábá uren mi vei sarisari fóké para van oriyan ban ará ákona vá inká kamaen báken ma avein avúavá bá timen mino. ¹⁷ Béi ano vá tìretin ma minó kama avúavá bariyaona vá inká kama veya kayo ma siyaonafin masá ákona uantano.

* **2:3:** 1Ti 4:1; 1Yn 2:18; 4:3 * **2:4:** Isi 28:2; Dan 11:36 * **2:8:** Ais 11:4; Rev 19:15 * **2:9:** Rev 13:11-13

* **2:13:** Efe 1:4; 2Te 1:3

3

Porin Amúkuantano Van Ma Inaúkein Baya Ino

¹ Mumunan tiyofi sífá tiváeyan noe, ma sípá bayan té uno. Mai ma Bafani kama vava ma siretí ankan inire ma mai aránaópá baona vava minó akhempá tiamé orera ékun banasi ano iniren mai vava aránaópá bano van mumpo vá amúkusintano. ² Amúkesin ná namu vanta kayo ano ma setin uman timiyain pinte vá Tiyarafenu ano siya ino. Mai fara vara seyo, minó ano ída Bafantá mumuman ukhen mino. ³ Máan tukhen mifo Bafan mano ma sirein baya ánain pura sen bákuriyain mi vantin tiretin ákona amiren dafikantin Ban Anon mano siretin ída uman aminten mino. ⁴ *Mai ma siretin nan barano van ma siamé tiferuna yanasinta kama e variyan nan Bafan mano setin ineine simí afová ukheruna ínainpá deren mai avúavá pákaresin banten mino. ⁵ Áesin ná Bafan mano siretin ayainti vá Tiyarafenu ano ma vanasi avábá iyain má inká Yisas Karaisi ma mantaan ákona uven uman barein má afová ure vá mai ma einí ono.

Ída Ma Avesara In Baya Ino

⁶ *Mumunan tiyofi sífá tiváe oe, setisi Bafan Yisas Karaisin avíkái ma man baya siamé uno. Mai ma siamikhé tiferuna vava ánain ma ída yakhafiyán ma avesaraen noin kéká áde ída vá orono. ⁷ *Mai fara vara seyo, siretin má ma váké maé tetí ankan ída sivesara iyákuya fefái afová ukha ompo setinti sivútivá ánain mana vá bákurono. ⁸ *Ída mana yunan para variyá umpo miyaní uré anan bariyá uno. Máan tiyái siretin ída uman ameno van pasé inuran má baya má ákona yorarí uré mai yanasinta variyá uno. ⁹ *Tetí ankan kasaé dunan inantiré nanunaren mifo mai avúavá ódareya mai ánain bákurono van mi siretin aní é uno. ¹⁰ Para vara seyo, siretí ankan má ma váké maé ma man bayan tiamikhá uno. “Mana vanta ano ma avesara uren ída yoranten maen mai vanta ano ída vá dunan nano.”

¹¹ *Máa sé tiamikharéi inékon tiretin aúbanté manáa ano avesaraen nóken ena kékái yoran aa iyáden avesera amiyan ne sen me sisimí iniyá tiféuno. ¹² *Máa sé iniréi Bafan Yisas Karaisin avíká máan nanin banta van manará báken dunan dóden nano van mi ma man baya siamiyá uno. ¹³ *Máan tiyantiya mumunan tiyofi sífá tiváeyan noe, puntákein avúavasí in nan ída vá avesara ono.

¹⁴ Ma vompompin ma siamé tiferuna vava ánain ma ída yakhafin nain nanin banta vá ída o munteşin ná betí avúava san ayave van ino. ¹⁵ *Ída vá béin namuro an de vá afá aváen ma man baya siamein- isá ono.

Porini Amusin Baya Ino

¹⁶ Ara ara uman mano siretin amaniná erinten mifo áesin ná ará kusin benafo Bafan mano ena ena ará kusin amiren ná tiretin má bano.

¹⁷ Téi Pori anon te siyampókéi ma kípán baya uvádeí sesi aní daná mairá kaé uno. Minó bompon kayorá máan manan ukhé uno.

¹⁸ Tetisi Bafan Yisas Karaisini sarisari ano siretin má banti vá bano.

* **3:4:** 2Ko 7:16; Kar 5:10 * **3:6:** Rom 16:17 * **3:7:** Fir 3:17 * **3:8:** 1Te 2:9 * **3:9:** 1Ko 9:4; 1Te 1:6
* **3:11:** 1Ti 5:13 * **3:12:** 1Te 4:11 * **3:13:** Kar 6:9 * **3:15:** 1Te 5:14

**PORI MA ESÉ ARAÍEN
TIMOTIN UVAMAN
AMEIN BOMPON MINO
(1 Timoti)**

**Ma ma kanú manaú
bompon ma uvaman
monó doran banta
amikhein mai 1Timotin
má 2 Timotin má inká
Taitusin ma san ma sian
amá ukhein baya maen
AD sikisti-fo (64) ráké
sikisti-seveni (67) ráké
ma aúban mi uvanten
mino.
Oo siádan baya vá o ukí páké
ma erikhein baya vá ano
siyáken AD sikisti-fo (64) fin
ma Sisa Nero ano ma monó
nanin banta ariyá eimpin
pasa Porin aren naifo ída
ino. Karavusi finte utúantan
maen evaránen bei yoran mo
araí uren ma varu kayofin
naren eúken mino. Kiriti vá
Masedonia vá Akaiá barafin
ma vain baru Nikoporisi vá
Troasi vá Miretusi vá inká
Korini vá Efesasi bá ino.
Inká Speini varafá inan
orikhen ne sen iniyan mino.
Monó doraríen noren
enóbíkan evaránen karavusi
fáken mo khauren maen kó
tiantáden AD sikisti-seveni
(67) fin aruan puren mino.
Béi ma monó doraríen nóken
mi esé ma Timotin uvaman
amikhein bompon má inká
Taitusin ma uvaman**

**amikhein bompon má
uvanten mino. Inká kó
tiantáden purino ma sirákan
mi kan dádasí en uvaman
Timotin amen mino.
Timotini Esé Bompon Ma
Uvanteí Pákenai Afova
Vaya Ino**

*Ma vompon ma uvantein banta ino.
Baya varen orin banta Pori ino.*

*Uvarein orana ino.
AD sikisti-tari (63) ráké sikisti-sikisi (66)
ráké ma aúban mino. Mai maen
Porin ma karavusi fintena utúantan
ma evaránen bei yoran mo yorein
pimpá ino.*

*Ma vompon ma uvantein baru ino.
Masedoniá inon ten iniyan mino.*

*Ma vompon ma uvaman amikhein
banta ino.
Timoti maen Porini eyo iyampon báken
kama arona varen ma Pori má Efesasi
o monó doran bantaí ein pumara ino.
Ínaimpáké Pori ma Masedoniá barafá
oríkan maen béi monó dorarí ono van
Efesasi para varen mino.*

*Nái ana vará ma vompon uvanten
nafino.*

*Timoti maen pumaran bákan mi man-
taan ákona uven monó dorarí ino
van ará ákona amin baya siamiyáken
kama ineine amikhen mino.*

Pori Ma Susu Sein Baya Ino

¹ Tetin tiya uren ma evaránen tivíkein
Tiyarafenu vá inká tetin ovaránen e sivi-
rante ne siré ma ave ukheruna vanta Yisas
Karaisin má ano ma aní uren aposeri
yoran timikhein banta séi Pori anon ma
vompon uvaré uno.

² Monó avúavápin ma se sanin uron an
dakhein banta Timoti vaípái ma vompon
uvamadé uno. Teti Sifóe Tiyarafenu vá
tetisi Bafan Yisas Karaisin má sarisari vá
arunaná bá ará kusin má ano vá en má
bano.

* 1:2: Apo 16:1-3; Tai 1:4

Kampun Monó Baya Sin Kayoi Aaman Vaya Ino

³ Téi ma Masedoniá orono van iyáké maé éin nan Efesasi bákeya vá mai ma kampun bayafó ma vanasi afova amiyain kéká tiamesin ída máan tino van mi éin me ayópá é uno. ⁴ *Mai ma vetí anafu aráoni avúavá ma mamádáken ma ara ara kampun baya kayo e sen oriyan bain mano ída kanaíen betin ayaintin Tiyarafenurá mumunan uren betin ma aya ono van iyain daná afová inten mino. Máan tinten mifo mai ano vetí ineine anan máden asuse urantin maen aruve asivein avúavá anan baranten mifo ída vá áesin mai avúavá barano. ⁵ Mai van mi Yisasín ánain ma vákuriyain kékápin ná ena ma moéken avábá in avúavasá bano. Betí ankan aú ma avusese intin ma kama yaná bá namu yaná bá ma yaíden afová in ineine ma vantin inká pura mumunan má ma vantin mi ena ma moéken avábá in avúavá afoká inten mino.

⁶ Máan tinten mifo manáa kampun afova ma amin kéká ano mai avúava sinta inka me ampiren beni ana ída vain baya sen orera iyan mino. ⁷ Betí ankan nan man baya afová ukhein kéká ino sen banasi ano afová ino van mi inikhen mino. Máan tiyan mifo mai ma kana siyá uno siren ma vanasi siamiyain bayai ana ída uron mi afová ukhen mino.

⁸ *Tetí ankan ma afová ukhé tiferuna vanasi ano ma Tiyarafenui man baya ánain ma funtáden bákurin manon man baya kama ukhen mino. ⁹ Máan tukhen mifo funtákein avúavá ma variyain nanin banta ina va man baya uvanten naino. Ída ino. Man baya ma yurafuriyáken ma Tiyarafenui vaya átakharé iyain kéká bá ume avúavá ma variyain kayo vá inká Tiyarafenui kantasí ukhein danasinta ma oyan amin kéká bá ino. Inká béin nan ma afon karí iyain kéká bá be anóe afóen má ena nanin banta vá ma aruan puriyain kéká bá ino. ¹⁰ Inká pamúkuí ma iyain kayo vá banta ano fi áa anasi ano fi ma vaéden beraran pamúkuí iyain kéká bá inká banta ano ma arona vanta avíden sarií iyain kayo vá ino. Inká kampun baya

sin kéká bá ena nanin banta iyáantáden ma ída avúavápin kaé iyain kayo vá inan man baya van mino. Banasi ano ma mai avúava sinta vá minó ara ara namu avúava sinta vá ma variyain manon Tiyarafenu ano ma fura sikhein avúaváká bano van ma setin afova simikhein baya ánain ída yakhafíyan mino. ¹¹ Mai ma setí ankan afova simikhein mai Tiyarafenui fanu sikhein kama vaya ino. Tiyarafenu ano séin nan mai kama vaya vá banasi siameno sikhen mino.

Tiyarafenui Sarisari Van Ma Pori Susu Sikhein Baya Ino

¹² *Tetişi Bafan Yisas Karaisi ano séin nan kanaíen beni yorarí inten mino siren mi séin aní uráken ma ákona simiyain nan mi véin tusu siantiyá uno. ¹³ *Pefá kama anan iyá uno siré maé oyampá baya siyáké ben ánain ma vákuriyá ein kéká dakhádé ariyaré uno. Máan tiyaré umpo Bafan mano ma séin nan arunan uren tivirein mai fara va ino, séi ída véin afová é mumunan ukharé ékun mino. ¹⁴ Bafan Tiyarafenu ano séin moéken tarisari uren mi Yisas Karaisimpin ma vain mumunan má avábá bá maman téin túpin bikasinten mino.

¹⁵ *Ume nanin banta aya uré avirano van mi Yisas Karaisi ma varafin erikhá mai fura vayan tiamé umpo vá minó ano véintasá mumunan ono. Namu avúavá baran kéká esantaré téi moéké ume vanta uron mi vá uno. ¹⁶ Máan tukhékun mifo Yisas Karaisi ano ída ainen téin uman timen mifo mai ma moéken umeí iyain nanin banta aní intin onano van mi Tiyarafenu ano séi nan moéken arunan uren tiviren mino. Máan turantin béintá ma mumunan inain nanin banta ano fara van oriyan ban aunan baranten mino. ¹⁷ Máan tukhanti vá mai ma fara van oriyan ban Tiyarafenu avisá daní iyáke kákan bí ameno. Para vara seyo veyáká anan Tiyarafenu váken inká ída furinton para van oriyan ban Kin bakan mana nanin banta ano véin ída kanaíen oné iyan mino. Pura ino.

* **1:4:** 1Ti 4:7; Tai 1:14 * **1:8:** Rom 7:12, 16 * **1:12:** Apo 9:15; 1Ko 15:9-10; Kar 1:15-16 * **1:13:** Apo 8:3; 9:1-5 * **1:15:** Ruk 19:10

Pori Ma Timotin Nan Mantaan Ná Ákona Ono Sein Baya Ino

¹⁸ Te sanin Timoti oe, fefá ma sakhanampa veya siádan ma varé ein nan mi ma veya kayo ákonaé timiyá uno. Ásin ná ma veya kayo ano éin ákona uantanti vá Bafani yorampin báke namu yaná bá ákona e aruvono. ¹⁹ Yisas Karaisintá ákona mumunan kaúde vá minó damú puntákein ineine ana vá barano. Mai fara vara seyo, manáa nanin banta ano mai avúavá me ampiren ída funtákein avúavá mo varan maen betíi mumunan mano sipi ma oriyaren onámanáká mo kuvanten barákein an dakhen mino. ²⁰ *Imeneusin nú Areksanda nú ano máan avúavái variyaré íká mikan nan mano afova máden Tiyarafenun ída oyampá baya sino van mi mikan avían Ban Anon ayampin kaé uno.

2

Monó Tin Avúavá Pákena Vaya Ino

¹ Máan tukhein nan mi mai ma siretin tiamikheruna vayará ma kakaní ukhein bayan tiamenté uno. Tiyarafenun amúkuon amesin ná minó nanin banta aya uren evaránen aviriyanti vá inká tusu amúkirí basá ono van mi ákonaé timiyá uno. ² Mai avúaváká teya vá kin kéká bá inká dafisin kéká bá amúkuon amiyasirá kamaé tirá kusin má manafin bá tiferá Tiyarafenu ano ma anunu ukhein avúavá ana vákuriyará banasi avorá kantasí ukhé bá tifano. ³ Mai avúavá anon kama ukhen mi setin ma Siya Uren Tivikhein Tiyarafenun amusin amé iyan mino. ⁴ Mai fara va ino, minó ano ída kípan aunan mamaren pura yaná afová ino van mi véi inikhen mino. ⁵ Mai fara vara seyo, Tiyarafenu veyáká anan bakan inká aúbaná banta mana anan báken mi Tiyarafenu vá banasi vá ma manafin kasen ban baya e sian more mere iyain nan mi siyá uno. Mai vanta mai Yisas Karaisi ino. ⁶ *Tiyarafenu ano ma siádan baré ein damú ma afoká in maen mi minó nanin banta miyaní uren avirano van Yisasin tiantan e furen

mino. ⁷ *Tiyarafenu ano vei veya vanasi siamiyáken mumunan ma in avúavá pákena vá pura sikhein baya vá baren ena anan nanin bantafin mo siamino van mi sein aní urá baré ma fura vayan tiamiyá uno.

⁸ Máan tukhantiya mumunan kéká ano ma manafin átaru inonafin aruve asive in má ará uman daantan avúavá bá ampire vá ayan daní ureya Tiyarafenu aví daní iyáke vá amúkono.

Kama Avúavá Ano Ma Anasi Arintai Auí Daná An Dan Baya Ino

⁹ *Máan tiyanti mae anasi arinta ano kama ukhein buí daná uren bantai inin namu ina siren ná au ma ída yákó in buí daná ana vá ino. Máan tiyáken ída vá ánon do kama uren kori fóké uvaran dana safi inká ankaroro fi áa moékan miyantá ma vain danasinta fi vá ino. ¹⁰ *Máan tinten mifo Tiyarafenun ánain mi vákuriyá uno ma siyain nanin arinta ano kama avúavá ana varantin ná mai avúavá ano vá betíi kama vuí daná an dano.

¹¹ Anasi arinta ano fúkekhen bempáké báken ná monó doran banta kayoi veya iniren ná mai aránaópá bano. ¹² *Anasi arinta ano vempáké báken ída vá bantará ánoní ená inká ída monó baya sino. ¹³ *Mai fara vara seyo, Tiyarafenu ano Adamun naren uváden ínaimpákéi Ivin uvaren mino. ¹⁴ *Máan turan Ban Anon mano ma mákandan maen anasi ano naren umeí ein mifo Adamu ano vaino. Ída ino. ¹⁵ Máan tukhen mifo anasi kayo ano ma aí pinté iyampon kaiyáken ma au vararasí uren mumunan iyáken avábá in avúavá bariyan ma kantasí ukhen ban avúavá ana ma variyan bantin mi Tiyarafenu ano aya uren evaránen aviranten mino.

3

Monó Doran Kayoi Vaya Ino

¹ *Monoká ma yafisin dorarí ono van ma anunu iyaona mai yan bain doran mi vákayan mai yorarí ono van iyan ná ma fura vayan tiamé uno. ² *Mai ma

* **1:20:** 1Ko 5:5; 2Ti 4:14-15 * **2:6:** Rom 3:29-30; Kar 1:4 * **2:7:** Apo 9:15; Kar 2:7-8; 2Ti 1:11 * **2:9:** 1Pi 3:3-5 * **2:10:** 1Ti 5:10 * **2:12:** 1Ko 14:34 * **2:13:** Esé 2:7, 21-22; 1Ko 11:8-9 * **2:14:** 2Ko 11:3; Kar 3:1-6 * **3:1:** Apo 20:28 * **3:2:** Tai 1:6-9

monóká dafiseno van iyain bantai avúavá ano funtákan tin ná ena nanin banta ano ída kanaíen béin oyampá baya sino. Inká be aná bá ana vá puntáden báken* ná beyantasá kama avúavá ma vain ná mamán one one ino. Inká puntákein ineine vá bantin kama vanta ino siyantín ná ena kéká ano ma ven amápin erintín ná betín kama iyáken Tiyarafenui afova vaya vá banasi siamino. ³ Béi ída vá óen non nen ná inká ída vá aruve asive inton bepáké báken moni san ída vá anunu ino. ⁴ Bei kéká kamaen dafisin banta vantín ná inká ben akhafana ano kamaen baya iniren ben aránaó ana vá bano. ⁵ Mai fara vara seyo, anasi iyampontá ma ída kamaen dafisin nain banta ano inté uren ná Tiyarafenui vanasirá dafisinten nafino. ⁶ Auyen mumunan kéká ída vá ainen monóká dafisin doran amino. Para vara seyo, véin ma amiran nain doran nan au khákan intín maen mairái Ban Anon mano véin mamádantín ainen eraven ankamintén mino. ⁷ Inká afokhampin ma vain kéká ano ma véin nan kama yorarii iyan mino ma sintín béi ída kanaíen Ban Anoni vase unampin o áduven ayave van inten mino.

Monó Doran Banta Kéká Ano Ma Varan Nain Avúavá Ino

⁸ Inká monó namumpin ma yoran banta kéká ano yere máan mana en kama avúavá ana vá barano. Ída vá kampun baya e sian more mere en ná inká ída vá óen non nen ná inká moníká inin kaen iyantín ná béin nan kama vanta ino sino. ⁹ Betí ankan kama yaná bá namu yaná bá ma yaíden afová in ineine funtáden ná pura mumunan pákaan ákona uren ná bano. ¹⁰ Monó namumpin tító doran kayo nare amesin doriyantiya kamaen ná doranten nafi mai ódare vá inaimpáké monó namumpin ma yafisin doran ameno.

¹¹ *Betín aná ona ano máan mana en ná kama nanin kéká ino siyantín ná mai nanin kéká ano ena nanin banta ída vá oyampá baya sino. Beti yantasá kama

avúavá ma vain mamán one one iyáken minó danákasá ákonaen dafisino.

¹² Monó namumpin ma yoran amiran nain banta ano ve aná bá ana funtáden báken ná* be akhafana vá bei kéká bá kamaen ná dafisino. ¹³ Mai ma kamaen doran nain kékái vanasi ano amo siyantín Yisas Karaisintá ma mumunan in avúavá ano moéken kákaní inten mino.

Tetisi Fura Mumunan In Baya Ino

¹⁴ Éi vaonafá orono van ukhé umpo ída ma ainé oréku maeya ma yanasinta varano van mi ma vompon uvaman amé uno. ¹⁵ Téi ma ída ainé oréku maeya mumunan kékasá ma vompon pinte ódare vá afova ameno. Mai kéká anon ákona namádan kayo an daven mi fara van oriyan ban Tiyarafenui fura vaya fákaan ákona uráken doranten mino.

¹⁶ *Tiyarafenu ano Yisasini kama vaya afová inon tiren mi aúpá bá ein mamán dákó ukhein pasen mana ano ída kanaíen mai vaya van ina inten mino.

Yisas Karaisi ano varará banta an daven afoká ukhan

Kantá Aunan mano véin nan puntákein banta e siren mamán dákó uran

enisori kayo ano ódaren banasi siamíkan barará nanin banta ano véintá mumunan uvin

Tiyarafenu ano véin aviren inarufá óden mino.

4

Kampun Monó Baya Sin Kékái Vaya Ino

¹ Máan ten mifo ma vara kípan akhempá ma oriyantín maen manáa kéká ano mai ma esé araíintá ma Tiyarafenurá mumunan iyá ein me ifá uren kampun aunani vaya ánain dakhafinten mino sen Kantá Aunan mano mai fákena sian amá ukhen mino. ² Mai ma kampun ten monó banta kéká uno ma siyain kéká anon mai afova aminten mifo vetíi kama yaná bá namu yaná bá ma yaíden afová in ineine asusen ukhen mino.

* **3:2:** Manáa afova vanta kayo ano mai van máa sikhen mino. Mana nanin máa vá barano. Ena afova vanta kayo ano mai van máa sikhen mino. Ída vá anasi máde ifá urú urú en nono. 3:12; Taitasi 1:6 fin dere vá onano. * **3:7:** 2Ko 8:21 * **3:11:** Tai 2:3 * **3:12:** Manáa afova vanta kayo ano mai van máa sikhen mino. Mana nanin máa vá barano. Ena afova vanta kayo ano mai van máa sikhen mino. Ída vá anasi máde ifá urú urú en nono. 3:2; Taitasi 1:6 fin ná dere onano. * **3:16:** Mak 16:19; Yon 1:14; Kor 1:23

³ *Máan tukhan mi ábasuí ma in avúavá bá inká mai ma fura sikhein baya ma afová ukhen mumunan iyain kéká ano susu siantáden nano van ma Tiyarafenu ano uvamádan bain dunan kayo vá are uanté iyan mino. ⁴ Para vara seyo, Tiyarafenu ano ma uvantein danasinta mai kama anan ukhen mifo ída vá manáa mo ifá iyáké túkákesá béin tusu siantiyá timusin pintesá mai yanasinta vará tifano. ⁵ Mai fara vara seyo, Tiyarafenui vaya ano máa sikhen mino. Ábasu ma vampin má ara ara yunan ma nan avúavá bápín pefái Tiyarafenu ano maman kantasí ukhen mifo amúkimposá tusu siyákeya varano.

Yisas Karaisini Kama Yoran Bantaí Ma In Baya Ino

⁶ Ma vaya kayo ma mumunan kéká tiaminte mae mai Yisas Karaisini kama yoran bantaí uveyan mai ma fura mumunan má inká kama vaya vá ma inire ma mantaan ákona eona vayan tian dáko inono. ⁷ *Kampun banta kayo ano ma siamin nain baya kayo van pédeya nentásá bano. Mai fara vara seyo, mai vaya kayo ano ída ayainten mifo ída vá asive asive iya vákeya kantasí ukhen ban avúavá ma varan nará ena ena ákona e yoseno. ⁸ Mai fara vara seyo, manáa nanin banta ano máa sikhen mino: “Dan bukhafará ma ákona varan mai veni nena sanáan ban mifo monó avúava san ma ákona varan mai moéken kákan danái van mino. Mai fara vara seyo, saréa ma vá tifanuna vá inká ínaimpá ma vá tifanuna vái miyan pefái Tiyarafenu ano iyátintan ban mino.” ⁹ Ma fura vayan tiyan mifo minó ano mai rasá mumunan ono. ¹⁰ *Mai ma fara van oriyan ban Tiyarafenu ano ma minó nanin banta vá inká béintá ma mumunan iyain kayo vá ma aya uren avikeintái setisi inin kauráké moékan uman o yosiyáké ákona yorari iyá tiféuno. Mai fara vara seyo, fura yanáká banasi ano mumunan ino van muno.

¹¹ Ma vaya vá minó nanin banta siamíde afova amesin ná mai ánain dakhafino. ¹² *Ída vá ásin ná mana ano éin nan

pumara ino siren ná éi ma siaminona vaya oyan amino. Mumunan kéká ma afova amiyáke ma yanasinta vá aní ono. Éi ma ne vare inonafin má inká mumunampin ma kantasí ukhen ban má inká ena ma avábá in má ino. ¹³ Tiyarafenui vompon dóki finte yankafesin iniyantiya vá mumunan kéká ákona uantiyáke vanasi afova amiyasirá téi oreno.

¹⁴ *Mai ma sakhanampa vaya ma inikhein Yisasini mumunan nanin bantaí ánon banta kayo ano ma ayan ánontá kauren avu uantákaré ein amusin ída vá kaumpan ono. ¹⁵ Éin ma amikhein dorantasá ei minó inin onan kaure yoriyákeya inká Tiyarafenu ano ma anunu ukhein avúavá ana variya sin ná minó nanin banta ano onano. ¹⁶ Ei avúavá bá inká Tiyarafenui vaya ma siamiyaonará basá dafiseno. Puntákein avúaváká ma mantaan ákona uvesin maen mai ma siamesin inin nain kéká bá inká éin má Tiyarafenu ano aya uren aviranten mino.

5

Timoti Ma Ena Nanin Banta Avábá Uantán Baya Ino

¹ Anon banta ída vá asin baya siyákeya e afóen má ma vempáké baya siyaonaisá ono. E afá aváeyan ma kama iyaonaí eya vá ena fumara vanta kama ano. ² Anon nanin kékasá e anóen ma kama einí iyáke vá inká e ayofin ma kama iyaonaí eya vá puntákein avuává posá ena nanin arinta kama ono.

³ Manáa yana san ma o afasí iyain baré nanin kayo ma vantiyá vetin ná aya ono. ⁴ Máan tin nompo mai varé nanin mano ma iyampon kaintin ná baré inten nafi áa ve anavasin ná baré inten nafi mai esé daná betí amápin ná monó avúavá baren ná betii anóe afóentá anona yafisino. Para vara seyo mai avúavá anon Tiyarafenu amusin amé iyan mino. ⁵ Máan té iyan mifo fura sen ma veni kéká ma ída vain baré nanin mano vei ákona inin Tiyarafenu rá kauráken mi aya ino van ena ena vayan má inuran má amúkiyan bá é iyan mino. ⁶ Máan té iyan

* **4:3:** Esé 9:3; Rom 14:6; 1Ko 10:30-31 * **4:7:** 1Ti 1:4 * **4:10:** 1Ti 2:3-4 * **4:12:** Tai 2:15 * **4:14:** 2Ti 1:6

* **5:6:** Pori ma ma vaya sikhein mai máan nanin kayorá ída yafiseno van mi sikhen mino.

mifo yan bukhafará ma amusin dosiyain baré nanin mano monó avúavápin purein an mi yakhen mino.* ⁷ Máan tiyáke ma afova vava vá ákona e monó nanin banta vá dere siamiresin ná mai ma varé nanin kayorá ma yafisinonará mana ano ída vá oyampá baya sino. ⁸ Máan tinten mifo ve anóe afóen nafi áa ve anafu aráon nafi ma ída kamaen dafisin nain kéká ano vetíi mumunan pefái me ampikhen mino. Máan kéká ano afokhampin ma vain nanin banta esantaren namu uron mi ukhen mino.

⁹ Mai ma aya ono van ukhanona varé nanin ná mai sikisti (60) orana esantakhein báken ná inká pefá be avafun má ákonaen baré ein nanin ná bano. ¹⁰ Mai varé nanin mano fefá be akhafanará kama yafisirí iyaren nafi áa ena kéká ano ma ven amápin erin maen betin kama iyaren nafi áa ena monó nanin bantafin ará barará dáken doriyaren nafi áa umampin bain kéká aya iyaren nafi áa minó damú kama avúavá barano van útakhen bákan ná banasi ano véin nan kama nanin mi van mino siyaré ein nanin ná bano.

¹¹ Auyen nanin kéká ma varesí ukhan tiya ída vá aya ono van ono. Mai fara vara seyo, vetí ankan ma evaránen banta varano van ma anunu inten maen Karaisin ma mumunan in avúavá me ampiren banta o varanten mino. ¹² Máan ma inain avúavá anon betí ma fefá tian damú dákaré inain baya yurafúden uman baranten mino. ¹³ *Máan tiyan maen ayesara uren nóken banasi amá e feren khuven iyáken baya e sian more mere iyan maen ena nanin banta ano ma yan bain dana san ankayan tiren ída seren baya sé iyan mino. ¹⁴ *Máan tukhein nan mi auyen baré kayo ano evaránen banta mamaren báken iyampon kaiyan mápin dafisino van mi siamiyá uno. Máan ma intin mi vetí ankani namuro kayo ano ída kanaíen oyampá baya sinten mino. ¹⁵ Mai fara vara seyo, manáa kéká ano mumunan inka me ampiren Ban Anon ánain dakhafiyái ma vava siyá uno.

¹⁶ Máan tukhein nan mi mana mu-

munan nanini kékápin ma varé nanin kayo ma vantin mai nanin mano vá mai kékáká dafisiyáken ída vá monó nanin banta uman amiyan bano. Máan tintin ná monó nanin banta ano vá mai ma ve antun ída van ma ída kanaíen ayain danasinta yoseren ukhein baré nanin kayorasá dafisino.

Monó Ánon Banta Kayorá Ma Kama En Dafisin Baya Ino

¹⁷ Monó doran banta kayo ano ákonaen ná ben ma amikhein doran dorariyáken ná Tiyarafenui vava vanasi siamiyan afova amiyan tiya vá betí miyan mun ékaan tano. ¹⁸ *Mai fara vara seyo, Tiyarafenui vompon dóki ano máa sikhen mino. “Burumákaó ano ma uviti aran dasamiyáken niyantiya ída vá oorá damono.”

Diu

25:4 Inká Tiyarafenui vompon dókifin deren máa sikhen mino. “Mai ma yoran nain kéká ano miyan ná barano.” *Ruk 10:7*

¹⁹ *Kankanán mano fi kanú manaú ano fi ma ída afová en ontan nain danáká ma monó doran banta kayo au finté ma intiya mai vava ída vá ineno. ²⁰ *Umeí ma uran nain kékasá banasi avorá asesin ná ena nanin banta ano máan avúava baran nan perano.

²¹ Tiyarafenui vá Yisas Karaisin má inká kantasí ma ukhein enisori kayo vá avorái ma vava siamé umpo ída vá aronará o khábe e khábe iya vá puntáde yorano.

²² Ída vá ámun uare monóká dafisin banta aní ureya aviádesin dorano. Manáa kéká ano ma umeí inámpin ída vá éin má oriveya umeí iyáke funtákein avúavá ana vá barano.

²³ Ena ena aí baré iya ompo ída vá non uró ana niyákeya ará ma ayain ná manáa uvaini non masá nano.

²⁴ Manáa kéká ano ume avúavasí iyan maen mai kayo van Tiyarafenui kópin oriven uman baranten mino sen minó ano afová ukhen mifo manáa kékái ume mai ída afová esin baré intin inámpákéi mamanan dáko inten mino. ²⁵ Máan mana en mi mai ma kama avúavá ma variyain kéká banasi ano afová ukhen mifo inká

* 5:13: 2Te 3:11 * 5:14: 1Ko 7:9 * 5:18: Mat 10:10; 1Ko 9:9 * 5:19: 2Ko 13:1 * 5:20: Efe 5:11

mai ma aupáké ma kama avúavá bariyain kéká ída afová esin baré intin ínaimpákéi maman dákó inten mino.

6

Doran Banta Ano Ma Vei Ayafa Aránaó Ban Baya Ino

¹*Monó nanin banta ano ma ída miyan baran dorarí ma iyanten ná betíi ayafa vanta aránaópá bantin ná banasi ano Tiyarafenu aví bá inká teti ma siamiyaruna vava vá ída oyampá baya sino. ²*Monópin ma van nain bantai yorarí ma iyan nain kéká ano ída vá te sífá tiváe ino siren ná avesarain avúavá barano. Máan tin nompo, ena mumunan kékái aya iyá uno sireya ída vá avesara iyáke ákona e vá dorano. Timoti oe, fura sikhein baya vanasi afova amiyáke vá ákona e siamesin ná mai ánain dakhafino.

Moni San Ma Anunu In Maen Mai Namu Avúavái Ana Ino

³*Kampun afova ma amin kéká ano ma ma siamiyaruna vava van kampun baya e sinten mifo ma maen tetisi Bafan Yisas Karaisini vayan báken monó avúavá ma ákona uantan bayan ban mino. ⁴Mai ma ena avúaváká ma afova amiyain kéká ano kákan bí barano van manan iyan mifo mana yaná ída afová ukhen mino. Betíi ineine ano fura sen asuse ukhan pasen betíi vava van manan pura siyá uno siren ena nanin banta maman bararasí iyan mino. Máan tiyáken aruve asivein baya vá kampun baya ma e uvaman more mere in má inká ena ano ma namu avúavasí iyain nan namu ineine uantiyan ban avúavá anan baré iyan mino. ⁵*Máan avúavá ma variyain nanin bantai ineine ano fura sen namu uron ukhan pasen ena ena kampun baya anan tiyáken uman maman dákó é iyan mino. Máan tiyáken monó aa fákéi kokhon danasinta varanté unon ten iné iyan mino.

⁶*Máa siyan mifo Tiyarafenui vava ma iniré mai ánain bákuriyá tiferuna anon tetisi monó tin avúavá e inoren kákaní

iyán mino. ⁷*Mai fara seyo ma varafin ma afoká é tiferuna yamú ída mana yaná baré erikhé tiferuna inká puronté maé ída mana yaná baré oró tifanté uno. ⁸Máan tukhein nará dunan má tuí daná bá ma yékun bantí maé mai van kana vá uno vá tétifano. ⁹Máan tukhen mifo kokhon danasinta varano van ma iyain kéká anon akhenókafin eraven ankamin mi namu ineine vá namu avúavá bá ena ina yaná ma aranan má ano máden asuse uran uman baré iyan mino. ¹⁰*Mai fara vara seyo, moni san ma anunu in maen mai namu avúava kayoi arú ino. Moni san ma anunu ein kéká ano mumunan avúavá me ampiren maen arun naná o yosé iyan mino.

Mumunan Avúavápin Ma Ákona Ukhen Ban Baya Ino

¹¹*Máan tiyan mifo Timoti oe, Tiyarafenui vanta ompo mai avúava san péde nentá báke vá mai ma kamaen puntákein avúavá ana vá bákurono. Máan tiyáke ei monó avúavápin Tiyarafenu amusin ame vá bentá mumunan má avábá ma in má bempáké ma kusen ban avúavá bá inká ara ara uman erintin ma mantaan ákona ukhen ma van masá pákaan ákona uráke vá bano. ¹²*Máan turáke mumunan avúava sará kama aruvirí ono. Mai ma vanasi avorá ma siyákeya inka Tiyarafenu rá mumunan é uno siren nan ma fara van oriyan ban annan ma amiren arakhein ná pákaan ákona ure vano. ¹³*Minó danasinta ma aun amikhein Tiyarafenu avorá bá inká mai ma Pontius Pairotin avorá ma funtákein kó ma sein banta Yisas Karaisin avorá báí ein ákonaé tiamiyá uno. ¹⁴Mai ma Tiyarafenu ano sein baya ánain mana yakhafiyáke vá banasi avorá puntáke vasin ná tetisi Bafan Yisas Karaisi ovaránen erino. ¹⁵*Ma ma minó ákona van ma avábá bíkakhein Tiyarafenu vá kin kayoi Kin má bafan kayoi Bafan má ano ma aní ukhein damú ma afoká intin mi inaru fáke Yisas Karaisin maman dákó inten mino. ¹⁶Beyakái ída furinton moéken kakhakheintá para vákan maen mana ano ída véin áde oré

* **6:1:** Efe 6:5 * **6:2:** Frm 16 * **6:3:** Kar 1:6-9 * **6:5:** 2Ti 3:8; 4:4; Tai 1:14 * **6:6:** Fir 4:11-12; 1Ti 4:8; Ibu 13:5 * **6:7:** Yop 1:21 * **6:10:** Efe 5:5 * **6:11:** 2Ti 2:22 * **6:12:** 1Ko 9:25-26; 2Ti 4:7 * **6:13:** Yon 18:36-37 * **6:15:** Rev 17:14

iyán mino. Mana vanta ano béin ída ontein bantín ída kanaíen onanten mifo béin maman daní esin ná beni ákona ano fara van oriyan bano. Pura ino.

Kokhon Ona Van Kéká Ano Ma Kama Avúavá Baran Baya Ino

¹⁷*Mai ma kokhon danasinta ma varará dan bákán ma vetíi moníká ma ákona inin kaiyain kéká mai ainen mi kípanten mifo vetin tiamesin ná ída vá au khakan ino. Mai ma o afasí é tiferuna yanasinta ma moéken timiyá ma simusin dosiyá tiferuna Tiyarafenu anon para van oriyan báé iyan mifo véintasá ákona inin kaono.

¹⁸Betin tiamesin ná betíi monípóké kama yorarisá ino. Máan tiyáken ná amusin pinté mai ma manáa yana san ma o afasí in nain kéká aya iyáken intéa yanasá Tiyarafenu ano amikhen nafi mai ena nanin banta aya ono vará ena ena útakhen bano. ¹⁹*Mai avúavá ma varan nain manon betíi kama yanasinta inarufá kainten mino. Mai anon ákona namádan ma yafereiní uádákaren mi fura sikhein aunan ínainpáké o varanten mino.

Pori Ma Timotin Nan Tiyarafenui Yorantá Kama En Dafisino Van Tiamein Baya Ino

²⁰Timoti oe, Tiyarafenu ano ma eni avúavá ódaren amikhan nain dorantasá dafían ákona ono. Namu avúavá oyan amire vá mai ma kampun baya sen noin kayo vará perano. ²¹*Manáa kéká ano kamaen mumunan iyá íkan mai kampun baya kayo ano e yarifaádan betíi mumunan me ampiren orikhen mino.

Tiyarafenui sarisari ano vá tiretin má bano.

* **6:17:** Ruk 12:20-21 * **6:19:** Mat 6:20 * **6:21:** 1Ti 1:6; 2Ti 2:18

**PORI MA KAN DÁDASÍEN
TIMOTIN UVAMAN
AMEIN BOMPON MINO
(2 Timoti)
Kan Dádasíen Ma Timotin
Uvanteí Pákenai Afova
Vaya Ino**

Ma vompon ma uvantein banta ino.
Baya varen orin banta Pori ino. Ma
maen bei sipá kípan baya ma uvantein
mino.

Uvarein orana ino.
AD sikisti-seveni (67) fin ma Porin
evaránen karavusi fáken Romú
moráken arono van iyan mino.

Ma vompon ma uvantein baru ino.
Romú ino.

*Ma vompon ma uvaman amikhein
banta ino.*
Porini eyo iyampon báken kama arona
varen ma Efesasi o van monó doran
bantaí ukhein pumara Timotin mino.

*Nái ana vará ma vompon uvanten
nafino.*
Pori ma vei furin ádesí ukhan ma
sipá intan bompon uvaman Timotin
amein mino. Ma vompompin Timo-
tin ayaen ákona uantan baya vá inká
manáa yoran má ma varan nain ma
san mo sian asotú iyáken inká Romú
barufá Timoti nan oren béin o onano
van ina ukhen mino.

Pori Ma Amusin Baya Sein Mino

¹ Téi Pori mai Yisas Karaisini vaya varen
orin banta anon ma vompon uvaré uno.
Mai ma Yisas Karaisintá mumunan in
nain nanin banta ma Tiyarafenu ano
iyáantan bain aunan nan mi vanasi mo
siamino van Tiyarafenu ano vei anunu
finté téin tisinten mino. ² *Te sanin an
ma yakhein banta Timotin mi ma vompon
uvaman amé uno.

Teti sifóe Tiyarafenu vá tetisi Bafan
Yisas Karaisin mái sarisari vá arunaná bá
ará kusin má ano vá éimpin bano.

Pori Ma Timoti Ákona Uantein Baya Ino

³ *Timoti oe, éin nan Tiyarafenun tusu
siantiyáké mai ma se sináuyan mano
funtákein ineine vá monó tiantiyá einíi
iyá uno. Tiyarafenurá ma inuran má
bayan má timúkiyáké maé éin nan ena ena
simúkuantiyá uno. ⁴ Éin evaráne onano
van mi iyá uno. Para vara seyo, éi ma
arunaná bariyan ná ma me afa ukháeruna
van mi ovaré me iniyaruna éin ma ona-
nuna yamúi kákan timusin onté uno. ⁵ *Téi
afová ukhéku éi fura seya Bafantá ákona
e mumunan iya ono. Para vara seyo, e
anóe Yunisin má e aráo Roisin má ma
mumunan iyá éin mumunan mái va onon
té iniyá uno. ⁶ *Máan túkhen náí éin ánontá
ma siyan kaudéku ma Tiyarafenui amusin
mantaona van mi ákona e yoresin ira an
den barúten kano van mi siamiyá uno.
⁷ *Mai fara vara seyo, setin nan akhokho
van iyan bano vara Tiyarafenu ano ma
saunan timikhen naino. Ída ino. Tetin
ákona simirantin ena nanin banta avábá
iyáken inká tetisi sivútiváká dafían ákona
ino van mi inin timikhen mino.

⁸ Máan tukhen mifo Bafani vaya ma
vanasi siamin nan ída vá ayave van
iyákeya séi ma karavusifin baruna mai
Karaisini yoran nan mi vá umpo mai van
dere ída vá ayave van ono. Téin má
uman o yosiyáke veni kama vaya vanasi
siamin nompo Tiyarafenu ma amikhein
ákona vasá útakhe vano. ⁹ *Tiyarafenu
anon tetin nan kantasí ukhen bano van mi
setin tivíden aní urá bá tifé umpo setinti
sinunura saino. Ída ino. Pefá ma vara ída
afoká ukhan maen bei tarisari vá kama
avuvasí ma in má Yisas Karaisin pinté
uaren tetin aní ono van mi vaya sian
damuádan baren mino. ¹⁰ *Baré íkan mi
setin tiyain banta Yisas Karaisi ano furini
ákona finte e sivíden bei Kama Vaya finté
uaren mi fara van oriyan ban aunan ma
varan aai aníen mino. ¹¹ *Máan turen bei

* **1:2:** Apo 16:1; 1Ti 1:2 * **1:3:** Apo 23:1 * **1:5:** Apo 16:1 * **1:6:** 1Ti 4:14 * **1:7:** Rom 8:15 * **1:9:** Efe
2:8-9; Tai 3:5 * **1:10:** Ibu 2:14 * **1:11:** 1Ti 2:7

Kama Vaya ma vanasi siamin banta váke vá aposeri yorari iyáke vanasi afova amin banta vá bano siren Tiyarafenu ano séin aníen mino. ¹² Mai van mi séi karavusí ukhé ma umampin bá umpo mai van ída siyave iyá uno. Para vara seyo, séi ma mumunan iyaruna Vanta afová ukhékun mai ma véi simikhein kama vayará dafíken ten má bantí oriyaré béi ma ovaránen erin nain damúí mo afoká onté uno.

¹³ Banasi ma funtákein baya siamin avúavá ma sen pinte afova mantanona vá pákaan ákona ukhe Yisas Karaisintá ma mumunan ukhesin ávabá banti ma vanona vará ovare me ineno. ¹⁴ *Tiyarafenu ano ma éin Kama Vaya amikhein ná mai ma erasampin bain Kantá Aunan mano ayainti vá kama e yafiseno.

¹⁵ Éi afová ukhen nan Esiá bara fáké ma erikháen monó nanin banta vá inká Fíkerusin má Emokenesin má deren téin me ampikhen mino.

¹⁶ Téi karavusifin bákun ída ayave usintan nan Onesiforusin má minó bei kéká bá ano séin e soniyáken me ákona usintiyán mifo Bafan mano vá betín arunan uantano. ¹⁷ Béi ma Romú barafá eriven maen ten nan mi minó akhempá dosen noren e soman dákó en mino. ¹⁸ Karaisi ma ovaránen erin nain damusá Bafan mano véin nará arunan uantano. Para vara seyo, Efesasí barufin ma Onesiforusi ano ara ara aa fáké ma séin tiya ukhein mai éi afová ukha ono.

2

Yisas Karaisini Kama Aruvin Bantai Vaya Ino

¹ Máan tukhein nan mi se sanin Timoti oe, Tiyarafenu ano ma Yisas Karaisin pinté uaren ma amikhein tarisari rasá ákona e mantano. ² Minó danasinta ma vanasi afova amiyá eruna mai fákéna éi afová ukhen ná kokhon nanin banta avorái éin mai vaya siamikhe umpo mai ma fura sen dorano van iyain banta kéká tiamesin ná betí ankan má dere vá ena nanin banta kasaen afova amino.

³ *Yisas Karaisini kama aruvin banta an deya vá tetí ankan ma variyaruna uman ná barano. ⁴ Aruvin bantaí ma inte mai ída vá áesin ma varáke yanasinta ano éin damuan ákona ino. Para vara seyo, máan ma esin maen mai ma véi aruvin bantaí uraya vaona vanta ano ída amusin inten mino. ⁵ *Mai ma íútin banta ano ma íútin avúavá pákena ída yakhafiyaren ma fa savifá íú tian afe uren ída mana yaná o vareiní in nampo vá Bafan mano ma sikhein avúavá kasá dorano. ⁶ *Ákonæen ma yunan dorarí iyaré ein kéká anoi amusin iyáken esé araién mai yunan naan oné iyan mino. ⁷ Bafan mano ineine aminti mae afova varan nampo ma ma siamiyaruna yanasinta ákona e vá inian kaono.

⁸ *Kin Devitini kéká pintéi Yisas Karaisi afoká ukharéin mi Tiyarafenu ano avían mantakhen mifo ída vá áun nono. Mai Tiyarafenui Kama Vayan bakái vanasi siamiyá uno. ⁹ *Mai ma Kama Vaya siamiyaruna van mi karavusifin senípó anan damuádá umoyan banta an dakhé uman bariyá umpo Tiyarafenui vaya ana ída kanaíen damuádantin banten mino. ¹⁰ Ten timaniná uman eriyán mifo Tiyarafenu ma aní ukhein kéká aya ékun Yisas Karaisintá mumunan ukharen para van oriyán ban kakhampin orino van mi fara ákona ukhé uno.

¹¹ *Ma ma sikhein baya ano mai furan tikhen mino.

Béi má ma furó tifanté

mai véi mái o vá tifanté uno. ¹² *Tetí ankan ma umampin oró tifanté, mai véi mái o yafisiní ó tifanté uno.

Béin ma oyan amé tifékun maen,

béi yere setin oyan timinten mino.

¹³ *Yisasin ánain bákuró tifanté uno siré ma ída vákuré tifékun maen, béi fara mai vayará dafían ákona ukhen banten mino.

Para vara seyo, véi ma iyáantádan nain daná ída yo varanten mino.

Tiyarafenu Ano Ma Aní Ukhein Doran Bantai Vaya Ino

* **1:14:** 1Ti 6:20 * **2:3:** 2Ti 1:8 * **2:5:** 2Ti 4:8 * **2:6:** 1Ko 9:7 * **2:8:** Rom 1:3; 1Ko 15:4 * **2:9:** Efe 3:1; 13; Fir 1:12-14 * **2:11:** 2Ko 4:11 * **2:12:** Mat 10:33 * **2:13:** Rom 3:3-4; Tai 1:2 * **2:14:** 1Ti 6:4; Tai 3:9

14 *Ma ma siamiyaruna yanasinta van banasi evaráne siamiyasín Tiyarafenu avorá ída vá baya van asive asive iyan bano. Máan avúavá ano ída kanaíen banasi ayaiyantín pasen Kama Vaya ma siamintín ineno van in nain kékái ineine máden asuse inten mino. 15 *Ákona yorarí iyasín ná Tiyarafenu ano eni yoran nan amusín iyan ná onano. Kama yoran banta ano ída vá ayave van iyáken Tiyarafenui fura vaya ana vaéan banasi amintín ná inino. 16 *Namu avúava san péde nentá báke vá aniana vaya ma sin naimpin ída vá o ferano. Para vara seyo, mai avúava sinta ano namu uron ukhan mi Tiyarafenu ano ída amusín é iyan mino. 17 *Mai avúavá anoi namu namon ma khen orera einí inten mifo Imeneusín nú Firetusín nú amaniná ma yáko ukhein ná onano. 18 Betí ankan mai fura sikhein baya me ampíren maen púkaré ein kéká san pefái e mantakhen mino sen kampun ten nóken manáa monó nanin bantai mumunan máden asuse iyan mino. 19 *Máan tiyan mifo Tiyarafenui monó nanin banta anon ákona varará ma namádan daféan ákona einíi ukhan mai van Tiyarafenui vompompín máa sikhen mino. “Bafan mano mai ma ven ninaí ukhein kéká afová ukhen mino.” *Nam 16:5* Inká enadá máa sikhen mino. “Bafan ninan bá uno ma siyain kéká ano vá namu avúavá oyan amino.”

20 Kokhon ona ma yan bain kékái mápin ma yunan kuren nan danasinta ma vain mai kori vá siriva vá póké uvaran danasintan bakan inká daa vá karí póké bá ma uvaran danasinta van ukhen mino. Kákan doran ma vain damú anan kori vá siriva fóké bá ma uvaran danasintafó aruven baren é iyan mifo yaa vá karí bápó ma uvanteimpín mi kanti karúde iyan mino. 21 Máan té iyan mifo mai yanasinta ma sesé uan avusese einíen ma mana vanta ano vei fain avúavá do sesé uan karúden maen kori vá siriva vá póké ma uvanteiní uvintín Tiyarafenu ano vetin pókéi vei yorarí inten mino.

22 *Auyen pumara arintai namu avúava sará pédeya funtákein avúavá ma varano

van anunu iyaona ana vá dakhafono. Mumunan in má avábá bá ará kusín avúavú bá ana variyákeya vá mai ma inin mano funtákan ma Bafantá monó tiyain kéká basá manafín amusín eya vano. 23 *Máan tiyáke mai ma arápiní in ma aruvin maman afoká é iyain baya kayo ma sin naimpin ída vá en má oriveya aya ono. 24 Bafani yoran nanin banta ano ída vá aruve asíve in avúavápin oferiyáken ná inká béi ma ará namu uantan nain kéká kama ana iyáken ara ara nanin banta vá kama inin amino. 25 Mai ma Tiyarafenui fura sikhein baya ma oyan amiyain kékápin kusín avúaváposá afova amino. Manáa yamú Tiyarafenu ano máan kéká inin amintín maen ará baéden pura sikhein bayará mumunan inten mino sé ákona ineine iyá uno. 26 Mumunan uvintín ma kama ineine erin nain damúí mai ma Ban Anoní kádampín báken ben oo yayiyá ein pinté me yumíaden erinten mino.

3

Bara Khípan Akhempá Ma Namu Avúavá Afoká Inain Baya Ino

1 *Timoti oe, ma ma siamenuna vaya yere vá afová ono. Ma vara ma mo kípano van iyantín maen mai namu avúava suron mi afoká inten mino. 2 Mai fara vara seyo, vanasi ano moníká inin kaúden beyan ma van nain nan manan iniyáken be amo siren au khakan inten mino. Máan tiyáken Tiyarafenu van tiren intiyain betíí anóe afóeni vaya átakharé uren betín ma susu siantan avúavá ída vantín maen inká Tiyarafenui kantasí ukhein danasinta van inian paen danasí inten mino. 3 Betimpín ída avábá in má ena nanin banta ma ume ampíantan avúavá bá ena nanin banta van kampun baya e sian more mere iyan betíí aurá ída kamaen dafisinten mino. Máan tiyáken kama avúavápin ída amusín bantín maen ena nanin banta ma aí amin nain nan manan ininten mino. 4 Betíí arona kayo avían namuro ayampín amiyan aau vain daná ino sen ída ovaren me ininten mino. Inká

* 2:15: 1Ti 4:6 * 2:16: 1Ti 4:7 * 2:17: 1Ti 1:20 * 2:19: Ais 52:11; Yon 10:14; 1Ko 8:3 * 2:22: 1Ti 6:11
* 2:23: 1Ti 4:7 * 3:1: 1Ti 4:1

au khákan daná mamádantin édaviyantín maen bara rákena amusin in avúava san moéken anunu iyáken Tiyarafenu me oyan aminten mino. ⁵ *Betí ankan mai yan bukhará anan monó té iyan mifo Tiyarafenu ma monó tiantan avúavápin ma ákona vain me oyan amé iyan mino. Máan avúaváká ma vain kéka sará péde nentasá bano.

⁶ Máan kéká anon banasii mápin peren kuven iyáken aran nan avúavápó mai ma ída ákona vain nanin kayo ano ma umeí uren mai umampin bain kéká máka siyan mino. Máan tiyákan mai namu avúava sinta ano vetintá dafisiyan mino. ⁷ Máan kéká ano ena ena yamú auyen avúaváká ma monó tin dakhafé iyan mifo mai ída uron mi fura yaná afová iyan mino. ⁸ *Mai afova ma amiyain kéká ano Mosesi ma fura vava siamiyákan ma Yanesin nú Yambresin nú ano oyampá baya siyaré ein an mi yiyan mino. Betíi ineine ano asuse ukhan ída fura mumunan mái van pasen Tiyarafenu ano vetin oyan amen mino. ⁹ Máan tein mifo ída ayáká báken mi Yanesin nú Yambresin nú amaniná ma afoká ein avúavá dákó intin ódaren betí ma variyá ein avúava san namun iyaré uno sen afová inten mino.

Pori Ma Manáa Yoran Timotin Amein Baya Ino

¹⁰ Máan tinten mifo Timoti oe, séi ma siamiyaruna vava vá tivútivá bá inká téi ma varano van tiádékun bain má éi afová ukha ono. Inká intéa mumunan masá bákerá ena avábá iyá kama avúavá baré oriya rafu mai yeren afová ukha ono. ¹¹ *Téin ma uman timiyáká ma sí pinté erikheruna éi afová ukha ono. Inká téi ma Antioki safi Aikoniamu safi Ristará barura safi ma váké umampin oriyákan ma Bafan mano mai uman kayo finte siya iyá ein éi afová ukha ono. ¹² *Mai fura ino. Yisas Karaisintá mumunan iyáké kama avúavá ana variyá bano van muno ma sin nain kéká ano uman o yosinten mino. ¹³ Máan tinten mifo namu vanta kéká bá dan bukhará ana ma kama ukhan ma vetin aúpin namu ukhein kéká bá anon

kampun bayafó ena nanin banta siamen nóken betiyan deren mai kampun baya kayorá mumunan inten mino.

¹⁴ Máan tinten mifo mai ma afova variyaona yanasinta mai fura yaná ifo fákaan ákona ukhe vá bano. Para vara seyo, éi afová en nan mai fura vava khayon tiamiyaren mifo mai rasá ákona mumunan kaono. ¹⁵ Éi ma e anoní iyanan maen Tiyarafenui kantasí ukhein Bompon Dóki finte nan Yisas Karaisintá ma ákona mumunan esin ma Tiyarafenu ano evaránen aviran nain afovan amikharen mino. ¹⁶ *Tiyarafenui Aunan manon ma vara ráke vanta inin amíkan mi Tiyarafenui vompon dókifin minó baya uvamádan báken tetin tiya íkái kama yaná bá namu yaná bá afová iyá tiféuno. Mai vava anon tetin maman puntáden puntákein avúavá ma varan afova simiyan mino. ¹⁷ Tiyarafenu ano mai aa sákéi minó damú ma kama yoran mana ma variyan ban avúavái maman ákona usintian mino.

4

¹ Máan tukhein nan mi mai ma maná damusí intin ma vei yafisin maman dákó ono van iyáken ma eriven ayun para vain má púkein kéká bá ma yaimin nain Tiyarafenu vá Yisas Karaisin má avorái éin ákonaé tiamiyá uno. ² Kama yamu safi áa namu yamu safi mai Tiyarafenui vava fara vá tiame oriya vano. Ei vanasi vempáke sá maman puntariyákeya namu avúavá baran nafo sireya ará ákona uantiya vá ákona e kama afova vava siameno.

³ *Mai fara vara seyo, maná damusí ma intin maen banasi ano funtákein baya ma siamiyasin ída ininten mino. Betíi anunu ánain mi yakhafen mai amusin en inin nain baya ma siamin nain kayo van mi yosinten mino. ⁴ Betí ankan mai fura vava me oyan amiren maen maní baya kayo ánain mi yakhafinten mino. ⁵ Máan tinten mifo ara ara avúavá ma yákó iyantiya afová ukhe vá bano. Bafani yorantá ma aí o yosin nan ída vá periyáke

* **3:5:** Mat 7:15, 21; Tai 1:16 * **3:8:** Eks 7:11 * **3:11:** Apo 13:14-52; 14:5, 8-20 * **3:12:** Mat 16:24; Yon 15:20; Apo 14:22 * **3:16:** Rom 15:4 * **4:3:** 1Ti 4:1

vanasi ma o aviádesin Karaisi vaípa ma erin nará ineno. Máan tiyáke Tiyarafenu ma amikhan nain doran ná dóan pisenó.

Pori Ma Kama Yorarí Uren Bei Miyan Nan Ave Ukhein Baya Ino

⁶ *Tiyarafenu ma susu siantan uvaini ma vanaein an dé pefái se saunan amikhé uno. Máan tukhékun tenti furin inka ádesí ukhen mino. ⁷ *Téi kama siruvirí uré téin ma simikhá ein doran dóan kíparéi Yisas Karaisini Kama Vaya ma siamin doran ákona uan pákaré bá uno. ⁸ *Máan tukhéi Bafan ma erin nain damúi funtákein avúavá póké me yaíden mi mai ma savaimpin o aní uvin ma amusin amiyainien mi siminten mino. Teya va siminten naifo mai ma funtákein avúavá bariyan ma veni erin nan ave ukhein kéká bá deren kama amusin aminten mino.

Pori Ma Timotin Nan Aine Vá Ereno Sein Baya Ino

⁹ Aine vá aa van dosire se vaípa ereno. ¹⁰ *Mai fara vara seyo, Demasi ano vara ráke yanasinta van anunu iyan pasen mi séin me ampiren Tesaroniká barufá orikan Karesensi mai Kare-siá barafá orikan inká Taitasi mai Darame-siá akhempá orin en mino. ¹¹ Máan tuvin mi Ruku anan téin má ban mifo vá erinte mae Makin masá avire ereno. Para vara seyo, véin ten tiyaen dorarí ukhen mino. ¹² Tikikasin pefá tiantékun Efesasi barufá orikhen mino. ¹³ *Éi ma eriyáke vá Troasi barurá Karapusintá tesi yante afuin me yavamádékun ban mifo mai vá bompon dóki kayo vá inká mairá ma sipisipi aurá ma uvanteruna vompon dóki ma yékun bain masá bare ereno. ¹⁴ *Aeni fóké ma manáa yaná uvaran banta Areksanda ano séin uman timiyain baré intin Bafan mano mai avúavákái anona véin uman aminten mino. ¹⁵ Tetí ankan ma siamiyaruna vaya kayo van béi oyampá baya sé iyan mifo véin tasá dafían ákona ono.

¹⁶ Esé araién ma kó daimin banta avorá tiviren oriyán maen minó ano séin me ampikharen mifo mana ano ída séin má

baren mino. Mai avúavasí ma ein Tiyarafenu ano vetíi ume ampiantano van mi inikhé uno. ¹⁷ Máan tiyá umpo Tiyarafenui Kama Vaya siamintin minó ena anan nanin banta ano inino van mi Bafan mano séin má báken ákona simiren purin pintena siyaen mino. ¹⁸ Namu avúavá sinta ano ma séin dakhafiyán pintena Bafan mano siya uren kamaen tiviren orintí bei inaru yafisimpin oronté uno. Minó damú Tiyarafenu avisá maman daní iyá bano. Mai fura ino.

Porini Kípan Baya Ino

¹⁹ *Pirisiran má Akuíran má inka mai ma Onesiforusini kéká bápín ná tenti simusin baya yesin orino. ²⁰ *Erastusi ano Koriní barurá e kharemí maé inká Trofimusin aí iyaimpin Miretusí barurá me afa é uno. ²¹ Mará aine erivesin ná iyon in damú afoká ino. Yuburusin má Pudensin má Rinusin má Krodian má inká minó mumunan kéká bá anon amusin baya yan éi vaonafá oren mino. ²² Bafan mano siretin aunampin bantin ná beni sarisari ano siretin má bano.

* **4:6:** Fir 2:17 * **4:7:** 1Ti 6:12 * **4:8:** 1Ko 9:24-25 * **4:10:** Apo 15:37-39; 2Ko 8:23; Kor 4:14 * **4:13:** Apo 20:6 * **4:14:** Ais 59:18; Rom 2:6 * **4:19:** Apo 18:2; 2Ti 1:16-17 * **4:20:** Apo 19:22; 20:4; Rom 16:23

**PORI MA TAITASIN
UVAMAN AMEIN
BOMPON MINO
(Taitasi)
Taitasi Vompon Ma
Uvanteí Pákenai Afova
Vaya Ino**

Ma vompon ma uvantein banta ino.
Baya varen orin banta Pori ino.

Uvarein orana ino.
AD sikisti-sikisi (66) fin mino. Mai maen Pori ma karavusi finte ma utúantan ma Romú baru me ampiren bei yorarién nóken mino.

Ma vompon ma uvantein baru ino.
Masedonia safi Efesasi safi áa Nikopori safi sen amino iyan mino. (Taitasi 3:12 fin ná onano.)

Ma vompon ma uvaman amikhein banta ino.

Ena anan pinte vanta ma Porin arona váken ma ven ayaen monó dorarién noré ein banta Taitasin mino. Máan tiyaren maen Kirití musóká o váken monó dorarí iyan mi uvaman amikhen mino.

Nái ana vará ma vompon uvanten nafino.

Taitasi ma Kirití musóká monó dorarí iyáken ma uman dosiyain nan mi ará ákona uanten inká manáa yorani aa aní uanten ukhen mino.

Pori Ma Taitasin Uvaman Amein Baya Ino

¹ Téi Pori Tiyarafenui miyan ída varan doran bantan báké Yisas Karaisini veya varen mo siamin banta uno. Béi anon téin tisintein mai ma veyan iyákein nanin bantai mumunan ayaé mo ákona uantékun Tiyarafenui fura sikhein baya vá avúavá bá afová uren béin ánain bákurinten mino.

* **1:2:** Kor 1:27 * **1:4:** Rom 1:7; 2Ko 8:23; Kar 2:3 * **1:6:** 1Ti 3:2-7; 2Ti 2:24-26 * **1:6:** Manáa afova vanta kayo ano mai van máa sikhen mino. Mana nanin máa vá barano. Ena afova vanta kayo ano mai van máa sikhen mino. Ída vá anasi máde ifá urú urú en nono. 1 Timoti 3:2, 12 fin dere vá onano.

² *Ma fura sikhein baya ano mai ma Tiyarafenu ano fara van oriyán ban aunan amenté uno siren iyáantan bain nanin bantai mumunan má afova vá ákona uantanten mino. Pefá ída minó daná afoká ukhan mai ma fara van oriyán ban aunan timeno van tiádan baren mino. Tiyarafenu ano ída setí ankan kampun tisinté iyan mino. ³ Pefá ma véi siádkaré ein damú pura sen afoká íkan mi vei Kama Vaya maman amasí urái mai Vaya setí ankan minó nanin bantafin tian amá iyá uno. Mai ma setin evaránen tivíkein mai Tiyarafenu ano séin aní uren beni yorarí ino van tisintái ma Vaya minó nanin banta siamiyá uno.

⁴ *Taitasi oe, erasanti mumunan mano manái ukha, éi sen tanin an mi yakhen ná ma vompon éin uvaman amé uno. Tetin Tifóe Tiyarafenu vá tetin ma siya uren tiviran banta Yisas Karaisin mái sarisari vá ará kusin masá éimpin bano.

Taitasini Yoran Kirití Musóká Ban Mino

⁵ Erasan ma ída yóan kípakheruna yoran dóan kípiyákeya séi ma siamerunái e vá minó kákan baru kayo fimpá Yisasini mumunan nanin bantai yoran banta kayo khaono van mai anarái éin Kirití Musóká me afaé uno. ⁶ *Mai yoran bantai avúavá ano vanasi avorá puntákantin be aná bá ana vá puntáden bano.* Béin akhafana ano yere vá monópin mana váken be anóe afóeni veya ída átakharé uren ma fon iyani avúavá ma ída variyantiya vá mai vá ódeya avirano. ⁷ Tiyarafenu ina yanáká ma yafisin bantai avúavá ano vanasi avorá puntáken ná bano. Béi ída vá bei aví daní uren ena aví maman bararasíen ná inká ainen aran ádé bain banta váken ná ída vá óen non naren ná aruvono van ino. Béi ída vá banasii ona kampun tiren baren ná inká moníká ana inin kaen ná ino. ⁸ Máan tin nafo ena nanin banta ano ma véin amápin ma erintin ná avábasá ino. Béi minó kama avúava san mana vá anunu iyáken kama ineine ánain bákuriyan dafíken ná bano.

Béi vei ineinerá dafiben ná puntáden kantasí ukhen bano. ⁹ Mai ma fura vaya véin pefá tiamikhá ein ná pákaaren mantaan ákona ino. Mantaan ma ákona uven maen puntákein bayafó ákonaen banasi siamiyáken ná inká mai ma fura vaya ma namuroí iyain kayo vá puntarano.

Kirití Musóká Ma Namu Avúavá Bariyain Kékái Vaya Ino

¹⁰ *Para vara seyo, vaya ma átakharéin nanin banta kokhon mi Kirití musóká ban mino. Beni ana i vain baya ma sian pura yanasí uren banasi ma máka sen noin kéká kokhon mi van mino. Mai kéká pinté au khavin avúavákái Tiyarafenu ano evaránen aviranten mino ma siyain kéká anon moéken pura ma seiní iyan mino. ¹¹ *Pura sikhein baya fókésá betíi aa iyádesin ná betí avaya fákano. Para vara seyo, vetí ankan banasii ona vá moní bá kampun tiriyá barano van ída ma siameren baya e sian more mere iyan banasii van máden asuse iyan mino. ¹² Kiriti kayo van kampun baya ana siyáken afá pon an den nóken avesara ana iyan ban kéká ino sen betíi sakhanampa vanta kayo finté mana ano sian dákó ukharen mino. ¹³ *Ma fura sen afoká ukhein avúavá baya ifo vá mai avúavápin ma oferiyaín kéká aufin ná ákona e vaya siamiyasin ná mai ma fura sikhein avúavá ánain mana vá bákurino. ¹⁴ *Yutan kayoi anafu aráoni maní bayará ma ákonaen tiamen nóken pura vaya ma yo ékiyain kékái vaya ída vá inino. ¹⁵ Ará ma avusese ukhein kayo ina yanasinta minó avusese ukhen mifo ará ma fainí ukhan ída mumunan iyain kayo ina yanasinta ída avusese ukhen mino. Betíi ineine vá kama yaná bá namu yaná bá ma afováin asuse ukhen mino. ¹⁶ *Betí ankan oo máa fókéi Tiyarafenu van afová ukhé uno sé iyan mifo vetíi avúavá ano ída véin bákuriyan mino. Máan tiyáken betí ankan Tiyarafenu van ída anunuen inian kaumpan uren baya átakharé iyain ída kanaíen mana kama avúavasí inten mino.

2

Pori Ma Taitasin Nan Puntákein Afova Vá Ameno Sein Baya Ino

¹ Máan tukhen mifo Taitasi oe, intéa vaya ákonaen puntákein ban nafi mai vá banasi siamesin ná afova uren dakhafino. ² Anon banta kayo afova amesin ná ída óen non nen asuse en nóken ná betíi ineinerá dafisino. Máan tiyáken inká kama vanta ino siyantín ena van anunu iyáken ná mai fura vayará mumunan ukhen ná mirenién uman eriyantin mantaan ákona ukhen ná bano. ³ *Mai ma anon banta kayo siameonai ana e vá anon nanin kayo siamesin ná betíi avúavá bá inin onan má pura sen Tiyarafenurasá dantin bano. Máan tiyáke ída vá baya uvaman more mere en ena nanin banta aran amiyáken ída vá ántin óen non naren ma óen in anunu ano vetíi inintá dafisino. Mai ma kamaen puntákein avúavá ana vá ena nanin banta aní ino. ⁴ Máan tiyáken ná auyen nanin kayo vá kama afova amintin ná be avafu akhá avábá ino. ⁵ *Inká betí ankan ineinerá dafiben Tiyarafenu avorá puntáken ban ná mápin kamaen dafisiyáken kama avúavá ana variya ná betí avafunái aránaópasá oriyan bano. Betí ankan mai avúavasí ma intin maen minó nanin banta ano Tiyarafenui vayará ída oyampá baya sinten mino.

⁶ Máan mana e vá minó pumara vanta afova amire ayaesin ná betíi ineinerá dafian ákona ino. ⁷ *Minó danasí ma inonafin ná ei kama avúavasá aníesin ná mai fumara vanta ano ódaren ná mai ánain mana vá dakhafino. Inká Tiyarafenui vaya ma sian afova ma ameno van éi fúkekhakhe vá ineine ure funtáde fura vaya ana vá tiameno. ⁸ *Éi ma funtákein baya ana ma siyasin maen maifin ída namu ukhantin banasi ano oman afoká inten mifo namuroí ma iyain kayo ano vetí ma siyain baya van ayave uren ída setin toyampá baya sinten mino.

⁹ *Ída miyan baran doran banta afova amesin ná betíi yafisin banta aránaó báken betíi yoran bariyan ná doran nan ma siantantin ída vá evaránen anona vaya

* **1:10:** 1Ti 4:7 * **1:11:** 2Ti 3:5-6; 1Pi 5:2 * **1:13:** 2Ti 4:2 * **1:14:** 1Ti 4:7 * **1:16:** 1Yn 1:6; 2:4 * **2:3:** 1Ti 3:11 * **2:5:** Efe 5:22 * **2:7:** 1Ti 4:12 * **2:8:** 1Pi 2:15 * **2:9:** 1Ti 6:1

sino. ¹⁰ Inká ída vá betíi yafisin banta kayo ina yanasinta umoyan barantin ná betin oman pura yoraríin kéká ino vá tino. Máan siyantín ná minó daná ma varan nain mano setin ma Evaránen Tivíkein Tiyarafenui vaya ma ena nanin banta ano iniyáken kama vaya ino sinten mino.

¹¹ Para vara seyo, Tiyarafenui sarisari ano ma vanasi ume fintena ma evaráne avíkein aa inká minó nanin bantafin dákó en mino. ¹² *Tiyarafenu ma oyan amin avúavá bá inká ma vara ráke namu avúava san ma anunu uren mai ánnain bákurin má ifá inon tiren mi mai sarisari ano saréa setin tisimiyan mino. Tiretíi ineinerá kama e yafíbe nóke ákona e mantakhe vá Tiyarafenu van peran kékasá bano sen tetin tisimiyan mino. ¹³ Mai ma setisi kákan Yisas Karaisi ano ma Evaránen Tivíkein Tiyarafenu ma vei kakhampin ma afoká inain nan tetí inikhé timusin iyá ave ukhé tiféuno. ¹⁴ *Mai ma setin nare siren ma ve au fóké ma namu avúavá pintena ma miyaní uren ma setin evaránen tivíden tesé uan avusese uren ma ve inái ukhein mai nanin banta ano kama avúavá ana varano van mi iyan mino.

¹⁵ *Máan tukhein nan mi Taitasi oe, mai ma éin tiameruna vaya kayo vá ena ena yamú minó nanin banta siamiyáke vá baya ma átakharéin kéka sá ákonæ funtarano. Mai ákona éimpin ban mifo ída vá áesin éi ma sinona vaya van mana nanin banta ano oyampá baya sino.

3

Pori Ma Vanasi Van Puntákein Avúavá Ana Vá Barano Sein Baya Ino

¹ *Banasi evaráne siamesin ná kamanin má beni ánon banta kéká báí aránaópa sá báken betin oo yayiyian ná kama avúavá barano van utaaren ná bano. ² Inká ída vá ena oyampá baya siren aruve asive iyáken ná bempáke sá ará kusen bano. Betí ankan puntáden báken ná ena nanin banta fura avúavá aní ino.

³ *Pefá tetin má dere vaya átakharé iyáké maka siré óen avúavápin timusin dosé nókun mai ano setin damuádá baré

tiféuno. Maifin ma vá tifékun maen namu avúavá bá ume avúavá bá ano setimpin bíkakhá ena ina yana san tiran niyáké ben ará namu uantan maran iyaré uno.

⁴⁻⁵ *Máan tiyaré tifé umpo setí ankan ma Evaránen Tivíkein Tiyarafenui anunu vá avábá bá ma afoká ein nan mi véi setin evaránen tivíken mifo seti ma funtákein avúavá bariyaré é tiferuna rasa ino. Ída ino. Bei arunanápói setin evaránen tivíken mino. Tiyarafenu ano Kantá Aunan pói setin tesé uren evaránen maman auyení urá bá tiféuno. ⁶ *Tetin ma Evaránen Tivíkein Yisas Karaisin pintéi uaren Tiyarafenu ano vei Kantá Aunan ída fákan tetin timaniná banaen mino. ⁷ Máan turanti mae Tiyarafenui sarisarirá tetin nan ída umeí ukhein mino siren para van oriyan ban aunan nan ma iyátintan bain ída aa iyarantí barano van ma ave ukharé eruna kasaé tetí ankan bará tifanté uno. ⁸ Taitasi oe, ma ma éin tiameruna vaya vará pura sen puntákein baya ino vá teno. Mai vará éi ma vaya fara e siame oriya vasin ná Tiyarafenuvá ma mumunan iyain kéká ano yafiben kama avúavá ana vá barano. Mai vaya ánnain ma vákurin nain kéká mai vaya ano kama ayairí inten mino.

Porini Kípan Baya Ino

⁹ *Máan tinten mifo mai ma ída kama ineine van ma asuse vaya kayo sen nóken ma vanasii ineine máden namu iyan ma inká be anafu aráon aví para vano van ma séi ven ana ayavéno uno siriyian ma vetíi man bayará bákuriyan ma aruve asive en noin kéká ádé ída vá orono. Mai fara vara seyo, mai vaya kayo maen asuse vaya kayon báken mai ano ída kanaíen éin aya inten mino. ¹⁰ *Manáa uman afoká inafó vá mai ma nóken betíi vayará ma ákona e nóken kampun baya kayo fóké ma ena monó kéká arápiníen ma noin kéká ma siamesin ída ininti inká evaráne enádá tiamesin ma ída ininti mai ída vá oo aí iya mairasá mo ifá ano. ¹¹ Éi afová ukha ono. Máan bantai avúavá ano ída funtákan

* **2:12:** 1Yn 2:16 * **2:14:** Eks 19:5; Diu 7:6; Isi 37:23; Kar 1:4; 1Pi 2:9 * **2:15:** 1Ti 4:12 * **3:1:** Rom 13:1-7; 1Pi 2:13-14 * **3:3:** 1Ko 6:9-11; Efe 2:1-2; 5:8 * **3:4-5:** 2Ti 1:9; Ibu 10:22 * **3:6:** Apo 2:17-18 * **3:9:** 2Ti 2:14, 16 * **3:10:** Mat 18:15-17

bei umefin bákan mai anon béin daimiyan mino.

¹² *Ínaimpáké ma Atemasin nafi Tikikasin nafi ma siantékun ma eni varu varen eni yoran aya ono van ma éi vaonará ma o unintiya éi aine vá aai ureya Nikoporisí barurá ereno. Mai fara vara seyo, iyon aú ma afoká inaimpin mai varurái o vanté unon té inikhé uno.

¹³ *Aporosin nú man baya afova vanta Senasin nú ma mairá onóben ma intéa yanasará inten nafi mai éi ayampaí ure vá mai yanasinta ayaesin ná mamaren orino.

¹⁴ *Tetin má ma monó tiyain nanin banta ano kama avúavá ana ma varen oriyan bani ana ma afová uren maen mi yunan má ona vá ma ída van nain kéká kasaien aya iyáken asese nanin banta anan banten mino.

¹⁵ Tén má ma minó mumunan nanin banta ma vain mano amusin baya siádákan éi vaípa oren mino. Taitasi oe, éi vá Kirití ma mumunan nanin banta váken tetin nan anunu iyain kékasá amusin baya siameno. Tiyarafenui sarisari ano vá tiretí ankan má bano.

* **3:12:** Efe 6:21-22; Kor 4:7-8 * **3:13:** Apo 18:24; 1Ko 3:5-6 * **3:14:** Efe 4:28

**PORI MA FIRIMONIN
UVAMAN AMEIN
BOMPON MINO
(Firimoni)**

**Firimoni Vompon Ma
Uvanteí Pákenai Afova
Vaya Ino**

Ma vompon ma uvantein banta ino.
Baya varen orin banta Pori ino.

Uvarein orana ino.
AD sikisti-tu (62) fin mi uvanten mino.
Korosike vompon má Efesasíke vompon má ma Tikikasi varen orein pimpá ino.

Ma vompon ma uvantein baru ino.
Romú ma karavusií ukhen maen karavusi namumpin mi uvanten mino.

Ma vompon ma uvaman amikhein banta ino.

Korosí baru ráke vanta Firimonin mino.

Nái ana vará ma vompon uvanten nafino.

Firimonin ina urantin miyan ída van doran banta Onesimasi ma Karaisimpin mumunan afá aváení ukheini ume ampiantano van mino. Ma vompon mano ume ampiantan má avábá in mái sian amá ukhen mino.

Pori Ma Amusin Baya Ino

¹ Tái Pori ano ma Yisas Karaisini Kama Vaya ma siamiyarunarái karavusifin báké erasan tifá Timotin mái ma vompon uvaman éi Firimoni ma verasanti mana yoran banta van ná ma moéké tinunu iyarunan amé uno.

²*Inká tetin tiyofin Afian má tetisi mana yoran banta Akipusin má inká mumunan nanin banta ano ma en amápin átaru uven monó tiyain kayo vái ma vompon uvaman amé uno.

³ Teti Sifóe Tiyarafenu vá Yisas Karaisin má ano vá tiretin tarisari uren ná ará kusin amino.

Pori Ma Tiyarafenun Tusu Sianten Amúkein Baya Ino

⁴ Tái ma éin nan timúkuantiyá maé Tiyarafenun ena ena susu siantiyá uno. ⁵ Mai fara vara seyo, ena kéká ano éi ma Yisas Karaisintá mumunan iyáke ma mumunan nanin banta van anunu ure ma aya iyaona van tisimí iniré uno. ⁶ Éi ma mumunan iyaonaíen ma mumunan iyain kéká bá ma monó tesin maen mai ma monó tin avúavápin ma éi ákona iyaonaíen mai kayo ano ákona iyantiyan mai ma Tiyarafenu ano ma kama yanasinta setin timiyain afová inono. Mai avúavá áesin afóka intin ná Karaisi kákan bí barano van mi ákonaé timúkuantiyá uno. ⁷*Éi ma mumunan nanin banta anunu iyaona anon téin kákan timusin má tirá ákona usintan má timiyan mino. Mai fara vara seyo, éi sen tifá anon mumunan kékái ará kusiantiya nái ma vaya siyá uno.

Pori Ma Onesimasi Ano Aya Ino Van Ina Ein Baya Ino

⁸ Mai van mi Karaisin avíká kasaé éin duvun ékuya kama avúavasi inon naren mifo ⁹ se nan ma anunu iyaona van mi fara inaúan iniyá uno. Anon banta Pori ma Yisas Karaisini yorantá karavusifin bain mano ma inauádein bompon ná barano.

¹⁰*Ma karavusi namumpin ma séi monó tiyáku ma Onesimasi ará baeren mumunan bantaí ein manon ten taniñ uró an dakhái ei kama avúavá béin aní esin onano van mi séi inaé uno. ¹¹ Pefá Onesimasi* ano ída kamaen ayainton karan orikharen mifo saréa erasan kama uron mi en tiya inten mino.

¹² Te súkákéi véin nan tinunu iyákéi e vaonafá evarané tiantékun oriyan mino.

¹³ Banasi ma Kama Vaya siamiyarunará ma karavusií ukherunafin béin ayópá ékun eni varu varen téin tiya ino van inikharé uno. ¹⁴ Inikhé umpo éi ma eyo sesirá béin ayópá ono van mi iyá uno. Ída éin duvun onté umpo ei anunurá tiya ono van mi inikhé uno. ¹⁵ Éin má típá bano van mi sanáa afará éin me ampiren

* **1:2:** Kor 4:17; 2Ti 2:3 * **1:7:** 2Ko 7:4 * **1:10:** 1Ko 4:15; Kor 4:9 * **1:11:** Kiriki vaya finté ma Onesimasin ne ma siyain mai Kamaen Ayain Banta e sikhen mino.

karan orikharen mifo mai van iniya vá evaráne avirano van mi inikhé uno. ¹⁶*Béi ída miyan baran doran banta ana vanten mifo séin tiran nakhein tifá tiváení ukhen mino. Máan tukhein nan mi eni miyan ída van doran bantaíen maen inká eni mumunan afá aváení en intéii véin nan moéke anunu inono sé inikhé uno.

¹⁷ Éi ma sen nan téi má mana yorari iyain banta ino ma se ininte vá mai séi ma orékuya ma sivábá inona máan uron ná eya véin avábá ure vá amusin uantano.

¹⁸ Inká éin uman amen ná en nina yaná umoyan baren ná ukharé inten nafi mai yanasinta anona evaráne amenté uno.

¹⁹ Téi Pori anon te siyampóké ma vompon uvaré uno. Mai ma véi mantáin nain danasinta séi anon anona evaráne amenté umpo éin ma ayaékuya Yisas Karaisintá ma mumunan ukheona yina maen éimpin para van mifo mai van ída inantenté uno.

²⁰ Tifa soe, erasan Yisas Karaisin ninan bá umpo Bafan avikasá téi ma inaerunaí esin ná tirá kusi sintano. ²¹ Téi ma ma vompon uvádé inaeruna fákena éi moéke kama avúava suron mi varan nono sé iniyá uno.

²² *Téi ma iniyaruna mai Tiya rafenu ano siretí ankani amúkin eyo sintí maé tiretin má evaráne o vanté umpo mana karafaran ná ten tina funtáádano.

Pori Ma Kípan Amusin Baya Sein Mino

²³ *Yisas Karaisini yorantá ma sen má karavusií ukhein banta Epafrasi anon ma vompompin éin amusin baya amen mino.

²⁴ *Ten má ma mana yorari iyain banta kéká mai Maki má Aristarkusi má Demasi má Ruku má ano yeren amusin baya amen mino.

²⁵ Bafan Yisas Karaisini sarisari ano vá eni aunampin ná bano.

* **1:16:** 1Ti 6:2 * **1:22:** Fir 1:25; 2:24 * **1:23:** Kor 1:7 * **1:24:** Kor 4:10-14

**IBURU KEKÁ MA
UVAMAN AMEIN
BOMPON MINO
(Iburu)
Iburu Vompon Ma
Uvanteí Pákenai Afova
Vaya Ino**

Ma vompon ma uvantein banta ino.

Ída mana ano afová ukhen mino. Ma vompon ma uvantein banta maen Timotin arona váken Tiyarafenui Feyante Vompon Dóki Kayo afová ukhein manon uvanten mino.

Uvarein orana ino.

Yutan kayo vá Romú kamanin mái aruvin ída arái ukhan AD sikisti-faipi (65) fin mi uvanten mino. Yutan kékái aruvin ma AD sikisti-sikisi (66) ráké seventi-tari (73) rá ma mo kipein aruvin ída arái ukhan inká Yerusaremí kákan baru vá dere ída aren taren ira saman kaúkan mi ma vompon uvanten mino.

Ma vompon ma uvantein baru ino.

Romú barurá ino sen iniyan mifo o siádan baya ano siyáken Ítarí barafin ne sikhen mino. (Iburu 13:24 fin ná onano.)

Ma vompon ma uvaman amikhein kékái ino.

Yutan kékái pinté ma sanáa ano Yisasintá monó tiyan mumunan iyákan ma Iburu kékái ino siyan ma vompon uvaran banta ano afová ukhan ma mana akhempá baré ein kayon uvaman amikhen mino. Mai kayo van Yerusaremí baren ne sen iniyan mifo manáa ano siyáken Areksandriá se sen Korini se sen Efesasi se sen inká Romu se sen iyan mino. Esé arái in táké Karaisintá mumunan nan betin aren asen iyákan mai ma arái in táké ma ákonaen eriyá ein avúavá me ampiren Yutan kayoi ara ara kampun

afova ánain bákurirí iyaimpin mi ma vompon uvaman amen mino.

Nái ana vará ma vompon uvanten nafino.

Yutan anan pinté ma Yisasintá monó tiyan mumunan iyain kékái aní iyáken Yisasini ákona anon man baya vá sakhanampa kékái báí vaya vá esantakhen ne sen aní iyáken mi sian amá ukhen mino.

Tiyarafenu Anin Mano Ma Enisori Kayo Esantakhein Baya Ino

¹ Pefá Tiyarafenu ano kokhon dádái ara ara aa sáké uaren mi sakhanampa vanta kayo oo ráké tetin tinafu siráon baya siamikharen mino. ² *Máan tukhan mifo ma vara kípan damú ádesí iyan mi ve Anin pinté uaren tétin tisimikhen mino. Tiyarafenu ano ve anin pinté uaren bara vá inaru vá inká minó danasinta vá uváden béin iyáantákaren mi minó bei yanasinta mai iyampon amikhen mino. ³ *Máan tukhan mai iyampon mano Tiyarafenui kakhan aúpin mi váken minó béi ma variyain avúavá máan aní iyan mino. Bei ákona vaya fókéi ma varafin ma vain danasinta ákona uanté iyan mino. Tetinti ume sesé uré avusese usintano van ma e fúaren mantaven mai oyampákéi ve afóen ayan kurompá ma vain Kin karáká inarufá un kumamen kákan bí baren mino. ⁴ *Máan ma ein avúavá anon anien mi ve Anin manon enisori kayo esantakhan betí ankan ben aránaópái van mino. Mai ma Tiyarafenu ano enisori kayo esantakhe ne siren amikhá ein bí an den enisori kayo aví esantakhen mino.

⁵ *Mai van mi Tiyarafenu ano Yisas Karaisin nan ma máa sikharé ein baya mai ída mana enisori van tikhen mino. “Éi sen tanin baná taréa en afóení é uno,” *Íbo 2:7* Inká Tiyarafenu ano evaránen máa sikhen mino.

“Téi ven afóení ékun inká béi sen taniní inten mino.” *2Sa 7:14; 1Kr 17:13*

* 1:2: Yon 1:3 * 1:3: Yon 14:9; Kor 1:20; Ibu 8:1 * 1:4: Fir 2:9 * 1:5: Apo 13:33 * 1:6: Rom 8:29

6 *Máa sikharen Tiyarafenu ano ve anin eséke iyampon ma aviren barará nanin banta ma me amusin amiren maen evaránen máa sen mino.

“Áesin ná Tiyarafenui enisori kayo ano véintá ana vá monó tino.” *Diu 32:43*

7 Mai van mi Tiyarafenu ano vei enisori kayo van máan mi sikhén mino,

“Uva an den

inká ira anamuná ma ein an den ukhen mino.” *Íbo 104:4*

8 Máan té iyan mifo ve Anin máan mi sen tiamen mino,

“Tiyarafenu oe, eni yafisin ákona ano fara van oriyán banten mino.

Eni funtákein avúava anon banasirá kama yafisirí inten mino.

9 Funtákein avúava san manan éi anunu ureyan namu avúava san afon karién nan,

Mai van mi Séi eni Ayarafenun báké éin avidéi ena khéká esantaré dan uron kaudé

amusin uverifó en ánompin bana é uno.” *Íbo 45:6-7*

10 Inká evaránen máa sikhén mí,

“Bafan noe, esé aráintá ma ma vara uvarano van inikharé eona, mai ayontá ma vain danasinta en ayan afun mi van mino.

11 Mai yanasinta ano o khípanten mifo éi fara va oriya van nono.

Mai yanasinta ano feyante vuí daná ma kafá kafá einíi inten mino.

12 Peyante vuí daná ma yádá einíi eyan mai yanasinta yádain nono.

Mai yanasinta ano feyante vuí daná ma kafá kafá einíi inten mifo

éi mai ma vanonará para váke

ída ayokhuvini inono.” *Íbo 102:25-27*

13 Tiyarafenu ano ída mana enisori van be anin nan ma máa seiní ukhen mino,

“Ten tiyan kurompá kumantesirá eni namuro kayo maman bararasí uré

en arantan kain karasí uantano.” *Íbo 110:1*

14 *Máa sikhén mifo enisori kayo mai yoran banta máan ban mino. Tiyarafenu ano ma evaránen aviran nain kékáká ma yafíken aya inain aunan kayon bákán mi siantan erikhen mino.

2

Kama Vaya Ma Oyan Amiyaren Ma Uman Baran Nain Baya Ino

1 Máan tukhein nan mi setí ankan ma mumunan iyá tiferuna me ampen nampo mai ma funtákein baya ma sisimí iné tiferuna rasá dafían ákona ó tifano. 2 *Para

vara seyo, Tiyarafenu ano ma enisori kayo oo ráké uaren ma sikhá ein mai fura veya kayon bákán banasi ano ma mai veya átakharé uren ída yakhafein kéká ano

uman bariyaren mino. 3 *Máan tiyaréin mi setin ma evaránen tiviran baya ma Bafan mano sian dákó uran ma inikhá ein

kéká anon puran tino sen tetin tisimiyan mino. Mai ma setin ma evaránen tivíkein baya ma átakharé onté mai intesá uré

karan oró tifante rafuno. 4 *Tiyarafenu ano enará ukhein avúavá bá inká aní daná kayo vá pói aní iyáken maen inká bei anunu fintéi Kantá Aunan amusin amídú ukhen mino.

Yisasi Ma Uman Baren Purein Manon Ma Setin Evaránen Tivíkein Baya Ino

5 Mai ma ínaimpá erin nain bara van ma siyá tiferunará enisori kayo ano ída yafisinten mino. 6 Máan tinten mifo Tiyarafenui bompon dókifin máa sikhén mino.

“Inte anarasá banasi van iniya vákeya, inká pará banasirá dafisiyá ba fono.

7 Manáarái véin maman enisori kayo aránaópá denan baré iyan,

kákan bí bá kakhan má póké béin kamamosí uantádeya,

8 minó daná ben aránaópá kae ono.”

Íbo 8:4-6

Tiyarafenu ano minó daná maman ben aránaópá kaúdan beni yafisin akhempá mana yaná ano ída van mifo saréa ma oné tifékun maen mai yanasinta ano ven

aránaópá ída van mino. 9 *Máan tukhen mifo Yisasin ma maman enisori kayo

aránaópá dan ma manáa rá baré íkan ma Tiyarafenu ano kákan bí bá kakhan

má pó ma véin kini kamamosí uantákein mi oniyá tiféuno. Mai fara va ino. Ti-

yarafenui sarisari áupin mi Yisas Karaisi

* 1:14: Íbo 34:7; 91:11 * 2:2: Kar 3:19 * 2:3: Ibu 10:29; 12:25 * 2:4: Mak 16:20; 1Ko 12:4, 11 * 2:9: Fir 2:8-9

ano ma vara ráke nanin bantai ara ara uman baren púbin mino.

¹⁰ Mai ma minó daná uváden ma-man dan ma kamaen doriyain Tiyyarafenu ano funtákein avúavá baren mi kokhon nanin banta avíden béi ma kákan bí mantéinien betin amen mino. Yisasin ma uman bareintái Tiyyarafenu ano vanasi aya uren evaránen avían kakhantá kaen mino.

¹¹ *Máan tukhein nan mi Yisas Karaisin má inká mai ma maman kantasí uantákein kéká bá Afóe mai mana anan ban mino. Mai ana van mi Yisas Karaisi ída ayave van inton kasaen te sun tifá kayo ino sen ariyan mino. ¹² Mai van mi Tiyyarafenui vompon dókifin béi máa sikhen mino.

Te sun tifá tiváeyan avorá eni kákan bí tian dákó onté uno,

monó nanin banta avorá í diyáké en aví daní onté uno.” *Ibo 22:22*

¹³ Máa siren evaránen temí, Tiyyarafenu rá anan tesi inin kaonté uno,”

Ais 8:17

siren evaránen temí,
“Tiyyarafenu ano ma simein iyampon kayo vá masi vá uno.” *Ais 8:18*

Yisasini Furin Mano Ma Ban Anoni Ákona Maman Bararasí Ukhein Baya Ino

¹⁴ *Tiyyarafenu akhafana mai amasi vá nare vápói uvantein pasen Yisas Karaisi yere mai avúavápin mi yorun afoká uven mai vukhafa vái varen mino. Barará banta an daven ma véi furein manon purini ákona ma fákakhá ein Ban Anoni ákona maman bararasien mino. ¹⁵ Yisas Karaisi ma mai avúavási ein manon mai ma furini akhokho ano ma vanasi yamuádan báken ma veni miyan ída varan doran nanin bantaí ma ukharé ein mi útúanten mino. ¹⁶ Para vara seyo, enisori kayo aya ono vara véi eren naifo, Abaraa-mun anavasin aya ono van mi erikhá mai afová ukhé tiféuno. ¹⁷ Máan ma ein manon tetin maman be aun afasí uren mi Tiyyarafenu avorá tarisari vá puntákein monó ánon banta kékái ánon bantaí uven béin íkun uan amintin banasii ume ampiantanten mino. ¹⁸ Akhenókain uman béi varen afová ukhein pasen mai uman ma varan nain kéká kasaen aya inten mino.

* **2:11:** Mat 25:40 * **2:14:** 1Yn 3:8; Rev 12:10 * **3:1:** Nam 12:7; Ibu 4:14; 7:26 * **3:5:** Nam 12:7; Diu 18:15-19 * **3:8:** Eks 17:7; Nam 20:2-5

3

Yisasi Ma Mosesin Esantakhein Baya Ino

¹ *Máan tukhein nará kantasí ukheona sífá tiváeyan má tiyó má bá ano ma inarufá orono van iyaona kéká ano vá ineno. Tiyyarafenui vaya varen orin banta Yisasi ma monó ánon banta kayoi ánon bantaí ukhen mino ma siyáeruna vará ineno. ² Mai fara vara seyo, Mosesi ma Tiyyarafenu oo yayien puntáken beni vanasirá dafiká ein an mi yen Karaisi ano mai ma véin aní uren tiantan erikhá ein Tiyyarafenu oo yayien puntáden doren mino. ³ Mana vanta ano ma kama ukhein namun uváden maen mai vanta anon kákan bí baré iyan mifo mai namun mano ída kákan bí baré iyan mino. Máan manan en mi Yisasi anon Mosesin esantaren kákan bí baren mino. ⁴ Mai fara vara seyo, mana mana namun ma vain mai mana mana vanta anon uvanten mifo Tiyyarafenu anon minó danasinta uvanten mino.

⁵ *Mosesi ano Tiyyarafenui yoran bantaí ukhen mi véin oo yayien puntáden beni vanasirá dafíken maen inká inaimpáké ma Tiyyarafenu ano fura vaya ma maman dákó inain avúavái aman manon an mi yakharen mino. ⁶ Máan tiyaren mifo Tiyyarafenu Anin Yisas Karaisi anon ben oo yayien puntáden báken ben amáká dafíken mino. Máan tukháí mai ma Karaisi ano e siviran nain nan ma simusin iyáké ákonaé ave ukhé tiferuna kéká ano ven amá an mi yakhé tiféuno.

Ída Ma Ará Baeran Nain Kéká Ano Ma Uman Baran Nain Nan Ma Amaan Baya Sein Mino

⁷ Máan tukhein nan mi Kantá Aunan mano máa siyan mino, Taréa vá beni vaya ineno.

⁸ *Mai ma kámá barafá ma vanasi ano Tiyyarafenui vaya átakharé uren, béin akhenóka uan oniyá ein an deya ída vá tiretíí ará pákaan ákona ono.

⁹ Tiretíí ankan anáuyan mai foti (40) oranarái enará ukhein daná aní ékun oniyáken mifo

seín akhenóka uan oniyaren mino.

10 Máan tiyaimpin betin nan tiran nan uantádé máa sé uno,

‘Minó damú téi ma siameruna vaya me oyan amiren maen ída sen too yayiyan mino.’

11 *Máa siré tiran má ákona vayafó máa sé uno.

‘Betí ankan mai séi ma sivíkiyaruna varufin ída uron mi orinten mino.’”

Íbo 95:7-11

12 Máa seruna ifo mumunan tiyofi sifá tiváeyan noe, máan tiyare mana ano aúkáké ída mumunan esin mai avúavá ano siretí ankan aviren tavi aipá orintiya aunan bain Tiyarafenun me ampín nampo yafían ná ákona ono. 13 Máan tin nampo “Saréa”* ana e ma sikhantiya ena ena yamu sá ben ákona uantan maran iyasín ná ume avúavá ano siretí ineine ída e yarifanti vá Tiyarafenun ída me oyan ameno. 14 Mai fara vara seyo, mai ma esé araié mumunan é tiferunaí é ma Tiyarafenurá ákona inin kauré ma oriyá maé mai Karaisin mái manafín dorá tifanté uno. 15 Máan tonté tifé umpo ákona vaya ma sikhein ída vá áun ono.

“Taréa vá beni vaya ineno.

Tiretí ankan ída vá Isareri kéká ano ma Tiyarafenui vaya átakharé uren

ma vetí ará pákaan ákona iyá einisá ono.”

Íbo 95:7-8

16 *Intéa kéká anó Tiyarafenui vaya inikhen mifo mai vaya átakharé ukharen nafino. Mai ma Mosesi ano Isipiké iyanen erein kéka ino. 17 *Inká intéa kékasá Tiyarafenu ano foti (40) oranará aranan uantákaren nafino. Mai ma kámá barafá umei uren ma fúan kípein nanin banta ino. 18 Inká Tiyarafenu ano intéa kéka sará ída senti sivíkan barufin o feran nono sen ákona vaya sein nafino. Mai ma veni vaya átakharé iyá ein kéka san mi sein mino. 19 Máan tukhá in mi veti ma ída mumunan ein avúava san bei avíkan barufin ída orinten ne sikhái afová ukhé tiféuno.

* 3:11: Nam 14:21-23 * 3:13: “Taréa” e ma sikhein mai í Bompon 95:7-8 fin ma máa sikhein mino. “Tiretí ankan ída vá Isareri kéká ano ma Tiyarafenui vaya átakharé uren ma vetí ará pákaan ákona iyá einisá ono.” * 3:16:

Nam 14:1-35 * 3:17: 1Ko 10:10 * 4:3: Ibu 3:11 * 4:8: Diu 31:7; Yos 22:4 * 4:10: Ibu 4:4

4

Tiyarafenui Vanasi Ano Ma Avíkan Baran Nain Baya Ino

1 Tiyarafenu ano ma vei avíkan barufin orino van ma iyáantákein mai fara vain tiretin pinté manáa ano maifin ída orin nona van mumpo setí ankan dafían ná ákona ukhesá bátifano. 2 Mai fara vara seyo, Tiyarafenu ano ma avíkan baru útaádan baini Kama Vaya ma vetí ankan tiamikharé einien tetin má deren tisimikhen mifo Tiyarafenu ano ma siamein bayará ída mumunan íkan mi mai ano vetin ída ayaen mino. 3 *Tiyarafenui vaya iniré ma mumunan iyá tiferuna kéká ano anan beni avíkan barufin oró tifanté umpo mai vayará ma ída mumunan inain kayo van máan mi sikhén mino.

“Téi sesi sirananá báí fura ódino siré té uno.

‘Mai kéká ano ída uron mi senti avíkan barufin orinten mino.’” *Íbo 95:11*

Máan tinten mifo esé ma ma vara uvareintái veni avíkan baru útaádan ban mino. 4 Mai fara vara seyo, yan manápá ifo afápá kan un kádan damusan béi monó bompoppin máa sikhén mino. “Tiyarafenu ano yoriyá ein nan dan manápá ifo afápá kan un kádan damusí íkan mi avíken mino.” *Esé 2:2*

5 Inká esé ma seruna vompon anafin Tiyarafenu ano máa sikhén mino. “Mai kéká ano ída uron mi senti avíkan barurá orinten mino.” *Íbo 95:11*

6 Tiyarafenui avíkan baru ma vain mai vanasi ano orin nain mifo fefá ma mai kama vaya siamin ma átakharé ein kéká ano mai varufin ída oren mino. 7 Máan tiyaimpin Tiyarafenu ano vei avíkan barufin ma orin ená damú man kaúden maí damusan taréa en tikhen mino. Pefá ma sikhareé ein baya máan Devitin oo ráké uaren máa sikhén mino. “Taréa ma véin avaya ininteya,

ída vá e ará pákaan ákona ono.” *Íbo 95:7-8*

8 *Mai fara vara seyo, Yosua ano Isareri kéká iyanen Kenaní barafin mo khaúden avíkan amen baré intin Tiyarafenu ano ída

ená damusan baya siádan té ein ten mino. ⁹ Máan tukhan mi Tiyarafenui vanasi ano ma avíkan nain damú ma iyáantan bain mano fara ave ukhen ban mino. ¹⁰ *Mai fara vara seyo, Tiyarafenui avíkan barufin ma ódin nain kéká ano véi ma yóan kípáren avíkein an den mai avíkan o varanten mino. ¹¹ Máan tukhein nará mai avíkan barufin ma orin nará ákona ó tifano. Para vara seyo, fefá ma Isareri nanin banta ano ma Tiyarafenui vaya ma átakharé einí ma inain manon eraven ankaminten mino.

¹² *Mai fara vara seyo, Tiyarafenui vayafin mi ayun ma fara van ákona víkakhen mino. Mai vaya ano vaenati ma sefá tefá an bakan ma avané iyain esantaren moékentá avan iyáken mai ano kasaen aú bá ayampa vá amasi vápin o feranten mino. Mai vaya anon aú bá ineine vá avúavá bá daiminten mino. ¹³ Minó daná ma ma varará bain mano Tiyarafenu avorá ída uron mi aúpa ban mino. Minó ano ma monó té avi daní é iyá tiferuna vanta avorá minó daná ano amákái van mino. Máan tukhein nará minó daná ma varé aruvé iyá tiferuna vá Tiyarafenu avorá tian amá ó tifano.

Yisas Karaisi Ma Monó Ánon Banta Kayoi Ánon Bantaí Ukhein Baya Ino

¹⁴ *Máan tukhein nan mi Tiyarafenu Anin Yisas Karaisi setisi monó ánon banta kékái ánon banta anon inarufá ódikhen mino. Mai ma véintá mumunan iyáké ma sian dákó iyá é tiferuna vaya vá pákaan ákona ó tifano. ¹⁵ Mai monó ánon banta kékái ánon banta anon tetimpin ma ída ákona vain afová ukhen arunan usintian mino. Mai fara vara seyo, varará nanin banta ano ma variyá tiferuna uman bariyáken inká Ban Anoni mákasimpin orivin akhenóka uan onen mifo véi ída umeien mino. ¹⁶ *Máan tukhein nará mai ma sarisari ma víkakhein kin kará ádé ída feran oriverá tiyaino van ma ékun ná arunan uren tarisari ino.

5

Yiasin Ma Ve Aufó Tiyarafenuin Íkun

* **4:12:** Efe 6:17; Rev 1:16; 19:13-15 * **4:14:** Ibu 3:1; 10:23 * **4:16:** Ibu 10:19 * **5:3:** Riv 9:7; 16:6 * **5:4:** Eks 28:1 * **5:5:** Manáa vompon dókifin máa sikhen mino. Taréa éin maman te sikhasí é uno. * **5:6:** Ibu 6:20; 7:1 * **5:7:** Mat 26:36-46; Fir 2:6-8

Uan Amiren Ma Setin Evaránen Tivíkein Baya Ino

¹ Banasii oo vantaí ukhen Tiyarafenu vá bayaí ino van mi monó ánon banta kékái ánon bantaí maman uran ban mino. Banasi ano ma Tiyarafenuin íkun uan amiyan inká tusu siantian ono van ma varen orin maen betíi ume ampiantano van béin Tiyarafenuin íkun uan amé iyan mino. ² Béi ma varará bantan bakan ben má dere ída ákona van mifo mai ma ineine asuse ukhein nanin banta ano ma savi aintá oriyán maen bempáké ará kusin pintéi vetí ankan maman puntariyan mino. ³ *Mai van mi vei ume vá banasii ume vá ampiantano van mi Tiyarafenuin mo íkun uan amiyan mino. ⁴ *Máan tukhantin mana vanta ano ída vá beyantá kákan bí barano van monó ánon banta kékái ánon bantaí ino. Tiyarafenu ano ma Eronin aní uran baré einien ná béi ana vá aní urantin mai yorari ino.

⁵ Máan tukhan Yisas Karaisi ano ída veyantá kákan bí barantó uno siren monó ánon banta kékái ánon bantaíen mifo Tiyarafenu anon máa siren béin mai yoran amen mino.

“Éi sen Tanin mono,

saréa éin afóeníi é uno.”* *Íbo 2:7*

⁶ *Inká ena vompon anafin béin nan máa sikhen mino.

“Éi Merkisedekin an deya

fara van oriyán ban monó ánon bantaí e ono.” *Íbo 110:4*

⁷ *Ma varará ma Yisasi yorun baken purin pintena aya ino van bei arunaná pinté kákan ifí diyáken Tiyarafenu ano aya ino van béintá ákona inin kaein nan mi veni amúkin inen mino. ⁸ Yisasi maen Tiyarafenu Anin mifo vara ráke uman kayo ma variyáken mi oo yaiyin avúavá afová en mino. ⁹ Mai aa sákéi Tiyarafenu ano véin maman monó doran banta kékái funtákein ánon bantaí uren mi kasaen minó dorari inte ne sikhen mino. Máan tukhein béi anon mai ma ven oo yaiyin nain kéká evaránen avíden para van oriyán ban aunan aminten mino.

¹⁰ Máan tukhein nan mi Tiyarafenu ano

véin maman Merkisedékin an den monó ánon banta kékái ánon bantaíen mino.

Baya Inin Avúavá Ma Me Oyan Amiyái Pákena Aaman Baya Ino

¹¹ Ma ma siamiyaruna mai kokhon bayan ban mifo ída kama e iniyanái veni ana ída sian amá iyá uno. ¹² *Tiretí ankan pefa suron mi monó nanin bantaí ukheya eriyare ompo ena nanin banta ma afova amiyán baren mi ena kéká ano siretin evaránen monó baya fákena afova amino van iniya ono. Tiretí ankan arará iyampon mano ma ída ákona yunan nakhen ma nan anu máa ana ma niyain an mi yakharono. ¹³ Máan kéká ano arará iyampon ma nan anu nein an mi yiyan pasen puntákein avúava sinta ída moéken afová ukhen mino. ¹⁴ Puntákein avúavá bá ída funtákein avúavá bá ma oman afova suron uren ma funtákein avúavá ana variyain kékái nan ákona yunan ban mino.

6

Arará Iyampon Ma Afova Amein An Ma Yan Avúavá Ma Me Ampin Baya Ino

¹ Máan tukhen mifo ída vá mai ma esé araíntá ma Yisas Karaisini vava sisimí iné tiferuna avúaváká evaráné orive orive iyá bá tifano. Monó avúavá purasé afová uresá ume avúavá ma me soyan amiré erikhé tiferuna ída vá evaráné mo aruviyáké Tiyarafenurá ma ákona mumunan in nará inétifano. ² Monó non péantan nafi ayan árontá kaúden avu uantan nafi fúaren ma orun mantan nafi inká Tiyarafenu ano ma ínaimpáké ma vanasii avúavá daiminaí pákena van mana ída vá tiamiya vano. ³ Máan tiya tifékun ná Tiyarafenu ano ma anunu intí maerá moékan afova vará tifano.

⁴ *Para vara seyo, mai ma Tiyarafenui fura vava vá kama yanasinta vá afová en ma Kantá Aunaní avúavá baren ma Tiyarafenui kama avúavá bain baya vá ⁵⁻⁶ inká ínaimpáké ma ma vara kípan nain ákona vá ma afová ukhein kéká ano ma Tiyarafenu me oyan amiren orivinten maen ída kanaíen ará baeranten mino. Mai fara va ino. Máan kéká

anon Tiyarafenu Anin oyan amiyáken mi véin evaránen daa unkamádantá ariyáken banasi avorá béin ankayan tiren ayave amiyán ban mino.

⁷ Banasi ano ma varafin danayun dókáin ma á eren bara afú daran ma orun ampamaren ma kama aran iré iyain mai Tiyarafenui avábái varé iyan mino. ⁸ *Máan té iyan mifo mai yunan anafin ma namu naman má ayankun naman má ma e ampamaren ma yunan ana yarádantin maen mai yunan ana afóe ano mai vara van auron ukhen mino siren ira saman kaurinten mino.

⁹ Téi ma sinunu ukheruna sirona kéká soe, ma vava ma siyaruna van mai ída siretin nan tiyá unon té iniya tiféuno. Tiyarafenu ano ma setin tiya uren tivíkeimpin ma kama yaná afoká inti ma varan nona rái inin onan kaúka ononté inikhé tiféuno. ¹⁰ *Mai fara vara seyo, Tiyarafenu ano funtáken ban mino. Mai ma veni ákona yorará iya ma mumunan nanin banta avábá ureya ayaiya ma kama e yafisiya vaona van béi ída áun inten mino. ¹¹ Ena ma ará amin avúavá ákona uan pákaráke oriyareya mai ma ákona inin onan kauráke ma ave iya vaona yaná purase o varano van mi setí ankan tinunu ukhé uno. ¹² Máan ma inteyan monó avúavápin ída avesara in nono. Máan tin nampo mai ma Tiyarafenu ano iyáantan bain daná ma fura sen afoká intéi uno siren ma mai yanáká ákona mumunan kaúdáken kama avúavá ana varen oriyaren ma mai yaná o varein kéká an mi yan nono.

Tiyarafenu Ano Ma Iyáantan Danáká Ma Ákona Mumunan Kain Baya Ino

¹³ Mana vanta ano ída Tiyarafenu esantakheimpin mi veyantá be avikái ayan befió uren pura ódino siren mi Abaraamun máa sen iyáan ten mino.

¹⁴ “Ein purasé moeké avu uantádé en ana akhá maman kokhoni suron uantanté uno. *Esé 22:17*

¹⁵ Máa siran ará kusin má Abaraamu ave ukharen mai ma Tiyarafenu ano iyáantáká ein daná baren mino.

* **5:12:** 1Ko 3:1-3 * **6:4:** Mat 10:22; Ibu 10:26-27; 1Yn 5:16 * **6:8:** Esé 3:17-18; Mat 13:7, 22 * **6:10:** Ibu 10:32-34

16 Mana vanta ano ma mana yaná ma ena kéká iyáantano van maen ben ma esantakhein banta avíkái ayan befiyó uren pura ódino siran mi mai ano fura sen ákona ukharéin mi ída ara ara vava vakan kasaen baré iyan mino. 17 Máan avúaváká anan ten mi mai ma iyáantákáin nain kéká ano fura sé baranté uno siren ákona mumunan ino van mi Tiyarafenu ano veyantá ayan befiyó uren pura ódino sikhein ída kanaíen do varanten mino. 18 *Máan tukhein nan mi Tiyarafenu ano setin iyátintáden inká ayan befiyó uren pura ódino siran ban mino. Maíkan dana san ma Tiyarafenu ano kampun tiantáden ma yurafurimpin ída seso sikhen mino. Máan tukhein nará mai ma ven ópá aúmaneno van muno siré ma karan oronuna kéká ano kasaé mantaan ákona uvé maé mai ma iyátintan bain danáká ákona inin kaó tifanté uno.

19 *Mai ma ave ukhé ma ákona inin onan kaiyá tiferuna anon sipii ankan ma un nompin kain orun pákaan ákona ukhen bain an mi setin tuká ukhen mino. Mai anon tetin tiviren inarufá ma vain monó namumpin ma moéken kantasí ukhein karafaran ma iyákein davaráe esantaren maen Tiyarafenui kantasí ukhein karafarampin ódiyan mino. 20 Yisasi ano setin tiya ono van pefái maifin un báken Merkisedekin an den para van oriyan ban monó ánon banta kékái ánon bantaí ukhen mino.

7

Merkisedekini Vaya Ino

1 *Merkisedeki maen Saremi* kákan barui kin báken inká moéken dan bain Tiyarafenui monó ánon banta ino. Máan tukharen maen Abaraamu ma kokhon kin kéká bá ma kákan aruvirí uren betin aruan kípáren ma evaránen barufá orono van eriyan ma Merkisedekin má ayanafá o fókan maen béin avu amen mino. 2 Máan turan maen Abaraamu ano mai ma aruvúden baren erein danasinta siyan míkampintan daíden mana masiman Merkisedekin amen mino. Merkisedekin ne ma sikhein bíi ana maen mai funtákein

avúavái kin nen ten mino. Inká Saremi kin ne ma sikheini ana maen mai ará kusian tiyáken kusin baren erin kin nen tikhen mino. 3 Tiyarafenui vompompin ben anoifon má anafu aráon má ma afoká ukheini ana vava ída váken inká ben ma khaein má be ma o furein mái ana vava yere ída van mino. Béi maen Tiyarafenu Anin an daven mi fara van oriyan ban monó ánon bantaí ukhen mino.

4 Merkisedeki ma kákan bantaí ukharé ein ná ovare me ineno. Abaraamu maen Isarerí barafin aví bain bantan baren mifo mai ma aruvin pintena varen eriyá ein danasinta ma siyan míkampintan daíden ma mana masiman Merkisedekin ma amikhein manon kákan danasí ukhen mifo afovasá ono. 5 *Rivain anan banta finté ma monó banta kékási ukhein nan Mosesini man baya ano máan mi sikharen mino. Minó ano siyan míkampintan daíden ná mana masiman betin amino sikharen maen betí afá aváeyan pinten nan e variyaren mifo mai Abaraamun anavasin manan baren mino. 6 Máan tiyaren mifo Merkisedeki maen ída Rivain anan banta anon Abaraamun pintena mana masiman barein mino. Mamaren mi mai ma Tiyarafenu ano fefá ma iyáantan baré ein banta Abaraamun ánotá ayan kaúden avu amein mino. 7 Máan tukhantín ída mana inain bantín maen avu amin ákona ma vain banta anoi mai ma avu variyain banta esantakhen mino.

8 Purin nain monó ánon banta kéká anon Yutan kayo fintena mana masiman bariyaren mifo Merkisedeki ano mai kéká esantakhen mino. Mai fara va ino. Béin nan ma ayun para van ne ma sikhein mano ino. 9 Inká ena ma vain mai Rivaini anan banta kéká ano ma mana masiman máden maen betíi anáu Abaraamun pinté uaren Merkisedekin amikharen minon té tifanté uno. 10 Mai fara vara seyo, Rivai ma ída afoká ukhan maen be anáu Abaraamun pinten nan Merkisedeki ano mana masiman mantaren mino.

Yisasi Ma Merkisedekin An Dakhein Baya Ino

11 Rivain anan banta ano ma kanaíen Tiyarafenui yoran mo kípáren ukhantín mai fará Tiyarafenu ano Rivain nú

* 6:18: Nam 23:19 * 6:19: Riv 16:2-3 * 7:1: Esé 14:17-20 * 7:1: Saremi e ma siyain mai Yerusaremi baru van mi sikhen mino. * 7:5: Nam 18:21

Eronin núi kéká pintena ída siantanton ná Merkisedekin an dakhein banta siantantin erino van en nafino.

¹² Para vara seyo, ena kéká ma man-man monó ánon bantaí iyáken maen mai auyen man baya vá uvarano. ¹³ Mai fara vara seyo, ma ma siamiyaruna vanta vá bei kéká bá maen mai ena anan pintena kékái váken mai ma onámaná karánará uádantá ma íkun uan amiyain doran pefá ída yókaren mino. ¹⁴ *Mai van téi máan mi siyá uno. Tetisi Bafan maen mai Yutan anan pintéi afoká ukhan mai anan pinté ída monó ánon bantaí inten ne sen Mosesi ano sian amá ukharen mino.

¹⁵ Merkisedekin an dakhein banta ma maman monó ánon bantaí urantin ma ena avúaváká doran nain nan ma Tiyarafenui auyen man baya ano sikheí pákenan tian amá iyá tiferuna mai afová inono. ¹⁶ Béi ma monó ánon bantaí ein mai Rivaini kéká ano ma varyiá ein avúavá kasa ifo mai ma fara van oriyan ban aunani ákonará ino. ¹⁷ *Máan tukhan mi Karaisin nan í Bompon pin máa sikhen mino.

“Éi Merkisedekin an dakhe,
fara van oriyan ban monó ánon bantaí e ono.” *Íbo 110:4*

¹⁸ Peyante man bayará ma monó dorarí iyá ein mai ída ákona vákan mo namu ukheimpin do maman akhempá kaen mino. ¹⁹ *Mai fara va ino. Man baya ano ída mana yaná maman kama íkan mi moéken kama ukhein danáká ma inin onan kaúden ave ukhein ban manon beni varu varen mino. Mai aa sákéi setin e sivían Tiyarafenu ádé mo khaiyan mino.

²⁰ Tiyarafenu ano Karaisin nan mi ayan befiyó uren pura ódino siren mi fara van oriyan ban monó ánon bantaí inono sikhen mifo ena monó ánon banta kayo van ída máa sikhen mino. ²¹ *Tiyarafenu ano Yisasin manan máa sen tiamen mino. “Bafan mano ayan befiyó uren pura ódino sikhein,
bei vaya ída yurafurinten mino.

Éi fara van oriyan ban monó ánon bantaí e ono.’” *Íbo 110:4*

* **7:14:** Ais 11:1; Mat 2:6; Rev 5:5
Ibu 8:6; 12:24 * **7:25:** Rom 8:34

* **7:17:** Ibu 5:6
* **7:27:** Ibu 5:3

²² *Tiyarafenu ano ma ayan befiyó uren ma fura ódino sikhá ein nan mi mai ma manafin kasen ban avúavá Yisasi ano me yóan kanaí uren mi maman kama uáden mino.

²³ Inká ena ma vain mai feyante avúavákái kokhon monó ánon banta kéká ano yoriyaren mino. Mana vanta ano ma monó doraríen oriyaeren ma fúbin maen ena anon beni varu varyiaren mino. ²⁴ Máan tiyaren mifo Yisasi maen para van oriyan ban monó ánon bantan bantin mai yoran mano ída mo kípanten mino. ²⁵ *Máan tukhein nan mi intéa kéká anó béin pinté uaren ná Tiyarafenu vaintá erinten nafi mai vetin aya uré evaránen avidantin para van oriyan bano van mi inikhen mino. Béin para van oriyan báken mi setisi ume ampisintano van Tiyarafenu tiamiyan ban mino.

²⁶ Béimpin ída mana ume vákan kantasíen avusese ukhen baréin mi ume nanin banta finte véin avían dan bain barurá kaúden inarufá kákan bí amiran báken ma siya iyain monó ánon banta ino. ²⁷ *Béi ída ena monó ánon banta kékái ánon banta ano ma minó damú Tiyarafenu íkun uan amiyá ein an danten mino. Mai kéká ano yetii ume van naren íkun uan amiren mi inaimpáké banasii ume van íkun uan amiyaren mino. Máan tiyaren mifo Yisasi maen manádái minó nanin bantai ume van íkun uan amen daa unkamádantá púken mino. ²⁸ Bara ráke vantai ákona ída vákan mi Mosesini man baya ánain dakhafen monó ánon banta kékái ánon bantaí iyaren mino. Máan tiyaréin ma man baya amiren maen mai oyampákéi Tiyarafenu ano ve Anintá ayan befiyó uren pura ódino siren mi véin nan puntákein avúavá baren oriyan bante ne sen anien mino.

8

Karaisi Maen Auyen Avúaváká Ma Kasen Bani Monó Ánon Banta Ino

¹ Ma ma senuna mai ana vaya ino. Tetisi monó ánon banta kékái ánon banta Yisasi ano inarufá kákan bí mamaren Tiyarafenu ayan kurompá kumanten

* **7:19:** Ibu 10:22; Yem 4:8 * **7:21:** Ibu 5:6 * **7:22:**

mino. ² Máan tukhan maen mai ma fura sen kantasí ukhein monó namun ma varará banta ano ída uvaran ma Bafan mano veyantá uvantein namumpin mi monó dorarí iyan mino.

³ Banasi ano ma Tiyarafenu tusu siantan daná bá inká íkun uan amin daná bá ma varen moran maen mi monó ánon banta kékái ánon banta kayo fintena mana aní uran mi mai yanasinta varen mo Tiyarafenu íkun uan amiyaren mino. Máan tiyaren mifo setisi auyen monó ánon banta kékái ánon banta ano yere vá manáa yanasinta varen Tiyarafenu mo íkun uan amino. ⁴ Béi ma varará bano sen baren ída kanaíen monó ánon bantaí ina inten mino. Mai fara vara seyo, Mosesini man baya ano ma sikhein ánain dakhafen pefái monó ánon banta kéká ano Tiyarafenu íkun uan amiyaren mino. ⁵ *Mai ma fura sikhein monó namun ma inarufá baini aman mi ma varará ma vain monó namun bakan maifin mi yoriyan mino. Mai fara vara seyo, Tiyarafenu monó tiantan namun ma Mosesi uvarano van iyan maen Tiyarafenu ano ákonaen ma vayan tiamikharen mino. “Ma anuyontá ma aní eruna avúavá kasá teya minó daná uvarano.” *Eks 25:40*

⁶ *Máa sikharen mifo ma varará ma feyante man baya ánain dakhafen ma yoriyá ein kéká esantaren moéken kama ukhein doran mi setisi monó ánon banta amen mino. Para vara seyo, kama avúaváká ma Tiyarafenu vá kasen ban mi véi ano moéken kama ukhein danasintafó iyátintan ban mino.

Auyen Kasen Ban Mano Ma Feyante Kasen Ban Esantakhein Baya Ino

⁷ Para vara seyo, esé aráintá ma kasen ban avúavá ma vareimpin ída mana uman baré intin ída evaránen ena kasen ban avúavá kain nainten mino. ⁸ Máan tin nainten mifo fefá ma manafin kasen ban avúavá ma mantaré ein pintena Tiyarafenu ano onákan banasi ano ume avúavá bariyaimpin mi máa sikharen mino.

“Bafan mano siyáken damú ma erintí, Isareri vá Yutan nanin banta vá ma auyen avúaváká ma manafin kasen ban amenté uno.

⁹ Auyen kasen ban mano

vetíi anáuyan má ma manafin kasen ban ma uvantá eruna vá ída manaí inten mino.

Inká mai ma vetin ayan pákaaré,

ma Isipi vara finte yo aviré merékun maen

mai ma vetin má ma manafin kasé banuna van ma siamikhá erunerá ída ákona inin kaeimpin mi

vetin me soyan amé uno sen Bafan mano sen mino.

¹⁰ Máan tukharé umpo ma maen auyen kasen ban mi

Isareri nanin banta vá taréa uvaranté unon ten Bafan mano sen mantino.

Tesi man baya kayo vetíi inimpin kaúdékun

betí ankan mai ana afová uvintí maé inká betí ankan auká uvádékun

mai ánain dakhafinten mino.

Téi vetíi Ayarafenu vákun

betí ankan tenti vanasin banten mino.

¹¹ Báken betíi arona fi

áa vetíi kéká safí ída afova amiyáken

Bafan ná afová ono sen ída siaminten mino.

Mai fara vara seyo, aví ída vain kéká káké ma aví bain kékáká ma o khanaí ukhein

mai minó anon téin pefá afová inten mino.

¹² Para vara seyo, veti ma namu avúavá bariyá inain ampiantádé

ída evarané betíi ume van ineine onté uno. *Yer 31:31-34*

¹³ Tiyarafenu ano ma auyen avúaváká ma manafin kasen ban nan ma siyanti mae mai feyante kasen bani ákona ano inka o khípiyan mi yo maman akhempá kaono van mantino.

9

Ma Vara Ráke Monó Namumpin Ma Feyante Avúaváká Monó Tiyá Ein Baya Ino

¹ *Esé aráintá kantasí ukhein davaráe namun mi ma varará uvádáken Tiyarafenu vá Isareri kéká bá manafin kasen ban avúavá bakan monó tiyaren mino. ² Mai yavaráe namumpin kankanan karafaran mi varen mino. Esé karafarampin on ma antúduan divin danka vá dunan kain kará bá bakan

* **8:5:** Kor 2:17; Ibu 9:23 * **8:6:** Ibu 7:22 * **9:1:** Eks 25:23–26:30

mai yarói airo ananí ukhein bereti kain baren mino. Mai karafarampin nan mi Kantasí Ukhein Karafaran ne siyaren mino. ³ *Inká mai oyampá ena kharafaran davaráe fóké e auádan bákan mai karafaran nan mi Moéken Kantasí Ukhein Karafaran ne siyaren mino. ⁴ *Mai karafarampin maen aunka fauran ma íkun uan amin kará ma korifó uvantein má inká daafó uváden ma korifó me iyákein bokhise vái kain baren mino. Mai vokhisefin manna e ma siyain bereti kayo ma kaúkein kori khave vá Aronini ayonta ráké ma ariké e fótein danka vá inká tiyan mikan man bayafin ma manafin kasen ban baya uvantein onámaná báí kain baren mino. ⁵ *Mai vokhise yarói vanasii ume ma ampian tiyain bákan serubimi e ma siyan ma Tiyarafenui kakhan má ma vain daná kankanan korifó uváden mai yaró kaikan ayan tátá uren baren mino. Máan tukharen mifo saréa ída kanaí é mai yanasinta fáke sian amá ó tifanté uno.

⁶ *Mai yanasinta ma arakhóku uan kaúden maen monó banta ánon kéká ano esé ma vain karafarampin mi ena ena un peren kuven iyáken mai ma amikhá ein dorarí iyaren mino. ⁷ *Máan tiyaren mifo monó ánon banta kékái ánon banta ano anan Moéken ma Kantasí Ukhein Karafarampin manádá anan ena ena oranafin ódiyaren mino. Ódiyáken maen bei ume vá inká banasi ano ma ída afová ukhen ma variyá ein ume vá arúantano van nare yáaren Tiyarafenuun mun ákonte uan amiyaren mino. ⁸ Mai avúavá ma varará bain monó namumpin ma fara vantin maen banasi ano ída kanaíen Tiyarafenui Moéken Kantasí ukhein karafarampin ódinten ne sen Kantá Aunan mano setin aní ukhen mino.

⁹ *Mai monó namun nan ma siyain mai saréa ma afoká inain dana san mi aní ukharen mino. Mai ma monó ánon banta kéká ano ma susu siantan danasinta vá inká íkun uan amin danasinta vápó ma íkun uan amiyaré ein mano ída kanaíen monó nanin bantai ineine fintena sesé uantiyaren mino. ¹⁰ Betí ankan peyante

avúavá ánain dakhafen dunan má non mápó mai avúavá bariyantín dan bukhafa ana sesé en oriyantin mai ma siádan baré ein damú afoká ino van mi sikharen mino.

Yisas Karaisini Nare Ano Ma Funtákein Ákonte Ukhein Baya Ino

¹¹ Máa sikharéin taréa Karaisi ano kama yaná kayo ma afoká eintá o monó ánon banta kékái ánon bantaí en mino. Máan tuven mai ma ma varará banta ayan mano ída uvaran ma inká ma varará ma uvamádan bain danasinta vá ma ída manaí ukhan ma moéken kama ukhein monó namun ma inarufá baimpin mi óden mino. ¹² Óden mifo memé bá kao vái nare fóké ákonte ono vara mai ma Moéken Kantasí Ukhein karafarampin óden naino. Ída ino. Karaisi ano ume fintena vanasi aya uren evaránen avirano van mi vei nare fóké manádá Tiyarafenuun íkun uan amen mino.

¹³ *Peyan avúavápin meméi nare vá afon kaói nare vá inká arará kaoi kasí bá anon kanaíen man baya ma yurafurein nanin bantai yan bukhafa sesé iyaren mino. ¹⁴ *Máan tiyaren mifo setisi ume sivútivá ano ma furin aasá tiviren oriyaré in ma Tiyarafenuurá monó tiantano van ma Karaisi ano vei narefó ma setin tú tesé ukhein nará ovare me ineno. Mai fara vara seyo, Karaisi anon para van oriyán ban Kantá Aunani ákona fóí ve au fóké tetisi ume van puntákein íkun uan Tiyarafenuun amen mino. ¹⁵ Mai ana van mi Tiyarafenu ano ma arakhein nanin banta ano kasaen mai ma fara van oriyán ban aunan ma iyáatan bain barano van mi véi ano Tiyarafenu vá banasi vá aúbaná báken auyen avúavápin ma kasen ban aa uvíken mino. Para vara seyo, esékena kasen ban ma kain baré ein mano umei miyan uman manan amiyaré íkan mi mai uman pinten nan útúantano van Karaisi e furen mino.

¹⁶ Máan tukhantín mana vanta ano ma veina yanasintará bompon uvariýáken ma mana iyampon nan téi ma fúbékuya sesina yanasinta éi vá barano sikharen ma fura sen púbintín manan mai ma iyáan takháin

* **9:3:** Eks 26:31-33 * **9:4:** Eks 16:33; 25:10-16; 30:1-6; Nam 17:8-11; Diu 10:3-5 * **9:5:** Eks 25:18-22 * **9:6:** Nam 18:2-6 * **9:7:** Riv 16:2-34 * **9:9:** Ibu 10:1-2 * **9:13:** Riv 16:15-16; Nam 19:9, 17-19; Ibu 10:4 * **9:14:** 1Pi 1:18-19

nain iyampon mano venina yanasinta varanten mino. ¹⁷ Mai fara vara seyo, mai ma vompon uváden iyáantein banta ano ma ída fúkantin maen mai ma iyáantan mano fara ave ukhen baré intin ma véi fúbintin mi mai ma iyáantein danasinta varanten mino.

¹⁸ Máan manan en mi esékena kasen bani avúavápin ma nare ma ída vantin maen mai ída ákona vanten mino. ¹⁹ Mosesi ma Tiyarafenui man baya kayo maman banasi amiren maen arará kaoi nare vá meméi nare vá maman non má manafinién mino. Máan turen isopi yaa ayan má inká sipisipi ayorá ma nararé kava fékein mápó maifin morun daaren mi Tiyarafenui vompon dóki vá banasi aufá bá péantákaren mino. ²⁰ Máan turen maen betin máa sen tiamikharen mino. “Mai ma Tiyarafenu ano siretin má manafiní é kasé bano van ma sikhare ein mi ma narefó perékun mai anon maman pura yanasí en mino.”

Eks 24:6-8

²¹ *Máan mana en mi mai ma yavaráéfó ma uvantein monó namun má inká maifin ma vákan doriyain danasintará bá ina nare feren mino. ²² *Mai van mi Mosesini man baya ano siyáken nare ano anan minó danasinta sesé inten mifo mana yaná ma ída aruren narefó ákonte intin mai Tiyarafenu ano ída kanaíen ume ampiantante ne sikharen mino.

²³ *Máan tukhein nan mi varará ma vain davaráe namun má maifin ma vain danasinta vá anon inarufá ma vain danasintai aman mi vákan Tiyarafenui man baya ma safúnai nare fóké sá ákonte ono sikharen mino. Máa sikharen mifo fura yanasinta ma inarufá bain mai safúnai nare esantakhein daná pói ákonte uren tesé uan avusese ukhen mino.

²⁴ Mai fara vara seyo, ma varará ma uvamádan baré ein danasinta mai inarufá ma vain danasintai aman mi varen mino. Máan tukhá ma varará ma vain monó namumpin na Karaisi óden naifo mai ma inarufá ma vain monó namumpin mi un báken teti ma variyá tiferuna uman pintena siya ino van Tiyarafenu avorá ákonaen divuniyan mino.

²⁵ Inká ena ena oranafin ma monó ánon banta kékái ánon banta ano ma Moéken Kantasí ukhein karafarampin ma safúnai narefó ákonte iyá ein an den ná be aufó ena ena Tiyarafenu ikun uan amiyan bano vará inarufá ódikhen nafino. Ída uron mino. ²⁶ *Kokhon dádasá purono sen baré intin ma vara ma arái ein tákéi véi o furen eriyen ban nainten mifo ma vara ano me akhen diyan manádái umei ákona finte fura sen utútintano van mi e fúaren bei narefó me ákonte ukhen mino.

²⁷ Barará nanin banta ano ma manádái púkaren inaimpáké kópin o mantan nain an mi yakhen mino. ²⁸ Máan tukhan kokhon nanin bantai ume ampiantano van Karaisi ano manádái e fúaren bei narefó ákonte ukhen mino. Béi ma ovaránen erinten maen banasii ume evarané ampiantiyá bano vara erinten naino. Ída ino. Mai ma véin ave ukháin nain kéká avirano van mi erinten mino.

10

Tafúnai Nare Ano Ma Ída Kanaí En Banasii Ume Arúantan Nain Baya Ino

¹ Mosesini man baya maen mai ma inaimpá ma kama yaná erin nain aman mi varen mifo Yisas Karaisi ano ma fura sikharen daná ma varen erein naino. Ída ino. Para va máa siya rauno. Mai ma ena ena oranafin ma safúnai narefó ma ákonte uanten eriyá ein mano ída uron mi vanasi ano ma monó tiyá ein ayaiyaren mino. ² Pura siren ume arúanten baré intin mai ma ikun uan amin avúavá ída vanainten mino. Mai fara vara seyo, manádái ma ikun uan amin avúavá ano ma monó nanin bantai ume ma ena ena sesé urantin maen mai ída umei ukhé uno sen afová inainten mino.

³ Máan tiyaren mifo mai ma ena ena oranafin ma manádái ákonte iyaré ein mano mai ma umei ukhá ein mi aní uantiyaren mino. ⁴ *Mai fara vara seyo, mémé bá afon kao vái nare ano ída kanaíen ume arúantanten mino. ⁵ Máan tukhan pasen Yisas Karaisi ma ma varará dorun báken máan mi sikharen mino.

“Íkun uan amin avúavá bá ákonte in avúava ba san éi ída anunun e ompo sen tui útaan kaútinte ono.

* 9:21: Riv 8:15, 19 * 9:22: Riv 17:11 * 9:23: Ibu 8:5; 10:1 * 9:26: Ibu 10:10 * 10:4: Ibu 9:13

6 Ume arun mino siren ma íkun uan amin má inká tafúna aruren ma íkun uan amin avúavá ba san éi ída amusin ukha ono.

7 Máan tiyaonafin mi séi siyáké, ‘Masi séi vakun, Bompon dókifin téin nan mi sikhén mino.

Tiyarafenu oe, éin oo yaiyé dorano van mi erikhé uno.’” *Íbo 40:6-8*

8 Esé araién Yisas Karaisi máa semí, “Ara ara yanápó ma íkun uan amin nafi safúna ma aruren íkun uan amin nafi inká ume ampiantano siren ma íkun uan amin nafi mai Mosesini man baya ano sikhá ompo mai avúava sinta van éi ída anunu ure amusin e ono.” 9 Máa siren temí, “Éin oo yaiyé dorano van mi eré uno.” Esé ma kasen ban man baya ma amikhá ein do mádé auyen avúaváká ma kasen ban man baya maman dákó ono van mi máa sen mino. 10 *Mai van mi minó damú para oriyan bano van Yisas Karaisi ano ve aufó Tiyarafenun manádá íkun uan amiren tetin maman kantasí urá bá tiféuno.

Yisas Karaisi Ano Minó Nanin Banta Van Manádái Tiyarafenun Íkun Uan Amikhen Mino

11 *Peyante avúaváká ma kasen ban aránaó ma váken monó ánon banta kayo ano ena ena yamú monó dorarí iyáken inká ume arumino van ena ena íkun uan amiyaren mifo mai ano ída kanaíen arumiyaren mino. 12 Máan tiyaren mifo setisi Monó Anon Doran Banta ano ume ampisintano van kama avúavasíen minó damú kena manádá íkun uan Tiyarafenun amiren ben ayan kuompá kin karáká un kumanten mino. 13 *Un kumanten mi vei namuro kayo maman bararasí uren beni arantan kain karasí ino van ave ukhen mino. 14 Mai fara vara seyo, ve aufó ma manádá íkun uan Tiyarafenun amein avúavá anon mai ma funtákein avúavá bariyain kéka maman kantasí iyan mino. 15 Máan tukhan Kantá Aunan mano yere mai van tetimpin tian amá iyáken esé arái in baya máa sikhén mino.

16 *“Tesi vanasi vá ma auyen avúaváká kasen ban maen

maí damúi yamuan kaonté uno sen Bafan mano sikhén mino.

Betí ankan aúká ma sesi man baya kaudé maé

inká betí ineinefin uvádékun mai veya ánain bákurinten mino.” *Yer*

31:33

17 Máa siren evaránen temí,

“Betí ankan ma man baya átakharé uren ume avúavá ma variyá ein nan

ída ovaré me ineine onté uno.” *Yer*

31:34

18 Máan tukhein nan mi ume ma ampiantá dantin maen ída evaránen íkun uan amin avúavá banten mino.

Tiyarafenun Ádé Ma Orin Baya Ino

19 *Máan tukhein nan mi mumunan tiyofi sífá tiváeyan noe, Yisasini nare ano setin maman avusese ukhein pasé ída feran kasaé Moéken Kantasí ma Ukhein Karafarampin ódó tifanté uno. 20 *Mai ma yavaráe fóké ma are ukhá ein mi Yisas Karaisi ano vei furimpó auyen aunan ma varan aa uvisiyáken do varen mino.

21 Máan tukhan maen Tiyarafenui vanasirái setisi kákaní ukhein Monó Anon Banta anon dafíken mino. 22 *Máan tukhanti erí tifé purasé túkáké bentá mumunan é Tiyarafenun ádesá oró tifano. Mai fara vara seyo, Yisas Karaisini nare anon tetinti namu ineine maman avusese uren ída fain bain nompói minó bukhafa sesé ukhen mino.

23 Mai ma Tiyarafenu ano amenté uno sikhá ma ákona mumunan iyá tiferuna ída vá me ampé tifano. Para vara seyo, Tiyarafenu ano vei veya ánain mi yakhafen mai ma iyáantan bá ein daná amé iyan mino. 24 Máan tukhein nará erí tifesá ará amin avúavápó ben aya ven aya iyáké kama avúavá ana vá bará tifano. 25 *Máan tiyáké ída vá manáa kéká an desá manafin ma átaruin avúavá me ampé tifano. Beni erin inka ádesí ukhen mifo erí tifesá ben ma moéken ákona uantan maran ná ó tifano.

Ída Ma Tiyarafenu Anin Oyan Amin Baya Ino

* 10:10: Ibu 9:12 * 10:11: Eks 29:38 * 10:13: Íbo 110:1 * 10:16: Ibu 8:10 * 10:19: Ibu 4:16 * 10:20: Mat 27:51 * 10:22: Riv 8:30; Isi 36:25; Efe 5:26 * 10:25: Ibu 3:13 * 10:26: Ibu 6:4-8

²⁶ *Máan tukhen mifo fura sikhein baya ma afová ure ma evaráne umeí iya vante mae mai ume ma ampiantano van ma íkun uan amin avúavá ena ída vanten mino. ²⁷ *Máan tinten mifo Tiyarafenui kó barufin ma o mantan má kákan ira ano ma veni namuro kayo saman kaurin nain má anan ave ó tifanté uno. ²⁸ *Mana ano ma Mosesini man baya yurafúdan ma kan mano fi kanú manau ano safi ma ódaran maen ída avo uantan bákkan esé anan aruan puriyaren mino. ²⁹ *Máan tukhantin intéa kéká anó Tiyarafenu Anin barafin daren ná arantampó dosasí iyáken ná auyen kasen ban man baya ma vei narefó ákonte ukhein maman painí iyáken ma inká tarisari amé iyain Aunan ma ankayan tiyá inten nafi mai kéká ano kákan uman uron mi varanten mino.

³⁰ *Mai fara vara seyo, setí ankan afová ukhékun beyantá máa sikhen mino.

“Mai anonafá betin daidé uman amenté uno.”

“Mai yaná ma varano van iyain kéká evaráne amenté uno.” *Diu 32:35*

Máa siren evaránen temí,

“Bafan mano veyantái vei vanasi yaim-inten mino.” *Diu 32:36*

³¹ Máan ume vá ma ayun para van oriyan ban Tiyarafenu ayampin ma orin maen mai namu ukhan kákan akhokho yanái van mino.

Mumunan Avúavápin Ma Mantaan Ákona In Baya Ino

³² Mai ma esé araiintá ma Yisas Karaisini kama vaya inire afova vareona van ída vá áun nono. Moékentá uman bariyáke ma ákonaen mantakhá eona vará ovare me ineno. ³³ Manáa yamú tiretí ankan avían banasi avorá mo khaúden maen aruren uman amiyaren mino. Inká ená damú tiretí ankan mano ena kéká ma uman bariya mae oyampá mantaveya aya iya ono. ³⁴ *Máan tiyan nan ma siretin páken karavusií mo ura mae maifin ma vain kéká bá kama iya mae inká tiretin nina yanasinta ma vara maeya sentisi kama ukhein danasinta inarufái yan bane

se afová ukhe fase amusin manan iyare ono.

³⁵ Máan tiya ompo mai ma Tiyarafenu má ákona inin dáke ma mumunan iyaona avúavá ída vá me ampiyákeya mai ma kákan miyan ma ave ukhein nará ovare me ineno. ³⁶ Mantaan ákona ukhe ma Tiyarafenu anunu ánaín ma yakhafiya maeya mai ma iyántákein amusin baran nono.

³⁷ Mai fara vara seyo, Tiyarafenu Vompon dókifin máa sikhen mino.

“Ída ayáká ban mi

mai ma Ereno Sikhein Banta ainen erinten mino.

³⁸ Máan tinten mifo funtákein banta ma váken maen tentá anan mumunan iyan banten mino.

Inká ten ma oyan timikhá inain kéká ída simusin uantanté uno.” *Aba 2:3-4*

³⁹ Máan tinten mifo mai ma Tiyarafenu oyan amiren ma ainen eraven ankamé iyain kéká an ída yakhé tifé umpo ákona mumunan má ma van oriyan ma o ayain baré iyain kékái vá tiféuno.

11

Ákona Mumunan Má Ma Varé Ein Kékái Vaya Ino

¹ *Inte avúava sará mamunan ne siyan nafino. Mai ma ída onté tiferuna yana san ma afoká intéi uno siré purasé ákona inin kaiyá tiferuna van mi mumunan ne siyan mino. ² Pefá ma varé ein nanin banta ano ákona mumunan iyákan mai van mi Tiyarafenu ano kana ino siren amusin ukharen mino.

³ *Ma varará ma saréa afoká ukhá ma oniyá tiferuna yanasinta maen mai suufó ma ída oniyá tiferuna yanasintan baré íkan mi Tiyarafenu ano ma seintái mai yanasinta afoká ukhen ne sé afová iyái mumunan iyá tiféuno.

Ebori Inoki Noa Nénei Mumunan In Baya Ino

⁴ *Ebori ano ákona mumunan má baren mi Kenin esantaren Tiyarafenu ano amusin ein avúaváká íkun uan amen

* **10:27:** Ais 26:11 * **10:28:** Diu 17:6; 19:15 * **10:29:** Mat 12:30-32; 1Ko 11:27-29 * **10:30:** Íbo 135:14

* **10:34:** Mat 5:11-12; 6:20 * **11:1:** 2Ko 5:7 * **11:3:** Esé 1:1; Íbo 33:6; Yon 1:3 * **11:4:** Esé 4:3-10

mino. Eborini íkun uan amin avúava san ma Tiyarafenu ano amusin ein manon aníen béin nan puntákein banta e sen mino. Máan turen béi fefái fúken mifo véi ma mumunan ukhá ein avúavá ano saréa o sisimen eriyen mino.

⁵*Mumunan manon tíkan Inokin maen ída fúken ayun para van mi Tiyarafenu ano véin aviren inarufá orivin béin nan dosivaen ifáen mino. Ínainpáké béin aviren orintéin maen Tiyarafenu ano véin nan amusin ukhein bantan baren mino.

⁶Máan tukhein nan mi ída ma mumunan inteya ída kanaíe Tiyarafenu amusin amin nono. Béi vaipá ma orono van inain kéká ano vá mumunana iyáken ná pura sen Tiyarafenu váken mi ven nan ma anunu uren dosein kéká kama miyan amé iyan mino vá tino.

⁷*Noa ano mumunan iyaren mi ída afoká ukhá ein daná afoká inten ne sen ma Tiyarafenu ano afova vava siamin maen ben oo yayien sipi uváden mi ve aná akhafana vá anafú basin nan má maifin ódivíkan non taven ída aren mino. Noa ma mumunan iyáken ma variyá ein avúavá ano ma ma vara ráke nanin bantai ume avúavá daídan ma vetin amaniná uman afoká ein manon Tiyarafenu avorá puntákein bantái ukhen mino.

Abaraamun Nú Be Aná Saran Núi Mumunan In Baya Ino

⁸*Tiyarafenu ano Abaraamun nan enafá bain bara éin amenté umpo ei varu vá me ampireya orono ma síkan béi mumunan iyáken mi ven oo yayien mai ma véi orin naipá ída afová ukhen para oren mino. ⁹*Béin ma Tiyarafenu ano iyáantan baré ein barafin ma oriven maen toya vanta an dakhen mumunan mái yavaráe namumpin baren mino. Inká Tiyarafenu ano ma iyáantan bantá kan Aisakin nú Yekopun nú ano yere máan manan en davaráe namumpin baren mino. ¹⁰Para va Abaraamu ano mai avúavá bariyaren naino. Mai ma veni akhen ída vain baru ma Tiyarafenu ano uvantein nan mi ákona inin kaúden ave ukharen mino.

¹¹*Saran nú Abaraamun nú ayokhuvíní ukhan Sara a nanin baren mifo mai ma Tiyarafenu ano ma iyátintákein daná timinten ne siren míkanan ákonaen mumunan iyan baren mi iyampon kaen mino.

¹²*Máan tukhein nan mi Abaraamu maen ayokhuvinién puroren ukhen ída iyampon kaoren mifo ven ana akhafana anon ayompin ma vain ofu kayo vá inká un non akhempá ma vain eyu kayo vá an den ída yankaforen ukhen mino.

¹³*Mai kéká ano Tiyarafenu ma iyáantein danáká ákona inin kaúden oriyaren ída mana yaná baran o furen mifo mai ma iyáantan danasinta ano nentá bakan para ódaren amusin mana uanten mino. Máan ma iyan mi ena vara finté toya nanin banta anon ma varafin e varé tiféuno sen inen mino. ¹⁴Máan baya ma siyain nanin banta ano mai vetíi varu anaí ma uren ban nain bara van mi inin onan kaúkaren mino. ¹⁵Betí ankan ma erikhá ein bara van máa sen baren mai ma erikháeipá kasaen evaránen orin nainten mino. ¹⁶Máan tin nainten mifo inarufá ma moéken kama ukhan ma mató baru vain nan mi vetíi inin onan kaúden oriyaren mino. Máan tiyáken mi Tiyarafenu nan ída ayave inton betíi Ayarafenu e sen ariyaren mino. Mai fara vara ino. Béi anon betíi kákan baru útaádan inarufá ban mino.

¹⁷*Tiyarafenu ano ma Abaraamun akhenóka uan onan maen béimpin mumunan baré íkan mi Aisakin íkun uan béin ameno van en mino. Tiyarafenu ano ma Abaraamun iyáantan baré ein danasinta mantaren mi auanon táke iyampon Aisakin íkun uan ameno van en mino. ¹⁸Tiyarafenu ano véin iyáan tiyáken máa sikharen mino, “En anin Aisakin ará pintéi en ana akhá afoká inten mino.” *Esé 21:12*

¹⁹*Tiyarafenu ano fúká ein kéká evaránen avían mantiyain bantin Aisaki ma fúbintin maen evaránen avían mantanten ne sen Abaraamu inikharen mi furin pinte ve akhá evaránen aviren mino.

Aisaki Yekopu Yosepi Nénei Mumunan

* **11:5:** Esé 5:21-24 * **11:7:** Esé 6:13-7:1 * **11:8:** Esé 12:1-5 * **11:9:** Esé 35:12 * **11:11:** Esé 18:11-14; 21:2; Rom 4:19 * **11:12:** Esé 15:5; 22:17 * **11:13:** Esé 23:4; 1Kr 29:15; Íbo 39:12; 1Pi 2:11 * **11:17:** Esé 22:1-14 * **11:19:** Rom 4:17

In Baya Ino

20 *Ínaimpáké ma Tiyarafenu ano ma Yekopun nú Ison nú vampin ma maman afokáin nain avúava san Aisaki fura sen iníden mumunan iyáken mi maíkan iyampon avu amen mino.

21 *Yekopu ma ayokhuvinién purono van iyáken ma varampin mana vakhen ban ma monó tiyan maen mumunan iyan mi Yosepin anin kanan avu amirú en mino.

22 *Ínká Yosepi ma furono van iyáken maen mumunan iyan mi máa sen ákona vaya siamikharen mino. Isipíke ma Tiyarafenu ano Isareri nanin banta yo aviren orinti sen tiyampa kayo vasá bare orono.

Mosesini Mumunan In Baya Ino

23 *Mosesin anóe afóe ano mumunan iyáken mi véin ma kaúden kanú manaú biyontá béin aúpá aúmamádan baren mino. Tiyarafenu ano enará ukhein iyampon mi míkanan amikhan pasen kin mano inte avúavasá bariyan nafi mai van ída feren mino.

24 Mosesi ma e anoní iyáken béimpin mumunan bakan mi véin nan ída kin Feron araun anin ne sen arano van inikharen mino. 25 Umei amusin mano ma ainen mo kípé iyain pinté me ifá uren mi Tiyarafenui vanasi ano ma variyain uman barano van inikharen mino. 26 Béi ma inikhá ein mai Yisaf Karaisin naro siren ma uman baran mi kama ukhen mifo Isipíkema kama yanasintará ma o ánoní inan ída inikharen mino. Mai fara va ino. Mai ma Tiyarafenu ano moékakhein miyan ma amin nain nan mi inin onan kaúkaren mino. 27 Mosesi ano mumunan mái váken kin nan ída feranton Isipí bara me ampiren oren mino. Oriyákan ara ara uman mano ayanafá afoká iyan mifo mai ma aúpá bain Tiyarafenurái inin onan kaúdáken mi oren mino. 28 *Isareri kéká ano Avo uantan avúaváká dafíben ona yaará nare fédantin aruan ma furin enisori ano vetíi esé kena ain iyampon ída

arino van Mosesi ano mumunan iyáken betin ákonaen baya siamen mino.

Isareri Nanin Bantai Mumunan In Baya Ino

29 *Isareri nanin banta ano mumunan iyáken mi Nararé Non ne ma siyain un non aúbaná pe ukhein barará ma oreinién ena ufá e kháden ódivin mi Isipi kéká ano vetin ánain dakhafen oriyaren minó ano non ufuren puren mino.

30 *Isareri kéká ano mumunan iyáken mi yan manápá ifo afápá kan un kádan damú ma Yerikó baru eúkiyain má kafi ma uvantá ein mano un baráken eraven mino.

31 *Pamúku nanin Reapi ano mumunan ukharen mi mai ma vei varu ráke nanin banta ano ma Tiyarafenui vaya átakharé iyaren ma fureimpin béi ída furen mino. Mai fara va ino. Mai ma afurin bantá kan ma aronái uren avían aúmanantáká eintá ino.

32 *Máan tukharen mifo mai inte vaya kayó ena vantirá tiamentera funo. Mai ma Kidioni fi Baraki fi Samonsoni fi Yefta fi Deviti fi Samueri fi áa inká sakhanampa vanta kayo fi ma mumunan iyá ein baya kayo mai van mifo ída afokhan bain ída siamenté uno. 33 *Mai vanta kayofin mi mumunan bakan ída ma kamaen dafisein kamanin kayo manan bararasí uren puntákein avúavá póké banasi aviren oriyaren mi mai ma Tiyarafenu ano iyáantan baré ein daná o varen mino. Mai kéká anon raioni kayo oorá páken mi 34 *ira ma varúten kiyá eimpin dusimiyáken inká baenatifó ma aruan purono van iyan maen aúpá karan noren mino. Betimpin ma ákona ída varé ein maí damú anan ákona maren namuro aren dakhafin karan orera iyaren mino. 35 *Anasi arinta ano vetíi kéká ma fúká ein pinte evaránen oniyaren mino. Oniyákan manáa kéká aruren betin amaniná ara ara uman kaiyan mifo Tiyarafenurá mumunan iyáken mi furin nan peden ma véin me oyan amiren ma kamaen ban nan ída inen mino. Mai

* 11:20: Esé 27:27-29, 39-40 * 11:21: Esé 47:31-48:20 * 11:22: Esé 50:24-25; Eks 13:19 * 11:23: Eks 1:22; 2:2 * 11:28: Eks 12:21-30 * 11:29: Eks 14:21-31 * 11:30: Yos 6:12-21 * 11:31: Yos 2:1-21; 6:21-25; Yem 2:25 * 11:32: Ano 6:11-8:32; 4:6-5:31; 11:1-12:7; 13:2-16:31; 1Sa 16:1-1Ki 2:11; 1Sa 1:1-25:1 * 11:33: Dan 6:1-27 * 11:34: Dan 3:23-27 * 11:35: 1Ki 17:17-24; 2Ki 4:25-37

ma fúkaren ma ínaimpáké evaránen e mantaaren ma kamaen amusin pinté o van nain nan mi vetíi ákona inin kaiyaren mino. ³⁶ *Manáa kéká máká maáká uren ayankun dafiyó pó ankáden au yo yavarava fiyan inká ena kéká seni anampó amempin kuren karavusi namumpin mo kaiyaren mino. ³⁷ *Manáa kéká onámanápó ankamádan puriyákan manáa sofó aúbán dana siyáken inká manáa vaenatifó tíka sáka in puren mino. Máan tiyákan manáa kéká ano sipisipi au fi memé au fi yo siren maen auí danasí uren arafan nóken kákan uman bariyaren mino. ³⁸ Máan tiyáken mai kéká ano vanta ída van kámá barafa safi anuyon pimpa safi yon aimpin nafi inká bara aimpin nafi aúmanen noren mino. Mai kéká ma variyá ein avúavá ano varará nanin bantai avúavá esantakhen mino.

³⁹ Mai ma siaméku ineona kéká ano mumunan eintái mai uman barákan Tiyarafenu ano kanaíene sen mifo mai ma iyáantan baré ein danasinta fura sen ída manten mino. ⁴⁰ Mai fara vara seyo, mai ma vetin ameno siren ma iyáantan bain daná mai moéken kama yanái Tiyarafenui ineinefin bain tetin má ma mai yoran dóan kíparékun maen manápasíen mi mai miyan timinten mino.

12

Yisasintá Ana Ma Inin Onan Kaúden Ban Ma Ventá Mumunan In Baya Ino

¹ *Máan tukhan mai nanin bantai ákona mumunan mano ma setin aní ukhein manon iyaren eúkukhen mino. Máan tukhein nan mi namu avúava sinta ano ma setinti aasá iyariyan ma fákaan ákona inain mai ume yanasá karúdaré mai ma Tiyarafenu ano yóde vá barano ma sikhein daná tiyampa é tava uresá o vará tifano. ² Yisasi ma setisi mumunan ana vain ná kakhábé tifékun ná tiviren orino. Béin arono siren ara ara uman ben amaniná kaúden ankayan-ten aufen akhare siyákan Tiyarafenu oo yaiyen daa unkamádantá ayave furiríen mino. Máan ten mifo amusin danasinta

vákan mai varano van mi máan turen Tiyarafenui ayan kuompá kin karáká ku-
manten mino. ³ Ume nanin banta ano ma véin amaniná ída funtákein avúavasí ein nará ovare me inesin ná mai ano ída avesara aminti vá oyan ameno.

Tiyarafenu Ano Ma Ve Akhafana Funtarano Van Uman Amein Baya Ino

⁴ Ume avúavá bá ma aruvimpin mana ano ída fureya ei nare vanakha ono.

⁵ *Te sikhafana ono ma sen ákona uantákaré ein baya áunta fono. Béi máa sikhen mino.

“Te sanin noe, Bafan mano ma man baya siamintiya mai éin mi funtariyan mifo ída vá inian namu uantáde vá tisiyá uno sire ará namu ono.

⁶ Mai fara vara seyo, Bafan mano ma anunu ukhein kékái man bayafó puntariyáken

inká te sikhafana e ma siyain kékái yafiyosí uren ankamé iyan mino.
Pro 3:11-12

⁷ *Tiyarafenu ano ve akhasí urá bátifé umpo uman ma variyá tiferuna vará béi anon man bayafó tetin puntariyan ne vá té tifano. Iye anó man bayafó be akhafana ída funtare ne siyá inikhe fono.

⁸ Tiyarafenu ano ve akhafana funtaré iyan mifo onesin ma siretin aúban ma mai avúavá ída vanti vá mai afova sá ono. Tiretí ankan ída ven akhafana ompo aasá iyampon mi vaonon tikhen mino. ⁹ Bararáke sífóeyan mano ma setin puntará maé betíi vaya iné iyá tifé umpo inté urerá inaru fáke Sífóen oo yaiyé ben aránaópá oriyará para vá tifante rafuno.

¹⁰ Tetin tifóeyan mano ma inin ma kama ukhein avúavá máan tanáa oranará tetin puntaré iyan mifo setisi kama avúava san mi Tiyarafenu ano funtaré iyain mino. Mai fara vara ino. Bei kantasí ukhein avúavá barano van mino.

¹¹ *Puntáden ban man baya ma siamiyan-tiya ída amusin inompo uman manan baran nono. Máan tukharen maen mai avúavá ma afová ukhein kéká anon

* **11:36:** 1Ki 22:26-27; Yer 20:2; 37:15; 38:6 * **11:37:** 2Kr 24:21 * **12:1:** 1Ko 9:24-25 * **12:5:** Yop 5:17; Rev 3:19 * **12:7:** Diu 8:5 * **12:11:** Yem 3:17-18

ínaimpáké kama yunan ma yuyaseinien kama khumanin o yosé iyan mino.

12 *Máan tukhein nará mai ma avíkiyain ayan puríkiya vá inká mai ma antu antu iyain arantantasá mantaan ákona ono.

13 *E arantan ma orin nain aa vá aní ure kama uresin ná ai ayan ma namu ukhein kéká ano ma en dakhafinten maen ída e yupóen ankaminten mifo evaránen kama inten mino.

Tiyarafenui Vaya Ma Átakharé Iyai Páke Ma Sikhein Baya Ino

14 Banasi vá ma ará kusen ban má inká avusese en kantasí ukhein ma van avúavá basá ákona e varano. Para vara seyo, ída ma kantasí ukhein kéká ano ída kanaíen Bafan onanten mino. 15 Tiretí ankan pinté mana ano íta yaa aran ma imá deiní esin manáa ano eraven ankamen Tiyarafenui sarisari ída varanafo yafian ná ákona ono.

16 *Mana ano famúku avúavá iyá intin pefá ma Iso ano Tiyarafenu oyan amiren ma vei esé iyampon bí ma sító dunantá ma amiyan bareiní inafo yafian ná ákona oro.

17 *Máan turákaren ínaimpáké mai avu evaránen barano van en mifo ída kanaíen mino. Mirenien aran íta uan amiyákan ifí den mifo evaránen ma sirun noe siren ma mai avu varampin ída kanaíen mino.

Inarufá Bain Yerusaremi Ádé Inká Ore Ono Ma Sein Baya Ino

18 *Mai ma Sainai anu yompin kákan ira khiyákan titípa ukhan ma kákan uva uaren baékon uniyan ma Tiyarafenu ano Isareri kéká ma vei man baya ameintá ída orikha rono. 19 *Mai fara vara seyo, ufen mano kákantá asin maen Tiyarafenu ano vetin má baya síkan akhokho van uaren ben nan tesin ída setin má baya sino sen mino. 20 Máa síkan Tiyarafenu ano vetin tiantan e afánen manáa nentá oriyákan temí, “Mana safúna ano ma anuyon me aruvinti vá onámanápó ankamesin ná purino.”

Eks 19:12-13

21 Mai avúavá ano Mosesin akhokho amíkan béi máa semí, “Téin tivinantan den tikhokho fiyá uno.”

Diu 9:19

22 Máa síkan maen Saioní anu yontá ma ayun para vain Tiyarafenui auyen Yerusaremi baru ma inarufá baintá inka ere ono. Kokhon tausení enisori kayo ano ma kéká ukhen amusin iyaimpin mi e va ono. 23 Tiyarafenui eséke iyampon kayo ma inarufá aví uvantá ein kékái átarufin mi ere ono. Mai ma minó nanin bantai avúavá ma yaimin nain Tiyarafenu vá inká banasi ma evaránen avíden ma maman kama uádiyain Aunan kayo vá 24 *inká Tiyarafenu vá barará nanin banta vá aúban ma váken auyen kasen bani man baya ma maman ákona uantan banta Yisasin má baípái ere ono. Eborini nare ano ma fefá berai siyan ma anona vá uman ameno ma seinien beni nare ano ída máa sinten mifo moékan tarisari uren ma ume arúantan nare vaípái ere ono.

Tiyarafenui Vaya Ma Ída Átakharé In Baya Ino

25 *Tiyarafenu ano ma siretin tiamiyain baya vá inireya mai ánain bákurono. Mai fara vara seyo, fefá ma ma vara ráke vanta Mosesi ano ma vaya varen oríkan ma Isareri nanin banta ano átakharé uren maen uman barein mino. Máan tein mifo inaru fáké ma vaya siyain banta avaya ma ída iné tifanté mai inté ukhein uman ná bará tifante rafuno. 26 Tiyarafenu ano ma Sainai anu yontá ma vaya síkan maen bara vái khayaen mifo saréa ma sian damuádan ma vain mai máan mi sikhein mino. “Enádá ma vaya sékun maen minan ayon má bara vái antu antu inten mino.”

Aka 2:6

27 Máan ma sikhein mai minan ayontáke yanasinta vá ma varáke yanasinta vá ano kípanten mifo inaruráke yanasinta ano fara vanten mino.

28 Máan tin nain nan mi mai ma ída namuin baru ma variyá tiferá Tiyarafenu van pédé béin tusu siantádé amusin amerá bentá ana monó té tifano. 29 *Mai fara vara seyo, Tiyarafenu maen afá iran báken minó danái kaan kaurinten mino.

Diu 4:24

* 12:12: Ais 35:3 * 12:13: Pro 4:26 * 12:16: Esé 25:29-34 * 12:17: Esé 27:30-40 * 12:18: Eks 19:16-20;

Diu 4:11-12 * 12:19: Eks 20:18-21; Diu 5:22-27 * 12:24: Esé 4:10; Ibu 8:6 * 12:25: Ibu 2:1-3; 10:26-29

* 12:29: Diu 9:3

13

Kípan Baya Ino

¹ Ena vá ma ará amin maran in avúava sá para fákaresin bano. ² *Ena fáke vanta ma aviren mápin mo khaúden kama uantán aváuvá ída vá áun nono. Mai fara vara seyo, fefá ma mai avúavá ma variyá ein kéká ano ída afová inton enisori kayo aya ukharen mino. ³ Karavusifin ma vain kékasará ineine iyáke vá beti ma variyain uman bariya vá inká manáa ano ma ena kéká uman amiyanti mae mai ma variyain uman ná ayaeya varano.

⁴ *Ábasuí impin áesin ná puntákanti vá míkanan mano ven oo yayiin maran iya vá ben nan anunu in maran ono. Ena nanin banta vá ma kiyafó maran en inká ena ana safi avafun nafi ma varen asuse en noin kéká Tiyarafenu ano yaíden kó tiantanten mino.

⁵ *Moni san ma anunuin avúava sará periyáke vá mai ma yákeona máa vará kanaí ukhé uno seno. Mai fara vara seyo, Tiyarafenu ano máa sikhén mino,

“Ída uron mi éin me ampiré nentá oré inká ída uron mi éin táunonté uno.” *Diu 31:6, 8*

⁶ Máa sikhén nan mi setí ankan ída feran kasaé máa sen té uno.

“Bafan mano séin tiyain bantan bantí mai van ída feranté uno.

Barará banta ano sen timaniná náísá intéi vae.” *Íbo 118:6*

Yisas Karaisini Avúavá Ano Fefa Safi Saréa Fi Áa Ena Ena Yamu Safi Mai Manái Anan Ukhén Banten Mino

⁷ *Ei yafisin banta kayo ano ma Tiyarafenui vaya sikhá ein nará ovare me ineno. Betin pinté ma kama avúavá erikhein nará iniyáke vá beti ma iyainí e vá Bafantá mumunan ono.

⁸ Yisas Karaisini avúavá ano fefa safi saréa fi áa ena ena yamu safi mai manái anan ukhén banten mino. ⁹ *Máan tukhanti ída vá áesin ná ara ara kampun afova ma amin mano siretí ineine máden

asuse ino. Tiyarafenui enará ukhein tarisari anon tiretí monó tin avúavá ákona uanté iyan mifo yunantá ma are ukhein man baya finté ída erikhein mino. Máan tukhan mai ánain ma vákurein kéká ída aya ukharen mino.

¹⁰ Monó ánon banta kayo ano ída kanaíen arata yaró ma kaiyain dunan nanten mino. ¹¹ *Ume ampiantano siren maen monó ánon banta kayoi ánon banta anon tafúna kayoi nare varen mi Moéken ma Kantasí Ukhein Karafarampin ódiyaren mifo mai safúna kayo au varufái ira saman kauriyaren mino.

¹² *Máan tiyaréin mi inká Yisasin má dere vanasi maman kantasí ono siren kákan baruí yafu ona akhempá bei nare vanaen mino. ¹³ *Máan tukhein nan mi erí baru akhempá aravuvé mai ma véi ayave vareiní é bará tifano. ¹⁴ *Mai fara vara seyo, ma vara maen mai ída setisi mató baru ifo inarufá ma kákan baru váken ída erikhein nan mi yosiyá tiféuno.

¹⁵ *Yisasini siyain tasá tetisi monó tin avúavápó ena ena Tiyarafenuin íkun uan amiyá beni kakhakhen puntákein bí tian dákó ó tifano. ¹⁶ *Manáa yana san ma o afasí iyain kéká ma kama uren ma e ina yaná ma avarí in avúavá ída vá áun nono. Para vara seyo, mai avúavá anon Tiyarafenuin moéken amusin amé iyan mino.

Kípan Baya Ino

¹⁷ *Tiretí monó tin avúaváká ma yafíkein ayafa kayo ano ma siamin nainisá oro. Tiretí aú bukhafa ma maman puntáantan doran mi vetí yoran bakan inká mai yorarí ma iyáin nain mai vetí anon Tiyarafenuin tiaminten mino. Betin oo yayiesin ná ída arunaná bá doren ná amusin masá dorano. Mai fara vara seyo, ída ma amusin pinté doriyá inti mae ída uron mi siretin aya inten mino.

¹⁸ *Tetisi ineine kama ukhá inká ena ena yamú kama avúavá ana varano van iniyá umpo Tiyarafenuin amúkuan amesin ná tetin tiya ino. ¹⁹ Téin nan amúku sintesin

* **13:2:** Esé 18:1-8; 19:1-3; Rom 12:13 * **13:4:** Efe 5:5 * **13:5:** Yos 1:5 * **13:7:** 1Ko 4:16 * **13:9:** Rom 14:17 * **13:11:** Riv 16:27 * **13:12:** Yon 19:17 * **13:13:** Ibu 12:2 * **13:14:** Ibu 11:10, 16; 12:22 * **13:15:** Íbo 50:14, 23 * **13:16:** Fir 4:18 * **13:17:** 1Te 5:12 * **13:18:** Apo 24:16; 2Ko 1:12 * **13:20-21:** Yer 32:40; Isi 37:26; 1Pi 2:25

ná ainen aaí intirá tiretí ankan baonafá orono.

²⁰⁻²¹ *Máan tukhein nará mai ma kusin amin Tiyaarafenu ano ma setisi Bafan Yisasin ma masí pinte orun avían mantein mano vá mai ma veni anunu ánain dakha-fono van ma iyaona vá ákona uantano. Béin ma amusin ameren avúavasá Yisas Karaisini ákona finté uaren ná tiretimpin dákó ino. Yisas Karaisi maen sipisipirá dafisin bantan báken bei nare vanaren auyen kasen ban man bayan ákonte ukhen mifo ena ena vá béin aví daní iyáke vá kákan bí ameno. Pura ino.

²² Mumunan tiyofi sifá tiváeyan noe, ma ma asíka vompon ma uvaman ameruna finte vá kama e inire afová ono.

²³ Tetí ankan tifá tiváe Timotin inka karavusi fintena útúantan bain ainen ma erintí maé avíaré tiretin o onano van oronté uno.

²⁴ Tiretí ankani yafisin kéká bá mumunan nanin banta kayo vasá tenti ará kusin baya siameno. Itarí ma vain monó nanin banta ano ará kusin baya siádan tiretí ankan baonafá oren miño.

²⁵ Tiyaarafenui sarisari ano vá tiretin má bano.

YEMISI MA UVANTEIN BOMPON MINO (Yemisi)

Yemisi Vompon Ma Uvanteí Pákenai Afova Vaya Ino

Ma vompon ma uvantein banta ino.
Yisasin afá ma Yerusaremí barurá báken
ma mumunan kayoi ánon bantaí ukhá
ein banta Yemisi ino.

Uvarein orana ino.
AD foti-faipei (45) ráké foti-naini (49)
ráké mai aúban mino. AD foti-naini
(49) fin Kanisori átaru fákakhan mino.
Maí damú ma ákonaen tikharé ein
baya kayo ída ma vompompin uvantein
mino.

Ma vompon ma uvantein baru ino.
Yerusaremí kákan barurá inon ten
iniyan mino.

*Ma vompon ma uvaman amikhein kéká
ino.*

Yutan monó nanin banta ano ma
Parestainí bara me ampiren ma karan
orera ukhá ein kékái amikhen mino.

*Nái ana vará ma vompon uvanten
nafino.*

Esé arái in bompon ma uvanteimpin
Yutan monó nanin banta ano Ti-
yarafenui man baya ánain puntáden
bákurino van ákona uantiyan inká
uman erintin ma mantaan ákona in-
ain bayan afova amikhen mino. Yisasi
ma anuyontá monó baya siameinien
mi Yemisi ano monó tin avúavá ma
ara ara aa ma vain mi monó nanin
banta siamikhen mino. Máan ma in
manon monó tin avúavápin mumun-
nan mano kama yoran afoká iyan ne
sen aní ukhen mifo mumunan manon
kantasí ukhé uno ma sin mano ída
ino.

Yemisini Amusin Baya Ino

¹ *Tiyarafenu vá Bafan Yisas Karaisin
mái ída miyan baran doran banta séi

* **1:1:** Mat 13:55; Apo 15:13; Kar 1:19; 1Pi 1:1 * **1:2:** Rom 5:3-5 * **1:3:** 1Pi 1:7 * **1:5:** Pro 2:3-6 * **1:10:**
Ais 40:6-7

Yemisi anon ma vompon uvaré uno.
Mai ma siyan míkan mifo sirantan kan
orun kádan (12) anan kéká ma Yutan
barafin bain pinté ma ena varafá meren
mana mana ukhein pimpái ma vompon
uvamadékun oreraen mino.

*Akhenókain Mano Ma Mumunan Ma-
man Ákona Iyain Baya Ino*

² *Mumunan tiyofi sífá tiváeyan noe,
uman mano ma siretin amaniná ma yákó
intiya mai van amusin mana in daná ino
vá te afová ono. ³ *Mai fara vara seyo,
siretí ankani mumunan ma akhenóka
uan onan nain manon turetíi mumunan
moéken ákona uantantiya mantaan ákona
in nono. ⁴ Máan tukhen mifo áin ná mai
avúavá ano orun potino. Para vara seyo,
máan avúavá ano ma fara oriyan báken
mi siretíi mumunan pura sen ákona uan-
tantiyan akhenókafin ída erave ankamin
nono.

*Amúkin Avúava San Ma Siamein Baya
Ino*

⁵ *Tiyarafenu ano ma varano sikhein
daná ma afová ono van ma in nain mano
vá mai ma uman nan ída ininton amusin
iyáken amiyain Tiyarafenu inaesin ná
amino. ⁶ Máan tukhen mifo véin ma ina
ono sinteya vá mai véi simintéi ina iyá
uno siyákeya vá ina ono. Para vara seyo,
kokhon ineine ma iyain kéká ano mai ma
uva ano ma non karantó ein an mi yiyan
mino. ⁷ Máan avúaváká ma van nain
nanin banta ano ída vá Bafan mano mana
yaná timintéi uno siren ineine ino. ⁸ Máan
kékái ineine ano mo asuse ukhantín pasen
beti ma varan nain danasinta ano non ma
karantó en onóbe enóbe ein an manan
danten mino.

*Ona Ída Van Kéká Bá Kokhon Ona Van
Kéká Bái Vaya Ino*

⁹ Mumunan kéká ano ma minó dana san
o afasí ma iyanten ná amusin ino. Para
vara seyo, Tiyarafenu ano máan kékái
kákan bí amiyain mino. ¹⁰ *Inká mai ma
minó danasinta ma kain bain kéká ano
amusin ná ino. Para vara seyo, Tiyarafenu
ano máan kékái oman bararasí urantin mi
katafin ma vain paravan mano ma mo
khafureiní inten mino. ¹¹ Para vara seyo,

áau édaven ma ákonaen á kan maen mai ma kamaen kiyaré ein paravan mano ma ainen mo kafuré iyain an mi yen mai ma kokhon ona ma kain bain kéká ano veti ina yanasinta vá ainen o aiyoranten mino.

Minó Kama Yanasinta Ma Eriyain Mai Tiyarafenu Pinté Ana Ino

¹² Mai ma akhenóka iyákan ma maifin mantaan ákonaé iyain kékái Tiyarafenu ano avábá uanté iyan mino. Para vara seyo, maifin ma mantaan ákona ukharé inain manon mai ma Tiyarafenu má ma anunu ukhein kéká ma aunan bain kamamó iyáantan ma vain baranten mino.

¹³ Inká akhenókafin ma orivinona ano ída vá tiyákeya Tiyarafenu anon téin akhenóka uan oniyan mino seno. Mai fara vara seyo, Tiyarafenu ano namu avúavá barano van mana ano ída véin akhenóka uan ontein bantin béi ano ída kanaíen banasi akhenóka inten mino. ¹⁴ Máan té iyan mifo setin tirá mantá ma siran niyaruna yaná anoi akhenóka in avúavá maman dákó iyá tiféuno. ¹⁵ Mai ma akhenóka in avúavá ano ma éimpin afoká uven e yarifaáda ma umeí iyaona anon purin maman dákó é iyan mino.

¹⁶ Máan tukhein nan mi mumunan tiyofi sífá tiváeyan noe, ída vá áesin kampun baya fóké tiretin do aviren tavifá orino. ¹⁷ Ayompin báken kano van ma oon kayo uvamádan ma vain danasinta Afóe Tiyarafenu vaipákéi kama yanasinta ano eriyákan béi ída aman mano ma onóbe enóbe einí é iyan mino. ¹⁸ *Bei fura vava fókéi setin maman be akhafanaí uren minó danasinta ma uvantein amaniná setin esesí urá bá tiféuno.

Baya Iniren Ma Mai Ánain Dakhafen Doran Baya Ino

¹⁹ Mumunan tiyofi sífá tiváeyan noe, minó baya ma sin nain kama e inireya ída vá aine vava siyáke vá aranan ono. ²⁰ *Para vara seyo, aranan ma in avúavá ano ída kanaíeya Tiyarafenu ma anunu ukhein avúavá maman dákó inono.

²¹ *Máan tukhein nan mi namu avúava sinta ma siretin aúpin ma van nará pédeya

Tiyarafenu ano ma vei vava siretin aúpin doádan bain ná kama ureya mai ánain dakha fono. Para vara seyo, mai ákona anon kanaíen tiretin aya uren purin pinta evaránen aviranten mino.

²² *Máan ma ukhein nan ovare vá me ineno. Mai vava kayo ánain dakhafano van mi siamiyan mifo iniya ana vano va raino. Ída ma mai vava kayo ánain dakhafinteya mai eyantái óen banta an daveya eyan mi máka siya va ono. ²³ Para vara seyo, vava ana inire ma ída mai ánain dakhafinte mae mai kamufin ma siretí auná onein an diya ono. ²⁴ Tiretíyan ódareya ma oren nan maen manádái áuné iyan mino. ²⁵ *Máan tukhein mifo mai ma ume finte ma Tiyarafenui funtákein man baya ano ma útúantaya ma vaona ma oman afova suron ureya ma mai ánain dakhafiyáke ma inká mai ma ineona vava ma ída áun esin maen mai van Tiyarafenu ano avu uantanten mino.

²⁶ *Monó nanin banta uno sire ma siretí ankan amafintá ma ída yafisinte mae mai siretíyantái óen banta an daveya eyan máka maáká esin mi siretí monó tin mo asuse en beni nan aran ída vanten mino. ²⁷ Teti Sífóe Tiyarafenu avorá ma fura sen monó nanin bantaí ukhé bano ma sinte vá aso iyamporinta vá inká baré nanin kayo vá ano ma umampin bantiya vá betin aya iyákeya ída vá áesin ná ma varákena yanasinta ano setin máden asuse ino.

2

Aronará Ana Ma Kama Iyái Pákena Van Ma Sikhein Baya Ino

¹ *Mumunan tiyofi sífá tiváeyan noe, manáa kayo van mana anunu ureya ma ena kéká oyan amiyáke mae mai inte ana vará teyá tetisi kakhakhein Bafan Yisas Karaisintái mumunan ukhé uno siya rafono.

² Tiretí átarufin ma mana vanta ano kama ukhein aúí daná bá kákan miyantá bain ankaroro vá uren erintin ma inká ena vanta ano yáka ráka ukhein aúí daná ma uren erinti ma ³ kokhon ona vain

* 1:18: Yon 1:13 * 1:20: Ekr 7:9 * 1:21: Kor 3:8; 1Pi 2:1 * 1:22: Mat 7:26; Rom 2:13 * 1:25: Rom 8:2; Yem 2:12 * 1:26: Íbo 141:3 * 2:1: Apo 10:34; Yem 2:9

banta van tiamesin kama karáká kumamintiya ma inká ona ída vain banta van ma mesapá o mantakheya vanó tinte fo áa varará kumanenó tiyanteya fo mai ⁴ siretí ankan mi yaimin bantíi uveyan tiretíi namu ineine fóké banasi yaimiya ono.

⁵ *Mumunan tiyofi sifá tiváeyan noe, ma vaya vá ineno. Ma varafin ma ona ída vain nanin banta van mi mumunampin moéken kákaní inten ne sikhen mino. Mai kéká anon mai ma Tiyarafenu anunu iyain kéká ma iyáantan bain dafisimpin orintéin aní ukhen mino. ⁶ Máan tukha ompo siretí anon mai ma ona ída van kéká ayave amiya ono. Kokhon ona ma vain kéká anon tiretin nina yaná máden asuse uren avían kópin kaiyan mifo mai van ída afová intoyá kama iyá ba rafono. ⁷ Mai ma Tiyarafenu ano ma Yisas Karaisini kama ví ma maman tiretin amaniná ma kaein banta mai vetí ankan manon oyampá baya sein mino.

⁸ *Mai fura ino. “Eyan nan ma anunu iyaonái e vá ena van anunu ono” *Riv 19:18*

sikhein man baya ma Tiyarafenui vompon dókifin bain ánain ma fura se vákurinte maen pura yanasí inono. ⁹ *Máan tukhen mifo mai ma ona vain kékái veya ánain mana ma yakhafinte mae mai man bayan durafúde umeí eono.

¹⁰ *Para vara seyo, iye anó minó man baya yakhafiyáken ná mai fintena mana man baya yurafurinten nafi mai Tiyarafenui minó man bayan durafuren mino. ¹¹ *Para vara seyo, mai Tiyarafenu ano anan temi, “Ída vá pamúku avúavasí ono.” *Eks 20:14*

Inká ena máa sikhemí, “Ída vá banta aruan purono.” *Eks 20:13*

Máa sikhanti ma sireti ma ída famúku avúavasí iyáke ma vanta aruan purinte mae mai man bayai yurafure ono.

¹² *Máan tukhantiya veya ma sin nona fi áa náí avúavasá barante fo mai ovare vá me ineno. Mai ma avábá bain man baya ano ma ume fintena utúantaya ma vaona

anoi kó tiantanten mino. ¹³ *Mai fara vara seyo, ena nanin banta van ma ída arunan uantiyaré esin maen Tiyarafenu ano éin ída arunan uantanten mino. Máan tinten mifo ena van ma arunan uantiyaré esin maen mi Tiyarafenui arunaná ano vei kó pintena siretin ampiantanten mino.

Mumunan Mano Ma Kama Avúavá Ída Maman Dákó Inten Maen Mai Mumunan Púken Mino

¹⁴ Mumunan tiyofi sifá tiváeyan noe, siretíi avúavá ano ma ída kama ukhantiya mai náí ana vará teyá tetí ankan mumunan ukhé tiféuno siya rafono. Máan mumunan mano ída kanaíen mana nanin banta aya urantin Tiyarafenu ano aviranten mino. ¹⁵ *Afá aváe ano fi áa ayofi ano fi ma yunan má auí daná ba san ma iyantiya ma ¹⁶ mana yaná ída aminton ma inka ino múmúká bákeya kama e yunan niyasin ná Tiyarafenu ano avábá uantano ma sin nona ano mana kama yanasá man dákó inte fono.

¹⁷ Máan tukhanti afovasá ono. Mumunan iyáken ma kama yorará in avúavá ma ída vantin maen mai mumunan mano mo faen danasí en purein an mi yakhen mino.

¹⁸ *Manáa ano kokhon ineine uren máa sé iyan mino. “Manáa kéká ano kama mumunan má bakan maen inká ena kayo ano kama yorará in avúavá bá ban mino,” siya ompo séi siretin tiamenté uno. Tiretíi kama yorará in avúavá ma ída vantí maé tiretíi mumunan ída onanté umpo sesi kama yorantái sesi mumunan aní ékuya onan nono.

¹⁹ Mana Ayarafenu anan ban minó tireya siretí ankan mumunan iya rafono. Mai fura ino. Namu aunan kayo vá ano yeren mumunan iyáken avinantampin ban mino. ²⁰ Tireti óen banta kayo oe! Kama yorará in ma ída vain mumunan mano ma mo namuen asuse ukhein mai inte yamusá afová inte rafono.

²¹ *Teti sinafu Abaraamu ma ve anin Aisakin ma on kará nará uádantá ma Tiyarafenu íkun uan amein avúava san ma Bafan avorá puntákein bantae ma

* **2:5:** 1Ko 1:26-28 * **2:8:** Mat 19:19; Kar 5:14 * **2:9:** Diu 1:17 * **2:10:** Riv 19:37; Nam 20:7-12, 24; Mat 5:19 * **2:11:** Rom 13:9; Diu 5:17-18 * **2:12:** Kar 6:2; Yem 1:25; 1Pi 2:16 * **2:13:** Mat 5:7; 18:32-35 * **2:15:** 1Yn 3:17 * **2:18:** Kar 5:6 * **2:21:** Esé 22:9-12

sikhá ein nan ídá ovaré me iniya rafono.

²² *Tiretí ankan afovasá ono. Beni mumunan má kama yorarí in má ano manafiní uven doran mi veni mumunan mano mo fura yanasi en mino. ²³ *Máan tukhan mi Tiyaarafenui vompon dókifin ma varé ein bayai mo khanaíen mino. Mai vaya ano máa sikharen mino. “Abaraamu ano Tiyaarafenuurá mumunan uran mi véin mamán puntákein banta e siran,” *Esé* 15:6

banasi ano yere véin nan Tiyaarafenui kama arona e sen ariyaren mino. ²⁴ Máan tukhein nará afová ono. Mumunan mana ma in mano va Tiyaarafenu avorá tetin maman puntákein nanin bantaí iyan naifo setisi kama yoran má ano yeren máan té iyan mino.

²⁵ *Pamúku nanin Reapin má dere anon mai avúavá tetin aní ukhen mino. Afurin banta kéká ma avían aúpá kaúdákaren ma sianta ena aí páké uaren ma evaránen orein avúavá anoi Tiyaarafenu avorá puntákein naniníen mino. ²⁶ Kama yorarí in mumunan ma ída vantin maen mai mumunan mano furein an mi yakhen mino.

3

Oorá Ma Yafisin Baya Ino

¹ Mumunan tiyofi sífá tiváeyan noe, monópin ma vanasi afova amin nanin bantaí ono van kokhon mano ída vá ono. Mai fara vara seyo, vanasi ma yaimin damú ma afoká intin maen mai ma afova amin nanin bantaí ukharé inain kékái Tiyaarafenu ano umantá daiminten mino.

² Tetí minó ano kokhon dádái namu avúavápin eravé tinkamé iyá tifé umpo intéa kéká anó oorá dafisinten nafi mai kayo anon monó avúavápin anoní ukhen pasen be aurá kamaen dafisinten mino.

³ Osin maen kákan tafúna ifo sító aenifó ma véin oofen damurákei kasae o amáe e amáe iyasín eni anunu ánain dakhafinten mino. ⁴ Inká sipirá dere vá afová ono. Mai maen kákan daná bantin inká kákan uva iyáken o mamáde e mamáde iyantin mifo sító danka ano ma o mamáde e mamáde ma inaintá anan orinten mino.

* 2:22: Ibu 11:17-18 * 2:23: 2Kr 20:7; Ais 41:8 * 2:25: Yos 2:1-21; Ibu 11:31 * 3:6: Mat 12:36-37; 15:11, 18-19 * 3:8: Rom 3:13

⁵ Máan manan en mi amafin mano yere sító danái van mifo kasaen kákan dana maman namu uádanten mino. Inká títóká karé uvin nain ira ano kasaen kákan aafan kanten mino. ⁶ *Amafin ma vain mai máan mana en mi ira ma khiyain an dakhen pasintin namu vaya kayo ma amafintá báken maen kasaen tiretíi kumanin máden asuse uren tireti ma kama e vaona mai ira anamuná ano ma e khen orera einíen kákan uman o maman aminten mino. Para vara seyo, mai ma uman baren berai siyan purin barufin ma ume nanin banta máden asuse iyain ira ma eriyain mai Ban Anon pintéi eriyain mino.

⁷ Banasi ano kasae ara ara osafáe fi nun kayo fi safúna kayo fi inká noyana kayo fi máde ayuní inono. ⁸ *Máan tin nompomanano ano ída kanaíen amafin ayuní inten mino. Maifin mi namu vaya kayo víkakhen maen mai ano vanta ma aruan puriyain uvá an mi yakhen mino. ⁹ Máan tukhan mi mai simafin mano manáa yamú tetisi Bafan Tifóen aví daní iyáken maen inká manáa yamú mai ma Tiyaarafenu ano ma ve avúaváká ten ma uvamádan bain nanin banta vá asiren ankayan té iyan mino. ¹⁰ Kama vaya kayo vá namu vaya kayo vá ano mana oofentéi khuviyan mino. Máan tiyain nan mi mumunan tiyofi sífá tiváeyan noe, máan avúavá ma variyain mai ída funtáken mino. ¹¹ Non mantein pinté ma vimpun édé iyain mai kama non má íta non masá manafin édé iyan nafino. ¹² Inká kanaíeyá fiki yaa ana fintena orifi aran kúdeyá inká uvaini anan tákena fiki aran kúdinte fono. Ida ino. Máan tukhan-tiya un non ma mantan nain pintena ída kanaíeya auyen non dafin nono.

Kankánan Afova Van Ma Sikhein Baya Ino

¹³ Máan tukhein nan mi kama ineine vanti ma Tiyaarafenui avúavá ma afová ukhanteya mai kama avúaváká basin ná tiretin pinté kama avúavá ano non ma vanaein an dano. Kama avúavá ma variyain nonará ma ída au khákan inte mae mai fura seya kama ineine vain kékasii in nono. ¹⁴ Máan tin nompomanano eyan nan mana in avúavá bá inká ena ará namu

uantan má ma siretimpin bantiya mae mai fura sen namu uron ukhen mino. Máan tukhen mifo mai van ída vá tiretíyan amo se vá tetin túpin kama ineine vá uno sireya fura vaya me oyan ameno. ¹⁵ Mai ma veyan nan mana in avúavá bá inká ena nanin banta ma inian namu uantan má ano Ban Anon pintéi eriyán mifo ída Tiyarafenu finté eriyán mino. ¹⁶ Para vara seyo, veyan nan mana ma in avúavá bá inká ena nanin banta ma inian namu uantan má ma vaimpin ma onesin maen namu avúavá ana variyantín minó daná ano mo asuse anan inten mino.

¹⁷ Máan tinten mifo mai ma inaru fáké erikhein afova ma mantein kéká ano ma esé araíen baran nain avúavú máan mi ukhen mino. Avusese ukhen ban má ará kusin avúavápó ma ena anunu in má minó damú ma vempáké kusen ban má ino. Inká ena nanin banta vá ma manafin ban avúavá bá inká ena van arunan uantiyáken kama avúavá ana variyan ma van má mino. Inká aronará ana ída kama iyan ban avúavá baren ma fura sen afoká in nain baya ana ma sin má ino. ¹⁸ *Mai ma ará kusin avúavá ma maman kaiyain kéká ano ma ará kusin danayun ma yóden maen puntákein avúava sintan duyasinten mino.

4

Tiyarafenu Ádé Ma Orin Baya Ino

¹ *Nái yaná anó tiretin aúbaná aruve asive in avúavá maman kaiyan nafino. Namu avúava san ma aran nan daná anó maman aruvin banta kéká an daren ná tiretin aúpin aruviyan nafino. ² Tiretí ankan ma anunu iyaona yaná barano van maeya mai ma yan bain kéká aruan pureya inká oyampá baya seya inká aruve asive eya iya ompo mai yaná ída variya ono. Para vara seyo, amúkimpó ída Tiyarafenu vaípá inantiya rono. ³ Inká Tiyarafenu vaípá ma inanten nan maen ída amé iyan mino. Mai fara va ino. Tiretí avúavá ano namu ukhan pasen mi amintiya yan bukhafa ma amusín amintá do maman karúdanona van mino.

* **3:18:** Mat 5:9; Ibu 12:11 * **4:1:** Rom 7:23 * **4:4:** Rom 8:7; 1Yn 2:15 * **4:6:** 1Pi 5:5 * **4:7:** Efe 6:12
* **4:8:** Ais 1:16; Sek 1:3; Mar 3:7 * **4:10:** Yop 5:11; 1Pi 5:6 * **4:12:** Rom 2:1; 14:4

⁴ *Tiretí ankan pamúku nanin banta an den non kéká ompo ma vara rákena avúavá ma aronái in avúavá ano ma Tiyarafenui namuro vain mai siretí ankan ídá afová ukhe rafono. Ma vara rákena avúavápin amusín doseno van ma inikhanteya mai ída kanaíeya Tiyarafenui arona vanonái siretin evarané tiamiyá uno. ⁵ Tetin nan Tiyarafenuurá ákona inin kaúden bano van ma vei Kantá Aunan túpin kain bain nan ma Tiyarafenui vompon dóki ano sikhein nan mai siretí ankan ná inin ná bariya rafono. ⁶ *Tetin nan mantaan ákona uven namu yana san ma anunu in avúavá bá aruvin non tiren mi Tiyarafenu ano moékan tarisari simiyan mai van mi Tiyarafenui vompon dóki ano máa sikhen mino.

“Au khákan ma iyain kéká Tiyarafenu ano namuroí iyan mifo veyan ma maman bararasí iyain kékái sarisari amiyan mino.” *Pro 3:34*

⁷ *Máan tukhen mifo Tiyarafenu avorá eyan maman bararasí ureya váke vá Ban Anoni avúavá oyan amesin ná tiretin me ampiren orino. ⁸ *Tireti ma Tiyarafenu ádé ma oresin maen Tiyarafenu ano siretin ádé erinten mino. Tiretí ume kéká ompo ayan tesé e vá inká baya sireya ída varan kéká ompo aúpin ná avové ure sesé ono. ⁹ Ída funtákein avúavá ma vare ona vará ifí diyákeya moékan arunaná bariyáke ída vá intireya amusín iya vá bempáké arunanápin ná bano. ¹⁰ *Bafan avorá ará bararasí ureya váke ma veni ákonará ana vano van ma esin maen béi ano siretin maman daní uren kákan bí aminten mino.

Ena Nanin Banta Ma Yaimí Pákena Vaya Ino

¹¹ Mumunan tiyofi sífá tiváeyan noe, ída vá ben namu vaya sin maran ono. Ená oyampá baya sinte fo áa yaiminte fo mai ano man bayan oyampá baya sireya yaimin nono. Man baya ma yaiminteya mai man bayará ída yafisiya ompo véin mi yaimin nono. ¹² *Man baya ma uvantein

Tiyarafenumpin mi ákona vantin tetin daiminten mino. Beyafin mi vanasi ma evaránen aya uren aviran ákona vá aruren asuse in ákona vá ban mifo siretimpin intéa ákoná bákayá ben daimin maran iyá ba rafono.

Inurantena Yanasan Ma Ve Amo Sí Pákena Vaya Ino

¹³ *Máan tiyan mifo afova sá ono. Manáa kéká ano siyáken maen “Taréa fi áa inuran nafi e manté mana kákan barufá oriyé maé mairá mana oranará báké manáa yoran kauré maé kokhon aman moní uvaranté uno,” siyan mino.

¹⁴ *Inuran ma afoká in nain danasinta siretí ankan ída uron mi afová ukha ono. Para vara seyo, sireti ma vaona ano non ayo ano ma sító máará afoká uaren ma ainen mo aiyoré iyain an mi yakharono.

¹⁵ Tiretí ankan máan ná teno. “Bafan mano ma setin nan mai avúavá barano ma sintí mai ída furin para váké mai avúavá baranté tiféuno.” ¹⁶ Mai ma varano van ma iyaona yanasintará ma e amo siya varé esin maen mai ano namu avúavá anan mamádantiya umeí in nono. ¹⁷ *Tiretí ankan afova sá ono. Mai avúavái varanté uno seya afová ure ma ída varante mae mai umeí in nono.

5

Kokhon Ona Ma Yan Bain Kayo Ano Ma Uman Baran Nain Baya Ino

¹ Kokhon ona ma yenan bain nanin banta ano ma vaya vá ineno. Akhokhofarí ukhein uman kayo ma eriyain nará ífí diyáke aí pinte sá kákan berai seno.

² *Tireti ma kama yanasinta yenan bain mano mo avóken tonton arukhan inká kama vuí danasinta antan danú ano nakhen mino. ³ Tireti ma yenan bain kori vá siriva vá ano mo namuen karokharoní ukhen mino. Ma vara ma kípan nain damúi mai ma kama yanasinta ma kaiyá inona anon tiretí avúavá daíden maen ira ano ma kheiní inten mino. ⁴ *Para vara seyo, mai ma siretí ankaní yorarí iyákaya ma ída kama e miyaní into ma manáa moní do maman kaiyá eona ano siretí mai

avúavá inka siamíkan minó ákona ma vain Bafan mano inikhen mino.

⁵ *Ena ena yamú tiretí ankan kama namumpin bákeya kama yunan kayo ana niyáke kama inorarí ukhaona inka arinti furin nono. ⁶ Mai ma kama kéká báken ma siretin ída aroren ukhein kayo yaíde mae aruan purono sireya aren nan puriyaren mino.

Ará Kusin Má Báken Ma Uman Baran Baya Ino

⁷ *Mumunan tiyofi sífá tiváeyan noe, afová ukha ono. Dunan doran kéká ano vara finté danayun orun ampamaren karavintí duyaseno van ma a san ave é iyain an deya vá ará kusin má bempáké báke vá Bafani erin ave ono. ⁸ *Tiretí ankan ará kusin má bákeya mantaan ákona ukhe vá bano. Para vara seyo, Bafani erin inka ádé ukhen mino.

⁹ Mumunan tiyofi sífá tiváeyan noe, Tiyarafenu ano siretí avúavá daíden uman amin nafo ída vá eraran aveantumpin baya sin maran iya vano. Mai fara vara seyo, mai avúavá ma yaíden uman amin banta ano inka ereno van iyáken onará mantakhen mino.

¹⁰ Mumunan tiyofi sífá tiváeyan noe, afovasá ono. Mai ma Bafan aviká ma kama avúavá bariyáken uman o yosiyaré ein sakhanampa vanta kayo anon tetin aní ukhen mino. ¹¹ *Mai ma kákan umampin o fékein kékái kákan bí amiyá tiféuno. Mai ma Yopun amaniná afoká in ma varein avúavá ano ma Bafani ineine ma kanaí ein manon tetin aní ukhen mino. Para vara seyo, Bafampin mi moéken avábá in má arunaná bá bíkakhen mino.

¹² *Máan tukhen mifo mumunan tiyofi sífá tiváeyan noe, ída uron ná inaru fi vará fi áa manáa yanasinta fi aví tireya vá pura ódino sire ayan befiyó ono. Para vá eyo seya ída inó se iya vá mairá ída uman barano.

Mumunan Nanin Bantai Amúkipin Ma Ákona Vain Baya Ino

¹³ Tiretin pinté ma uman baren oriyan ban nain mano vá Tiyarafenu amúkuan

* **4:13:** Ruk 12:18-20 * **4:14:** Íbo 39:5, 11; Pro 27:1 24:14-15 * **5:5:** Ruk 16:25 * **5:7:** Diu 11:14; Yer 5:24 1:21-22; 2:10; íbo 103:8 * **5:12:** Mat 5:34-37

* **4:17:** Ruk 12:47 * **5:2:** Mat 6:19 * **5:4:** Diu * **5:8:** Rom 13:11-12; 1Pi 4:7 * **5:11:** Eks 34:6; Yop

amino. Inká amusin ma iyan nain mano vá Bafan anédó diyáken ben aví daní ino.

¹⁴ *Tiretin pinté ma aí iyantin ban nain mano vá monó doran banta kayo arantin ná Bafan avíká mai kéká ánontá uveri vanaren amúkuantano. ¹⁵ *Mumunan má ma amúkuantan nain manon betin aí daná kípáantá dantin mi Bafan mano evaránen betin kama uantanten mino. Inká mai kéká ano ma umeí ukharé intin maen Tiyarafenu ano vetíi ume ampiantanten mino.

¹⁶ Máan tukhein nará tiritíi ume van sirun noe sin maran ná iyáke vá ben amúkuantan maran esin ná Tiyarafenu ano aya ino. Puntákein nanin banta ano ma amúkiyaimpin mi moékan ákona van mino. ¹⁷ *Tetin an dakhein bantan Iraiya varen mi á ída yano van ákonaen amúkin mi kanú manaú orana ifo afápá mana un kádan biyontá ída á den mino. ¹⁸ *Máan tukharéin maen inká evaránen á dano van ma amúkin ma á eran maen dunan má káta vá ano evaránen orun póten mino.

Mumunan Ma Me Ampikharé Ein Ma Ayaintin Ma Evaránen Mumunan In Baya Ino

¹⁹ *Mumunan tiyofi sífá tiváeyan noe, siretin aúbanáké ma manáa kéká ano Tiyarafenui fura sikhein baya ma me oyan amiren orikharé intin ma ovaránen aviádanti ma erinti mae ²⁰ *mai vá afová ono. Mai ma o aviáden nan ma erein banta anon mai ume vantai furin pintena aya uren nan mi Tiyarafenu ano mai vantai ume kayo ampianten mino.

* 5:14: Mak 6:13 * 5:15: Mat 17:18-20 * 5:17: 1Ki 17:1; 18:1 * 5:18: 1Ki 18:42-45 * 5:19: Kar 6:1
* 5:20: Pro 10:12; 1Pi 4:8

**PITA MA ESÉ ARAÍEN
UVANTEIN BOMPON
MINO
(1 Pita)
Pita Ma Esé Bompon
Uvanteí Pákenai Afova
Vaya Ino**

Ma vompon ma uvantein banta ino.
Pita anon Sirivanusin nan ma Sairasine sen ariyain banta ma veni vompon uvaran doran bantaí ukhá ein mi siamin uvanten mino.

Uvarein orana ino.
AD sikisti-fo (64) fin mino.

Ma vompon ma uvantein baru ino.
Ovaeran bayafó ma Babironi e siyain baru Romú ino. (1 Pita 5:13 fin ná onano.)

Ma vompon ma uvaman amikhein kéká ino.

Esiá bara van ma saréa Teki e siyain barafin ma vain monó namun kayofin kokhon Yutan kayo vákan inká ena anan pinté ma monó tiyain kéká bá dere vákan mai kayon uvaman amikhen mino.

Nái ana vará ma vompon uvanten nafino.

Monó nanin banta ano ída uman baranté uno sen inikharé ein uman kayo varyaimpin mi ma vayafó betin ákona uantáken mino. Inká baru yafisin kayo vá antuntá ma varú baru ukhein kéká bá ano ará manafinien bano van mi aní iyáken ará ákona uantan baya siamikhen mino.

Pita Ma Amusin Baya Sein Mino

¹ Yisas Karaisini vaya varen orin banta mai séi Pita anon ma vompon uvaré uno. Mai ma Pontusí barafa safi Karesia safi Kapadosiá barafa safi inká Esiá barafin nafi Bitiniá barafin nafi ma Tiyarafenu ano aní ukhein nanin banta ano ma meren

mana mana ukhein kékápin mi ma vompon uvamadékun oren mino. ² *Tifóe Tiyarafenu ano fefái siretin aní uraya varé en nan mi Kantá Aunan mano siretin man kantasien mino. Mai ma siretin man kantasí ukhein ana maen mai máan mi ukhen mino. Yisas Karaisini vaya inire ma mai ánain dakhafe nan ma inká beni nare ano siretíi ume sesé uanteintá ino.

Máan tukhantin Tiyarafenui avábá bá ará kusin má ano moéken tiretin masá bano.

Para Van Oriyan Ban Aunan Ma Sive Ukhein Nará Tiyarafenu Aví Daní Tifano

³ Tetisi Bafan Yisas Karaisin Afóe Ayarafenu avisá daní ono. Mai fara vara seyo, setinti monó tin avúavápin maman auyení ino van mi Tiyarafenu ano Yisas Karaisin pinté uaren ída kípán arunaná tetin timikhen mino. Máan tukháí Yisas Karaisi ma fúaren evaránen e mantakhein nan mi ákona inin kauré ave iyá tifeuno. ⁴ *Mai ma ída miyantá bain amusin Tiyarafenu ano ve akhafana amikhen mino. Mai ma siretin amikhein amusin ma inarufá kaúantan bain mano ída avóken inká o afeyoren en inten mino. ⁵ *Tiyarafenu rá ma mumunan iyaona van mi vei moékan ákona fóké tiretintá dafikantiya oriya varé esin ume fintena siretin aya uren evaránen aviranten mino. Ma vara ma mo kípán nain damúi mai ma evaránen aviran nain maman dáko urantin minó anon onanten mino. ⁶ *Mai vará minó ano fura se amusin ono. Asikarái kokhon uman kayofin oferan nampo mai oyampáké amusin ban mino.

⁷ *Tiretí ankan kaná ákona e mantakheya fo mai siretíi mumunan akhenóka uan onano van mi mai uman kayo erinten mino. Irafin ma kori iyó uan oniyain an den mi siretíi mumunan akhenóka uan onanten mifo Tiyarafenu avorá mai siretíi mumunan mano kori esantaren moéken kákan danái van mino. Máan tukhantin ákona akhenóka kayofin ma sireti man-taan ákona ukharé esin maen Yisas Karaisi ma ma varará afoká inain damúi siretin nan amusin uren kákan bí aminten mino.

⁸ *Tiretí ankan béin ída yáko oné iya ompo véin nan para anunu é iya ono.

* **1:2:** Rom 8:29; 2Te 2:13 * **1:4:** Kor 1:12 * **1:5:** Yon 10:28; 17:11 * **1:6:** Yem 1:2; 1Pi 5:10 * **1:7:** Pro 17:3; Sek 13:9; Mar 3:3; Yem 1:3 * **1:8:** Yon 20:29; 2Ko 5:7

Inká béin ída onteya mumunan iyáke mae moéke amusin é iya ompo mai moékentasá amusin ono. ⁹ Para vara seyo, véintá ma ákona mumunan kaiya ona van ma amin nain miyan mai Tiyarafenu ano ma ume fintena siretin evaránen aviran nain mino.

¹⁰ *Mai ma Tiyarafenu ano ume fintena vanasi sarisari uren evaránen avirano van ma sikhein nan mi sakhanampa vanta kayo ano moeké afová ono van iyaren mino. Mai avúavásí ma inain ana mai vetí ankan ída afová ukhen kokhon ineine iyáken mi fara sakhanampa vaya siyaren mino. ¹¹ *Karaisi ma uman o yosen púaren ma ínampáké e manten kákan bí baranaí pákena van ma veni Kantá Aunan mano fe o útúben tiamiyain nan betí ankan amino ukharen mino. Mai yaná inte yamusá afoká intéin ná iye anó mai uman barantéin ná tiyan nafi siren kokhon ineine iyaren mino.

¹² Betí ankan ma vá ein damu san mai yanasinta ída afoká inten ne sikharen mifo kokhon orana ma esantavintin mi sireti ma vanona yamu san mi afoká inten nen tikharen mino. Máa sikharéin mi inaru fáké ma siantan erein Kantá Aunani ákona vá ma vaya sen noin kéká anoi saréa mai Kama Vaya siamiyan mino. Mai ma afokáin nain avúavá ano mo kama uron ukhan mi enisori kayo ano yere amusin iyáken mai yaná afoká intin onano van iyaren mino.

Kantasí Ukhen Ma Van Avúavá Pákena Vaya Ino

¹³ Máan tukhanti Yisas Karaisi ma ovaránen erin nain damú ma varanona sarisari vará ákona inin kauráke vá tiretí aurá kama e yafiseno. ¹⁴ *Tiyarafenu akhafana ompo veni vaya vá ineno. Mai ma Tiyarafenu ída afová ukhe ma ída funtákein avúavá bariyá eona ano siretin damuádan nafa ída vá mai avúavá evaráne yakhafono van anunu ono. ¹⁵ Máan tukha ompo saréa ma Tiyarafenu ano siretin maman be akhafanaí ono van ma aní uren kantasí ura vaona rasá kantasí ukhein avúavá ana vá barano.

¹⁶ *Mai fara vara seyo, Tiyarafenui vompompin máa sikhen mino. “Téi kantasí ukhé umpo siretí ankan masá kantasí ono.” *Riv 11:44-45; 19:2; 20:7*

¹⁷ *Máa sikhen mifo afovasá ono. Mai ma inarufá bain Tifóe oe sire ma amúkuan amiyaona ano ma vanasi yaimin nain damú mai ída arona ino sin avúaváká daiminten mino. Tiretí ankan ma varyaré eona avúaváká ten mi yaíden miyan aminten mino. Máan tukhanti ma varará ma vákeya ena vara fáké ma e vain an dakhe vá Tiyarafenu aránaópá ma van avúavá ana vá barano. ¹⁸ Mai fara vara seyo, siretí anáuyani avúavá ánain ma vákuriyaona ano ída kanaíen ayairí ukhan mi mai fintena siretin aya uré avirano van Tiyarafenu ano Yisasin pinté uaren tiretin miyaní ukhen mino. Mai miyan mai kori vá siriva fóké basa miyaní ukhen naino. Ída ino. ¹⁹ *Tiyarafenu anin Yisas Karaisi ída mana ume vákan ma afun ída vain sipisipi an dakhein ni aunan bain nare fóké miyaní uraya vaono. ²⁰ *Pefá ma vara ída afoká ukhan maen mai avúavá barano van mi Tiyarafenu ano véin aní uran baré íkan damú ma afoká iyain má ume fintena siretin aya ino van béin tiantan ma varará eren mino. ²¹ *Tiretí ankan Yisas Karaisimpinté uarei Tiyarafenu rá mumunan iya ono. Inká Tiyarafenu ano ma furin pintena Yisas Karaisin orun avían mantaren kakhana ákona amikhein manon tiretí mumunan moéken ákona uantiyan mino.

Afá Aváeyan Ma Aúkáké Avábá In Avúavá Baya Ino

²² *Tiretí ankan ma fura sikhein Kama Vaya inire ma mai ánain bákureona van mi siretí ume yo sesé uraya va ompo saréa vá mana nanin banta akhafana an dakheya fura se ven avábá in maran ná ono. Máan tiyáke ena nanin banta yere fura seya aú kákesá avábá ono.

²³ Mai fara vara seyo, siretí ankan monó tin avúavápin evaráne auyení ukha ono. Ma vara ráke anóe afóe ano ma amikhein aunan mai sireti ma furesin

* **1:10:** Mat 13:16-17 * **1:11:** Íbo 22; Ais 53; Ruk 24:26-27 * **1:14:** Rom 12:2; Efe 2:3; 4:17-18 * **1:16:** Mat 5:48 * **1:17:** Rom 2:11; Rev 2:23 * **1:19:** Apo 20:28; Ibu 9:12-14 * **1:20:** Efe 1:4; 2Ti 1:9-10 * **1:21:** Yon 14:6; Rom 5:1-2 * **1:22:** Yon 13:34; Rom 12:10

maen kípanten mifo auyen aunan betin pintesa erikhen naino. Ída ino. Mai aunan Tiyarafenui fara van oriyen ban baya fintéi erikhein mai ída kípán para van oriyen banten mino. ²⁴ Para vara seyo Sakhanampa vanta ano máa sikhen mino, “Banasi ano ainen ma kafuriyain kata an mi yakhen mino.

Betí kama vukhafa ano katafin bain kama faravan mano ma ainen mo khanoení iyan mino.

Kata ma kafuriyain má beni faravan mano kano uaren un pafasen eravé iyan mino.

²⁵ Máan té iyan mifo Bafani vaya ano fara van oriyen banten mino.” *Ais 40:6-8*

Mai vaya maen Tiyarafenui Kama Vaya ma fefá tiamíka inikhá eona ino.

2

¹ *Máan tukhen mifo minó namu avúavá bá kampun ma siantan avúavá bá ifasá ono. Ída vá kama avúavá anan bariyá bá uno seno. Baya ana ma siren ída varan avúava safi ena ma namu inin mamantan nafi ena ina yaná ma kampun tiren baran avúava safi vá oyan ameno. ² Arará iyampon mano ma nan anu máa niyáken e inoriyain an deya vá monó avúavápin e inoresin ná Tiyarafenu ano siretin aya uren evaránen avirano. ³ *Tiretí ankan taréa Bafani kama avúavá inka afová e ono.

Ákona Onámanáká Ma Má Uvaran Baya Ino

⁴ Yisas Karaisi ano Tiyarafenui monó namuntá ákona namádaní ukháin mi vanasi ano namu ukhen ne siren do éken mino. Máan turan Tiyarafenu avorá kama ukhen baréin béin aní ukhen mifo ve vain tasá ereno.

⁵ *Tiyarafenu ano siretimpó deren maman bei ákona namádaní uren mi ven ma monó tiantan namun uvariyan mino. Yisas Karaisi ma varein avúavákái Tiyarafenu ano siretin maman kantasí ukhein monó doran banta kékasí uren mi véi ma íkun dan amiyaona van amusin

iyen mino. ⁶ *Mai fara vara seyo, Tiyarafenui vompon dókifin tian amá ukhen mino.

“Onano. Yerusaremi* barurá mana onámaná aní uré maman ákona namádan an daré dafédékun bain béintá ma mumunan in nain kéká ano ída ayave van inten mino.” *Ais 28:16*

⁷ Mai ma veni vaya iniren oyan amiyain kéká ina va van naifo mumunan ma iyaona kékái kama yanái van mino.

“Má uvaran banta kayo ano ma yo maman karúdein onámaná ano maman má dádaimpin mana ákona onámanasí ukhen mino.” *Íbo 118:22*

⁸ Inká Tiyarafenui vompon dóki ano evaránen máa sikhen mino,

“Banasi arantantá duádan ma eyúpó en ankamé iyain onámanái véi van mino.

Inká mai ma vanasi ano eraven ankamé iyain onámaná ino.” *Ais 8:14*

Betí ankan ma Tiyarafenui vaya ída intin mi mai avúavá afoká inten ne sikháin mai avúavá afokáen mino.

⁹ *Máan ten mifo siretí ankan mai ma einisa ukha va ono. Ída ino. Para vara seyo, Tiyarafenu ma kin bain manon tiretí ankan aní urayan beni monó doran bantaí uveyan tireti má inká beni kantasí ukhein nanin banta vá ano ven ninaí ukha ono. Máan tukhantin Tiyarafenu ano ma yuntein avúavá pintena avían bei kakhakhein avúavápin ma kaúdákantiya kasae veni kama avúavá ena nanin banta aní inono.

¹⁰ *Pefá tiretí ankan banasi va vare va ono.

Taréa siretí ankan Tiyarafenui vanasin ba ono.

Pefá tiretí ankan Tiyarafenui arunaná ída mantare

saréa veni arunaná inka vare ono.”

¹¹ *Téi ma sinunu ukheruna sirona kéká soe, siretí ankan ena vara fákéi e van ná namu avúava sinta ano ma siretí au anunu vá aruviyain nan mi nentá bano van ákonaé tiamiyá uno. ¹² *Afokhampin ma vain nanin bantafin ma váke yafían

* **2:1:** Efe 4:22; Yem 1:21 * **2:3:** Íbo 34:8 * **2:5:** Efe 2:21-22; Rev 1:6 * **2:6:** Efe 2:20 * **2:6:** Yerusaremie ma siyain baya mai Saioni sen tiyan mino. * **2:9:** Diu 7:6; 14:2; Ais 9:2; Apo 26:18; Efe 5:8 * **2:10:** Ose 2:23 * **2:11:** Kar 5:17, 24 * **2:12:** Mat 5:16

ákona ukheya vá bano. Tiretí ankan ma Tiyarafenu aví danín avúavá bariyanona van ída kama iyan ne siyaren maen Tiyarafenu ma vanasii avúavá me yaimin nain damúi siretin nan kama avúavái variyaren ne siren mumunan iyáken Tiyarafenu aví daní inten mino.

Banasirá Ma Yafíkein Kékái Aránaopá Ma Van Baya Ino

¹³ *Kin manon minó danáká dafíkein bákán béi ma siamin nain baya kayoi aránaopá ana vano van mi Bafan mano inikhen mino. ¹⁴ Máan tukhan kin mano vei yoran banta kéká aní uran ban mifo mai kayo aránaopá dere vá bano. Mai fara vara seyo, mai ma namu avúavá baran nain kéká uman amiyáken kama avúavá ma varan nain kéká maman daní ino van mi vetin tiantan erikhen mino.

¹⁵ *Para vara seyo, siretí ankan ma kama avúavá baran nona ano mai ma oyampá baya sin nain kékái oorá iyarano van mi Tiyarafenu ano anunu ukhen mino. ¹⁶ Tiretí ankan miyan ída van doran banta kéka saono. Ída ino. Tiretin inka útúantaya va ompo ída vá inka útútintá bá uno sire namu avúavá bariyáke vá Tiyarafenui yoran banta kékási ukhe yoriya vano. ¹⁷ *Ena nanin banta aráopá ma van avúavá aní iyákeya vá monópin ma vain kékásá avábá ono. Tiyarafenu van periya vá kini aránaopá sá bano.

Miyan Ída Van Doran Bantai Vaya Ino

¹⁸ *Miyan ída van doran banta kéká ma vanteya siretíi ayafa aránaopá sá bano. Ída vá mai ma kama avúavá aní iyáken doran amin nain kékái yoran mana varano van ono. Mai ma yoran barano van duvun in nain kékái vaya yere vá ineno. ¹⁹ Mai fara vara seyo, siretí ankan kamá iya fo áa namú iya fo mai kama ineinen iyákeya manái ukhein avúaváká anan míkani yoran bariyan nan mi Tiyarafenu ano amusin iyan mino. ²⁰ *Tiretíi namu avúaváká ma uman bariyare ída mana miyan o varan nompo kama e váke ma

funtákein avúavá bariya ma uman bariyaré esin mi Tiyarafenu ano siretin nan amusin inten mino.

²¹ *Mai uman barano van mi Tiyarafenu ano siretin arakhen mino. Para vara seyo Yisas Karaisi ma siretí ankan nan uman mantein manon tiretin aní ukhen mifo véin ángain ná dakhafono.

²² “Béi ída umei iyáken manáa kéká ída mákáken mino.” *Ais 53:9*

²³ *Béin ma asiyákan anona ída asikharen mino. Inká béin ma uman amiyákan anona ída uman amikharen mino. Mai ma funtákein avúaváká kó tiantan banta Tiyarafenu ayampin mi vei uman kaen mino. ²⁴ *Tetin nan ume avúavá me ampiren puntákein avúaváká bano van mi veyantá tetisi ume maman be aurá kaúden baren daa unkamádantá un puren mino. Béin ma arein afun kayo anon tiretin ayofen mino. ²⁵ *Para vara seyo siretí ankan aiyókein sipisipi an deya kufa ukhare ompo saréa evaráneya sipisipirá ma yafisin banta an den ma siretíi aúká dafisin banta vaípái orikha ono.

3

Ábasuí Ma Ukhein Nanin Banta Ano Ma Vetíi Avúaváká Dafisin Baya Ino

¹ *Anasi kayo oe, máan mana e vá tiretí aváná ano ma Tiyarafenui Kama Vaya ída iniyanti mae beti ma sin nain baya aránaopásá bano. Tiretí ankan ída vaya sin nompo Tiyarafenu van ma fédeya funtákein avúavá ana ma varanona anon betin aní inten mino. ² Mai ma funtákein avúavá ma varano nan óden mi vetíi ará baeranten mino.

³ *Tiretíi ánon do ma ara ara yamirí in nafi inká kori fóké ma uvaran danas-intafó ma auí in nafi áa kama ukhein auí daná póké ma yan bukhafará auíin mano funtákein avúavá ída yákó é iyan mifo mai van ída vá kokhon ineine ono. ⁴ Mai ma Tiyarafenu avorá moéken kama uron ukhan ma vempáké ban avúavá ano ma aú pinté eriyen ma ída ainen mo kipé iyain avúava sará ineno. ⁵ Para vara seyo, máan avúavá

* **2:13:** Tai 3:1 * **2:15:** 1Pi 3:16 * **2:17:** Rom 12:10 * **2:18:** Efe 6:5 * **2:20:** 1Pi 3:14, 17 * **2:21:** Mat 16:24; Yon 13:15 * **2:23:** Ais 53:7; 1Pi 3:9 * **2:24:** Ais 53:5-6; Rom 6:11 * **2:25:** Isi 34:5-6; Mat 9:36; Yon 10:14; Ibu 13:20-21 * **3:1:** Efe 5:22 * **3:3:** 1Ti 2:9

pókéi fefá ma kantasí ukhá ein nanin kayo ano auí uran moéken kama uron iyaren mino. Betí ankan Tiyarafenu rá ákona inin kaúden betíi avafuná aránaópá báken baya iniyaren mino. ⁶ *Sara ma ve avafu Abaraamuni vaya iniren ma sesi ayafa oe ma siyaré ein an ná dano. Tiretí avafun ná ano ma siretin namu uantan nain avúava san ma ída ferana funtákein avúavá ana ma varanteya mai Saran araumasín an mi vaono.

⁷ *Máan manae vá aváná ano siretí anáona kákan bí amireya vetín má ma manafín kamaen ban avúavasá aní ono. Betíi au ano siretin an den ída ákona ukhen mifo Tiyarafenu ano siretin má manaí uren uváden auyen aunan bain amusín mi amikhen mino. Tiretí anáona yafiseren aa fáké ma ída kama ureya yafisesín maen Tiyarafenu ano siretíi amúkin ída ininten mino.

Monó Nanín Banta Ano Ma Vetíi Avúaváká Dafisín Baya Ino

⁸ Kípan baya ma siamenuna mai máan mi ukhen mino. Minó ano vá mana inintá bákeya arunaná bíkakhantiya vá tiretíi aú bá inin má bararasí ureya ven avábá in maran ná ono. ⁹ Namu avúavasí ma uantiyanti ída vá anona namu avúavasí uantano. Banasi ano ma ída funtákein baya sen asinti ída vá betí ankan anona aseno van iyákeya avábasá aní ono. Para vara seyo, mai avúavá barano van mi Tiyarafenu ano inikhen maen máan ma inonarái siretin avábá uantanten mino. ¹⁰ Mai fara vara seyo, Tiyarafenui vompon dókifín máa sikhen mino.

“Para van oriyan ban aunan má kama yamú kayo va san iye anó anunu inten nafi

mai kayoi amafín mano ma namu vaya sintá dafisen ná

inká oo ano ma kampun baya kayo sintá dafisen ná ino.

¹¹ Mai kéká ano namu avúavá ampíren kama avúavá ana vá barano.

Ena kéká bá ma ará kuse manafín ban nará ákona e yorano.

¹² Para vara seyo, funtákein avúavá ma variyain kékái Bafan mano yafíken

betíi amúkin nan á kaséden iniyan mifo

mai ma namu avúavá bariyain kékái

Bafan mano oyan amiyan mino.” *Íbo 34:12-16*

Tiyarafenu Oo Yaiyintá Ma Uman Baran Baya Ino

¹³ Tiretí ankan ma kama avúavá barano van esín maen iye anó umó danten nafino. ¹⁴ *Máan tukhen mifo kama avúaváká ma uman baresín maen Tiyarafenu ano mairái miyan aminten mifo “ída vá akhokho van iyáke ída vá kokhon ineine ono.” *Ais 8:12-13*

¹⁵ Ída vá kokhon ineine iyáke siretíi vampín ná Karaisín maman tiretíi Bafaní ure vá béintá monó teno. Inká monó avúavápin ma ákona inin kaúkeona van ma ina inti siaminona vaya vá ena ena útakhe vá bano. ¹⁶ *Máan tin nompo ovare me ineine ureya vá bempáké ará amin aa fákesá tiameno. Máan tesín maen tiretí ankan Karaisín ninan basin pasen mai ma namu vaya sen asiyaré ein kéká ano kama avúavá ma variyaona van ódaren ayave van inten mino. ¹⁷ Tiyarafenu oo yaiyen ma kama avúaváká uman baran manon namu avúaváká ma uman baran esantakhen mino.

¹⁸ Mai fara vara seyo Yisas Karaisi ma setisi umerá manádá para van oriyan ban purirí ma ein mai véi yeren máan uman o yosikhen mino. Béi ída mana umeí iyaren mifo setín tiviren Tiyarafenui varufín orono van mi ume nanin banta van dan bukhaafín uman o yosen pubíkan mi Kantá Aunan manon aunan amin evaránen e mantén mino.

¹⁹ Mai aunan pinté uaren mi mai ma auí uran ma karavusi uádan baré ein aunan kayofín mo monó baya siamen mino. ²⁰ *Mai ma Noan tiamín ma voti uvariýákan ma Tiyarafenui vaya átakharé iyan ma Tiyarafenu ano vempáké báken ave ukhá ein kéká ino. Kákan á daaren ma non taven banasi ariyan maen mai finten dan manápá ifo afápá kanú manaú un kádan nanin bantan máan Tiyarafenu ano ayaen mino. ²¹ Mai ma non taven banasi arein manon non ma féantan aní ukhen

* 3:6: Esé 18:12 * 3:7: Efe 5:25 * 3:14: Mat 5:10; 1Pi 2:20; 4:14 * 3:16: 1Pi 2:12 * 3:20: Esé 6-7

mino. Yisas Karaisi ma fúaren e mantaein ákona ano ma siretin aya ukhein manon monó non ma féantan avúavá aní ukhein mino. Monó non ma féantan mai au fáke va fain do sesé in naifo inin ma sesé uren aviren Tiyarafenu ádé orin avúavá ino. ²² Taréa Yisas Karaisi inarufá oren kakán bí o mamaren Tiyarafenui ádé kumantan maen minó enisori kayo vá minó daná ma varan ákona vá ara ara ákona kayo vá ano véin aránaópái van mino.

4

Tiyarafenui Avúavá Bá Ma Van Baya Ino

¹ *Máan tukhein nan mi Yisas Karaisi ma aí o yosikhanti siretí ankan mái máan uman o yosin nompo mai ma véi varyararé ein avúavá basá útaare vá bano. Mai fara vara seyo, Yisas Karaisin aviká ma uman barantó uno ma sireya inikhante mae umeí ma iyaona vá ampeno. ² Máan ma inteyan umeí ma in anunu khayó ída e yakháan more mere eya non nompo Tiyarafenui yoran mana varano van moéke anunu in nono. ³ *Para vara seyo mai ma afokhampin bain kéká ano ma aruven baren iyáken amusin dosiyan ma aurá ída yafisin avúavá bakan ma famúku avúavasí ono van anunu iyaré ein avúavái fefá bariyare ono. Betí ankan ma ara ara omasí iyáken óen non naren óen iyan ma inká ída funtákein omasí iyáken ma kampun ayarafenu kayorá ma namu avúavá póké monó tiyá ein mai feyante avúava sinta ifo vá ampeno.

⁴ Mai ma fefá manápá noré eona kéká bá ma ída evaránen oriveya vetin má namu avúava sinta varyaona van mi siretin oyampá baya sen asiyan mino. ⁵ *Máa siyan mifo fúkein kéká bá mai ma ída furin nan para vaona kéká bá anon Tiyarafenu avorá o mantavesin minó nanin bantan daiminten mifo afovasá ono. ⁶ Para vara seyo mai van mi fúkein kékápin dere Tiyarafenui Kama Vaya Yisas Karaisi siamikharen mino. Mai kéká ano fura sen dan bukhafarái uman baren púken mifo vetí ankan ínaimpáké Tiyarafenu ma

einien aunampin ída furin para vanten mino.

Tiyarafenu Ano Ma Amusin Amikhein Dorantá Ma Kamaen Dafisin Baya Ino

⁷ *Ma vara ma kípan nain damú inka ádesí iyan mifo siretíi avúavápin dafían ákona ukheya funtákein avúavá ana variya vá amúkiya vano. ⁸ *Moéken ma kákaní ukhein daná ma vain mai ven avábá uantan maran eya vá oriya vano. Para vara seyo, avábá in avúavá anon ara ara ume kayo yaran ten mino. ⁹ *Inte khéká anó tiretin má dunan niyáken bano van inten nafi mai amusin pintesá mai kéká aviádesin siretin má bano.

¹⁰ *Ena nanin banta aya ono van ma Tiyarafenu ano mana mana amusin amirú ukhein dorantá kama e yafíbesin ná Tiyarafenui sarisari ano siretimpin bíkaaren banasifin orino. ¹¹ Tiyarafenui oo vantaí ono van ma arakhanti mai véi ma siretin pinté uaren baya seinisá ono. Inká ena nanin banta aya ono van ma Tiyarafenu ano arakhanti mae mai ma véi amin nain ákona fókesá mai yoran barano. Máan ma esin mi Yisas Karaisi ma mantein avúava san Tiyarafenu aví ara ara avúavá póké daní inten mino. Minó kakhán má ákona vá ben ninan bain ayáká para oriyan banten mino. Mai fura ino.

Monó Nanin Bantaí Uven Ma Uman Baran Nain Baya Ino

¹² Téi ma sinunu ukheruna sirona kéka soe, akhenóka yanasinta ano ma siretin aúfin ira ma akheiní iyantiya mai van ída vá enará ukhein danái afoká iyá uno sire akhokho van ono. ¹³ *Máan akhenóka kayo anon Yisas Karaisi ma varein uman má manaí ukhá intiya ínaimpáké ma vei kakhán má ma ovaránen eriven amusin in nain damú tiretí ankan moéke véin má amusin in nono.

¹⁴ *Yisas Karaisin ánain ma yakhafiyasin ma aren asen iyantiya mai siretí ankan amusin mana vá ono. Mai fara vara seyo, Tiyarafenui kakhakhein Aunan manon tiretin má banten mino. ¹⁵ Mai ma vanta aruan puré iyainta safi umoyan inta safi

* **4:1:** Rom 6:2, 7 * **4:3:** Efe 2:2-3 * **4:5:** Apo 10:42 * **4:7:** Rom 13:11-12 * **4:8:** 1Pi 1:22 * **4:9:** Ibu 13:2 * **4:10:** Rom 12:6-8 * **4:13:** Apo 5:41; Yem 1:2; 1Pi 1:6-7 * **4:14:** 1Pi 2:20

aau varanta safi áa enai yoran máden asuse inta safi ma uman baren berai sin nara siya rauno. Ída ino. ¹⁶ Yisasín ánain ma yakhafín nonará ma uman baran nona van mi siamiyá umpo ída vá ayave van ono. Tiretin nan ma Karaisini vaya ánain bákuriyain nanin banta e ma sen ariyain nará amusín iya Tiyarafenu avisá daní ono. ¹⁷ Mai fara vara seyo, vanasi ma yaimin nain damú inka afoká ein Tiyarafenu ano ve akhafana finté naren arái uren daiminten mino. Monó nanin bantafín naren daiminten mifo mai ma Tiyarafenui Kama Vayará ma ída mumunan iyáin nain kéká anon moékan uman baranten mino. ¹⁸ Tiyarafenui vompon dókifín máa sikhén mino,

“Puntákein nanin banta aho uman ma mamarantin ináimpáké Tiyarafenu ano aya uren aviranten mifo

mai ma Tiyarafenu oo átakharéiyá in nain kéká bá ume nanin banta vá ano ma umampin orintin maen Tiyarafenu ano ída uron mi ayainten mino.”

Pro 11:31

¹⁹ Máan tukhanti Tiyarafenui anunu ánain dakhafiya ma uman bariyáke vá puntákein avúavá ana vare oriyáke vá mai ma siretin uvantein Tiyarafenu sá ákona inin kaono. Mai fara vara seyo, véi ma sirein daná ída ifá é iyan mifo minói varé iyan mino.

5

Monó Doran Kayo Vá Pumara Kayo Vái Vaya Ino

¹ Mai ma siretimpin ma vain monó doran banta kayo ma vaya siamenté uno. Téi má deren monó nanin bantai yafisin báké Yisas Karaisi ma mantein uman nan banasi siyamiyaruna véi ma ovaránen erin nain damú téi má deren beni amusimpin orékun kákan bí timinten mino. Monó nanin bantará ma yafisin baruna van mi ákona é ina iyá uno. ² *Tiyarafenu ano siretin mai yoran amikhen mifo sipisipi kayorá ma yafisiyain banta an de vá beni vanasirá dafiseno. Mai yorarí iyáke miyan

barano vara siya rauno. Ída ino. Tiyarafenui vanasirá dafisin anunu vantiya amusín má beni yoran para varano van mi siamiyá uno. ³ *Ída vá betintá ayafaí in dorarí iyákeya siretíi yoran pókesá betin kama avúavá aní ono. ⁴ Máan tiyaré esin ma sipisipirá dafisin banta kékái Ayafa ma erintí ma veni amusimpin oresin maen kákan bí amiren ayáká para van oriyan ban miyan mi siretin aminten mino.

⁵ *Tiretí pumara kéká soe, monó nanin bantará ma yafisin banta kéká ano ma siamin nain baya inire vá mai ánain bákurono. Inká monó nanin banta oe, eyan maman bararasí ure vá ben ayain maran ono. Mai fara vara seyo, Tiyarafenui vompon dókifín máa sikhén mino.

“Mai ma au khákan iyain kékái Tiyarafenu ano oyan amé iyan mifo

ará ma varará kaúden bain kékái sarisari uanté iyan mino.” *Pro 3:34*

⁶ *Máan ma sikhanti ará bararasí ure vá Tiyarafenui moékan ákona aránaópá basin ma veni kama yamú ma afoká intin tiretin maman daní ino. ⁷ *Tiretin amaniná ma afoká é iyain uman pinte mai Tiyarafenu anon ayaé iyan mifo minó uman béin ná ameno.

⁸ *Tiretíi namuro mai Van Anon mi váken be ma onan nain arono van raioni an daven báden non mifo véin nará dafian ákona ono. ⁹ *Tiretíi mumunantá ákona ukheya vá béintá dafike mantaan ákona vá ono. Mai fara vara seyo, siretí an den ma minó akhempá ma mumunan afá aváeyan má ayó má bá ma vain mano siretí ma variyaonaí ukhein uman mi varé iyan mino.

¹⁰ Tiyarafenu ano Yisas Karaisin pinté uaren mi vei sarisarifó tiretin o avían bei ída kípan kakhantá kaúken mino. Manáará ma uman o yosiresin mi véi anon tiretin oyampá mantaven evaránen ákona amiranti mantaan ákona ukheya van nono. ¹¹ Minó ákona mai ven ninan bain para oriyan banten mino. Mai fura ino.

* **5:2:** Yon 21:15-17; Apo 20:28 * **5:3:** 2Ko 1:24; Fir 3:17; Tai 2:7 * **5:5:** Efe 5:21; Yem 4:6 * **5:6:** Mat 23:12; Ruk 14:11; Yem 4:10 * **5:7:** Mat 6:25-30 * **5:8:** 1Te 5:6 * **5:9:** Efe 6:11-13; Yem 4:7

*Pita Ma Vei Vaya Mo Akhení Iyáken
Amusin Baya Sein Mino*

¹² *Ten má ákonaen monó dorarí iyain tifá tiváe ino sé ma inikheruna vanta Sairasi mái siya iká asíka vompon tiretin uvaman amé uno. Inte uman ná tiretin amaniná afoká é iyan nafi mai Tiyarafenui sarisari ano siretin má bakái ákona uantano van ma vompon uvaré uno. ¹³ *Romú* barafin ma vain mumunan nanin banta ano vetíi amusin baya kain tiretí ankan baonafá orin inká te sanin an ma yákein banta Makin má deren bei amusin baya kain oren mino. ¹⁴ Monó avúavá pókesá ben avábá in maran ono.* Mai ma Yisas Karaisini vanasi vaonafin ná ará kusin banti vano.

* **5:12:** Apo 12:2, 25; 13:13; 15:22, 37-40 * **5:13:** Apo 12:2; 2Ti 4:11 * **5:13:** Romue ma sikhein mai Kiriki
vaya fintéBabironia en tikhen mino. * **5:14:** Kiriki veya fintéi Tiyarafenurá ma monó tiyain nanin banta ano ma
kantasí ukhein amónan maran in póké ma avábá aní iyain nan tikhen mino.

**PITA MA KAN DÁDASÍEN
UVANTEIN BOMPON
MINO
(2 Pita)
Pita Ma Kan Dádasíen
Bompon Uvanteí Pákenai
Afova Vaya Ino**

Ma vompon ma uvantein banta ino.
Baya varen orin banta Pita ino.

Uvarein orana ino.
Pitan aruan purin ádesí iyákan AD
sikisti-faipi (65) fin nafi áa sikisti-sikisi
(66) fin nafin uvanten mino.

Ma vompon ma uvantein baru ino.
Romú barurá ino.

*Ma vompon ma uvaman amikhein kéká
ino.*

Mai ma esé uvantein bompompin ma
sikhein barafin ma vain monó namun
kayofin mino.

*Nái ana vará ma vompon uvanten
nafino.*

Kampun doran banta kayo ano ma
nóken Yisasin nan ída Tiyarafenu
Anin báken inká ída ovaránen erin-
ten ne ma siyain nan mi vanasi ano
yafíben bano van áká ukhen mino.

Pita Ma Amusin Baya Sein Mino

¹ Téi Saimon Pita ma Yisas Karaisini
aposerí ukhé beni ída miyan ban dorarí
iyaruna vanta anon ma vompon uvaré
uno.

Yisas Karaisi ma setisi Tiyarafenu vá
Tiyain Banta vá báken ma setin maman
Tiyarafenu avorá puntákein nanin ban-
taí urá bátiféku ma setin má manaíe
funtákein mumunan iyaona kéká baonafái
ma vompon uvamadékun oren mino.

² Yisas Karaisi ma setisi Bafan má Ti-
yarafenu vá bain ma afová ono van esin
maen mai Tiyarafenu ano vá bei sarisari
vá ará kusin má pókesá tiretin avu uan-
tano.

*Tiyarafenui Afova Vayafin Ma Kákaní In
Baya Ino*

³ Yisasin ma oné afová é tifékun maen
beni moékakhein ákona ano mai ma
funtákein avúaváká ma vano van iyá
tiferuna yanasinta siminten mino. Bei
khakhan má kama avúavá bá barano
van mi setin tarakhen mino. ⁴ Bei kákan
bí bá kama ukhein avúavá bá pinte
uaren móeken ma kama ukhein avúavasí
usintano van mi setin iyátintan baren
mino. Mai ma namu avúavasí in tinunu
ano ma setin eúkuádá bá tiferuna finte me
ampiren beni kama avúava sinta variyan
ben an dakhen bano van mi iyátintáken
mino.

⁵ Máan tukhanti mai ma iyáantan
bain danasinta ma varano vará ayampaí
ureya vá tiretíi avúavápin maman kaono.
Máan ma esin mi siretíi mumunampin
kama avúavá asotú uanten inká kama
avúavápin Tiyarafenu van ma anunu in
afova asotú uantanten mino. ⁶ *Inká
mai afovafin e aurá ma kamaen dafisin
avuává asotú uanten maen umampin ma
mantaan ákona in avúavápó aurá ma
yafisimpin asotú uantanten mino. Inká
umampin ma mantaan ákona uven ma
Tiyarafenui avúavá ánain bákurin má
asotú uantanten mino. ⁷ Inká Tiyarafenui
avúavá ánain ma vákurimpin afá aváen
nan ma anunu in avúavá asotú uanten
maen inká afá aváe ma anuimpin mino
nanin banta van ma anunu in avúavá bá
asotú uantanten mino. ⁸ Mai avúava sinta
ma móeke varesin maen mai anon tetisi
Bafan Yisas Karaisin ma afová inonafin
moéken aran iranten mino. ⁹ Máan tinten
mifo mai avúavá ma ída afova variyain
kékái auu yufúkein an dakhan ída kamaen
oniyain mino. Ume avúavá pinte ma
Tiyarafenu ano yo sesé uren avíkein mai
me áunten mino.

¹⁰ Máan tukhein nará mumunan tiyofi
sifá tiváeyan noe, siretí ankan ákona e
yoresin ná tiretin nan pura sen Tiyarafenu
ano ma araren bei naí ukhein kékápin
ban mino sen ná afová ino. Mai fara
vara seyo máan ma inteaya ída kanaíeya
erave ankamin nono. ¹¹ Máan ma esin
mi Tiyarafenu ano setin Tiyain Bafan

* 1:6: Kar 5:22-23

Yisas Karaisini fara van oriyen ban dafisin barufin ma orin ona yiantanten mino.

Monó Dóki Finte Vaya Ma Avovéen Inin Baya Ino

¹² Tiretí ankan pefái fura sikhein avúavá afová ureya mantaan ákona ukhe ompo me áuninona van pasé para e siamé oriya bano van mi inikhé uno. ¹³ Téi ma ída furin ma ma vukhafa vá para vanté maé mai vaya kayo fara siretin e siamé oriya bano van mi inikhé uno. ¹⁴ *Máan tiyá umpo setisi Bafan Yisas Karaisi ano séi ma ma varará banuna yamú inka aní iká afová ukheruna ída ayáká bákéi furonté uno. ¹⁵ Máan tukhein nan mi séi ákona yorari ékuya mai yanasinta afová ukhare ínaimpáké ma fúbéku mae mai yanasinta van para ineine eya oriya vano van muno.

¹⁶ *Mai fara vara seyo, setisi Bafan Yisas Karaisini ákona vá beni ovaránen erí pákena vaya kayo ma siyaruna mai ída vantai inintá tiyá umpo seti suu fóké ma fura sé beni ákona onteruna van mi siyá tiféuno. ¹⁷ *Para vara seyo seti Sifóe Tiyarafenu ano ma inaru fáké ákona oovaraádan eriyen maen máa sikharen, “Ma sen sanin téi moeké tinunu ukheruna iyampon mi vakái, véin nan moeké timusin uantiyá uno.” Máa ma sein manon moékan ákona ma vain Tiyarafenu pinté kákan bí bá kakhan ákona vá baren mino. ¹⁸ Kantasí ukhein anu yontá ma véin má un bákéi setiyantá mai vaya inékun inaru fáké oovaraádan eren mino.

¹⁹ Mai van mi sakhanampa vanta kékái vaya kayo ano sian amá ukháí afová ukhé tifé umpo vetí ankan ma uvamádan bain baya kayo vasá avové ureya ineno. Mai fara vara seyo, vetíi vaya ano yunteimpin ma kakhaan teiníi iyantiya oriya varé esin mi ínaimpáké ma Yisas Karaisi afoká inain damú beni moékan kakhan manon aúpin kakhaan tanten mino. ²⁰ Ma furan tiyá umpo sakhanampa vanta kayo ano sakhanampa vayai ono vara vetíi inin pinté Tiyarafenui vompon dókifin o véden tiádan ban naino. Ída ino.

²¹ *Mai fara vara seyo, Kantá Aunan manon ákona amiyákan Tiyarafenu ano vetin pinté uaren baya sikhen mino.

2

Kampun Afova Amiran Ma Uman Afoká É Iyai Pákena Vaya Ino (Yuti 4-13)

¹ *Máan tukhen mifo fefá ma Isareri kékápin kampun sakhanampa vanta kayo varé einien mi siretimpin kampun arú kayo ano afoká inten mino. Mai kéká anon Tiyarafenu ma sikhein baya yo vaeden maen betíi ineinefó ena nanin banta aúpáké afova aminten mino. Máan tiyáken betin ma miyaní uren ma minó dafisiyain Bafan me oyan aminten mino. Máan ma inain manon betíi amaniná ainen uman o maman kainten mino. ² Máan ma iyantin kokhon nanin banta ano vetíi namu avúavá ánain dakhafiyáken Karaisini fura vaya ma maman paen danasí uren maen ayave amin aváuvá banasi avorá maman dákó inten mino. ³ Máan tiyáken betíi ineinerá kampun baya fóké pura ma seiní uren tiretíi moníká dafiseno van inten mino. Máan inten mifo Tiyarafenu ano ma vetin kó tiantáden uman ameno sikhá ein damú pefái aní ukháin inka eriyain betíi ankan uman baranten mino.

⁴ *Mai fara vara seyo, enisori kéká ano ma umeí uran maen Tiyarafenu ano vetin ída avo uanten mifo sítipa ukhein don aimpin kain orun báken mi vetin ma kó tiantan nain damu san ave ukhen mino. ⁵ *Inká pefá Noani yamú dere Tiyarafenu ano ume nanin banta ída avo uanten mifo Noan má dan manápá ifo afápá kan un kádan bei kéká bá máa anan avo uantein mino. Tiyarafenu ano ma funtákein avúavá póké ma vanasi yaiminaí pákena vayan Noa ano siamiyaren mino. Mai oyampákéi Tiyarafenu ano á dan eraáken non taven maen beni vaya ma átakharé iyá ein kéká ufurin puren mino. ⁶ *Ínaimpákéi Sodomu vá Komora vái kákan baru kayo ira saman kaúden

* 1:14: Yon 21:18-19; 2Ko 5:1 * 1:16: Mat 17:1-5

1Pi 1:11-12 * 2:1: Mat 24:11; Yut 4 * 2:4: Yut 6

* 1:17: Mat 17:5; Mak 9:7; Ruk 9:35 * 1:21: 2Ti 3:16;

2:5: Esé 6-8; 2Pi 3:6 * 2:6: Esé 19:24; Yut 7

kasí o éke e éke uren ma vara rákena yo fútian karúdein mino. Ume nanin banta amaniná ma ínaimpáké kain nain mai avúavái vetí ankan amaniná aní ukhen mino. ⁷*Máan ten mifo maí damú ana Roti funtákein banta váken ume avúava san aí pefe iyan berai siyaré íkan Sodomú barurá ma afoká ein uman pintena Tiyarafenu ano véin aya uren aviren mino. ⁸ Mai véi funtákein bantai váken pasen namu avúava sinta ma ena ena yamú afoká iyákan ma onen inen iyan maen kákantá berai siyaren mino.

⁹ Máan tukhantiya afovasá ono. Bafan mano afová ukhein mi máan uman pinta ven ánain ma yakhafiyáin nain kéká kasaen aya uren aviranten mifo mai ma ume avúavá bariyáin nain kékái uman amen oriyantín daimin nain damú afoká inten mino. ¹⁰ *Bafan mano mai ma vetíi anunu ánain dakhafen namu avúava sinta variyáken Tiyarafenui veya átakharé iyáin nain kékái moékakhein uman amin ten mino. Máan nanin banta ano au khákan iyáken ída ma ena van inin avúavá bá bákan mi kasaen inarufá ma kantasí ukhen khakhan má bain aunan kayo van ída feranton betin nan tiren inté iyan mino. ¹¹ *Máan té iyan mifo mai ma kampun afova amé iyain kéká ma esantakhan ákona vá bain enisori kayo vá dere ano ída máa sen kantasí ukhen kakhan má báken ma Bafan avóra bain aunan kayo maman bararasí uren tiren intikhein mino.

¹² *Mai ma kampun afova amiyain kéká ano ída ma ineine vain uraran má afá tafúna kayo vá ano ma arin daná baimpin ma amúkuven orein an mi yiyan mino. Mai kéká ano akhokho amin ákona ma sító máará afová ukhein nan mi siren intiyain betin má deren aruan kípan ten mino. ¹³ Betí ankan ma namu avúavá bariyaré inain tákena mai namu miyan manan baranten mino. Betí ankan dáko ma namu avúavasí in nan mi moéken anunu iyáken tiritin kákan ayave man amé iyan mino. Mai kéká ano ma siretin má manafin dunan niyái páké ma siretin máká maaká iyain manon mai omá máden asuse uren mi ayave amiyain

mino. ¹⁴ Betí ankan ira yoren nóken auu fóké ma fara oniyaintá ina famúku avúavasí iyan mifo mai avúavá ano ída ayoé iyan mino. Betí ankan kama yanasinta fóké íú an daren ída ma mumunan ákona ukhein kéká mamádan umefin eraven ankamiyan mino. Máan tiyáken beyan nan mana iniren ma ída ena van inin avúavá ákonaen bariyain mai kéká ano moékan uman baren namu uron inten mino. ¹⁵ *Betí ankan puntákein avúavá me ifá uren mai ma Beorin anin Baramun an dé namu avúavái miyen barano van mi anunu iyaren mino. ¹⁶ *Baramu ma namu avúavá bariyaréin maen banta ano ma veya seinien bei yonkin mano véin asiran mi mai ma óen banta ano ma variyain avúavá ma variyá ein me ampen mino.

¹⁷ *Mai kéká ano ainen mo káné iyain non an den inká uva ano ma e avéken mo asuse iyain konan an dakhen mi veti ma sirein danasinta ída funtáden baré iyan mino. Mai kayoi nan kákantá títipaen ma kumayusí ukhein baru útaan kaúantan ban mino. ¹⁸ Betí ankan ída mana yanasí inái páké be amo ana siren au khaiyan banten mino. Pamúku avúava san maman kama yaná an daren maen moéken anunu iyáken mai avúavá pinté ma asare me ampiren eriyain kéká mamádantín evaránen eraven ankaminten mino. ¹⁹ Betí ankan ten kama e kuse van nono sinten mifo umei miyan ída van doran bantan báken betí moéken namu uron en asuse ukhen mino. Mai fara vara seyo, mana vanta ano ma áintín mana yaná ano véintá dafisinti mae mai yanái miyan ída van doran bantaí inten mino. ²⁰ *Inká banasi ano ma namu avúavá me ampiren setisi Bafan Yisas Karaisin ánain dakhafiyare ma evaráne ume avúavái miyan ída van doran bantaí ma inten maen mai fefá ma namu avúavá bariyaré ein esantaren namu avúava suron mi varanten mino. ²¹ *Kantasí ukhein man baya ma vetí ankan amikhein ma ódaren me oyan amiyain mai funtákein avúaváká ma van aa ída afová en baré intin kama uron mi inainten mino. ²² Mai kayo van mi minó

* 2:7: Esé 19:1-16 * 2:10: Yut 7-8, 16 * 2:11: Yut 9 * 2:12: Yut 10 * 2:15: Nam 22:7; Yut 11; Rev 2:14
* 2:16: Nam 22:28-35 * 2:17: Yut 12-13 * 2:20: Mat 12:45 * 2:21: Ruk 12:47-48

nanin banta ano sikharéin mi fura sen afoká en mino. “Iyan mano mun biádaren evaránen nanten mino.” *Pro 26:11* Inká “Non peádan pon mano evaránen ápópin o vaven típon ananten mino”.

3

Bafani Yamú Inka Eriyan Mino

¹ Téi ma sinunu ukheruna sirona kéka soe, siretí ankan evarané tiaméku mai ma siameruna vava van ovare me in-esin mai ano kama ineine amino van mi kan dádasíe ma vompon uvamádékun tireti vaonafá oren mino. ² *Kantásí ukhein sakhanampa vanta kayo ano ma fefá tikharé in ma inká tetin Tiyain Bafan mano ma aposeri kéká pinté uaren ma ákona vava siamikheini ana vava ovare me afová ono van mi siyá uno.

³ *Esé arái in daná ma siretí ankan evarané tiamenuna mai ma vara ma mo kípan akhempá pura vava van ma siren intin kéká ano siren intiyáken betí anunu ánain dakhafen namu avúavá barano van inten mino. ⁴ *Mai kéká ano máan mi sen anona vava sinten mino, “Yisasi ma ovarané ereno van ma sikhá ein mai intesí eriyán nafino. Ma vara ma afoká ein táké mai vava anan o sen eriyán mifo minó daná ano vaintá anan para van mino.”

⁵ *Tiyarafenui vayará ma ayon afoká uádaren ma inká non pinté bara afoká uren non póké eúkuádan bain ma san betí ankan áuden ída ovaren me iniyan mino. ⁶ *Máan turákaren mai nompói ma vara máden namu uren asuse ein mino. ⁷ Inká Tiyarafenu ano evaránen ákona vava sikhén mino. Banasii avúavá ma yaimin nain damúi inaru vá bara vá ira saman kauriyáken Tiyarafenui vava ma átakharé iyain nanin bantan umán aminten mino.

⁸ *Máa sikhén mifo séi ma sinunu ukheruna sirona kéka soe, ída vá áun nono. Bafan avorá mana tauseni (1,000) orana ano maná damú an mi yakhan inká maná damú ano mana tauseni (1,000) orana an mi yakhen mino. ⁹ *Manáa

nanin banta ano ma iyainíen Bafan mano sirein dana san ída vempáké doré iyan mino. Ída ino. Tiretin nan mi iniren máan tiyan mino. Mana ano ída umán barano van mi inikhen mifo ará baerano van béi ayáká para ave ukhen mino. ¹⁰ *Máan tukhen mifo Bafan ma erin nain damú ída afová esin umoyan banta an mi yanten mino. Erintin maen inaru ano akhokho-farién uu aruaren mo kípiyantín maifin ma varé inain danasinta ira ano khaan kaurintin maen inká bara vá maifin ma vain danasinta vá dere ira khaan kaurin-tén mino.

¹¹ Minó danasinta ma eúkukhein mai ira ano khaan kaurinten mifo kantásí ukhe vá puntákein avúavá ana variyan ban nanin banta vá bano. ¹² Máan ma iyákeya mai ma Tiyarafenu ano afá ira fóké ma minó danasinta saman kaurin nain damu san aine ereno sire vá ineine iya vano. ¹³ *Máan tin nompo mai ma auyen bara vá inaru vá ma iyátintan bakan ma funtákein nanin bantai varu ma vain nan mi ave ukhé tiféuno.

¹⁴ Máan tukhein nará téi ma sinunu ukheruna sirona kéka soe, mai yanasinta ma afoká inain nan ma ave ukhanteya mai minó danápin ma funtáke vanona avúavasá bariya vá Tiyarafenu vá kuse vano.

¹⁵ *Banasi ano ída o afeyorano van mi Bafan mano ave ukhen mifo afovasá ono. Mai van mi seti ma sinunu ukheruna sífá tiváe Pori ano Tiyarafenu ma amein afova fókéi siretin bompon amikharen mino.

¹⁶ Béi ma uvantein bompon kayofin ma onesin maen máan danasinta kayo van manan tikhen mino. Béi ma uvantein bompon kayo ma onante manáa umán dakhanti maen inin ma ída kama ukhein kéká anon mai vava vaéden ena yanáká tiádiyán mino. Ena vompon dóki kayofin dere máan avúavá anan bariyákan mai ano umán manan o maman afoká iyan mino.

Pita Ma Kípan Baya Sein Mino

¹⁷ *Téi ma sinunu ukheruna sirona kéka soe, siretin pe o útúbé amaan baya

* **3:2:** Yut 17 * **3:3:** 1Ti 4:1; Yut 18 * **3:4:** Mat 24:48 * **3:5:** Esé 1:6-9 * **3:6:** Esé 7:11; 2Pi 2:5 * **3:8:** Íbo 90:4 * **3:9:** Aba 2:3; 1Ti 2:4 * **3:10:** Mat 24:29, 35; Ruk 12:39; 1Te 5:2 * **3:13:** Ais 65:17; 66:22; Rev 21:1, 27 * **3:15:** Rom 2:4 * **3:17:** Mak 13:33; 1Ko 10:12

siaméku afová ukharé esin maen namu nanin bantai avúava sinta ano siredíi inin ída máden asuse intiya ákona e ma munan iyaona ída me ampeno van muno.

¹⁸ Máan tin nompo setin ma Siyain Bafan Yisas Karaisin ma anunu ukhein tarisari vá afova vasá e inorano.

Béimpin ná minó kakhan má aví ma yaní in avúavá bá ano saréa váken ná para van oriyan bano. Mai fura ino.

**YONI MA ESÉ ARAÍEN
UVANTEIN BOMPON
MINO
(1 Yoni)
Yoni Ma Esé Bompon
Uvanteí Pákenai Afova
Vaya Ino**

Ma vompon ma uvantein banta ino.
Baya varen orin banta Yoni vei furin ádesí ukhan ma uvarein minon ten manáa afova vanta kéká iniyán mifo ída mana vanta ano fura sen afová ukhen mino.

Uvarein orana ino.
AD nainti (90) ráké mana antareti (100) ráké mai aúban mino.

Ma vompon ma uvantein baru ino.
Esiá barafin ma un non akhempá áau orun perápá ma vain baru Efesásí ino.

Ma vompon ma uvaman amikhein kéká ino.

Efesásí ma vain monó namun má Esiá barafin ma vain monó namun kayo vá inká minó akhen pá ma vain monó namun kayofin mái uvamádan oreraen mino.

Nái ana vará ma vompon uvanten nafino.

Minó akhempá ma monó tiyain kéká ano ma Yisasintá mumunan iyan ma kamaen ban avúavá ma varan nain má inká pefá ma Yisas Karaisini kama vaya siamikhá ein ma san mi sian amá ukhen mino. Ma vara ráke avúavá bá inká kampun monó doran banta kéká bá avúavá ba san mi ma vompon ma yankafin nain kayo afova amikhen mino. Inká ena avábá uantán ma kákaní ukhein nan tian amá iyáken mi Tiyarafenu ano ma setin avábá usintiyain oniyáké maé mai vará ben aya ven aya vá onon tikhen mino.

Ayun Ma Fara Van Oriyan Ban Baya Ino

* 1:1: Yon 1:1 * 1:2: Yon 1:14 * 1:4: Yon 16:24 * 1:5: 1Ti 6:16; Yem 1:17 * 1:6: 1Yn 2:4 * 1:8: Íbo 32:5; Pro 28:13 * 2:1: Ibu 7:25-26

¹ *Minó danasinta ma ída afoká ukhan ma varé ein mano setin má baya siyáká beni Vaya iniyáké oné tiféuno. Béi Yisas Karaisin báken Ayun Ma Fara Van Aunan mi varé íká béin oniyáké aruvé tiféuno.

² *Pefá mai Aunan manon be Afóen má manafin baré íkan béin maman dákó urá purasé onteruna van mi ayun para van aunan mi véi van mino sé tiretin tiamiyá uno. ³ Tetí ankan ma fura sé ódaré inikhé tiferuna yana san mi eresí manafin átaru uvé monó teno van tiretin tiamiyá uno. Manafin ma átaru uvé monó té tífanuna mai ve Afóen má be Anin Yisas Karaisintá báí monó tiantá tifanté uno.

⁴ *Tetí ankampin moéken timusin bíkano van mi ma vompon uvaman amiya tiféuno.

Tiyarafenui Kakhantá Ma Van Baya Ino

⁵ *Ma vaya vá tiretin nan tiameno siren ma véi sisimikhá ein bayan tiretin tiamiyá uno. Tiyarafenu mai kakhan mi vákan béimpin ída sítípa van mino. ⁶ *Máan tukhantí setí ankan ma manafin átaru uvé Tiyarafenu vá monó tiyá uno siré ma yuntein avúavápin para vá tifanté maé mai kampun mi siré ída fura sikhein avúaváká nó tiféuno. ⁷ Máan tiyá tifé umpo Karaisin an dé ma Tiyarafenui kakhakhein avúavápin ma vá tifanté maé mai véin táí manafin átaru uvé monó tiyá tiféuno. Máan tiyá tifékun maen be Anin Yisasini nare ano setinti ume yo sesé usinté iyan mino.

⁸ *Tetí ankampin ída ume van mino ma sé tifanté mai setiyan mi máká máaka iyá tifékun pura sikhein avúavá ano setimpin ída van mino. ⁹ Máan tukhen mifo setisi ume ma sian amá uan béin amé tifékun maen béi ma sikhein ánain dakhafen mi setinti ume yo sesé usintáden puntákein avúaváká kainten mino. ¹⁰ Tetimpin ída ume van mino ma sé tifanté mai Tiyarafenu van mi kampun banta ino siyá tifékun mai avúavá anon beni vaya van tetin túpin ída van ne sen aní iyan mino.

2

Yisas Karasin Ma Fura Sen Afová In Baya Ino

¹*Téi ma sinunu ukheruna iyamporinta oe, siretí ankan ída umeí ono van mi ma vompon uvaman amiyá uno. Mana ano ma umeí inte ya mai mana vanta váken mi setisi ume ampisintano van Tiyarafenu tiamiyan ban mino. Béi Yisas Karaisi Tiyarafenu avorá puntákein bantan ban mino. ²*Béi anon tetisi ume van be au fóké ákonte ukhen mino. Máan turen tetisi ume ana ída yo sesé ukhen mifo minó barafá ma vain nanin bantai ume vái yo sesé ukhen mino.

³Máan tukhen mifo inté uresá beni nan bá uno sé afová ótifante rafuno. Beni man baya khayó ánain ma vákuró tifanté mai anon beni nan bá uno sé afová ó tifanté uno. ⁴Mana vanta ano ma séi Tiyarafenu afová ukhé uno siren ma veni man baya ánain ma ída vákurinten maen mai véi kampun bantan bakan pura vaya ano veimpin ída van mino. ⁵*Máan tukhen mifo fura sen ma Tiyarafenu van anunu ukhein kéká anon beni vaya ánain dakhafiyán mino. Máan ma onté tiféi mai véin masá o súpá ukhe rafu áa ída fi sé afová ó tifanté uno. ⁶Tiyarafenu vá manafin bá uno ma sin nain kéká ano vá Yisas Karaisi ma varé ein avúavá kasá bano.

Auyen Man Baya Ino

⁷*Téi ma sinunu ukheruna sirona kéka soe, ma auyen man baya va siretin uvaman amiya rauno. Ída ino. Mai fara vara seyo, ena vá ma avábá in maran ná ono ma sikhein man baya ma aráintá amikhaya o ine eriyá eona fákena vompon mi uvaman amé uno. ⁸*Máan té umpo mai ma fura sikhein avúaváká ma Yisasín má tiretin má baonarái ven avábá in maran ná ono ma sen peyante man baya ano sikharé ein mai anon tiretimpin auyení ukhen mino. Mai fara vara seyo, sítípa ano inka e kípiyan mi fura oon mano yákó uven kakhaan tiyan mino.

* **2:2:** Yon 1:29; Kor 1:20; 1Yn 4:10 * **2:5:** Yon 14:21, 23 * **2:7:** Yon 13:34; 2Yn 5-6 * **2:8:** Yon 1:9; Rom 13:12 * **2:9:** 1Yn 4:20 * **2:10:** Rom 14:13 * **2:11:** Yon 12:35 * **2:15:** Rom 8:7 * **2:16:** Rom 13:14

⁹*Mana vanta ano ma siyáken, “Téi kakhan aúpin bá uno,” ma siren monópin bain afá aváeyan ma safi ayofin ná ba safi ma ará uman daan tiyantén mai véi sítípa fin para van mino. ¹⁰*Iye anó ena monó nanin banta van anunu inten nafi mai véi kakhan aúpin mi váken betin ída mamádantin eyúpóen ankaminten mino. ¹¹*Máan tinten mifo mana ano ma monópin bain afá aváeyan nafi ayofin nafi ma ará namu uantanten mai sítípa yaná ano véin auu yufúkuádan kufan ukhen mino.

¹²Téi ma sinunu ukheruna iyampon kayo oe,
Yisasi ma varein avúavá anoi siretíi ume arúantáká mai van mi ma vompon uvaman amiyá uno.

¹³Monó bayafin ma karakheona nanin banta oe, esé araién ma minó danasinta afoká ein bantan Yisas Karaisin báká tiretí ankan béin afova suron ukhen náí ma vompon uvaman amiyá uno.

Auyen nanin banta oe,

Ban Anon má aruvúde véin maman bararasí ureya ven esantakhen náí ma vompon uvaman amiyá uno.

Téi ma sinunu ukheruna iyampon kayo oe, inarufá ma vain Afóen pefái afová ukhen ná ma vompon uvaman amiyá uno.

¹⁴Monó bayafin ma karakheona nanin banta oe,
esé araién ma minó danasinta afoká ein bantan Yisas Karaisin bákái siretí ankan béin afova suron ukháen náí ma vompon uvaman amé uno.

Auyen nanin banta oe,

Tiyarafenui vaya maman ákona ure aúpin denan baréi

Ban Anon maman bararasí ureya véin esantakháen náí ma vompon uvaman amé uno.

Bararáke Avúava San Ma Ída Anunu In Baya Ino

¹⁵*Ma vara vá maifin ma vain danasinta vá ída vá anunu ono. Mai fara vara seyo, ma vara ráke avúava san ma anunu

iyanteya mai Afóen nan ma anunuin ída éimpin bain mi aní iya ono. ¹⁶ *Mai fara vara seyo, ma vara ráke avúavá anon ará mantaya ena ina yana san anunu iyákeya au khákan in avúavá maman afoká uádé iya ono. Mai avúava sinta ano ída Sifóen pinté erikhen mifo ma vara finte yanasintan afoká iyan mino. ¹⁷ *Ma vara vá maifin ma vain danasinta vá ano inka mo kípiyan mifo Tiyarafenu ma anunu ukhein avúavá ma varan nona kéká anon ayun para va oriya van nono.

Yisas Karaisini Namuro Kayo Van Ma Amaan Tikhein Baya Ino

¹⁸ *Téi ma sinunu ukheruna iyampon kayo oe, ma vara ma kípan damú inka afokáen mino. Pefá ma siretí ankan inen nan ma Yisas Karaisini namuro erinten ne ma siyaré ein mai inka kokhoná afoká ukhen mino. Mai yaná ma oniyá tifesá ma vara ma kípan damú inka afokáen mino sé tifano. ¹⁹ *Mai vanta kéká aṅo setin má baren mifo vetí ankan ída setin tinan báken mi monó pinté me ampiren orikhen mino. Mai ma setin me ampiyain avúavá anon enina ída vá uno sen aní iyan mino. ²⁰ *Máan tiyan mifo siretí ankan ída vetin an dakhaono. Mai fara vara seyo, Kantá Aunan mano siretimpin bákayai fura ma sikhein baya afova suron ukha ono. ²¹ Máan tukhen náí siretí ankan nan pura veya ída afová ukhen mino va sé iniresa ma vompon uvaman amiya rauno. Ída ino. Tiyarafenui fura veya kayo vá kampun baya kayo vá ano ída manafiní ukhá pasé mai veya afová ono van mi ma vompon uvaman amiyá uno. ²² *Iyé kákan kampun banta van nafino. Mai ma Yisasin nan Tiyarafenu ano vei vanasi evaránen avirano van ma aní ukhá ein banta va ino ma siyain kéká anon Yisas Karaisini namuro van mino. Mai fara vara seyo, máan kéká anon be Afóen má be Anin má ída afová ukhé uno siren namurói uanté iyan mino. ²³ *Mana vanta ano ma ve Anin nan ída afová ukhé uno ma sinten mai véimpin ída ve Afóe vanten mifo iye

anó be Anin nan tian páman inten nafi mai véimpin mi ve Afóe vanten mino.

Kantá Aunan Mano Ma Afova Amiyain Baya Ino

²⁴ Máan tukhein nan mi mai ma esé araíe ma inikharé eona veya vá pákaan ákona ono. Máan ma inteyan be Anin má be Afóen mápin o súpá ukheya van nono. ²⁵ Máan ten ma setin má manafin bantí maéi mai ma Yisas Karaisi ano ma ayun ma fara van oriyan ban aunan ma iyátintákaré ein mai simusin má bará tifanté uno.

²⁶ Mai ma siretí ankan kampun tiré e avían namu avúavápin kaono van ma iyain mai kéká afová ureya ferano van mi ma vompon uvaman amé uno. ²⁷ *Tiretí ankan inka Kantá Aunan manten nan tiretimpin bákayai ena ano fura veya siretin ída afova amino van mi iniya ono. Mai fara vara seyo, Kantá Aunan mano siretin minó afova amiran mai fura vayan ban mino. Mai ma Kantá Aunan mano siamein baya ánain para vákure oriya vá inká Yisas Karaisin masá túpá ukhe vá oriya vano.

Tireti Tiyarafenu Akhafanan Ba Ono

²⁸ Téi ma sinunu ukheruna iyampon kayo oe, saréa vá Yisas Karaisin má manafin túpá ukheya mumunan iyaré esin ná béi ma ovaránen erin nain damú ída ayave van ina mantaan ákona ono. ²⁹ *Tiyarafenui funtákein avúavá ma afová ukhante mae mai ma funtákein avúavá ma varyiain kayo van afová eya ven akhafana inon tin nono.

3

Tiyarafenu Akhafana An Dakhen Ma Van Baya Ino

¹ *Tiyarafenu ano vei anunu moéken tetimpin banaráken te sikhafana oe sen tariyá mai fura sé ben akhafanan bá tíféuno! Máan tukhé tífé umpo varará nanin banta ano Tiyarafenu ída afová ukhen pasen mi ven akhafana ma vá tiferuna mai ída afová ukhen mino. ² *Téi

* **2:17:** Mat 7:21 * **2:18:** Mat 24:5, 24; 2Yn 7 * **2:19:** Apo 20:30 * **2:20:** 1Ko 2:15; 2Ko 1:21; 2Yn 2 * **2:22:** 1Yn 4:3; 2Yn 7 * **2:23:** Yon 5:23; 1Yn 4:15; 5:1 * **2:27:** Yon 16:13 * **2:29:** 1Yn 3:10 * **3:1:** Yon 1:12-13; 16:3 * **3:2:** 2Ko 3:18

ma sinunu ukheruna sirona kéka soe, inka setí ankan Tiyarafenu akhafanaí ukhé tiféuno. Yisas Karaisi ma erin nain damú inté ukhein bukhafa vasá bá tifante rafu mai ída afová ukhé tifé umpo véi ma erin nain damúi fura sé ben an davé tifékun mi mai ma vaintá béi fara vantí oná tifanté uno. ³ Mai van ma mumunan in nain kéka anon Yisas Karaisi ma avusese ukhein an den avusese ukhen banten mino.

⁴ Umeí ma iyain nanin banta anon Tiyarafenui man baya yurafuriyan mino. Mai fara vara seyo, ume avúavá ma variyain mai Tiyarafenui man bayan durafuriyan mino. ⁵ *Yisas Karaisimpin ída ume vákan mi setisi ume yo arútintano van béi erikhayai siretí ankan afová ukha ono. ⁶ Máan tukhantiñ béin má ma van nain nanin banta ano ída umeí iyan banten mino. Inká ume avúavá ma varen oriyan bain kayo ano véin ída afová en onten mino.

⁷ Téi ma sinunu ukheruna iyampon kayo oe, ída vá áesin manáa kéka ano siretin mákáden tavifá aviren orino. Yisas Karaisi funtákein bantan bakan ben an ma yákein nanin banta anon puntákein avúavá ana varé iyan mino. ⁸ *Máan tiyan mifo vanasi ano ma fara umeíen oriyan banten mai ma araiintá umeí ukhein bantan Ban Anon bakan mi veni kékái vá uno sen aní iyan mino. Máan tiyan mifo Ban Anoni yoran ma varé ein morun asuse ono van mi Tiyarafenu Anin mano eren mino. ⁹ *Tiyarafenui kékápin ma afoká ukhein nanin banta ano veni avúavá báí váken ída umeíen oriyan bá é iyan mino. Tiyarafenu pintéi afoká ukhen pasen betí ankan ída umeíen oriyan banten mino. ¹⁰ Máan tukhanti inte kékasá Tiyarafenu ina van ná inká inte kékasá Ban Anon nina van nafi mai saréan afová ó tifanté uno. Tiyarafenui man baya ánain ma ída vákuren ma inká afá aváen nan ma ída anunu iyain kéká mai ída Tiyarafenu akhafana ino.

Ena Vá Ma Avabá In Maran In Baya Ino

¹¹ *Esé araiintá ma inikharé é tiferuna vaya mai ena vasá avabá in maran onon

tikharen mino. ¹² *Keni ma Ban Anoni kékasí uven ma ve afá aruan purein an ída vá dá tifano. Mai fará béin aruan puren nafino. Mai fara va ino. Keni namu avúavá bariyan maen be afá ano funtákein avúavá bariyaréin pasen mi máan ten mino. ¹³ *Máan tukhein nará mumunan tiyofi sífá tiváeyan noe, varará nanin banta ano ma siretin namu uantantiya mai van ída vá anú duman duman ono.

¹⁴ *Mumunan tiyofi sífá tiváeyan ma avabá ó tifanté mairái furin pinté esanté para ma ayun ban oriyan ban aunampin oré uno sé afová ó tifanté uno. Máan ó tifanté umpo avabá in avúavá ma ída vain kéká ano fara fúken ban mino.

¹⁵ *Mana vanta ano ma monó nanin banta ma namuroí uanté iyain mai vetin mi aruan puriyan mino. Banta ma aruan puriyain kékápin mi ayun ma fara van aunan ída váka siretí ankan afová ukha ono. ¹⁶ *Yisas Karaisi ma ve aunan tetin timikhein mai fura avabái vá teti ankan afová ukhé tiféuno. Máan ma ukhein nará teti siyofi sífá tiváen naro sire tetisi saunan má dere vá ampiadá tifano.

¹⁷ *Máan tukhen mifo mana vanta ano ma kokhon danasinta kaúdáken ma amusin iyantin ma ve afá aváe ano manáa yana san ma o afasí ukhantin ma ída aya inten mai inté uren ná Tiyarafenui avabá ano mai vantafin banten nafino.

¹⁸ *Téi ma sinunu ukheruna iyampon kayo oe, setí ankan ída vá bayafó ana ena avabá iyá uno sé tífan numpo sivútivá pókesá pura sé aní ó tifano. ¹⁹ Pura sikhein avúavá ánain mi vákuriyan mino sen tetisi sivútivá anon aní intíi afová iyáké ída feranton kasaé Bafan avorá o mantá tifanté uno. ²⁰ Máan tiyákun maen tetin tú bá inin má ano ma ume nanin banta ono sen tisimiyantí maé ída feran kasaé ben avorá o mantanté uno. Mai fara vara seyo, Tiyarafenu ano setin tú bá inin má esantakhen pasen pefái minó afová ukhen mino.

²¹ *Téi ma sinunu ukheruna sirona kéka soe, setin tú bá inin má ano sisimen ma ída umeí ukha ono ma sin nain manon ákona simintí ída feran kasaé Tiyarafenu

* **3:5:** Yon 1:29; 1Pi 2:22-24; 1Yn 2:2 * **3:8:** Yon 8:44 * **3:9:** 1Yn 5:18 * **3:11:** Yon 13:34 * **3:12:** Esé 4:8
 * **3:13:** Yon 5:18-19 * **3:14:** Yon 5:24 * **3:15:** Rev 21:8 * **3:16:** Yon 13:1; Kar 1:4 * **3:17:** Diu 15:7
 * **3:18:** Yem 2:15-16 * **3:21:** Ibu 4:16

avorá o mantá tifanté uno. ²² Mantakhé oo yayiyáké béi ma amusin ukhein danas-inta anan bariyá tifékun pasen mi inan ma senuna yaná kasaen timinten mino. ²³ *Béi ma sikheiní esá ben anin Yisas Karaisin avíká mumunan iyá ena nanin banta vasá avábá in maran ó tifano. Máan ma in avúavái veni man baya van mino. ²⁴ *Tiyarafenui man baya ánain ma vákuriyain kayo anon béin má manafin bákan inká béi vetin má ban mino. Kantá Aunan ma setin timikhein manon aní ikái Tiyarafenu ano setin má ban mino sé afová ukhé tifeuno.

4

Kampun Sakhanampa Vanta Kayoi Vaya Ma Yaíden Afová In Baya Ino

¹ *Téi ma sinunu ukheruna sirona kéka soe, Kantá Aunan manon ákona simiyá baya siyá uno ma siyain kéká mai Tiyarafenu fintesá mai aunan erikhan ná tiyan nafino van daíde afová ure vá mumunan ono. Mai fara vara seyo, kokhon kampun sakhanampa vanta kayo ano ma varará orera ukhen mino. ² *Yisas Karaisin nan ma sian amá iyáken barará bantaí uven mi afoká ukhan mino ma sin nain sakhanampa vanta van mi Tiyarafenui Aunan mái van mino seya afová in nono. ³ *Máan tin nompó Yisas Karaisin nan ma ída máan baya sin nain banta mai véi ída Tiyarafenu vaípáké erikhen mino. Máan banta van mi Yisas Karaisin ma namuroí uantan aunan má ma varará afoká inten ne sen pefá tiami inikharé en nan mai vanta inka e van mino.

⁴ *Máan tukhen mifo séi ma sinunu ukheruna iyampon kayo oe, siretí ankan Tiyarafenu inan bákeya mai ma kampun sakhanampa vanta kéká bá ma aruviyá eona inka vetin esantakha ono. Mai fara vara seyo, siretí ankampin ma vain Aunan manon ma varafin ma vain aunan esantaren kákaní ukhen mino. ⁵ *Mai ma Tiyarafenui fura vayan tiamiyá uno ma siyain nanin banta mai ma vara rákena kékái váken ma vara rákena afova fói vanasi siamíkan iniren mai veya ánain

bákuriyan mino. ⁶ Máan tiyan mifo setí ankan Tiyarafenu inan báken mi véin ma afová ukhein kéká anon tetinti veya iniyan mino. Inká Tiyarafenu ina ma ída vanten mai seti ma siamenuna veya ída ininten mino. Máan ma in nain avúavákái ma fura Aunan mái van mino sé inká ma kampun aunan mái van mino sé uré afová ó tifanté uno.

Ena Vá Ma Avábá In Maran In Baya Ino

⁷ Téi ma sinunu ukheruna sirona kéka soe, ena vá ma anunu in maran in avúavá mai Tiyarafenu finté erikhein mifo erí máan avúavá ana vá baré oriyá bá tifano. Ena van ma anunu in nain manó mai véi Tiyarafenu fintéi afoká ukhen inka véin afová ukhen mino. ⁸ Máan tukhen mifo mana ano ma ena van ída anunu inten mai véi ída Tiyarafenu afová inten mino. Mai fara vara seyo, anunu ma in avúavái anan Tiyarafenu van mino.

⁹ *Tiyarafenu ano ma setin nan anunu ukhein mi anien be Anin mana iyampon uró tiantan ma varará eren miño. Béin pinté uaren ayun ma fara van oriyan ban aunan barano van mi máan ten mino. ¹⁰ *Teti ankan ma Tiyarafenu van tinunu iyá tiferuna vara siya raumpo mai ma véi ano seti nan anunu iyan ma ve Anini furimpó ma setisi ume ampisintákein nan mi siyá uno.

¹¹ Téi ma sinunu ukheruna sirona kéka soe, Tiyarafenu ano ma setí ankan nan máan anunu ma iyantisá máan mana erá ena van anunu in maran ná ó tifano.

¹² *Mana ano ída Tiyarafenu onté iyan mifo setí ankan ma ven anunu in maran ma é tifékun maen mi Tiyarafenu ano setin má e váken tetin pinté uaren ena ma anunuin avábá maman kákaní inten mino.

¹³ *Tiyarafenu ano setin má báken tetin nan beni avúavá ánain bákurino van mi vei Kantá Aunan tetin timikhá mai afová ukhé tifeuno. ¹⁴ Barará nanin banta aya uren evaránen avirano van ma ve Afóe ano ve Anin tiantan ma erakhá ein mai seti suufó ontaréi sian amá iyá uno. ¹⁵ Yisas Karaisin nan ma Tiyarafenu Anin mino ma siren tian dákó inain nanin banta

* **3:23:** Yon 6:29; 13:34 * **3:24:** 1Yn 4:13 * **4:1:** Mat 7:15; 1Te 5:21; 1Yn 2:18; 2Yn 7 * **4:2:** 1Ko 12:3

* **4:3:** 1Yn 2:18 * **4:4:** Mat 12:29; 1Yn 5:4-5 * **4:5:** Yon 8:47; 15:19 * **4:9:** Yon 3:16 * **4:10:** Rom 5:8-10;

1Yn 2:2 * **4:12:** Yon 1:18 * **4:13:** 2Ko 1:22; 1Yn 3:24

vái Tiyarafenu ano manafin bantin mai kayo ano veni avúavá ánain bákurinten mino. ¹⁶ Tiyarafenu ano ma setin nan moéken anunu ukhein mai afová ukhé tifei véimpin ákona inin kaiyá tifeuno.

Avábá in avúavá anan Tiyarafenufin bakan mi avábá aúpin ma vain kéká anon Tiyarafenufin bakan inká betimpin béi van mino. ¹⁷ Tiyarafenui avúavá ánain ma vákuriyá tiferuna anon ena ma avábá uanttan avúavápin moéké ákona iyá tifeuno. Máan tukhein nan mi vanasi ma yaimin nain damú ida feran kasaé ben avorá o mantá tifanté uno. Mai fara vara seyo, ma varará ma váké maé Yisas Karaisini avúavá ánain mi vákuriyá tifeuno.

¹⁸ Máan anunu ma in manon ida feran bantin inká puntákein avúaváká ma anunun in manon minó peran avúavá do maman karúdanten mino. Mai ma yaimin nain damu san ma iniré tikhokho van é tífekun maen mai anon anien tetimpin beni anunu ano ida ákona ukhen nen tinten mino. ¹⁹ Tiyarafenu ma esé aráintá tetí ankan nan anunu ukhein nan mi setí ankan ena vá anunu in maran iyá tifeuno. ²⁰ Mana vanta ano ma ve ayofi afá aváen nan ma ida anunu iyáken ma Tiyarafenu van tinunu iyá uno ma sinten maen mai véi kampun banta ino. Mai fara vara seyo, setí ankan ma oniyá tiferuna siyofi sífá tiváen ma ida sununu ó tifanté mai ma ida oniyá tiferuna Tiyarafenu inté uresá tinunu ó tifante rafuno. ²¹ *Tiyarafenu ano ma man bayan timikhen mino. Tiyarafenu nan ma anunu inain mano vei ayofi afá aváeyan masá anunu ino.

5

Tiyarafenu Anintá Ma Mumunaní Pákena Vaya Ino

¹ *Minó ano ma Yisasin nan Tiyarafenu ano vei vanasi evaránen avirano van ma aní ukharé ein banta ino sen mumunan inten maen mai vetí ankan Tiyarafenu akhafana ino. Inká minó ano ma Tiyarafenu van anunu inten mai ven akhafana vá inan anunu inten mino. ² Tiyarafenu van ma sinunu ó tifanté mai

veni man baya ánain mi yakhafiyá ben akhafana vá inan tinunu iyáké afová iyá tifeuno. ³ *Tiyarafenu van ma anunu in nan ma siyain mai veni man baya ánain ma funtáden bákurin avúava san mi siyákan mai ida uman dakhen mino. ⁴ Mai fara vara seyo, Tiyarafenu akhafana ano ma Yisas Karaisintá mumunan intin maen betin ákona amintin ma vara ráke namu avúavá maman bararasí uren mantaan ákona inten mino. ⁵ Yisas Karaisin nan ma Tiyarafenu Anin mino siren mumunan ein kéká anon bara ráke avúavá bá ma aruviyaré ein maman bararasí uren mantaan ákona iyan mino.

⁶ *Yisas Karaisi ma monó non perein má daa unkamádantá ma vei nare vanaein má anon Tiyarafenu Anin muno sen anien mifo non máa fo saino. Ida ino. Non má nare vá póké ino. Máan tukhan mi Kantá Aunan mano yere ma siyain mai fura vayan bakan tetin tisimiyen mino. ⁷ Kanú manaú daná anon Yisasin nan puran tino sen aní ukhen mino. ⁸ *Mai yaná ma vain mai Aunan ban non ban nare van ukhen mino. ⁹ *Tetí ankan ma vara ráke vantaí vayará mumunan iyá tife umpo Tiyarafenui vaya ano moéken kakaní ukhen mino. Para vara seyo, Tiyarafenu ano ve Anin nan mi sian amá uran ban mino. ¹⁰ *Mai vaya van mi Tiyarafenu Anintá ma mumunan iyain kayo ano mai furan tikhen ne sen afová iyan mino. Mai fara vara seyo, ida ma mumunan iyain kayo ano Tiyarafenu van kampun banta inon tiyáken ben Anini vaya ma sian amá iyain nan ida mumunan iyan mino.

¹¹ Máan tiyan mi Tiyarafenu ano mai van tian amá ukhen mino. Be Anini avúavá ánain ma vákuriyá tiferuna kékái ayun ma fara van oriyan ban aunan Tiyarafenu ano simikhen mino. ¹² *Máan tukhan maen iye anó Tiyarafenu Anin man aúpin dan ban nafi mai véi fara van aunan manten mifo Tiyarafenu Anin ma ida manten mano mai aunan ida manten mino.

Yoni Ma Kípan Bayafó Tian Ákona Ukhein Baya Ino

* **4:21:** Mak 12:29-31 * **5:1:** 1Yn 4:15 * **5:3:** Yon 14:15, 23-24 * **5:6:** Yon 1:29-34 * **5:8:** Yon 15:26
* **5:9:** Yon 5:32-37 * **5:10:** Yon 5:36-40 * **5:12:** Yon 3:36

13 *Tiyarafenu Anintá ma mumunan ukheona kayo ano ayun para van aunan manté uno sire afová ono van mi ma vompon uvaman amé uno. 14 *Tetí ankan ma ákónaé mumunan iyáké ma veni anunurá mana yana san inantékun maen béi setinti vaya ininten mino. 15 Inká béi inikhái inan tiyá uno ma siré afová iyáké ma inante-nuna yaná mai véi kanaíen timinten mino sé afová ukhéi inanté tifanté uno.

16 *Tiretin pinté mana ano ma onesin e ayofi fi afá aváe fi ma furimpin ída ororen ukhein umeí ma iyanti vá amúkuantesin ná Tiyarafenu ano véin aunan ná amino. Inká purimpin ma aviren oré iyain ume váé iyan mifo mai ume ma varyiain kéká amúkuantano vara siya rauno. Ída ino. 17 Minó namu avúavá ma vain mai ume ifo manáa ume kayo ano ída furimpin aviren oré iyan mino.

18 *Tetí ankan afová ukhé tifékun Tiyarafenui kékasí ma ukhein kayo ano ída umeí ana en oré iyan mino. Mai fara vara seyo, Tiyarafenu Anin manon betin pákaan ákona uren dafíkan mi Ban Anon mano ída kanaíen betí au aruvé iyan mino. 19 Tetí ankan Tiyarafenu akhafanan bá afová ukhé tifékun mi ma vara ma eúkukhein mai Ban Anoni ákona aránaópái vákan beni inintái minó daná bariyan mino. 20 Tetí ankan nan pura sikhein Tiyarafenu afová ino van mi ve Anin mano setin morun afova simikhá afová iyá tiféuno. Máan tukháí setí ankan ma ven Anin Yisas Karaisimpin baruna van mi Tiyarafenu fin bá tifere siyá uno. Beyáká anan pura sikhein Tiyarafenu váken ayun ma fara van oriyan ban aunan mi van mino.

21 Téi ma sinunu ukheruna iyampon kayo oe, kampun ayarafenu kayo ano Tiyarafenui varu varen tiretí aúpin kumanin nafo yafían ná ákona ono.

* 5:13: Yon 20:31 * 5:14: Yon 14:13-14; 1Yn 3:21-22 * 5:16: Mat 12:31 * 5:18: 1Yn 3:9

**YONI MA KAN DÁDASÍEN
UVANTEIN BOMPON
MINO
(2 Yoni)
Yoni Ma Kan Dádasíen
Bompon Uvanteí Pákenai
Afova Vaya Ino**

Ma vompon ma uvantein banta ino.
Baya varen orin banta Yoni vei furin ádesí ukhan ma uvarein mino.

Uvarein orana ino.
AD nainti (90) ráké mana antareti (100) ráké mai aúban mino.

Ma vompon ma uvantein baru ino.
Efesasi barurá ino.

Ma vompon ma uvaman amikhein kéká ino.

Monó nanin má be avafu akhafana va safi áa monó namun má maifin ma monó tiyain nanin banta va safin amiken mino.

Nái ana vará ma vompon uvanten nafino.

Mana antumpin nafi áa monó nanin bantafin nafi uvaman kaúden mi avábá in avúavá bá ana vá bano sen mi inká kampun monó banta kayo van dafíke vá bano sen tiamikhen mino.

Amusin Baya Ma Sein Baya Ino

¹ Téi Yisasintá ma mumunan iyain bantai monó doran bantan báké

Tiyarafenu ma veina e siren aní ukhein nanin má be akhafana vá báká ma séi sinunu ukheruna kéká baonafái ma vompon uvaman amé uno. Ída seyáká ano ana siretin nan purasé tinunu iyá umpo Tiyarafenui fura sikhein avúavá ánain ma vákuriyain kéká bá ano yeren anunu ukhen mino.* ² Tetin túpin ma fura sikhein avúavá bain nan mi siretin nan tinunu iyaruna mai ano fara oriyan banten mino.

³ Pura vaya vá avábá en tarisari in avúavá bá ma vain banta mai seti Sifóe Tiyarafenu vá be Anin Yisas Karaisin pinté basá arunaná bá ará kusin má ano setin túpin bano.

Pura Vayará Bano Van Ma Ákona Uvantein Baya Ino

⁴ *Tifóe ma seiníen ma e akhafana ano fura sikhein avúaváká nóká ma oniyaruna anon kákan timusin timiyan mino.

⁵ *Máan tukháí mai ma moéké tinunu ukheruna nanin noe, ída auyen man baya uvaman amiyá umpo fefá ma araiintá inikharé tiferuna mai man bayan bákái ena nanin banta vá avábá in maran ono van tiamiyá uno. ⁶ Tetí ankan ma Tiyarafenui man baya ánain ma vákuriyá tiferuna van mi avába se siyan mino. Pefá araiintá ma iné tifékun mai man baya anon ena vasá anunuin maran ono sikharen mino.

⁷ *Banasi mákáden ma aviren tavi aípá orin kéká ano inka ma varará orera ukhen mino. Betí ankan manon Yisas Karaisin nan banta vukhafa vá ma varará erikhen ne siren ída mumunan é iyan mifo máan kéká anon banasi mákáden aviren namu aasá oriyáken mi Karaisin namuroí iyan mino. ⁸ Máan tukhen mifo mai ma varano van ákona e yoriyá eona yaná pa savifá dóan afein nampo yafían ákona ukhare vá tiretí miyan puntáde varano. ⁹ Mai fara vara seyo, Yisas Karaisini vaya ma ída funtáden banasi afova aminton ma vetíi inin ánain dakhafen ma vanasi siaminten maen mai véi ída Tiyarafenu vá túpá ukhen mino. Máan tukhen mifo Yisas Karaisini vaya ma funtáden banasi afova amen nonfen mai ve Anin má be Afóen mái véi súpá ukhen mino. ¹⁰ Mana vanta ano ma ída funtákeín aa sáké Yisas Karaisini vaya varen erinti vá ída vá e amá o avían kaúde véin avábá uantano. ¹¹ Mai ma véin o avían kaúden kama in nain banta ano véi ma namu yorarí iyain mi aya inten mino.

Kípan Baya Ino

¹² Téimpin kokhon baya vá tiretin tiamento van inikhé umpo fa savifá ída

* **1:1:** Anasi vá be akhafana vase ma sikhein mai monó namun má banasi va san mi sikhen ne sen kokhon afova vanta kayo ano iniyan mino. * **1:4:** 3Yn 3 * **1:5:** 1Yn 2:7 * **1:7:** 1Yn 4:1-3

vompon uvaré afe iyá bano van muno. Máan tono van inikhé umpo áde anantá tiretin o onano van iyaruna séi ma oréku soniyasí ma siretin má baya sékun mai anon timusin ma iyá é tiferuna mo fura yanasí inten mino.

¹³ Mai ma Tiyarafenu ano aní ukhein ayofin akhafana* anon betíi amusin baya yan tireti vaonafá oren mino.

* **1:13:** Tiyarafenu ano aní ukhein ayofin akhafana e ma sikhein mai ena varufá ma mumunan nanin banta vain nan mi sikhen mino.

**YONI MA KANÚ
MANAUSÍEN UVANTEIN
BOMPON MINO
(3 Yoni)
Yoni Ma Kanú Manausíen
Bompon Uvanteí Pákenai
Afova Vaya Ino**

Ma vompon ma uvantein banta ino.
Baya varen orin banta Yoni vei furin ádesí ukhan ma uvarein mino.

Uvarein orana ino.
AD nainti (90) ráké mana antareti (100) ráké mai aúban mino.

Ma vompon ma uvantein baru ino.
Efesasi barurá ino.

Ma vompon ma uvaman amikhein kéká ino.

Romú kéká ano Khaiusin bí kokhon banta aví daran ban mino. Auyen avúavá ma uvantein bompompin (Niu Testameni) ma Khaiusin bí bain mai Koriní barurá ban (Romu 16:23, 1 Korini 1:14) Masedoniá barafá ban (Aposeri 19:29) inká Debí barurá ban ukhen mino. (Aposeri 20:4, 5) 3 Yoni vompompin ma vain banta ída mai vanta kayo vá manaí ukhen mifo manaí ukhein bí bain banta inon ten afova vanta kayo inikhen mino.

Nái ana vará ma vompon uvanten nafino.

Khaiusini mumunan má monó nanin banta ma ven amá orin ma avábá uantiyá ein ma san mi susu sian ten mino. Diotrefesin ne sin banta ano monó ayain banta kayo namuroí uantiyan mi Khaiusi mantaan ákona ino van Yoni ano veya siamen mino.

Yonini Amusin Baya Ino

¹ *Téi Yisasintá ma mumunan iyain nanin bantai yoran bantan báké

éi sesi kama sirona uron mi Khaiusi van ná ein nan purasé tinunu iyákéi ma vompon uvaman amé uno.

² Téi ma sinunu ukheruna sirona oe, éin aú iyampon mano kama ukháí eni yante vukhafa vá ano yere ákona ukhantiya amusin iyáke minó daná kama e varano van mi simúkuantiyá uno. ³ *Éi inte avúavá kasá bákeyá pura veya ánain dakhafiyafó mai manáa sífá tiváeyan mano séin me sisimí iniréi kákan timusin é uno. ⁴ Te sikhafana ano ma fura sikhein baya ánain ma vákuriyain baya ma séi iniyáké mai ena yanáká ma simusin iyaruna simusin esantaréi moeké timusin uantiyá uno.

Bafani Yoran Banta Kayorá Ma Kamaen Dafisi Pákena Ma Ákona En Tein Baya Ino

⁵ Téi ma sinunu ukheruna sirona oe, mireníe ena fáké monó doran banta kéká ano ma esanten oriya ma e amápin avían kaúde yafisiyaona avúavá mai Tiyarafenui kama yorarii iya ono. ⁶ *Éi ma vetin avábá ure kama avúavá aní iyaona veya van mará ma vain monó nanin banta siamíkan inen mino. Betí ankan ma éin me ampiren orono van iyantiya vá Tiyarafenu ano ma amusin ukhan nain aa sákesá manáa yanasinta aya esin ná mamaren orino. ⁷ *Mai fara vara seyo, vetí ankan Bafani yorarii en nóken pasen afokhampin ma vain nanin banta finte ída mana ayain daná baré iyan mino. ⁸ Mai vará máan banta kéká kama avúavá aní erá mai kéká aya iyáké inká manafiní uverá Tiyarafenui fura avúavá tian banasi amé tifano.

⁹ Monó nanin bantafin ma afova vompon uvamadékun orikhan mifo mai ma veyan ánon bantai ono van iyain banta Diotrefesi ano ída mana yanasí inten mino. ¹⁰ Téi ma oronté béi ma setin nan namu yorari iyan mino sen ma soyampá baya siren namu veya kayo siyain nan éin mo siamenté uno. Ena fáke monó doran banta kéká ma ída ve amápin o avían kaúden ída kama iyáken inká betin ída aya ino van ma monó nanin banta siamiyain nan deren tiamenté uno. Máan banta kéká ma aya iyain nanin banta mai monó namun pinte véi ano yo sianté iyan mino.

* 1:1: Apo 19:29; Rom 16:23 * 1:3: 2Yn 4 * 1:6: Tai 3:13 * 1:7: 1Ko 9:11-12

¹¹ *Téi ma sinunu ukheruna sirona oe, ída vá máan avúavá ena nanin banta aní iyáke kama avúavá ánain mana vá dakha-fono. Kama avúavá ma varé iyain kayo ano aníen Tiyarafenui vanasi uno sé iyan mifo namu avúavá ma variyain kayo ano mai Tiyarafenu ída afová ukhé uno sen aní é iyan mino. ¹² Máan té iyan mifo minó ano Demetriusini kama avúavá bá inká béi ma fura vaya siamiyain mái sian dákó iyan mino. Tetí ankan má dere ma veni kama avúava san tian dákó iyaruna mai siretí ankan afová ukhen náí fura vayan tiyá uno.

Ma Sipá Ma Kípan Baya Kayo Ino

¹³ *Téimpin kokhon baya kayon báí éin tiameno van inikhé umpo ída vompompin uvaman amenté uno. ¹⁴ Mai fara vara seyo, seyantá tiretin o oniyáku sen má baya seno van mi inikhé uno.

¹⁵ Tiyarafenui ará kusin mano éin masá bano.

Mará ma vain arona kayo ano vetíi amusin baya siádan éi vaonafá oren mino. Tenti simusin baya yere maifá ma vain tirona kayo vá mana mana arariya siameno.

* **1:11:** 1Yn 3:6-10 * **1:13:** 2Yn 12

YUTI MA UVANTEIN BOMPON MINO (Yuti)

Yuti Vompon Ma Uvanteí Pákenai Afova Vaya Ino

Ma vompon ma uvantein banta ino.
Yisasín nú Yemisin nú afá Yuti ano ino.

Uvarein orana ino.

AD sikisti-faipí (65) fin nafi áa sikisti-sikisi (66) fin nafi uvanten mino. Yerusaremí baru ma AD seventi (70) fin ira saman kaurein ída afoká ukhan mino.

Ma vompon ma uvantein baru ino.

Mai ma Kantasí Ukhein Bara e ma siyain bara Parestainí inon ten iniyan mino.

Ma vompon ma uvaman amikhein kéká ino.

Mana monó namun nafi áa kokhon monó namun kayofin nafi ma Yutan kéká ano mumunan iyain mi amikhen mino. Parestainí barafá bá Asiriá barafá bá inká Pesíá barafá bá ma vain mumunan kékápin ma Yuti monó doraríen noré eipái uvaman amikhen minon ten iniyan mino.

Nái ana vará ma vompon uvanten nafino.

Mai ma famúku avúavá bá monó ano ma sikhein baya ma maman tavi aipá kaiyan ma kampun bayafó banasi afova amiyain kayo van perano van mi amaan baya siádan ban mino.

Yuti Ma Amusin Baya Sein Mino

¹*Téi Yuti Yisas Karaisini miyan ída van doran banta ma Yemisin afá baruna anon ma vompon uvaré uno.

Tifóe Tiyarafenui avábápin basin ma Yisas Karaisi yafíkanti vano van ma arakhein nanin bantafin mi ma vompon uvamadékun oren mino.

²Tiyarafenui arunaná bá ará kusin má avábá in avúavá bá ano vá tiretimpin moéken bano.

*Kampun Afova Ma Amiyáin Nain Kéká
Ma Uman Baran Nain Baya Ino*

(2 Pita 2:1-18)

³Téi ma sinunu ukheruna sirona kéká soe, Tiyarafenu ano ma setin tiya uren evaránen tivíkeí pákena van mi vompopin uvadé tiameno van inikharé umpo mai ma fura vaya ma namuroí uantiyain kékáká dafiseno van mi uimpin ma vompon uvaman amé uno. Pura vayará ma mumunan in avúavá ano minó damú para oriyan bano van mi Tiyarafenu ano manádái vei kantasí ukhein nanin banta amikhanin ída kanaíen mana vanta ano yo arúden ena vaya khainten mino. ⁴*Máan tukhan mi Tiyarafenu oo ma ída yayiyain kéká ano aúpáké inka siretin aúbaná o féken namu avúavá kasae varano van mi Tiyarafenu ano ume ampantiyan mino sen tiretin tiamiyan mino. Máan banta kayo van mi setisi mana Ayafa ma vain Bafan Yisas Karaisini vaya namuroí inten ne sen mi inká mai kayon Tiyarafenu ano yaíden uman aminten ne sen sakhanampa vanta kayo ano fefái siádan baren mino.

⁵*Isarerí nanin banta ma Bafan mano Isipí kena aya uren iyanen oriyákan mai ma véintá ída mumunan ein kéká ma arukhá ein tiretí ankan afová ukhen náí evarané tiamékuya afova suron ono van muno. ⁶*Inká Tiyarafenu ano ma enisori kayo yoran amiran ma veni vaya átakharé uren ma vetin amein doran me ampikhein nan afová ono van muno. Tiyarafenu ano vetin ayanan kuren títípa ukhein barufin karavusií uran báken banasi ma yaimin nain damu san mi ave ukhen mino. ⁷*Inká máan mana en Sodomú baru vá Komorá baru vá maí kan baru ádé ma varé ein baru kayofin má ma famúku avúavá bá ída funtákein avúava sinta vá ano mo kákani suron ukhá ein tiretí ankan afová ono van muno. Mai varu kayo ma ira saman kaurein manon namu avúavá ma variyáin nain nanin banta ma ínaimpáké para van oriyan ban ira fóké ma vetin taman kaurin nain mi aní ukhen mino. ⁸Máan mana en mai ma nóken kain ódarákéi ma avúavá kasae

* **1:1:** Mat 13:55 * **1:4:** Kar 2:4; 2Pi 2:1 * **1:5:** Eks 12:51; Nam 14:29-30 * **1:6:** 2Pi 2:4 * **1:7:** Esé 19:1-25; 2Pi 2:6, 10

bariyá uno siyain kéká anon pamúku avúavá bariyáken baya inin avúavá me oyan amiren kakhan má ma vain enisori kayoi ákona van dere siren intiyan mino.*

⁹ *Máan té iyan mifo Ban Anon mano ma Mosesin au varano van ma aví bain enisori Maikorin má aruve aruve iyan maen béin ída oyampá baya sen mifo Tiyarafenu ano ana vá éin daíden uman aminon tein mino. ¹⁰ *Máan tein mifo ma vanta kayo van ma siyaruna mai vetí ankan manon ída afová ukhein danasinta van oyampá baya siren betíi anunurá namu avúava sinta variyan mino. Máan ma iyain manon iyan má pon máí aasá oriyáken mi uman o maman be amaniná kaiyan mino. ¹¹ *Máan kéká san mi sirun nan uantiyá uno. Mai fara vara seyo, Keni ano ma ve afá Eborin aruan purein an mi yen noin moékan uman mi varanten mino. Betí ankan Baramun an mi yen moni saro siren ara ara avúavá baranten mino. Inká Kora ma Tiyarafenu oyampá baya siyaréin ma arein an den mi vetíi namu avúava san aruan kípan ten mino.

¹² *Monó nanin banta vá ma avábá aní iyáke manafin dunan tádé nano nafin máan kéká anon eriven asuse avúavá bariyáken ída ayave van inton beyan ma nan nain nan manan inten mino. Mai kayo anon tókónten konan mano ma o átaru uvin ma uva ano yo fútian asuse uran ma ída á danton meren asuse ein an den mi mai ma iyáantan nain danasinta ída fura sen avúavápin maman kain ten mino. Máan kékái ída ma aran íré iyain daa ana ma arú bá do yaruádan báken kano einíi iyain evaránen purinten mino. ¹³ Betí ankan ma namu avúava sinta variyain manon un nompin ma uvaen karantó uaren ma fain evaránen eriyain ma kákantá avaya seiníi iyan mifo ída ayave van é iyan mino. Inká me khoe khoe en ma noin ofu kayo an mi yakhen pasen kumayusí uaren ma sítípa ukheimpin tipá oriyain mino.

¹⁴ *Adamun táké ma o khaen eriyain

ma yan manápá ifo afápá kan un kádan banta Inoki ma afoká iyáken mai nanin banta van máa mi sen sakhanampa vaya siádan baren mino. “Onano, Bafan mano vei ída yankaforen tauseni enisori vái eriyain mino. ¹⁵ Mai ma Tiyarafenu me oyan amiren béin oyampá baya siyáken ara ara namu avúava sinta ma variyá ein nanin bantan me yaíden betíi namu avúava sinta maman dákó uren uman aminten mino.” ¹⁶ Mai nanin banta ano aveantumpin baya vá inká oyampá baya vá tiren maen kasaen betíi anunurá namu avúavá sinta varé iyan mino. Máan tiyan maen beti ma variyain danasinta van betiyain amo siren maen ena nanin banta van kampun ten kama avúavái variya ono siren beti vaípákana kokhon danasinta inantiren baré iyan mino.

Mumunampin Ákona Ukhen Bano Van Ma Arakhein Baya Ino

¹⁷ Máan té iyan mifo séi ma sinunu ukheruna sirona kéká soe, setisi Bafan Yisas Karaisini aposeri kéká ano ma siamikhá ein baya vará ovare me ineno. ¹⁸ *Ma vara kípan damú ádesí ma iyantin betíi namu anunu ánain mana yakhafiyáken Tiyarafenui avúava san ma siren intin kéká afoká intene síka inikhare ono. ¹⁹ Máa sikharé íkan mai vanta kayo ano saréa afoká ukhen mi siretin maman aúban daimiyan mino. Máan kékápin Tiyarafenui Aunan ída vákan mi vetíi yan bukhafa ánain dakhafen mai avúavá bariyan mino.

²⁰ *Máan tiyan mifo séi ma sinunu ukheruna sirona kéká soe, kantasí ma ukhein mumunan tasá mantaan ákona ukhe inká Kantá Aunan mano ma amin nain inintá ana vá amúkono. ²¹ Máan tiyáke setisi Bafan Yisas Karaisi ano ma vei arunaná pinté uaren ma ayun para van oriyain ban aunan ma varen me amin nain nan ma ave ukheya Tiyarafenui avábápin ná bano. ²² Máan tiyanti mai ma mumunan ída ákona ukhan ma kokhon ineine iyain kéká sará arunan uantano.

* **1:8:** Afova vanta kéká ano mai enisori kayo van namu ukhein kayo inon tikhen mino. * **1:9:** Dan 10:13, 21; 12:1; Sek 3:2; 2Pi 2:11; Rev 12:7 * **1:10:** 2Pi 2:12 * **1:11:** Esé 4:7-8; Nam 16:1-35; 2Pi 2:15; 1Yn 3:12 * **1:12:** 2Pi 2:13, 17 * **1:14:** Esé 5:18, 21-24 * **1:18:** 2Pi 3:3 * **1:20:** Kor 2:7 * **1:23:** Sek 3:2; Rev 3:4

²³*Máan tiyáke mai ma yaimin nain damú ma ira ano khanain kékasá aya ure avirano. Kokhon nanin banta ano fara vain betin nan arunan ure ayain nompo veti ume avúavá ano ma siretimpin erin nará dafian ákona ono.

Amúkimpó Ma Tiyarafenui Aví Daní Ein Baya Ino

²⁴ Tiyarafenu anon tiretin nan eraven ankamin nafo siren dafian ákona ukhanti varé esin maen béi anan ume avúavá do sesé uantáden aviren orinti kakhakhein barufin amusin pinté o van nompo véin avisá daní ono. ²⁵ *Beya anan tetisi Bafan Yisas Karaisin pinté uaren Tiyain Tiyarafenu van mifo véin avisá daní ono. Minó kakhán má kini ákona vá béimpin bakan inká minó danáká ma yafisin ákona kayo vá báken minó danáká pefá dafikaren taréa vain ínaimpáké dere fara oriyan banten mino. Pura ino.

* 1:25: Rom 16:27; 2Pi 3:18

AÚPÁ BARÉEIN BAYA MA SIAN DÁKÓ UKHEIN BOMPON MINO (Revaresen)

Aúpá Baré ein Baya Ma Sian Dákó Ukhein Bompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Yonin ma Patmosi Musóká do siantan karan o váken mi uvaren mino.

Uvarein orana ino.

AD sikisti-eiti (68) ráké seventi (70) ráké mai aúban mino. Romúke kin Nero ma vanasi aruan puriyá ein pimpái uvanten mifo AD seventi (70) fin Yerusaremí baru ídá ira saman kaúkan nafi áa AD nainti (90) ráké nainti-faipí (95) rá ma Kini Domisiani ano ma vanasi uman amen aruan puriyáin ma veni kin doran mo khípein orana kayo fin mino. (AD eiti (80) ráké nainti-sikisi (96) ráké mai aúban mino.)

Ma vompon ma uvantein baru ino.

Esiá barafin áau orun perapá Eisiní un nompin bain musó Patmosí ino.

Ma vompon ma uvaman amikhein kéká ino.

Mai ma yan manápá ifo afápá kan un kádan monó namun kayo ma Esiá barafin bakan aví tikhein kayo vá inká minó akhempá ma Yisasintá monó ten oriyan ban nain nanin banta vá ino.

Nái ana vará ma vompon uvanten nafino.

Enará ukhein danasinta van ma sakhanampaí uádan aúpá baré ein ma sian amá ukhein bompon ma Yisasi ano Yonin amein nan mino. Esé Araíin Bompopin (Esé Araíin Bompon 1-11) ma vain banasi ano ma umeí uren

Tiyarafenun me ampiren orein bayan tian amá ukhen mino. Ma vompon mano mai ma umeí uren Tiyarafenun me ampiren nentá orikharen ma aú baéden ará manafiní in doran ma Yisas Karaisi ano maman dákó ukhein mi sian amá ukhen mino.

Aúpáke Yanasinta ma Maman Dákó Ukhein Mai:

Esiá barafin ma vain monó namun kayofin Romu kamanin mano uman amiyan ma inká baru finté uman amiyan ma iyain nan mi amaan baya sikhen mino (1:1-3:22). Inká Tiyarafenui Sipi sipi Arará ano ma savore sópe an dakhein mai:

1. Tiyarafenu ano ma ma vara yaimin nain (4:1-19:10)
2. Namu avúavá ma maman bararasí inain (19:11-20:15)
3. Auyen bara vá inaru vá ma erin nain mai auyen Yerusaremí ino (21:1-22:5).

Mo khípan baya maen Karaisi ma vanasifin tiádan bain mino (22:6-21).

Esé Araí In Baya Ino

¹ *Pefá ma aúpá baré ein danasinta ma e unen dákó ono van iyan maen Yisas Karaisi ano vei yoran banta kayo aní ino van Tiyarafenu ano mai yaná béin amen mino. Máan turan mai yaná maman dákó ino van mana enisori siantan bei yoran banta Yoni vaípa oren mino. ² Mo aní in ma ódaren maen Tiyarafenui vaya vá Yisas Karaisini avúavá bá puntáden tiamen mino. ³ *Ma sakhanampa vaya ma yankáan monó nanin banta amin nain kéká bá inká mai vaya iniren ma mai ánain dakhafin nain kayo vá Tiyarafenu ano avábá aminten mino. Para vara seyo, mai yanasinta ma yákó inain damú inka ádesí iyan mino.

Dan Manápá Ifo Afápá Kan Un Kádan Monó Namumpin Ma Mumunan Nanin Banta Van Ma Yoni Amusin Baya Siantein Mino

⁴ *Téi Yoni anon dan manápá ifo afápá kan un kádan monó namun kayo ma Esiá barafin ban ma maifin mumunan nanin

* 1:1: Rev 22:6 * 1:3: Rev 22:7, 10 * 1:4: Eks 3:14-15; Rev 3:1; 4:5

banta vaípái mai vompon uvamádekun oren mino.

Mai ma fefá baren taréa van ma inká ínaimpá dere ma fara van nain má inká dan manápá ifo afápá kan un kádan Aunan kéká ano ma Tiyarafenui kin kará aufá bain má sarisari vá kusin má ano vá tiretin má bano. ⁵*Inká Tiyarafenui vaya ma funtáden tian dákó en ma inká purin pinté an uanten orun mantaven ma ma vara ráke kin kayoi ánon bantaí ma ukhein banta Yisas Karaisini sarisari vá kusin má ano yere vá tiretin má bano.

Mai ma setin avábá uren ma vei narefó ma umei karavusi fintena útútintein banta avisá daní ó tifano. ⁶*Be Afóe Ayarafenui monó doran bantaí uven Tiyarafenu vá barará nanin banta vá aúban báken dorarí ino van mi véi ano setin tivían bei yafisin aúpin kaúken mino. Mai vará béin moéke kákan bí amesin ná beni yafisin doran mano fara van oriyan bano. Pura.

⁷*Onano. Konan daró béi erintin maen minó auu ano oniyantin inká mai ma véin ayorampin ma vankampó antáká ein kéká bá ano yere oniyantin maen ma varai minó akhen pákena nanin banta ano véin nan ifí danten mino. Pura ino.

⁸*Bafan Tiyarafenu ano máa sikhen mino. “Téi maé Araín má Kípan mái vá uno.* Mai ma fefá baré taréa vá ma inká ínaimpá dere ma fara vá ma Moékan Ákona vá Banuna uno.”

Yonin Auu Vaédan Ma Yisasin Onein Baya Ino

⁹Téi Yoni siretin afá aváe uno. Yisasin oo yaiyé Tiyarafenui yafisin aúpin tiretin má mana yoran bantan báké tirá kusin pinté ara ara uman bariyá tiféuno. Tiyarafenui vaya vá Yisasiní vaya vá ma sian dákó eruna van mi Patmosi musóká tiviren mo karavusií urá baré uno. ¹⁰Bafani yamú afoká uví bentá monó tiyá ékun toyampáké mana oova ano ufen ma aseinién máa semí, ¹¹“Ma ma

oneona yanasinta vompon dókifin uváde vá dan manápá ifo afápá kan un kádan monó namun kayofin ma mumunan nanin banta vaimpin ná dan orino. Mai monó namun kayo maen Efesasií Simenaí Pekamamií Taiatairai Sadisií inká Firaderfia vá Raodisia vá ino.

¹²Mai ma soyampáké ma vaya siyain onano siré dovaébé onékun maen dan manápá ifo afápá kan un kádan oon uruan dankará intánuran baren mino. ¹³*Máan tukhan mai ma oon uruan intánukhein danka kayo aúbaná mana Vanta Anin ma einí ukhein mano arantantá aravukhein ayá buí daná uren inká akhoní in ma korifó uvanteimpó akhoní uren baren mino.

¹⁴*Béin ánon do ano efan ankará íkan inká auufenté ira ma anamuná einí iyaren mino. ¹⁵Máan tiyan maen béin arantan mano aeni ma irafin iyó uran ma karo kharo einí iyákan inká beni vaya ano non iya ma káosiyán avaya seiní iyan mino.

¹⁶*Máan tiyan maen inká dán manápá ifo afápá kan un kádan ofu ve ayan kurompá pákakan inká míkan akhempá an ukhein baenati ano ven oo fenté e unen mino. Máan tiyan maen ben auná pinté áau ano ma moékentá panu seiní iyaren mino.

¹⁷*Máan tukharéi ma mo oné ben arantampin o sinkamé purin an davékun maen ayan kuron pákena yámampó ten timaniná kaúden máa semí, “Téi maé Araí in má Kípan má umpo ída vá akhokho van ono. ¹⁸Téi maé para van oriyan ban mi varéi fúkaré umpo saréa ayun para vá oriya banté uno. Máan tukhéi furin má beni aron ída van masípin ma ira khiyain tákena khi vá pákakhé uno.

¹⁹“Máan tukheruna van mi mai ma saréa yákó inain danasinta vá inká ínaimpá ma yákó inain danasinta vá ma oniyaona vá bompon dókifin uvarano.

²⁰Mai ma yan manápá ifo afápá kan un kádan ofu ma siyan kurompá páké ma inká yan manápá ifo afápá kan un kádan oon kayo vá ma uruan korifó uvantein dankará ma intánuran bakan ma oneonai

* **1:5:** Íbo 89:27; Kor 1:18 * **1:6:** 1Pi 2:9; Rev 5:10; 20:6 * **1:7:** Dan 7:13; Sek 12:10; Mat 24:30; Yon 19:34-37; 1Te 4:17 * **1:8:** Rev 21:6; 22:13 * **1:8:** Kiriki vaya finté Arfa vá Omekha va se ma siyain mai Araín má Kípan má unon tiyan mino. Revaresen 21:6; 22:13 fin dere vá onano. * **1:13:** Dan 7:13; 10:5 * **1:14:** Isi 43:2; Dan 7:9; 10:6; Rev 2:18; 19:12 * **1:16:** Ibu 4:12; Rev 2:12; 19:15 * **1:17:** Ais 44:6; 48:12; Rev 2:8; 22:13

ana vaya mai máan mi ukhen mino. Dan manápá ifo afápá kan un kádan ofu maen mai ma yan manápá ifo afápá kan un kádan monó namun kayo ma vain pintena enisori kékái van mino. Inká dan manápá ifo afápá kan un kádan oon ma uruan dankará intánuran bain maen mai ma yan manápá ifo afápá kan un kádan monó namun kayo ma vain mino.

2

Efesasi Monó Namumpin Ma Mumunan Nanin Banta Vaípasá Ma Vompon Uvamádan Orein Baya Ino

¹ * “Efesasi baru ráke monó namumpin ma mumunan nanin banta vákan ma vetintá dafikein enisori vaípasá ma vompon uvamádan ná orino siren máa sen mino.

Mai ma yan manápá ifo afápá kan un kádan ofu fákaren ma inká dan manápá ifo afápá kan un kádan oon kayo ma uruan korifó uvantein dankará intá nukheintá ma noin banta ano máa mi sen mino. ² *Tiretí ankan ma ákona yorari iya ma mantaan ákona uve uman bariya ma kama avúavasí iyaona van téi afová ukhé uno. Afová ukhé kuya namu vanta kayoi avúava san avesara iyáke vaya varen orin kéká uno ma siyain kayoi avúavá bá baya vá daíde onen nan mai ma siyá ein mai kampun bayan tiyaren mino. ³ Téin tivisare sireya ída avesarain uman bariyáke ákona yorari e ono.

⁴ Máan te ompo esé ma araiintá ma séin nan anunu iyáke ma ena kéká ará amiyá eona avúavá mo ampire ná mai van mi siretin tirá namuanté uno.

⁵ *Mai ma esé araiintá ma variyá eona avúavá ma me ampireya o vaona vá onano. Ará baéde vá pe ma variyá eona avúavasá barano. Ída ma ará baeresí maé mai ma siretí ankani oon uruan intánin danka ma vain do khanenté uno. ⁶ Máan tonté umpo mana avúavái siretí ankampin kama ukhen mino. Mai avúavá maen Nikorasini kéká ano ma variyain danasinta van ma afon kari

iyaona mai sen má deren tifon kakhen mino.

⁷ * “Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino. * Intéa anó mai uman kayo esantanten nafi mai vantantiantékun mi Ti-yarafenui varu fintena aunan bain daa aran kúduren nanten mino.

Simená Monó Namun Ma Uvamádan Orein Baya Ino

⁸ “Simená baru ráke monó namumpin ma mumunan nanin banta vákan ma vetintá dafikein enisori vaípasá ma vompon uvamádan ná orino siren máa sen mino.

Mai ma Esé Araíin má Kípan má báken ma fúaren orun mantakhein banta ano máa mi sen mino. ⁹ *Afová ukhé kuya ona ída váka e arunanápin ba ompo mumunan in avúavápin tiretí ankan moékakha ono. Mai ma Yutan kéká uno siren ma kampun baya e sian more mere iyan ma siretin oyampá baya siyain kayo maen ída fura Yutan kayo ifo Ban Anoni monó namun kayon báká betí ankani kampun baya afová ukhé uno. ¹⁰ *Mai ma uman erinti varanona van ída vá akhokho van iya vano. Tiretin pinte manáa akhenóka uan onano van Ban Anon mano avían karavusifin kaúdantin maen tiyan míkan damúpin tiretin aruren ara ara uman amiyáken purin arirí inten mifo mumunan ná pákaan ákona ure varé esirá aunan bain kini kamamó uantano.

¹¹ * “Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino. Intéa anó mai uman kayo esantanten nafi mai vantanevaránen ma furin mano ída fákanten mino.

Perkamumí Monó Namun Ma Uvamádan Orein Baya Ino

¹² “Perkamumí baru ráke monó namumpin ma mumunan nanin banta vákan ma vetintá dafikein enisori vaípasá ma vompon uvamádan ná orino siren máa sen mino.

* **2:1:** Rev 1:16 * **2:2:** 1Yn 4:1 * **2:5:** Rev 3:3 * **2:7:** Esé 2:9; Rev 22:2, 19 * **2:7:** Átaren ma van nain mano inino ma siyain mai vayai ana afová inovan mi siyan mino. Revaresen 2:11, 17, 29; 3:6, 13, 22; 13:9 vá dere onano. * **2:9:** 2Ko 11:14-15; Rev 3:9 * **2:10:** 2Ti 4:8; Yem 1:12 * **2:11:** Rev 20:14; 21:8

Mai ma sefá tefá avan iyain baenati ma fákakhein banta ano máa mi sen mantino. ¹³ Ban Anon mano ma vei kin kará kain bain barufin mi van ná afová ukhé umpo sen tiviká pura seya mantaan ákona ukha ono. Téintá mumunan iyáken ma sen tiví tian dákó iyá ein banta Antipasin ma Ban Anoní kéká ano siretí varu fintena ma aruan púda mae mai umantá ída mumunan me ampe ono.

¹⁴ **“Máan tiya ompo siretí ankampin manáa sirá uman para van mino. Mai ma Barami ano ma Barakin afova amin ma Isarerí nanin banta yuvun íkan ma kampun ayarafenurá íkun uran dunan kayo niyan ma inká pamúkuí iyá einí ukhein banta kayo ano siretin aúbaná para van mino. ¹⁵ Máan manan eya Nikorasini ineine ma vanasi siamiyáken ma mai ume avúavá ánain dakhafiyain kéká deren áen nan tiretin aúban para van mino. ¹⁶ Máan tukhein nan mi ará baerano. Ída ma ará baeresí maé tireti vaonafá ainé erivé mai ma sefá tefá an bain baenati ano ma soo fenté e unakheimpó mai kayo vá tiruvonté uno.*

¹⁷ **“Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino. Intéa anó mai uman kayo esantanten nafi mai vantán aúpá ma vain manna manáa amiyá maé inká efanten onámanáká ma vei auyen bí uvantan nain amékun maen mai ma varan nain mano veyáká anan afová inten mino.*

Taiatirá Monó Namun Ma Uvamádan Orein Baya Ino

¹⁸ **“Taiatirá baru ráke monó namumpin ma mumunan nanin banta yákan ma vetintá dafikein enisori vaípasá ma vompon uvamádan ná orino siren máa sen mino.*

Mai ma Tiyarafenu Anin auufenté ma ira kheiní iyan ma inká aeni ma iyó uran ma karo kharo einí ma arantan táké iyain banta ano máa mi sen mino. ¹⁹ Ena kéká ará amin nafi mumunan ma iyaon nafi inká ará kusin pinté ma ara ara yorarí iya ma mantaan ákona uve ma

uman bariyaona mai fefái afová ukhé uno. Mai ma esé bariyá eona avúavá kayo ma esantare variya onan oniyá uno.

²⁰ **Máan tiya ompo mai ma siretí ankan aúban ma mana Yeseberin ne sin nanin ma váken beyan nan téi sakhanampa nanin muno siren ma senti yoran nanin banta iyanen pamúku avúavápin oriyan ma inká kampun ayarafenuntá íkun uran dunan niyain nan mi siretin tirá namu uantiyá uno.*

²¹ Manáa afokhan amiré bei namu avúavá ampiren ará baerano siyákon mifo mai vaya ída iniyan mino. ²² Máan tiyain nan mi mai nanin kákan aí daná amirékun maen barampin bakhen berai siyantí inká mai ma ven má ma namu avúavá bariyá inain kéká ano ma ída ará baerantí maé betin má deren mai uman amenté uno. ²³ **Téi ano mai nanin akhafana aruan púdekun maen mairái minó monó namun kayo ano afováen téin nan mi ineinefin má aúbá daíden oné iyan ne sinten mino. Máa siyantí maé tireti ma variyá inona avúavákái sé daidé miyan amídú onté uno. ²⁴ Máan tonté umpo Taiatirá barurá ma vaona nanin bantan ma vaya siamé uno. Mai nanini vaya ánain ma ída yakhafen ma inká Ban Anoni aúpá baya ma ída afova variyaona kéká amaniná ída uron mi ara ara uman kaonté uno. ²⁵ **Mai ma fákakheona avúavá máa vá ákona uan pákare váesirá téi ovarané ereno.**

²⁶ **“Intéa kéká anó esé araín táké ten too yaiyen doriyáken ná mantaan ákona uven ara ara uman esanten mo akhení uranten nafi mai kayon ákona amékun ara ara varafin ma vain nanin bantará dafisinten mino.*

²⁷ ‘Aenifó uvantein ayonta fákaren banasirá dafisiyáken maen bara khave ma ankaman duyufeiní vanasi inten mino.’

Mai ma se Sifóen pinte ma varerunaí ukhein ákona anan betin má baranten mino. ²⁸ **Máan turé maé kukharó ma afoká é iyain ofu vá dere mai kayo*

* **2:14:** Nam 22:1–25:2; 31:16; 2Pi 2:15 * **2:17:** Eks 16:4, 14-15, 33-34; Ais 62:2; Yon 6:48-50 * **2:18:** Rev 1:14-15 * **2:20:** 1Ki 16:31; 2Ki 9:22 * **2:23:** Íbo 7:9; Yer 17:10; Rev 20:12-13 * **2:25:** Rev 3:11 * **2:26:** Íbo 2:8-9 * **2:28:** Rev 22:16

amenté uno. ²⁹ Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino.

3

Sadisí Monó Namun Ma Uvamádan Ma Orein Baya Ino

¹ *Sadisí baru ráke monó namumpin ma mumunan nanin banta vákan ma vetintá dafikein enisori vaipasá ma vompon uvamádan ná orino siren máa sen mino.

Mai ma Tiyarafenui yan manápá ifo afápá kan un kádan Aunan má inká dan manápá ifo afápá kan un kádan ofu kayo vá ma fákakhein banta ano máa mi sen mino. Ei ma vare aruve iyaona yanasinta afová ukhekuya siyáke setimpin taunan báká bá uno siya ompo fura seya fúkarono. ² Auu mábe onano. Mai ma sitó máa mumunan ma fara váken ma ádé anantá kípáno van iyaimposá ákona uan mantano. Mai fara vara seyo, siretíi avúavá ano Tiyarafenu avorá nenta suron mi van mino. ³ *Máan tukhein nará mai ma esé inire ma mumunan ukhá eona vava oo yaiye vá ará baerano. Ída ma ará baeresí maé umoyan banta ano ma ereiní ékuya mai ma erenuna yamú ída afová inono.

⁴ *Máan tin nampo Sadisí barufin maen manáa nanin banta ano vetíi auí danáká ída ume avúavápó paini ukhein mai kayo ano efanten buí daná uren téin má nonten mino. Mai fara vara seyo, vetíi avúavá ano funtákaré intin mino. ⁵ *Inká intéa kéká anó mai uman esantaren ná erinten nafi mai kéká bá deren efanten buí daná uantanté uno. Máan turé maé aunan bain bompompin ma vetin aví bain ída arumonté umpo Tifóen má beni enisori kayo vá avorá tesiná ino sé tian amá onté uno. ⁶ Ma ma Aunan mano siádan monó namun kayo fimpá orera iyain baya kayo vá átaren ma van nain mano inino.

Firaderfiá Monó Namun Ma Uvamádan Orein Baya Ino

* **3:1:** Rev 1:4, 16 * **3:3:** Mat 24:43-44; 1Te 5:2; Rev 2:5; 16:15 * **3:4:** Yut 23 * **3:5:** Eks 32:32-33; Mat 10:32; Ruk 12:8 * **3:7:** Ais 22:22 * **3:8:** 1Ko 16:9 * **3:9:** Ais 45:14; 49:23; 60:14; Rev 2:9 * **3:10:** Ruk 21:19; 2Ti 2:12 * **3:12:** Ais 62:2; 65:15; Rev 14:1; 21:2

⁷ *“Firaderfiá baru ráke monó namumpin ma mumunan nanin banta vákan ma vetintá dafikein enisori vaipasá ma vompon uvamádan ná orino siren máa sen mino.

Mai ma Devitini ki fákakhen pura sen kantasí ukhein banta ano máa mi sen mino. Intéa yanasá béi ano yivé iyan nafi mai ída mana ano kanaí e munkin nono. Inká be ma munkuran nain daná ída kanaí e mana ano yivin nono. ⁸ *Ei ma variyaona yaná máa afová ukhé uno. Onano en avorá ona yiantanon tirékun bain mana ano ída kanaíen munkinten mino. Éimpin manáa ákona váká afová ukhé umpo senti vava fara fákarakéya ída sen tiví aúmane ono.

⁹ *Afovasá ono. Mai ma kampun banta kayo ano nóken ma ída Yutan kéká baken mifo kampun bayafó Yutan kéká pintena uno siren ma Ban Anoni kéká bain mai kayo aviré en arantampin me kaúdekun aron durafúden tiyáken Yisasi ano siretíi ankan nan moéken anunu ukhein kéká se sinten mino.

¹⁰ *“Mai ma sen too yaiye uman bariyáke ma senti man baya fákaan ákona ure varé eona anonafá maé Tiyarafenu ano ma ma varará nanin banta akhenóka uan onan nain damú tiretin aya onté uno.

¹¹ “Ainé ovarané erenté umpo mai ma fákaren nan bain avúavasá pákaan ákona ukharé esin mana vanta ano ída eni kin kamamó do varano. ¹² *Arugin ma uviní uran nain mi avían Tiyarafenui monó namuni namádaní urékun mai kéká ano ída uron mi evaránanten mino. Máan turé betin amaniná tesi Tiyarafenun aví bá bérin pinté ma auyen Yerusaremí baru ma inaru fáké eran nain aví bá uvaranté uno. Inká betin amaniná tesi auyen bí bá uvaranté uno. ¹³ Ma ma Aunan mano siádan monó namun kayo fimpá orera iyain baya kayo vá átaren ma van nain kayo ano inino.

Raodisiá Monó Namun Ma Uvamádan Orein Baya Ino

14 “Raodisiá baru ráke monó namumpin ma mumunan nanin banta yákan ma vet-intá dafikein enisori vaípasá ma vompon uvamádan ná orino siren máa sen mino.

Mai ma Tiyarafenu ano ma uvantein danáká ma fura siren dafiken ma véin ánain ákonaen dakhafiyan ma funtákein avúavá ana fura sen baran banta van ma Pura Vaya ana sin banta e sen ma ariyain banta ano máa mi sen mantino.

15 *Afová ukhékuya éi ída iyon eya inká ída múmu suron ukha ompo séi ma inikheruna mai finté mana ma inonái ono van mi iniyá uno. 16 Máan tukhá éi maen tanáará iyon uron ona se múmu suron ona sikhaona van mi se soo fenté éin do vían karúdenté uno. 17 *Kokhon ona va moní bá dékun báká mana yana san ída o afasí ukhé uno siya ompo éin ma auu yufúkukha avápa váke ma minó dana san iyanan ma ena kéká ano arunan uantiyain nan ída afová iya ono. 18 *Éin afova amékuya mai séin pintena irará iyó uran kori ma fanu siyain miyaní ureyá mairá teya séi minó danápin kanaí ukhé uno siyáke inká efanten buí daná bá miyaní ureya avápa ma vaona iyáde ída ayave van ono. Inká uveri yere miyaní ure auufen pédesin kama intiya auu mábe onano. 19 *Téi ma sinunu é iyaruna kéká maen aré asé uréi anteré iyá umpo veya inire ará baerano.

20 *Onano, masi onará e mantakhé ankamiyá umpo mana ano séinti veya ma iniren ma ona yivin nain mái un kumamé dunan nékun inká béi sen má nanten mino.

21 Téi ma aruvin uviní urékun ma se Sifóe ano e siviádá ma veni kin karáká o kumaneruna an déi aruvin ma uviní uran nain banta o aviádékun tenti kin karáká ten má e kuman inten mino.

22 Ma ma Aunan mano siyádan monó namun kayo fimpá orera iyain baya kayo vá átaren ma van nain mano inino.”

4

Inarufá Ma Monó Tiyain Baya Ino

* 3:15: Rom 12:11 * 3:17: Ruk 12:21; 1Ko 4:8 * 3:18: Ais 55:1 * 3:19: 1Ko 11:32; Ibu 12:6; Rev 2:5
 * 3:20: Yon 14:23 * 4:1: Rev 1:1, 10 * 4:2: Ais 6:1 * 4:3: Isi 1:28 * 4:4: Rev 3:18 * 4:5: Isi 1:13; Sek 4:2; Rev 1:4; 8:5; 11:19; 16:18 * 4:6: Isi 1:5-10, 22; 10:14 * 4:8: Ais 6:2, 3; Isi 1:18; 10:12

1 *Máan turé mun onékun inarufá mana ona yiádan bakan pefá ma ufen an den ma veya sikhá ein oo ano máa semí, “Mará édesí ma yaná ma entavuvintin dákó inain daná aniéku onano.” 2 *Máa siyain má Kantá Aunan mano séimpin bikaví maé inarufá mun oniyaruna vá mana kin kará bakan mairá mana ano kumantaren mino. 3 *Kumantan maen mai vanta au fáké yaspa onámaná bá inká nararé onámaná kanerianí bá káké ma fanu seiní iyan mino. Máan tiyákan mana afayonan mano mai kin kará mamáden eúkukhen maen danaren onámaná ano ma fanu seiní iyaren mino. 4 *Tuenti-fo (24) kará kayo ano mai kin kará maman aúban kaúden eúkukhan mai kará kayorá tuenti-fo (24) ánon enisori kayo ano efanten buí daná bá korifó uvantein kamamó bá ánontá uren kumantaren mino. 5 *Mai ma kin kará bain pinté aafa kankaré tiyan afayuí iyákan mai kin kará aufá maen dan manápá ifo afápá kan un kádan oon uruan korifó uvantein dankará intánuran kiyaren mino. Mai maen Tiyarafenui yan manápá ifo afápá kan un kádan Aunan kayo ino. 6 *Mai kin kará aufá kamu an dakhein un non bakan maifin ída mana yaná ban maen avusese uron ukharen mino.

Mai kin kará sefá tefá akhen pákena safúnaren daná ma kaya iyan aunan bain kami kami ano vákan maen betí oy-ampá bukhafa vá inká aufá bukhafa vápin auu kayo ano eúkukharen mino. 7 Mai ma safúnaren danasinta maen máan mi ukhen mino. Esé ma an uanten ma vain mai raioni ma einí ukhan maen inká mairá ma vain mano afon burimakau ma einí in maen inká kanú manausí ma ukhein mano vanta auná ma einí ukhan maen inká típá ma vain mano ámaren noin tumpán an dakhen mino. 8 *Mai ma kaya iyain daná kayo maen dan manápá ifo afápá mana un kádan aayan barú barú ukhan maen minó bukhafafin auu kayo ano eúkukhan inká aayan aránaópá dere varen mino. Mai yaná kayo ano ena ena vayan má inuran má ída avíkan máa siyan

ban mino:

“Minó Ákona Vá Bain Bafan Tiyarafenu
maen
kantasí ukhen ne, kantasí ukhen ne,
pefá baré ein taréa fara van ínaimpá
erinten mino.”

9-10 *Tafúnaren daná kayo ano mai ma kin karáká kumanten ma ayun para van oriyan bain manon amusin uanten ben aví daní iyaren mino. Máan tiyan maen tuenti-fo (24) ánon enisori kayo ano varará erafúben matimen mai ma ayun para van oriyan bain manon monosí uantiyan inká betíi korifó uvantein kamamó do yavanúan kin kará arantampin kaiyáken máa siyan mino.

11 “Bafan noe, éi maen tetisi Tiyarafenu
báke mae
eya anan dan uró banan minó ano éin manan amusin uanten éin aví ana vá daní iyáken eni ákona aránaó ana vá bano.

Mai fara vara seyo, éi anon minó danasinta uvariýáke
inká ei anunurái mai yanasinta sen nan dákó ukhen taréa mai yanasinta van mino.”

5

Sipisipi Arará Bá Bompon Dóki Vái Vaya Ino.

1 *Máan tiyáká onékun mai ma kin karáká kumanteini ayan kuron pákena yámampin mana vompon dóki fákakhan mai vompontá maen tefá tefá akhentá bompon uvantan dan manápá ifo afápá kan un kádan pintan dampan ákona uran baren mino. 2 Máan tukhá onékun mana ákona enisori ano oovararen máa semí, “Iye anó kanaíen ma vompontá ma yamparen ákona uran bain do kavótiren kavasinten nafino.” 3 Máa sen mifo inaru fáke safi vara ráke safi inká bara aú pinte safi ída mana ano mai vompon kaváden dankafin nainíen mino. 4 Ída mana ano mai vompon kanaíen kaváden dankafin nainí ukheimpin téi váduríyá ifí dé uno.

5 *Ifí diyarunafin mai-tuenti-fo (24) ánon enisori kayo finté mana ano máa semí,

* 4:9-10: Rev 19:4 * 5:1: Ais 29:11; Isi 2:9-10 * 5:5: Esé 49:9; Ais 11:1, 10; Rev 22:16 * 5:6: Sek 4:10; Yon 1:36; Rev 13:8 * 5:8: Íbo 141:2; Rev 8:3-4 * 5:9: Íbo 33:3; 40:3; 96:1; 98:1 * 5:10: Eks 19:6; Ais 61:6; Rev 1:6; 20:6

“Ída ifí diyáke onano. Yutan anan pinte vanta Devitin akhá ano ma raionií uven ma aruvin uviní uren ma Devitini kin kará barein banta anon kanaíen mai ma yan manápá ifo afápá kan un kádan anamuntá ma fúkin damparan bain kasaen kavótiren dankafinten mino.”

6 *Máa sirá téi onékun Sipisipi Arará ma aruan púkaré ein mano aúbaná mantakhan mai ma safúnaren daná kayo ma kamí kamí bain má ánon enisori kéká bá ano véin maman aúban den manten eúkukhan mino. Béin ánompin kaoi viri an dakhein dan manápá ifo afápá kan un kádan bakan inká dan manápá ifo afápá kan un kádan auu vákan ma ukhein mai Tiyarafenu ano ma yan manápá ifo afápá kan un kádan Aunan ma siantan ma varará orera iyain mino. 7 Mai Sipisipi Arará ano oriven mai ma kin karáká kumantein bantai ayan kuompáke yáman pintena mai vompon o varen mino. 8 *Mai vompon dóki mamaran maen mai ma kamí kamí tafúnaren daná kayo ma kaya iyain má tuenti-fo (24) ánon enisori kéká bá ano mai Sipisipi Arará arantampin mátimen mino. Mátimen mana mana ano kita fákakhan en inká kori fóké uvantein mákifin ma aunka fauran bain dere fákakhan mino. Mai Tiyarafenui vanasi ano ma amúkiyain dóki kayo ino.

9 *Mai kéká ano auyen í máa sen den mino.

“Éi anan kanaíeya mai vompon mádeya mairá ma yampakhein púkin do khavótire mai vompon kavasin nono.

Mai fara vara seyo, éin aruan púdayai ei narefókéi vanasi miyaní uan Tiyarafenu ame ono.

Minó anan pinte vá ara ara vaya ma siyain má inká banasi ma minó barafá bain kayo vá ino.

10 *Máan ture éi anon mai nanin banta maman Tiyarafenui monó doran bantai uren nan mi Tiyarafenu vá barará nanin banta vá aúban báken beni yorará iyan

inká barará nanin bantaré dafisinten mino.”

Arará Sipisipi Aví Ma Yaní Ein Baya Ino

11 *Máan turé evaráne mo oniyáké inékun ída yankaforen enisori kayo ano veni kin kará mamáden iyen eúkuven í diyákan kamí kamí tafúnaren daná ma kaya iyain má ánon enisori kayo vá ban mino. 12 Avádóden máa sen í den mino.

“Mai ma aruan púkaré ein Sipisipi Arará kantasí ukhen mino.

Tiyarafenu ano véin nan mi kanaíen kantasí ukhein ákona vá kokhon ona vá

inká afova vá ákona vá inká kákan bí bá kakhan má avu vá baranten ne sikhen mino!”

13 Máa siyá inékun inaru fáke safi vara ráke safi vara aú pinte safi inká un nompin nafi ma vain tafúna kayo ano yere máa sen í den mino.

“Avu vá kákan bí bá kakhan má ákona vá kin karáká ma kumantein nina vá inká sipisipi arará ina vá para van oriyan bano.”

14 Máa sen í diyain má mai ma kamí kamí tafúnaren daná kayo ano fura ino síkan inká tuenti-fo (24) ánon enisori kayo ano aron durafúden Tiyarafenu vá sipisipi arará bá aví daníen mino.

6

Dan Manápá Ifo Afápá Mana Un Kádan Anamun Máa Ma Yamparan Baré ein Ma Sipisipi Arará Ano Kavótein Baya Ino

1 *Kakháké ontékun Sipisipi Arará ano mai ma yan manápá ifo afápá kan un kádan pintan ma yamuan ákona uran baré ein pintena mana fúkin do karáto faan karúdiyain má inékun aafa ma kankaré teiní iyain má tafúnaren daná kayo ma kamí kamí baré ein pinté mana ano siyáken, “Ereno,” sen mino. 2 *Máa síká mun onékun maen mana efanten osin e mantavin mai osin amaniná ma kumantá ein banta ano uve vá isana vá pákakhan kin kamamó béin amen mino. Máan turan mai vanta ano vanasi vá mo aruvúde betin maman barasí uré ereno van oren mino.

3 Orivin maen sipisipi arará ano ena ana máden púkin do kavótiyain má inékun tafúnaren daná kayo finté ena ano siyáken “Ereno,” sen mino. 4 Máa siyain má ena nararé osin e unen eríkan mai osin amaniná ma kumantaré ein banta mana kákan baenati maman amiren barará nanin banta finte ma kusen ban avúavá do mádantin ma ven aruan purin maran in ákona amen mino.

5 Sipisipi arará ano kanú manaú dádasí en ena ana máden púkin do kavótiyain má inékun maen tafúnaren daná kayo finté kanú manausí ma ukhein mano siyáken “Ereno,” síká mo oniyaruna vá mana sókonten osin mano sufá e mantavin mai osin amaniná ma kumantá ein mano kan kanan uman daimin tikheri fákakharen mino. 6 Máan tukhan mai ma safúnaren daná kayo ma kamí kamí bain áubanáké mana oo ano siyáken, “Orive ei yorarí esin ná banasi ano arafan nan ino. Máan tiyan ná maná damú ma yóden miyan baran nain mano vá mana sátó kurafin ma uviti miyaní inafi áa kanú manaú tátó kurafin ma uviti an dakhein daná bari ma miyaní inafi vá barano. Máan tin nompo ída vá orifi yaa vá uvaini ana vá namu uantesin ná para vano.”

7 Máa siran maen sipisipi arará ano kamí kamí dádasí en ena ana máden púkin do kavótiyain má inékun maen tafúnaren daná kayo finté kamí kamisí ma ukhein mano siyáken “Ereno,” sen mino. 8 *Máa sirá mo onékun mana aufáke yanaren uvin ayoran mana ukhein osin eren mino. Mai osin amaniná ma kumantaré ein banta aví Purin ne sikhan maen inká Banta Masi se sin mano véin bákuren noren mino. Nókan maen kamí kamí pintan banasi yaíde vá baenatifo safi anampo safi namu aí kayofo safi inká afá tafúna kayofo safi vá mana masiman aruan kípano siren mai ákona míkanan amen mino.

9 Máan turan maen sipisipi arará ano yan manápá dádasí en ena ana máden púkin do kavótiyain má onékun Tiyarafenui vaya ma sian dákó eintafan ma aruan púká ein kayoi aú iyampon kayo ano arata aránaópá baren mino.

* 5:11: Dan 7:10; Ibu 12:22 * 6:1: Rev 4:6; 5:1 * 6:2: Sek 1:8; 6:1-6 * 6:8: Yer 15:1-3; Isi 5:12, 17; 14:21

10 Báken mai kéká ano oovararen máa semí, “Dan báke ma fura se kantasi ukhe ona Bafan noe, intéa yamusá barará nanin banta ano ma setin tirukhá ein anonafá betin daídeya uman aminte fono. 11 *Máa siyain má mai kéká efanten buí daná kayo amiren tiamemí, “Tanáará ave ukhe avíkiyasín ná arona yoran nanin banta ma fara vain kayo yere aruan púdantisá máan tono.”

12 *Máa sirá kakháké ontanan sipisipi arará ano yan manápá ifo afápá mana un kádan dádasí en ma ena ana máden púkin do kavótiyain má kákantá bara kaya íkan áau ano maman tókonten iyain má biyon mano maman nare an den nararesien mino. 13 *Máan tiyain má ayon pinte ofu kayo ano kákan uvaen ma fiki yaa ana sori in ma aran kakhufeinién barará eraven mino. 14 *Máan tiyain má ayon mano vompon dóki ana ma yádaeinién orin maen ínká anuyon kayo vá un nompin ma musó kayo ma varé ein má ano afeyoren mino.

15 *Máan tíkan bara rákena kin kayo fi yafisin banta kayo fi aruvin banta kayoi ánon banta fi ona kokhon dákein kéká safi áa kákan ákona vain kayo fi ínká miyan ída van doran nanin banta vá para van nanin banta kayo vá ano karan don aimpin má ínká on ain ma anuyompin bain kayo fimpá o aúmanen mino. 16 *Máan tuven maí kayo ano oovararen temí, “Minan anuyon noe, mesan ma on don baona oe, o ankábore setin e man darádesí mai ma sipisipi arará ano ma kin karáká kumantein ayafen ída oné tifékun beni aran naná ano setimpin ída erino. 17 *Mai fara vara seyo, veni aran naná ma erinten ne siká ein damúí yákó ukhen mifo iye anó kanaíen mantanten nafino.”

7

Tiyarafenu Vei Vanasirá Ma Yafibintin Ma Uman Mano Vetin Amaniná Ída Afoká Inain Baya Ino

1 *Máan turá onékun kamí kamí enisori ano ma varai kamí kamí akhen ma vaintá mantakhen mai enisori kayo ano varará

ída uvaen orino van kamí kamí uva fákakharen mino. Pákakhan mai uva ano ída uvaen oren barará ma vain daa anara safi ínká un nompin nafi mo kayoen mino.

2 Máan tukhá onékun áau e uní páké mana enisori ano Aunan ma vain Tiyarafenu ina ma fúkipó damparen damuan ákona ukhein ana fákaaren eren mino. Eriyáken mai ma kamí kamí enisori ma ma vara namuin ákona amikhein kéká oovararen máa sen tiamen mino. 3 *Ída vá bara fi un non nafi ínká daa ana ma vain maman namu ukhesirá Tiyarafenui yoran nanin banta ayafentá beni aní daná damparé tiféku vá ono.”

4 *Máa sirá inékun Tiyarafenui aní daná ma yampakharé ein mai Isareri kéká pinte mana antareti ifo foti fo sauseni (144,000) nanin bantan aní ukharen mino.

5 Yutan anan pinte maen tiyan míkan mifo sirantan kan orun kádan tauseni (12,000) ino.

Rubenin anan pinte maen tiyan míkan mifo sirantan kan orun kádan tauseni (12,000) ino.

Katin anan pinte maen tiyan míkan mifo sirantan kan orun kádan tauseni (12,000) ino.

6 Asani anan pinte maen tiyan míkan mifo sirantan kan orun kádan tauseni (12,000) ino.

Naptarini anan pinte maen tiyan míkan mifo sirantan kan orun kádan tauseni (12,000) ino.

Manasenin anan pinte maen tiyan míkan mifo sirantan kan orun kádan tauseni (12,000) ino.

7 Simionini anan pinte maen tiyan míkan mifo sirantan kan orun kádan tauseni (12,000) ino.

Rivaini anan pinte maen tiyan míkan mifo sirantan kan orun kádan tauseni (12,000) ino.

Isakani anan pinte maen tiyan míkan mifo sirantan kan orun kádan tauseni (12,000) ino.

8 Yeburunini anan pinte maen tiyan míkan mifo sirantan kan orun kádan tauseni (12,000) ino.

* 6:11: Rev 7:9, 13; 19:14 * 6:12: Mat 24:29; Apo 2:20; Rev 8:12; 11:13; 16:18 * 6:13: Ais 34:4 * 6:14: Rev 16:20 * 6:15: Ais 2:10, 19, 21 * 6:16: Ruk 23:30 * 6:17: Yoe 2:11; Mar 3:2 * 7:1: Yer 49:36; Dan 7:2 * 7:3: Isi 9:4, 6; Rev 9:4 * 7:4: Rev 14:1, 3

Yosepini anan pinte maen tiyan mikan mifo sirantan kan orun kádan tauseni (12,000) ino.

Bensamenini anan pinte maen tiyan mikan mifo sirantan kan orun kádan tauseni (12,000) ino. Mai má anan nanin bantafin mi Tiyarafenui aní daná ayafentá kaúken mino.

Kokhon Nanin Banta Ano Ma Sipisipi Arará Aví Ma Yaní Iyain Baya Ino

⁹ Máan turá mo onékun ída yankaforen nanin banta ma minó akhempá báken ara ara vaya siyain kayo ma minó barafin bain má minó anan nanin banta vá ano Sipisipi Arará ma kin karáká kumantein aufá mantakharen mino. Mai nanin banta ano efanten buí daná ana uriyan kefo ana fákárú ukharen mino. ¹⁰*Mai nanin banta ano avádóden oovararen máa siyaremí, “Banta ma evaránen aviran mai setisi Tiyarafenu

ma kin karáká kumantein má inká Sipisipi Arará bá ina ino.”

¹¹ Minó enisori kayo ano kin kará bá tuenti-fo (24) ánon enisori kayo vá inká mai ma kamí kamí tafúnaren daná kayo vá maman aúban kaúden manten eúkukhen mai enisori kayo ano kin kará aufá ánon bara finí uren matimen Tiyarafenu aví daní iyáken ¹²*máa semí,

“Pura ino.

Aví daní in avúavá bá kakhan má kama ineine vá tusu siantan má béin kákan bí amin má

moékan ákona vá

mai setisi Tiyarafenu inan bantin ayun para van oriyan banten mino.

Mai fura ino.”

Tiyarafenu Ano Ma Sipisipi Ararái Narefó Ma Uman Pinté Ódein Kayoi Auí Daná Ma Sesé Uantein Baya Ino

¹³ Máa siyákan mana ánon enisori ano séin inaen temí, “Ma ma efanten buí daná uren bain kayo mai inté ukhein kéka sá báken ná inte fákesá e van nafino.”

¹⁴*Máa síká béin tiaméú, “Kákan banta oe, éi anan afová ukha ono,” sékun béi semí, “Mai ma kákan uman pinté e unen erein kékái váken Sipisipi Ararái narefó

betíi auí daná tesé uran mi maman efanten ukhen mino. ¹⁵ Máan tukhein nan mi mai kayo anon Tiyarafenui kin kará aufá báken beni monó namumpin inuran má bayan má dorarí iyan mino. Máan tiyain mai ma kin karáká kumantein mano vei kákan davaráefó betin dáantáden dafisinten mino.

¹⁶*Mai kayo ída uron mi enádá arafan puren

inká non nan aien inten mino.

Mai ma kákan aá ma akhiyan imúkan ariyan noré ein mi

yáantanten mino.

¹⁷*Mai fara vara seyo, Sipisipi Arará ma kin kará aufá mantakhein mano sipisipirá dafisin bantaí uven aunan amin non baípa aviren orintin mai non niyantín Tiyarafenu ano vetíi ánu ma auu fenté eriyá ein minó do arúantanten mino.”

8

Sipisipi Arará Ano Yan Manápa Ifo Afápa Kan Un Kádani (7th) En Púkipó Damparan Baré Ein Dóki Kavóten Mino

¹ Dan manápa ifo afápa kan un kádani en ana ma fúkipó damparan baré ein ma Sipisipi Arará ano yo kavótiyain má teti (30) minitirá inarufá baya fúkekhen oreraen mino. ² Máan tiyain má onékun dan manápa ifo afápa kan un kádan enisori kayo ano Tiyarafenu aufá mantakháin mana mana en ufen amirú en mino.

³*Máan tiyákan kama aunka iyain pauran ma íkun uan amin dóki ma korifó uvantein ena enisori ano mamaren mai ma onámaná karánará urantá e manten mino. Mumunan nanin bantái amúkin má manafiní uren íkun uan amino van kokhon kama aunka ma iyain pauran mai enisori ano mamaren kori fóké ma uvantein arata ma kin kará aufá baintá oren mino.

⁴ Mai fauran má mumunan nanin bantái amúkin má ma manafiní uren íkun uan amein mano mai enisori ayan pinté Tiyarafenu vaintá óden mino. ⁵*Máan turen mai enisori ano mai ma kori fóké uvantein dókifin arata rákena ira o váan kaúden ma varará karúdan eriyain

* **7:10:** Rev 5:6-7 * **7:12:** Rev 5:12 * **7:14:** Dan 12:1; Mat 24:21 * **7:16:** Ais 49:10 * **7:17:** Íbo 23:2; Ais 25:8; Rev 21:4 * **8:3:** Eks 30:1-3; Rev 5:8 * **8:5:** Eks 19:16-19; Riv 16:12; Rev 11:19; 16:18

má aafa kankaré tiyáken aafayuí íkan kákaníen bara khayaen mino.

Ufen Ma Asiyain Baya Ino

⁶ Máan tiyain má mai ma yan manápá ifo afápá kan un kádan enisori kéká ano ma ufen pákakhá ein aseno siren maman ama san en oreraen mino.

⁷ *Esé ma varé ein enisori ano ma vei ufen asiyain má nare vá ira vá inká kómópa amú bá ano manafiní uven barará eren mino. Máan tiyain má minó daná ma kanú manaú pintan masiman uran baré eimpinté mana masiman ira ano vara vá daa vá kaaren káta vá dere khen kauren mino.

⁸ Máan turákan kaní ma ukhá ein enisori ano vei ufen asiyain má kákan ira anamuná ano anuyon an davin maman un nompin karúdan aravuyen kanú manaú masiman pintena mana masiman mano maman nareíen mino. ⁹ Máan tiyain má un nompin ma kanú manaú pintan ma ara ara uraran ma varé ein mai mana masiman mano furen orera en mino. Máan tiyan maen inká sipi kayo ma kanú manaú pintan baré eimpinté mana masiman mano namuen mino.

¹⁰ Máan tiyákan kanú manausí ma ukhá ein enisori ano vei ufen asiyain má kákan ofu ano inaru fáké tosi on ma keiníen kákan non kayo vá tító non kayo vá ma vain daró eraven mino. ¹¹ *Mai ofu aví Íta ino. Ítan báken kanú manaú masiman pintena mana masiman maman íta noníen mino. Máan turan mai non ma nein nanin banta ano furen mino.

¹² *Máan turákan kamí kamisí ma ukhá ein enisori ano vei ufen asiyain má kanú manaú pintan ma áau vá biyon má ofu kayo vá ma masiman uádan baré ein pintena mana masiman ankádú íkan mai akhen páke mo sitípaen dunen mino. Máan tíkan kanú manaú masiman pintena vayani mana masiman títípa íkan inká inuran má dere máan manaen mino.

¹³ *Máan turá mun onékun mana sumpán mano ámaren ayompin entaviyan avádódén asiyan máa semí, “Barará nanin banta oe, uman eriyon mifo yafike vá

bano. Mai fara vara seyo, kanú manaú enisori ano ma fákakhein ufen ma asintin ma yákó inain nan mi aaká iyá uno.”

9

Dan Manápasí En Asein Ufen Mano Ma Esé Araíin Akhokho Maman Afoká Ein Baya Ino

¹ *Máan turan dan manápasíen ma erein enisori ano vei ufen asiyain má onékun mai ma inaru fáké un kararen barará eravukharé ein ofu mai ma aron ída van masí káke khi amen mino. ² *Mai khi ma mamaren aron ída van masí ona yiviyaín má mai masí pinté kákan ira ma sádan íkun ódein an daaren aá ma khiyaré eintá mun iyábin títípaen mino.

³ Mai íkun pinté panon kayo ano e unaren barará eravíkan iyavan kayo ano ma untaré iyainí ukhein ákona amen mino. ⁴ *Amiren mai fanon kayo siamemí, ‘Káta yana safi yunan ana fi inká daa ana fi ída vá arin nampo Tiyarafenui aní daná ma ída ayafentá mantan nain nanin banta vá arono. ⁵ Banasi ma aruan purin ákona ída vetin amen mifo iyavan mano ma vanta untádan ai san auré iyainí ukhein ákona máa anan dan manápá biyontá amen mino. ⁶ *Mai yanasinta ma afoká intin maen banasi ano furin nan dosinten mifo ída kanaíen onanten mino. Betí ankan purintó uno siren ineine inten mifo furin mano karan orinten mino.

⁷ *Osin kayo ma aruvimpin orino van auí uanteiní uren ánontá korifó uvantein kini kamamó uantádan mai fanon kayo vanta aunasí ukharen mino. ⁸ *Betí ankan ánon do ano anasi arinta ánon do ma eraveiní ukhan inka aveantun mano raioni aveantun an dakharen mino. ⁹ *Mai yaná kayo maen aenifó uvantein tanko aurá uran betin aayan mano karisi kayo ma osin mano yarifen aruvimpin oriyan ma uu areiníen mino. ¹⁰ Betí ankan ame vákan iyavan mano ma untareiní iyan maen dan manápá biyontá ma vanasi untaran ákona amen mino. ¹¹ Mai kékái kin maen aron ída van masí pintena enisorin ban mino.

* 8:7: Eks 9:23-26; Isi 38:22; Yoe 2:30 * 8:11: Yer 9:15 * 8:12: Isi 32:7; Rev 6:12-13 * 8:13: Rev 9:12; 11:14 * 9:1: Rev 20:1 * 9:2: Esé 19:28; Eks 10:12-15; Yoe 2:2, 10 * 9:4: Rev 7:3 * 9:6: Yop 3:21; Yer 8:3 * 9:7: Yoe 2:4 * 9:8: Yoe 1:6 * 9:9: Yoe 2:5

Ben aví ma Iburu vaya finté Abadoni e sin inká Kiriki vaya finté Aporioni e ma siyain mai Minó Daná ma Máden Asuse in Banta en tikhen mino.

¹² Esé ma erein uman inka esanten mifo ena kankan uman ma eriyain nará dafiseno.

Dan Manápá Ifo Afápá Mana Un Kádaní En Asein Ufen Mano Ma Esé Araíin Akhokho Maman Afoká Ein Baya Ino

¹³ Máan turan dan manápá ifo afápá mana un kádaní ma ukhá ein enisori ma varé ein mano vei ufen asiyain má Tiyarafenu avorá ma kori fóké uvantein arata akhentá ma kamí kamí biri ma vain pinté baya siyá iné uno. ¹⁴ Mai vaya ano ufen ma fákakhá ein enisori van temí, “Kamí kamí enisori ma Yufretisí non akhempá ma yamuádan bain ná útúantano.” ¹⁵ Maa sikhán mai ma kamí kamí enisori van ma mai oranafin mai viyontá maí damú mai áau rasá kanú manaú pintan ma yain mádan bain nanin banta fintena vá mana kéká arino van ma síkan ma útaaren baré ein kéká san inka ifo vá oriveya máan tono sen tiamen mino.

¹⁶ Mai ma aruvin banta kayo ma osintá kumantaré ein mai kan antareti mirioni (200,000,000) bakan tisimiyá iné uno.

¹⁷ Téin ma suu vaédá onékun maen osin kayo amaniná banta kéká kumantaren mino. Mai vanta kékái aruvin buí daná káké nararéin kun inaru an dan inká anafuren uaren sarafa onámaná an dakharen mino. Inká osin kayo ánon mano raioni kayo ánon an davin ira anamuná bá íkun má ira kharo iyain sarafa onámaná bá ano vetin oo fenté e khuven orera iyaren mino.

¹⁸ Mai osin kayo oo fenté ma ira anamuná bá íkun má inká ira kharo iyain sarafa onámaná bá ma e khuven orera iyaré ein mai aran naná anon kanú manaú pintan ma varará nanin banta yaimádan baré ein pintena mana kéká arin puren mino. ¹⁹ Mai osin kayoi ákona ma vain mai oofen má amefin mái van mino. Mai fara vara seyo, vetin ame ano osafáe ánon an dakhán mi vanasi ma arin ákona ano amefin deren ban mino.

²⁰ *Mai ma kanú manaú uman mano ma ída aruan purein kéká ano vetii ume

* **9:20:** Íbo 115:4-7; 135:15-18; Dan 5:23; Rev 16:9, 11

* **10:7:** Amo 3:7

avúavá pinté ída ará baeren erin nainien mino. Mai kayo anon namu aunan má inká kori vá siriva vá onámaná bá bronsi vá daa vá ma máden ayan póké uvádan báken ída onen ída vaya sen inká ída khayaen iyaren mino. Máan tiyákan mai kampun ayarafenu kayorái monó tiyaren mino. ²¹ Máan tiyan báken mai ma vanta aruan puriyá ein nafi uvátakhanisá iyaren nafi inká pamúku avúavasá iyaren nafi umoyanisá iyaren nafi mai yanasinta finté ída ará baeran nainien mino.

10

Mana Enisori Vá Titó Bompon Dóki Ana Vái Vaya Ino

¹ Máan turá mairá mun oniyaruna vá ena ákona enisori ano inaru fáké eriyákan konan mano véin eúkuvin afayonan mano ánontá davénakhan mino. Béin auná ano áau ma fanu seiní iyákan ben arantan mano ira ma uruádan keiní iyaren mino.

² Mai enisori ano ayan kuron pákena yarantan un non daró kaen inká ayan ópáke yarantan barará kaen uren mantakhen ayampin mana sató bompon dóki kaváden pákakharen mino. ³ Pákakhen mai enisori ano raioni ma vádeiní iyain má dan manápá ifo afápá kan un kádan dádá aafa khankaré tiyan baya sen mino.

⁴ *Mai ma aafa khankaré tiyan baya sein maman bompompin uvarano van iyaruna vá inaru fáké mana oova ano máa semí, “Mai vaya áin ná inimpin mana vantiya ída vá bompompin uvarano.”

⁵ *Maa síkan mai ma un non daró bá barará bá arantan daren mantakharé ein enisori ano ayan kuron pákena yáman orun maman inaru fasien mino. ⁶ Máan turen mai ma ayun para van oriyan bain Tiyarafenu ano ma inaru vá bara vá uváden maifin ma vain danasinta uváden ma inká un non uváden maifin ma vain danasinta ma uvantein manon avíká ayan befiyó uren temí, “Tiyarafenu ano ída ave iyan banten mino. ⁷ *Máan tinten mifo ena enisori ano ma vei ufen asin nain damúi Tiyarafenui aúpá ineine ma vei

* **10:4:** Dan 12:4, 9 * **10:5:** Diu 32:40; Dan 12:7

sakhanampaí in doran banta kayo oo ráke uaren ma sikhá ein mo kanaí inten mino.”

⁸ Maa siren inaru fáké evaránen mai oova ano semí, “Ore vá un non daró bá barará bá ma mantakhein enisori ayampin ma kavákein bompon dóki ana vá o varano.”

⁹ *Maa síká mai enisori vaípa orivé títo bompon dóki ana simino van mo inantékun béi semí, “Máde nano. Nesin maen oorá bonkampun anu an den ase inten mifo nankúdesin ma arápin aravinten mi morun kákantá íta inten mino.” ¹⁰ Maa síká mai enisori ayan pintena síto bompon dóki ana o máde nékun bonkampun anu an den ase en mifo nankúdekun ma sirápin araven maen morun kákantá ítaen mino. ¹¹ Maa tiyákan béi semí, “Ma yanasinta ano minó nanin bantafin má minó bara kayofin má ara ara veya ma siyain nanin bantafin má inká kin kayofin máí afoká inten mifo sakhanampa veya vá evaráne mai kéká tiameno.”

11

Kankan Daná Ano Ma Sian Amá Ukhein Baya Ino

¹ *Maa siren mana avamáan onan danka maman timiren temí, “Oriveya vá Tiyaarafenui monó namun má arata vá mo avamáan oniyáke vá maifin ma monó tiyain nanin banta yere vá dankafono. ² *Maa tin nompo akhempá ma uvaren eúkukhein dafu aúpin ída vá avamáan onano. Mai fara vara seyo, ena anan nanin banta amikhein afokhan mi vantin mai nanin banta anon mai ma Yerusaremí baru ma kantasí ukheimpin foti-tu (42) viyontá onóbe enóbe iyáken dasan dasan inten mino. ³ Maa tiyantí tenti veya ma sian amá in bantá kan ákona amékun maen baré buí daná uren mana tauseni ifo tu antaret sikisti (1,260) yamúi sakhanampa veya sinten mino.”

⁴ *Mai sakhanampa vantá kan maen mai ma ma varará dafikein Bafan avorá ma mantakhein orifi yaa aná kan má oon uruan intánin danka kanan má ino.

⁵ *Mana vanta ano ma vetí ankan aruré

uman ameno van ma intin maen betin oo fenté ma kuvin nain ira ano mai ma namuroí uantiyáin nain kéká kaan kaurinten mino. Mai aa sáké anan betin ma uman ameno van iyá inain kéká ano furinten mino. ⁶ *Betí ankampin ákona vantin pasen Tiyaarafenui sakhanampa veya ma siyáken kasaen inaru onará dasirádantin ída á danten mino. Maa tiyáken un non má non kayo vá maman nare noní ana iyáken inká betíi anunurá ara ara aa fáké barará nanin banta amaniná uman aminten mino.

⁷ *Betí ankan ma sakhanampa veya sian kíparantin maen mai ma aron ída van masípin ma afá tafúna varéin nain mano e unen édavuvén maen békanaan aruan purinten mino. ⁸ *Kákan baru Sodomu vá inká Isipi vara va san ma namu avúavá bíkakhen ne ma siyain an mi Yerusaremí baru ano yakhen betíi Bafan Yisasin daa unkamádantá arein mino. Maa manan en mi mai varui kákan aasá békanaan aruan kaintin banten mino. ⁹ Maa turantin maen kanú manaú bayan má manápá áaurá báí míkanaan bantin minó bara fáke nanin banta vá ara ara anan má inká ara ara veya ma siyain kayo vá ano e óden ída vá masí ono sinten mino. ¹⁰ Mai sakhanampa vantá kanan manon ara ara uman barará nanin banta amaniná kaiyaré intin pasen békán ma furein nan barará nanin banta ano amusin uren kama yanasinta ven amin maran inten mino.

¹¹ *Maa ten oriyantin ma kanú manaú bayan má manápá áau vá ma esantantin maen aunan ma amin aunan mano Tiyaarafenui finté máí kanan bantafin e ferantin maíkan banta ano evaránen orun mantantin maen mai ma oniyaré inain nanin banta ano akhokho van en orera inten mino. ¹² *Maa tiyan inintin maen inaru fáké avádóden oovararen máa sinten mino. “Mafá édano,” sintin maen békani namuro kayo ano kakháken ontantin konan mano míkanaan aviren inarufá ódinten mino.

¹³ *Mai áaurá anan kákantá bara khaya intin mai varui mana akhen pákena minó

* **10:9:** Isi 2:8–3:3 * **11:1:** Isi 40:3; Sek 2:1–2 * **11:2:** Ruk 21:24; Rev 13:5 * **11:4:** Sek 4:3, 11–14 * **11:5:** 2Sa 22:9; Íbo 97:3 * **11:6:** Eks 7:17–20; 1Sa 4:8; 1Ki 17:1 * **11:7:** Dan 7:21; Rev 12:17; 13:7; 17:8 * **11:8:** Ruk 13:34 * **11:11:** Isi 37:5, 10 * **11:12:** 2Ki 2:11 * **11:13:** Rev 6:12; 16:18

daná baráken asuse intin dan manápá ifo afápá kan un kádan tauseri (7,000) nanin bantan aruan purinten mino. Máan tintin ma ída furin para varé inain kéká ano akhokho yan uaren inarufá ma vain Tiyarafenu aví daní inten mino.

14 *Kaní ma in uman mano inka esanten* mifo kanú manausí ma in uman mano inka e un inten mino.

Dan Manápá Ifo Afápá Kana Un Kádaní Ma Ukhein Ufen Ma Asein Manon Kanú Manausí Ma In Uman Baren Eren Mino.

15 *Máa sirákan mai ma yan manápá ifo afápá kan un kádaní ma ukharé ein enisori ano ma vei ufen asiyain má inarufin avádóden oovaren temí, “Ma varará ma yafisin mai Bafan mano ma vei vanasi evaráñen avirano van ma aní uran baré ein ninaí inka ein béi anon mai nanin bantará dafisen oriyen banten mino.”

16 Máa siyákan mai ma Tiyarafenu aufá ma tuenti-fo (24) ánon enisori kéká ma kin karáká kumantein kayo ano ánon bara finí uren mátimen bein monó tiantiyen 17 temí,

“Minó Ákona Vá Baona Bafan Tiyarafenu oe,
éi fefá bare ma saréa fara vaona van mi
setí ankan éin tusu sianté uno.

Mai fara vara seyo, inka kákan ákona mamareya

ei yafisin aúpin inka kin dorarí in arái ukha ono. 18 *Minó bara fáke nanin banta ano éin aranan uantiyan mifo saréa inka eni aran naná eren mino.

Púkaré ein nanin bantai avúavá ma yaimiyáke ma ei yoran banta kéká miyan aminona yamú inka afoká en mino.

Ei sakhanampa vanta kéká bá inká ei kantasí ma ukhein nanin banta vá miyan amin nono.

Mai ma aví bain má inká aví ma ída vain má anon éin nan peré iyain mino.

Ma varará ma váken minó daná máden asuse iyá ein kéká éi anon aruan kípán nono.”

19 *Máa siran inarufá Tiyarafenui monó namun ona yiran béi ma ará manafiní uren kasen ban man baya ma kain bain bokhise kasaen minó ano onen mino. Onákan mai finté afayuí iyáken aafa kankaré tin kákantá bara khaya iyain má kákan á dan kómópá amú eren mino.

12

Mana Nanin Má Drakoni Vái Vaya Ino*

1 Mana kákantá enará ukhein daná inarurá afoká iká oniyaruna vá mana nanin mano áau fóké auí uran biyon mano ven arantan aránaópá bakan tiyan mikan mifo sirantan kan orun kádan (12) ofu kayo fóké kin kamamosí ukharen mino.

2 *Mai nanin mano amúbasí ukharen iyampon kaono van inamun nan iniyáken bá den mino.

3 *Máan tiyain má inarurá ena avúavá afokái oné uno. Mana kákan nararé drakoni ano yan manápá ifo afápá kan un kádan ánon bakan tiyan mikan biri e un-akhan minó ánontá kin kamamó ukharen mino. 4 *Mai drakoni ano kanú manáú pintan ma ofu kayo yaimádan baré ein pintena mana masiman ame fóké do ankan karúdan ma varará eraven mino. Mai ma inamun nan iniyaré ein nanin mano iyampon kaintí aruré kakhaseno van aufá mantakharen mino.

5 *Mai nanin mano afon iyampon kaúdan ínaimpá mai iyampon mano aeni fóké uvantein ayonta fákaren minó bara fintena nanin bantará dafisin nain bakan mai drakoni ayan pintena yo yafen Tiyarafenui kin karáká mun kaen mino.

6 Máan turákan mana tauseri ifo tu antareti vá sikisti (1,260) yamú o vantin dafiseno van ma Tiyarafenu ano kámá barafá útaan kaúantan baré eipá mai nanin mano karan oren mino. 7 *Máan turákan inarufá kákan aruvin afoká in Maikori ano vei enisori kayo vá kábin inká

* 11:14: Rev 9:12 * 11:14: Mai kaní ma in uman maen 9:13-21 fin tikhen mino. * 11:15: Eks 15:18; Íbo 10:16; Dan 2:44; 7:14 * 11:18: Íbo 110:5; 115:13; Rom 2:5; Rev 20:11-13 * 11:19: Ibu 9:4; Rev 8:5; 15:5; 16:21 * 12:: Drakoni e ma siyain mai kákan púpúku an dakhein osafáe ma ayan má bain mino. Banasi ano véin nan peré iyan mino. * 12:2: Mai 4:10 * 12:3: Dan 7:7 * 12:4: Dan 8:10 * 12:5: Íbo 2:9; Ais 7:14; 66:7; Rev 19:15 * 12:7: Yut 9

mai drakoni ano vei enisori kayo vá kábin uven kákan aruvirien mino. ⁸ Mai aruvin manon drakonii kéká ma inarufá baré ein pintena Maikorini kéká ano aren taven mino. ⁹ *Mai drakoni van ma Ban Anon ne siyákan peyanté osafáe ma váken barará nanin banta mákasiyan baré ein má bei enisori kayo vái kharúdan ma varará eren mino.

¹⁰ *Máan turá inékun mana oova ano inaru fáké máa semí, “Banasi ma evaránen avirano van ma aní ukharé ein banta ano inka vanasi evaránen avíden béimpin ákona vákan Tiyarafenui yafisimpin dafisen mino. Mai fara vara seyo, Tiyarafenu avorá ma inuran má bayan má ma seti siyofi sífá tiváeyan auvin kuráden baya siyáken betíi avúavá ma yaimiyaré ein banta inka yauman karúdan ma varará eren mino. ¹¹ Sipisipi Ararái nare vá pura vava vá pói Maikorini kéká ano mai ma auvin kuráden baya siyaré ein banta maman bararasí uren betíi furin nan ída feren mino. ¹² *Máan tukhein nará inaru vá maifin ma vaona kayo vá ano amusín ná ono. Máan tukhen mifo vara vá un non ma soe, akhokho vará ono. Mai fara vara seyo, Ban Anon mano afová iyáken tító máarái yoranté uno siren kákan aran naná bá erakhen mino.”

¹³ Mai drakoni ano onákan béin barará do siantiyaimpin mai ma afon iyampon kaein nanin dakhafen mino. ¹⁴ *Dakhádan oriyan maen kákan tumpán aayan amiren tiantan mai ma kanú manaú orana ifo yan manápá ifo afápá mana un kádan biyontá (3-½ orana) ma kámá barafá o vantín ma ventá dafisino siren ma útaan kaúantan baré eipá ámaren oren mino.

¹⁵ Máan tiyain má drakoni ano nompó mai nanin ufurono van oo safédan mai finté kákan non taven mino. ¹⁶ Máan tikan maen bara ano mai nanin ayaen oo safédan drakoni oo fenté ma khuvein non

mano varafin orun peren mino. ¹⁷ *Máan tikan drakoni ano mai nanin nan kákan arananá baren mino. Arananá máden mai nanin akhafana ma Tiyarafenui man baya ánain bákuriyan ben oo yayiyáken inká Yisasini kama vava ma sian dákó iyain kéká bá aruvin araíen mino.

Afá Tafúna Ma Un Non Pinté E Unen Édein Baya Ino

¹⁸ Máan turen un non akhempá o mantakhen ave en mino.

13

¹ *Máan tukhá ma oniyaruna vá mana afá tafúna ano un non pinté e unen éden mino. Mai safúna maen dan manápá ifo afápá kan un kádan ánon bakan inká tiyan mikan biri e unakheintá tiyan mikan kin kamamó uran bakan ánon kayorá Tiyarafenuun ma ankayan tikhein bí kayo uvantaren mino. ² *Mai safúna ano repeti* an dakharen mifo ven arantan mano bea* arantan an dakhán inka oo ano raioni* oo ma einíi ukharen mino. Máan tukhan mai drakoni ano vei ákona vá kin kará bá dafisin ákona vá amen mino.

³ *Mai safúna ma onékun maen béin ánon kayo fintena mana ánon aruran bakan ída kanaíen unirá ukharen mino. Máan tukharen mifo mai namon ma evaránen uniyain má barará nanin banta ano sakha iyáken mai afá tafúna oo yayien béin ánain bákuren mino. ⁴ Drakoni ano ma afá tafúna mai ákona amikhein nan banasi ano amusín iyáken béintá monó tiyan inká mai safúna vá dere monó tiantiyain amusín en temí, “Iye anó béin an dakhe fono. Iye anó kanaíeya véin má aruvinte fono.”

⁵ *Máa siren mai safúna áikan Tiyarafenu oyampá baya siyáken ma fotitu (42) viyontá ma vei anunurá minó avúavá baran nain ákona amen mino. ⁶ Máan turákan béi Tiyarafenu oyampá baya siyáken ben aví bá inká ben má ma

* **12:9:** Esé 3:1, 14; Ruk 10:18; 22:31; Rev 20:2 * **12:10:** Yop 1:9-11; Sek 3:1 * **12:12:** Ais 44:23; 49:13 * **12:14:** Dan 7:25; 12:7 * **12:17:** Rev 11:7 * **13:1:** Rev 12:3; 17:3, 7-12 * **13:2:** Dan 7:4-6 * **13:2:** Repeti e ma siyain mai kákan pusi an dakhein tafúna ino. Mai ano kasaan banta aruren kakha sinten mino. * **13:2:** Bea e ma siyain mai iyan an dakhein kákan tafúna ino. Béin ayan arantan kákan bakan ayafó báta uron ukhein mino. Mai ano kasaan banta aruren kakha sinten mino. * **13:2:** Raioni e ma siyain mai kákan ayo ana fusi an dakhein tafúna ino. Béin aveantun an báta ukhan kasaan minó daná kakhasé iyan mino. Banasi ano mai van kákantá peré iyan mino. * **13:3:** Rev 17:8 * **13:5:** Dan 7:8, 25; 11:36; Rev 11:2

inarufá bain nanin banta vá ankayan ten mino. ⁷* Máan tiyákan Tiyarafenui kantasí ukhein nanin banta ma aren tavin ákona mai safúna amen mino. Amiren minó anan nanin banta vá banasi vá ara ara vaya siyáken ma minó barafá bain nanin bantará ma yafisin ákona vá dere amen mino. ⁸* Amirantin maen mai ma ma vara ída uvanten ma aun baran bompompin ma aví ída uvantaréin nain nanin banta ma váin nain mano mai safúnará monó tinten mino. Mai vompon maen mai ma vanasi ano aruan purein Sipisipi Arará ina ino.

⁹ Átaren ma van nain mano vá inino. ¹⁰* Karavusifin orino ma sikhá in nain kéká ano karavusií intin inká baenati fóké aruan purino ma sikhá inain kéká baenati fóí aruan purinten mino. Máan ma intiya kantasí ma ukhan nona nanin banta ano ída vá akhokho van iyákeya mumunan ná pákaan ákona ono.

Afá Tafuna Ano Ma Vara Finté E Unein Baya Ino

¹¹ Maa sirá ma onékun bara finté ena afá tafúna e unen édákan ánon pinté Sipisipi Ararái virí kan ma e uneiní ukhan mifo veni vaya ano drakoni ma vaya seinien mino. ¹² Mai safúna ano esé ma non pinté erikhá ein tafúnai ákona mamaren maen minó nanin banta yuvun íkan mai ma arukháin ma namon unein tafúnará monó ten mino. ¹³* Máan tiyáken moéken enará ukhein aní danasinta uvaren dararen iyan ira van dere síkan inaru fáké minó nanin banta avorá barará eriyen onen mino. ¹⁴ Enará ukhein aní danasinta ma uvaren dararen in ákona Tiyarafenu ano amiran maen mai ma esé e unein tafúna avíká barará nanin banta mákáden tikan mai ma vaenatifó aruran ma fúkaren evaránen e mantein tafúnai aman manon uvaren mino. ¹⁵ Máan turan mai ma uvamá dein tafúna aman manon ma aunan amintin baya sinti ma véintá ída monó tin nain nanin banta ma aruan purin nain ákona Tiyarafenu ano amen mino. ¹⁶* Amiran minó aví bain má ída aví bain má inká ona vain má ida ona vain má inká miyan ída van doran banta vá para ma van banta

vá ano mana aní daná ayan kurompáke yámanta safi ayafenta safi kaino van duvun en mino. ¹⁷ Mai aní dana ma ída van nain kéká ano ída kanaien ena finte miyanien nafi inká sarii safi en inten mino. Mai aní daná maen esé ma e unein tafúna aví vakan mai nampá ano ven aví aní ukhen mino.

¹⁸ Máan tukhein nan mi kama ineine vá afova vá ma van nain kéká ano vá mai afá tafúnai nampá daíden beni ana vaya afová ino. Mai fara vara seyo, mai nampá maen mana vanta inan bakan mai nampa maen kanú manaú sikhisi (666) ino.

14

Sipisipi Arará Bá Mana Antareti Ifo Foti Fo Tauseni (144,000) Nanin Banta Vái Vaya Ino

¹ Maa sirá onékun Sipisipi Arará ano Saioní anuyontá mantakhan mana antareti ifo foti fo sauseni (144,000) nanin banta ma ven aví bá be Afóen aví bá ma ayafentá uvantein kéká ano véin má baren mino. ²* Máan tukhá inékun inaru fáké non iya ma kausiyan avaya seiní iyan inká aafa ma kákantá kankaré teinien mino. Mai ma kita asin banta kayo ano ma manafin asiyan avaya ereiní iyá iné uno. ³* Mai kayo ano kin kará aufá mantakhen kamí kamí tafúnaren daná ma aunan bain má tuenti-fo (24) ánon enisori kayo vá avorá mana auyen í diyaren mino. Mai íi ana ída ena kéká ano afová en mifo mai ma mana antareti ifo foti fo suseni (144,000) nanin banta ma ma vara ráke miyaní uren avíkaré ein kayo ano anan afová en mino. ⁴ Mai kéká ano ída anasi arinta vá bariyáken maen pura sen avusese ukhen mi Sipisipi Arará ma oreipá bákuren noren mino. Barará nanin banta fintena esé ma kharaein dunan ma Tiyarafenu vá Sipisipi Arará bá ma íkun uan amein an dakhein kéká ino. ⁵ Mai kayo oo fenté ida mana kampun baya sikhein bakan pura sen betíi aau ída van kéká ino.

Kanú Manaú Enisori Vaya Ino

⁶ Maa sirá onékun mana enisori ano ayompin ámaren entaviyáken ma varará ma

* **13:7:** Rev 11:7 * **13:8:** Íbo 69:28; Rev 17:8; 20:12, 15; 21:27 * **13:10:** Yer 15:2; 43:11; Rev 14:12 * **13:13:** 1Ki 18:24-39; Mat 24:24; Rev 19:20 * **13:16:** Rev 14:9-11; 16:2; 20:4 * **14:2:** Rev 1:15; 19:6 * **14:3:** Ais 42:10; Rev 5:9; 7:4

minó akhempá mana mana anan nanin banta ma váken ara ara vaya siyaimpin kama vaya ma fara van oriyan bain tian dákóen mino. ⁷ Mai enisori ano oovararen temí, “Tiyarafenu van periyáke véin mana vá kákan bí ameno. Mai fara vara seyo, véi ma vanasi yaimin nain damú inka yákó en mifo mai ma inaru vá bara vá un non má titó non kayo vá ma uvarein Tiyarafenu ana vá monó teno.”

⁸ *Máa siran inká kaní ma ukhá ein enisori ano ayompin mai ánain eriyáken oovararen temí, “Aví ma varé ein baru Babironi inka varáken asuse en mino. Mai fara va ino. Mai kákan baruí famúku avúavá anon banasi e yarifádan beni avúavá bariyáken óen non ma neini iyaré in mi Tiyarafenui aran naná anon máan ten mino.”

⁹ *Máa sirákan kanú manausí ma ukhá ein enisori ano mai ma esé erein enisori kanan ánain eriyáken avádóden oovararen temí, “Inte nanin banta anó afá tafúna vá beni aman manontá bá monó tiyáken ná beni aní daná ayafenta safi ayanta safi mantaré inten nafi ¹⁰ *mai kéká anon Tiyarafenui aran naná ma vain kápifin ma ída ena non má ópé ukhan íta iyain mi nanten mino. Narantin maen Sipisipi Arará bá inká kantasí ma ukhein enisori kayo avorá báí mai kéká sarafa onámaná ma ira khiyain póké akhiyantín berai siyan banten mino. ¹¹ *Máan tiyantín mai ma akhiyan nain íkun mano édaviyan para van oriyan banten mino. Mai fara vara seyo, safúna vá beni aman manontá bá ma monó tiantiyáken ma ven aví ma mantaréin nain kéká anon ena ena vayan má inuran má ída kusen avíken banten mino.” ¹² *Mai ma kantasí ukhein Tiyarafenui man baya vákuriyáken Yisasintá mumunan iyan ma ara ara uman bariyain nanin banta vá ará kusin masá mantaan ákona ino.

¹³ Máa sirá inékun mana oova ano inaru fáké temí, “Ma vaya vompompín uvarano. ‘Tare ráké ma Bafan avíká purin nain mano vá amusín ino.’ ”

Mai van Aunan mano furan tino siren máa semí, “Mai kéká ano ma uman pinté doriyá ein nan avíkan baranten mino. Mai fara vara seyo, vetí ankan ma kama avúavá bariyaré ein manon betin ánain bákurinten mino.”

Ma Vara Ráke Nanin Banta Ma E Avían Átaru Inain Baya Ino

¹⁴ *Máa sirá mo oniyaruna vá mana efanten konan bákan mai yaró mana vanta aninten mano kumantaren mino. Ben ánontá korifó uvantein kin kamamó bákan inká davénakhan an iyain tópe ven ayampin baren mino.

¹⁵ Máan tiyain má ena enisori ano kákan monó namun pinté e khuven eriyáken mai ma konan daró kumantaré ein banta oovararen tiamemí, “Davénakhein tópe eina mamare yunan duyaseno. Mai fara vara seyo, varará inka yunan karakhan mai yunan ma yuyasin damú inka afoká en mino.” ¹⁶ Máa síkan mai ma konan daró kumantaré ein banta ano vei yavénakhein tópe mamaren ma vara amaniná karúdan mai ma karakhá ein dunan duyasen mino.

¹⁷ Máan turan inká ena enisori ano inarufá ma vain kákan monó namun pinté e khuven eriyákan ben ayampin má dere yavénakhen an iyain tópe varen mino.

¹⁸ *Inká mai oyampáké ma vara ma ira saman kaurin ákona ma amikhein enisori ano arata ma vaipáké e unen eriyáken mai ma an ukhan davénakhein tópe ma fákakhá ein enisori oovararen tiamemí, “Ei sópe mamareya vá barará ma uvaini anan táké aran intaré ein mai inka afu khakhen mifo vá tíkano.” ¹⁹ Máa síkan mai enisori ano vei yavénakhein tópe maman barará karúdaren afu ma khakharé ein uvaini aran máa tíkaan Tiyarafenui aran naná ano ma uvaini aran dasamiyaimpin karúdan oren mino. ²⁰ *Máan turen kákan baru akhempá mai uvaini yasamiyan mai finté nare non mano kanú maná antareti (300) kiromitará oriyákan mai nare ano orun manen dan manápá fitirá óden mino.* Mai ma orun manen édein mai

* **14:8:** Ais 21:9; Yer 51:7-8; Rev 17:2; 18:2, 3 * **14:9:** Rev 13:12-17 * **14:10:** Esé 19:24; Íbo 75:8; Ais 51:17, 22; Yer 25:15-16; Isi 38:22; Rev 16:19; 20:10 * **14:11:** Ais 34:10 * **14:12:** Rev 13:10 * **14:14:** Dan 7:13 * **14:18:** Yoe 3:13 * **14:20:** Ais 63:3; Rev 19:15 * **14:20:** Kiriki veya finté osin oorá ma aeni kuvé iyaintái mun kanáí ukhen ne ma sikhein mai yan manápá fiti vá manáí ukhen mino.

osin oorá ma aeni kuvé iyainí ukheintái mun kanaíen mino.

15

Mosesin Má Sipisipi Arará Báí Í Ino

¹ Máan turá inarufá onékun maen kákantá enará ukhein daná afoká en mino. Mai yaná maen dan manápá ifo afápá kan un kádan enisori kayo ano yan manápá ifo afápá kan un kádan aí daná bá uman má pákakharen mino. Mai maen Tiyarafenui sipá kípan aran naná ma amin nain mino. ² Máan tukhá onékun mana kamu an dakhein un non má ira vá ano manafiní ukhan mino. Máan tukhan mai ma afá tafúna vá ben aman manon má ma aruvúden esantakhá ein kéká ano mai akhempá mantakhen Tiyarafenu ano ma amein kita kayo asiyaren mino.

³ *Asiyáken Tiyarafenui yoran banta Mosesin má Sipisipi Arará báí í máa sen den mino.

“Minó Ákona Vá Baona Bafan Tiyarafenu oe,
kákantá enará ukhein danasinta éi maman dákó é iya ono.

Ara ara nanin bantai kin mi van nan éin avúavá anon pura sen puntáken mino.

⁴ *Bafan noe, iye anó éin nan ída feranton kákan bí aminten nafino.
Para vara seyo, eyaká anan kantasí ukha ono.

Ara ara vara fáke nanin banta ano e átaru uven éintá anan monó tiantanten mino.

Mai fara vara seyo, eni funtákein avúavá inka maman dákó en mino.”

Dan Manápá Ifo Afápá Kan Un Kádan Dókifin Ma Aí Daná Bá Uman Má Ma Vai Pákena Vaya Ino

⁵ *Máan turá oniyaruna vá inarufá ma Tiyarafenui kákan monó namun bákan ma yavaráefó e auádan ma kantasí ukharé ein karafarani ona yiven mino. ⁶ Mai ma yan manápá ifo afápá kan un kádan enisori kayo ma Tiyarafenui aran naná bain dóki kayo ma fákakhá ein kéká ano mai kákan monó namunté e khuven eren mino. Betí ankan ayá efanten buí dana

en inká kori fóké ma uvantein daná ákorá kuven ukharen mino. ⁷ Máan turen ma e khuven eriyain má mai ma kamí kamí tafúnaren daná ma aunan bain kayo finté mana ano mai ma yan manápá ifo afápá kan un kádan dóki ma korifó uvanteimpin ma ayun para van oriyan ban Tiyarafenui aran naná ma varé ein mamiyan mai enisori kéká mana amirú en mino. ⁸ *Máan turákan Tiyarafenui kakhan má ákona vái íkun mano mai kákan monó namumpin bíken mino. Mana ano ída kanaíen mai namumpin ódikhantin ma yan manápá ifo afápá kan un kádan enisori ano ma uman má aí daná bá bain dóki kayo ma vanasi amaniná banaan kíparantin mi ínaimpáké un peranten mino.

16

Tiyarafenui Yan Manápá Ifo Afápá Kan Un Kádan Aran Daná Banain Nain Baya Ino

¹ Máa sirá inékun mai monó namunté mana oova ano mai máa enisori siamemí, “Aravuveya mai ma yan manápá ifo afápá kan un kádan dóki ma fákakheonafin ma Tiyarafenui aran naná bain bara amaniná bana ono.”

² *Máa síkan eséke enisori ano vei yóki varen mo vara amaniná bana íkan mai ma afá tafúnai aní daná mamaren ma ven aman manontá monó tiyá ein kayo aurá moéken namu ukhein namon kayo inisen ken mino.

³ *Máan tiyain ma kaní ma ukhá ein enisori ano vei yóki varen mo un non ané bana iyain má un non mano furin bantai nare ma einí íkan minó danasinta ma maifin baré ein mano fúan kípen mino.

⁴ Máan tuvin maen kanú manausí ma ukhá ein enisori ano vei yóki varen mo kákan non kayo vá inká tító non kayo vápin banaran maen maman nareíen mino. ⁵ Máan turá inékun mai ma minó non kayorá dafiká ein enisori ano máa semí, “Mai ma fefá bare ma saréa fara vaona oe, éi Kantasí Ukhaona ono. Mai fara vara seyo funtákein avúavákái vanasi yaídeya ma uman amiya ono. ⁶ Mai fara vara seyo, mai nanin banta anon

* 15:3: Eks 15:1; Íbo 139:14; 145:17 * 15:4: Íbo 86:9; Yer 10:6-7 * 15:5: Eks 38:21 * 15:8: 1Ki 8:10-11; 2Kr 5:13-14; Ais 6:4 * 16:2: Eks 9:10; Rev 13:12-17 * 16:3: Eks 7:17-21

eni kantasí ukhein kéká bá sakhanampa vanta kayo vá aruan púdan betíi nare ano varafin eravukharé iyan mai anonafái vetíi nare amen nan niyan mino.” ⁷*Máa sirá inékun arata vain táké mana vaya ano máa semí, “Minó Ákona Vá Baona Bafan Tiyarafenu oe, eni vanasi yaimin avúavá maen pura sen puntáken mino.”

⁸ Máa sirákan áau ano kákanien banasi aá akhano van kamí kamisí ma ukharé ein enisori ano vei yóki varen mo áau fin banaren ákona amen mino. ⁹*Máan turákan kákan aá ken banasi akhiyaimpin Tiyarafenu ano ma mai uman kayo amein nan ben oyampá baya siren ída ará baeren béin aví danien mino.

¹⁰*Máan tiyákan dan manápasí ma ukharé ein enisori ano vei yóki varen mo afá tafúnai kin karáká banarákan beni yafisin aúpin manadá kákan títipaen kumayusí iyain má beni kéká ano aveantuntá inkékípiyáken kákantá berai sen mino. ¹¹ Máan tiyáken betíi namon mano ma aí iyain nan manan inarufá ma vain Ayarafenun oyampá baya sen mifo mai ma namu avúavá bariyaré ein nan ída sirun noe siren ará baeren mino.

¹²*Máan tiyákan dan manápa ifo afápá mana unkádaní ma ukhá ein enisori ano vei yóki varen mo Yufretisi e ma siyain nompin banaran mai non kánen mino. Áau e uní pákena kin kékái aái uantantin kasaen betíi aruvin banta kayo iyanen áau orun perápá orino van mi máan ten mino. ¹³ Máan turá onékun tokhá an dakhein namu aunan kanú manaú ano drakoni vá afá tafúna vá inká kampun sakhanampa vanta vá oo fenté e khuyen eren mino. ¹⁴*Mai aunan kayo maen Ban Anoni enará ukhein daná kayo ma maman dáko in kékái varen mino. Mai kéká ano minó barafá ma vain kin kayo siamintin mai ma Minó Ákona Vá Bain Tiyarafenui yamú ma yákó intin ma ven má aruvin nain danasinta útaan manafin átaru ino van mi oreraen mino.

* **16:7:** Íbo 19:9; Rev 15:3 * **16:9:** Rev 9:20-21 * **16:10:** Eks 10:22; Ais 8:21-22 * **16:12:** Ais 11:15 * **16:14:** Rev 19:19 * **16:15:** Mat 24:43-44; Rev 3:3 * **16:16:** Sek 12:11 * **16:18:** Rev 4:5; 8:5 * **16:19:** Rev 14:10 * **16:20:** Rev 6:14 * **16:21:** Eks 9:23-24; Rev 11:19 * **17:1:** Yer 51:12-13 * **17:2:** Ais 23:17; Yer 51:7; Rev 14:8 * **17:3:** Rev 13:1

¹⁵*“Afovasá ono. Téi maé umoyan banta an davé uimpin mi erenté umpo intéa kéká anó betíi ona uren ban ná auu sapé tikhá inten nafi mai kéká ano vanasi avorá ída avápa oren maen inká ayave van en inten mino.”

¹⁶*Máan turen minó kin kayo o avire e avire uren Iburu veya finté Amákedoni e ma siyain barurá átaru en mino.

¹⁷ Máan tiyákan dan manápa ifo afápá kan unkádaní ma ukhá ein enisori ano vei yóki varen mo uvafin bana iyain má kákan monó namumpin ma kin kará bain pinté mana kákan oova ano máa semí, “Inka kípen mino.” ¹⁸*Máa siyain má pefá ída iyá einien afayuúen aafa kankaré tiyain má ma vara moékentá kayaen mino. ¹⁹*Máan tiyain má mai ma kákan baru Babironi e sin ma varé ein mano kanú manaú pintan kauren orera íkan minó akhempá ma kákan baru kayo varé ein dere vá kauren oreraen mino. Máan tiyákan Tiyarafenu ano Babironí baru ma váken umeí iyá ein nan o varen me iniren mai ma vei aran naná uvaini ma kápifin bíkakhá ein amen mino. ²⁰*Máan tíkan un nompin ma musó kayo varé ein o afeyoran inká anu yon kayo ma varé ein maman avaíen mino. ²¹*Máan tiyan maen inaru fáké kómópa amú kayo eren mino. Beni uman maen fifti (50) kirokaremi vákan mai ano vanasi yasamiyan kákan uman amiyaimpin Tiyarafenu oyampá baya sen oreraen mino.

17

Kákan Pamúku Nanini Vaya Ino

¹*Mai ma yan manápa ifo afápá kan un kádan enisori kayo ano ma yan manápa ifo afápá kan un kádan dóki kayo ma fákakhein pinté mana enisori ano séi varunará eriven temí, “Téin má ere sirá non kayo yaró ma kákan pamúku nanin mano ma kumantein ma uman amin nain aní ékuya onano. ²*Ma vara ráke kin kayo ano mai nanin má pamúku avúavá bariyákan inká mai nanini namu avúavá

ano varará nanin banta maman óen uádan mi óen non ma naren óen einí iyan mino.

³*Máa siren mai enisori ano sen taunan do maman kámá barafá kaí onékun dan manápá ifo afápá kan un kádan ánon bakan tiyan míkan biri e unakhein nararé tafúna ané mana nanin mano kumantaren mino. Tiya rafenun ma oyampá baya sikhein baya kayo mai ma kumantein tafúna au fimpá uvantaren mino. ⁴*Mai nanin mano ara ara nararé pó uvantein buí daná uren bakan ben au fáké kori vá ara ara onámaná kaké ma kanen kanen einí iyaren mino. Kori fóké uvantein kápi véi fákakhan maifin beni namu avúavá bá pamúku avúavái fúta yanasinta vá ano víkakharen mino. ⁵Máan tukhan mai nanin ayafentá ovaeran bayafó ben aví máa sen uvantaren mino. “Kákan baru Babironi maen ma varará ma famúku nanin kayo ma váken púta avúavá bariyain kéká anóe ino.” ⁶*Mai nanin mano Yisasini vaya ma sian dáko iyaré ein mumunan nanin bantai nare narákan mai nare ano véin óen uádan báká ódé takha é uno. ⁷*Máan tékun mai enisori ano sisimemí, “Éi fará takha iya fono. Mai nanini aúpá daná bá dan manápá ifo afápá kan un kádan ánon bakan ma siyan míkan biri e unakhein tafúnai vaya vái ana éin tiamenté uno. ⁸*Mai ma one ona safúna ano fefá baren mi saréa ída vain ínaimpáké ma aron ída van masí pinté ma e unaaren ída kípan uman baranten mino. Ma vara ma araien uvarein táké ma aunan baran dókifin ma aví ída uvantaré inain kayo anon mai ma fúkaré ein tafúna ma aron ída van masí pinté orun baránen ma édan nain nan anú duren takhaen orera inten mino.

⁹“Kama ineine ma van nain manon ma vayai ana vaya afová inten mino. Mai ma yan manápá ifo afápá kan un kádan ánon ma vain mai yan manápá ifo afápá kan un kádan anu yon mi vákan mai varufin mai nanin mano yafíken mino. ¹⁰Dafíken maen dan manápá ifo afápá kan un kádan kin kayoi varu vá deren manten mino. Mai kin kayo finté dan manápá kin kéká ano eraven ankamin mana kin mano

saréa fara van mino. Inká ínaimpáké ena kin ma afoká in nain mano ída ayáká dafisinten mino. ¹¹Mai ma fefá afá tafúna varen ma saréa ída vain mai yan manápá ifo afápá kanú manaú un kádaní ma ukhá ein kin mino. Beni avúavá ano yan manápá ifo afápá kan un kádan kin kayoi avúavá báí manaí ukhein ben má deren uman baren purinten mino. ¹²*Mai ma siyan míkan biri ma e unakha oneona mai siyan míkan kin mano ma ída yafisin ákona mantein mi one ono. Ínaimpáké ma kin karáká kumanin ákona ma mai kin kayo amirantin maen afá tafúna vá manafiní uven asíka afará doranten mino. ¹³Mai kin kayo ano mana inintái yoriyan pasen betíi ákona vá dafisin ákona vái mai afá tafúna aminten mino. ¹⁴Mai kéká ano Sipisipi Arará bá aruvinten mifo véi maen bafan kayoi Bafan báken kin kayoi Kin mi vain pasen betin aruren maman bararasí inten mino. Mai ma veyantá araren aní uran báken ma ven oo yayiyaré ein kéká anon béin má banten mino.”

¹⁵Máa siren mai enisori ano sisimemí, “Mai ma famúku nanin mano kumanta oneona non maen minó akhempá ma váken ara ara vaya siyain nanin banta kayoi aní ukhen mino. ¹⁶*Mai ma siyan míkan biri ma oneona vá afá tafúna vá ano mai famúku nanin oman kaumpan uren maen beni aúí daná dákan karúdarantin avápa vantin ben au vukhafa kankafen naren ira saman kaurinten mino. ¹⁷Mai fara vara seyo, mai avúaváká ten dorano van mi Tiya rafenu ano mai ineine vetin aúká pe khain ban mino. Máan tukhantin pasen mai kin kayo ano sen inen uren betíi yafisin ákona mai safúna amintin maen mai yorará inten mino. Máa ma inain manon Tiya rafenu ma síkhá ein baya mo kanaí inten mino. ¹⁸Mai ma oneona nanin maen mai ma kákan baru váken ma vara rákena kin kayorá ma yafikein mino.”

18

Babironí Baru Ma Eraven Ankamein Baya Ino

* **17:4:** Yer 51:7; Rev 18:16 * **17:6:** Rev 18:24; 19:2
* **17:12:** Dan 7:7, 24 * **17:16:** Rev 18:8

* **17:7:** Rev 13:1 * **17:8:** Dan 12:1; Rev 11:7; 13:7

1 Máan turáká oniyaruna vá ena enisori ano inaru fáké kákan ákona vá eriyákan béin au fáke khakhan mano ma vara fanu siáden mino. 2 *Mai enisori ano avádóden oovararen temí, “Kákan baru ma Babironi varé ein inka eraven ankamen mino. Maifin namu aunan kayo vá pútaen aunka ukhein danasinta ma niyain tumpán kayo vái varuí uvíkan akhokho farí ukhein tafúna kayoi masisíi en mino. 3 Mai fara vara seyo, varará nanin banta ano véin má ma famúkuí iyain avúavá anon óen non ma naren óen einí iyan mino. Inká bara ráke kin kayo vá dere anon mai nanin má pamúkuí iyákan ara ara yaná ma miyaní iyain kéká anon beni namu avúavákái kokhon danasinta máden ona van nanin bantaíen mino.”

4 *Máa sirá inékun ena vaya ano inaru fáké oovararen temí, “Tenti vanasi ma vaona oe, veni ume avúavá manafin bariyare véi ma varan nain uman ayae varan nampo mai finté me ampire kharan ereno.

5 *Mai fara vara seyo, veni ume kayo ano víken inarufá ódíkan Tiya rafenu ano mai nanini namu avúavá daidé uman ameno van inikhen mino. 6 *Ei vanasi ma uman amiyaré ein avúavá kasá asotú ure anona véin uman ameno. Bei kápifin ma ákona non opé uren amiyaré ein nará anona ena kápi vasá uvaman kova ure ameno. 7 *Béi kokhon ona vákan amusin iyáken kamaé bá uno siren ena nanin banta uman amiyaren mifo ovare me iniyáke vá anona véin uman ameno. Mai nanin mano vei inimpin beyan amo sen máa semi, ‘Téi kuinin mi váké kuinini karáká kumanté uno. Téi ída varé nanin baruna ída kanaí é tirunaná bariyá banté uno.’ 8 *Máan ma siyá ein nan mi furin má arunan ná bá arafan má ano maná damú anan béin maman bararasí inten mino. Mai fara vara seyo, minó ákona ma vain Bafan Tiya rafenu anon beni avúavá daíden ira saman kaurinten mino.

9 *‘Máan intin ma vara ráke yafisin kayo ano ma mai nanin má pamúku avúavasí iyáken beni kama yanasintafin ma amusin

iyá ein kéká ano véin ma ira saman kauriyain íkun ma oniyáken ben nan arunan uren ifí daantanten mino. 10 Mai nanin ma ira khen kaurintin ma ai dosen berai sin nain nan mai ma véi má amusin iyá ein kéká ano akhokho van nentá e mantakhen máa sen bá danten mino: ‘Sirun noe, kákan baru ma varé ein Babironi inká namu uron en mino. Tiya rafenu ano veni avúavá daíden mana áaurá anan uman amen mino.’

11 *‘Ma varará ma váken ona miyaní uriyan sarí iyaré ein kayo ano vetin nina yanasinta ma miyaní in kéká ída vantin pasen mai nanin nan arunan uren ifí daantanten mino. 12 *Mai kékái ona maen kori vá siriva vá kama onámaná kayo ma kanen kanen iyain má kama ankaroro kayo vá efanten davaráe kayo vá ino. Inká nararé davaráe kayo vá sirikha yavaráe vá kama auna iyain daa kayo vá ara ara yanasinta ma erofanti aveantumpó ma uvantein kayo vá ino. Inká kákan miyan tákena yaafó ma uvantein danasinta kayo vá bronsi vá aeni vá mampori vái mai nanin mano miyaní iyaren mino. 13 Miyaní in ona kayo ma mai kéká ano ma kain baré ein maen sinamoni vá bin má irafin kaúdan ma íkun uaren kama aunka in pauran má ino. Inká ara ara masamen ma kama aunka iyain má aufá peran uveri ma kama ukhein má uvaini vá orifi anu vá kama faravá bá uviti vá ino. Inká burumakaó bá sipisipi vá osin má osin mano ma yarifiyain kari vá inká miyan ída van doran banta kayo vá banasi vá deren mai nanin mano miyaní uren sarí iyaren mino.

14 ‘Mai ona ma miyaní uren sarí iyaré ein kéká ano máa sinten mino, ‘Ase yunan kayo ma naráke ma ena vá nano van iyaré eona mai inka o afeyoren mino. Inká kákan miyan táke yanasinta ma maman kaúdáke amufí nafí iyaré eona inka sipá orein ída kanaíe mai yanasinta ovaráne varan nono.’

15 *‘Ona ma varen mai nanimpin me sarí uren moní bariyará ein kayo ano

* 18:2: Ais 13:21; 34:11-14; Yer 50:39; Rev 14:8 * 18:4: Ais 48:20; Yer 50:8; 51:6, 45; 2Ko 6:17 * 18:5: Esé 18:20-21; Yer 51:9 * 18:6: Íbo 137:8; Yer 50:15, 29; 2Te 1:6 * 18:7: Ais 47:7-9 * 18:8: Rev 17:16 * 18:9: Isi 26:17; 27:30-35 * 18:11: Isi 27:36 * 18:12: Isi 27:12-13, 22 * 18:15: Isi 27:31, 36

nentá e mantakhen mai nanin mano ma uman bariyan berai siyain nan akhokho van uren ifí daan tiyan máa sinten mino. ¹⁶*Kákan baru Babironi oe, sirunke ono. Éi maen anasi ano ma kama ukhein aúí daná uren ma kori vá ara ara onámaná kayo vá ano ma kanen kanen iyain má kama ankaroro kayo vá ma mai yaró uran ma afi sikhán bainíi ukhare ono. ¹⁷*Máan turákáen nan mana áaurái mai yanasinta ano mo namuen mino.’

“Máan tiyantín maen sipi afóeyan má sipii kapteni kayo vá maifin ma ona varen nóken sarí iyaré ein kéká bá inká sipi kayofin ma yoriyain kéká bá ano nentá e mantanten mino. ¹⁸*E mantaven onantín ma mai varu ira khen kauriyan ma íkun édavintín maen ifí diyán máa sinten mino. ‘Ma varará ena kákan baru máan tukhein baren nafino. Ída ino.’ ¹⁹Mai kéká ano kayó pákaan ánompín kaúden kákan arunaná máden ifí diyáken máa sinten mino. ‘Kákan baru Babironi oe, sirun ke ono. Mai nanin nina yanasinta ano ma kákan sipi afóeyan aya íkan ona vain kékasí iyaré ein mai manádái o afeyoren mino.’

²⁰*“Inaru oe, véi ma furein nará amusín ono. Mumunan nanin banta vá baya varen orin banta kéká bá sakhanampa vanta kayo vá ano amusín ná ono. Tíretí ankan ma uman amiyaré ein anonafái Tiyarafenu ano veni avúavá daíden uman amen mino.’”

²¹*Máa sirákan mana ákona enísori ano kákan onámaná ma uvítí yasamiyain an dakhein mamaren un nompín karúdan araviyákan oovararen temí, “Ma onámaná ma karúdekun aravein an den mi Tiyarafenu ano kákan baru Babironi manan karúdentín tipá o afeyoranten mino.

²²*Mai ma kita fi okhakhan nafi ufen nafi ma asiren í diyaré ein kayo avaya ída enádá inin nono. Ara ara yoran bákan ma mai yorantá afova mantéin mano ma yoriyaré ein kayo ano ída vantín inká uvítí yasamiyan ma avaya siyaré ein má dere ída inin nono. ²³*Oon mano éin ída evaránen kakhaantanten mino. Anasi

ma iman amin banta vá mai nanin má ano ma amusín iyaré ein baya ída uron mi enádá éin pintena ininten mino. Eni ona ma miyaní iyaré ein mai kákan banta kékái váken kampun avúavá póké banasi yo iyanen tavi aipá oriyaré intín pasen mai avúavá afoká inten mino. ²⁴*Béi anon Tiyarafenui kantasí ukhein nanin banta vá sakhanampa vanta kéká bá inká minó akhempá ma vain nanin banta vá aruan puriyaré in mi oman páman en mino.”

19

Babironi Varu Ma Ira Khavin Inarufá Amusin Í Dein Baya Ino

¹ Máan turá iniyaruna vá inaru fáké kokhon nanin banta ano oovararen temí, “Bafan avisá daní ono.

Evaránen ma síviran má kákan bí bá minó ákona vá Tiyarafenu inán bákan béin pintéi afoká ukhen mino.

²*Mai fara vara seyo, fura sen ma funtákein avúavá póké anan Tiyarafenu ano vanasíi avúavá daimé iyan mino.

Ma varará ma kákan pamúku nanin báken ma vei namu avúavá póké banasi máden asuse uren Tiyarafenui yoran nanin banta ma aruan puriyá eipái anona yaíden uman amen mino.”

³ Máa siren evaránen oovarariyan temí, “Tiyarafenui avisá daní ono.

Mai varu ma ira khen kauriyan pintena íkun mano fara ódiyan banten mino.”

⁴ Máa siyákan tuenti-fo (24) ánon enísori kayo vá inká tafúnaren daná ma kamí kamí báken kaya iyain kéká bá ano Tiyarafenu ma vei kin karáká kumantein avorá matimen oovararen temí, “Pura ino. Bafan avisá daní ono.”

⁵ Máa siran mai ma kin kará bain pinté mana vaya ano máa semí, “Beni yoran banta kéká ma aví bain má inká aví ída vain má ma vákeya ven nan periyaona kéká ano vá Tiyarafenu aví daní ono.”

* **18:16:** Rev 17:4 * **18:17:** Ais 23:14; Isi 27:27-29 * **18:18:** Isi 27:32 * **18:20:** Diu 32:43; Ais 44:23; Yer 51:48 * **18:21:** Yer 51:63-64; Isi 26:21 * **18:22:** Ais 24:8; Isi 26:13 * **18:23:** Yer 7:34; 16:9; 25:10 * **18:24:** Yer 51:49; Rev 17:6 * **19:2:** Diu 32:43; Rev 6:10

6 *Máa sirá inékun kokhon nanin banta ano oovararen baya siyain mano non iya ma káusiyan avaya seinien inká aafa ma kankaré teinien iyan temí, “Bafan avisá daní ono.

Mai fara vara seyo, setisi Bafan Tiyarafenu ma Minó Ákona vain manon kinien mino.

7 *Eri tifé í diyá timusin é béin kákan bí ameno.

Mai fara vara seyo, Sipisipi Arará ma anasi iman amin damú inka afoká ukhan mai ma véin baran nain nanin mano veyan útaren ave ukhen mino.

8 Efanten davaráe ma kamaen panu sikhán ma ída mana fain dampakhein mi uren bano siren amikharen mino.”

(Efanten davaráe maen mai ma Tiyarafenu kantasí ukhein nanin banta ano ma funtákein avúavá bariyá ein mi aní ukhen mino.)

9 *Máa siran mairá enisori ano sisimemí, “Ma vaya vompompin uvarano. ‘Mai ma Sipisipi Arará anasi varan omáká ma o kumamen dunan nano van ma arakhein kéká ano vá amusin ino.’” Máa siren evaránen temí, “Ma maen Tiyarafenui fura sikhein baya kayo ino.”

10 *Máa siká béin monó tiantano van arantampin o mátimékun mifo véi semí, “Ída vá máan tonó. Éin má Yisasini vaya ma sian dákó iyain afá aváeyan má ayofiná bá an dakheruna vantan bá umpo Tiyarafenun mana vá monó tiantano. Mai fara vara seyo, Yisasi ma fura vaya sikhein manon banasi ákona amíkan sakhanampa vaya sé iyan mino.”

Efanten Osin Ané Ma Kumantein Bantai Vaya Ino

11 *Máa sirá mo onékun inaru ona yiviyain má mana efanten osin mantakhan mai ané mana vanta kumantaren mino. Mai vanta van mi Tiyarafenui Vaya Ánain Puntáden Dakhafiyán inká Pura Vaya Ana Sin Banta e sen aré iyan mino. Béi maen puntákein avúavápói vanasi yaíden bei namuro vá mo aruvé iyan

mino. 12 *Mai vanta auu fenté ira anafun ma édaveiní iyákan ben ánotá kokhoná kin kamamó baren mino. Ben ayafentá mana ví uvantan maen ída ena ano afová ukhan beyaká anan afová ukharen mino.

13 *Narefin dakharé ein buí danái véi uren bákan ben aví ma vain mai Tiyarafenui Vaya ino. 14 Inaru fáke aruvin banta kayo ano efanten buí daná ana uriyan efanten osin kayo ané kumamen béin ánain bákuren oren mino. 15 *Mai ma esé oriyaré ein banta oo fenté barará nanin banta ma aruan purin nain baenati ano sefá tefá an ukhan e unen erakharen mino. Béi anon aeni ayonta fákaren banasirá ákona yafisirí iyáken Minó Ákona vain Tiyarafenui aran naná ma vaimpin dantin aravúbintin uvaini ma yasameiní inten mino. 16 *Ben arúkantá bá ayá davaráera bá máa sen bompon uvantaren mino. Kin kayoi Kin má bafan kayoi Bafan má ino.

17 *Máa sikhá ma onékun mana enisori ano áaufin mantaven ayompin ma ámaren noin nun kayo oovararen tiamemí, “Tiyarafenui kákan dunan ma samádan bain tasá e átaru ono. 18 Átaru uveya kin kayo vá aruvin banta kayoi yafisin banta kéká bá ákona aruvin banta kayo vá inká osin kayo vá mai osin ané ma kumantá ein kayo vá miyan ída van doran banta vá para ma vain kéká bá inká tító bá kákan banta kayo vái au vukhafa nano.”

19 Máa sirá onékun mai ma efanten osin ané ma kumantein banta vá beni aruvin banta kayo vá aruvono siren afá tafúna vá bara ráke kin kayo vá ano vetíi aruvin banta kayo avían átaru en mino. 20 *Máan tiyaréin maen mai afá tafúna fákiyáken inká kampun sakhanampa vanta kéká ano ma ven aviká enará ukhein daná uvaren dararen iyaréin kayo vá dere fáken mino. Mai avúavá pókéi mákadan banasi ano veni aní daná mamaren béin aman manontá monó tiyaré íkan mikanan para ayun kaya iyan páken sarafa onámaná ano ma ira khiyaimpin mo kharúden mino. 21 Máan turen maen mai ma efanten osin

* 19:6: Rev 14:2 * 19:7: Ais 61:10; Rev 21:2 * 19:9: Mat 22:2 * 19:10: Apo 10:25-26; Rev 22:8-9 * 19:11: Íbo 96:13; Ais 11:4; Rev 1:5; 6:2 * 19:12: Dan 10:6; Rev 1:14; 2:17 * 19:13: Ais 63:1-3; Yon 1:1, 14 * 19:15: Íbo 2:9; Rev 1:16; 14:20 * 19:16: Rev 17:14 * 19:17: Isi 39:17-20 * 19:20: Rev 13:12-17; 20:10

ané kumantaré ein banta oo fenté ma e unen erikhá ein baenati anon afá tafúnai aruvín banta kéká aruan púdan tumpán kayo ano vetin au vukhafa nen mino.

20

Mana Tauseni (1,000) Orana Aúpin Ma Yakó Inain Baya Ino

¹ *Máan turá onékun mana enisori ano inaru fáké eriyáken aron ída van masí kákena khi vá kákan seni anan má pákakharen mino. ² *Ban Anon nan ma drakoni e siyáken peyante kákan osafáe e siyaré ein mai mana tauseni (1,000) oranará bano van seni anampó damuan kaen mino. ³ Máan turen mana tauseni (1,000) oranará báken ída evaránen banasi mákasino van mai enisori ano aron ída van masípin béin karúdan aravuvín mai masí ona munkuan ákonæen mino. Mai máa orana ma esantavintin maen tanáa afarái útúantá dantin banten mino.

⁴ *Máan turá onékun kin kará kayo vákan mairá ma kumantá ein kéká maen banasii avúavá ma yaimin ákona amen mino. Máan tiyákan Yisasini fura vaya vá Tiyarafenui kama vaya vá ma sian dáko ein nan ma anuran tikhá ein kayo vá ina oné uno. Inká afá tafúnara safi veni aman manonta safi ma ída monó tian tiyáken beni aní daná ma ayafenta safi ayanta safi ma ída mantaré ein kéká bá dere oné uno. Mai kayo ano evaránen aunan mamaren mana tauseni (1,000) oranará Yisas Karaisin má dafisiní ukhen baren mino. ⁵ Púkaren ma ída esé orun mantan nain kéká ano mana tauseni (1,000) oranarái masípin para vanten mino. ⁶ *Púkaren ma esé aráien orun mantampin mai Tiyarafenui kantasí ukhein nanin banta anon orun mantanten mifo amusín ná ino. Mai fara vara seyo, inaimpáké ma kan dádasí en evaránen purin ákona ano ída kanaíen betin maman bararasí inten mino. máan tinten mifo mai kéká ano Tiyarafenu vá Yisas Karaisin máí yoran bantaí uven Karaisin má mana tauseni (1,000) oranará dafisiní ukhen banten mino.

Tiyarafenu Ano Ma Ban Anon Maman Bararasí Ein Baya Ino

⁷ Mana tauseni (1,000) orana ma orivintin maen Ban Anon ma karavusii ukhá ein útúantanten mino. ⁸ *Karavusi ma útúantá dantin Kokin má Makokin máí kéká ma minó barafá bain mo mákáden aruvino van avían manafin átaru inten mino. Mai kéká maen un non akhen páke eyu an den ída yankaforen mi vanten mino. ⁹ *Máan turá onékun mai kéká ano minó akhen páké eriaeren Tiyarafenui vanasi vá béi ma anunu iyá ein kákan baru vá me iyaren eúken mino. Máan tikan mifo inaru fáké ira ano á ma yeiníen eraaren mai kéká morun ken kauren mino. ¹⁰ *Máan turan mai ma vanasi mákasiyaré ein Ban Anon páken sarafa onámaná káké ma ira khiyaimpin ma afá tafúna vá kampun sakhanampa vanta vá ma mo kharúdakháeimpin mo karúden mino. Maifin mi vetí ankan bantin inuran má bayan má ira akhen oriyantin berai siyan banten mino.

Púká Ein Kékái Avúavá Ma Sipá Daimin Nain Baya Ino

¹¹ Máan turá oniyaruna vá mana kákan efanten kin kará bakan mai yaró mana vanta kumantaren mino. Mai vanta au fáké ma fanu siyain nan ma vara vá inaru vá ano féden karan orin mifo vetí aúmanin baru ída varen mino. ¹² *Máan tiyáká onékun mai ma aví bain má aví ída vain má ma fúká ein kéká ano Tiyarafenui kin kará avorá o mantavin bompon dóki kayo kavasén oriyan Aunan Baran Dóki yere khavasén mino. Kaváden púkaré ein kéká ano ma fara váken bariyaré ein avúavá mai vompon dókifin uvamádan baré in betí ma variyá ein avúaváká tiyan daimen mino. ¹³ *Un nompin ma fúká ein kéká ampiádan erin maen inká masípin ma masí ukhá ein kéká bá ina ampiádan ere ere uvin betí ankan ma variyaré ein avúaváká ten daimen mino. ¹⁴ Máan turen puren ma noré ein baru maman karúdan kákan ira khiyain masípin oren mino. Mai ma kákan ira khiyain masí ma vain mai

* **20:1:** Rev 9:1 * **20:2:** Esé 3:1; Rev 12:9 * **20:4:** Dan 7:9, 22, 27; 1Ko 6:2; Rev 13:17 * **20:6:** Rev 1:6
 * **20:8:** Isi 38:2, 9, 15-16 * **20:9:** 2Ki 1:10 * **20:10:** Íbo 11:6; Rev 19:20; 21:8 * **20:12:** Dan 7:9-10; Mat 25:31-46; Apo 17:31; 2Ko 5:10; Rev 13:8 * **20:13:** Rom 2:6; 1Pi 1:17; Rev 2:23; 22:12

kan dadasí en ma furin mino. ¹⁵ Máan tukhan maen mai ma Aunan Baran Bompon dókifin ma aví ída varé ein kayon kákan ira khiyain masípin karúdan oren mino.

21

Inaru Fáke Yerusaremi Van Ma Sikhein Baya Ino

¹*Máan turá auyen inaru vá auyen bara vá oné uno. Mai fara vara seyo, feyante inaru vá bara vá e khípan maen inká un non má dere khípen mino. ²*Máan tuví onékun maen auyen Yerusaremi ma kantasí ukhein mano Tiyarafenu vaípáké inaru me ampiren auyen nanin ma imádan be avafu vaípa orein an den ma varará eren mino. ³*Máan tiyá inékun mai ma kin kará bain pinté mana oova ano máa semí, “Tiyarafenui varu ano saréa vei vanasifin orun bain betin má béi vanten mino. Mai kéká ano veni vanasíí intin béi ano vetíí Ayarafenui inten mino. ⁴*Máan tuven maen betin auufente minó ánu yo arúdantin purin nafi arunana safi ifídan nafi aí dana safi ída vanten mino. Mai fara vara seyo, feyante avúavá ano ma uman amiyá ein mano inka e khípen mino.”

⁵*Mai ma kin karáká kumantá ein mano máa semí, “Minó danasinta maman auyení iyá uno.” Siren temí, “Ma vaya maen pura sen puntakein baya ifo vompon dókifin ná uvarano.”

⁶*Máa siren evaránen temí, “Mai inka khípen mino. Téi maé Araíin má Kípan má uno. Non nan ma aiyain kayo mai ída miyan bantíí aunan baran non ma eraviyain pintena sékun para nanten mino.

⁷*Intéa nanin banta anó ara ara uman esantanten nafi mai kéká anon mai ma útaan kaékun bain danasinta mamaren ten tikhafanaí intíí séi vetíí Ayarafenui onté uno. ⁸*Máan tinten mifo mai yanasinta van ma féden téin oyan timin nain kéká bá ída ma mumunan in kéká bá minó daná ma máden asuse in kéká bá banta ma aruan purin kéká bá pamúku avúavá

ma varan kéká bá uvátakhan ma in kéká bá ayampó uvaran danáká ma monó tin kéká bá kampun baya ma sin kéká báí varun mai ma sarafá onámaná káké ma ira khiyain ban mino. Mai kan dadasí en ma furin nain mino.”

⁹Mai ma yan manápá ifo afápá kan un kádan enisori kayo ano ma Tiyarafenui kípan aran naná ma víkhakhein dóki kayo ma fákakhá ein pinté mana ano eriven temí, “Ten má eresirá mai ma Sipisipi Arará ma varan nain nanin aní ékuyá onano.”

¹⁰*Máa siren mai enisori ano séin tau-nan do maman kákantá dan bain anuyontá mo khaúden kantasí ukhein baru auyen Yerusaremi ma Tiyarafenui vaípáké ma inaru me ampiren eriyain anien mino.

¹¹*Tiyarafenui kakhan mano mai varufin bíkavin mai khakhan mano kákan miyantá ma vain yaspa onámaná káké ma kanen kanen einí iyaren mino. ¹²*Mai varui kafi yan bákan tiyan míkan mifo sirantan kan orun kádan (12) ona van mai ona kayorá mana mana enisori ano yafídú ukharen mino. Máan tukhan mai ona kayorá tiyan míkan mifo sirantan kan orun kádan (12) anan banta ma Isareri kékápin bain aví uvantaren mino. ¹³Mai ona kayo ma varé ein maen áau ma e unípá kanú manaú ona vákan inká notifá kanú manaú bákan sautifá kanú manaú bákan inká áau ma orun perápá kanú manaú baren mino. ¹⁴Tiyan míkan mifo sirantan kan orun kádan (12) onámaná darói mai varui kafi uvantaren mino. Máan tukhan maen Sipisipi Ararái sirantan kan orun kádan (12) eyo iyampon kayo avíí mana mana onámanáká uvádú ukharen mino.

¹⁵*Mai ma sen má baya sein enisori ano mai varu vá kafi vá inká ona kayo vá ma avamáan onan danká kori fóké uvantein pákakharen mino. ¹⁶Mai varu avamáden onákan kamí kamí akhen ban maen beni ayá bá asíka vá ano kan tauseni ifo kan antareti (2,200) kiro mitan baren mino. ¹⁷Mai varui kafi ma amákó uren uvantá ein ma avamáan onein mai sikisti faif (65)

* **21:1:** Ais 65:17; 2Pi 3:13 * **21:2:** Ais 52:1; 61:10; Ibu 11:16; 12:22; Rev 3:12 * **21:3:** Riv 26:11-12; Isi 37:27; Sek 2:10; 2Ko 6:16 * **21:4:** Ais 35:10; 65:19; Rev 7:17 * **21:5:** 2Ko 5:17 * **21:6:** Ais 55:1; Yer 2:13; Yon 7:37; Rev 1:8, 17; 22:17 * **21:7:** 2Sa 7:14; 1Kr 17:13; Íbo 89:26-27 * **21:8:** Mat 25:41; Rev 20:15; 22:15 * **21:10:** Isi 40:2 * **21:11:** Ais 60:1-2, 19 * **21:12:** Isi 48:30-35 * **21:15:** Isi 40:3; Rev 11:1

mita ino. Banta ano ma avamáan oniyain avúavákái sen enisori ano avamáan onen mino. ¹⁸ *Mai varui kafi maen yaspa onámaná póké uvaren inká mai varufin ma vain danasinta korifó uvaren urákan mai ráké kamu an dakharen mino. ¹⁹ Mai ma sirantan kan orun kádan (12) onámaná daró ma mai varui kafi uvádan bakan ma kákan miyantá bain onámaná kayofó ma auí ukharé ein mai máan mi ukhen mino. Esé arái in bafan ma yaféká ein mai yaspa e ma siyain onámaná bakan mairá kaní ma ukhá ein safaia vákan inká kanú manausí ma ukhá ein akhétí vákan inká kamí kamisí ma ukhá ein mai emarari ino. ²⁰ Inká dan manápasí ma ukhá ein sadonikisi vákan inká dan manápá ifo afápá mana un kádaní ma ukhá ein kaneriani vákan inká dan manápá ifo afápá kan un kádaní ma ukhá ein krisoraiti vákan inká dan manápá ifo afápá kanú manaú un kádaní ma ukhá ein mai beriri ino. Inká dan manápá ifo afápá kamí kamí un kádaní ma ukhá ein topasi vákan inká tiyan míkaní ma ukhá ein krisopresi vákan inká tiyan míkan mifo sirantan mana orun kádaní (11th) ma ukhá ein yasinti vákan inka siyan míkan mifo sirantan kan orun kádaní (12th) ma ukhá ein ametisiti vákan ukharen mino.

²¹ Mai ma sirantan kan orun kádan (12) ona ma varé ein mai kákan miyantá ma vain ankaroro fói mana mana ona uvádú ukhan inká mai varui kákan aa maen kori fóké anan uvantan kamu an dakharen mino.

²² Mai varufin ída kákan monó namun bá oné uno. Mai fara va ino. Minó Ákona ma vain Bafan Tiyarafenu vá Sipisipi Arará bá anon mai varui kákan monó namun ban mino. ²³ *Mai varufin áau vá biyon má ano ída kakhaan té iyan mino. Mai fara va ino. Tiyarafenui kakhan manon panu sian tiyan mi Sipisipi Arará anon oon uruanté iyan mino. ²⁴ *Ara ara vara fáke nanin banta ano mai kakhan aúpin nontin maen bara ráke yafisin kayo ano maifin eriven betíi kákan bí aminten mino. ²⁵ *Mai varufin ída yunin bakan pasen mi inúpasí ma íkan ída ona munké

iyán mino. ²⁶ Minó bara fáke nanin banta ano kama yanasinta vá kákan bí bá baren mai varufin ódinten mino. ²⁷ *Mai varufin maen ída mana namu avúavá bá ayampó uvaran danáká ma monó tin avúavá bá ayave avúavá ma variyá ein kéká bá kam-pun ma siyá ein kéká bá ano ódinten mino. Máan tinten mifo Sipisipi Ararái aunan baran bompopin ma aví uvantan nain kéká ano anan ódinten mino.

22

Aunan Ma Amiyain Noni Vaya Ino

¹ *Máan tiyákan mai enisori ano Tiyarafenu vá Sipisipi Arará bá kin kará pinté ma avusese ukhen aunan amiyain non mano ma kamu an dakhen oriyain anien mino. ² *Mai non mano varu aúbaná ma kákan aa vaimpin eraviyákan tefátefé akhentá maen mana aunan amin daa ampanten mai ano sirantan kan orun kádan (12) dádái mana oranafin aran iré iyan mino. Mana mana viyontái aran iriyan mai yaa ana fókéi ayofan danasí uren barará nanin banta ayofé iyan mino.

³ Aufon ma in avúavá mai varufin ída vanten mino. Mai fara va ino. Tiyarafenu vá Sipisipi Arará bá kin kará mai varufin bantín pasen beni yoran nanin banta ano véintá anan monó tinten mino. ⁴ *Máan tiyákan mai kéká ano ven auná oniyantin maen be aví mai nanin banta ayafentá uvaranten mino. ⁵ *Máan turantin mai varufin ída yunin bantín oon má áau vá ano ída kakhaantanten mino. Mai fara va ino. Bafan Tiyarafenu ano kakhaan tiyantín mai nanin banta ano kiní ukhen ayun para van oriyan banten mino.

⁶ *Máa siren mai enisori ano sisimemí, “Ma vaya funtákein mi váká banasi ano iniren pura ino sino van muno. Inaimpá dákó inain danasinta van ma Bafan Tiyarafenu ano vei sakhanampa vanta kayo siamíká ein bayan bei enisori siantan ein morun tiamiyan mino.”

Yisasi Ma Erin Nain Baya Ino

* **21:18:** Ais 54:11-12 * **21:23:** Ais 60:19-20; Rev 22:5 Ais 52:1; Isi 44:9; 1Ko 6:9-10 * **22:1:** Isi 47:1 * **22:2:** Rev 3:12 * **22:5:** Dan 7:18, 27; Rev 5:10; 20:6; 21:23, 25

* **21:24:** Ais 60:3, 5 * **21:25:** Ais 60:11 * **21:27:** Esé 2:9; Isi 47:12; Yoe 3:18; Sek 14:8 * **22:4:** Mat 5:8; * **22:6:** Rev 1:1 * **22:7:** Rev 1:3

7 **“Afovasá ono. Ainé téi erenté uno. Ma vompompin ma uvantein sakhanampa vaya ma iniren bákuriyá ein kékasá amusin ino.”*

8 **Téi Yoni anon mai yanasinta oniyáké mai vaya iné uno. Mai vaya iniré maé mai enisori arantampin o mátimé béintá monó teno van é uno. 9 Máan tékun mifo véi semí, “Ída vá máan tonó. Téi maé ein má sakhanampa vanta kayo ma afá aváeyan bain má inká ma vompon pinte vaya oo yaiyen ma mai vaya vákuriyain kéká báí mana yoran bantan bá umpo Tiyarafenun aví ana vá daní iyáke ventá ana vá monó teno.”**

10 *Máa siren tisimemí, “Ma sakhanampa vaya ma vompompin uvareona mai ída vá damuan ákona ono. Mai fara vara seyo, yamú inka ádesí ukhen mino. 11 *Máan tukhein nará namu avúavá ma inain áesin na mai avúavá baren oriyan bano. Pain avúavá ma inain áesin ná mai avúavá baren oriyan bano. Inka puntákein avúavá ma varan nain áesin ná mai avúavá baren oriyan bano. Inka kantasí ukhen ban avúavá ma varan nain áesin ná kantasí ukhen ban oriyan bano.”*

12 **“Afovasá ono. Téi ainéi erenté uno. Téi ma erenuna mai miyan mái mamare erivé maé mai ma varará nanin banta ano ma variyá inain avúavákái siyá miyan amídú onté uno. 13 *Téi maé Arfa vá Omekha vá báké Araín má Kípan má uno.*

14 **“Bei aúí daná ma sesé uren bain kayo vá amusin ino. Mai kéká san mi kana ino sintin mi aunan baran daa aran niyáken kákan barui ona finté ódinten mino. 15 Mai varu akhempá mai iyan kayo an den*

ma uvátakhan iyá ein kéká bá pamúku nanin banta vá banta aruan purin kéká bá ayampó ma uvaran danáká ma monosí iyá ein kéká bá inká kampun baya ma e sian more mere iyá ein kayo vái vanten mino.

16 **“Téi Yisasi anon ma vaya siamino van tesi enisori siantékun mi mumunan nanin banta vaipá oren mino. Téi maé Devitini Ampamin Anan* bákéi séi anon beni kin kará baranté uno. Inká téi mae Ákurá Ma Fanu Siyain Ofu uno.”*

17 **Kantá Aunan má Tiyarafenui vanasi* vá ano siyáken, “Ereno.” Máa siyantín ma vaya ma inin nain mano vá ereno sino. Máa siyantín ma non nan ai nain mano vá eriven nano. Non ma nano van in nain áesin eriven ná aunan bain non ma Tiyarafenu ano fara amusin amiyain ná nano. 18 *Ma vompon dókifin ma sakhanampa vaya vain ma inin nain kéká amaniná ma ákona vayafó amaan té uno. Mana vanta ano ma ena vaya maman ma ma vompontá asotú intin maen ma vompompin ma Tiyarafenui aran nana san ma sikhein Tiyarafenu ano maman mai vanta amaniná kainten mino. 19 Inká mana vanta ano ma ma vompon pintena mana vaya yo varantin maen aunan amin daa aran ma véin iyáantan bain Tiyarafenu ano yo mádantin maen mai ma kantasí ukhein baru van ma ma vompon dóki ano sikheimpin ída ódinten mino.*

20 **Ma vaya kayo ma sian dáko ein banta ano máa semí, “Eyo, séi ainé erenté uno.”*

Pura ino. Bafan Yisasi ereno.

21 *Bafan Yisas Karaisini sarisari ano vá Tiyarafenui vanasi vá bano.**

* **22:8:** Rev 19:10 * **22:9:** Rev 19:9 fin ná onano. * **22:11:** Dan 12:10 * **22:12:** Ais 40:10; Yer 17:10; Rev 2:23 * **22:13:** Ais 44:6; Rev 1:8, 17; 21:6 * **22:14:** Esé 2:9; 3:22 * **22:16:** Nam 24:17; Ais 11:1, 10; Rom 1:3; Rev 2:28; 5:5 * **22:16:** Devitini Ampamin Ana uno ma siyain baya mai Yisasi fefá bakan inaimpái Deviti afoká ukhan mino. * **22:17:** Ais 55:1; Rev 21:6 * **22:17:** Tiyarafenui vanasi van ma siyain mai Kiriki vaya finté banta ma iman amikhein arinta van mi siyan mino. Mai vanta maen Yisasi ino. * **22:18:** Diu 4:2; 12:32 * **22:20:** Mat 24:30-31; 1Ko 16:22 * **22:21:** Manáa Kiriki vompon akhempá ma vaya asotú ukhen mino: Pura ino.